

DS
754
.K8
v.11

皇朝經世文續編卷四十目錄

戶政十七 漕運上

折南漕議

漕糧開屯議

籌畫漕務疏

嚴禁旗丁凋難示

復吳仲宣漕帥

江省新漕仍難改徵本色疏


會議海運交米疏

漕項無從劃撥海運難以議分

借黃濟運徒耗經費擬請暫行海運疏

籌抵海運經費疏

籌備運道以利漕行疏



李祖陶

林則徐

賀長齡

曾國藩

沈葆楨

曾國藩

沈葆楨

沈葆楨

馬新貽

吳元炳

官剝船戶苦累仍請照前貼給疏

李鴻章

奏為

奏為

奏為

奏為

奏為

奏為

奏為

奏為

奏為

奏為

奏為

奏為

奏為

奏為

奏為

奏為

奏為

奏為

奏為

奏為

奏為

奏為

奏為



皇朝經世文續編卷四十

上海葛士濬子源輯

戶政十七

漕運上

折南漕議

馮桂芬

禹貢百里賦納總二百里納銓三百里納秸服四百里粟五百里米此古聖人轉輸之法也宋人詩有云自古有良法一州食一州誠哉是言蓋不聞仰給於數千里之外而無百一之閒阻者然則求裕京倉莫若興西北稻田而稻田非可計年奏績也惟有於天津通州京倉三處招商販運米麥雜糧而令東南諸省折解銀兩俟有成效並停東豫糧運最爲簡法京倉支用以甲米爲大宗官俸特十之一耳八旗兵丁不慣食米往往由牛錄章京領米易錢折給兵丁買雜糧充食每石京錢若干合銀一兩有奇相沿既久習而安之咸豐九年有以某牛錄扣米勒折控部者以歷年已然各旗皆然某牛錄得從蒞譴惟官俸亦然三品以上多親領其餘領票輒賣給米鋪石亦一兩有奇赴倉親領者百不得一然則南漕自耕穫徵呼駁運經時累月數千里竭多少脂膏招多少蝨蠹冒多少艱難險阻僅而得達京倉者其歸宿爲每石易銀一兩之用此可爲長太息者也且也嘉慶中協辦大學士劉權之疏有云南漕每石費銀十八金

不曰二十金而曰十八金必確有所見魏氏源駁之謂止四金其說甚謬

魏氏云每船受米六百石幫費洋千元不過每石一兩有奇不

知六百石內交倉正耗米僅四百餘石六百石幫費皆應在四百石內通攤魏氏誤會一謬也彼時松白糧幫費有多至貳千六七百元者魏氏不知二謬也又云漕項連行月銀米每石一兩攷行月等一切米

價幾及一兩銀尙在外魏氏誤

以今計之浮收

幫費或海運經費皆在內

漕項也

給丁苦蓋各費在內

漕項之浮收也給丁耗米

行月米五米貼運米給還米等也繕軍田租也漕河工費也漕督糧道以下員弁兵丁公私費用也雖不

能得其確數大約去劉說不遠乃其歸宿爲每石易銀一兩之用此又可爲長太息者也則何如援照成

案每石折銀一兩肆錢解京發餉直截了當有增無減兵心必大喜惟是領折買食可以相安者仍以歲

有南糧二百餘萬石流通市中之故若市中驟少此二百萬石實米則一切雜糧騰貴兵丁領折之後何

從買食計二百萬石可食六七十萬人是六七十萬人無所得食矣此宜爲之地者也今議京通天津三

處招商運糧宜於免門關稅外援糧船帶免他稅之例定爲運糧若干石準免他稅若干著爲令仍以時

查報糧數務合近年南漕糙白米之數不足則設法招徠或用鹽務倡導故事以足之諺云價高招遠客

都門百貨所集卽川滇閩廣之產尙可咄嗟立辦一旦南糧不來米價貴卽雜糧隨之而貴又有帶免他

稅之例近畿雜糧連檣擊穀不待言人特不可一日不飽米麥雜糧同歸一飽且玉田豐潤等縣產米不

少近更有牛莊米南運上海者本不患無米況近來商賈路窄一聞北地價貴必趨之若鶩更不患無米

但令市中有米卽不必官中有米更宜官中多籌一年之蓄按年糶陳糶新爲有備無患之計則轉勝於從前之年銷年款而成萬全之策矣如是則南民所完之數卽北兵所得之數 國家無毫釐之損閭閻節齎送之資而且所謂漕項以下款目一切可省合計之奚啻千萬兩大利民大利國何憚而不爲哉或曰海運行之十餘年有效盍仍舊貫不知一行海運不特多出運費且上倉運漚一交涉於官吏之手百端折耗雖簡於河運仍復不少兩湖江安尤鉅雖出自民間而其歸宿爲每石易銀一兩之用又何苦令萬家膏血多擲虛耗耶至於前議稻田利興則數年之後無事南米更善之善者矣若河運一廢不可復稍有識者卽知之而咸豐九年樞臣猶請復河運噫尙何言哉 文廟聖明得寢其議意外之幸也

漕糧開屯議

李祖陶

禹貢田賦之制五百里甸服百里賦納總二百里銓三百里納秸服四百里粟五百里米孟子亦云有布縷之征有粟米之征則漕運以供京師其來尙矣然至於今則其敝已極有田者自應輸糧且踴躍爭先惟恐其後而州縣乃堅不收米惟收折價折又高擡其價欲上米者非并力上控奔走數年者不能暨米得上而其費已不貲猶復內有扣除外有津貼數皆甚鉅若是者其困在民輓運沿前明之舊以屯田之軍充之田久荒亡而船仍須造丁仍須簽富戶不能自行一任舵工水手浮開用費貧丁借貸訛索連累

親朋加以沿途規例逐年加增欲逃不能欲充不可若是者其困在軍州縣收漕號爲金穴薦書疊至皆思染指上官同寅皆有一定規例數不可缺鄉蠻恃衆搶桶爭廩甚至毆役辱官罪不可較及至兌軍尤十分繁難爲費尤鉅如是者困尤在官故昔以有漕州縣爲美缺今以有漕州縣爲苦缺昔以管糧多者爲富戶今以管糧多者爲窮民長此不變其何以堪昔虞文靖公于元至順間有畿南可開水田之議而不能行明徐貞明作潞水客談能行矣而不能就我朝康熙年間靳文襄公欲於鳳徐淮揚兗五府州沿河之地開屯行之已有緒矣卒以中讒而罷雍正間 憲皇帝命怡賢親王偕朱文端公經理畿輔農田水利賜銀二百萬爲經費已開田三百餘畝矣而賢王薨朱丁艱卒寂寂而罷 睿皇帝平定教匪之後亦思經理以蘇民困屢命大臣相視程月川中丞以天時地利人和證之謂不可行予嘗讀而疑之北方立國者自元以前若金若遼若元魏皆不聞仰食於南而稱強國使必仰食於南則他口江淮之間有竊發者中梗漕運其何以給特經理無人如李文貞所云明代雖經太平然諸事多未曾整理卽整理亦未得其法耳近讀包大令慎伯所著中衢一勺中有畿輔開屯以省南漕議不覺躍然謂雍正間欲遍畿輔之地通爲水田固難若只於近京數百里之內擇近河可通舟處相地脈開溝渠招集江浙老農擇嘉種分試地力但得三四十里可開墾處四五區計其所入卽足以抵南糧數百萬石之漕其事尙不甚難并

可省一切繁費然必拘拘種稻猶似不合時宜惟海鹽朱尙齋太守在吾郡時嘗作一文謂少種稻而多種麥黍實足補包說之偏而救其失今略節其文于左以備覽謂自來教北人種稻者若漢張堪魏劉靖北齊裴延儻宋何承矩元虞集明徐貞明皆徂於其鄉土之利沾沾惟稻是種豈知西北之人慣食黍麥不願食稻以北方麥吐花在晝其性陽食之足以養人也且藝稻之功倍於他種難尤在水人情畏難樂易黍麥既足養生何肯舍易就難此直北稻田所以難興亦不必興也今京師八旗及豫青兗徐雍冀之人仕在京者皆嗜麵食其祿以稻米且將易麥爲麵而食之此外荆揚之人不過十之一二居京日久亦能食麵則授祿之可改米爲麥而兼以黍也明矣惟大倉歲出之外須有積貯米與黍麥皆難經久則稻穀亦不可缺今議於天津河間二郡畫地四區一區百萬畝但取十之二營爲水田以種稻其入穀倍米可一百六十萬石以備積貯其八先種麥後種黍徵取麥八黍二以充廩祿四區爲田四百萬畝以開方法計之但爲方八十里已得田四百二十四萬畝而溝洫堤埂倉廩屋廬每區各加地方五里總計一百里而已足一區設一官秩如知縣以司其歲入實諸神倉以抵南漕四百萬石之額于是重運可改輕齎漕船運丁可以不用漕運倉場兩督與坐糧廳官皆可罷計一歲經費歲可節存五六百萬金諒哉斯言可以補慎伯之偏而圓其說矣予讀明史徐貞明傳至潞水客談中所陳十二利可謂詳哉言矣而卒不

能行者伍袁萃謂北人懼東南漕儲派於西北故爲煩言以阻之也若用慎伯開屯之說則與民無涉北人可無過慮而有煩言又如尙齋之說少種稻而多種麥黍則爲功差易又足以合人情而宜土俗予詩所云漕糧隨地堪屯種者實本此二文以爲據也且隨地可屯則亦不必拘定天津河間二府如慎伯集中所舉諸處皆可行而靳文襄公所舉沿河之地尤可行倘能行之食不患其不足而省費亦不可勝算矣

籌畫漕務疏

林則徐

竊臣承准軍機大臣字寄七月初四日奉 上諭前據金應麟奏請將漕運事宜量爲變通已有旨交兩江總督江蘇巡撫等妥議具奏矣著陳鑾裕謙卽將原奏內所指各節體察情形通盤籌畫仍俟林則徐到任後再行會商務臻妥善據實具奏將此諭令知之欽此臣因奉差在粵未見金應麟原奏請俟江蘇省將原奏咨到卽當體察籌議先於八月內附片奏 聞在案嗣准署江蘇巡撫布政使臣裕謙鈔錄金應麟原奏移咨到粵臣細閱奏內所陳查辦六條處分一條皆辦漕切要之事自應大加整頓力挽積疲而其附片採訪見聞亦不得已而求變通之法惟是漕務勢成積重醫家之治久病見證効而用藥難蓋他端政事祇求官與民兩相安而已獨漕務則糧戶輸之州縣州縣兌之旗丁而旗丁領運於南解交於

北則又有沿途開壩與通倉經紀操其短長故弊常相因而事難獨善卽論病根所起南北亦各執一詞以北言南則謂州縣浮收以致旗丁勒索以致到處誅求而以南言北又謂旗丁旣被誅求安得不勒索而州縣旣被勒索安得不浮收每以反唇相稽鮮能設身處地於是官與民競丁與官競卽官與官亦各隨其職掌以顧考成而無不相競而凡刁生劣監訟棍包戶奸胥蠹役頭伍尖丁走差謀委之徒亦皆乘機挾制以衣食寢處於漕本圖私也而害公矣本爭利也而交病矣原奏謂近年州縣臨漕規避挾制上司莫可誰何此亦難免之事蓋寬之固不啻教猱升木卽嚴之亦不過掩耳盜鈴各處類然而蘇松爲尤甚蘇松之漕果治則他處當無不治臣前在蘇省雖歷五次冬漕祇求無誤正供實不敢言無弊茲奉諭旨飭議謹憶往時所歷情形與原奏互相參酌分擬四條或正本清源或補偏救弊或爲補救外之補救或爲本源中之本源近則先計一時遠則勉圖經久不揆固陋謹逐條另繕清摺恭呈 御覽伏候聖裁惟差次未帶案卷竊恐記憶舛訛如蒙 聖明採擇可否 發下署兩江總督臣陳夔龍署江蘇巡撫臣裕謙覈對案據並將本屆冬漕有無堪以照辦之處斟酌具奏請 旨定奪是否有當謹繕覆 奏伏乞 皇上聖鑒訓示謹 奏謹將漕務四條繕具清摺恭呈 御覽 一議正本清源必使自南至北皆無例外苛求然後可以杜州縣之浮收絕旗丁之勒索要不能專禁一處故其事極難然果法在必行則

亦不敢因難而阻也臣竊擬一簡便之法曰縣督幫收緣州縣一經開倉則逐日用度不勝枚舉不獨幫費繁重已也與其進倉出倉時日耽延耗費無算何如合收兌爲一事就糧船爲倉厥查每年重運過後本次總有減歇及屑造之船先令依限修造一經開漕先以此船收米回空到後速催修脩船接續貯收完一船卽取一船關結先開離次州縣於岸上搭蓋篷廠令花戶斛米交船丁與民相授受而官監之務使平斛響擋顆粒不得浮加其米色之高低胥由州縣持平不任旗丁欺壓蓋在官旣無濡染則理直氣壯卽禁止令行不但旗丁無刁難卽索規包抗之徒皆可執法從事而小民胥免浮折徵收可決公平矣惟就中窒礙者有三一則春篩白糧採買糯米一切夫工折耗口袋麻繩向由州縣津貼一則逃亡絕戶廢地老荒向由州縣墊補一則票冊紙張夫役飯食篷廠薪燭向由州縣措辦一收新漕皆無從描注但能責州縣以潔己不能責州縣以解囊卽幫費不花一錢而虧漕誤運之患自若況重船不能不脛而走又人所共知者乎不得已仍依成法而變通之溯查丁代民勞之始每石原有耗米六斗六升辦運極爲充裕嗣將耗米劃出四斗起運歸公其餘二斗六升折徵銀一錢三分由糧道批解倉場衙門以充支放公用故有二大輕齎之名而丁不與焉又有篩颺耗米一款每石給二升七合有零專以貼丁嗣則奏准米歸通倉其貼丁之款由縣折銀支給復有漕贈一款正耗二米每石贈銀一錢改兌之米每石贈銀五分

原由糧戶津貼旗丁故謂之贈迨後此款內每石劃出二十七文分給北壩名曰箇兒錢又於雍正七年
前大學士尹繼善奏准革除江蘇漕弊每米一石津貼銀六分半歸旗丁半歸州縣近聞此款專歸丁收
凡此皆貼漕之大略或載全書或見部案班班可考今果力辦清漕似須統核倉場經紀以及旗丁州縣
每處應得漕務款項實有若干其用度萬不可少者若干徹底查明通盤籌畫凡有可以取資之款各支
各用彼此不許侵尅其實在無從設措者卽不得不參酌成法仍著糧戶貼銀蓋完米既顆粒無浮則糧
戶受益不少而縣幫辦公掣肘之處糧戶亦無不周知從前中外條陳每有八折收漕之議事多流弊自
不可行若仿尹繼善奏准章程參考歷來成案比較現在情形則每石酌貼銀三四錢似亦不詭於正可
否責令各府州細加察看由司道議詳督撫分別奏明予以限制將大小戶一律徵收比之目下完漕
定可減輕過半如縣幫再有婪索糧戶再有抗延以及後手之尖丁白規之生監惟有儘法痛辦而已雖
然疲幫軍船不得不裁汰也查江淮興武二幫因無屯田疲名久著然尙有造費貼息其最不堪者如太
倉後幫滁蘇幫太河二三幫債積巨萬船壞八九不調劑不能出運卽調劑亦無完膚且孤寡廢疾之流
皆其債主沿河攔索以累百計故津貼到手卽罄而開行數里卽停索債者認船不認人謂之黑帳惟船
去然後債去雖定例各幫額船不許缺少然負重灑帶雇募買補與夫加一免雇亦例內所許通融者與

其強留之而各幫效尤何如酌減之而米歸灑帶抑或減疲幫之額以添殷幫之船似宜責成糧道體察辦理勿以原額拘之庶可悉歸完善矣雖然開壩關纜不得不酌減也查重運挽過清江浦向稱三閘五壩每船關纜夫錢不過十餘千至二十餘千爲止嗣因清江一閘亦難挽放而臨黃各壩復有加添道光二年前漕臣李鴻賓所定木榜則稱四閘九壩近年復加至十四壩每處關纜皆以頭二三進爲差年增一年每船渡黃需錢百餘千至百數十千不等固由水勢湍急而夫頭之乘危勒索委員之暗地分肥薄人於險實爲可惡欲除其弊先須大減委員留一二實心者專其責成以每日所放船數分勤惰以所放之有無失事核功過其壩座設法減少關纜夫錢悉定其數刊榜曉諭此外沿途各閘亦皆照行如有訛詐立置於法似可以杜其弊雖然候補衛弁不得不甄別也捐納衛官分發到淮圖差使者無非圖規費耳從前自南至北漕委不過二十餘人迨道光七年奏定重運不得過四十員回空不得過二十八員至十六年又有不得過八十員之奏總由候補人衆難令空閒然與其調劑而累丁何如酌留而汰冗或量其膂力改補營職或按其捐數量改佐雜似亦可以疏通矣雖然通倉使費不得不核實也查通倉經紀以爲生凡米之好醜斛之贏縮俱難隨手改移故費足則秕稗亦珠璣費不足則釜鐘當升合不獨旗丁惟命是聽卽各省糧道恐亦莫可如何惟賴本管官爲之裁制而已查糧船有帶北存公一款本係從幫

費內劃出以爲壩費聞近年存公款銀每不敷用以致壩債愈多則累丁之故可想似宜准令各幫旗丁於抵通交米後將經紀有無勒索稟知該管糧道卽由道彙取丁結逕揭部科一次如有指出贓款准予查辦按實者寘之重典或可互相鈐制至賦出於田理宜清丈頃畝以除寄莊飛灑之弊丁起於屯理宜稽核衛地以裕貼造贍運之資此亦本源之所應治而不能期諸旦夕似當從容以理之者也 一議補偏救弊漕務已成積重若一時不能驟改亦須補救有方金應麟原奏所陳本已詳悉臣所議有於原奏中融會者有於原奏外推詳者在縣在幫各有六事一則核舊章以去太甚也查蘇松糧戶向分大小而收數因有短長大戶愈占便宜則小戶愈受苛刻彼此相較有數十等之差於是小戶效尤亦詭寄於大戶而辦漕愈難矣今雖未能遽令畫一斷不可過於偏枯該管府州耳目切近應令確查所屬州縣歷年收兌舊章援以爲準不及者曲在民太過者曲在官隨地隨時持平核辦至近年祠堂公產假託者多卽義產息田亦竊善舉之名以遂短漕之計應令散歸各戶照衆徵完以杜影射有挾制者罪之總以去其已甚爲主一則治經造以除弊匿也查近歲完糧不但徵新且多帶舊其中分年分限各屆完數不同民間要見由單始可照數完納而闔縣糧戶多者數十萬少亦十數萬一切完帶之數瑣碎畸零官吏難以周知不得不假手於里甲莊差統名謂之經造而若輩居爲奇貨不以實徵戶冊與官不以易知由單與

民私折暗包以完作欠迨至兌漕緊急硬將短數交官而加貼之多早經肥己遲悞把持莫此爲甚應令州縣於開漕之先速將由單散給並將給單日期出示通諭各糧戶如五日內單未到手許控經造若單到手而不完納另差查催倘已由經造折收匿不稟官者一經發覺立辦重罪一則清訟米以杜抗延也查收漕之事固少持平而告訐之人總非善類無糧而上控則索規可知有糧而上控則躲避可知控案固須審明正供豈容藉抗應將上控之糧戶由赴訴衙門押令到倉交完本名下米石始行准理一則稽丁胥以憑懲蠹也查漕書記書倉差斗級以及管倉管廩家人皆不能不用若輩莠多良少非魚肉百姓卽侵盜本官飛串灑米搬戶掛籌等弊難以枚舉甚且結尖丁而分肥浮蹤莫捉應先責令州縣將此等的實姓名年貫住址並其家屬親丁詳列冊內送該管府州覆查一有弊端立即提究如查造不實提拏不到惟該州縣是問至總運廳差亦須裁減並永禁坐倉以免勾結滋弊一則嚴截串以杜豫虧也州縣闖茸之員間有漕前截板串或挪解下忙錢糧或墊辦修倉鋪底其串或給書差或付錢鋪無非明虧暗損挖肉補瘡至臨漕而無所措手矣更有不肖之員暫時署事將值交卸趕將善區美戶截串先徵此爲營私誤公之尤必須重辦一則消漕尾以實庫貯也江蘇漕額之大有一縣而可抵湖南北一省者漕船催開緊急斷不能守待闔縣疲戶一律全完故州縣墊漕萬不能已所謂漕尾是也惟其恃有現存未

徵之串得交後任接徵而後任又以新屆錢漕爲亟未遑兼顧一輾轉間舊串流交久之幾成廢紙應責令州縣按年分月帶徵二成徵不足者著賠則雖往復乘除總無五年以外之漕尾而庫款庶免虛懸至有一種取巧州縣將短縮太甚之大戶故意不徵留作漕尾移交者察出特參與大戶一同懲辦庶可示儆此在縣之六事也其在幫者亦有六事一則復冬兌以符趨限也查漕船例應冬兌冬開嗣因節節爲難不能悉符舊制近年疊奉諭旨統限四月初十以前全數趨至清江渡黃北上定須懷遵欽限不得刻逾但冬間若不多兌春間必不能早開而旗丁慣以米色爲詞停兌議費且其意欲令米石在縣倉發熱過後始行上船故兌愈疲而費愈重漕亦愈遲嗣後冬間須儘縣中所收之米全行兌幫不得任刁猾庶來春祇須找兌差可速漕矣一則按兌米以給津貼也幫費卽不能遽裁而頻歲疊加何以爲繼惟當欽遵嘉慶二十二年九月所奉諭旨統以米石多寡按水次舊章酌給津貼作爲一定限制如再格外需索卽當治罪而給付之法總惟兌一石之米給一石之費如兌多給少不依州縣給多兌少不依旗丁有逐日兌單爲憑自足以昭公允至於未兌以前責在州縣既兌以後責在旗丁歷奉諭旨嚴明定須敬謹遵守若兌竣之後勒捐通關及空船先開隨後趕米皆旗丁誤漕大弊必須重治其罪一則別虛船以昭核實也查加一免雇及輪減存次之船並不受兌出運而仍給與行月苦蓋已屬格外從優豈

得復爭津貼應查照從前奏案此項虛船不准混索幫費致全幫延緩開行如違卽當嚴辦一則實行月以防正虧也查旗丁行月米糧皆計口授食之需升合不容短少乃近聞縣幫串合折乾每船有折米數十石及百餘石不等獨不思沿途食米不足致虧正糧誰執其咎嗣後水次如有此弊縣幫一體治罪一則懲水手以節身工也糧船水手有額雇在船者有遊幫短絳者總之皆兇狠之徒或師傅盤踞老堂或頭船勒薦夥黨偶遇風水阻滯卽藉端勒加身工甚至毆丁折艙大爲幫累近年疊經嚴辦略見斂戢嗣後如有勒加身工之水手卽於所在地方儘法懲創不稍姑息毋使旗丁被累方免誤公一則定輪開以齊跨兌也蘇松等屬向有調幫章程原使酌劑均平而船數米數不能恰合故一縣之米有兼兌數幫者一幫之船又有跨兌數縣者與其按縣全開不如按幫爲便應飭糧道排定日期每縣先輪一幫開行週而復始其跨兌者合輪數縣遂齊一幫以免參差似亦可以速漕利運此在幫之六事也 一議補外之補救查原奏片稱兌費斷不能減南糧恐不能來有謂宜於糧船大修時將船改小以一分二卽免撥費開費有謂宜於淮上建廠貯米卽令小船運京有謂宜令蘇松常鎮杭嘉湖等府逐年試辦海運仍將兌費提存藩庫此三者皆不得已而求變通之法也臣查中途建倉以利轉盤與古之洛口倉相仿本係成法但核計一廠貯米約五六百石大者亦止千石以南漕四百萬石計之每廠貯一千石卽須廠座四千

就令減半轉運二千版亦不可少經費殊覺浩繁且淮上逼近河湖亦恐難以擇地若糧船以一分二過開既覺輕靈遇淺又免盤剝誠利運卹丁之善策然查南漕起運之船約有四千隻其中本已區分大小江廣之船最大浙次之蘇又次之緣江廣重運直下長江小船難禁風浪若江浙之船改小而江廣不改則開河磨淺起剝仍費周章且卽江浙之船所載正漕照例只四百石此外則爲加載負重而又有例准攜帶土宜不能強小船以受大船之載若因改船而船數驟加一倍是欲去累而累轉增矣且大修較之折造例限尙隔三年領項亦少三分之一當大修而令其折造丁必藉口抗延尙有未屆大修者尤不能一律勒改是一幫之船有大有小旣難稽核而剝費亦所省無幾是以臣未敢輕議更張也竊謂三者之中惟海運曾經辦過尙有成案可循若按候放洋得乘南風北駛春夏二季中一船必可兩運如以涉險爲慮則沙船往來關東每歲以數千計水線風信皆所精熟祇令裝載六七分已合鬆艙之數則風暴無虞也如慮米石出洋易滋影射查南北洋面沙船烏船各有所宜本難越駛倘恐萑苻竊發自應護以舟師且每歲沙船所運關東豆石雜糧不知凡幾奚獨於載米而疑之海運若行或以官運或以商運或運正供額漕或運採買米石尙當細酌情形另行從長計議惟原奏有將免費提存藩庫以實庫項之議查道光六年辦理海運雇募沙船每石給價七錢若免費另提則雇資安出且旣明提免費又奚能禁止浮

收如謂輪年提費補虧正恐一年提存難補節年虧缺若提者自提虧者自虧於事仍恐無濟大抵海運尚屬可行而所以行之者不同設或規費漸增亦與河運奚擇惟現在河運甚形棘手未卜日後如何而海道直捷易通亦不敢不豫留地步如蒙 飭令議行容臣到兩江之任再與江蘇撫臣及司道等詳細籌商會同具奏

嚴禁旗丁刁難示

道光七年

賀長齡

照得東省漕糧向分開內開外州縣皆係冬兌春開時日甚寬各州縣從容收足運赴水次無須買米交幫旗丁不能藉端勒索故免費尙不甚多聞內州縣因運河歲須冬挑皆係冬兌冬開時日甚迫各州縣相距水次近者一二百里遠者三四百里或因糧多收未足數或因車少趕運不及勢不能不在水次買米墊兌而旗丁遂藉此多方索詐始準買補兌交並勾通米店擡價居奇或勒折重價代爲買兌漁利稍不遂意輒將現米駁斥不收徑自開船出閘轉以該州縣誤兌稟揭該州縣恐蹈誤漕之咎祇得另雇船隻運赴閘外趕兌需索日甚免費日加而濟甯前幫之任姓各丁尤爲豪橫訪聞任振標任嚴化等挾貲巨萬恣意妄爲一經簽派頭船則運官聽其指揮州縣資其魚肉若非百計刁難何能飽其慾壑聞內州縣兌漕因之甚爲苦累查買米兌漕固屬例不準行而向來零星小戶升合之米鄉民每以不便辱

量情願折色交納該州縣亦因數大零星恐辱手斗級人等易於高下賤削鄉愚亦遂準其折交代爲買兌其距倉窳遠之糧戶路遙費重運送本極艱難若值陰雨連旬米石更易傷耗故鄉僻小民尤願以銀錢折納該州縣亦不能不變通以宜民誠以天庾正供所重在米米若不佳卽實係糧戶之米亦準幫丁駁換令該州縣買補另交但期米粒乾潔並未嘗以買補爲不可行東省開內三十餘州縣計自開厥收米以至兌畢開行爲期尙不及一月若以數千至萬餘石之漕尅期收足於旬日之間揆時度勢旣所斷斷不能又萬萬趕運不及而必泥於不準買米上兌之例徒供旗丁訛索之資若更相沿不改其勢必且日增當經本護院援照江蘇成案專摺具奏請將開內有漕州縣如屆期末收足數並趕運不及者準令於各水次就近買補墊兌以免旗丁挾制並將不法幫丁斥革查實辦理欽奉諭旨交部議奏茲經戶部覆準並令將旗丁挾制需索之處會同本部堂出示嚴禁奉旨依議欽此欽遵咨會前來除檄飭司道遵照辦理外合行出示嚴禁爲此示仰各幫旗丁知悉自示之後務須守法奉公應得兌費均遵糧道核定之數取數辦公而止不得藉端多索恣意挑剔尤不許勾通米店擡價居奇勒折重價倘敢故違或仍如從前之徑自開船出閘轉以州縣誤兌稟揭及橫豪滋事別情定卽按名盡法懲辦

復吳仲宣漕帥

曾國藩

南漕概改海運自是天時人事窮變推移之勢承示江北各漕及皖北之由洪澤湖北達者先辦河運以免紆途運漚出洋而舊制亦不致全廢具見卓裁斟酌妥善弟雖主海運之說而亦不敢竟廢河運蓋以北運河一水經數百年勞臣經營而成巨川豈宜以停運之故墮昔人莫大之功惟修造漕艘弟意不欲太驟不欲太大不欲以例價責成旗丁自造太驟則無此巨款太大則難於浮送或者千里深通一節膠淺又增無數濬河之費責成旗丁自造往往一丁造船舉族斂費能趁吾兄任內革此虐政爲幸將顧全此三者則江廣三省似不能不以海運爲主而河運僅堪爲輔芻蕘之見仍求切實指示

江省新漕仍難改徵本色疏

同治二年

沈葆楨

竊臣接准戶部咨議覆倉場侍郎麟慶等奏請飭令各省將額運米石趕緊運京並御史丁壽昌奏籌備京倉各摺議令本年開徵新漕酌定成數改徵本色體察情形先期奏明辦理又准咨稱現在九淤洲業經克復奏令將本年新漕如何酌徵本色以及起運事宜妥速奏辦各等因查江省漕糧礙難借運輪船及採辦米石運京諸多窒礙情形經臣先後奏明奉 旨允準在案茲准前因自應竭力通籌何敢拘泥前奏藉詞推諉伏念漕糧爲 天庾正供原應徵收本色惟是行之日久百弊叢生道光年間浮收者或二三石以上勒折者或至七八兩之多非盡飽州縣私橐也數千里餽糧經一人必有一人之費需一物

必有一物之費踵事逐增遂積重難返有非禁令所能止者自上兌後以至京倉節節取之旗丁旗丁不得不取之州縣州縣乃以旗丁所索並上兌以前一切需費責之于民當時物力之豐民情之厚迥非今日可比然開漕之案已層見疊出矣咸豐三年後運道中梗變價充餉較兌運年分輕減已多自是兵燹連年農民失業花戶不堪差擾以抗納爲常規官吏求免處分以報災爲長策始而官民交困繼而官民相讐窮則變變則通湖北因有折徵之議江省踵而行之固緣民氣未蘇不得不因時制宜姑就力之所及而利導之也今歲春夏陽雨偶愆災不甚重而各屬米價驟貴至四五兩有奇饒廣以東並無米可購蓋連年之兵燹耗之水旱耗之蘇皖浙軍營之採辦輪船之販運又耗之無力者朝不謀夕有力者稍能蓄積既慮資賊又苦題捐雖素稱產米之區絕無蓋藏有事則立匱日來秋稻已穫米價尙三兩上下按漕徵米浮於原折之數已多焉能令其再完運費乎海運雖較省於河運據署九江道蔡錦青稟稱海船水脚每石約銀一兩江省地非濱海其由內河出江由江達海由天津入京並製備口袋下河過船入倉挑脚官吏夫役飯食等費必一二倍不止限以成例官無可賠准其實銷費無從出且各縣倉廩悉燬於賊修復尤難未能隨兌隨收輸將必增苦累分徵本折輻輳滋多滑吏奸胥藉以上下其手此臣與各司道再四商酌總緣瘡痍未起遽難規復舊章誠恐無益京倉轉慮貽誤京餉合無仰懇 天恩俯准將本

年分新漕仍徵折色源源委解以備餉需

會議海運交米疏

曾國藩

竊臣等承准軍機大臣字寄同治九年十一月二十日奉 上諭海運交卸一節該部擬請按照河運章程改由糧道赴通徑交係爲掃除積弊起見著曾國藩李鴻章英桂張兆棟張之萬楊昌濬斟酌情形詳細妥商會同覈議具奏原摺片均著分別抄給閱看等因欽此臣國藩當卽劄飭江蘇糧道英樸會同藩司核議詳覆臣昌濬亦卽劄飭浙江糧道如山會同司道核議詳覆旋據浙江糧道如山等會詳稱海運章程始自道光六年由滬運津責成南省委員由津運通責成北省委員釐然判而爲二各有專責奉行既久法非不善而弊卽叢生今欲大改章程不外除弊節費二事然運通之弊全在剝船若改由糧道委員押運以隔省人地生疏之委員稽察隔省積慣作弊之船戶恐呼應不靈其弊更甚至海運經費係按照米數備帶赴津力求撙節方可敷用向來北省押米員弁多至一百數十員今若改由南省帶員赴北薪水既多川資更鉅卽此一項已形糜費其餘各款亦必驟增恐於事未必有濟而所費更屬不支又津局以起剝爲重通壩以交卸爲重糧道專駐津局則交米之事無所專責先赴通壩則起剝之事又恐羈延而沙船在津等候太久耗費更多尤慮畏累遠避有礙於下次之招雇種種窒礙未敢輕議更張等語

由臣昌濬資商臣國藩察核所陳各節均係切中事理竝非意存推諉卽據詳會奏矣適又接江蘇糧道英樸稟稱邇來海運弊不在商船之運津而在剝船之運通剝船舞弊固由積習之相沿亦由水腳之過少該船戶旣虧累於平時復需用於臨事偷漏攪和無弊不作致令乾圓潔淨之米一交剝船米色頓壞殊爲可惜今欲力矯前失惟有遵照部議由南省糧道徑運交通自津過剝以後慎選委員以押運舟分設卡段以司稽查嚴定偷漏罪名以鈐制之節省經紀等費以優恤之或可一洗剝船之弊至封僱彈壓等事仍由直隸地方官妥爲照料南北通籌恩威並用漕務當有起色現已草創章程十四條雖不能十分周密請試辦一年等語臣國藩以該糧道英樸在浙江辦理海運二次調任江蘇又辦九年分一次一切情形久爲熟習旣肯力爲其難勇於任事果能除漕米攪水潮雜之弊豈非大有裨益復經函商臣之萬臣昌濬酌核辦理臣昌濬旋又覆函以爲運通之弊果能改絃更張實爲中外所共願惟改章而仍用額設之經紀向有之剝船則從前錮習牢不可破若欲重立新章另行雇船另行派人則事屬創始必須通盤籌畫確有把握方可試辦接准閩浙督臣英桂來函亦深慮驟然改章諸多窒礙現在米船將次放洋爲期已迫糧道如山議請俟下屆再行試辦與其倉猝改章不如從容集議臣之萬覆函亦稱直隸督臣李鴻章覆奏海運事宜摺內業已聲明今年新漕只能照章在津驗收 諭旨允派倉場侍郎一員赴

津會辦若改爲徑運赴通驗收則南北辦理兩歧奏咨商改多費周章殊覺不便臣國藩參考衆論酌度時勢本年海運應仍在天津驗收江蘇糧道英樸既有創辦徑運赴通之志浙江糧道如山續行覈議亦
有下屆試辦之請臣等公同定議檄飭英樸如山於馳抵天津後先將本年糧米查照向章辦理再將下
屆糧米運通改章之處面稟李鴻章應將經紀若何更換剝船若何整頓各項經費若何覈實動用一一
籌度不厭精詳俟下屆漕糧海運由臣等先期議定新章奏明辦理以昭慎重

漕項無從劃撥海運難以議分疏

沈葆楨

竊臣准戶部咨會議倉場侍郎桂清畢道遠修治運河一摺請 旨飭下該督撫體察情形核實恭錄
諭旨並覆奏原摺行令欽遵辦理前來竊以因轉漕而治河因治河而籌費沿流溯源意至善也 國家
軫念河務原爲漕務起見從前修費不惜歲數百萬金良以 天庾正供非河運不行航海風濤難測故
也今帑項艱難萬非昔比不得已而取資於漕項又合數省之款以濟之設爲各省力所能建亦必有一
勞永逸之計而後費不虛糜若歲歲修河以供歲歲辦運無論費無從出也竊慮受病日甚有求如目下
之河形而不可得者敬將原奏交議各節爲我 皇上分晰陳之原奏有漕省分應酌提漕項若干一節
查甯屬起運光緒元二年分冬漕以漕項開發運費因沿途起剝沿途挑濬處處周折各短數萬金數千

金不等惟光緒三年極力節省二萬金撥充晉豫賑需則 恩准暫行海運之所致也蘇省運費亦遞年不敷甚鉅全賴藩庫挪款墊用若再令分撥數成無論河運海運均將束手河未修而漕先廢矣安徽係折漕省分宜有漕項盈餘而京餉出其中協餉出其中本省軍餉出其中以盈補絀尙難相抵並非有提存的款以待不時之需今若取之於民民不堪命若將京餉協餉停解參處隨之挹彼注茲計惟有裁勇之一法夫設防如故又值年穀順成伏莽尙不時伺隙而起倘一旦藩籬盡撤良懦無所依附宵小因而生心雖智者不知所以善其後也原奏江浙兩省能否將海運糧石各分出十數萬石辦理河運安徽省下屆漕糧能否起運本色若干並運米船隻能否多僱一節查蘇省辦理海運已苦經費不敷再令舍易趨難更從何處挪款安徽之窘甚於江蘇力不從心不言而喻徵本色猶可運本色甚難本屆江北漕船六月尙未儘數渡黃回空更不知何日卽事竣催令南返盤壩守凍虧朽過半或冒險求速飄海散失各船戶前鑒具在下屆欲勉符舊額勢須多方勸勉招集方得成行更於此外求多恐百呼而無一應者矣原奏運河宜如何設法修濬將全河形勢一併詳細查明議覆一節查全河詳細情形臣未親履其地無由臆斷但以大勢揣之前人之於運河皆萬不得已而後出此者也漢唐都長安宋都汴梁舍河運別無他策然屢經險阻官民交困卒以中道建倉伺便轉餽而後疏失差少元則專行海運故終元之世無河

患焉自明而後汲汲於河運遂不得不汲汲於河防運方定章河忽改道河流不時遷徙漕政亦隨爲轉移我朝因之費旣踵事而增而獷悍遊食之徒萌蘖其間所謂青皮黨安清道友者引類呼羣恃衆把持成固結不可解之勢前兩江督臣陶澍憂之乃創爲海運之說明以節省經費暗以消患無形蒙宣宗成皇帝允行而漕政於窮無復之之時藉得維持不敝迨髮捻事起此輩潛入其中南北蕩平消磨殆盡雖闐闐市鎮尙有此等名目然無大淵藪以容之偶或什伍成羣良有司足以治之矣是河運所可慮者又不僅在經費也原奏運河貫通南北漕艘藉資轉運兼以保衛民田意謂運道存則水利亦存運道廢則水力俱廢然無漕省分水利亦關民田命脉未嘗敢任其廢弛臣竊以爲舍運道而籌水利易兼運道而籌水利難何則就下者水之性也必使貫通南北不能復聽其就下矣不聽其就下則事事皆以人力爲之費用不貲利亦大減且民田之與運道尤勢不兩立者也兼旬不雨民欲啟涵洞以灌漑官則必閉涵洞以養船於是而挖堤之案起至於河流斷絕且必奪他處泉源引之入河以解燃眉之急而民田自有之水利且輸之於河農事益不可問矣運河勢將漫溢官不得不開減水壩以堤保婦孺橫臥壩頭哀呼求緩官不得已於深夜開之而堤下民田立成巨浸矣東境河道經撫臣隨時飭屬挑濬地方官何必全無天良其所以旋濬旋淤者則借黃濟運之害爲尤烈前淤尙未盡去下居之運已連檣接軸而高

下懸殊勢難飛渡於是明知借黃之非計而舍此無以資浮送又百計逆水之性强令就我範圍致前修之歛皆空本屆之淤復積部臣所謂歷年興修均以隨時挑挖逐段疏濬爲權宜補苴之計者誠洞見癥結之論不可不思患豫防者也議者太息於經費之無措舳艫之不備致此舉之不成臣竊以爲使道光年間歲修之銀與道光年間官造之船至今一一俱存以行全漕於借黃濟運之河未見其能達也蓋江北所雇船隻其大不及從前糧艘之半然必俟黃流泛漲且竭千百勇夫之力以挖之過數十船而淤復積今日所淤必甚於去日而今朝所費無益於明朝若使船大且多有所施其技乎且懍乎其不可犯者大河之性也近因西北連年苦旱來源不旺遂乃狎而玩之物極必反設令因濟運而奪溜北趨則畿輔受其害南趨則淮徐受其害如民生何如 國計何伏願 朝廷師元人創行海運之成法體 宣宗成皇帝試辦海運之深心以收近日輪船自然之利並念時局孔棘萬不容作無益害有益實事求是以濟艱難臣自知蠡測管窺無當萬一第旣奉 旨飭令核實籌議愚慮所及萬不敢強不知爲知以自欺於 君父之前也

借黃濟運徒耗經費擬請暫行海運疏

光緒二年

沈葆楨

竊臣等接准部咨江北各州縣漕米仍飭辦理河運等因光緒二年七月二十五日奉 旨依議欽此查

江浙冬漕及江西兩湖採辦京米均係海運獨江北十餘萬石部臣堅持定見以爲漕運不廢河道賴以長存且有借黃濟運之方但使黃汎不至斷流則漕運終無窘步所籌至深且遠苟非迫於時勢之萬不得已臣何敢不殫思竭力共濟時艱惟本年河運困阻情形迥非昔比不敢不以干慮所及爲 皇太后

皇上縷晰陳之從前河運愆期中途改而陸運曰開兌遲延致誤黃汎耳本屆漕米於正月日起至二月初十日止寶汜水次一律開行是月二十八日悉數挽過三閘催趲不爲不速乃楊莊以北淺不盈尺非特無水濟運且須蓄水養船嗣得甘霖又經上游啟壩逐層套送隨地起剝其淤處雖剝船亦僅半裝方能浮送挑河之費打壩之費灌塘之費雇剝之費車絞之費所虛糜者不知凡幾然黃汎之期固未誤也乃渡黃後察看河運之底高與大河水面相埒黃流無從灌入遂議築壩興挑自口門至張秋九百餘丈挑闊三丈挑深三尺縱能暢行無阻兩省所費蓋不貲矣夫運河之底何以高至於是則歷屆借黃濟運所淤者也借終日之力以濟之償累月之力以挑之猶可言也乃秋汎一到漕船銜尾爭進未及半而運口窒則昨日所挑者又爲今日黃流所淤餘船欲不出於陸運不可得矣借黃旣不足以濟運徒使山東河道年年受淤是河道未嘗賴漕運而存且將因漕運而廢水失其本然之性商賈之舟楫農田之灌溉從此交病而愚臣鯁鯁過慮竊以爲無形之患又有甚於此者何則就下者水之性也大河挾泥沙而行

停則淤淤則決故治河者有逼隄束黃之法又有借清刷黃之法蓋益其湍悍之性使挾泥沙疾趨不稍停留庶不致潰而旁出今黃汎方苦微弱未嘗逼隄以束之借清以刷之轉復導之旁行舒其湍悍之性上游愈舒則下游愈緩所挾泥沙無力東注中道遞積數年之後河身高與隄等北潰則畿輔受其患南潰則淮徐罹其殃而東省之首當其衝者無論也臣愚以爲水宜順其性政貴因平時合無仰懇 天恩准將江北漕糧暫辦數年海運俟山東運道一律通暢再議酌復舊章至淮徐一帶運河所關於農田賈舟者甚鉅幸淮南引地全復有款可籌斷不敢以河運暫停置水利於不顧愚昧之見誠恐無當萬一謹合詞恭摺馳陳

籌抵海運經費疏

同治四年

浙江巡撫 馬新貽

竊照浙省杭嘉湖三府漕糧米石前奉 恩旨減免額徵經臣等查明應減成數奏奉 諭旨各按科則重輕分別上中下則一律永遠減免以紓民力等因欽此欽遵刊刻謄黃徧行曉諭在案所有議籌運費一款先經督臣左宗棠具 奏接准部覆內開查浙省海運向只支銷漕截銀兩其不敷之數皆由州縣酌提津貼並不動用庫款是以准免報銷今該督以正額浮收概行覈減請將津貼一項裁革自係爲釐剔漕弊起見但所需運費總宜於漕務項下寬爲籌備俾敷應用不得於漕項之外再動別項正款至一

切支銷如有應裁應減者亦宜分別裁減力求撙節不得卽以八錢作爲定額應令該督撫從長計議量入爲出將籌備欸項及應用數目再行據實覆奏由臣部覈定後方准照數動支如有盈餘報部候撥准免造冊報銷以歸簡便等因當經轉飭藩司糧道通籌妥議詳辦去後茲據該司道等詳稱查浙西漕米除照額覈減外共存正耗米七十萬三千餘石內海運新章每石給商船耗米八升以全漕起運而論應扣去五萬餘石無須運費所有起運需費之米祇六十五萬餘石每石以八錢覈計約需銀五十二萬兩按漕截一欸例應給幫改行海運以後業經 奏准提解每石三錢四分六絲今擬全數動用計正銀二十六萬一千一百四十九兩零隨耗五千三百二十九兩零又白糧經費項下畫出漕截銀一萬三千一百零此外自應遵照部議 奏准之案於漕糧項下酌提不敢動用別項正欸如減存之行月等米旣不給幫自應變價擬照經費食米定價每石作銀一兩五錢現除減免外仍應共收米二萬四千二百五十四石零計銀五萬一千三百八十一兩零又查南月米一項此時亦不給幫共收正米七千一百石每石作銀二兩計銀一萬四千二百兩杭嘉湖三府行糧折徵項下共銀一萬一千四百五十二兩零隨耗五百三十八兩零月糧折徵項下共銀五百四十八兩零隨耗二十七兩零經費食米折徵項下共銀三千八百四十一兩零隨耗一百八十一兩零以及甯紹等府本色月糧項下共銀五萬九千七百三十一兩

零又耗三千六百四十二兩零折色月糧項下共銀六萬八千七百二十四兩零又耗三千九百四十五兩零合之漕截銀兩已共銀四十九萬七千六百八十九兩零以全漕起運之年約需銀五十二萬兩計之所絀無幾如有不敷之處再於漕務項下設法撥補所提各款皆係河運年間給幫之款今河運易爲海運酌量籌抵仍係以漕辦漕未動正款等情詳請具 奏前來臣等伏查從前海運經費不敷皆由各州縣酌提津貼每石自七錢至四錢不等此項津貼銀兩該州縣豈能自捐廉俸無非取自民間雖欲不浮收而不可得矣今正額旣蒙 恩減浮收更應禁絕所有海運經費一項除動支漕截而外斷不可再令州縣津貼以致重累吾民惟有遵照部議於漕務項下寬爲籌備今據該司道等議請以減存行月南月各米分別變價以及杭嘉湖三府行月食米折徵之款甯紹等府本折月糧等款抵備海運經費以昔年給丁之項爲今日運米之用以公辦公不動別項正款尙屬妥協此外漕務項下尙有一二未提之款萬一經費不敷亦可隨時撥補固不必另提正款亦毋庸再議津貼也其部議每石運費不准拘定八錢之數查原奏所爲八錢者不過約計之詞以示限制之意原難作爲定額惟海運自滬及津僱船設局用費浩繁不得不寬爲籌備以免臨時掣肘臣等仍當督飭該司道等力求撙節覈實支銷如有盈餘存於道庫聽候撥用並將動用數目按年 奏給免其造冊報銷以歸簡易至從前辦理河運用款尤多將來

如果復行以此八錢之款作爲給幫之用是否相當尙難懸揣今但就海運而言辦理自可裕如矣

籌備運道以利漕行疏

吳元炳

竊照江北運河上年底水本小入春以來有消無長河道益形淺涸上游邳宿一帶深者尺餘淺者尙不盈尺漕船喫水二尺五寸萬難浮送若一律興挑不特曠日持久工費浩繁且來源太微徒深無益惟有擡蓄水勢撈挑淤灘所費不多而事易集查徐屬各閘皆有越河向係水大則啟水小則閉臣現飭署徐州同知王宗幹趕將河清河成匯澤利運潞流五閘越河先行堵閉截其旁出之流以歸正河自可擡高水勢不誤舟行上年微山湖瀦水小於九年分數尺將來鋪水下注亦得藉此收束不致宣洩太甚其各閘上下多有浮沙淤灘分別擇要撈挖務使通暢並多備關纜以供提挽之用至清江以下亦患水小臣已札飭兩淮運司增堵歸江各壩並將裏河廳屬之清江越閘先行堵閉以資節省刻下江北漕船業已齊幫開行臣謹督飭道廳隨時察看情形相機妥辦以期漕行無阻欸不虛糜

官剥船戶苦累仍請照前貼給疏

光緒十二年

李鴻章

竊臣前因官剥船戶窮極滋弊例定工食銀十五兩僅領一半不符贍家餬口請自今年起每船由蘇浙漕項內酌貼工食銀五兩奉 旨着照所請戶部知道欽此業經咨行欽遵在案茲准戶部咨開定例封

河守凍內每船工食銀十五兩又每船每年給油艙銀五兩三年給小修銀二十兩又每運米百石給腳價銀八兩四錢零食米一石一斗五升同治七年請籌給耗米同治十年請每百石加腳費銀五兩歷已格外周恤今請加每船銀五兩應無庸議等因臣維部議剝船戶既領工食油艙修費又有腳價食耗米統計爲數似多故謂無須再加然逐項分計所得實屬有限且此次係酌復工食辦法亦非例外加增請得而詳陳之查油艙修費係爲補葺官剝之用非船戶所得自私況軍興以後人工物價皆昂又將十年滿料改爲十五年船身歷久朽敗修費益重領例銀兩不足尙須貼補並無絲毫餘剩至同治七年籌給耗米每百石一抵五斗七升五合迨奏明歸南省自行運通亦與船戶無涉此皆應剝剔除未可併計者其所得惟工食腳價食米三項從前封河守凍期內實領工食銀十五兩而於蘆商捐款東綱生息項下動支本無折扣凡運米到通係由經紀承交既不賠米更無浮費所得腳價除去沿途用項儘先盈餘且商貨暢行漕後攬載獲利是以尙不爲苦嗣因長蘆山東綱情疲累商捐生息收數無幾將工食減發銀七兩五錢而交米並責之船戶遇有短缺與經紀各半分賠查南糧由海運津難免略受潮氣沙船行程遲緩米久儲倉鹹水外漬尤慮間有蒸變是以剝船受兌到通往往須下地風晾踐踏拋灑並有附近窮民偷竊此中傷耗不少既須補賠其船上添置繩纜器具鋪艙蓆片秫稽沿途加雇緯夫並過壩卸米腳

力風瞭人工及一切守候意外之費尤屬不資每供斛百石僅例領腳費銀八兩四錢零食米一石一斗五升實不符賠補傷耗及各項開銷幸有同治十年奏加腳費每百石銀五兩藉補運費之不足然每年運米三次所餘三項與工食併計約不過十餘兩每船水手眷口七八人一年衣食悉在其內焉能足用又值連年荒歉商貨稀少攬載寥寥遂致啼飢號寒貧窘日甚臣目擊其困憊情狀又據紛紛苦求勢不得不量予調劑查從前每屆虧短漕米至數萬石之多羈押船戶至數百名之衆津通兩處逐日追比血肉橫飛亦未有實濟迭經設法整頓嚴飭南北運員實力稽查不准偷竊又加給津貼若干去今兩年竟無虧短實已著有成效該船戶既不敢作奸犯科而又明知其資生乏術若不稍示體恤無以得情法之平難保不復萌故智商之倉場侍郎及蘇浙糧道意見相同遂有酌貼工食之請亦緣例定工食減至一半僅計七兩五錢實發之數太少本應復額祇以直隸無款可籌蘇浙漕項恐難多撥故僅議貼給每船銀五兩實較部議每船例給工食銀十五兩之數仍減銀二兩五錢既未規復原額更非格外加增且必俟該船最後一次運竣如無顆粒短少始由蘇浙局員查明自行核給否則扣留不發酌計每年每省不過分攤銀數千兩懸此以爲賞罰之的俾可觀感奮興仍嚴飭運員實力稽查以冀不再虧短如敢抗違盡法嚴辦南省旣無籌補之案正供卽免缺乏之虞實於漕運大有裨助是前摺已聲明嗣後不准於此

外再請增議明示限制亦無虞踵行不已相應仰懇 天恩俯念此係酌復工食辦法實較部議例定銀數有減並非格外加增 敕部仍遵前奉 諭旨自今年起每船由蘇浙漕項內貼給工食銀五兩以裨漕運免累窮民再今年銀兩已據蘇浙糧道詳報於奉 旨後欽遵發給斷無再向窮苦船戶追還之理理合恭摺覆陳

（The following text is extremely faint and largely illegible due to the quality of the scan. It appears to be a continuous block of vertical text spanning the main body of the page.)

皇朝經世文續編卷四十一目錄

戶政十八

漕運下

請復河運芻言

附地洞八辨

丁顯

復河運議

范本禮

海運河運議

李慶恆



皇朝經世文續編卷四十一

上海葛士濬子源輯

戶政十八

漕運下

請復河運芻言

附地洞八辨

丁顯

自古治國家者未有以運道爲緩圖者也虞都冀州嵒總賦於王畿而貢物經行卽爲運道之祖漢興卽位關中始引渭渠以漕山東之粟旋濬褒斜以致漢中之穀初不過歲運數十萬石及其盛時歲益漕六百萬石類由河渠疏利治之有方魏武篡漢偏安洛陽然猶專任鄧艾開廣漕渠以達江淮代魏者晉也其時五胡亂華勢成割據而武帝猶鑿陝南山以致漕米懷帝猶修千金碣以運軍糧宋齊梁陳遞都金陵米粟饒多不煩轉運而西魏則僻處長安道險人弊車牛之費萬分艱難猶賴刁雍畫策造船於嶂岷山河水之次自是國有儲糧人稱安樂及隋開皇引渭鑿渠轉運倉粟百姓稱便煬帝不道發百餘萬衆開永濟渠舳舻數百里並載軍糧雖積粟至二千六百萬石而勞民傷財不旋轉而離叛隨之矣有唐一代其轉漕稱善者裴耀卿劉晏也而晏視耀卿尤稱最其法緣水置倉節級轉運江船不入汴汴船不入河河船不入渭民不疲勞而米無覆溺緣國家建都長安其勢不能不爾而晏之囊米載舟勝於耀卿函

脚營窖也晏之歇糧支江勝於耀卿雇船載運也宋都大梁有四河以行漕曰汴河曰黃河曰惠民河曰廣濟河歲運粟五百五十萬石黃河不久卽罷惟汴河達漕爲多且久其制江浙荆湖之米輸真楚泗洲轉般倉沂流入汴以達京師此外自廣濟河而運京者僅京東之十七州由惠民河而運京者僅陳潁許蔡等六州嗣因轉般法壞又改爲直達綱以致汭流鄉保時出騷擾公私橫費靡有紀極元都朝燕伯顏獻海運之策始猶議闢膠萊故道旋以沙民朱清張瑄羅璧能識海道試行有功遂爲一代良法然考之元史仍使壽張尹韓仲暉開會通河歲運漕米數十萬石以實京都防微杜漸俱有精心明之永樂雖行海運而江南之粟且由淮河運入潁岐別以大車載赴黃河轉輸金臺及會通河成海運悉罷而東南四百六十萬石漕米全由河運矣 聖朝鼎興亦主河運道光六年間因清口淤澱暫行海運一次次年卽罷乃自咸豐初年蘭陽決口汶爲黃遏而運道一大變同治四年試行河運臨清以南全行乾涸船抵張秋藉黃浮送磨淺起剝開閘梗塞秋高水落難望回空此二十餘年京倉米石均仗蘇浙本色浮海抵津而河運之行不絕如縷於是中外大臣各獻嘉謨有請全行海運者有議引衛濟漕者有謂東昌二百里陸運轉般者有以折價採買爲便者有 奏挽黃歸故者有籌築隄束黃者築室道謀言人人殊請分晰而詳言之爲海運之說者曰元行海運中外稱善 聖祖 列宗間欲試行況今洋船駢集海若獻靈蘇

浙之漕轉運十年風濤之險未經盜賊之氛悉靖積慣而出大洋非若元人之沿山求喚也則徑熟經旬而抵京倉非若河運之經年交兌也則期捷水脚有定價無恤丁修艚之銀也則費省開洋有定時無修河守閘之擾也則法優與其竭蹶河干藉黃而帑金虛擲曷如聯翩洋舸招商而天庾充盈則全行海運便爲引衛之說者曰大洋之險非可以久歷也汶爲黃隔黃挾汶行清水涓滴不能送漕舍海運而新是圖則盍引衛濟運衛水之距張秋相去僅一百數十里而由元城以注該鎮亦勢如建瓴誠能不惜經費濬開引河則衛水盛漲卽可瀉注臨清復於張秋建築水櫃儲存清水並引范濮壽張雨水隨時傾注冬春則閉閘蓄清夏秋則啟閘灌運昔白英激汶濟漕亦此法也杜藉黃之淤襲引汶之策法未有善於此者則引衛入運便爲轉般之說者曰航海濬衛猶冒險而傷財也漕船阻遏不過東昌二百一十三里轉般輪運費亦不多或仿董搏霄負米更遞之謀或循裴耀卿置倉轉輸之法仍由臨清以運天津江淮之船不渡河則免回空守凍之累津淀之船不入閘則無套塘守汛之憂王念豐轉般私議蔡繼漕復轉運疏古人有言之者矣則陸運轉般便爲採買之說者曰之數者均需於運也今有不需於運而自能足國者採買是也僅令各省照米折銀運繳京庫特派大員於就近豐稔府縣採辦米穀則居奇之徒不招而集關東田地肥饒且運其有餘以赴江浙閩廣採買到京尤屬易易況今輪船裝載經旬萬里川米湘

粟購運不難酌量擡價商販卽來矣運糧於各幫支兌而舟車盤剝其勢紛購米於近省交易而商賈駢臻其政壹則不如採買便爲挽黃歸故之說者曰今之議改運者以黃河奪濟挾汶入海今如挽黃歸故則河運似可復舊矣攷黃河故道曩由雲梯關入海自咸豐初年銅瓦廂決口遂改由牡蠣口經行今欲挽之而南首濬河身數千里分段修補長隄以次塞決合龍總估銀二千六百萬兩分省攤派分年舉辦似易爲力如此則清口糧艘自有淮水浮送而張秋漕米仍藉汶水運行則挽黃歸故便而籌築隄束黃之說者曰否否航海權謀也非經久之策也引衛變例也非常易之圖也轉般採買可以暫試不可以爲國典也挽黃歸故勢需緩圖不可以爲急救法也近年黃水散漫決口太多不獨汶水之清未能濟運卽黃水之濁非際伏秋盛汛亦不能貫注張秋今惟將各口堵合收束長隄則黃水擡高自能抵送臨清雖明知逐年濬淤似非良策然以天庾正供係根本要圖卽萬分爲難亦不能不極力興辦則築隄束黃便此數策者均各自抒偉論卓有識力舉而行之補偏救弊亦足爲達變之方救時之術矣然以顯默揣天時遠揆地利靜審人心細察水性竊謂全行海運有當慮者四引衛入運有不便者六轉般爲權變之方而又有五難採買係暫行之法而亦有三害挽黃歸故復舊章也而有不足恃者七築隄束黃急先務也而有可議者八請畢其說元行海運成數具在覆溺極多者僅至元二十三年每石漂覆三斗四升零

而分年科算視河運之短欠比較仍優卽明永樂初年王宗沐小覷鷹游門傾覆七舟亦因溟渤初行洋道未熟致有此患非海運之咎也風濤之險似不足爲海運憂不知天怒難知海程窺遠萬一如咸豐二年淮安五月十二日之颶風飛舟拔樹光緒五年海州四月初四日之颶風拋石移莊其傾覆之數豈可逆料卽託聖朝洪福漕米挽行百靈呵護斷不如斯要之老成謀國動出萬全似貴存慎以將事之心斷不可出鋌而走險之策此海運之當慮者一也閩粵南洋或有海氛而由吳淞以達大沽沙礮水淺賊寇全清卽有萌蘖蘇松則有提鎮登萊則有總兵隨時巡緝斷不懼以綠林盜舶擄劫黑水軍稽加以海防久撤萬國來賓商舶星羅輪航雨集猜嫌不啟盟好永敦方將同護帝京誰敢憑陵糧舸然以今九瀛雜處難保不一旅尋仇儻或焦齒貫胸互相啟釁鯤程鼉舫日肆干戈鷸蚌相持橫截要路或鬪兵漚水而十傲之糧艇不來或角勝燕臺而百里之津門遽梗安山之河運久患滯淤沙艇之海糧又復隔絕京倉暫竭良可隱憂此海運之當慮者二也然此猶人所易料者也更有人未嘗料而其勢將來必梗塞不能行者則大沽口日久淤澱之患也元行海運以來洋道之變遷昭昭可考元之漕米均由劉家河入海卽古之婁江舊稱口寬二十丈水深一百尺今則口門之外淤爲平陸矣明初運艘例由崇明廖角嘴轉灣浮海今有該處淤淺與戲臺沙相接海舟不能出入矣登州成山爲漕船假道之區曩稱水深千尺

船不可近今則與勞薛諸山矗峙沙洲矣安東雲梯關漕船間或經行黃河本由此入海今則海口遠徙灘淤成田升科起稅且逾二百里口門之外並有沙梗五條矣大沽口距鐵門關祇二百八十里黃挾沙行爲料射之形勢漸浮送近年輪船赴津秋冬水小業經起剝待潮而行不數十年而牡蠣口淤遏又將如雲梯關外接築長隄沙梗凝接勢不能不壅遏大沽江浙漕米又復未能抵京卽藉外洋機器疏濬深通而積沙將去流沙旋來日積月高斷不能按期交兌此海運之當慮者三也更有甚者漕河全盛時糧船之水手河岸之繹夫集鎮之窮黎藉此爲衣食者不啻數百萬人自咸豐初年河徙漕停粵氛猖獗無業游民聽其遣散結黨成羣謀生無術勢不得不流而爲賊捻逆滋擾淮潁徐宿之人居多往年賊黨繁滋未始非漕運之羈阻激而爲此也我朝聖聖相承二百數十年來不改河運卽道光六年海運試行其行徑之熟兌期之捷用費之省立法之優未嘗不可爲長久計而聖諭煌煌一則曰此係一時權宜之策再則曰來年仍由河運方爲妥善聖謨廣運燭照無遺豈不以歷朝良法未可變更億萬民人難於位置明知耗費良多而河運歷年如故亦謂成大事者不計小費圖遠略者不務近功遠慮深謀實有超出尋常萬萬者今則軍務肅清四方底定疊奉綸音營勇以次裁撤邇來分散者猶未甚多仍易防檢將來大股支遣非謀位置之地難保不別釀事端此等閒民率由召募均係强悍無賴之徒一

且撒手歸田毫無約束薄有蓄積揮霍立窮逼迫饑寒復萌故智小則明火案多大則揭竿變起勦辦殲除又不能不煩兵力欲以弭兵而轉致興兵其害豈有已時綜計國家各務惟河運復行安置之人極多全漕起運船數非一萬數千隻不可以每船二十人而論水手絳夫此中可容數十萬人加以沿河小本各集窮民藉此養活實繁有徒雖屬奸民苟能溫飽亦誰肯自作不靖設以長行海運遂廢河運而地方終不能安定其若之何以知河運之廢興實關國運之治亂此海運之當慮者四也引衛濟漕極爲良策而利之所在卽爲弊之所伏由元城縣遽開新渠百數十里不能不遷移集鎮挖廢田疇設或抗違威逼勢迫閭閻騷擾不可勝言此引衛之不便者一也經行之地豈少墳塋移葬遷柩慘及枯骨昔河帥張欲於盱眙溜淮套等處鑿山引淮聖祖仁皇帝南巡欽聞且因塚骨纍纍卒寢其議今由元城館陶鑿渠開河難保不遷移邱墓此引衛之不便者二也衛水來源本清而盛漲猝臨濁漳輒復挾沁倒漾怒濤渾浪一發難收遏之則水勢仍微聽之則泥淤又墊欲避河患而卒與河患相同此引衛之不便者三也蘆鹽入豫由衛運行今欲障之東流卽不能不攔河設閘一經閉遏蘆稅鹽釐致多梗塞國課有虧此引衛之不便者四也豫糧來往本由衛河東運兩岸民田尤資灌溉今欲引以濟漕勢必建閘閉壩從此商賈船隻停攔不行沿岸農民石田致慨漕粟雖能勉運而民生格礙良多此引衛之不便者五也汶

水襲引東省各泉普行湍注支派甚多衛水發源本弱卽極力蓄儲設法展寬斷不如汶水之旺縱或伏秋大汎水勢有餘而上流容受不多盛漲消耗亦易如今十數幫之船誠不難乘時蓄送設行全漕春往秋還周年不息終有易竭之時催運押空刻刻可慮此引衛之不便者六也轉般之法行之於古則爲權衡而行之於今則多梗滯木牛流馬之經轉轂括囊之法亦因水程寫遠萬不能不行此法卽唐之緣水置倉宋之易船摺梗運均由河道經行亦未嘗陸輓數百里之遙也今如東昌之道永梗而僅恃轉般以入御河車負馬馱不絕於道人夫百萬多費帑金一難也道阻且長經管匪易一經陰晦霖變尤多而奸民之盜竊霖雨之漂淌防不勝防護不勝護浮沉虧耗誰爲補償二難也置倉設官又增帑項不獨薄贖紛煩亦且書差需索多一番交割卽多一分開銷出納轉移更多周折三難也民夫運價定例雖嚴而胥吏持權多方舞弊一隙稍疏小則短扣額價而威勢相凌大則勒派民夫而絲毫不給相沿成習變爲差徭控告無門民遭荼毒四難也御河以東剝船無多增之不能造之不易循環接運歲月稽延久積臨清亦滋流弊軍餉官俸未能如期五難也採買之法少則易行多則難購今以百萬漕糧遽欲採買卽在南省購辦而搭附輪船弊與海運相等一害也近畿採運數逾百萬太倉之粟安能足額卽當豐歲價亦高昂抑之則商賈不來聽之則閭閻食貴二害也派員購辦非不廉明而勒限銷批急如星火勢處急迫亦

不能不倒行逆施或以京倉要餉而禁民戶私藏或以官價成交而勒市僧賤售加以奴隸分肥差牙索費苛擾凌虐轉以累民三害也無已則挽黃歸故而亦有不足恃者濬修塞決業經估銀二千六百萬兩此等鉅款 國庫支絀之秋豈易勻撥而自粵捻滋擾地方大戶幫助軍餉藏積俱空今再捐勸亦屬寥寥部議分派各省逐年攤辦而竊思近年大局海防未靖兵餉方殷加以秦晉燕趙水旱洊臻賑恤之銀靡歲不撥如再協餉治河能保其源源而來乎此挽黃之不足恃者一也二千里之河身高者二丈老淤凝結飛沙盈渠雖撥帑金豈易開它此段暢而彼段仍淤其功不成今歲開而明年又塞其功亦不成即全河治矣而或有數十里之梗數千丈之塞其功仍不成此挽黃之不足恃者二也乾隄二千里之遙逐年風雨大段毀壞加以築圩禦捻劇隄爲濠蘭儀以東不啻數千百處遽加修補未易彌縫稍不如式一經汎漲處處可決決於南而銅碭睢桃足爲洪湖之患決於北而曹單豐沛仍爲運道之憂此挽黃之不足恃者三也黃河遷徙天寶主之今銅瓦廂決口寬逾十里跌塘五丈東趨利津實有歸壑之勢勉強堵塞豈易合龍設使閉而復決千萬金錢又成虛擲歷攷 國初以來黃河決口寬僅四五百丈猶且屢塞屢決閱數年而不成豐口初決費帑五百萬而迄少成功馬港改灣耗銀八百萬而仍由舊道近代覆車可爲明鑒矣昔河始奪淮百法挽其北行而不能今河復奪濟恐百法挽其南行而不能此挽黃之不足

恃者四也且勿謂其不能合龍也即使緩以時日倍籌鉅帑強而挽之南行而清口套塘之法今日亦不能行歷年淤遏黃高淤淮而自七堡一決洪湖高仰引河捫口淮水不能暢出即閉禮壩涓涓細流僅恃一線之張福口淮弱黃強安能浮送道光末年百法補苴且有節屆孟秋而楊莊之船始報盡者是以迭次奏行海運蓋知河運有岌岌不可終日之勢也今日淮口之淤更勝於昔引河未闢湖水不高黃即復故而淮爲黃遏勢亦不能啟壩送漕黃河不歸故而運道之梗在張秋黃河即歸故而運道之梗轉在楊莊此挽黃之不足恃者五也不獨此也腰圩石隄本多殘缺即或估脩豈能保固而洪澤半湖形勢如磔一經籌堵禮壩淮水擡高經臨盛汎湖不能容高堰即不可保如再潰決則高寶東岸又將有清水潭荷花塘之憂南運梗塞更在淮揚此挽黃之不足恃者六也且淮揚之憂亦不僅在運道已也往年黃河奪淮二瀆並行洪湖之水全以裹下河爲壑漂沒田廬淹傷禾稼幾於無歲無之今幸黃河遷徙大憲奏請導淮民慶再生功幸能成而河又欲奪之昏墊之慘又如昔時黃與濟合培堰而山東即弭水災黃並淮行入汎而淮南永爲澤國非惟民庶吞聲亦且漕糧減額此挽黃之不足恃者七也築隄束黃固屬今日要圖而僅恃築隄束黃卽爲河防弊政往年漕舫七千按時浮送水猶有餘今以漕糧僅十數幫運船僅五百隻尙且十分危險待汎而行設起全漕卽或束黃亦難終年擡送此築隄之有可議者一也邇

日漕艘歷年遲鈍非際大汛經臨卽致束手無策幸而秋漲未消猶可按時抵次不幸而天寒水落卽難
畫策回空僅恃束黃交兌回船不能飛渡此築隄之有可議者二也運糧船價本自不多而每年濬淤糜
帑轉甚更加添絳剝淺在在需銀 國家力顧京倉斷不吝此庫款而以易窮之鉅帑填難盡之漏卮殊
爲可惜僅議束黃淤遏更甚年年耗蠹日益加增此築隄之有可議者三也臨清以南官河綿遠不惟米
糧轉運亦且商賈往來今僅築隄束黃勢惟伏秋盛汛浮送漕船帆檣鱗集而秋冬水涸舟楫不行坐使
兩岸市廛仍然減色此築隄之有可議者四也萬里漕河有關 國運地脈泉源豈可中斷今僅築隄束
黃而不引汶水貫注致使河瀆朝宗轉等溝塍積潦活水不來民風更弱此築隄之有可議者五也張秋
開壩曩爲蓄清次第啟除良爲善策今僅束黃濟運而未有清水來源挾入浮沙閘閘兜束漸且爲患於
御河此築隄之有可議者六也黃不南徙自須固築金隄以爲保障加培民堰以遏洪流僅議束黃濟運
而上下游卒歸緩辦簡陋補苴游移兩可致使黃河之患一決於侯家林再決於石莊戶頻年漫溢肆虐
山東設再因循陽穀東阿處處可決且將爲害於 帝畿此築隄之有可議者七也僅以黃水助運近年
大汛猶可設法擡高挽推漕米然查荆門各閘沙泥凝結較之昔年業高數尺運送一年卽高仰一年人
力無多帑金易盡安能去此日積月累之沙譬如今年高一尺者來年卽高二尺矣今年高五尺者來年

卽高六尺矣浸假而河渠壅遏高與閘齊汎漲卽臨運送漕糧竊患求如今日而亦不可得此築隄之有可議者八也引衛濟漕如彼其左而挽黃歸故又如此其難轉般豈裕國之方採買非經邦之策居今日而議漕運顯反覆思維亦仍不外以河爲宗以海爲輔以築隄爲要著以禦黃爲首圖是在設法以引導之相機以修築之隨時以疏濬之擇地以儲蓄之可改者改之當因者因之而已矣且夫黃水由大清河入海是國家之福也河出利津乃係漢唐千乘故道經行千年迄少水患咸豐改道以來南河每年省歲脩銀七百萬兩豈非明驗而蘭陽以東濱黃濱淮灘岸又復涸出良田千百萬頃增科起稅國賦加多而且大河雄闊萬里來源環抱神京尤據形勝粵捻四出劫掠鄒滕迄無樂歲而臨流輒反卒未能飛渡黃河天塹之險不異長江濁浪一渠勝於雄兵十萬矣近今要策勢惟有將齊河濟陽利津霑化接築遙隄而南岸本爲泰山舊足酌加沙堰卽足屏障千秋其中流仍須如南河往年設混江龍十數具往來疏剔則沙淤永不壅遏歷觀乾隆嘉慶之時名臣輩出吏部尙書孫長洲相國嵇均以改河入大清爲請咸豐初年安徽巡撫福以口決蘭儀奏請河由利津入海實有二利四便此外錢辛楣文集孫淵如奏稿魏默深籌河篇孫漢孫治河疏均謂河入利津爲今日之急務河未奪濟猶望其遷徙以減東南半壁之災今河自奪濟此乃朝廷轉亂爲治之機閭閻易危爲安之日而猶鯁鯁焉挽使南流甚非長治

久安之策也顯聞披經世之篇習聞名賢之論遠稽掌故於歷朝近訪泉源於數省蠡指管窺間有論說其謂設法引導相機修築諸大政非託空言試而行之安在河運之不可復乎請終其說所謂說法引導者奈何分水一口卽南旺湖本爲水脊南高韓莊百十有六尺北高臨清九十尺該口有東來汶水挾以百數十泉滔滔瀉注障以石壩遏以斗門其派極多其勢極旺分流濟運極爲靈便漕船越安山經荆門轉御河道歷四百里地經十九閘均藉汶水逐漸浮送 國朝以來未聞竭蹶而自蘭陽一決黃河貫運汶水抵濟黃俱挾以東行以致汶水清流涓滴不能注入張秋而貫入臨清以南運河者僅有汎漲濁沙逐年淤遏日積日高且黃河歷年決口水勢漫溢伏秋之時面寬數十里毫無約束引衛不能禦黃不可是以漕米經行萬分艱險始猶仿行套塘近則淤墊太高將欲蓄塘套送而亦難之又難爲今之策欲行漕米惟有仍引汶水而汶爲黃隔欲引汶水計惟仿淮安楊家廟創修地洞之法俾汶水之清仍由河底地洞伏行以達張秋庶幾濁浪不再淺淤而清水如初支送策雖創而實因制雖新而實舊也其策創修雙孔地洞六百丈各高五尺六寸寬三尺二寸建築兩隄口寬以五百丈爲準兩隄之中各建一壩一爲臨黃一爲攔黃兩壩之外復建兩閘一爲導清一爲復清酌建金門以爲漕船出入地步閘壩造修均騎地洞而地洞之設又須南口稍高入口配戴廟閘出口配平水閘方能勢如瓴建如此則隄中之五百丈

可容黃水經行而隄外之一百丈分爲運船屯陽船到安山一如南河套塘之法因利乘便是亦計之善者援古證今成規具在其大者如淮南裏河底設立木洞而河西數十里積潦行於地中俱以東鄉爲壑其小者如杭湖靈隱寺套竹爲筒挹泉於韜光而水可引於五里之外其成自天者濟水伏流千里迄山東濟南激而爲趵突泉其成於人者金陵貢院以洋鐵爲管周圍旋繞激引江水而試場數萬人之飲食藉以不竭卽淺知深因近悟遠安在清水之不可引導乎所謂相機修築者奈河黃河渾濁束以高隄方能以海爲壑否則沙緩停淤壅遏更速且東昌運道汶水由洞濟運尤須以隄障禦黃流不使泥沙挾入而自蘭陽報決黃水全注張秋歷年大溜南趨又將洪川口霍家橋新興屯等處次第衝開遂致伏秋汛漲數十里地一片汪洋而沙河及趙王河反行乾涸漕出戴廟無岸無隄插標繞坡十分艱棘矧以濱河兩岸疊被奇災小則漫溢出槽遠近田廬全歸水國大則衝刷開口當衝集鎮盡付洪濤微特安山逼近昏墊罹災卽陽穀以東十數州縣亦復饑溺流離不堪言狀百姓奚辜受此困阨率因東省紳耆時以挽黃歸故爲心而不爲之策長久歷年大吏籌款惟艱有揚湯止沸之謀無釜底抽薪之術漕運之憂亦地方之劫也殊不知黃河遷徙人力難回頻年毀裂累已難堪設再因循害將曷極今幸霍家橋張家志門各處均已流沙積漸壅遏口門計惟有審度地勢迅築長隄撥帑集夫力期鞏固而青惠蒲濱兩岸以次

增培民堰接建遙隄庶民衆同慶安康而漕運不憂梗塞此外禦汶石壩蓄水開牆湖岸之傾欹斗門之毀敗尤須一例興修認真舉辦不此之務而猶以築隄爲緩圖焉非裕國安民之策也雖然設洞以引汶築隄以攔黃將來之沙可不來而已積之沙猶終遏也可奈何則惟隨時疏濬之可乎東黃濟運沙日積而日多引汶濟漕沙日去而日少此乃一勞永逸之方一費久省之術特以臨清以南沙堆如山地段太長程功匪易非分年以開濬則急遽而不能成非積日以累功則陵蹶而不可達該河壅積有年開闢兜勒董是役者首在疏濬中淤配平各閘俾十數萬之糧魚貫而入然後以次開寬逐年掘挖務使丈尺寬深復如舊制則行十萬之漕可也行百萬之漕可也卽行四百萬之全漕亦可也設以帑金太鉅不易措施則又有藉助兵力之法昔同治八年東臬劉估濬張秋河身因駐紮銘字各營而酌撥津貼光緒六年督相李以大關天津海口合三十四營兵力而另加犒賞軍可杜其寬閒帑不憂其告竭 奏而行之是亦通權達變之方也其餘陸續當辦者壅滯山泉則派員搜剔紆回山澗則設法爬疏管泉各職亦須實力實心隨時疏導東省之運道安患其再有停滯乎然吾攷運河數千里極易淤遏者首在東昌次卽在衆興今東昌之地擬請設洞引清按閘疏濬則張秋之運河治矣而衆興之運河仍患水小則又奚說此其勢非擇地儲蓄不可韓莊以東曩借微山湖水以送船宿遷以南例資駱馬湖水以濟運今則駱馬一

湖屯爲官田蒙沂之水不復儲蓄俱由尾閘洩入六塘王柳二閘幾爲虛設近來漕運俱藉山東湖水賈注桃南時而東湖水旺或能開閘分溜縱其運行設際東湖水微接濟本汛猶憂不足安能再讓有餘以濟下流勢不能不開閘蓄清以保本分桃宿以東遂憂淺涸光緒二年期屆四月糧艘淺擱猶在楊莊職此之故今縱不能合駱馬全湖屯水接運亦宜相擇該湖卑窪之區圈以圩堰遏以閘壩以爲漕船復行之地廢田不多而卽能源源入運是亦降格補救法也不以此爲當務蒙沂泉源聽其旁洩而僅恃鄰省之水以徼幸於萬一十數幫船猶憂膠滯設行全漕其何以濟至如漕政之當改者亦甚多多矣會典開載淺船定式梁頻不逾一丈入水不逾四尺邇來江豫艚駁猶符定制而江浙湖廣等船圖載私貨深有至七八尺者遂致運水稍小守板蓄水違限愆期況今各湖淤墊儲水不多越式大船安能行運而且一般赴津糜耗良多有造船之費有修艚之銀有屯田之租有月贈之錢一石之糧數倍運之而州縣之賠累黎庶之加徵官民交困更有積重難返之形尤甚者今日之丁卽明朝之軍始因稍寬民力暫令支運循行日久遂改長運浸假而勒之造船浸假而坐之編冊其歷年之賠墊積歲之凋殘患已不可勝言此中或有虧欠照例監追間有殷丁押提僉換斷以頂運責以賠糧百姓窮親如罹湯火破產傾家不知凡幾而强有力者又復藉以潛米刁勒州縣挾制關卡買幫包貨百弊叢生矧漕糧耗米本有定例邇來逐

漸加增橫立名目於是有贈耗贏米有輕齎銀兩有貼補定額有通關例費州縣虧挪遂不能不增加民賦億萬蒼黎豈堪受此浮收之累若此者均河運之蠹也船式不改則妨漕運法不改則妨帑軍丁不改則妨民漕費不改則妨政曩因昇平日久積習相承固結牢籠更張匪易今則弊端釐剔漕政一新有可改之機又處能改之勢千載一時會逢其適是在大憲因時而裁酌焉亦漕運之急務也而其所當因者亦自有在漕米冬兌冬開立有則例而回空趲運各有限期斷不容一刻遲緩近因水次耽延歷逾 欽限沿途阻滯在在展期以故鑿冰阻凍積壓年年今欲往還迅速自須查照限期且今之長運卽宋之直達綱也本少轉輓之費又免耗竊之虞準挾土宜足爲津貼卽交兌稍遲較之支運接運猶爲簡便再議改章轉滋紛擾便民而不害民利國而非病國非甚不得已亦何妨相因勿替耶詩曰不愆不忘率由舊章書曰監于成憲永無愆此之謂矣總之策貴酌其純疵謀必審乎正變統籌全局乃能扼要以圖功採集羣言始可折衷而立論際漕政陵夷之日爲權宜旋斡之方以浮海與達河較海危而河安也以導衛與引汶較衛紆而汶捷也挽黃之與導清一逆而一順也築隄之與設洞一塞而一通也輓粟長行卽可免轉般之煩擾也抵京充裕並不煩採買之紛更也雇船有額價以視舢板水脚亦不甚懸殊也漕法可改章從此積慣弊端亦可以裁汰也 聖朝軍政以外首重漕糧部議疊頒不廢河運誠以根本要圖須

立經常良策顯狂瞽之言雖未必確有把握而審時度勢似易圖功儻詢於芻蕘而擇善以從焉庶幾東省運道清流激湍兩淮河渠一無阻滯權以江淮皖豫米穀先行起運暫時河未展寬蘇松全浙漕糧仍行海運一俟疏濬經年河渠復舊然後以蘇浙大幫全由河運卽湖廣遠省亦卽次第徵收本色陸續而來則進退權自我操遲速不爲人制從此遠服輸將米仍來於八省 太倉堆積粟可支乎十年不獨天庾充足續媿乾嘉亦且貢物駢臻治侔虞夏豈不懿哉

附地洞八辨

予撰請復河運稿成或有難之者曰子欲設洞引汶其想可謂幻矣惟黃河水勢猛濶秋冬水涸之時尙深一二丈地洞安能設乎顯曰此其時可爲也查張秋以南爲沙河再南爲趙王河再南爲老黃河黃河遷徙靡常幸隄尙未築自可於此數十里地豫擇乾涸卑窪之處將開洞造成然后因勢築隄移河就洞不獨事半功倍且功料鞏固可以持久或又難之曰黃河濁浪力能拔山今雖將洞造成一旦黃水經臨不慮其毀裂乎顯曰是非可以苟且爲也洞底豫排梅花木椿其洞每丈須以二丈六尺長鐵椿橫以鐵柵圈定天硨打入地中其東面係下流以鐵絡船滿裝碎石層層靠定再製鐵牛十座以資擎托其西面亦堆碎石毋須鐵船每丈以十二尺長粗鐵索綰定一頭繫於另外鐵椿夯入河底以

爲扯拉洞面間丈覆以長大鐵瓦或卽製造鐵洞如此則大溜卽臨庶幾不患衝突矣或又難之曰如此製造可免衝突然洞式太長不慮其滲漏乎黃水浸入奈何顯曰是又非可以草率將也其洞須以江廣大木做成四寸厚板縫口合槽俱以原繳漆汁鑲嵌接頭之處間有不合須如練船不使有一隙之疏然後外融鐵板裏加滿漆如能不惜帑金以錫爲膽更能持久如是亦不致於滲漏矣或又難之曰地洞高以五尺六寸寬以三尺二寸爲準其式不太鉅乎顯曰是蓋有道焉汶水之清雖不如黃水之濁然山礮之沙礫隄岸之泥土難保不隨溜擁入洞中一有淤遏亦須隨時疏濬如此寬長畚揭之往來人夫之出入方能有容且一經漕船套塘亦須汶水全注方不掣肘更可以宣洩盛漲有餘之水其平日僅開一洞仍須收小口門以爲蓄水之地或又難之曰地洞須六百尺其式不太長乎顯曰予亦籌之熟矣兩隄之中須能容納黃水盛漲兩隄之中須能容船四千隻方能綽有餘裕然兩隄仍須各長十里方不擁擠兼防火患或又難之曰製造地洞之法照此亦須銀數十萬兩再加築隄之費又須帑金數百萬兩今估引衛功程僅需銀七十餘萬兩而設洞之費加數倍焉不太糜帑乎顯曰引衛之銀僅就河言之也未嘗議及築隄也引汶固須築隄卽導衛亦須築隄不能偏廢也且衛水之弱終不如汶水之旺導衛卽微倖成功浮送全漕仍無把握如能引汶達入張秋則往年成案具在勢不難

浮送全漕也或又難之曰卽設洞浮送全漕設黃河再淤又將若何顯曰濟水之清足以刷黃水之濁且以混江龍逐日爬梳斷不憂其淤墊南河之壞以罷混江龍而始日卽停淤也此物運之則不覺有功罷之則立形受害果能不惜帑金則黃河永無停滯之患或又難之曰黃河遷徙靡定設相度地勢未能移河就洞欲於水底施功其亦可乎顯曰是亦難矣然可以設法爲之其法須擇河面極寬水勢極淺之處豫以外洋機器將設洞處河底掘挖配平兩閘次以椿木水碓打入然后密排鐵椿以一半夯入河底一半浮出水面配平橫柵跟隨洞勢河心搭架卽飭夫匠齊集水面橫擔鐵柵就勢迅將地洞造成一俟齊全同時以天礮夯入水底惟東面之鐵船鐵牛須豫安設方獲擎托之力其綰合鐵索之椿則同時夯入徐覆鐵瓦惟漿灰不易施功耳地洞安定陸續築隄四道俱騎地洞一如船隄之式其地洞首尾俱出隄外各功齊全隨將洞中沙淤剔出則汶水亦可引導送漕特幣金須加數倍耳

復河運議

范本禮

天下事有一定而不可變者理之所在是也有一變而不可復者勢之所趨是也二者似相反而實相因河運者非一定不可變之制也旣變焉則不可復虞夏之世冀州田中中賦上上總秬秠粟米皆賦於甸服故上無仰食之病下無轉輸之勞今舍三代培養本原之道而專取唐宋以來苟且目前之計自棄其

食以仰食於人非所以重根本也故以理而言欲爲天下計久長河運固在所必變者已河運之變爲海運也固非能爲根本計者徒以清口淤澀漕滯難通勢迫使然耳勢之來雖聖人無如之何故旣變焉則不可復議者徒見近日中法之役和議速成未始不由於海運阻滯因欲規復河運謂河運復而後海疆有事乃不虞受制於人而不知其勢之不可也夫欲復河運必先治運河考同治十年曾文正疏陳河運艱難如嶧之大泛口滕之郝山口皆嫌淺窄自微山湖至袁口間更處處淤淺或數十丈或百餘丈十餘年來淤也當更甚治之也當亦更難且無論治運河之難也雖治之亦終無益何也黃河穿運以後汶不能越黃濟運安山以北益患乾涸同治初年大溜全趨張秋尙能灌運嗣穿運之處日徙以南自安山至八里廟五十餘里運堤節節穿斷黃流湍急漕舟難行運河可治黃之穿運者不可治也況道光六年始行海運繇於清口淤墊清口淤墊繇於引黃濟運當其時黃未北徙也故黃無論南北行運河不能不爲所穿運爲黃穿運道必不能無阻滯故曰河運之不可復者勢所趨也夫議者亦未見河運之害耳丁夫之騷擾有司不敢詰風水之阻滯人力不能施當其時蓋公私苦之矣五十餘年後忘其前不慮其後鯁鯁焉以復河運爲急務何見之淺也且河運果復萬一海疆有警豈真能不制於人哉何也河運固不能越天津而抵通州也而得以河運爲萬全策哉然則如之何而可也曰因勢利導救時之務也務農足食

立國之本也直隸水利所以屢興屢廢者非地不可耕也民情而不見其害也今海運一阻糧食騰貴民亦知仰食於人之不足恃矣及此時而道之浚溝渠給田器教樹藝力田者有賞而賦不加征行以漸持以恆務使根本之地不仰給於人此理之正也雖虞夏之盛何以遠過於此哉

海運河運議

李慶恆

國家定鼎燕京承前明之舊歲輸東南之粟令漕卒自至所在州縣支運輸輓之費歲率二三倍行之二百年道光季年天子念元元之困惻然憫之乃下大臣議復海運行之至今數十載矣東南瘡痍之後得以裁浮費稍稍與民休息蓋其效已覩議者猶深謀遠慮防海道梗塞之患欲並試河運請得借箸以籌之當元之時伯顏以河漕繁費令朱清張瑄通海道由劉家港開洋至撐腳沙轉沙嘴至三沙洋子江過萬里長灘經清水黑水二洋至成山過劉島至之罘沙門二島放萊州大洋抵略河口終元之世獲其利然漂溺無歲無之而季世終以不給明成祖遷都北平鑒亡元之弊命疏會通河以輓漕是時南直隸蘇松常之粟浙江杭嘉湖之粟送至淮安鎮江廬鳳淮揚之粟送至徐州徐州之粟山東兗州之粟送至濟甯並以裏河船遞送至京師所謂轉運也當時民以爲不堪乃改於淮安瓜州水次增加船腳耗米對船貼兌與軍領運謂之兌運民猶以爲不堪復改於本府州縣附近水次交兌而增加漕卒過江腳耗於

是乎定長運 本朝因革損益知明制之未可輕廢故不敢惜一時之費而改二百餘年之舊然而法久弊滋漕卒之需索官司之浮冒紳民之輕重不齊蓋至 宣宗成皇帝之世而東南重困矣河運之改而由海固其勢不得然而亦因以蘇斯民之困也大抵海道速旬日可至輸輓之費又省效可旦夕覩然一旦海氛不靖梗塞阻隔倉卒不可救而漂沒覆溺之患猶小河運雖無此慮然三四千里不三月不至所費既鉅重爲民生困二者各弊是以 國家非甚不獲已不輕言變法蓋其慎如此今海運行二十年漕大便利當事者復議欲復其舊豈不以 朝廷二百年之法子孫萬世無窮之利不可以遽廢且自停運以來漕卒無所得食山東河南諸省盜賊蠭起十數年而始滅中原之元氣實傷於此又以逆夷窺伺畿甸萬一有變以舟師截我之糧道事尤有大可憂者夫此誠不可不爲之計然第防海運之害而不知今日河運之未可驟復即使復之而亦不能保其有利而無害蓋河運一復所費必鉅所費既鉅勢不得不取之民間小民無知不以爲勢之不得然而以爲上仍不恤民之困至於官吏之藉端加派而浮冒侵漁之弊又將不可勝言夫民者邦之本也孔子與子貢論政甯去食而不失民之信聖人豈爲是迂論哉誠以無民而有食不可以立國也 國家承 列聖深仁厚澤漸漬於人心斬木揭竿之徒旋起而旋滅亦以民之固結者深故根本固而外患不足以搖之今東南甫定又蒙 毅皇帝加恩減江南之漕可

謂勤恤民隱矣使復以河運之故而小民重受昔日之累是爲德不卒甚非有國家者久安長治之策也然則如之何而可曰漕運無得失漕運之多寡乃其得失漢初漕山東粟以給中都歲止數十萬石其後則歲六百萬唐初歲不過二十萬其後三歲七百萬宋初亦不過數十萬其後至五百五十萬夫其後之所以不得不多者羨卒之太多冗員之未去西北之水利未興不去其不得不多之原以馴復於不漕自裕之法區區講目前之得失抑亦治其標而不知治其本也爲今之計亦惟汰羨卒裁冗員興水利而已矣夫國初養旗丁以拱衛京師比於漢之南北軍誠得內重外輕之勢然二百年來生齒日繁使皆仰食天庾必不可久今若定以額數簡其精銳別爲一軍其餘並令各尋所業與漢人等一轉移閒而國家之所省多矣至於去冗員則非閉捐例嚴保舉不可夫今日外省之官科目不及異途之半而京師各官自員郎以下亦皆可以資入至保舉之濫自監司至守令佐雜更不知幾千百人此其人卽小有技能然非讀書稽古又大率躁進之徒使之踞於民上不惟虛糜朝廷之廩祿而亦重以剝小民之脂膏今若永閉捐例保舉一途申連坐之法令大吏不得濫予前此捐職保舉人員在京由各部在外由督撫嚴加甄別除才績卓著者奏留外餘俱聽其回籍如是則國家之所省愈多矣其尤要者則在乎興西北之水利夫土無瘠沃水利之興廢卽其瘠沃今日西北之石田皆三代膏腴之地夫誰不知之而水

利終未能興者以費鉅而任使又難其人也夫慮其費鉅而無所出則莫若漸以行之令地方官得便宜從事募民修陂塘築堤岸墾荒田而免其起科小民易於趨利必踴躍從事苟得各州縣相率爲之庶力衆而事可辦若夫任使之人則在各大吏之實心整頓嚴其賞罰一事權久其任使天下豈無鄭國鄧艾其人者乎行之有效然後盡折東南之漕輸銀天府不特東南之民力以紓於國計亦永永有賴焉其與斤斤於海運之得失者奚可同年而語乎願以告天下之有心經世者



皇朝經世文續編卷四十二目錄

戶政十九 鹽課一

駁長蘆鹽價改用銀椿疏

賀長齡

會同兩湖督撫籌議楚省鹽務疏

陶澍

敬陳兩淮鹽務積弊附片

陶澍

再陳淮鹽積弊疏

陶澍

會同 欽差擬定鹽務章程疏

陶澍

覆奏課歸場竈之說未敢遽行疏

陶澍

附奏獲私變價按引提課片

林則徐

整頓鹽務疏

林則徐

疏通鹽引疏

賀熙齡

鹽不設官議

李祖陶

呈賀耦庚師

俞德淵

上賀耦庚制府書

俞德淵

再呈賀耦庚師

俞德淵

賀耦庚

俞德淵

賀耦庚

俞德淵

賀耦庚

俞德淵

賀耦庚

俞德淵

賀耦庚

俞德淵

賀耦庚

俞德淵

賀耦庚

俞德淵

賀耦庚

俞德淵

賀耦庚

俞德淵

賀耦庚

俞德淵

皇朝經世文續編卷四十二

戶政十九 鹽課一

上海葛士濬子源輯

駁長蘆鹽價改用銀椿疏 道光七年

賀熙齡

本年十月二十日 欽奉 上諭前據那彥成等奏長蘆商力積疲虧欠日增由於錢價過賤易銀交課成本虧折所致請將鹽價改用銀椿並將加價三文減去兩相抵計不致有礙民食當交戶部覆議茲據奏稱就現在最賤之錢價計算除將減去加增三文抵算外尙加賣至一文有奇究恐民間因此有食貴之虞等語長蘆鹽價兩議加原爲體恤商情藉資調劑乃歷年以來鹽務毫無起色虧累益增該督等所奏易銀交課致虧成本情形固屬事之所有惟遽改舊章是否民間不致食貴此後先課後引即可年清年款再無挨延必須體察情形詳覈定議長蘆引鹽行銷直豫地方山東與長蘆事同一律該督等所奏亦未籌及異同著楊國楨琦善認真訪察運務商情並將各該處易銀市價覈計鹽價務期於民食毫無窒礙詳細確查據實具奏並著那彥成阿揚阿照戶部所議將商人成本內支銷各項凡用錢支發者悉令剔除另行覈計不得概以易銀賠折爲詞如果改用銀椿先課後引是否實能經久每年奏銷是否實

能全完積欠課項是否實能歸補並按年可補若干通盤詳覈逐一切實覆奏再降諭旨欽此仰見我

皇上軫恤黎元疇咨博采之至意

臣

備員臺職凡有管見所及亦不敢不效其一得之愚竊以爲利不百

不變法功不十不易器改用銀椿之議如果於

國課稍有裨益亦未嘗非通變權宜之一法乃

臣

再四

訪察竊恐有累於平民有損於帑項而並無益於鹺政實有不可輕議更張者諸爲我

皇上陳之查直

隸總督那彥成等原奏內稱現在紋銀一兩易制錢一千三百文應請引地較近例價每觔在十七文以

下者以一千二百五十文爲斷引地較遠例價在十八文以上者以一千二百文爲斷等語經部臣計其

核定之數除將加價三文抵算每觔尙加賣至一文以外謂於負販窮民不無食貴之苦自

臣

思之食貴

者豈獨窮民但受其累者實惟窮民爲最甚蓋許以加一文則商人所加有斷不止於一文者卽如天津

縣屬每鹽一觔例賣三文五毫其價最輕且因係公共口岸向不加價乃現今該縣市買鹽價每觔需制

錢一十六文較定例已多賣至五倍有奇一縣如此他縣可知夫以例載一定之數人所共知者商人尙

敢不遵若改爲按銀該計則並無明定數目該商等更可操縱在手任意增昂勢將何所底止伏惟我

皇上蠲租貸賑每不恤千萬帑金以加惠閭閻豈肯因調劑商人反致累窮民之口食且從前之加價尙

不過暫時權宜猶有停止之日今銀椿之加價則將著爲定例永無望減之時

臣所謂有累於平民者此

也又督臣等原奏所改稱改定銀椿後成本活動轉運迅速即可定爲先課後引新課年清年款斷不致於再虧每歲所得餘利儘數勒限交官約計可得數十萬兩彌補積欠亦可漸清等因似係爲慎重課款起見殊不思嘉慶十七年加價一文一半津貼商人一半彌補積欠而部臣查出彌補之數至今僅有十九萬餘兩仍屬欠項纍纍毫無實際況道光五年堰工加價二文三年後亦係以一文解部充公以一文彌補積欠其充公者豈能謂無裨於帑項卽補欠者亦豈能謂無益於商人如果按數催徵年清年款何嘗不可漸收實效今一旦將前加之價盡行減去而充公補欠者悉以之惠商人是將來商人之完款尙在虛懸而目前現徵之加價已歸無著名爲籌課實則侵帑其理甚明固不得再計而決也且臣聞該商等藉引行私由來已久計其每歲所獲之利何可數計而猶然虧課欠帑屢乞聖恩調劑豁免不已繼以展緩展緩不已繼以借墊不但舊欠不清續欠又積至一千數百萬兩之多是該商等之頑抗欺混貪得無厭實已習爲然固而猶云一改銀椿卽能裕課其誰信之臣所謂於帑項有損無益者此也若以整飭長蘆鹽務舍此別無長策則浙鹽於嘉慶年間改用錢椿何以近日加之整頓遂有轉機並未以易銀賠折爲累兩淮向用銀椿常有盈餘何以現在疲敝情形仍難補救是知鹽務之衰旺並不係賣價之分別銀錢果其經理得人自然日形充裕臣復查兩淮卽係先課後引而近今虧欠乃積至三千餘萬是使

蘆鹽改用銀椿即可先課後引亦屬空言無關實濟且臣聞長蘆之改用銀椿惟總商爲甚願散商並不樂從蓋總商惟圖專利而散商則因一經加價凡一切浮雜派費無不增加益受總商之擾累是該商人中業已衆心不一何能裕課項而杜商虧該督臣等所稱試行二年即可年清年款彌補積欠原未嘗真有把握不過仍問之商人在總商等惟知苟利目前欺混乃其慣計恐試行二年以後虧欠依然徒爲奸商等便其漁利行私之計而已臣所謂病民損帑將來亦終無益於鹽政者此也臣復查戶部議覆摺內指駁各情節亦以請改銀椿爲不可行特因該處鹽務廢弛拖欠課項日多故請 勅下河南山東撫臣再加訪察俟其覆奏到日恭候 聖裁而臣審察情形參稽輿論既確知此事有礙民生無裨 國計亦不敢以曾經奉 旨飭查卽行緘默致蹈知而不言之咎

再鹽務至今百弊叢生臣向聞兩淮鹽政運司兩衙門每年商人均有例送規費其數正復不貲雖間有不受者亦甚寥寥至遇有撥解之款鹽政運司又因庫貯空虛不得不向商人挪借以致總商有所挾持故鹽務一切陳奏有多出自商人之意指者兩淮如此長蘆恐亦不免前此長蘆請改銀椿交部議奏之時外間傳聞謂商人赴京謀幹希圖議准道路之言固屬無據惟該商等惟利是圖慣於鑽刺此言亦未必盡出無因 國家大計豈容商人暗爲營謀是關於鹽務者小而關於 國政者更大現在綱紀肅清

該商等雖未能售其技然不可不防其漸臣既有所聞理合附片具陳

會同兩湖督撫籌議楚省鹽務疏

陶澍

竊臣陶澍欽奉

諭旨派赴江西安徽一帶校閱營伍

泰請順道回籍修墓并乘便會同

臣訥爾經額

臣周之琦

臣裕泰籌商淮鹽緝銷事宜仰荷

聖鑒所有湖南鹽務

臣

陶澍前過長沙曾經晤商

臣裕泰

茲由洞庭順颿東下於十一月初七日行抵鄂垣與

臣

訥爾經額

臣

周之琦會晤復將鹹務彼此悉心籌

議緣湖廣北南兩省爲行銷淮綱最重口岸每年額引七十七萬九千九百餘道而網載之儀徵老河引距貯鹽之漢鎮相隔幾及二千里長江險阻風信靡常挽運本屬不易加以船戶水手之來私盜賣中途節節逗遛稽察更屬難周且楚省係水陸通衢界連川粵豫皖等省四通八達鄰私最易侵灌防範設或稍疏卽致貽害腹地內如湖北宜昌府屬之官渡卡緊接川江從前銅鉛船自四川裝運北上一路收買川私入楚售賣經由卡隘并不聽候查驗以致宜昌一郡盡食川私并灌及下游荊州各屬與荆門之遠安當陽湖南之澧州石門等處大爲淮綱之害卽經議定章程奏奉

諭旨飭令宜昌鎮總兵親督卡運各員查驗催趲并雲貴四川各督撫飭令沿途各州縣嚴禁售給該船戶鹽斤自奉行一載以來宜昌一帶水道川私嚴行堵截銷數日有進步又隨州應山切連豫省信陽州等處多被潞私侵灌黃安麻城切

近光山固始及皖省英山等處多被蘆私侵占接近淮北票鹽之處亦有闖入皆因小民趨利若鶩貪賤

食私緣山越嶺輾轉售賣前經臣陶澍於淮北英山等處設卡并派六安營參將趙承德等帶兵以時巡

歷查拏復經臣訥爾經額臣周之琦派令湖北鹽道于克襄親往黃州各屬勘明要隘分設卡座堵緝近

來銷數已有轉機又襄陽府各屬與豫省南陽各處犬牙相錯豫省行銷潞鹽較之淮鹽價值貴賤懸殊

侵灌本易而豫省奸商又復逼近楚境廣開子店甚至包運到楚轉賣以致占礙淮綱大爲官引之害現

於奉 旨飭拏匪犯張開運案內究出梟販多名拘獲究辦以示懲創應俟會同河南撫臣籌議疏緝章

程另行具 奏又湖南郴州所屬之永興縣係粵鹽引地粵商開設子店行銷生鹽與淮界熟鹽本有區

別距粵商藉海船艙底沙泥準其煎熬名色多設熬鍋將生鹽煎熟侵灌淮界以致楚省引額短絀道光

十一年經前任湖廣督臣盧坤奏奉 諭旨必應嚴定章程令各守地界酌定熬鍋額數永定限制毋許

私增多設等因欽此盧坤當卽欽遵飭令兩省委員核議嗣經盧坤核定每子店一家準其留鍋一口咨

商粵省而粵省總以熬鍋不能定數爲詞及盧坤調任廣東臣訥爾經額頻年文移往返咨商而粵商又

紛紛具呈終不肯酌定額數以致迄無成議影射多熬充賺淮引在所不免伏思粵省來咨以粵鹽係通

省融銷若將永興子店限定熬鍋口數該省引課卽有阻滯兼以楚省所議拏獲販私人犯例應訊明來

歷如訊係永興子店所賣咨提究辦乃謂楚人自犯之罪與粵省子店無涉不應妄扳拖累等語伏思緝私扼要必當澄本清源惟不稍存畛域始能各固藩籬粵省融銷分數未必全在永興一縣何以不能定額行銷且熬鍋係爲煎熬海船艙底泥沙而設爲數甚微何能藉此裕課其必欲廣設熬鍋無非藉端影射將生鹽煎熟混雜侵灌淮界是粵課固可寬裕而淮引卽被侵占剝肉補瘡於公何補且查湖南省頻年詳辦販賣粵私案件不一而足雖各犯罪由自取而多留熬鍋爲奸商開偷漏之門陷愚民蹈販私之網於理似屬未協事關有礙淮引若不定以限制誠恐愈增愈多無所底止查永興縣現存子店六十五家相應請 旨飭下兩廣督 臣將永興子店六十五家每家只準存鍋一口永爲定額不準私自加增及添設子店鍋口尺寸亦不準稍有寬大總期於粵引淮綱兩無妨礙至於拏獲私鹽須照例究明買鹽來歷行提審辦粵商更不得規避狡卸失察私鹽出境地方文武各官亦應照例議處庶可各知儆戒以固藩籬此外疏銷事宜前次立法已詳如有應因利乘便之處隨時斟酌辦理不令窒礙 臣等惟有隨地隨時同心協力認真經以理冀課裕引暢仰副 皇上整飭離綱之至意

敬陳兩淮鹽務積弊附片

陶澍

再 臣查鹽務紛繁弊端不一如印本賀票貼息套搭皆弊混之尤者不肖奸商巧立名目借端開銷以致

庫本全空課項日絀竟有積重難返之勢卽如商人辦運所有引課場價運腳使費一切併計謂之成本內有商人缺底一項名爲根窩每引取票銀一兩每年按引卽須銀一百六十九萬有餘歸於底商先國課而坐收其利其餘則浮費居多每由總商開銷取之散商名爲辦公而實不知其名目盈千累萬任意攤派此類甚多成本安得不重成本既重則售價必昂而私梟由此起矣如漢鎮爲銷鹽第一口岸鹽價每斤需錢四五十文迨分運各處銷售近者六七十文遠者竟需八九十文不等其實鹽務成本首重正課其次則場價計每引配鹽三百七十四斤僅徵正課銀一兩至數錢零不等其硃單雜課亦僅徵一二錢不等計算場價每鹽一斤不及十文而轉銷各處竟至數十倍之價且有攪和污泥雜入皂莢蛤灰等弊鹽質更差以致江廣之民膏血盡竭於鹽貧家小戶往往有兼旬彌月堅忍淡食不知鹽味者而鄰私乃乘機灌入此非私販之銷售能勝於官實由鹽價大昂有以致之也至於儀徵一帶爲捆鹽之場奸商與商厮難免私行夾帶江船水手從而效尤而私梟亦因以罔所顧忌其實私梟所販之鹽卽係場竈所產之鹽如果商人能收買餘鹽何致有私鹽可販祇因商不能收而竈戶窮困偶有透漏以資朝夕遂致輾轉負載積少成多而無資本無身家之匪徒聚而成梟幸此輩多係烏合見利則趨聞拏則散現在知縣王用賓署游擊金萬全皆練於緝捕之人梟徒警畏自六月內黃玉林指拏各犯以後紛紛逃散地

方尙屬靖謐惟鹽務拔本塞源必須革去奸商另招股實而殷實之商又必須明定章程刪去浮費使不受總商攤派之累然後肯來前與運司諄切言之當可次第整理合併附片具陳

再陳淮鹺積弊疏

陶澍

竊照兩淮鹽政關繫國帑臣頻年在蘇已聞其疲敝情形日甚一日但不料山窮水盡竟至如是之極固由院司屢易漫無費成因循諉卸各顧目前而庫貯既空奸商無可咀嚼遂成渙散臣細加察訪其來有自亦不起於近日查淮南向有數百家近因消乏僅存數十家且多借貲營運不皆自己貲本更有以商爲名網取無本之利並不行鹽者以致利衰引滯向係兩年三運今乃一運兩年愈遲愈積月利愈虧而商人習慣淫侈率多醉生夢死之徒不知自行經理惟任商夥商廝編擺作弄朦混侵吞以致日形竭蹶其岸引所以滯銷者一由成本積漸成多一由藉官行私過甚查成本之輸於官者爲科則有正項雜項外支帶款等名目用於商者有引窩鹽價捆壩運費辛工火足等名目此外應徵雜支各款尙多而外銷活支月摺岸費等款皆總商私立名目假公濟私詭混開銷種種浮費倍蓰正課統名爲成本歸於鹽價以致本重價懸銷售無術轉運愈滯積引愈多不得已而統銷一年讓出本綱地步作爲分限攤補且每綱支解之款不能停緩復將上綱下綱徵收之銀通融借墊輾轉那用屢統屢積更於科則之中帶徵

帶補逐漸愈增此成本所由積重也私鹽充斥固應首重緝私然岸銷之滯不盡關梟販其商運官引之重斤與裝鹽江船之夾帶實爲淮綱腹心之蠹在商人於正鹽之外本有耗涵無課之加斤卽無異官中之私而又有包內包外之私其包內者係運商捆鹽出場多帶重斤商賈亦復如之且又短發江船水脚以鹽斤私抵船價其短發所給之價復被賄夥埠頭等勒扣過半甚至船戶不領脚價轉以重賂向商賈埠頭等圖謀裝鹽下至商宅之婢役亦月有饋費彼江船何苦爲此無非藉公裝私而已聞江船裝鹽每捆解放私鹽謂之買硃每船裝官鹽十之五六餘艙盡以裝私謂之跑風船既裝鹽將全引一船之鹽分爲三四船遇有一船遭風失淺卽捏報全引淹銷將竝未失事之二三船亦請補鹽既得照例免課又得通綱津貼到岸之後并得提前先賣謂之淹銷補運是以一引而換數引明目張膽之私也及抵漢岸商人擡價居奇停船挨賣謂之整輪以窄徑自窘而私販轉得暢行迨窮年守候銷售無期於是在後之船鑽營以提前其點者將待輪之鹽偷賣俟輪到時買私補填謂之過籠蒸糕甚至鹽已賣盡仍報淹銷將船鑿沈以滅其偷賣之蹟謂之放生各種弊竇皆起於整輪不但擡價實便售私此又藉官行私之爲害也引旣不能年銷年額課焉能年清年款從前章程本爲虛立而且虛稱報効無非分綱壓派之爲虛報奏銷更起懸墊那移之漸前綱懸墊後綱復難那補解餉無措於是遮掩彌縫有預納減納貼色貼

息之名或折減若干作爲正數其貼色貼息亦於正數內少完若干作爲加色加息之數商既巧占便宜而庫貯因以短縮與州縣之虧挪何異其少納之數雖云分綱帶完然積欠以至數千萬前次清查或分十五綱帶徵或分三十綱歸補李代桃僵偏枯孰甚以致殷商裹足不前正課益懸而無著矣至於報効一款原係因公抒誠得沾議敘自應各出己貲乃亦先由運庫墊解分年帶繳積欠纍纍是庫存正款徒爲商人騙取議敘之用而商捐之名適足爲消耗之目而已以上數端弊起於商而利不在商商既自敝而課因以敝現在己丑之引行銷甫半庚寅年尙未開綱課絀商刁浮僞百出造謠興謗不服稽查興言及此可勝慨歎然錮弊既深不得不亟求補救之法臣之愚見謂宜計裝鹽不留空艚則受載有定數而夾帶易查矣實發水脚毋許剋扣則船戶不藉口而腳鹽易清矣遭風失淺之船準其補鹽不準免課則淹銷無所利而捏報自少矣嚴查水程俾銷數有準而無引之私自剔矣更宜大減浮費節止流攤以輕成本而恤運商以上各條應請 旨敕下鹽臣督同運司鹽道妥議籌辦實力奉行臣亦隨時稽查以資應助至於收買餘鹽減價敵私皆正本清源之上策而現似力尙未能惟有口岸散輪則銷路暢而場竈自清食價平而民情大順私鹽不戢自靖無如商情固執但知目前搶跌微似有虧不知守候太久月利全無縱使每斤多賣數文得不償失況過籠蒸糕沈船放水百弊由此而生於商大有未利不止於虧

國課而病閭閻也查從前兩江督臣孫玉庭與湖廣督臣陳若霖籌辦散輪時於前兩月同到之船散賣既畢再開後兩月之輪以散寓整最爲法良意美行之業有成效自道光八年冬底復改整輪未及二年而鹽務敗壞至此不可收拾然則整散之效不待智者而始知矣應請 敕下鹽臣會同湖廣總督遴委廉正勤明之員查明漢岸現在滯銷引鹽共有若干仿照前次散輪之法辦理積滯庶可暢銷新綱始可發運以冀銷有轉機漸還舊制

會同 欽差擬定鹽務章程疏

陶澍

竊臣王鼎臣寶興奉 命前來江南會同臣陶澍籌辦兩淮鹽務曾將查出庫貯墊占虛報奏銷商運遲竈私透漏各實情并分派司員會同地方委員分赴各場履勘緣由奏報在案臣等一面將淮綱全局詳加綜核逐細鉤稽力求課歸場竈之法惟是兩淮歲徵正雜課銀及帑利各款四百餘萬絲豪皆 國帑攸關既宜籌利所從生必須防弊所自伏因思責成場竈大要有三而皆有窒礙之處一由竈丁起科淮南以鑷煎鹽淮北以池曬鹽今按池鑷定課每鑷每池約徵銀百餘兩竈丁皆瀕海貧民若令先納課而後賣鹽則力有未逮抑令先賣鹽而後納課設遇歉產之日勢必課宕丁逃且場鹽每斤向賣制錢一二文三四文不等今加入課銀六釐是課重本輕私賣但及交課之半竈丁卽獲大利販商卽省重貲仍

難免透私之弊此竈丁起課之難以遽行也一由垣商納課招徠殷商令其認課包納竈鹽悉歸該商經理出賣寓散於整較爲扼要惟兩淮池鐮半係竈產以己業而聽命商人情必不願況商人惟利是視秤收則勒以重斤借貸則要以重息竈戶狃于售私職此之故竈不樂以鹽歸垣商亦必無費完課此垣商納課之亦難遽行也一由場官收稅就各場產鹽引額攤定課額商販先向場大使報明認買斤數照額納課赴各竈配買鹽斤如此官爲經理似覺核實無如計算產鹽最多之伍祐等場照引定課應徵銀六十餘萬兩卽等而下之如梁垛等場亦應徵銀二十餘萬兩雖淮濟等關蘇松各縣錢糧不及此數鹽場微員豈能任此巨帑況試行之初額難懸定若聽其儘收儘解難保不匿報侵欺兼之場署多在海濱既無城郭之防又乏營汛之衛徵解亦恐致疏虞此場官收稅之亦屬難行也至於就井抽稅滇省雖有成效但兩淮情形與滇省不同滇省鹽井二十四區課額三十餘萬兩防邏易周課程亦易足兩淮場地延袤八百里水陸交通非滇省一井一官卽能查察可比且商運先課後鹽額亦十倍滇省未易仿照辦理茲據司員及委員等各以查勘場竈苦累情形陸續稟覆臣等以事關勦始必須計出萬全連日公同籌酌竭誠殫思期於變通盡利而利之所在弊卽因之卽使先爲試辦而清竈愈商改官變法非一二年規模不能粗定小民難與圖始雖廣爲曉示亦恐觀望不前卽商販通行又必南侵閩浙綱鹽北侵蘆潞綱

鹽若不統各省釐務通盤籌畫實不免此贏彼絀之虞況此一二年中課額未可常懸場鹽未可停捆各岸食鹽更未可久缺假令試行盡善固可掃除積弊設或稍有未協卽難再復舊章伏思我朝淮鹽定制杜透漏則有垣竈之稽查防捆夾則有壩所之掣制絕船私則腳價毋許折給通綱引則口岸無事輪編至於筦庫核自運司無占墊通挪之弊緝私責在弁汛嚴游巡堵截之方逐層防範至周至密果能實力奉行自不致有流弊無如相率因循積重難返此非法之敝人人實廢法請卽准鹽弊之大者論之一曰浮費歲徵正雜各款以產鹽分數核算行銷盡屬有餘乃外解外支各項復有數百餘萬兩之多其中如鹽政之辦貢辦公及漢口之岸費揚州之活支乏商之月摺等項甚至一切官私酬應均列入成本開銷似此積習相沿無怪成本日形喫重二曰夾帶兩淮正引三百六十四斤現在各場捆鹽多者幾至加倍此商人引鹽之夾帶也其餘商夥商廝舵工水手無不各有重斤私捆攙雜多裝是以沿途則有買硃跑風名目到岸則有過籠蒸糕情弊并有糧船影帶之食鹽商巡報獲之功鹽無非假公行私將無課之鹽先儘售賣綱食各引安得不滯三曰私販淮南之老虎頸及深江孔家廬淮北之錢家集古寨及新壩龍苴城等處向爲梟徒盤踞馬頭鹽務中雖有緝捕經費之名而汛兵巡役往往得規庇縱且淮鹽行銷六省地方遼闊如湖北之荊襄一帶則有潞鹽之私江西之南贛一帶則有粵鹽之私他若河南之蘆私

安徽之浙私皆由各省越境透漏占礙淮綱其害又不獨在梟販此皆淮綱受病之處而推求致病根源實因視成法爲具文久之遂渙散而不可收拾誠非區區補偏救弊所能轉機惟有將舊章大加釐剔現計革除浮費銀二百六十萬兩成本既輕鹽價自減儘可敵私民間亦何樂蹈買私之罪將私販不緝而自除而且清庫欸革總商以杜侵漁之漸定秤桶編船號以絕影射之萌挑河道散輪規以暢運銷之路酌帶銷緩積欠以清套墊之源使射利者無可借端欠課者無從藉口似較課歸場竈之法確有舊轍可循謹分爲十五條另繕清單恭呈 御覽伏候 欽定 臣王鼎臣寶興經此次釐定條款之後 臣陶澍原有兼轄鹽務之責隨時隨事力加整頓儻仍有透私墮課各情弊立將玩誤之官弁商人盡法嚴懲示儆斷不致偶涉姑容如此行之數月定有起色查現在已丑綱未銷之鹽尙有三分庚寅全綱並未啟銷應自辛卯綱起卽照新定條款辦理第不劃清界限仍易啟套搭之弊應請前項未銷之鹽隨時帶銷如遇銷數通暢卽援照從前辦過提綱成案儘數補銷毋任積壓再淮南北各場存積之鹽甚多數月以來商不收運以致場竈苦累課帑支絀此時已屆年終辛卯立應開綱應嚴飭商人趕緊買運交課如有藉端延宕輕則立予參革重則嚴行治罪總期弊去太甚法在必行仰副 聖主飭綱裕課除弊便民之至意

覆奏課歸場竈之說未敢遽行疏

陶澍

竊臣節次承准軍機大臣字寄欽奉諭旨將侍講學士顧純奏請課歸場竈光祿寺卿梁中靖請就場

收稅各一摺飭交臣悉心籌畫核議具奏又前後遞到太僕寺少卿卓秉恬請仿照王守仁贛關立廠

抽稅一摺江西巡撫吳光悅請撤商歸竈徵其課稅一摺均奉旨交臣與湖廣江蘇江西湖北安徽河

南各督撫悉心妥議具奏各等因臣查諸臣所請變通鹽法其說不一皆主於化梟爲良無官無私立意

誠爲甚善惟臣再四籌畫通盤合計仍有未敢遽議更張者兩淮鹽課甚重三倍於江蘇全省之錢糧非

通泰海一隅之場地所能歸入若徵之於竈則沿海窮民家無長物卽謂鹽歸丁賣不患其貧而一池一

鐮獲利幾何豈能以數百萬之鉅款散而責以完納若欲就場收稅則又弊竇易滋蓋鹽之爲物與布帛

菽粟同功而不同用布帛菽粟隨處所有成本重而課稅輕然且不免於透漏若鹽在場竈每斤僅值制

錢一二文一經收稅則價隨課長爭其利者必多海濱廣斥民竈雜處池以埽鹽凡有箕帚者皆可埽鐮

以煎鹽凡有鍋竈者亦可煎將比戶皆私課稅且因之而更紂至於設廠抽稅或小試於一隅若行之於

各省則與就場設官徵稅之法地不同而流弊同緣各省道路四通八達凡鹽所從入之地安必處處皆

有隘可守繞越漏私轉恐比場竈爲更甚總之無官無私必須無課無稅而後可業經有稅有課卽屬有

官有私如謂一歸場竈一設鹽廠卽可上裕國帑而化梟爲良竊恐有所未能且此數說者皆本於唐

臣劉晏聽其所之一語故諸臣皆以爲化梟之良策其實劉晏權鹽卽今商運之法所謂亭戶糶商人
是也晏建常平鹽倉數千商運不至則減價以糶置巡院十三以捕私鹽姦盜爲之衰息是晏恐遠省缺
鹽及商竈漏私已於聽其所之之先大有布置並非僅聽其所之而遂能化梟爲良也晏當日係總天下
之鹽而權之故能聽其所之今則某省食某處之鹽各有口岸若淮鹽任其所之必至南侵浙閩北侵蘆
潞兩淮未收其利而他省已受其害矣儻因此遂改天下之鹽法盡歸於場竈則紛更愈甚關繫愈大利
權不操於上必移於下恐豪強兼井之徒得據爲利其患有甚於私梟者是以上年冬間臣與尙書王鼎
等通盤籌酌業將課歸場竈及就場收稅種種窒礙之處詳細聲明會同具奏在案至分地銷鹽課歸
商辦原係國家成法第因日久弊生浮費愈增而愈多錢糧亦愈加而愈重卽如每年應解之帑利七
十餘萬其借本早罄於前人彼時艱務猶堪敷衍又有此一千餘萬之借本供其揮霍是以中枵而仍能
粉飾於外今則各項竭蹶無本可借而轉須爲前人歲償其利息此外節省之款又有四十餘萬兩亦係
沿襲於昔年而加徵於此日以致負重難勝沈痼從此而甚臣於萬難措手之時力求補救自接印以來
疏通積引懲辦私梟現據湖廣督臣函稱漢岸舊鹽銷完新鹽業已開秤卽糧船水手素稱强悍而本年
回空亦未敢仍前夾帶儻再能多辦新引似可望漸有轉機無如自三月開綱以來始而章程初定商情

不無觀望繼而被水成災場竈又多漫淹加以商本乏竭力能辦運者不過十數家設法支持勉圖接濟此等情形總緣從前之受病太深故此日之復原非易也臣自維愚昧實不敢謂計出萬全惟有殫精竭慮認真督辦并札催運司諭飭各商乘此旺銷之時設法趕運俟本綱限滿之後儻能得有起色則本朝二百年來之成法卽無庸另議更張萬一無可挽回再行據實奏明另行籌辦總期於鹺務實有裨益斷不敢稍存成見亦不敢推諉卸責致負聖主委任之至意

附奏獲私變價按引提課片

林則徐

再疏引莫先於緝私臣莅楚後督飭各屬印委員弁分投堵緝覈計月餘之內已報獲私販三十八起私鹽一萬八千一百七十餘斤人犯八十六名分飭審辦仍稽查各路卡隘務令認真緝拏不許稍涉鬆勁惟是未獲之私鹽固有礙於官引卽已獲之私鹽仍暗佔於銷數何以言之緣獲私例應變價分別給賞充公而各地方向來民食祇有此數多銷一分變價之鹽卽少銷一分額行之引故有州縣緝私甚力獲鹽甚多而該地方額引轉見缺銷者初聞之似不可解及徐察之而後知變價之鹽所佔礙於官引爲不少也然旣獲到私鹽若不准其變賣又斷無別項出路而因變賣轉佔正額是緝私與疏引勢且兩妨殊非盡善之道臣思鹽之分別官私惟以有課無課爲斷變價給賞之例祇以鼓勵獲鹽之人卽一半充公

亦僅資各處開銷經費於國課仍無裨益莫若變通其法將所獲私鹽變賣之價先按引鹽課則提繳正款錢糧覈計此外贏餘已足敷給賞充公之用卽獲鹽之兵役亦皆不致向隅而變價可補官課之虧卽獲私足抵官銷之缺似亦疏引裕課之一道所有應納課銀由各州縣會同管卡員弁彙繳道庫轉解兩淮歸入該年額引覈數造報如蒙勅部議准卽將本年報獲各案私鹽一律遵辦

整頓鹽務摺

林則徐

竊臣質本庸愚鹽務尤非所習仰蒙聖慈委任先經署理兩江總督旋復擢授湖廣總督於鹽政皆責無旁貸不敢不加意講求因講求而愈知籌辦之難因難辦而益矢轉移之力其中曲折繁重情形有非循常蹈故所能收其實效者故必倍加整頓不敢稍避怨嫌現雖積弊漸除猶恐久而生玩謹將一切辦法爲我聖主縷陳之伏查兩淮引額除淮北二十九萬六千九百八十二引不在湖廣行銷外其淮南年額應銷鹽一百三十九萬五千五百十引內江蘇安徽江西三省額銷之數僅居四分有零而湖廣銷額幾及十分之六以每引四百斤計之每一萬引卽合鹽四百萬斤積而至於七十七萬九千九百餘引之多其爲鹽殆不可以數計此湖廣所以爲淮南最重之口岸也然楚民並不盡食淮鹽如湖北施南一府六縣及宜昌府屬之鶴峯長樂二州縣均屬例食川鹽湖南郴桂二州屬并衡州府屬之酃縣共十一

州縣例食粵鹽是楚省境內本有川粵引地則凡犬牙相錯之處皆不能無影射透漏正不獨湖南永興一縣熬煎粵鹽以灌淮界久爲粵省之所必爭也至應食淮鹽之地亦有離淮較遠例准借食鄰鹽者如宜昌府屬巴東等四州縣之借食川鹽永州府屬道州等五州縣之借食粵鹽鎮筸等處苗疆之借食川鹽皆經宣諸令甲雖定例不許過十斤以上但一人可買十斤合衆人計之卽不知凡幾矣論者謂行鹽之額定自國初近來生齒日繁何至歲銷鹽斤轉不能如原定之數此言殆未深考耳查兩淮鹽法志載國初淮南歲行綱鹽只九十六萬六百八十四引迨後綱食遞有加增至嘉慶七年始符現在引數是淮南現行額引比之國初原額實多四十三萬四千八百引有零又國初每引運鹽二百斤至雍正年間定爲每引三百四十四斤嗣後累次加增至道光十一年始以每引四百斤爲定額較之三百四十四斤爲一引者每七引溢出一引以此科算是湖廣所銷之鹽比前又暗加十餘萬引而不覺也竊思原定鹽額每以民數爲衡近數年來湖北湖南兩省報部民數細冊約共五千萬人有零除例食鄰鹽之處至少亦去十分之一其應食淮鹽者約有四千五百萬人以每人日食三錢照例科算是每引四百斤之鹽足供六十人終年之食卽以所報民數與應銷引數互相比較已恐有絀無贏且生齒既繁則食鹽之人固多而賣鹽之人尤多民間生計維艱故凡有鹽利可圖之處貧民無不百計挑運四出售私其近

川近粵近潞地方與兩淮場竈相距皆遠淮鹽挽運到岸自千餘里至二三千不等而鄰鹽一蹴卽到成本既輕賣價自賤欲令民間舍近食遠舍賤食貴本係極難之事且以鹽課較之則鄰省皆輕而淮綱獨重卽如川鹽每包一百三十五斤在大甯雲陽等廠僅納六分八釐一毫卽最重之犍爲廠每包亦只一錢三分四釐若淮鹽一百三十五斤卽該納銀一兩三四錢比川課加重十數倍又查潞鹽每一百二十引爲一名完正雜課銀一百兩若淮鹽一百二十引卽該納銀四百八十兩亦不啻倍蓰雖粵鹽課則臣未深知而考其總數不逮淮課十分之二其輕可知夫以重課之鹽而與鄰界之輕課爭售卽彼此同一官鹽亦必彼贏此縮况又加以無課之私販紛紛浸灌其勢之不能相敵更不待言且不特此也潞鹽之行於陝西有應從湖北鄖陽府經過者川鹽之行於貴州有應從湖南辰沅等處經過者以淮綱地界而爲鄰鹽必由之路雖欲禁其私賣勢必不能唯因引地既定於前若不保衛藩籬則浸灌更無底止是以嘉慶年間中外臣工屢有奏請以鄖陽改食潞鹽衡永改食粵鹽辰沅改食黔鹽者均經駁飭不准是楚省邊境名爲淮界而實不銷淮鹽之處又去十之一二所恃以行銷者惟在腹地數郡耳然自黃州以至武昌漢陽凡鹽船經由停泊之處其爲夾帶腳私所佔者久已習爲故常又商民各船由江浙來楚每有船戶水手帶鹽私售且近來淮北票鹽盛行更由安徽之英山霍山與河南之光山商城羅山等縣灌

入黃州德安漢陽各處故雖腹地數郡亦愈見其難銷更有一種棘手情形則以商人完課買鹽發給運脚皆須用銀而市上鹽斤無非賣錢從前銀價賤時以千作兩照奏案梁鹽每包價銀三錢科算不過賣錢三百文近因銀貴錢賤三錢庫銀卽合錢四百二三十文縱使市上鹽價較前有增而以錢合銀實已暗減岸商水販皆惟利是圖豈甘虧本則招徠愈難今試將高低之鹽一律牽計每引只算銀十四兩湖廣每年食鹽按額卽須銀一千餘萬兩以錢計之則須一千五六百萬千文其爲繁重甲於各省是運鹽納課雖在兩淮而輸納營運之費大都出諸兩楚此臣所以夙夜籌思而兢兢然惟恐貽誤也臣自上年三月到任因正二兩月售鹽稀少亟籌設法疏銷凡所陳奏督屬緝獲各路私鹽及嚴禁銅鉛船買帶川私與夫襄陽等處撤退鄰境三十里內鹽店並衡永一帶責成道員督緝各事宜幸俱仰蒙訓示並諭令四川河南各督撫一體稽查俾臣得以嚴飭各屬加倍懷遵認真堵拏如宜昌一帶爲川私叢集之藪則委候補道劉肇紳前往督同宜昌府知府程家顯查拏究出弁兵縱私分肥情弊從嚴懲創又襄陽府屬久被潞私侵佔絕無水販運鹽臣親至其地相度機宜責成安襄鄖道楊以增改立章程並將施南府金石聲奏蒙恩准調任襄陽該道府一同出力籌辦潞梟漸見斂退水販卽源源運行又衡州一帶亦久不銷引自臣親到該處飭拏私鹽多起並將卡座奏改遊巡責令衡永道張晉熙會同湖南鹽道李

裕堂督辦近日粵私差少惟距武昌甚遠尙須隨時察看又黃州武穴一帶爲鹽船入楚停泊要口船戶水手與岸上奸販串通賣私日甚一日臣派委試用知府但明倫駐劄該處凡有鹽船入境親行催攢並將水痕風色察驗報明如有水跡不符及無故逗遛立即究辦聞船戶奸販皆憚其嚴凡此遠近印委各員分飭籌辦仍責令湖北鹽道于克襄督同漢岸總卡委員武昌府同知陳天澤綜司其成此外各府州縣皆有緝私疏引之責雖楚省向例准其融計銷數而臣惟恐各屬互相觀望會同撫臣周之琦飭令鹽道于克襄按月按季覈計各州縣銷數分別功過先將短銷之黃安縣知縣劉坤琳撤任查辦於是州縣始知儆懼競思設法督銷又經該道于克襄捐貲密遣親丁分路緝私尤多起獲是以統計上年兩省所獲私鹽竟至一百餘萬斤之多且獲一斤之鹽卽提一斤之課不特有裨庫項並向來捏報邀功朦混搪塞諸弊舉無所施此皆仰賴 聖主洞燭無遺 允臣獲私提課之奏始得欽遵督辦感懷尤深臣又思釐務事宜仍須恩威並用若一味嚴緝恐窒礙亦多故又剴切示諭紳民曉以利害大意以爲每人每日食鹽僅止三錢所費不過一文卽官鹽不如私鹽之賤而按日分計所爭亦僅毫釐民間日用飲食何在不可節省而獨於必不能已之食鹽計較毫釐貴賤公然犯法食私在紳衿應革功名在平民應受滿杖明於利害者當不至若是之愚且湖廣錢漕最輕比之江蘇僅及數分之一 聖恩高厚賦額永不加增

若於鹽課正供尙相率而背官食私天良安在除既往姑寬免究外嗣後責令紳衿大戶以及鄉團牌保互禁食私犯者公同送究小民見此示諭俱尙聽從又挑賣私鹽之窮民許其改悔投充肩販由各處官鹽子店給票挑赴四鄉賣完繳價如此則肩販各有生路庶可化莠爲良而偏僻村莊皆有官鹽挑到不得藉口食私於銷引似有裨益查向來民間匪類大半出於鹽梟卽襄陽之捻匪紅鬚爲害最甚總因逼近豫省以越販潞私爲事遂至無惡不作今自整飭鹽務之後襄陽絕無搶劫之案並將隔省盜犯拏獲多名是所辦者鹽務而其效卽不止於鹽務也又各處水販在漢岸買鹽向給水程一紙運到後須由地方官彙繳臣恐胥役藉端勒索致水販裹足不前是以變通辦理俾省浮費以示招徠因事屬細微不敢瑣屑入告乃准兩江總督臣陶澍移咨欽奉 上諭林則徐曾署兩江總督其於鹽務轉運交關之處熟悉情形現經酌定道里遠近限期由水販交付鹽行送局齎道不准由州縣催繳可免需索留難辦理甚爲合宜等因臣跪誦之餘益當欽遵妥辦水販因此稍沾微利頗見踴躍買鹽惟此縣之水程轉運別縣售賣者恐致漫無稽考仍應令其送縣呈查此又隨後續立之章程與前議兩不相悖者也又宜昌府屬例食川鹽之鶴峯長樂二州縣歷由兩淮委員駐劄萬戶沱地方代川辦運原爲保護淮界起見而兩淮鹽政相距甚遙尙有借官行私無憑稽察經臣咨商兩江督臣陶澍改爲由楚省委員駐辦以便約束

竝只許就近購運四川巫山縣之大甯廠鹽已足以敷民食不准遠赴數千里之犍爲縣裝運花鹽以致下侵荊州等處接准陶澍咨覆意見亦極相同又從前楚省歷因襄陽宜昌衡州三處額引不銷陸續奏明官運商鹽前往減價售賣以敵鄰私此意未嘗不善而於利弊未能洞澈不免似是而非是以歷辦竝無成效蓋淮鹽成本重大卽減之又減總不能賤於無課之私鹽若不認真緝私而欲以官鹽衝其鋒是商本徒虧而鄰私仍不能敵且商人本爲牟利必抑價以虧其本則商運愈不前而私鹽愈充斥矣況又訪有一種奸販轉買減價之賤鹽以灌旺售之引地是爲藉寇資盜無異剝肉補瘡臣將此三處之鹽一槩不令抑價以杜流弊現在襄陽水販運鹽已多宜昌亦已通販衡州則官鹽業經運往水販尙未前來祇須隨時察看情形如水販銷路大暢則官運固可無需卽有必須官爲倡導之處亦照時價發售務令鹽色純淨秤足味佳不宜抑勒減價以致虧本滋弊其揚商向因減價賠墊立有三鹽名目按引捐貼臣由臣咨明兩淮嚴行裁汰不任藉口賠累致礙鹺政現聞揚商輸課倍形踴躍而楚岸售得價銀臣復不時催解赴揚不任花銷糜費本屆所報銷數有一引卽解一引之銀務使針孔相符胥歸實在不准如前之漫無憑證要之銷鹽之暢滯上之視乎天時下之視乎地利而人力總不可不盡臣竊恐無可操之券而斷不敢有未盡之心惟賴 聖慈福庇長使年歲豐登隄防鞏固則民力寬裕而肥腴之奉旨蓄之

供售鹽自當更旺此時所屬各員雖有籌辦出力之處臣均不敢遽行保奏致啟易視之心務令一力奉行始終無怠庶幾暢益加暢至私鹽現獲固多然有私總不如無私之爲妙果使將來銷引愈多而獲私轉少更足以見化莠爲良之實效臣惟禱祀以求不敢稍有懈怠以期仰副聖主委任責成於萬一

疏通鹽引疏

賀熙齡

竊維兩淮鹽務自道光十年冬皇上洞燭情形法窮當變欽差大臣前赴江南會同兩江總督陶澍籌議釐革舊弊更定新章自是以來浮費裁而成本較輕庫款嚴而出納不混計凡九載奏銷八綱且攤帶乙未己亥諸綱殘引數十萬較之從前十載僅行六綱且多預收空本者已有區別惟是兩淮奏銷正項緣先納課後行鹽與他省之先鹽後課者情形迥異故雖奏銷八綱實非已銷去八綱之鹽緣運司每遇奏銷屆期卽派商趕納雖有存岸未銷之鹽存庫未銷之引而新綱限迫不得不按數分派各商如期完納商人成本止有此數口岸多積一引之鹽卽佔攔一引之本近聞淮南奏銷雖過八綱竟有積存兩綱未銷之引如江西湖廣安徽綱食各岸截至去年冬月止已運未銷鹽共一百六十餘萬引約計一綱有餘以到岸成本每引十兩有零計算卽佔攔成本一千數百萬兩又運庫中已納丙申丁酉戊戌己亥四綱未運之引又一綱有餘亦佔攔商本二百餘萬兩通計佔攔商本二千萬兩而現在揚州各商已貲

實不過五六百萬其餘皆係出利會借每綱岸鹽非兩載不得銷售回課而此兩載內又添出兩綱派納之數此淮南轉輸不靈之實在情形也且淮南綱食引鹽額完正雜帶款課銀五百餘萬兩近年奏銷則止完正項其餘雜款緩納之銀需候運岸銷售始行補納每一綱之課非數綱不能全清故目前雖奏銷八綱實未能徵足八綱之全課以致各省應解各款不時奏催無由應手若但以正項奏銷爲事雜款何由足額此又淮南徵解各款新陳積壓之實在情形也臣訪求所以積壓兩綱之故亦非由於辦理之不善祇緣道光十年更定新章之始前督臣陶澍任事過銳代銷辛卯以前滯鹽殘引一百三十餘萬引又代徵還未銷印本積欠侵價統引殘課三百數十萬兩皆以後任代償前任之積欠共佔一綱引額加以江漢水災滯銷復積一綱因此積壓兩綱至今總無疏通之策臣思鹽務不過在場輕本在岸速銷二端現在淮南裁減浮費以來每引正雜錢糧四兩實難再議輕減而漢岸銷鹽止有此數即使湖廣緝私認真整頓亦止能銷足本綱正額若欲以溢銷加倍提行兩綱恐必無之事然則淮南常年積此兩綱未銷之鹽空佔商人之運本作何銷納且引愈積壓則愈多課愈佔擱則愈絀倘一二年內竟有竭蹶不能輸納之商復致倒歇者彼時奏銷又將如何辦理正項且不能支雜款又將如何徵解臣詳加訪察皆因淮南目前之患在於中梗若不亟籌全局及早疏通卽恐有難於措辦之勢惟是釐務繁重非他人所能代

謀應請 勅下兩江總督督同運司徹底確查通盤籌畫務須先事圖維將前積兩綱引目如何設法疏通之處據實入告勿徒彌縫目前直至奏銷不前始爲臨渴掘井之計再者淮北票鹽近年因販多鹽少創爲驗貲折扣之法而驗貲銀數歷年遞增聞本年竟多至一千餘萬兩其實票鹽應收錢糧場價不過百萬其餘九百餘萬一經核定折領之票仍須發還各票販收回徒然壓擱本無所用而每當淮北驗貲之時正淮南奏銷之日一時彙集銀千百萬兩悉赴淮北驗貲而去遂致揚州銀短價昂雖重利無可借貸是驗貲之法於淮北無毫髮之益而適掣淮南奏銷之肘應如何量爲變通或官運到壩發販或簽商認引認岸或歸場定額售賣於此數策中酌行其一即可無庸驗貲以累奏銷及將淮南無著懸引如何酌歸淮北之處應請一併飭交兩江總督督同運司詳籌妥議以期有利無弊臣因訪聞淮南鹺務新陳積壓不能轉輸一二年內恐誤奏銷而淮北票鹽驗貲十倍有累正課不得不豫籌疏通之策爲此恭摺具陳

鹽不設官議

李祖陶

鹽爲天地自然之利煮於海晒於池吸於井皆可成鹽爲民生必不可少之物權之以爲軍國之需實足補田賦之所不及故漢以來善治財者非必加派田畝及若唐之間架陌錢宋之青苗市易也大都取足

於鹽耳然或處處張官設吏以牢籠之則利不歸于上亦不及於下而盡中飽於官與胥故予欲鹽直賣與商人也唐劉晏之爲轉運使也專用權鹽法充軍國之用時自許汝鄭鄧之西皆食河東池鹽度支主之汴滑唐蔡之東皆食海鹽晏主之晏以爲鹽更多則州縣擾故但於出鹽之鄉置鹽官收鹽戶所煮之鹽轉鬻於商人在其所之自餘州縣不復置官其江嶺間去鹽鄉遠者轉官鹽於彼貯之或商絕鹽貴則減價鬻之官獲其利而民不乏鹽始江淮鹽利不過四十萬季年乃六百萬緒由是國用充足而民不困顧亭林日知錄引松江李雯之論謂鹽產于場猶穀之生於地宜就場定額一稅之後不問其所之則國與民兩利此蓋以天下皆私鹽卽天下皆官鹽也謂其言鑿鑿可行今日鹽利之不興正以鹽吏之不可罷也且云行鹽地分有遠近不同遠於官而近于私者民不得不買私鹽既買私鹽則與販之徒必多于盜賊盛而刑獄滋矣予少居崑山常熟之間爲兩浙行鹽地而民間多販淮鹽自通州渡江其色青黑視官鹽爲善及遊太原所食皆番鹽堅緻精好此地利之便非國法之所能禁也明知其不可禁而設爲巡捕之格課以私鹽之獲每季若干爲一定之額此掩耳盜鈴之政也其言如此亦可謂深切而著明矣繼此以來賢士大夫以此名說各疏者不可勝計總不能行至道光初年陶文毅公總制兩江兼綰鹽政始本海陽李侍郎贊元之說奏行票鹽然止行於淮北而不行於淮南江南以食鹽利者衆把持而阻遏

者多也然私鹽愈多官鹽愈滯課不足額官疲而商亦疲馴至湖北塘角火災漢岸鹽船被燬幾盡天變于上人怨於下雖欲不變其法不可得矣於是兩江總督陸公建瀛敬陳淮南鹽務恤災必先興利興利必先除弊謹酌擬章程恭摺奏 聞大意謂淮南鹽務之疲壞實田口岸之不消其不消之故則在官價昂於私價官本重於私本而成本過重之故又在銀價日貴浮費日增爲今之計欲暢銷必先敵私欲敵私必先減價欲減價必先輕本欲輕本必先裁省浮費攤減科則竊謂今日大弊莫大于利不歸國亦不歸下而歸于中飽之人淮南引地首尾四省仰食于鹽者官則文武印委等員吏則大小衙門書役以及商夥商厮商船不可億計一議整頓則必羣起而撓之造謠挾黨恐嚇挾詐必使良法中止而後已臣受恩深重不敢以帑項正課商民脂膏爲避誹謗養奸蠹之計謹將淮南全局通盤籌畫以裕課之法爲卹災之方酌議章程十條云云部議有准有駁飭令覆奏而卒從之一時鹽價大跌一包之錢幾可得兩包之鹽四野騰歡額手頌 聖天子恩膏暨陸制臺德意遍東南數千里之地如出一口嗚呼可謂快矣第按其章程仍處處間以官吏與日知錄所云不問其所之者不同又大致倣票鹽而却不名票鹽大意謂票鹽散不可稽核此則操縱在手可以自如也然前人有言凡立一法必待其人而後行者非良法也必人人可行而後可稱良法今法如陸君長在兩江尙能堅持不變否則官吏乘間陋規裁者可復少者可

增猶之漕運本有餘米月糧可供一切費用乾隆年間卽奏增腳錢數十文今則暗增至數百文矣且浮收勒折習以爲常 朝廷雖明知之而亦不以爲怪也天下之事類皆如此可勝嘆哉

呈賀耦庚師

俞德淵

承詢江南有無姦商可以懲辦此事非悉數所能終謹略爲言之岸商代人賣鹽以他人之財供其揮霍久爲揚商之害去之不足惜也若揚商則挾本求利其從前之作姦犯科者久皆歇業衣食不能自給雖置之重典於事亦復無濟現在稍可支撐者不過一二十家多係借資行運自數年以來風波屢作虧折漸多人人有保家遠害之思前因星使臨江謠言四起草木皆兵大勢幾於渙散自洲上春到此待之以至誠示之以無畏人心始稍稍安帖茲驚魂甫定而遽欲齊之以刑不但將現在之商驅之使去彼聞風者誰復敢挾巨貲而蹈不測之險乎且歷來鹽務之壞鹽政運司實難辭咎今皆置之不問而惟商是求是猶舍僨軍之帥而歸過於士卒非公論也卽今日之不能整頓非盡商不用命乃官不恤商所致耳各省岸費以數十萬計各衙門陋規大者數萬小者數千計以至關隘之刁難書役之需索地匪之訛詐無一不取諸商而官視以爲常置之不問商力幾何旣輸庫藏六百餘萬之課復供各省各岸數百萬之費安在其不日就彫敝也而且以庫款之挪墊爲商罪其罪實在運司商不能主也以江船之帶私爲商罪

其罪實在船戶商不能禁也以鹽價之昂貴鹽色之攙和爲商罪其罪實在水販鋪戶商不能與聞也去歲爲極敝之時猶收二百萬之課若以國初之鹽課而計已屬逾額今因科則太重僅足三分之一然已倍於中省之賦矣矧此二百餘萬之課卽出自一二十家疲乏之商若不培植之而復芟夷之將併此而無之矣卽如裁費一事揚州辦貢辦公之費減存三十三萬漢岸公費減存三十八萬江西減存十七萬今計上年用項揚州用二十四萬有零視原減之數又減矣漢岸則用八十餘萬較原減之數多至四十餘萬矣江西則用三十餘萬較原減之數多至十餘萬矣商人獲利幾何減鹽價則身受其實減浮費則徒存其名此中委曲情形安能人人而告之大抵天下有可行之權者未必知之果真而知之真者又未必有可行之權運司之權督催商運謹守筦籥是其職也其他則呼之而不應維揚咫尺之地權雖不能及尙可以情理通之若外府外縣則無可措手矣制軍之權善用之第可及於本省不善用之卽本省亦陽奉而陰違而況能及於外省乎淮鹽行銷六省上下各衙門不知凡幾凡與鹽務有交涉者無不於鹽有濡染安得合數省之官常齊心協力而爲之今欲有利於商必將不利於衆奪衆人之所利而強其所難此不可得之數也然衆之利不去則商之利日微國家之課亦日絀此亦相因之理也在昔極盛之時未嘗無弊行之百餘年踵事遞增其弊日甚一日沿至於今已成積重難反之勢於此而欲改絃更

張非大有權力者不能淵何人斯敢希冀其萬一乎治鹽務者不能爲商保本祛弊而徒咎乎商之無良猶之治地方者不能爲民興利除害而歸咎於民之不善試思國家設官之謂何而以牛羊之放軼倒斃謂牛羊實自爲之非求牧與芻者之罪抑亦巧於自諉矣淵自知力薄任重縱不自爲之圖亦終必得罪而去不過姑存此說以自抒所見已耳然斯言也聞者必謂袒護商人爲運司之通病幸望吾師祕之勿宣統俟吾師來年出山時淵如尙留未去當將一載以來所揣摩而知之者爲吾師傾囊倒篋而陳之卽從此永入山林於人世不相聞問亦無所憾矣

上賀耦庚制府書

俞德淵

前函尙未封發頃復接奉賜書伏承教誨殷拳曷勝銘感兩淮鹽務之難竝無深文奧義只私鹽充斥官引滯銷二語盡之辦鹽務者止辦得能銷足矣運司之權職不出於運不銷則何由運聞閭生齒日繁無業窮民衣食於鹽腎不畏法如江船腳私糧船夾帶以及川蘆閩粵各私其佔礙官鹽銷路者豈止數倍以致官引到岸累年不售成本佔擱愈佔擱則愈難流通商本日感轉運愈難新商聞風益形裹足此鹽務之所以弊也減價敵私之說言之似覺可聽其實終歸無濟蓋官鹽成本重於私鹽者不啻倍蓰其何能敵如欲以官敵私則必國家不徵課而後可卽如今春散輪以後楚岸鹽價雖賤而商人成本太虧

情形漸卽廷羸毋論威不能震卽恩亦無可加從前所聞均多隔膜自到此三月細意講求知此事無本源之可言昔管子擅魚鹽之利一擅字中原有利權獨攬之意今法令不行民心積玩合數省之强悍桀驁無業游民起而爭國家之利官引安得不滯商力安得不疲爲今之計宜以緝私爲第一義然非合數省大吏之權大加震動又合地方營縣聯成一家不分畛域斷不足以收緝私之效若舍此而別求探本之論雖殫精竭慮實難期捷獲之功也現奉宮保奏委王竹嶼前赴楚岸查辦一切此行所關不小鹽務轉機在此一舉然揚楚兩地意見各殊未知果能有濟否讀來書云不翻清查無以懲奸商不復窩價無以招新商此乃傳聞之言非真知此中關目者清查本無可翻卽從而翻之亦與現辦事體毫無裨益至所謂奸商者此時俱不在場且窮乏已甚辦與不辦均與大局無關至於裁減窩價正爲招徠新商新商之所以不來在官鹽無利官鹽無利由私鹽日多全與窩價無干窩價減則成本輕於新商何不利焉爲此論者乃局外人耳因承垂問用敢縷陳伏祈訓示

再呈賀耦庚師

俞德淵

再啟者吾師出山之舉躊躇不決自因時勢多難故不能不迴慮却顧以淵思之出處之機亦自有數焉存於其間有非可以意爲趨避者要惟行其心之所安而已猶憶吾師於道光四年初到吳門時奉教伊

始竊聞吾師之言曰熱腸二字卽是仁字彼時深味師言謂仁字道理際天極地熱腸二字足以盡之其語簡切而包括無窮及觀吾師由蘇至東至甯凡所到處孜孜以振起地方救援民生爲急務其惻怛無已之心奮發有爲之志氣無非從一片熱腸而出蓋仁之發於天性也今值民生日感之時忽萌端居不出之想將使熱腸變爲冷念以性所故有之仁強而制之使不得遂其心必有所愀然難安者心所不安卽形神亦爲之不暢來書所云體中時有不適者未必不由乎此若然則吾師雖欲優游田園自樂其志恐抑鬱無聊之情轉不若旁皇四境者之所寄託也在昔陳圖南謂張忠定公曰譬如失火家望君救火安得不赴此爲熱腸人言之也使此心一冷則將謂人家失火何與己事而仁道或幾乎息矣仁生理也斷無可息之時此古今世道之所以不敝也方今生民彫瘵國計日窘凡有封疆之責者措施誠非易易猶幸有大君子數人衆力齊擊或可補救於萬一而凡現在場面稍有世道人心之慮者亦賴有人焉爲之壯其膽而作其氣庶幾有所恃而不恐若惟是獨善其身而已則潔身遠遯從古不乏高人要皆天性孤冷無意於人世者之所爲與吾師所謂熱腸爲仁亦殆如水火之不相入未可同年而語也以淵思之吾師亦行其心之所可安而勿強其性之所弗欲則出處之機不著蔡而自決承問票鹽何以無補大局緣兩淮每綱科則應徵正雜銀六百萬兩淮北票鹽歲止徵銀二十餘萬兩不及通綱二十分之一是

以謂之無補大局顧此二十餘萬兩之課從前商疲運絀已歸烏有今辛壬兩綱實已全數入庫且帶征殘引課銀十餘萬兩就淮北一隅而論已屬大有轉機外間傳言謬論紛紛不足爲據至有販無鹽乃地之所產止有此數非關辦理之人不善而綱額已足於國計民生有益無損其造作浮語者皆因不能使其私圖耳大抵天下事有利不能無弊苟利大而弊小斷不能懲弊而坐失其利淮北票鹽係千百年創始之舉甫行一二載縱巧於立法者豈能盡善無遺惟權其利害之輕重而已且鹽課與他政不同非身入其中不能悉知竊要從前名人立論著書尙多影響近時道路之言更何足道卽如淮南商人能去儀徵改捆固於成本所省實多然此事言之若易行之實難移步換形與淮北局面大有區別蓋未易一二更僕數也糧船帶私固亦調劑旗丁之一端然於國家體政不可爲訓且因恤丁而害課必至鹽法盡壞而後已兩年以來辦理粗有眉目人心幸得相安今歲貴漕師獨出心裁幾成決裂非宮保師大力挽回則所損者不獨在淮綱矣茲事體大不及縷陳附呈宮保奏稿三件亦可知其梗概吳門之事大有可憂少穆師幾於寢食俱廢茲有夾片稿錄呈足知其難第係密陳之件且勿宣示爲幸現交臘月以後仍復雨雪連旬蘇松皆無交倉之米轉瞬立春竟不知如何爲計自吳至浙省有盜賊滿途死屍徧地之謠時勢如此吾師聞之當亦爲代感額也

皇朝經世文續編卷四十三目錄

戶政二十 鹽課二

復趙菊言方伯

俞德淵

復陸心蘭方伯

俞德淵

諭淮商

俞德淵

致前徐州守張丹村

俞德淵

與王御史論淮鹽第一書

楊士達

與王御史論淮鹽第二書

楊士達

變鹽法議

姚瑩

論鹽二

孫鼎臣

論鹽三

孫鼎臣

利淮議

馮桂芬

採買淮鹽濟食分岸納課濟餉疏

駱秉章

奏陳楚省鹽法乞酌撥引張疏

胡林翼

臣等謹將

奏摺

謹此

奏聞

奏為

奏為

奏為

奏為

奏為

奏為

奏為

奏為

皇朝經世文續編卷四十三

上海葛士濬子源輯

戶政二十

鹽課二

復趙菊言方伯

俞德淵

昨奉惠緘以豫省南汝光一帶例食淮鹽淮商久不運鹽到岸以致私梟充斥百弊叢生去年楊海梁中丞移咨大府議令改食蘆鹽嗣後復查蘆潞兩商因該處運鹽成本過重均不願添設口岸現據該處工民具呈請改課歸地丁聽民自便至安徽潁州一府亦應照辦是否可行中丞特屬閣下詢明致覆可否並承示近蘆食蘆近潞食潞尊意亦復相同具見盡懷垂照指示周詳殊深感佩矧弟身當斯局敢不悉心體察據實縷陳以仰副海梁中丞暨閣下垂問諄諄之至意查康熙四十二年河南汝陽縣曾有改食蘆鹽之議欽奉諭旨永行禁止雍正年間上蔡平西等縣屢請改行蘆引亦未准行乾隆二年豫撫議將上蔡等十四州縣改歸長蘆當經兩江總督會同鹽政議奏以去淮改蘆鄰私更易侵越南北兩淮並受其患復經戶部議令仍照舊章辦理是汝光一帶改食鄰鹽前人業經籌及彼時雖格於羣議迄今又已百年如果今昔情形不同原不妨酌量變通以救時弊惟該處民間所食全係蘆私潞私從前節次奏

經世文續編

卷四十三戶政二十

請改行長蘆官鹽尙恐於防私有礙此時如聽民自便在立法之初固僅僅行於疲累口岸而地勢犬牙相錯鄰近之區必將任意充斥雖欲保守旺銷處所以全力專辦亦恐勢有不能以淮北現在情形課食全虛本可置之度外第汝光潁毫實爲淮南門戶刻下鹺務雖當極弊之時淮南去歲課銀尙徵收二百餘萬兩若一旦撤去藩籬讓出南汝光三屬並將潁郡之阜太等縣劃出另辦則蘆潞之鹽從此層層侵入不特淮北引地日蹙卽淮南亦保障益難淮鹽行銷六省悉皆徵課於商若僅將此十數州縣改入地丁於全局旣多格礙必將全淮引地概行改歸丁納或可收擴然一變之效第慮課額過重統計兩淮每年內外正雜課銀雖經裁減之後尙有五百六十餘萬兩均係經費攸關無從再減勢難攤入六省賦額之中且天下皆食鹽之人天下不皆力田之人農民僅列四民之一未嘗責令獨完鹽課而官吏商賈有藝人等其力半皆十倍農民乃咸食無課之鹽亦恐不免有偏重之患惟汝光一帶官鹽久缺民食堪虞旣係力窮勢竭自應極加整頓弟於接奉賜函之後再四熟籌實無良策因思淮北致病之由總緣運道諸多不便閱時旣久需費更繁以致岸鹽短絀刻下籌議行運票鹽所歷程途聽民販各從其便不致如前五駿十楨之繁且無論何色人等各隨資力之大小皆可販運行銷與從前專商認運已有區別卽汝光等處民人亦無難稍覓資本來場販運前經鄒公眉觀察帶同各委員前往海州逐場履勘據云給票

抽兌之法尙屬可行業經議立章程與弟處會詳請奏宮保過揚時已將奏稿酌定帶至清江繕發此時諒已具奏一俟奉 旨允行卽當遵照辦理現在淮北三場設立五局僉派官商旣已粗立規模勢難中止海梁中丞以南汝光改歸地丁之議移文咨商宮保亦必不能以甫經奏定之案遽改前說復議更張以弟愚見票鹽之法甫經奏行其果否行之有濟原無把握如果稍有轉機自應力圖成效倘半年之後仍屬口岸無鹽則課食所關自難坐悞卽請海梁中丞以前議發端入奏俟交專管鹽政衙門議覆彼時卽可乘機轉灣另籌變通之法鄙見如斯未知尊意以爲何如均希裁定海梁中丞處並祈代爲致覆

復陸心蘭方伯

俞德淵

日前接奉復函備蒙垂察祇以事多棘手心緒忙煩裁復久稽竊深慚悚邇維履凝福曷勝抃頌淵抵揚以來已踰匝月日行稿件紛至沓來皆素所未經每看一稿每調一卷反覆推詳尙多茫然未解且幕中均係生手無一諳習之人致公事益覺拮据又衙門積弊權在吏書稍不經心弊混卽由此起若欲條分縷晰又苦於索解無從似此竭蹶之形如驅駑馬上千里之坂顛躓困敗可計日而待耳至鹽務大局有無轉機目下尙難預料蓋因商人無本轉運專望岸課回頭新綱接命之源全在於此頃聞漢岸銷價減跌各商資本虧折已多雖欲急公自效其道無由舊商如此新商聞風生畏誰肯冒險而來此辛卯新

綱所以難望其踴躍也且己丑納課之鹽尙有十餘萬未經到岸亦不能不讓令先銷傳言漢岸將來有缺鹽之患恐未必然且即使八九月間新鹽抵岸若私鹽未盡則官引仍復滯銷十餘年來鹽務敝壞之由總坐此病若不用力於緝私而別求利運之法此事勢之所必無淵到此逐加講求知此實爲第一義溯查從前袁旺相循其機括均不出此前言緝私爲塞流而以敵私爲正本清源者亦止得半之論管子擅魚鹽之利此擅字中卽寓無窮杜私之意若令今人爲之則利非國家之有矣此不待辨而明者也淵於此事知之而不能行之蓋一出於才之短一由於權之輕且事關各省非通力合作迄難見功爲今之計不過盡一分之心冀收一分之效倘至今冬明春仍無一毫起色惟有據實自陳知難而退以無貽曠職之羞足已素叨知遇故敢絮陳尙祈俯賜惠言俾知遵守尤深翹企省垣公事想都順手惟貢院工程所短經費尙多上下江各屬民捐官捐之項本係分作兩次行文未便混成一事其已未解繳俱有底冊可查如札催不應或委員守提庶不至悞至官捐之項或求咨商蘇安兩處於養廉中扣解以濟要工亦無不可從前府中上詳時本有此議五畝園書院府庫存銀二千八百餘兩足敷工用此中有王竹嶼措銀一千八百兩將來未可泯沒王鴻軒先生未知曾否到署聞書啟一席疊經更換尙未得人未知此時已定否麥秋甚薄下河一帶低窪之處受傷尤重聞各處有報災者未悉如何辦理竈下煎丁困苦尤

甚折價催納不前各場官俱罹革職處分似不能不從權詳辦也承委之事容當開送然身已在局外而輕爲臧否之論於心終有未安耳

諭淮商

俞德淵

爲明白曉諭事照得前因船戶不得水腳夾帶私鹽影射銷售當蒙 欽差大臣會同督憲奏明此後應將水腳倒價照實核發回空船隻按照到日先後挨次編號不准仍蹈買裝舊習所以必須編號者原以杜大船而裝少引藉以稽查引數起見查原奏內並無輪號挨裝之說商人以成千累萬資本捆鹽上載行走江面千有餘里自應聽其擇選船隻之堅固寬僱老成可信之船戶攬載而行以昭慎重況船之大小不同引之多少迥異若必照號挨裝旣拂人情更多滯礙總之專用埠頭則買裝之弊難除添設幫手則把持之弊又生督憲洞悉情形深以挨裝之事爲不妥是以檄飭另派公正辦事商人二名專司編號及督發水腳事宜俾除積弊以示公允茲本署司到任後檢查案卷不特該商人並未前往查辦而自上年七月間奉文編號起迄今並未辦定轉於埠頭之外另添幫首董事名目殊堪詫異試思埠頭之把持勒索弊已顯然方期力加整頓何堪又添幫首董事反起把持壓裝之漸多一事則多一事之周張多一人卽多一人之費用更與奏定刪減浮費繁文之意迥不相符且本署司訪聞添設幫首人等竟敢私出

揭帖意圖挾制亟應嚴行禁革以儆刁頑除詳明督憲並札令鹽掣同知暨儀徵縣訪拏仍另行委員前往專司編號等事外合行出示通行曉諭爲此示仰商人及埠頭並行船戶人等知悉自示之後所有委員添派幫頭董事人等概行禁革商人捆鹽上載聽其在於編定四百六十五隻船內自行僱覓報知監掣並委員人等配合引數上載總須將船裝滿不准留有空艙致多夾帶如所僱之船不載前編數內卽由委員接連已編之船挨次添入仍將自一號起至幾百幾十號止某號裝引鹽若干註明船戶姓名先造總冊二本申實以憑另委大員抽查俟裝載後量明水跡加烙火印開行按五日造冊報明督憲暨本署司查考至應發水脚卽查照前委員稟定舊額眼同商人埠頭原契給發如有尅扣平色及埠頭商夥商厮仍有需索情弊許該船戶赴轅喊稟定行從嚴究辦該幫頭人等亦須各知自愛遯跡藏蹤倘敢仍前捏造謠言妄生事端一經監掣同知及儀徵縣拏解到案本署司惟有執法從事爾時噬臍無及宜各凜遵毋違特示

致前徐州守張丹村

俞德淵

睽違愈久音問彌疎去臘接奉手書又以俗務忽冗無暇致覆且遙溯山中起居超然塵外時作天際真人之想每一執筆覺林泉猿鶴之思棖觸於懷自問塵容俗狀有不堪爲外人告者遂至日月遷延久

稽修候大率由此想叨愛素深久附神交之契能自諒於筆墨外也承詢鹺務情形此事頭緒繁多悉數之不能終其物但所云小人伺隙一層誠所不免並蒙示以謹小慎微思患預防之道尤徵關愛情殷淵承乏於此忽忽五年於淮鹽疲敝毫無補救惟兢兢自守約己不敢不嚴待人不敢不恕邇來揚郡紳士商民幸得相安無事惟此地現任候補各班共計百餘員向狃於鹽務積習大率不拘繩檢淵於蒞任之初未免稍加整頓幾有束溼之慮近亦咸就安帖耦俱無猜其中激勵爲善者頗亦不少卽最下者亦不至蕩檢踰閑然防微杜漸未嘗不以一身先之仍不出來諭所云謹小慎微之意而已至於不禁商私不裁官費不籌國用此等浮議乃遠方臆度之辭本省尙無此言蓋亦實無此事兩淮商人身家保重向之敢夾帶私鹽惟商船夾帶在所不免船戶獲帶私之利商人受帶私之名此向來冤案非身履此地未必知之自宮保兼管數年所孜孜講求者惟商船夾帶爲第一要義近雖未必全清然已十去七八詎意船戶之夾帶漸少而商鹽之耗折愈多蓋船戶失帶私之利其沿途浪費盡取之商鹽盜賣偷爬無所不至此則去一弊又生一弊外人所不知者也至於鹽規一事有在口岸之鹽規如湖廣江西安徽河南各省上下衙門之岸費是也有在揚地之鹽規如鹽政運司各衙門之月費供應是也今楚西各省岸費雖奉星使裁減究屬陽奉陰違依然如故緣地隸隔省不惟運司之權不能禁卽總督之威亦無所施且商人

行鹽豈能不仰借州縣若地方官毫無所得則商人之魚肉更多此其所不能盡去者勢使然耳至於此地兩衙門月費供應其銀數十萬兩向係商人支送一概裁除淨盡月費是星使奏裁其供應一項名目甚多係淵到任後自爲裁革止留巡費一款是向來緝私賞號之用不惟鹽政運司卽漕河二帥府縣營弁皆有之但數目微分多寡耳此款由庫提用用印文具報數年以來公私支用皆取諸此此外與商人毫無交手計淵每年所得之數官吏商民無不周知所以能與此邦人士相安無事共諒無他者蓋有由然非倖而致也不然衆人之霑潤盡去一己之脂膏獨存縱使陽爲矯飾欲蓋彌彰能免於衆喙之交集乎且非獨淵一人已也卽此地首領書差以今視昔均有滄桑之感每談及十年以前無異天寶盛時其炎涼之態亦可想而知矣天下談經濟者閉門造車出門皆可合轍鹽務一事其中曲折非局外所易知淵自親身其事覺從前見聞皆屬隔膜固無怪言之者之紛紛也去歲當道有與鹽務爲難者密偵數月而後以全力攻之亦止言課引短絀辦無成效等事究未切中窾要淵每撫膺自思處此疊愆叢積之地公罪或不能免惟天此愚誠止期得免私罪不至貽譏吾黨卽投之竄之亦將歡喜承受無纖毫芥蒂於中也

屢枉車騎得飫清誨仰見閣下先憂後樂之盛心無任傾折惟所論淮上鹽政極言弊之可杜而杜弊在緝私雖屬正論然于外間情形未悉敢貢其妄焉閣下其聽之夫弊之所在必求所以杜之固盡人知之矣然不杜源而強塞其流則流必壅而弊轉滋公私上下將交受其困今兩淮鹽務之當杜弊者滯引是已杜弊且以益弊者緝私是已緝私國法也而以爲益弊此固有說也蓋官引缺銷非緝私不力也緝私不善實擾民之端也淮鹽行銷六省額引歲二百萬今滯引積至百萬官商諱言其故而歸咎私販厯任鹽政輒以綱鹽不消由緝私不力入告故各省行銷淮引之處皆于要隘設卡委文武員弁帶兵役緝堵并得施放鳥鎗自嘉慶十九年江督百公以江西綱鹽缺消奏請照安池太等府一律叅處緝私遂愈竣而各省佐雜員弁因以爲利往往率領隸卒持軍器伏山坳水曲伺負鹽人過奪所棄鹽斤不歸官而以充私橐有私販正渡河聞風逃竄至落水溺斃及顛墜澗谷而死者亦有中鎗隨斃者又有肩挑數斤不在私販之列而橫遭攘奪者緝私之官弁不可謂不嚴私販之嬰法網不可謂不慘似宜官引暢消私販屏跡矣然而合消淮鹽之郡縣計之不下千萬丁口以食鹽計之應消億萬斤而官引猶苦壅滯者非天下有食淡之軍民而所以疏鹽之源未得也推原其故一由商人加銷額外之引實私而不居私之名者多一由從前鹽政屢爲鹺商請增餘息致鹽價日昂蓋私有數種梟私特其一耳有官商夾帶改捆

加觔者有岸商巡捕獲鹽名爲功鹽作官售賣而不按斤配引輸課者有鹽艘售私於中途者其名有商私功私船私之殊其借引以行私則一故私之在民者礙引尙微私之在官者礙引甚大至鹽價遞加數至成案可稽而嘉慶十二年奉鹽商成本視前數倍此後不得續請加增致滋民累商力稍裕卽行奏減之上諭 仁宗之洞悉民隱至矣盡矣至今奏減未奉明文天下產鹽之區有八遂以淮價爲獨昂長蘆陸運最難而鹽價僅及淮引之半官價旣昂於私給鹽者復雜以砂礫潮惡不可食故民間樂於食私而私販愈不可禁止其始官吏持鹺之短長而浮費日加其繼鹺商結歡官吏求增餘息則成本日重兩弊相因積而難返爲救急之計莫如減額外之引正引自可疏通且酌減餘息則鹽價平價平引自消官引暢消則私販不禁自絕查道光十三年間福建光澤各處鹽田淤於水私鹽價昂梟販不至撫州建昌二府屬官鹽遂暢消至引不能繼及鹽田復而官引不消如故也非其顯証歟舍是欲以缺消費私販以緝私責州縣其不公私交困者幾何哉頃聞湖督復請添設卡座堵緝私販竊謂微末員弁得賄買放初無緝私之實多一卡多一費利于候補員弁而無濟暢引實務似非計之得也至於負販之人無地蔑有其於山川塗轍習歷周知川陸交錯在在可通深箐蒙翳僻徑尤多以不習之兵役察素悉之私販兵役寡而私販衆固已不勝又況貧窘弁員借辦公以營私囊橐不充則雖私梟羣過概不問欲其私梟之不

充斥勢必不能且緝私亦難言矣宋張詠知杭州值歲饑首禁販鹽捕獲數百人詠悉寬其罰吏執不可詠曰錢塘十萬家餓莩如此若鹽禁益嚴而爲盜患益甚矣善乎張忠定之言也今東南頻遭水旱富者漸貧而貧者益困所謂梟販惟川私潞私及淮北鳳潁泗之人耳其餘皆貧難軍民無田可耕貸本營生妻子嗷嗷待此以活更有肩挑數斤給一月之食例不在私梟之內者而卡弁奪所有而私之又裁贓以誣陷之實無折服其心且兵役借國法以便私視人命若兒戲劫貨殺人與盜何殊焉貧難軍民橫遭冤苦計無復之使急而生心似非地方之福也昔嘉慶間粵盜譚阿招自稱平波王閩盜蔡牽自稱鎮海王並殺傷官吏擾害數年其始特販鹽之梟徒耳捕急遂流毒至此此往事之明徵也夫桀驚不馴之獸有深山大澤以養之則帖耳弭首伏其中而不出必赭其山而伐其草木彼無所得食必走城市而嚙人風聞江南洲渚深阻之地鹽梟成羣爲首者有大仗頭副仗頭之目雖經節相蔣公捕其渠魁而餘黨至今未解若是者誅之而不勝誅也將使之弭首帖耳乎抑使之走城市而索食乎此督撫之任亦言臣之責也閣下留心民瘼其審所可焉毋忽

與王御史論淮鹽第二書

楊士達

謂私販果不必緝乎非也設法疏通暢消官引而積弊遂除乎亦未也官引壅滯則私不可不緝者國

體也亦事勢也設法疏通所以救一時而非計之全策之上者也欲歷久無弊上不虧國課下不病民生則非斟酌變通不能夫鹽在天地間無論有禁無禁皆國有也自區之爲官于是鹽之產於私場者官反不得收其利鹽之出於官場者利亦不盡歸於國不歸於國則歸於商商與民爭利而民病官又與商爭利而商病商且與商爭利而商益病商民交病其患何極且夫鹽產於場猶五穀產於地也穀登而官徵其糧鹽鬻而國稅其利甚便也後世善治鹽者莫如劉晏晏但於出鹽之地收鹽鬻於商不問其所之由是國用充足民不困弊前明嘉靖中歲辦二十二萬四千鹽引一引納稅十分減至八分六分御史汪鋐奏不必禁私鹽但請官抽其稅而給照加賞推二公之意皆欲公天下大利於民蓋民利未有國不利者也爲今之計莫如仿汪鋐之法去官鹽之名不復設商置引任民間自煮自鬻而官爲定其出鹽之額計額多寡爲抽稅之準以歲終上於戶部一稅外官不得與如此則大員無剝商橫取之弊而官方以肅商人無借帑積欠之弊而庫藏可充兩淮無浮費陋規之弊而財用可節鹽無滯引礙消之弊而國課自裕舉天下皆私鹽實舉天下皆官鹽所謂富藏於民者此也又雲南等處白黑鹽井各不一處又有屬於子井者設官置井近日法弊頗爲民病議者亦謂莫妙于隨民所便而食之官卽隨其地而稅之不必置官設井其稅自充足是否照鹽之在淮者一律變通以歸畫一亦望審之此實裕國足民之大計昔賢

早有見及者而封章無以入 告之人得非以積欠未繳歟商欠有名無實莫若酌其輕重多寡而稍蠲之然非財匱時所敢言也將何以仰酬 聖天子勤勞宵旰孜孜求理之德意言之使可行焉則在閣下矣

變鹽法議

姚瑩

嘉慶道光間兩淮鹽法之敝極矣淮北無商陶文毅力行票法而轉盛獨淮南未及變法僅奏請數端減輕課本以恤商而已當時雖云恤商而病根未去淮南鹽法仍未有瘳也病根奈何一曰出鹽之場竈一曰銷鹽之岸店二病不除鹽法未見其可矣道光十六年文毅嘗問瑩曰有勸淮南並行票鹽者可乎瑩曰淮北課少而地狹淮南課多而地廣其事不同夫票法之善以去商販之束縛而民便之也有票販有水販票販納課赴場領鹽運至西壩而止爲時數月行內河數百里耳水販則皆淮北引地諸府州縣之人至西壩買鹽而歸散售於州縣食鹽之戶謂之水販官惟責課於票販而不問水販票販惟售鹽於水販而不問食鹽之人地近原闕而易從此其所以善也淮南不然其引地遠在楚西三省且有長江千里之險若行票法則票販斷不肯赴場領鹽且冒險千里運至楚西其違者運及儀徵而止耳楚西水販亦斷不肯冒險售鹽於淮南如此是楚西無淮鹽也三百一十九州縣之人能淡食乎惟驅使食蜀粵之私

耳淮南鹽既無所銷售課將十去七八國家何賴焉文毅乃止然至今日文毅之法又窮於淮南矣昔者
鹽嘗再護運司庫貯實銀常三百六十餘萬歲解京外諸餉未嘗告缺今司庫存銀纔十餘萬京外諸餉
積欠又數百萬官與商皆爛額焦頭相顧束手矣淮南額引一百四十餘萬儀徵改捆歲常七八十萬猶
以爲少今頻年儀捆僅三十萬捆工數萬人餓者大半環監掣號呼乞活而無以應之殷商運鹽能行二
三萬引以上者不過十餘家新綱每開幾於無商可派積引如山復多懸而無著運司計窮惟以率由舊
章四字藉口藏拙大府籌議補救又沮格不行商人困極無如何矣十一月十九夜楚北停鹽忽被天災
焚去四百餘艘逃存不過三分之一淮南課本一炬而去四百餘萬衆商聞之魂魄俱喪同聲一哭相與
僉呈告退通計淮南資本不及千萬今一炬失其大半欲責其運行千餘萬金之鹽以輸國課恐加以
嚴法而不行此誠危急存亡之秋更甚於道光八九年間矣尙能無變法乎變法奈何曰法半敝者猶可
補救圖全今敝十之八九如病者僅存一息耳非大瀉大補之不可大瀉大補者減緝私之費以收場竈
之鹽撤楚西岸店以免匿費之弊而已夫緝私之途不一自鄰私外以江船夾帶之私場竈透賣之私爲
大江船透賣七八出於場竈其病由垣商相時謀利不能多收竈戶之鹽竈戶不能枵腹以死也勢不能
不私售於梟販例禁雖嚴而無所用若清查場竈實數每竈出鹽若干分爲四季垣商收不盡者官爲收

買俾竈戶得以生養何必犯法售私乎垣商之鹽以備商運官收之鹽以應官辦口岸較之用銀買自垣商者貲本不更省乎官辦鹽本既省何致復有欠課第收鹽之費不貲司庫不能復籌此款則莫如減緝私之費以收鹽計無善於此者蓋緝私一項歲常費數十萬大抵有名無實不過委員稍分梟販之利益其私橐耳無益於公久矣今大加裁汰第存扼要之所數區及總督隨時賞犒委員之用可歲省其費之半飭淮南二十場大使責令按季收鹽報明備用如有短欠不實嚴定處分官運口岸之委員無須鹽本但須運岸之費是去緝私之虛名拔梟私之病根而益官岸之實用此其爲大補者也楚西岸店其弊無窮始爲商人賣鹽收課本而設既乃爲地方文武取用不窮之府乾隆中卽有匣費之名屢經裁減迨道光十年奏定每引四錢以銷鹽之數計之也而不肖有司則不計銷數而定爲歲額楚岸七十萬西岸四十萬不問費所由來第以額定賂規爭取之而已近十餘年楚岸日增至一百餘萬蓋名爲歲額而有重支有豫借習以爲常是無增額之名而有加費之實也復有往來遊客隨時抽豐不能定數蓋自總督鹽道以至州縣委員無復念商情之苦者矣楚西岸店之人無非淮南商親友復借有司之掊克貪求而浮報用數分潤入己此所以歲至一百餘萬也夫以銷鹽一引輸費四錢計之楚西匣費年僅當數十萬耳而違例妄取加增之數及於百數十萬試思國家歲課幾何尙年欠百數十萬而入有司之腹者反絲毫

無欠且重支豫借過於其額今中外度支如此之絀 聖主日夕憂勞大小諸臣食何人之祿不能爲國分憂而相與營私蠹耗於公如此其能無愧於心乎楚鹽因岸店所在漢口人烟稠密無地建倉又時有火患是以皆船泊省會由鹽道給發水程聽各縣水販子店分鹽散售然自九江大姑塘以下楚西二境二十餘州縣皆坐視鹽船之過而不能買商鹽仍須自省運回價值安得不增是以人情不順皆爭買船戶之腳私商鹽爲例所拘轉不許開艙售賣此成何理耶法令皆自相束縛以困商民及其敝也 國家亦暗受其害而不知夫爲法而病商病民以至病 國猶斤斤守之而不敢議此非愚也私耳昔陶文毅原奏本有僉商於黃州等處認運口岸之議而楚鹽道詳稱設店卽有應用經費恐不肖商夥影賣腳私致漢岸水程無從稽查西鹽道則稱所僉之商新置店屋鹽倉以及岸店辛工日用核算店費浮於水販赴青山領鹽水腳商力難賠仍必增入鹽價似多窒礙遂格不行夫添店僉商誠有如二道所云者然實則假爲公言以陰遂其就近魚肉商人之計且既有省店又於中途添店資費皆須重出故不願行今不僉商添店但令商鹽船至九江姑塘卽准其開艙分給水販子店運售或自至各府散售其楚西岸店皆撤有留者官不必問但令赴兩鹽道請領水程一如淮北票鹽西壩以上官爲稽查西壩以下但給水程其餘聽之則官民皆便火患胥除兩省匣費仍遵定例按數由淮商完納運司委員批解交兩鹽道分

給如此則岸夥無自浮開不肖有司無從重支豫借遊客無騷擾可省厘費百萬設本商願在青山或九江大姑塘一帶立店者聽之可也楚西接界卡要之地緝私文武照舊設立其費亦令商納司庫備文批解鹽道不許私取於商蓋鹽法本爲國課羣下收其餘利以資辦公可也然亦止可十之一二今正雜課纔三百數十萬而岸費已一百數十萬是三分而及其一盛時猶爲違制況凋壞至於今日歲完正雜課不及二百萬而岸費猶一百數十萬有加無已雖幸衆爲諱匿上無嚴譴其如商力不支何哉今以淮南之姑塘九江當淮北之西壩姑塘九江以上既處處稽查嚴密姑塘九江以下大開法網去其束縛聽商售賣但約以水程邊卡仍設官緝私地方官毋庸責成銷鹽分數則文武不能額外多取店夥不能影射浮開遊客不能抽豐騷擾然後岸費之浮增可節而正雜課之輸納可盈蘇商之困下利民而上利國中不失辦公之資楚西文武衙門及委員店夥俱有人心宜亦無怨此其所謂大瀉者也誠使大府原議諸條頒行而益以大補大瀉之法是雖不行票鹽而實半師其意淮綱其猶可立乎

論鹽二

孫鼎臣

治天下之弊當究其弊之始終得其所由生與其所終極去之而利自見天下產鹽之地曰兩淮曰兩浙曰長蘆曰福建曰廣東曰河東曰甘肅曰雲南曰四川淮南歲引一百三十九萬五千五百有十課銀五

百八十餘萬兩淮北歲引二十九萬六千九百八十有二課銀二十七萬二千兩有奇兩浙歲引八十萬五千三百九十有七課銀二十九萬兩有奇長蘆歲引九十六萬六千四十有大課銀一百五十六萬兩有奇福建歲引五十四萬五千六十有二課銀三十萬二千六百兩有奇廣東歲引八十一萬四千五百有十課銀六十四萬七千五百兩有奇河東歲引三十三萬三千四百四十有二課銀五十八萬一千六百兩甘肅花馬池歲引七萬二千六百八十有大課銀一萬四千五百兩有奇雲南無引歲額以勛計者三千九百四十二萬七千一百課銀三十七萬六千二百兩有奇四川無額視一歲所售之數請引於部而備餘引凡五千蓋鹽課居天下財賦四之一兩淮最鉅其弊亦最甚爲鹽之策者亦獨繁要其歸則緝私也恤竈也裕商也爲緝私之說者天下無不食鹽之人生齒之息今倍於昔鹽之售反絀於昔則病鹽者實私鹽也彼塞則此通矣其說誠是也然私果安出乎私之途非一船私者出於商船之船戶漕私者出於回空之軍船鄰私者出於鄰境之商梟私者出於所在之私販以其慄驚也而謂之梟功私者出於商所捕得之私鹽而莫盛於商所自販之私商賄吏而以鹵耗爲名溢於額引者倍於售也先私而後官私無課而官有課也雖然商之販私非商之故課重使之然也課之重非課之故吏黷使之然也順治初始定綱數淮南之引一百四萬二千三百九十淮北二十二萬九千一百二十有二今淮南之引增三十

五萬三千百有二十淮北之引增六萬七千八十有六矣引目既增商未受鹽而先輸課輸課之外歲有貢貢之數五十萬在公之費又七八十萬其閒大工大師旅則有加價有加飭商又輒獻銀以佐國家之急常一二百萬產鹽之地自場吏以上行鹽之地自卒役以上至於文武之大吏莫不有賂而又責之貸錢船戶以造船出財募人以捕私其爲用之繁且廣如是定制凡引課銀八錢三分及一兩一錢七分而商非銀二三兩不能運一引其後向之二者增而四三者增而五鬻一綱之鹽纔得三百萬而所費殆二千萬欲毋販私得乎故雖販私而吏不問也商私行而官引滯矣總船私漕私鄰私梟私之數不敵商私船私漕私鄰私梟私可以法戢而商私不能禁故緝私之說掩耳盜鈴之說也夫鹽產於場場不私鬻私鹽安出禁其所販之地不若禁其所產之地清其源而流自絕於是有議稽火伏以禁場私者矣火伏者所以稽煮鹽之數也一竈爲一鐮厯一晝夜一鐮之得鹽若干有定數起止皆場官監之然諸場廣袤數百里火伏之時有先後逐竈逐鐮而視之不能之勢也且夫計口授鹽度天下之丁制爲引之數引之數有限而鹽之產恆有餘積有用之鹽於無用之地欲禁朝不給夕之竈丁使毋私鬻禁嗜利之商與梟使毋私市可乎禁之必收餘鹽以恤丁丁有餘力場無餘鹽私不緝自止此緝私先恤竈之說也雖然是餘者委之無力之場商收之乎委之積困之綱商收之乎課逋帑絀欲仰於官而官又不能故恤竈之說

亦畫餅以止兒唬也不收餘鹽無以恤竈不紓商力則不能收餘鹽然則裕商其恤竈之本乎於是權鹽之使司計之臣請蠲 玉貢矣請免積逋矣請帶徵滯課矣請加價加觔而免其課矣又有封輪散輪之法以劑其盈虛有借底馬之法以資其轉運凡所以爲商計者無弗至而商之困不蘇額入之課累歲而可逋官吏之費依時而無爽故裕商之說亦朝四暮三之說也原其所由始而極其所終其利弊之所在瞭然矣往者陶文毅督兩江當淮北積弊之後綱商盡散乃更其法爲民運官給票而收其稅命曰票鹽行之而效蠲一切之冗費其費則視商運纔損三之一而運鹽者已獲厚利積年之滯鹽頓空亦宋沈立裁官估而歲額轉增之證也後十餘年淮南之商益困陸沔陽以文毅爲之而效也如淮北之法行之而綱法始盡散未幾東南用兵兩淮之引地戎馬交馳鹽法益埽地無餘而弊亦隨之蕩然盡矣數窮理極向之鉤帶蟠結堅如銅山紛如積絲數十百年 廟堂之上勞心焦思以圖之閤識之士竭智畢慮以謀之扃而不可排障而不可開者一旦決去如轉石於千刃之岡而墜之淵也雖人事爲之抑豈非天哉

論鹽三

孫鼎臣

往者亭林顧氏善劉晏之法而稱李雯之言亭林之說後人習聞之舉之達於朝諗於當事之吏尼而不行則所謂鹽利之不可興由於鹽吏之不可罷也當道光之九年御史王贈芳嘗以課歸場竈請矣襄平

蔣相國與鹽政福森駁之越二年華陽卓相國太僕寺卿梁中靖翰林侍講學士顧菴又以是請安化陶文毅駁之今觀其駁議之言則慮場地之廣而漏稅也竈戶之貧而逋稅鹽之隨稅增價也商之爭競居奇遠地之不得鹽也場不能置庫而場官之輦運煩也場官之職卑而稽察不能周也竈地之被災而病稅也根窩裁而失業者多也根窩之說後卒裁之亦無甚害懼竈地之不能無災則制田賦者亦豈能必天之無水旱哉是數說者皆未嘗就其事之理而熟思之爲之說而詳處之也誠著爲法以場商之有亭池自煮鹽者爲鹽戶予以執照編之冊其有亭池煮鹽之竈丁願爲鹽戶者告官一例子照編冊其貧無力以亭池鬻於富民而自爲竈丁者聽命督撫舉廉能州縣官爲場官而優其品秩稅銀之徵解考成視地丁錢糧例運司總其成餘官皆罷其稅則通數一歲舊徵正課之數與各場一歲產鹽之數均之而酌其中每百觔定稅若干必畫一毋畸輕畸重其舊徵之雜項勿計鹽戶自煮鹽鹽成告官開市場官稽其數而監其買賣按所賣之鹽依稅則納銀稅畢場官給稅票販商運鹽出場關津驗票而行不問所販之地販商不問何人先於所在州縣領照赴場買鹽無照者禁州縣每三月具其數上之運司鹽之價毋官定稅則必畫一者均輕重以絕趨避也勿計羨者有鹽卽有稅鹽溢稅亦溢鹽無所爲餘則稅無所爲羨許貧丁以亭池鬻之富民者通貧富以重鹽戶順丁之情勿強也舉州縣爲場官者吏選慎然後鹽政清

劉晏用士人之意也罷餘官而總於運司者一事權塞利孔也場官給稅票者利商旅譏盜鬻也販鹽必領照而具其數上運司者稽匿漏防侵欺也鹽無定價者產有衰旺物有高下市易之道不可以法齊也天下無無稅之鹽而私販不必緝鹽隨出稅隨入逋課不必督大商小賈人人得出財自運鹽而鹽無地不通壟斷不必慮淡食不必憂官少而費省價輕而售易鹽之利盡歸於場不必優恤而鹽戶自饒不必厲禁多取而歲入自倍諸弊去諸利興因利利民而國亦賴焉者此也道光之初綱法猶未甚壞食鹽之利者衆稅徵於場國利民利商利而官不與焉故雖以襄平之忠安化之才不能不撓於衆多之勢時之未至雖賢者無所用其力歟兩淮之綱旣廢引地之禁亦盡弛東南民之食鹽莫可究詰其直不減於昔之綱鹽民不食賤而國失數十萬之課利權旁落皆中飽於姦民鹽法之更宜莫便於此時矣於是當事之吏始思往者之言謀徵場稅而不立法不擇官自咸豐五年至七年七月稅銀止八萬六千五百餘兩偷漏侵漁皆所不免或者遂謂海濱隨地爲鹽不盡受場吏約束勢必設兵重刑而彼亡命無不通盜雖賢能有難制且鹽官之不能盡罷猶河吏之不能盡裁以爲場稅果不可行信能從吾言鹽戶立矣猶有不受約束者乎鹽利盡歸於場猶有通盜鬻私者乎定場官之考成而精其選猶有侵欺者乎傳有之疑事無成建非常之原而蹈常習故之見牽於中以此而責成功也難矣哉

就場徵課之說亭林先生亟稱之其實必不可行海濱遼闊隨地可煮隨處可銷孰得而禁之果行此法壅者自壅通者自通不過驅利而歸之場官耳陶文毅晚悟其非斷然不行誠遠慮也劉翰清誌

利淮鹺議

馮桂芬

顧氏炎武據李雯議鹽宜就場定額一稅之後不問其所之天下皆私鹽天下皆官鹽矣謂其說鑿鑿可行又引杜詩蜀麻吳鹽自古通句又以崑山多食淮私而功令行浙鹽爲掩耳盜鐘之政其意蓋欲撤一切疆界以實其不問所之之法似亦探本窮源之論余少時讀而善之洎後修鹽法志於揚州又躬履鹽場始知李說書生之見也淮南鹽價每斤約銀五六釐課約銀一分淮北官定鹽價每斤銀一釐五毫課約銀六釐是所謂一稅直俄頃而舉鹽價一倍之五倍之也誰則願經此一稅者利之所在人人趨之竈戶商戶船戶兵役百執事等無一非漏私之人官能防之乎況官亦庸足恃乎濱海數百里港汊百出白蘆黃葦一望無際村落場竈零星散布於其間不漏於近署漏於遠地矣不漏於晴霽漏於陰雨矣不漏於白晝漏於昏暮矣何地可禁亦何時可禁當下一轉語曰天下皆官鹽天下皆私鹽矣國初雖無帑利而課額已不少其時百物皆賤鹽價必有賤無貴情事宜相等李氏乃爲此說毋乃慎乎票鹽之始明史食貨志載嘉靖中山東兩浙令山商每百斤納稅八分給之票每年收銀二千餘兩浙江鹽法志則

稱嘉靖中兩浙巡鹽御史李遂行票引於黃巖等場每張照鹽三百斤置票九萬張又稱厥後漸廣是又
不止九萬張之數計九萬張已得銀二三萬兩所謂廣者山東猶不與明史所載殊未盡魏氏源票鹽記
僅引明史則考之不審也此近於就場定稅特不能不問所之爲折中之法陶公澍行之淮北而大效陸
公建瀛於淮南踵行之亦兩綱全課悉舉爲數年所未有而訾毀蜂起則綱領是而條目非也今議鹽法
舍是更無良策亦於票鹽中求其盡善斯可矣其法有四一廓清窠臼也凡事委曲繁重皆弊藪也票法
已從簡易然尙有可議者減引而轉帶乙也挽上六間也儀徵改捆也桐城等江運八岸仍歸專商也宜
一切剷除之於三江營一帶相地立局爲交稅及場船交鹽江船受鹽之所每綱仍用舊額一百三十九
萬餘引加八岸七萬餘引并入淮南每引四百斤分兩包就場定捆以後經卡掣驗永不改捆酌定正雜
課經費一律定額其湖運淮北天長一岸亦宜歸并淮南照高寶食鹽辦理運商凡招三種一自場運江
一自江運岸一自岸運各州縣無論官紳軍民皆準承運凡舊商舊引概不轉轆一平減賦則也票法宗
旨在於輕本敵私能敵私則前綱早竣後綱繼之鹽出於海而無窮與稍多何害利歸於官而不絕取稍
少何害不能敵私則私鹽占之利不歸官鹽溢於海何益之有焉若如刊冊課目斤稅幾及一分實已過
重辛亥改章亦以其過重每引加帶一二百斤然票鹽仍不獲利爲今之計莫如奏芟帑利參價二款帑本早沒於舊商帑利轉責之新

販舊商稅整可以分參若干兩新商稅零不能折參若干分徒使價出商資參歸官橐二者皆名不正言

不順而帑利百餘萬厥數更鉅實滯銷之原必應刪薙以輕成本一製造洋船也擬造容五六百墩

可容鹽二千餘

引千餘輪船十安慶九江漢口三處牽算月得往來三歲得往來三十六凡運鹽七八十萬引更用舟尾繫舟之法卽全綱可舉又回舟可帶米二三百萬石統計往來舟值視江船常價有減無增而運行之速則十倍且輪船質堅力猛所遇輒糜碎海口捕盜往往見盜船卽前觸之并可兼巡私之用計無便於此者一廣建鹽倉也向來運鹽舟笨而遲到岸已須累月守賣動輒經年多一日停泊卽多一日費用且多一日偷漏水火之虞意外乘之整輪散輪還相爲弊且今議洋船運鹽工食更鉅有不可停泊之勢一入於倉則防範易於舟儼直少於舟且可時其貴賤酌其緩亟而多寡其運數令各場各地永無多鹽缺鹽之患凡鹽一年之後質堅不復淋漓向時鹽船守候本須逾年是卽久儲倉中虧折僅等三江營安慶九江漢口四處皆濱江於建倉甚便乃從來不聞議及何耶或又曰鹽課中有按丁加斤之目則鹽課之數原準丁數今以各省地丁三千萬鹽課六百萬計之鹽課當地丁十之二徑於地丁中加十之二爲鹽課亦簡易之法不知賦稅之事減順而加逆非萬全之道且果行之異日度支稍乏必議重徵鹽稅是適爲稅政之地未敢輕於立論也至兩淮引地課額居天下大半兩淮舉而餘可勿論矣

採買淮鹽濟食分岸納課濟餉疏

咸豐五年

駱秉章

竊自逆賊竄湖廣擾江皖而陷金陵長江梗塞淮鹽片引不抵楚岸者三年於茲矣湖南一省例食淮鹽州縣十居七八從前無事之時商民販運穀米煤炭桐漆油竹木紙鐵及各土產運赴漢口銷售易鹽而歸分銷各岸計淮南之鹽銷數多者惟湖南爲最每年正引之外尙融銷湖北之引十餘萬論者每謂淮南引鹽行銷西岸漢岸而其實湖南從漢岸分銷幾敵淮綱之半誠以江西有粵鹽浙鹽閩鹽之浸灌湖北有川鹽潞鹽淮北鹽之浸灌湖南則距產鹽各省稍遠而川粵之私又有三峽五嶺之險爲之阻隔浸灌較難故行銷淮鹽較江西湖北兩省爲尤暢也自江淮道梗淮南片引不到兩粵多故粵鹽亦不時至而鹽價昂四民重困湖南爲產米之鄉近年稍稱豐稔穀賤如泥又武漢疊陷米糧無路行銷農民賣穀一石買鹽不能十觔終歲勤動求免茹淡之苦而不得如是而農困商販貿遷阻滯生計蕭條向之商賈今變而爲窮民向之小販今變而爲乞丐如是而商困兵勇出征鹽與銀並重既不能實鹽自隨勢必隨地購買近則墟市荒儉購買維艱南人數日不嘗鹽味則筋力疲乏甚或重腿成疾如是而兵勇亦困此患之中於湖南者也淮南各場煮海爲業丁竈而外窮民賴以營運爲生者奚止數十萬衆頻年片引不行各場鹽素山積鹽一觔僅易一錢尙苦無從銷售生理日窮坐以待盡上年兩江督臣怡良曾經據

實陳 奏急以恤丁爲請其竭蹶可想此患之中於江南者也 國家兩淮鹽課正雜各款每歲共銀六百餘萬兩爲經入一大宗三載以來兵餉增數千萬之出鹽課失二千萬之入兵事方殷餉源早涸用兵各省均抱隱憂武有七德豐財居一財不能豐且日憂饑潰主兵之臣以乏餉而號令難行負戈之士以乏餉而壯氣易餒兵勇之應裁者以欠餉而不能裁事機之應辦者以欠餉而不能辦錢糧漕折追呼急而民力難支捐輸釐金括索頻而膏脂已竭日復一日何堪設想此患之中於 國家者也且自古鹽筴之利不歸於官則歸於民歸官則利權一而國用紓歸民則豪猾橫而民生感事勢所必然也今淮鹽之利不歸於官不歸於民而且潛歸於賊何以徵之淮南片引不行轉運之路已斷矣而民間買食之鹽亦有產自淮場者謂非奸民與賊販易此鹽何自而來風聞各處並有販運穀米硝磺潛越下游荒僻洲渚搬堤轉壩與賊易鹽獲利之事奸民冒死趨利本爲法所難防小民方虞買食維艱豈遑問其所自官軍明失淮鹽之利而餉無可籌逆賊陰據淮鹽之利而禍以愈烈以此言之則採買淮鹽之舉不獨爲籌餉計在所必先卽爲剿賊計亦刻不容緩也明矣歷代籌邊裕餉之策多出於鹽誠以鹽之爲利與地丁漕米同一取之於民而小民惟知買鹽不知納課較之地丁漕米尤無追呼徵比之煩但令成本輕減足以敵私小民盡食官鹽卽小民盡完 國課是有益於 國有益於民爲 朝廷收自然之利並爲閭閻銷

無窮之患莫便於此明代開中法及王守仁權鹽濟餉之策所爲識時要著行之有效也兵部侍郎銜臣曾國藩曾慮及此而有借撥浙鹽之請已蒙 皇上俞允第所請三萬引爲數甚少濟江西民食尙且不足更何能波及湖南曾國藩非不知浙鹽三萬無濟江楚兩岸之需亦非不知淮鹽較浙鹽成本更輕行銷易暢特以淮鹽運銷楚岸必假道浙河浙中官商方暗侵淮南引地爲浙鹽壟斷之謀必將藉淮鹽入浙浸灌浙江引地爲言危詞聳聽其勢終扞格而難行不如卽借浙鹽稍資軍需之接濟臣愚則以浙省所產之鹽斷不足敷江楚民食而於軍餉裨益無多不若採買淮鹽於民食有不匱之源而於剿賊機宜及各省軍餉尤有裨益且湖南旣例食淮鹽之地淮鹽又係行銷湖南之引浙鹽可借淮鹽豈反不可行應請 敕下兩江督臣轉飭運使郭沛霖監掣同知許惇詩運判馮國柱鹽大使萬啟彬陳本鎮等設法倡導勸諭各場有鹽之商先運一十萬引趕赴湖南俾全省兵民得免淡食之苦其應納之課以一半由兩淮投納以一半歸湖南投納以充兵餉在戶部以失課之鹽抵餉無俟仰屋而籌在江楚以滯銷之引變銀不至束手待盡不獨江楚兵民商賈兩有裨益且於數省軍務大有轉機至淮鹽由浙河轉運湖南經過江西亦係淮鹽引地原無慮其浸灌惟由蘇過浙必經浙河係浙鹽引地然程途僅止三百餘里責成領運之商督運之官限以程期亦無難杜其浸灌且楚岸鹽價倍昂於浙商人惟利是趨豈肯以貴銷

楚岸之鹽賤售浙岸以人情物理推之似可毋庸過慮如果試行有效湖南所收鹽課漸有成數則東征水陸兩軍亦有可指之餉臣斷不敢稍存畛域置大局於不顧當此時局艱難萬狀之時公家之利豈可知而不爲若身任封疆而徒顧一隅私計致所濟者小而所誤者大是何異於鹽商各護引岸之見乎並懇諭浙江撫臣及鹽務諸臣毋爲奸商私議所脅持則東南大局幸甚臣一得之愚謹據實直陳

奏陳楚省鹽法乞酌撥引張疏

咸豐七年


胡林翼


竊照湖廣兩省自淮鹽阻絕以來鹽法遂無章程惟藉鄰省商販陸續運到以濟民食此實暫時權宜之計非可恃爲久遠也查潞粵各鹽成本較昂運販止及近邊不能行遠惟川鹽一水可通成本較少是以近年兩省食鹽實以川爲大宗儼與淮運相埒咸豐三年前署督臣張亮基奏請借撥川鹽引張派員督運著有成效因粵匪上竄遂未續請嗣後兩楚食鹽皆係私商運販經川省之夔關楚省之宜昌沙市抽提課稅後卽准作爲官鹽任其所之約計入楚之鹽以旺月計算每月約合川省水引九百餘張一千萬斤上下此項鹽觔固未定有額數亦未給有引票惟視楚省鹽價之長落以卜來鹽之旺衰正月間宜昌有襄匪之警商販一月不前南省鹽價大昂民間幾於淡食鹽之來楚與否其權皆操之商販不統於官鹽法爲國之大政利權下移無此政體萬一姦商欲操奇贏相率一月不至民間卽鮮食鹽一旦相隨屬

集先到者倍蓰獲利後到者又復壅滯堪虞大非便民裕用之道臣等自省垣克復後卽再四籌商擬仍援張亮基借撥川引之案而稍變通其法改爲官運官銷仍不奪商販之利以每月銷鹽九百引計算擬按月官運用鹽水引二百張餘七百引仍歸商販自運由楚省派道府大員至川會同川省委員按月督運仍照川省章程完納引課到楚後另派公正委員勒限督銷其運鹽資本卽由川省協濟楚餉內按月發交駐川委員承領運辦通四月報銷一次其所銷鹽價並所獲贏餘一併解赴大營作爲軍餉似此通融辦理其利實有數端楚省引地袤延數千里之大民運衰旺不常官運源源不竭價值不虞頓長卽有缺乏隨處可通此一利也川鹽成本較輕倘經理得人則贏餘頗厚以實軍儲不無小補此二利也川省濟楚軍餉竭力供支尙虞不足茲畫作鹽本在川省所籌仍不過照向月之數而楚省所獲較豐是不增餉而有增餉之益此三利也南省米多而缺鹽北省鹽多而缺米卽令委員運鹽易米以作軍食此四利也民運七而官運其二旣非占民之利且商販得隨官運可免痞徒訛搶之虞此五利也九江之於金陵風利不過五日可到是東征之師不僅目前之挹注必以鄂爲根本卽異日之糧糈終賴鄂爲轉輸鄂省一隅之地民力凋殘餉項日絀凡有資軍餉之事幾於搜索殆盡此尤便民而不病商實可萬全無算如蒙 俞允卽求 飭下四川督臣每月備撥川省富順廠鹽水引二百張交楚省委員承辦並就近將濟

楚月餉發交委員收領以免往返解運之煩其督運督銷章程並委員銜名敬俟奉到諭旨詳悉咨送戶部查核試行半年當有贏餘以資軍食即可將蜀省月撥五萬兵餉再行奏請停止








DS 754 .K8 v.17
皇朝經世文續編卷四十四

戶政二十一 鹽課三

請整頓鹽法疏



整理淮北票鹽疏

曾國藩

整頓淮南鹽務疏

曾國藩

條陳長蘆鹽務疏

曾國藩

楚岸鹽引淮川分界行銷疏

曾國藩

與劉星房都轉書

曾國藩

請收回淮南引地疏

曾國藩

復李少荃中堂論輪船運鹽書

李宗義

收回淮南引地應遵部議迅速舉行疏

沈葆楨

兩淮鹽價仍難議增疏

沈葆楨

淮商遵完川鄂餉銀懇立限收復楚岸疏

沈葆楨

經世文續編

卷四十四目錄

二

糸十之糸糸

糸十之糸糸

糸十之糸糸

糸十之糸糸

糸十之糸糸

糸十之糸糸

糸十之糸糸

糸十之糸糸

糸十之糸糸

糸十之糸糸

糸十之糸糸

糸十之糸糸

糸十之糸糸

糸十之糸糸

糸十之糸糸

糸十之糸糸

糸十之糸糸

糸十之糸糸

糸十之糸糸

糸十之糸糸

糸十之糸糸

糸十之糸糸

糸十之糸糸

糸十之糸糸

糸十之糸糸

糸十之糸糸

糸十之糸糸

糸十之糸糸

戶政二十一 鹽課三

請整頓鹽法疏

劉毓楠

竊兩淮鹽課爲皖省軍餉大宗皖營現當攻剿喫緊之時全賴北鹽暢銷課銀充裕方資接濟查淮北票鹽初行歲銷四十六萬餘引加江運數萬引征收正雜課銀幾逾百萬奏銷年清年款良由立法精用人當也近年歲銷不過二十萬引或十餘萬引乙卯丙辰兩綱尙未運清票商則完納無資場竈則晒掃失業漸成渙散之勢推其故皆由該管官吏經理不善祇知牟利營私不知恤商招販以致引滯課絀皖營守提軍餉累月經年貽誤大局所關匪細是以前任運判許惇詩陳照均經原任漕運總督袁甲三參劾去任奈鹽官積習相沿專尙夤緣奔競更多闖冗庸劣之輩求其正本清源實心任事百不獲一淮北潰敗已甚必得有爲有守之員方足以資整頓而籌課餉查運使兼轄兩淮現蒙 皇上簡放新任必能破除情面任用賢員惟淮北利弊所在恐難周知臣愚以爲得人則法自立除弊則利自興謹據平日聞見所及酌目前因革所宜敬抒管見六條爲我 皇上敬陳之一裁釐捐以裕引課也查西壩爲淮北票鹽

總匯之區湖南由壩運經各岸途經高良澗正陽關臨淮關三河尖等處現俱設有釐卡每處按包抽捐制錢六七百文或一千一二百文均係各營弁勇管理交納稍遲鞭笞立至商販畏懼裹足不前引課日絀實由於此且釐捐向無定額不肖營弁往往征十報一各營仍有缺餉之虞是釐捐有名無實已可概見擬請裁撤釐卡招徠商販以期額行全復軍餉日饒國計民生均有裨益一禁私鹽以廣銷路也自來整頓鹽法首重緝私而官中之私尤宜嚴加禁止淮北提鹽抵課以來營弁捆運餉鹽買私帶運包庇梟販漏卡闖關一引餉鹽數引私鹽其勢不可以窮詰且票販赴場買鹽經漕運總督委員每運一引於例定鹽斤之外加帶二十餘斤集零成引運交漕局不征國課名爲餉鹽實則私鹽且令場商賠鹽斤票鹽賠包索舡行賠販脚百端騷擾怨譟沸騰徐州糧臺餉鹽向在西壩採買今則海州運判親屬代辦赴場買鹽尅減價值拘拿車船夾帶私包莫敢如何應請將營鹽夾帶諸弊認真剔除並將漕局徐臺之鹽概行停止一汰冗員以免擾累也鹽官之設各有專司淮北從前運行綱鹽過淮改捆是以設有淮北驗掣同知一員專司改捆同知一員淮北批驗所大使一員白塔河烏沙河巡檢各一員專司改捆等事迨改票以後北鹽徑運西壩出湖舊道全徙官行徒設同知等員有官無職罔不謀署他缺應卽裁缺以省俸廉再票鹽改章之始板浦中正臨興三場設立四局新關大伊山五丈河順清河等處各設一卡均由

運使委員稽查乃日久弊生竟有挂號請坪查艙裁角諸名目每引黑費輒至制錢數千該委員等勒索陋規徒爲商販之累應將局卡各員卽行裁撤所有秤掣查驗事卽責成三場之官實心經理一減經費以輕成本也淮北票鹽舊有經費一欸隨同正雜課銀征收爲數甚鉅嗣因轉輸不及改運四成鹽包核計正雜課銀不及三成經費等款已在一成以上凡經費所提鹽包存壩變價官民互市搶售勒索殊屬不成事體又壬戌年請運較旺海州運判於例提鹽包之外每百引加征現銀數兩是年請運二十餘萬引加征幾至二萬餘兩是否稟詳上司有案應令嚴切根究以禁苛派並將經費應提鹽包速行停止酌留舊制經費十成之二征收現銀則官吏無分鹽爭售之弊有現銀辦公之實票販成本較輕亦足以廣招徠俟壩銷暢旺並將鹽課提包章程停止仍征現銀以杜弊端一定鹽價以恤竈丁也淮北改票以後丁竈鹽價駁價每引例定九錢嗣後屢減屢復變更不已每一運判到任必先詳請運使核減鹽價恐嚇商民迨至賄賂滿囊始行詳復舊制是以前任各運判均經減復駁價有案價減則產廢產廢則鹽缺鹽缺則課懸課懸則餉虧弊之相因有如此者況淮北屢遭搶匪焚掠亭鹽池井大半荒蕪丁竈流離晒掃失業亟宜保固池鹽以裕課源應仍查照票鹽定章每引定爲鹽價駁價九錢永遠遵行該管官不得擅行核減致滋擾害一疏河道以利挽運也海州運鹽河道潮汐時通常患淤塞商販舊有河費捐款每引

捐銀二分足額年分捐銀八千餘兩向例存諸海州運判庫內以備隨時挑河乃自咸豐元年以來從未興挑現在河身淤墊日高乾涸時形挽運多阻近來銷數雖絀十餘年之久捐款已逾數萬商販屢請挑河該運判輒謂庫存無款置若罔聞應令確切查明速將捐存款項發給興挑以利捆運又聞淮北商捐全係官爲經理乃捐倉穀則義倉如洗捐勇糧則練勇無多應令一併清查以杜侵蝕以上六款皆關淮北鹽務利弊臣訪聞較確不敢壅於上聞應請旨飭下兩江總督遴委清正大員會同該運使徹底清查毋得瞻徇隱飾以清積弊而裕課源

整理淮北票鹽疏

同治三年

曾國藩

竊臣伏查淮北鹽務自前督臣陶澍改行票鹽意美法良商民稱便果能率由舊章行之百年不敝無如軍興以後運道之通塞靡常銷數之暢滯無定鹽既不能如額運售課亦不能按綱造報拖延套搭已覺年不如年然未辦餉鹽以前票販雖日形竭蹶而尙能勉力從公池商雖難免偷漏而未敢任意私售逮軍營提鹽抵課變易舊規營員日出於其塗商販遂聞而卻步李世忠部下赴壩領鹽尤屬桀驁一不遂欲百般恐嚇甚至因棧鹽不足下場自縊一營開端各營效尤護私夾私之弊遂至不可窮詰現在李世忠業經開缺回籍其部下兵勇亦皆遣散當此淮甸澄清自宜恪遵聖諭將餉鹽截停招集新舊票販

照常請票運鹽完納現課出湖銷售臣等咨博訪參考成法覈議新章約有必須停止者三急宜整理者四請爲我皇上陳之漕臣以清淮防費支絀先令場商每包捐鹽五斤每引共二十斤旋因逐包捐繳諸多未便由海分司詳改每運鹽百包帶繳五包其應完課銀及售出鹽價雖經吳棠奏明作爲清淮軍需但錙銖而取之瑣屑而派之殊非政體所宜此必須停止者一也徐州係山東引地前因捻氛梗阻東引未能到岸經督辦徐宿軍務田在田奏准借運北鹽畫收東課原係暫時權宜之計行之日久流弊滋多採買則私自赴場售銷則旁侵皖界刻下東引業已通行徐民無虞淡食不能再託借運之虛名貽侵銷之實患此必須停止者二也北鹽向有淨鹽毛鹽之分已改網者爲淨鹽未改網者爲毛鹽皆須納課方准出湖近來私梟勾串營弁朋販毛鹽結隊橫行連檣闖越堵之嚴則營員出而包庇緝之疎則官引盡被占銷此必須停止者三也夫權鹽之法革其弊而利自興餉鹽停則強刦害販之弊除捐鹽停則科歛病商之弊除借運朋販之鹽停則引界混淆營私充斥之弊無不除臣所謂整理之四端蓋亦就諸弊旣云因勢利導耳淮北綱引前係奏至戊午綱爲止今於五月初八日接開己未新綱惟兵燹以後戶口大減斷不能銷四十六萬引之數應循照近年奏案先辦正額二十九萬六千九百八十二引每引例收報部正課一兩五分一釐雜課二錢又外辦經費四錢倉穀河費鹽捕營各一分此外如團練壩工緝賣

號項等款名目太繁一概刪除以紓販力此現籌整理者一也近來軍餉皆賴鹽釐接濟勢不能概行裁撤而長路處處設卡商販視為畏途且從前各卡總計每包約須完釐錢二千餘文爲數過重自應大加核減今擬仿淮南總收分解之法歸併兩處自西壩出湖先在五河設卡每包收釐錢五百文運赴上游再於正陽關設卡每包收釐錢五百文他卡只准驗票不准重抽統由臣選派委員駐卡經理蓋非減釐不足以輕本非裁卡不足以卹商此現籌整理者二也淮北解餉原案向以十成分攤臨淮軍營分四成滁州李營分四成安徽撫營分二成今臨滁兩營業已分別裁并自可將該兩營舊有之餉改撥金陵一軍稍解燃眉之急惟漕臣停止捐鹽亦應量予撥濟以資貼補嗣後所收課釐臣已咨明吳棠喬松年應仍以十成分派臣營派五成撫營派四成漕營派一成論兵數則小有裒益論舊例則無甚更張此現籌整理者三也北鹽每引例定正鹽四百斤分細四包每包連漕耗重一百十斤近來棧鹽出湖皆在西壩改網大包重一百二三十觔不等以省運腳及按包抽釐之費換包後鹽票不符叢生弊竇臣已嚴申禁令不准改網大包並於例給大票外將每船裝鹽包數亦仿淮南之例填明艙口清單庶鹽與票符可杜就重而避輕不致以多而報少此現籌整理者四也以上各條係就戶部原奏及御史劉毓楠之條陳悉心參酌力挽近年之秕政悉復疇昔之成規而又恐積弊已深一旦改收現課各販不甚踴躍更議輔以

官運照商販一律辦理以示倡導淮北近年以來綱法紊亂開綱既無定期奏銷亦無定限目下新章既定臣嚴飭運司督同海州分司廣爲招徠源源認運仍限一年造報奏銷以符定制但例銷北鹽口岸迭被苗捻蹂躪之後不但煙戶凋零人民稀少且未經開綱之前存積餉鹽捐鹽販鹽爲數不少舊鹽之占壓太多新鹽之售銷難速勢有必然又皖之潁六廬鳳豫之信羅光固逼近捻氛軍情變幻刻刻可危課項能否如額收足奏銷能否依限造報未敢信有把握其五河正陽關所收鹽釐將來自當隨同正課一併報部以重款項惟因餉需緊要此時所收鹽課只能支應軍需未能先運京餉私衷耿耿抱疚良深臣惟有督飭署運司忠廉殫盡血忱實力經理以仰副 皇上整飭鹽綱之至意

整頓淮南鹽務疏

曾國藩

竊臣於上年九月二十二日覆奏京倉需米摺內曾將籌辦南鹽情形略陳大概在案伏查淮南鹽課甲於天下自長江梗阻引岸廢弛迭經前督臣於咸豐四年奏辦就場抽稅販戶下場網鹽收課甚微又於七年奏改設局征稅令水販就棧採買稍有成效但每年所征課銀較全盛時尙不及十分之一總因楚西引地未通鹽無去路是以課無來源現在江路肅清運道暢行無阻所有楚西各岸自應趕緊設法運鹽濟售力圖整理而籌辦之難大端有二一在鄰鹽之侵灌太久西岸則食浙私粵私而兼以閩私楚岸

則食川私粵私而兼以潞私引地被占將及十年民既藉此以濟食官亦藉此以抽釐積重難返久假不歸勢不能驟行禁絕一在釐卡之設立太多淮鹽出江自儀徵而金柱關而荻港而大通而安慶而華陽鎮以達楚西層層設卡處處報稅均以鹽釐爲大宗諸軍仰食性命相依勢不能概行裁撤臣博訪衆論核定新章按切今日之時勢仍倣昔年之成法大致不外乎疏銷輕本保價杜私四者請爲我皇上粗陳其略自鄰鹽侵佔淮界本輕利厚淮鹽不能與之相敵江楚百餘州縣徧地皆是查之不勝其煩堵之且恐生變計惟重稅鄰私俾鄰本重而淮本輕庶鄰鹽可以化私爲官淮鹽亦得逐漸進步現已咨明湖廣江西各督撫將鄰私釐金酌量加抽聽鄰鹽與淮鹽並行不悖譬之田產被客民佔據田主初歸姑與客分耕而食待至淮運日多銷路日暢然後逐佔田之客申鄰私之禁此疏銷之略也近年楚西之鹽每引完釐約共在十五兩以上所分濟者下游爲都興阿之餉馮子材之餉李世忠之餉上游爲臣與官文部下之餉皆萬不可停者臣與各處咨商鹽釐不能全停未始不可暫緩除揚鎮兩防宜照舊額外其餘未始不可少減酌定新章前之逢卡抽收者今改爲到岸售銷後彙總完釐分解各軍前之收卡稅五兩有奇者今改爲楚岸每引抽銀十一兩九錢八分西岸每引抽銀九兩四錢四分皖岸每引抽銀四兩四錢既減釐以便商人先售而後納此輕本之略也商販挾資求利無不願價值常昂保而勿失然不由官

爲主持往往見小欲速跌價搶售其始一二奸商零販但求卸貨而先銷不肯守日而賠利其後彼此爭先愈跌愈賤如風捲潮退雖欲挽回以保成本而不可得官與商俱受其害現於楚西各岸設立督銷局派委大員駐局經理鹽運到岸令商販投局掛號懸牌定價挨次輪銷時而鹽少小民無食貴之虞時而銷滯商賈無虧本之慮此保價之略也鹽法首重緝私大夥私梟明目張膽猶不難派兵捕拏最易偷漏者包內之重斤船戶之夾帶所謂官中之私查禁尤難現經改復道光三十年舊章每引正鹽六百斤分緬八包每包另給涵耗七斤半包索三斤半共重八十六斤由臣刊發大票隨時添給並於大勝關大通安慶等處派員驗票截角如有重斤夾帶立即嚴加懲究提鹽充公其各岸之兼行鄰鹽者亦必另給稅單苟無單而販私卽按律而科罪此杜私之略也茲四者均就目前之要務及道光年間之成規參酌而損益之無論官運營運悉照商運一律辦理至應完課銀因鹽釐爲數太重未能據議增加仍照咸豐七年奏案征收向來鹽課按半年奏報一次今擬將各處彙收之釐亦分上下半年隨課並報以便部臣有所稽考惟兵燹之餘戶口大減以今日之民數照承平之引額恐運銷不及一半加以鄰私充斥挽復非易殷商絕少招徠尤難能否漸有起色殊無把握臣惟有督飭署運使忠廉實力講求以期國課軍需兩有裨益

條陳長蘆鹽務疏

曾國藩

竊臣於同治八年五月初一日奉到 寄諭前因給事中陳鴻翊奏請整頓長蘆鹽務當經降旨交戶部議奏茲據奏稱陳鴻翊所擬各條或係申明成例或係現辦有案或欸由外銷向未報部總之蘆綱積弊在引岸虛懸乏人認運因而交欸日絀浮費過重商力難紓正供遂致暗虧請飭迅速整頓等語著曾國藩按照部議各條督飭長蘆運司將應辦事宜趕緊修舉應汰陋習實力埽除如尚有未盡事宜並著體察情形酌擬章程具奏等因欽此當卽恭錄札飭運司恒慶據實詳覆以憑核奏旋據該運司將鹽捐錢文津貼剥船一條先行詳請咨覆其餘九條亦於六月間詳復臣以其中利弊未能詳細釐剔所陳尙有不實不盡批令再行確查具詳九月初間又經另委候補知府李興銳馳赴天津按照原奏各條明查暗訪悉心考究據實稟復茲據該司及委員先後查復前來臣參觀互證酌擬辦法分條具陳如左

第一條認辦懸岸宜定限期查蘆商認辦引地向例於具稟之後飭綱查明是否家道殷實仍由本商自覓散商聯名出結具保由綱總循例加結始由運司轉詳咨部更名一面給發行知領引辦運此等層折原爲慎重課帑由來已久其中緊要關鍵重在出結之保商不在加結畫押之總商其或商本實不充足或外來人地生疎綱中無商承保則往返查訪稽延時日亦事勢所常有並非該商總等有意刁難藉端

需索也惟新商認岸之初辦千引者向令先交兩課銀一千餘兩不等名曰寄庫以驗殷乏又認運租運捆運之外另有試運章程試之二三年果不能辦准其稟退有寄庫則資本之證據早明有試運則本商之進退裕如在綱總不必過於慎重徒啟壟斷之疑不以爲因循廢公卽以爲靳惜美岸迹近把持情同勒捐嗣後新商具呈但有散商聯名具保者卽令綱總酌定限期於二十日內加結畫押運司亦迅速發給行知庶衆商可資鼓舞

第二條保結商人宜專責成查長蘆向例新商入綱取具聯名商保保其家道殷實如有貽悞課運願甘分賠甘結惟各商因通綱向有隨引帶交參課銀兩遇有參商拖欠課款除以查抄家產變抵不敷外均在商交參課內彌補是以從無保商攤賠之案迨至道光二十九年引岸參懸無商認辦懸課過多參課不敷彌補通綱添捐懸岸課一款隨領引時每引交銀四分專補懸課之用無如懸岸日增歸補愈難所有續參商課雖逐案飭令分賠總未據完交實銀且查蘆綱商人多因悞運悞課其本商名下自能保全出綱者甚屬稀少若再責令分賠代人受過並不予以年限難免不紛紛畏累遠避則蘆屬引地從此有參無認殊於全局有礙自應量爲變通擬請仿照保固三年定限如果三年正課之內認商貽悞課運被參卽將應交正課除抄查備抵外其餘參欠課銀分作三成在於參商名下追交二成出結之散商加結

之總商分賠一成如逾三年之期認商業經完過奏銷引課可稱家道殷實卽與保商無涉以示限制似此酌核辦理於課款分賠有著而於各商亦不致有畏累不保之虞矣

第三條督催總商宜先完課查蘆商完課無論總商散商均照通綱一律辦理近年奏銷後所欠勒限課銀委係累商欠交之款綱商名下應交正課均經依限催完惟向來章程每屆上課之期運司派委鹽務後補數員率同綱總督催委員平日與衆商情誼不洽於鹽務底裏不明督催無權虛應故事每屆籠統完至八分以上爲率而此八分中孰多孰寡孰先孰後無從稽考是總商之拉勻揀算從中取巧其物議亦由此而起嗣後惟當遵照部議敕令綱總首先完納每屆奏銷將總商名下課款是否清完之處附案聲明仍由運司將總商另立簿冊散商亦立一簿將已完幾成未完幾成據實登註隨同銷冊詳文送鹽院衙門備查綱總無從牽拉衆商無從朦混開誠布公共見共聞征收亦當日有起色

第四條捆運懸岸宜交全額查長蘆懸岸前於道光二十八年經 欽差王大臣查辦鹽務案內將無商州縣五十五處除有州縣自行運銷者十一處無容更改外其餘四十四處之河南懸岸二十州縣盡改票鹽仿照淮北成案先課後鹽無論資本多寡一經交課給票護運直隸懸岸二十四處予限半年責令各州縣或招商或招販一律整理倘商販無人責成各州縣領運如州縣實不能辦理之處仍由鹽運司

遴員官運等因今查直豫各處懸岸除陸續招有新商具認外尚有豫屬之新鄭太康扶溝長葛直屬之成安開州並先經曾有商認辦復又參懸之豫屬鄆陵沈邱項城洧川又二十八年以後續經參懸引岸除隨據新商接認外尚有南岸之祥符許州禹州臨潁鄆城直隸之永清邢臺鷄澤隆平鉅鹿衡水唐山曲周統計二十三處內除衡水現有新商稟認試辦外其餘各岸疊經該司出示招商並通飭各屬一體廣爲招募迄今無商認辦引岸虛懸民食堪虞自不得不照案飭令官商販招運藉濟民食以補課款惟捆運多寡無定原與包額認辦不同若輩惟利是圖能多捆一包之鹽卽多獲一包之利亦未嘗不願多運多銷而卒之所運無幾蓋亦有故或因資本微薄無力多捆或因岸地滯銷有虧成本以致未能按額捆運現在旣准部議自應遵照飭令捆運之各官商如果情願包額認辦限一年之內出具認狀保結詳請咨部更名一面由司另行募新商稟認妥辦如有實在銷滯無商認辦之處每岸專案詳咨不復以籠統浮詞塘塞蓋懸岸爲中外所同慮捆運乃鹺政之弊端本無所容其掩飾也

第五條長蘆綱總宜令更代查山東綱總雖係按年更換第山東先課後引後課綱總之責任兩不相侔換期太促必以甲年應完之課款責成丙年之綱總督催恐此推彼諉之弊必且層見疊出且綱總爲通綱領袖要在遴選得人非其人卽一月一換無裨實政得其人卽累年不換亦愜輿情蘆商殷

實者少殷實而認真辦事者尤少年年更換恐中選之人無多而廢弛之患滋甚現經運司於舊綱總四人之內挑留楊俊元華楨斥退高凌漢黃昭融於本年六月具奏衆論尙屬允協嗣後綱總擬不必限定換期爲衆商所翕服者酌留接充如其不然隨時撤換詳請咨部查照

第六條代銷融銷宜行分別查長蘆滯岸積引例准融與暢岸分成代銷當辦理融銷之初原爲蘆商疲累居多銷路又滯每至奏銷屆限雖引地積有存鹽而課項無措力不能完勢必紛紛參追各商以融鹽與融引事同一律稟請將積鹽融賣與別商銷售以所得之鹽價卽交庫抵課惟復價一項歸買商完交其餘一切課款仍由賣商按限呈納仍爲保全奏課起見同治三年前任督臣劉長佑奏覆河南撫臣張之萬奏參蘆商把持案內將融銷引鹽一層業經詳細聲明有案可稽檢查近三年案卷亦係疲累之商或因正課無措或因復價到限無力措交不得已將所運之鹽融賣與別商運赴暢岸銷售其所得價銀由買商呈出交官以濟目前之急是賣商得價融銷卽與自運銷售無異在買商既經按包交價並非得無課之鹽在賣商鹽已收價亦非上無鹽之課融賣融買事出兩商情願並非買商圖得便宜致有弊竇且代銷與融銷稍異之處代銷則賣主津貼銀每引三錢五六分至四錢不等其正雜課復價等款概歸買主完納融銷則買主代交正課六錢復價五錢解費二分一釐其餘各款仍由賣主自行完納代銷則

賣主出津貼之費融銷則賣主有自納之款其辦法不同而使累商得稍資周轉則同賣者買者彼此扣算定價兩相情願則亦同所有各商融銷引鹽除捆運之商仍遵三年奏案飭令一概領引運鹽不准融銷外其行商融鹽應請照舊辦理免其禁革以保頽綱而重帑項

第七條歷年積欠宜令代交查歸補庫墊積欠一項自道光二十八年清查案內共計銀二千三百四十三萬一千四百餘兩每年議定庫墊銀六萬兩積欠銀十一萬兩分年按引攤交每引攤銀二錢四分零自同治二年起因商力拮据改爲外引撥出銀一錢二分京引撥出銀八分領引時隨引完納其餘銀兩仍照案按限帶交嗣於同治五年因綱情愈疲稟請外引減交銀一錢京引減交銀六分自道光二十九年起到咸豐八年止除已完現商淨欠交銀五十九萬八千三百三十餘兩業經奏奉部覆准自咸豐十一年奏銷後分作五年代完又自咸豐九年起至同治七年止續應征銀一百七十萬兩內除參懸無著銀四十九萬九千二百四十餘兩永平七屬官辦暨天津公共口岸未撥銀四萬四千二百三十餘兩現商應交銀一百十五萬六千五百二十餘兩內已完銀三十五萬六千七百餘兩連前實計現商共未完銀一百三十九萬八千一百五十餘兩其已交銀兩均經湊撥各餉動用按季冊報在案其欠交銀兩雖屢經嚴諭飭催無如各商僉稱因近年引地被擾被災領運失時額引滯銷商力拮据顧運顧課已屬萬

分竭蹶前項積欠代交前商參累之款一時無力賠交委屬實情且近來參商迭出長蘆懸岸已屬不少若以此紛紛參辦通綱無商不欠幾至無岸不懸全綱掣動所關非細茲准部議除將欠交銀兩趕緊設法嚴行催交以清積欠外所有隨引先交之款按每年出庫引數核計應完數目造入春秋撥冊聽候部撥至於欲紓商力必須減成本臣當另案陳奏

第八條報災補運宜再詳查查各州縣詳報被搶被水各商引鹽有詳運司已經委員會勘尙未勘覆詳報者是以失鹽數目卽院司兩處案卷已覺未能相符茲據該司逐細詳查除奉部覆准補運五六等年被梟匪髮逆燒搶之甯晉臨城杞縣七年被捻逆焚搶之定州南樂清豐大名開州東明臨漳等州縣商人益德裕等被搶失鹽一萬六千零二十九包不計外實在據委員勘復陸續詳報之清苑等處商人被搶失鹽四萬五千六百七十七包又新城等州縣被水衝淹鹽一萬八千六百三十一包又已委未經復勘之濟源等州縣并未經委勘之安平縣商人被搶失鹽一萬零八百五十六包又因案情未符批飭覆查未據詳覆之溫縣等處商人在途被搶失鹽三千二百四十六包除由司核明照例分案叙詳并將未經通詳之各州縣分飭另行補報以昭核實外所有州縣商名鹽數分別另造清冊呈送備查請將原冊封送軍機處并分咨戶部以備考核

第九條加觔抽錢宜行禁止查道光二十八年清查案內每包加鹽一百五十觔合計北鹽重五百六十七觔有奇南鹽重五百七十二觔有奇違者卽以私論各商赴坭築鹽向由批驗所大使驗明秤掣按包編號之後始行飭商裝運前奉部飭卽經該運司明查暗訪出示嚴禁并親赴關所查照鹽包挨次編列號數按包抽提當堂秤掣均屬相符訊據各商僉稱伊等赴坭按引築包均由批驗大使查驗秤掣編號有一鹽必有一引造關時按號抽提過秤既有官司稽查又有部砑觔兩眾目共睹非商等所能行私朦混且伊等深知例禁綦嚴亦當自顧身家何肯犯法取利至造關時裝載備掣者卽係批驗所過秤編號之引鹽此外實在並無另有私築號鹽意圖夾私加觔情事復飭據小直沽批驗所大使王鳳岡以查明各商赴坭築運均係遵照部砑觔兩一律辦理並無夾觔加帶另築號鹽以備掣抽情弊出具印結詳送到司該司恐尙有不實不盡復經連日逐細查訪僉稱如一此後惟有嚴益加嚴督飭委員暨批驗大使認真秤掣不時密查倘有奸商夾私加觔情弊立卽照例從嚴懲辦臣亦當不時由省委員赴津密查掣驗事宜斷不敢稍存姑息以杜流弊而肅鹺政至隨引每包抽收津貼錢五十文乃係同治六年海運案內各商公議捐作津貼濟剝民船之用並無浮收抑勒情弊業經另行詳明咨部覆准在案

第十條墨筆科則宜加裁革查道光二十八年 欽差王大臣查辦鹽務核定科則曰正雜課曰平飯曰

補欠曰歸補積欠曰王范滿垣租息曰領告雜費曰緝費曰各項解費曰內外帑利共九款每引攤交銀二兩六釐刊單通行飭商遵照此木板之則也後有續增商捐款項因年限多寡並無一定一經捐足卽由各商隨時稟請停止並非作爲定額是以向用墨筆添寫刊單之後同治三年河南撫臣張之萬奏參蘆商把持運使受其朦弊案內指稱墨筆私加私用經前運司克明查出墨筆添寫者曰懸岸課曰捐補參價曰欽天監生息曰歸補緝費曰口岸汛工曰籌補津貼曰還墊辦公曰酌增領告曰朝袍冊寶曰修署曰報效軍需曰隨引復價凡十二款當將墨筆原委逐款造冊由前督臣劉長佑奏覆有案可稽嗣將朝袍冊寶六釐修署一分報效軍需二分三款先後停止同治六七年間因迭奉內務府奏派長蘆採辦絹箋以及蘆勇口糧並捐築金堤挑挖府河等事增添一款初曰寄庫還款改曰金堤還款其餘均照前奏之數並無絲毫加增此外又有南場各商稟添大河口延費一款南引各商捐添報效豫省協餉一款係不在通綱科則之例皆墨筆之則也至所稱領引時外加者三款查有津貼辦貢一款因前辦採貢緞商人張鑑歷年賠累各舊商公議情願每引津貼辦貢銀三分五釐又津貼辦公一款因總商辦公一切費用出自己囊衆商公議願每引幫貼辦公銀六釐迨因舊商星散新商心力不齊完交寥寥本年已將此二款停止矣至巡費津貼一款係承辦青靜滄鹽四處引地緝費裁減不敷通綱公議每引願幫銀四

釐此爲保護引地而設應仍其舊斯三者外交幫貼之則也據該運司造具木板科則一冊續增墨筆一冊外交幫貼一冊並將領告科則款式呈送前來理合封送軍機處並分咨戶部備查至部議以浮費過重行令認真釐剔分別禁止臣亦深知蘆綱之疲由於成本太重銷路太滯而衆商亦稟訴苦累情形呈請拯救頃至天津與運司面商一切卽日將各項科則酌擬裁減具奏以輕成本而挽頽綱以上十條就部文所指者逐細登覆至於引滯商疲全綱不振別圖補救之方容卽於酌減科則案內另行具陳

楚岸鹽引淮川分界行銷疏

曾國藩

奏爲楚岸淮南引地業經會商定議暫與川鹽分界行銷恭摺覆陳仰祈 聖鑒事竊楚省引岸被川鹽侵占太甚經臣國藩於同治十一年三月間縷晰具奏嗣准戶部奏覆應由兩江會同湖廣四川妥議章程奏明辦理同治十一年六月二十五日奉 旨依議欽此恭錄轉咨前來臣等伏查行鹽各有引界今以川淮兩省之鹽同行湖北一界之內此暢則彼滯勢有必然近年淮南銷數日疲存鹽壅積無術疏通皆由川鹽到處洒賣遂使淮引之界幾被川鹽占盡論鹽觔則色白味鹹川貨本甚於淮論搬運則下水順流川路較近於淮論民情則楚人食川習慣而已成自然論官事則川販聚楚驟禁而恐生事變故川私侵佔淮南引地雖屬大紊紀綱之事而有萬難遽變之勢今欲於積重難返之後挽回一二仍當暫分

疆界爲徐圖規復之計湖北淮引之地九府一州此國家之大法終古不變者也就川私侵淮之地而於其中收復數府專行淮綱酌分數府淮銷川鹽者此目下之權宜四面兼顧者也臣等函牘往來籌商再四就湖北九府一州計之現定將武昌漢陽黃州德安四府先行歸還淮南專銷淮鹽其安陸襄陽鄖陽荊州宜昌荊門五府一州仍准川鹽暫行借銷議定淮分之界不准川鹽侵入分寸而川分之界仍可由淮商就中酌設子店撥售零引以明本係淮引地方不可喧賓而奪主一割而永棄前於沙市所設配銷局旣於川販多所未便而淮銷亦並無成效應將此局裁撤移設新堤改爲分銷淮鹽局至武漢黃德四府內湖北所設抽收川稅水陸局卡亦一律裁撤禁止川鹽不得顆粒侵銷四府地界此會議分界之大略也淮鹽滯銷之由固由川私充斥而銀價日昂鹽價日貴亦屬有礙銷路初定章程湖北每銀一兩約易錢一千五百餘文今則增至一千八百餘文居民買鹽則用錢而局中售鹽則收銀水販成本因之暗增不能不量予酌減查楚岸定章本定每引售銀二十四兩厥後遞減至十九兩二錢現擬每引再減售價一兩二錢每正引六百觔定售銀十八兩所減之價在於應解鄂淮鹽釐內各半分扣將來銀價如跌再將鹽價隨時酌提以昭平允此減價之大略也地方州縣本有緝私疏銷之責若不加意整頓深恐完稅之川鹽雖申禁令而無稅之川私勢更蔓延加以潞私北私交相侵灌名雖定界仍無補於淮銷除

湖北飭派緝私各兵勇照常布置外所有武漢黃德四府擬擇扼要之地設卡分堵凡潞私北私及川鹽越界漏稅之私仍由臣瀚章通飭各州縣不分畛域幫同局卡實力緝拏每年年終由督銷局會同湖北鹽道視銷數之暢滯定州縣之勤惰開具清摺送由臣等會同考核酌量勸懲以收實效一面由臣國藩責成運司督飭各場講求煎煉之法務使淮南鹽色白潔期與川鹽相敵倘有以醜劣低鹽運棧立將場員記過撤委此又講求緝務整頓鹽色之大略也兵燹以後戶口大減各岸應銷之鹽較昔年額數已屬極少而業鹽而謀食者人數日衆場井之產亦日多臣等不敢期銷數之極旺但求業淮鹺者不至因銷路被奪而遂絕生計業川鹺者不至因銷路被堵而引出事端是卽兩全之道此次分界之後如果淮釐有贏鄂釐日絀卽當補貼鄂餉期於勻分餘利而止如果淮銷仍滯川銷大暢卽當嚴堵川私期於不侵新界而止若其軍事大順滇黔肅清川鹽自有本管之引地則今日分割之五府一州仍當歸還淮綱淮南引地行之數百年不刊之典臣未敢輕於議割也總之隨時體察川淮情形補偏救敝務在不戾時宜不墜憲章至湖南堵川之法前經臣國藩奏明俟湖北酌堵川鹽稍有起色續行奏辦現查湘省祇有岳州常德澧州三屬行銷川鹽岳州係達省會之門戶常德係入辰沅之要津均爲淮鹽緊要口岸亦經議定專歸淮銷惟澧州與荊州相近川鹽運往路捷價輕應暫分與川銷其餘未盡事宜俟開辦數月再行

酌核續陳

與劉星房都轉書

曾國藩

頃得讀閣下所寄鹽法節略一紙仰見壁畫精到籌謀深遠敬佩無已去歲變法之初規模粗具亦容有未盡善者今茲復欲小有變更以期保此大局此密益求密之道也第試行未久謗譏未熄忽又自改其前說適足以快讒慝之口此次小議改轍要須周浹詳慎不復少留滲漏以期十年廿年永不再改而後有以自立弟等雖未諳鹺政亦欲免竭管蠡以相佐助搜尋罅漏以相詰難謹就節略中所載及其所不載悉心研究竊以爲不足慮者有二未深晰者有四宜熟計者有三焉伏惟分別而詳示之辛丑五綱之殘課及清查扣留部府各款從前奏案每引加帶課銀五錢有奇此舊商之殘欠本與新販無涉戶部不能執甲所負之債而取償於乙執綱商之帳而追呼於票商且去年初改新章之時此項欠課業已奏明停緩豈甫經年餘忽從而追索之此其不足慮者一也活支外款本無成數撙節一萬卽報一萬以候部撥撙節十萬卽報十萬以候部撥假使外間動用已盡無分毫可供指撥戶部亦不能持籌以相問執簿以相責此項銀兩係兩淮額外樂輸或多或少或有或無其權操自尊處戶部不得爲政此其不足慮者二也節略中言此時鹽課皆當復還舊額方爲正辦不知所謂復額者復一百三十九萬餘引每引四百

觔之額乎抑鹽觔復一百三十九萬餘引之舊而仍照新章併爲六百觔大引僅存九十三萬引乎由前之說則由六百觔而仍改還四百觔是成本驟加課額驟增辦理將大致竭蹶想智者必不爲此矣由後之說則較戊申綱之八十九萬引僅多行四萬引雖觔數暗與會典定額相符而引數究嫌短絀此弟等之未深晰者一也節略中又稱俱復舊額照科則卽每引須加徵五錢有零不知尊意以爲此項宜加乎不宜加乎以爲宜加則二年以來每引止費六兩一錢有奇衆商已慣見而慣聞矣忽增五錢亦恐其因而裹足以爲不宜加則國家課額自有定數去年議增二十萬引業已攤課而之輕今年議減十六萬引亦宜攤課而之重倘徑裁課額則人言藉藉豈不可畏此其未深晰者二也岸價之長跌非官吏所能爲力場價之貴賤則院司可以裁制去年陸公奏定新章云官定場價不得過二兩四錢不許擅價居奇今節略云場鹽每引加貴七八錢何以官不能制此其未深晰者三也去年奏定新章云祇行一百九萬餘引滿額卽止以防壅積乃節略中云改票以來已運正引三百餘萬是兩年而行三綱之引矣其果壅滯耶則於百九萬引額滿之時卽應停止不應自背前奏溢出額外自誇銷引之多而受壅積之害其果疏暢耶則此時不應忽有改圖減引之議此其未深晰者四也乙未綱之鹽從前陶文毅奏案本請分年帶運鹽旣分十年帶運課亦分十年帶徵聞此綱至今鹽未運畢課亦未徵完去年陸公奏章乃稱爲乙

未綱以納錢糧未運之鹽實與陶公前奏不合弟等已蓄疑於心矣惟力籌卹商輕本之法不得不思加
勛既思加勛不能不指此項乙鹽爲名以爲所加之勛初非無課之鹽有識君子亦當深諒任事者之苦
心第每引配帶二百觔兩年以來行引至三百萬之多則乙鹽全綱配帶已畢且溢出乙鹽之外矣此後
每引仍加二百觔又將指何項鹽爲名將來淮南票引永以六百觔爲定例乎抑仍有改還四百觔之時
乎若不奏明必爲言者所藉口此其宜熟計者一也去年陸公奏定章程云自百引起至千引止厥後儀
徵設棧乃改爲自十引起以便小販從前淮北試票所以從十引起者以其引地甚隘道里甚近民販甚
小耳淮南則縱橫萬里交錯七省與淮北迴不侔矣近聞江廣各岸小販充斥規趨微利爭先跌價大販
守候不利則折本賤售一轍既覆相戒不復再舉蓋大販之受擠於小販亦猶官鹽之受擠於私鹽似應
禁革小販仍從百引起票否則巨商畏縮實於大局有妨此其宜熟計者二也去年奏定新章云被災舊
商凡請運新鹽千引者准其配帶補運免課之鹽二百引如舊商無力情願自招新商代運者亦准配補
二百引弟等竊以爲此條過矣每引六百觔內既有二百觔無課之鹽以千引計之因加觔而無課者三
之一因配補而無課者五之一是無課者占五百三十餘引也無課之鹽太多成本太輕岸價焉得而不
賤新商焉得而不虧場產焉得而不絀往者綱商取巧之術有所謂淹銷補運者有所謂加帶融楚者淹

銷云何船被水淹之鹽准其免課補運奸商則鑿沈無鹽之船而希圖報淹融楚云何食岸輕課之鹽通融行於楚岸奸商則懸閣應運之引而鑽營融楚二者之免課輕課其害較私鹽而更甚今日之配補無課其害較二者而更甚若不裁革此項則新商行票既受擠於小販又受擠於配補跌價賠本職是之由此其宜熟籌者三也凡此數者弟等未經身履或莫悉其機要十年以來國家大政惟此事足挽回元氣閣下與陸公之忠盡士林所共仰也然裁抑滋多謗譴亦鉅其初規有未善者此次小議變更不可不詳盡周至務使目前無遺議日後無流弊庶足宏濟於艱難耳

請收回淮南引地疏

曾國藩

竊照楚省本係淮南引地定額最多銷鹽最廣從前淮綱盛時歲徵各岸課銀甲於天下徵諸蘇省者不及十之一徵諸江西安徽者不過十之三徵諸兩湖者則居十之六是淮綱之興替全視楚岸之暢滯爲轉移軍興以後長江梗塞淮鹽不能行楚經楚省督撫奏明借食川鹽原屬權宜之計臣於同治二三年間整理鹺務維時淮商卽以收復楚岸爲請祇因引地被占十有餘年行之既習爲常禁之未便太驟是以暫將鄰鹽釐稅酌量加重原冀川私本重而日衰淮鹽漸進而日旺不謂川販巧於遷避百計漏釐每運兩引之鹽僅完一引之稅臣訪知其弊上年曾派委員至宜昌會同楚省委員公同掣驗本年又減淮

鹽之釐期收敵私之效非不多方補救乃查鄂湘兩局積壓淮鹽不下十餘萬引存數極多銷數極滯而川私紛至沓來較前尤盛推原其故總由鄂省利食川鹽雖有掣驗之名而明讓斤兩近聞宜昌抽收川稅仍不過六七折以致川販成本太輕來源愈旺是前此繞越而偷行者今更肆行而無忌川鄂官商幾忘引地之應屬何省請舉淮之受害於川者數端爲 皇上陳之淮鹽逆流上駛歷長江洞庭之險每船至少須裝千餘包船笨載重計自瓜洲開行非四五個月不能達鄂非六七個月不能達湘偶遇暴風山磯立時淹沒巨萬本銀悉歸烏有川鹽則自川江順流而下勢等建瓴雜用小船便捷異常計程途則淮遠而川近論舟行則下易而上難此運道捷於淮者其害一也淮南之鹽以餘東呂四兩場爲通場之冠俗所謂餘呂真梁者也從前暢行楚岸其鹽色之潔由於商力充足本年所產之鹽堆至次年始行開售堆愈久則溷愈淨近年垣商疲乏隨收隨售鹽色不無稍減川鹽則自行楚以後廣開井竈其色甚白其質甚乾川販因之而居奇淮岸因之而日廢喧賓奪主莫斯爲甚此鹽色之勝於淮者其害二也淮鹽定章以五百引起票係有鑒於道光末年改辦票運不拘引數聽商稟認厥後承辦數千引之大販皆爲一二引之小販搶運所誤故新章定以限制一以杜無本冒充之弊一以驗有力承運之資計請鄂湘引票五百引非現銀六千兩不辦川鹽則計斤不計引集資數百千即可辦運鹽皆散裝既官私之莫辨釐

不預納亦來去之自由此籌運之巧於淮者其害三也鄂湘兩局售鹽皆以到岸之先後定出售之遲速鹽不到輪不准搶賣近數年來銷雖極疲商未跌價深得整輪之益當在船守風抵岸守輪計一檔之鹽非一年之久不得脫銷川鹽則到處可售得價卽賣銷路廣則窮鄉僻壤遍地皆私賣價輕則鋪戶行家非川不鬻此籌銷之便於淮者其害四也有此四害淮何能與川敵川鹽一日不停淮鹽一日無暢銷之望議者謂川鹽停止於川省業鹽人等有礙殊不知淮南通泰二十場垣商煎丁以及鈎摺網忙人等不下數百萬戶兵荒年久困苦顛連爲從來所未有滿望江路通行規復引地徐圖轉機不料鄂湘最暢之岸盡爲川私所占西岸亦爲粵私閩私所占場商倒歇之家固衆而煎網各役失業之人尤多比之川省業鹽者何止數倍凡認淮引之商屢赴臣衙門呈遞稟詞請堵川私幾無虛日譬之家有田產任客民多年佔據爲尊長者忍視子弟之啼饑號寒而不爲之救有是情乎至湖北軍餉原以川釐爲大宗刻下髮捻俱滅軍事大定鄂省存營極少餉項足敷周轉況淮鹽內亦收鄂釐淮銷果暢鄂餉卽因之而增此時堵止川私核與前准部文俟淮運暢行應卽申明舊章嚴禁鄰私毋任侵占等語相合相應請 旨敕下四川湖廣各督撫停止川私行楚以復昔年之舊制而收經久之利權臣職司鹺權厯有歲年所徵課銀因軍餉緊要未能多籌解京私衷抱歉耿耿於心今雖交卸鹽篆猶思籌異日之有餘補近年之不足我

朝鹽法沿明舊制畫分引地係大經大法一成而不可易今南北軍務告竣而不力爭以圖規復則二百餘年之憲典自臣而隳其拂逆商情歛一日之怨厥咎猶輕敗壞成法貽後世之譏厥咎更重用是縷晰具陳如蒙 諭旨准禁川私應如何分立限期漸減漸停如何巡緝粵私潞私浙私閩私不復抽收鄰稅統由新任督臣馬新貽核議章程奏明辦理

復李少荃中堂論輪船運鹽書

李宗義

頃奉小除夕手書擬將鄂湘西皖淮鹽酌分二成交招商局輪船裝赴各岸交卸等因仰見碩畫周詳無違弗屆招商局果能得此大宗水脚卽多一層餘利潤是善策惟於淮鹽大局頗有關係不得不博訪周諮細加討論其中窒礙殊多請爲中堂縷晰陳之淮鹽定章以船到之先後爲賣鹽之次第輪船行走極速凡狡黠運商自必樂於雇運以爲先到搶售地步已恐有紊輪章其自置江船及向有結實船戶攬裝者又必以輪船吊包起駁拋灑尤甚且每票五百引分撥二成不能同日開江同時到岸另須派友照料費用尤增揆諸衆情未能盡愜況何商應裝輪船何商應裝江船分派難均徒滋爭端其窒礙一也近年鹽運到岸守候輪到速則一年遲則或至十七八箇月不等商鹽上倉者居多或卽用紅船久守亦聽商便輪船到岸不能停留必須將鹽舫全數起岸江楚各鹽倉前已均有盈滿之患深恐輪船承裝之鹽猝

然擁到無倉堆儲其窒礙二也尤有甚者淮南鹽祇此數裝鹽船隻日見其多各岸銷數並未能暢以致船戶生計愈絀現在儀徵棧前停泊江船少則千餘號多則不下二千餘號以每船十二人計之約水手二三萬人竟有一兩年不能攬載者或將船隻變賣或拆船板零售世香省三皆目擊情形馬端敏公任內因運商剋扣水腳江船船戶聚眾滋事幾釀巨案前事不遠可爲殷鑒今江船之困苦如此若再酌分二成撥給輪船各幫船戶一聞此信難免聚訟不休其鋌而走險糾眾滋鬧更在意中其窒礙三也洋船不准裝鹽載入通商條約近年間有洋船裝鹽駛赴江楚均經關道查辦議罰若中國輪船一准裝鹽洋人勢必效尤雖責成儀棧關道鈴束不准外國輪船裝載淮鹽但洋人有所藉口倘竟裝運岱鹽及別項私鹽闖入長江貽害何可勝言其窒礙四也有此數層似覺礙難照辦事關淮南全局謹就管窺所及觀縷瀝陳中堂燭照如神統希鑒而原之

收回淮南引地應遵部議迅速舉行疏

光緒二年

沈葆楨

竊維古今財賦之源自丁漕而外以鹽權爲大宗淮南額課甲於天下乾隆年間兩淮每年解部正款極一時之盛每遇大政如掃蕩伊犁平定金川淮南捐輸餉銀自一百萬兩至三四百萬兩不等 天語褒嘉載在典冊此固 列祖 列宗締造之宏規亦亘古不磨之良法也自粵逆倡亂長江梗阻前署湖廣

督臣張亮基奏請借撥川鹽行楚而鹽法一大變咸豐末年兩淮鑛廢墾荒商逃竈困幾蕩然矣同治初年前兩江督臣曾國藩克復安慶奏定淮南新章迄今十有餘載第因奏復引地迄未果行兩湖銷鹽尙不及定額之半而通泰二十場產浮於銷遞年積壓幾無隙地以容之臣於上年十月蒞任疊據場商運商聯名公稟請復楚岸值此滇黔肅清川省自有本管引界前所借銷淮界不應久假不歸臣正與兼署湖廣督臣翁同爵咨商會議間接准部文議覆御史周聲澍禁川復淮一摺並安置川商整頓淮綱之法酌議章程五條奏奉 諭旨准飭臣等實力奉行伏查部臣統籌全局就盈虛之數酌損益之宜實屬一秉至公規畫久遠昔漢臣司馬遷之傳貨殖曰太上因之其次利導之其次整齊之今以淮鹽固有之楚岸仍令歸淮因也以川鹽應銷之滇黔責成川運利導也令川省查封私井令楚省復設巡卡令淮南講求煎煉各杜其弊而整齊之也臣所謂關繫 國家大計者謹以裕 國利民兩事爲 皇太后 皇上縷悉陳之查楚省抽收川釐湖北每年報部一百五十餘萬串約計合銀不足九十萬兩淮鹽銷楚岸一引從前奏明可得釐銀六兩三錢有奇嗣於分界案內減收一兩二錢實收銀五兩一錢二分七釐加以課銀每引由督銷局收銀一兩二分三釐共收銀六兩一錢四分復引地復每年卽以增銷十五萬引而論可收銀九十餘萬臣擬令淮商每年包完鄂餉銀九十萬兩如銷足十五萬引卽以釐課全抵鄂餉萬

一銷不足數另由淮商按引攤賠必使鄂餉收足九十萬而後已幸而溢銷其釐課亦儘歸鄂餉使鄂省費一分疏銷之力卽獲一分疏銷之利由督銷局隨銷隨解不由運庫轉撥使鄂省無蒂欠之虞其湘省禁川後淮銷必暢所增淮釐每年斷不止如川釐收錢三四萬串毋庸另議津貼是於楚省餉需必大有裨補非僅毫無所省已也淮南自定新章運商獲利頗厚前此招之不來者今聞收回引地之信趨之如鶩將來增引時必須收捐掣籤方昭公允曩者認運各舊商如清水潭直省賑濟本省工賑均已繳過捐項數次始准常年辦運今新商事同一律楚岸引價尤昂此項捐輸以每票收銀數千兩計之必可集成巨款藉充中外緊要之需所謂裕國者此也鹽爲民生日用所必需少則淡食多則壅滯故立法之始必先計戶口之數以定額銷之數計額銷之數以定額產之數場與岸呼吸相通首尾相應方持久而不敝乃淮額未復而淮產日增無怪場竈有岌岌不可終日之勢前數年非不急圖規復淮界其如滇黔不靖川鹽亦無出路何是以湖廣督臣李鴻章四川督臣吳棠交章陳奏川鹽不可遽停湖廣督臣李瀚章力主淮引未能驟復並非意存畛域實有萬不得已之苦衷現在情形則與前迥別正當乘此機會移侵楚之川引轉而復滇黔之舊額譬如客民初因無籍可歸不得已而賃田耕種一旦本籍自有可耕之田斷無舍己耘人之理倘不此之圖恐再閱數年如雲南之昭通貴州之貴陽等屬例食川鹽口岸其民斷

不肯姑淡將另爲他鄉所占彼時川淮交受其困恤淮則川患生計之絕祖川則淮滋鉅險之虞煎丁網役以及船戶人等兩省奚啻億萬同時怨望難保不句串巨梟激而生變御史周聲澍原疏部臣覆奏皆有見於淮南今日之病卽川商前車之鑒欲求兩全之策必於此時急圖收復淮鹽引地並復川鹽引地庶川淮商民各得其所源源辦運視爲世業所以息目前侵灌之爭利猶小所以弭日後無形之患利獨大所謂利民者此也或者謂淮鹽不如川鹽之白難強楚民棄美而就惡抑知食鹽者以鹽味之濃厚爲美不以其色也販鹽者以鹽質之乾潔爲美亦不以其色也蓋味濃厚則一勺之鹽可抵兩勺之用質乾潔則行遠無滷耗之虧臣到任以來竈戶場商環訴哀籲者殆無虛日臣謂上策莫如自治求人必先反己周諮博訪咸謂淮鹽質勝於色臘月醃物交春不變本爲楚省所重年來場商以資本占擱不暇精求場員以泄沓成風不復過問竈丁只圖多煎爲利火候不齊煎成委之於地與塗泥爲伍由竈而場無所遮蔽沿途風沙雨屑入之收垣後爲其不銷也愈不知愛惜踐踏焉飛灑焉出運後又有船戶之攪和子店之作僞並有參以石膏者而鹽味不可問矣場產向有定額嗣因有產不及額者乃改章以現產之多寡爲配運之多寡所以勵溢產而戒短額也各場垣遂相率虛報彼此效尤拙者積年老堆纖毫不動巧者隨收隨運餘滷未乾水販領一包之新鹽逾旬而僅得九折而鹽質不可問矣卽如餘東呂四所產向

爲淮南各場之冠其白與川鹽匹敵乃因儘收儘運鹽新而涵耗多湘鄂水販交棄之願取其色低次而質乾潔者則謂楚民偏重鹽色此耳食之言也實則淮鹽累年滯銷無力加意講求失其本來面目耳臣竊念積弊已深莫可窮詰不得已寬其既往派委坐補江西督糧道段起江蘇候補道龐際雲帶同廉幹委員分赴通泰二十場逐堆清丈丈量準而虛報之弊絕虛報絕而鹽之等差方按籍可稽該道等不避勞怨破除情面竭兩月之力躬歷各場一律查竣臣飭取各場樣鹽親自查驗其積年老堆乾潔純淨質味均佳者亦復不少已令先儘老堆派運不使新堆驀越老堆盡後隔年之新堆又成老堆則水販轉輸無滲涵之耗責成場官嚴飭竈戶場商多購蘆席凡煎鹽堆鹽之地均令下有襯墊上有遮蔽卽由竈而垣中途亦護以蘆席俾禦風雨此後出場之鹽仍有鹽味淡鹽質雜及多涵耗者商革官參夫而後再嚴沿途之攙雜泥沙並禁到岸之減扣斤兩責成淮南總局儀徵鹽棧及各岸督銷局層層鈐束冀攙積年之弊端以便兩省之民食至川鹽行楚售價本貴於淮以釐重也今擬撤卡停釐嗣後川價益輕難保川私不抵隙而來多方侵灌湖北之平善壩實爲川淮毘連扼要之區必須專派大員調集礮船實力扼堵此外何處宜設專卡何處宜設分巡臣斷不敢以湖北有督銷之責稍存推諉一切巡緝經費亦當由淮商籌措責成現辦湖北督銷局廣西補用道程桓生選派熟悉地勢之委員前往各該處相度機宜妥議

通稟會商川楚各督撫臣和衷妥辦李瀚章翁同爵王文韶皆素抱公忠心存君國接到部臣此議必能力破羣疑恪遵成法蓋鄂省所慮者餉項之不足耳今則餉有來源矣川省所慮者邊引之未復耳今則鹽有去路矣是規復淮引在川楚並不難行於淮綱萬不容緩相應請旨敕下湖廣四川各督撫臣遵照部議從速辦理俾淮引早復一日場竈早紓一日之困國家早收一日之利大局幸甚再湖南平江所食碱鹽並非土產仍由淮南運銷凡煎鹽鑿底結塊者曰碱鹽各路均以下等視之而平江專以爲美其味苦而有力其質堅而不耗其價廉平江非此不食各私無從灌入故銷路獨暢該岸於同治五年據湘商專認請票較早不隨湘綱衆商給運所收課銀係彙入上下半年奏報合併聲明

兩淮鹽價仍難議增疏

光緒二年

沈葆楨

竊前辦西征糧臺戶部侍郎袁保恆奏請各省酌加鹽價一案兩次接准部咨令各督撫專案奏覆等因先經前署督臣劉坤一劄飭運司及各鹽道體察籌議因未覆齊是以未經覆奏現經臣催據各司道先後詳覆前來伏查袁保恆加價之議意在裕餉贍軍西陲需用之繁待餉之急無有過於今日者臣責司鹽權苟有裨於度支何敢不竭盡心力冀効涓埃惟淮務大綱首重疏銷而疏銷莫急於便民便民莫急於輕本三者相輔而行缺一不可兩淮地多竈廣但係產鹽之區而非銷鹽之地其引界淮南則重在江

楚淮北則重在皖豫販私例禁固嚴而隔省則呼應欠靈地廣則耳目難及況兵燹以後各引地久被鄰鹽占銷至今未能遽復緝無票之私非易緝有票之私尤難淮南近年造報鹽釐日見其減淮北部限以八個月爲一綱從未依限銷足至速亦須十個月方能辦竣一綱又因統計綱分尙短四綱故縱能稍稍提早亦卽按辦新綱並無以四個月帶銷積引之說鄰鹽路近而價賤淮鹽路遠而價貴避貴趨賤人情之常若於鄰界毘連之處高擡淮價而欲鋪戶水販舍賤就貴雖法令亦有時而窮此加價有礙疏銷之實情也鹽爲民間日用所必需減一分售價卽紓一分民力從前鹽法祇徵鹽課不徵鹽釐軍興以來各省藉鹽釐以濟軍餉始則分抽繼歸統解淮南雖迭次奏減而湖南湖北江西各岸每引尙收六兩有奇至八兩有奇不等淮北五河正陽兩卡每包收釐錢五百文已歷有年所課釐並計比較疇昔僅徵課銀爲數已重楚西等岸又因銀價日昂錢價日跌民間以錢零買價已暗增日求減輕而不可得此加價有礙便民之實情也商人辦鹽必先計算本利是盈是虧盈則不招自至虧則招之不來原奏先請每觔酌加三四文嗣減酌加二文夫曰二文至少也殊不知兩淮引額重於他省淮北例定每引四百觔淮南例定每引六百觔卽就每觔二文計之淮北每引須加八百文淮南每引須加一千二百文無論就場徵收或隨課並納終須歸入成本核算商力實有未逮且前運商運鹽到岸場商收鹽入垣皆因積壓過多非

守至一年有餘不能脫售因之有滙耗之累住日之累銀利之累轉輸愈滯折閱堪虞與初定章時情形迥乎不同此加價有礙輕本之實情也以上各層臣就各司道之所詳證以近日之商情參以曩時之成法周諮博訪衆論僉同兩淮課釐所入雖未能復全盛時之舊而每年淮南北統計已在三百萬兩以上歷年報解京餉全恃鹽課西征各軍如老湘一營專提淮北之釐此外淮軍月餉江南留防各營軍餉又特撥之 萬年吉地 惠陵等工程緊餉皆取資於鹽釐邇來江皖滯銷大有江河日下之勢各項撥款支絀不可言狀兢兢自守猶慮失其舊觀萬一因增價而缺銷因缺銷而誤運必致課釐大形短絀竊恐所益於軍需者徒有其名所損於 國計者深受其實臣固不敢稍涉諛卸存畏難苟安之心亦何敢輕易更張致得不償失之患

淮南遵完川鄂餉銀懇立限收復楚岸疏

光緒三年

沈葆楨

竊收回淮鹽引地一案欽奉 諭旨令臣等妥速會商先期奏定等因當經分咨各督撫臣一面飭司督同淮南籌議去後茲據運司歐陽正墉取具各商切結加結詳覆前來臣查淮南額重課緊取資於兩湖者居十之六兩湖引地爲萬竈煎丁所託命亦千古鹽法之常經今通泰二十場山積塵封幾無隙地竈情之急迫如彼部議之嚴切如此司淮鹺者居今日而不圖規復引岸上無以循 列聖之矩矱下無以

拯窮海之生靈清夜捫心可勝負疚顧禁川復淮前督臣曾國藩馬新貽均奏荷 飭部議行而迄未就緒者滇黔軍務未靖川鹽無所歸宿各省籌餉同一緊急爲淮計無暇爲川鄂計顧此則失彼此川鄂兩省所以不得不交章請緩也現在川省運黔邊引業經四川督臣丁寶楨籌借巨款官運商銷在川且存讓淮之心在淮敢吝貼川之費傳曰以欲從人則可書曰同寅協恭和衷哉是欲復淮必須事事爲川鄂設想方合同舟共濟之誼臣博采羣議集思廣益熟籌三事敬爲 皇太后 皇上縷晰陳之一曰包餉宜信就淮南餉事而論每年部撥京餉四十五萬兩尙未能解足八成他如出關緊餉貴州甘肅烏城東三省等處撥餉或酌量解濟或絲毫未解支絀至此豈有餘款可籌然既經戶部議令包完論成本未免驟增論公議實無旁貸在謀鹽票不得者聞有加引之說輻輳而來雖勒以重捐亦其所甘然謀夫孔多未必能守此大信竊思商循世族之所嚮甘苦備嘗所籌必遠與其招新商終不能爲萬衆無遮之會不如保舊商可以鞏百年不拔之基臣督同運司傳集衆商許儘鄂湘原認之引循環轉運不再另增新引以撓其權而奪其利各該商仰體 朝廷德意情願每引捐繳銀二兩鄂湘兩岸近年本可銷淮鹽二十萬引禁川以後以增銷十五萬引計之共可銷三十五萬引每引二兩可得銀七十萬兩加以原奏課釐九十萬兩共合一百六十萬兩擬以一百萬貼鄂六十萬貼川鄂省向收川釐分正稅加稅公費三項加

稅內有分解淮局之款統在此百萬兩查照向章分別抵扣每年包繳之銀由督銷局按月分解責成淮商於年終截數統算缺則如數包納溢則留備滯銷業與各該商堅明約束取有切結達部將來淮商短繳絲毫微臣願當其咎此恪遵部議開誠布公先示大信之辦法也一曰定限宜豫淮南場竈盼引地之復有年矣一旦議禁川鹽不啻久旱之遇甘雨朝發令而夕奉行猶苦其緩情也亦勢也惟川鹽運鄂所以勝淮者淮收現銀川收期票歷時既久帳目滋繁非寬以歲月無從清理卽川省修復邊引亦斷非一蹴而幾之事夫趨利每敗於欲速而用志尤貴其不紛川鹽自井次起運以達宜昌完稅後分赴荆襄等府若先禁其出售則舊積者何由歸本若先禁其入楚則已運者勢難折回臣悉心酌議應以此摺奉旨之日起立限一年截止川鹽出運以清其源自截止出運之日起再限六個月一律運竣自運竣之日起再限六個月一律銷竣而其流亦清倘已屆限期而川鹽尚有尾數存岸或由川商核算存本歸淮商收買搭銷以免輻輳亦兩全之計截止川鹽起運之日卽平善壩設卡之始設卡後限內有票川鹽由卡驗明仍歸鄂省照常抽稅放行淮南應於鄂之宜昌樊城湘之澧州等處酌設督銷淮鹽分局仍歸總局統轄俟到岸川鹽售銷過半方將淮鹽運往各分局先行儲備全數封存俟川鹽限滿銷竣方准接售淮鹽如此寬以兩年則川商舊欠可陸續收回川井新鹽可陸續減運彼時開辦邊引官運商銷必已著有

成績此遵部議不求速效次第就理之辦法也一曰用人宜慎既禁川鹽必停川釐川釐既停販則利其本輕民則貪其價賤難免私梟不乘間抵隙而來引地既經收回責商包餉淮南商命脈所繫在此川鄂餉源所繫亦在此關係既極重大籌畫不厭精詳大概以不擾民爲第一要義而關鍵在乎用人用人當則緩急弛張悉中肯綮自能民懷德而梟畏威臣擬揀選廉明精細力持大體道員先行商諸湖廣督臣李瀚章必求彼此深信再行會同奏派在平善壩設立緝私局總理其事應如何添造礮船如何抽調旱隊如何設立分卡如何揀派委員統由該員屆時妥議通稟會辦襄陽一帶爲潞私侵灌最盛之區亦應派員前往聯絡地方官力籌堵緝以後湖北四川州縣協同淮南緝私爲淮出力與爲川鄂出力無異三省合爲一家隨時會商勤者獎之惰者汰之此遵部議用人得當私淨官行之辦法也至淮南鹽色自去年清理場垣先儘老堆網運臣日與場局各員加意講求未嘗片刻懈弛現在運鄂之餘東呂四石港金沙伍祐各場鹽觔涵淨質潔漸可與川鹽相敵向來色次場分經現署泰分司許寶善飭取各場原涵用灰重淋一次調集竈丁入鑪試煎呈驗鹽樣一律潔白如霜所加工本每斤不足一文考究既精整頓尤易爲力臣已飭分司場員如法煎煉兼以鹽色之高下定售價之低昂別場員之勤惰鼓舞而督責之以期鹽色蒸蒸日上斷不任其以低次涵重之質自取滯銷夫運鹽者商食鹽者民從末有不便於民而商能

獲利者倘禁川之後淮局以低鹽充數致鄂民有食貴食惡之苦臣願受湖北督撫臣參劾不敢置詞臣以二百餘年固有之引地費百數十萬各商之血本披肝瀝膽求助鄰封豈好爲苟難哉實有鑒於祖制必不可違部議必不可梗國計必不可誤竈戶必不可無以爲生萬不獲已之苦衷當爲川鄂所共諒臣一面具奏一面咨商湖廣四川湖南各督撫臣將臣所議各節是否允洽秉公妥議迅速覆奏並咨明臣處以便會同次第開辦仰副聖主整飭鹺綱之至意再粵鹽佔銷湘岸應俟川鹽禁絕後另再察酌情形奏請辦理合併陳明

皇朝經世文續編卷四十五目錄

戶政二十五

鹽課四

瀝陳閩省鹽務積弊請改行票運釐課並抽疏

左宗棠
徐宗幹

閩省鹽務改行票運釐課並抽章程稟

吳大廷

整頓場務官幫章程稟

附籌議整官幫場務章程

吳大廷

查覆下游各縣場產鹽額數并設卡各要隘稟

附摺

吳大廷

變通海運以及分別擔私船私抽收釐課稟

吳大廷

瀝陳閩鹽試行票運情形疏

左宗棠

請免現商帶輸銀兩疏

左宗棠

會奏減免兼徵帑息疏

左宗棠
徐宗幹

會奏票運一年期滿征收課耗釐等項銀數疏

左宗棠
徐宗幹

裁革陋費稟

吳大廷

請由道籌給西浦二關薪俸工食稟

吳大廷

經世文新

卷之十

一

前出使臣等因工食

與大廷

送平頭使臣

與大廷

會同知縣一平頭使臣

與大廷

會同知縣一平頭使臣

與大廷

會同知縣一平頭使臣

與大廷

會同知縣一平頭使臣

與大廷

會同知縣一平頭使臣

與大廷

會同知縣一平頭使臣

與大廷

會同知縣一平頭使臣

與大廷

會同知縣一平頭使臣

與大廷

會同知縣一平頭使臣

與大廷

宣統二年

皇朝文獻通考卷之十

皇朝經世文續編卷四十五

上海葛士濬子源輯

戶政二十三

鹽課四

漚陳閩省鹺務積弊請改行票運釐課並抽疏

同治四年

閩浙總督左宗棠
福建巡撫徐宗幹

竊查福建鹽課自國初定制歲僅征銀八萬五千餘兩雍正元年各場委官監管地方官隨處設卡委員收稅先完課而後給單聽其配運售賣至乾隆七年奏定盈餘銀十四萬一千餘兩較之原額增至兩倍後因歸商辦理劃地分售卽以常年所收稅銀作爲引額此法一變商之浮費遂增鹽之行銷遂隘後人補偏救弊朝令暮更於是分而爲官幫爲商幫爲縣灣官銷引滯則責令各商代銷舊商欠帑則勒令新商攤補迨道光年間一變爲僉商再變爲試辦三變爲官運而鹽法之敗壞極矣就西路商幫論之一商倒幫分派各商代課課額愈多成本愈重又加以規費之需索流交之帑息溪海之險阻虧折坐耗不數年而資產蕩然倒罷相繼此商幫之積弊也商幫倒懸帆額無人認配則又變爲官運試辦之始銷路尙覺疏通迨其後官視爲利藪開銷挪墊虛抵搪塞辦運者扣費以入私橐督銷者賣私以取盈餘比課額太懸則又捏報失水搶毀等情上下分肥弊端百出遂致所領成本逐漸銷磨此官運之積弊也縣

經世文續編

卷四十五 戶政二十二

一一

海各幫距場較近收私賣私習爲固然其始地方官姑爲隱忍久之官勢浸衰私梟浸熾遂於埕私場私包私船私幫私引私之外復有糾黨持械明目張膽之擔私與官爭利與商爲仇到處皆然無從捕治此縣海之積弊也福興漳泉各府二十一廳縣謂之官幫向皆歸縣征收毋論已未征存均應按日計算責令完納久著定章奈州縣畏難苟安任人包辦名曰樸戶樸戶者卽館辦之別名也其因地方民情刁悍不敷征解者有之而獲有盈餘者實亦不少乃因甲年所收之錢必待乙年奏銷遂相率以二三分抵兌藩庫軍需冒銷無著之款避免革職處分其餘則盡飽私囊攘爲己有雖歷任鹽道屢札頻催而抗延不交竟成積習此官幫之積弊也各場員有督曬配運之責有緝私修坎之勞今因場署大半無存官坎莫考遂不駐場經理借寓省垣遇有海私進口商人收買運銷各場員則冒認場分指私爲官截角收費藉圖漁利以致埕坎全廢遍地皆私濱海愚民久不知場員爲何官配鹽爲何事肆無忌憚糾衆橫行此場務之積弊也夫鹽爲天地自然之利綜計閩省全年財賦以四分計之鹽居其一惟利之所在弊卽叢之雖軍興十餘年閩省被禍較他省爲輕閩省鹽課較他省爲少而積弊相沿竟至日引月長全綱不可復問此臣等所以亟籌通變之方也咸豐元年戶部奏閩省商疲引滯請飭在於就場征課按包抽稅二條詳細妥籌擇一可行之策另議章程據實具奏已奉 俞允嗣因上下游軍務繁興未及查辦奏覆至

咸豐三年又據御史蔡徵藩條陳閩省鹽務請修復收稅舊章按照現商完課數目改收場稅關稅一摺又奉 勅下詳悉妥議切實具陳後經前任督撫臣 奏請將續倒懸額七百五十餘帆試行招販辦運行之未久成效無聞竊維兩淮改票之案在承平之時一經變通課額較旺卽近年皖浙被兵之後商散民窮舉行票運釐課並抽亦復有裨軍餉閩省僻在海陬山水險阻雖非商賈輻輳之區然各屬地方被擾較輕西路各幫舊商猶在其間官幫稊戶藉此營運者又復不少誠能改行票運仿照皖浙辦法釐課並抽其餘冗費概行裁革並飭各場員駐場督配各府州縣分設局卡重抽私販開設官行勻配銷數下游濱海一帶產鹽地方酌撥師船梭巡以杜擔私船私偷漏或可稍事補苴據福建鹽法道吳大廷稟呈條款請 奏前來臣等查閩省鹽務積弊相沿已非一日全綱受病亦非一端該道所稟洞悉弊源計惟改行票運釐課並抽庶可藉圖整飭除現定條款甫議試行尙有未盡事宜批飭隨時妥籌稟辦外合無仰懇 天恩俯念閩省鹺綱疲壞准予改行票運試辦一年限內容臣等督令該道儘征儘解免計分數考成俾得力籌整頓察看一年限滿如果行有成效再行奏請著爲定章

閩省鹽務改行票運釐課並抽章程

福建鹽法道

吳大廷

一釐課並抽以濟軍餉也查閩省西路額鹽每引陸擔柒拾伍觔應徵課費銀貳兩捌錢叁分叁釐叁毫

叁綵陸忽東南路并各縣灣每引壹百觔應徵課銀壹錢伍分東路細鹽每引壹百觔應徵課銀柒分伍釐漳州府屬之龍南海長平並龍巖州暨漳平甯洋捌州縣每引壹百觔應徵課銀貳錢叁分貳釐觔重既多寡不同課額亦輕重不一今擬改行票運自應酌中定擬釐課并抽以昭平允查西路各幫距場較遠運道維艱每引擬抽課銀貳兩捌錢肆分加耗銀貳錢捌分肆釐再抽釐金銀壹兩肆錢貳分釐課兩項共合抽庫平紋銀肆兩伍錢肆分肆釐其東南路并各縣灣及漳龍各州縣每引擬抽課銀貳錢捌分加耗銀貳分捌釐再抽釐金銀壹錢肆分釐課兩項共合抽庫平紋銀肆錢肆分捌釐如此分地定數變通抽收則商販配鹽運銷不致畸重畸輕俾歸劃一

一分別票額以利轉輸也西路定章以三十引起票東南路并漳龍各廳縣均以壹百引起票以期易於周轉其應繳課釐議令買票時先繳壹半其餘壹半到地銷售由局收繳

一分設局卡以便稽查也查向章商販請引均須就場捆配近年場務廢弛任聽海船裝鹽私相買賣名曰便海流弊滋多今擬重整章程除嚴飭各場員分赴本任核實配運外凡有商販請票均須按場捆配以示均平現於南臺設立鹽務課釐總局凡鹽觔由海運到省先於館頭閩安等處釐卡查驗進口再由浦下關按擔盤驗上倉卽隨時報明總局如有夾私多帶查出重罰或係無票之鹽將船照扣留

押送總局照西路例加倍抽收一律清繳再議指銷引地補票起運其各府州縣一體照辦

一票岸兼辦以冀暢行也閩省商力疲乏不得不議變通之法以恤商艱但各商承辦有年因課費太重引岸滯銷虧短成本者固間有之其中善於居積獲利倍蓰者亦不乏人現在改行票運并裁革冗費專顧課釐各該商具有天良更宜踴躍轉輸以期日有起色今擬票岸兼辦先查明某商年認某岸筵引若干仍責令照舊認岸買票運銷該地應開設官行亦先儘認岸之商捐請若該商稟明無力承辦再准他戶捐充其無商認運地方盡招新販若有力之商情願兼辦別岸者亦聽其便如將來行銷暢旺額課銷完准其額外多請但均須請領新票不准以陳引混淆其有坐擁厚資巧爲趨避者除查明有無欠課分別追繳革退外仍從重勒捐運本以爲取巧者戒

一開設官行以資考核也鹽不歸行則漫無稽考夾私搶售有礙疏銷今擬於省城內外及各府州縣地方勸諭殷商捐請牙帖開設官行凡官鹽到地須先投行掛號准其酌收行用每兩貳分該官行卽以到地之遲早爲配銷之先後若兩戶之鹽同日到岸者應以掣籤之先後爲準俾免壅滯南臺所開官行每遇鹽船進口一切繳照盤驗等事均由該官行代爲經理俾臻迅速

一裁革冗費以紓商力也閩省輸納名目甚繁費耗綦重再加以各衙門酬應向章如鹽道到任有填衙

門包及三節兩壽之規禮其餘各場署及幫地文武各衙門所費不資積習相沿商力益困今自本署道始凡一切陋規概予裁革俾各商販專顧課釐別無浮費自應急公報效設法疏銷

一截清存引以杜影射也各商遠年存引倒罷之後往往抵給有力之商賤價售存遂得運無課之鹽而舊欠之課仍歸無着今擬改行票運一概將陳引暫停均須買票起運以歸劃一其各幫地已運未銷之鹽飭各商趕緊核實報數認完釐金免其重繳課項以示區別

一酌加耗鹽以示體恤也查舊章各幫均分別路途之遠近每正鹽壹擔酌加竈餘原耗折耗等名目或拾餘觔至肆伍拾觔不等今擬悉仍其舊凡官鹽掣驗准其照章照幫加給耗餘觔數折算併許准免課釐

一整頓官幫以足徵額也查官幫之貳拾壹廳縣向係各該地方官請引運銷完繳課項近年以來率藉口於私鹽充斥官引不行每屆奏銷只完二三分以顧考成其實樸戶包辦輸於官者甚鉅要皆挪作別用甚或竟入私囊以致積欠愈多銅弊難挽今擬改行票運凡官幫各廳縣引地准令各商販一體指認運銷併開設官行仍責成各該地方官稽查銷數嚴緝私鹽督徵應完一半釐課儘數按月報解如有短絀照遲悞軍餉例參辦

一填發販單以昭慎重也改行票運須用販單擬由本道製造詳送鹽院憲蓋用印信再由本道加蓋關防填發凡商販捆運先赴本道衙門呈明捆配何場鹽若干擔認赴何處投行銷賣完繳一半課釐由道核明相符填發販單給領赴場捆運該場員核明捆配卽於單內填明月日起運字樣截去前角角下加蓋場印卽將截存單角按旬繳報一面發還原單領運該商販憑單過卡掛驗相符亦於單內填註月日查驗訖字樣將原單蓋戳給領放行俟鹽運到地報由該地稅釐局驗明單鹽符合截去後角角下加蓋關防接到地先後月日發官鹽行挨次行銷飭令官行扣完一半課釐收回原單由稅釐局按月彙繳道署備查

整頓場務官幫章程稟

吳大廷

竊職道於閏五月十九日奉憲臺批職道稟請改行票運釐課並抽緣由奉批據稟各節頗能洞見弊源閩省鹽務倒疲已極此時亟籌變通之方自不能不改行票運候卽據情入奏試辦一年如行銷果能暢旺再著爲定章其現議各條內或有未盡妥協者卽隨時稟候核奪辦理繳摺存等因奉此伏查職道於五月十五日發稟後當卽商同藩司并會辦官運局周道妥議舉行刊刻告示運單等件於五月二十二日設立南臺鹽務課釐總局遴員駐辦月餘以來西路南路各商販均各遵章捐請牙帖開設官行先

繳一半課釐買票行運并查明省會幫地舊存鹽觔數目免課完釐所有停引一概截清以分界限幸賴
憲恩覃布商販均尙踴躍遵行惟查出產之源首在於場所運銷之地莫近於官幫除已分飭場員赴任
供職札飭官幫廳縣會同各稅釐局設法招徠分別抽收外惟南臺既設課釐總局下府情形又與西路
不同自應斟酌變通以期並行不悖茲又悉心參酌擬定整頓場務官幫章程開具清摺呈請憲臺察核
批示以便纂入票運章程內通頒曉諭俾知遵守至各場地皆濱海徧地私梟久矣愍不畏法自非少示
兵威似難遽求整飭且泉漳一帶外寇雖已肅清土匪仍未絕跡亦應次第搜捕以安善良可否仰祈憲
恩俯賜酌撥朱道張部郎楚軍於泉漳兩府每府駐紮一營遇有土匪劫掠私販橫行准由各該場及地
方官稟請派隊緝拿庶於場務地方兩有裨益

附籌議整頓官幫場務章程

一各鹽場產有定額配有定數全在各場員督晒配運認真辦理方有起色近年以埕坎失修私鹽充斥
各場員均不駐場以致日形頽廢本道蒞任以後嚴飭各赴本場次第整頓現在改行票運除各商販
在省請票之鹽係先完一半課釐仍由道給單均勻坐配務令赴場購運外其有由該場肩挑船販者
亟宜嚴加稽查如係無票之鹽必須就場徵課以清其源本道卽以產鹽之缺溢定場員之勤惰信賞

必罰毋得仍前玩愒自蹈愆尤

一各場向有倉館爲收配之所近年大半坍塌無館可儲以致走漏愈多亟應查照舊章會同就近稅釐局委員核實估勘請款修理併由道添派委員幫同舉辦務令工歸實濟俾復舊規

一各場緝私之法應就私販出入必由之地設卡巡緝方資周密准由各場勘明地方稟請札飭該縣文武員弁會同認真緝捕再查各該場貢山濱海道路紛歧尤須於總匯之地扼要嚴查現在洋面海私業已准由吳軍門派撥紅單師船梭織查拏其漳屬私鹽進口則以石碼關爲要隘現已委員會同該關大使設卡稽查督抽釐課泉屬私鹽進口則以金門爲要隘亦卽遴員會同南水關大使仿照辦理該員等務須力加整頓認真查驗如遇無票之鹽定卽按章重抽釐課方准過關倘敢抗違卽行拿辦

一各場抽收釐課無論海販陸販均須一律給予道印販單再由各該場加蓋場印填發以便稽查而杜弊竇所收銀錢按月解交就近之稅釐局由稅釐局亦按月彙解道庫各該場於月終一面截數具報併截同單根送道備查至砵秤舫兩自應遵照部頒砵碼概以庫平一百舫爲一擔候由道製造較準烙號頒發以免參差

一縣場應徵坵課向歸各場養電收曬收倉候配嗣因經費浩大各場員包給電戶自行收曬照額定課

近年各幫多不到場坐配各處埕坎又間有潮水沖塌之處無力修理以致應徵坵課未能足額查此項係解部充餉之款現值京餉支絀均奉按年指撥必應照額籌解疊次飭追并飭縣會同清釐毫無起色刻下漳郡收復各縣場務須逐一查明清理嚴催徵解如實有荒蕪坍塌之埕坎亦應籌備經費核實修復倘有竈丁把持刁抗立即嚴拿究辦庶年徵坵課得以按額征收埕坎歸公得以稽核實數再有倉館存儲則商幫年配引鹽無虞缺乏而濱海亦不致徧地皆私矣

一場員經徵釐課以徵解之多寡定考成之優劣如能課釐旺收立即酌予優獎倘復仍前懈弛分別記過撤任倘敢心存不肖罔上行私填報販單以多爲少一經察出定即詳請參追決不寬貸

一縣灣各幫應徵鹽課向歸各該縣按在任月日攤算繳解查各該廳縣於到任之始即有稜戶包辦其包辦數目雖有盈絀之殊而限繳現銀實受其利迨至奏銷期迫始措解二三分以爲邀免處分地步餘則任意虧挪現在改行票運擬飭令各稅釐局於附近各縣招徠稜戶包辦按月儘數繳局轉解道庫所有從前一切陋規概予豁除或有包數少而銷數旺者亦應酌量加增如無釐局之處委員前赴該廳縣會同地方官飭令稜戶包辦按月由委員催收移請地方官簽差解道仍飭令稜戶之有力者捐帖開行領票運銷一面查勘各要隘處所應否設卡堵截私販或即照新章過卡收抽釐課化私爲

官以裕課款而便民食之處卽日具覆核辦倘該地方官意存推諉坐視不管卽照情徵例詳請參處

同治四年七月初九日奉督部堂左批據稟各條均屬妥協其縣灣各幫鹽課擬飭令各稅釐局於附近各縣招徠穰戶包辦按月儘數繳局解道一切陋規概行裁革尤切中時弊仰卽實力行之至漳泉福州等處私鹽充斥以船私爲最應於何處總口設卡撥船梭巡各場以何場產鹽最旺船私攬私由何處偷漏地方係何營管轄俱應逐一查明稟候核奪繳摺存

查覆下游各縣場產鹽額數并設卡各要隘稟

吳大廷

案奉憲臺批職道稟整頓下游官幫場務章程并請撥勇彈壓由奉批據稟各條均屬妥協其縣灣各幫鹽課擬飭令各稅釐局於附近各縣招徠穰戶包辦按月儘數繳局解道一切陋規概行裁革尤切中時弊仰卽實力行之至漳泉福州等處私鹽充斥以船私爲最應於何處總口設卡撥船梭巡各場以何場產鹽最旺船私擔私由何處偷漏地方係何營管轄俱應逐一查明稟候核奪等因奉此仰見憲臺整飭離綱之至意欽佩莫名職道先於未奉批示以前遴委候選從九吉星燦陞用縣丞單理杭馳赴下游周歷履勘據實稟覆以憑酌辦去後茲據吉星燦等將履勘各縣場情形開摺稟報前來職道悉心參核各場產鹽額數向以蓮河爲最旺莆田下里前江福興江陰次之梧州潯美等場又次之近來場官並不到場埕坎之公私未清故產額之贏絀難定至於船私出入雖以泉州之廈門金門漳州之石碼三處爲最而同安之缺子口圍頭海頭晉江之廠口莆田之江口平陸平海福清之柳厝口漳浦之石蛇尾海澄之

海門等處亦屬走私要隘其餘小路紛歧肩挑負販者處處均可偷越更屬防不勝防非如福州之五虎口甯德之東沖口可以扼要設卡者比也所幸洋面一帶已有吳軍門廣艇分段巡哨可以帶緝船私如遇商漁船隻裝載私鹽查無單據擬請就近解交石碼委員彭光藻泉州委員韓承烜等照章分別究罰以重課釐其零星擔私迭據彭光藻稟稱已有認辦樸戶自設哨捕逐段巡查當更得力何則貲本攸關則思慮自密路徑既熟則防範易周理固然也萬一大幫梟匪聚眾走私現在漳泉各營均經憲臺選派將弁重整營規擬飭樸戶稟請附近營汛撥隊彈壓以壯聲威梟匪當亦斂戢其廣艇及營汛拏獲私販所收罰款仍飭石泉兩局委員照章二分歸公一分充賞以示鼓勵是否有當理合開具清摺稟求憲示如蒙俯允并乞咨行吳軍門與泉漳各營遵照辦理實爲公便

附各場產鹽額數并設卡各要隘摺

一福州府福清縣

福清場年產額鹽四萬六千五百擔

福興場年產額鹽一十三萬八千五百擔

江陰場年產額鹽一十三萬二千四百二十七擔

該縣三場產鹽頗多道路亦極叢雜其要隘惟柳厝口爲最官私皆由此進可設卡稽查再行派勇分巡漁溪更爲周密

一興化府莆田縣

莆田場年產額鹽七萬四千六十五擔七十七斤

下里場年產額鹽一十七萬五百四十八擔八十斤

前江場年產額鹽一十三萬八千零八十八擔三十一斤

該縣三場出鹽海口極其散漫惟江口平海兩處稍可歸總宜派水師巡緝陸路則塘岑涵江兩處爲要隘若於江口等處設卡復派勇分巡郊上埗頭槐厝前沁楮林後湖各地方則水陸均可扼住矣

一仙游縣

該縣惟楓林市一館又因兵燹廢去遍地皆私民復刁悍所以私販充斥不獨仙游一邑直通興泉二府其私鹽均從斗門雙溪兩海口而來但必經過楓亭市若於該三處設卡不但仙邑之私可化爲公卽鄰封官幫亦必日有起色矣

一泉州府惠安縣

惠安場年產額鹽八萬四千四百九十二擔三十二斤

該縣一場鹽館俱近海口出鹽頗多惟崇武獺窟小岞黃崎數灣最大宜多派砲船於沙格輞川臭塗一帶及青龍龍港兩橋往來巡緝至於旱路之洛陽橋已設有釐卡可以兼顧

一晉江縣

祥豐場年產額鹽七萬四十八擔

潯美場年產額鹽七萬九千四百擔

該縣二場灣口頗多極難稽查惟南門外廠口館實扼其要安海灣亦係總路該兩處可以設卡兼須師船再於河市深滬丙州井尾祥芝蚶江東石西塔等處宜派砲船勇丁往來巡緝再有要口必須巡查之處且俟委員察看情形妥籌稟明辦理

一安溪縣

該縣五館惟祥雲浮屠兩處近海爲最要之區現在盡係私買私賣若於該二處設卡稽查銷路可期起色

一同安縣

漳州場年產額鹽二萬七千二百六十七擔五十斤

蓮河場年產額鹽二十六萬八千八百二擔四十斤

該縣二場俱附近金門亦與同安晉江南安交界出鹽甚廣其間如東石石井大簋小簋等處均不遵官辦而馬巷爲尤甚若於圍頭灣頭草嶼缺子口馬家巷等處設立水卡嚴查復派砲船分巡石滸鄉三江地方旱路則設卡於江頭河厝將軍祠青亭等處私梟必當斂戢

一漳州府龍溪縣

該縣鹽之來路水則石碼旱則同安之灌口後溪烏嶼等處其東門之新橋爲石碼來船必經之路宜設卡其江東橋三岔河鎮門等處現經石碼關派有砲船往來巡緝惟海澄縣門距石碼四十餘里係大海要口如同安私販名烏底船者船上帶有鎗砲器械必須多派砲船方可彈壓黃庭亦宜設卡稽查陸路之三公宮等亦須派勇巡查

一長泰縣

該縣官商向由石碼起運其私鹽均係同安沖入旱路必經由同安交界之朝天白帆二嶺該私梟等均帶有鎗砲器械水路可通石碼必經三汊河宜於朝天嶺白帆嶺近處設立旱卡三汊河河口設立

水卡私梟可期斂戢

一南靖縣

該縣私販之來皆由文昌塔適中頂洪瀨深渡溪又龍溪漳浦海澄三縣交界之九龍嶺馬口橋等處而入必由此數處擇要守隘至與平和交界之山城館水陸可通均食廣東之大埔并漳浦雲霄沖來私鹽又須於東南二門外用巡船一二隻沿河梭巡

一海澄縣

該縣白水營浮宮墟海門等灣均與同安連界惟大舟口最爲要口同安之烏底船叢雜其間必須多集砲船往來巡緝方資彈壓餘如東西旱路之馬口橋漸山龍徑各處均與漳浦南靖連界亦須派勇分巡

一平和縣

該縣山路極多四通八達民食鹽斤均係隣境肩挑而來西路由廣東饒平兩縣交界之大埔沖入者尤多是宜設卡其東南北三路當由毗連之縣扼要嚴查毋須設卡以節糜費

一漳浦縣

浦南場年產額鹽三萬一千七百零四擔六十九斤

該縣一場十五館埕坎在東南蜿蜒二百餘里皆出鹽之所欲除私梟必須整修倉館儘曬儘收而後可資稽查石蛇尾爲漳浦雲霄二處要路必須設立水卡往來巡緝

一雲霄廳

該縣兩館六灣口其鹽均從梅安等灣運至必經石蛇尾可與漳浦同一水卡旱路派勇巡查

一詔安縣

詔安場年產額鹽六萬五千九百八十八擔八十三斤

該縣八館一場以銅山館爲最大出鹽卽在銅山館之五都鄉必須飭令場員責重寵丁儘收儘曬一

面在宮灣地方派勇巡查成效可期

同治四年九月初五日奉督部堂左批所稟下游各廳縣產鹽額數及擬設水陸各卡情形甚爲明晰應卽照辦剗飭興泉永道

汀漳龍道分飭各廳縣并咨明水陸兩提軍照行各標協營一體查照辦理繳清摺存

變通海運以及分別擔私船私抽收課釐稟

吳大廷

竊照閩省鹽綱倒疲已久自議改票運如倡絕學於舉世不爲之日幸沐憲恩假以便宜寬嚴并用甫逾數月上下游官商各幫竟能踴躍遵行征收日有起色惟整頓場務一事雖經酌擬章程稟呈憲鑒一面

通飭各場實力奉行迄今仍未就緒交冬以來海運日形稀少幫地鹽漸短缺若不早爲變計將來必至有票無鹽有岸無銷此中關係良非淺鮮請將按場分配種種艱難爲憲臺詳陳之夫整頓場務以到場截角爲最要而到場截角則斷非養竈收曬豐備倉儲不可從前商本充足風災養竈各有經費竈丁可不賣私而又請有場辦隨時收鹽上倉是以海船引照到場隨即撥裝場員既無難分配海運亦不致稽遲正本清源法未有善於此者也其後海潮屢漲埕坎日坍兵革數興商力益絀竈無以養則賣私既不能除倉已無存則儲鹽更不能預積漸因循遂至場員以到任爲苦海商販視到場爲畏途一變而爲上期再變而爲便海數十年來場官不知督配爲何事商販亦視分配爲具文沿習既久恬不知非一旦欲恢復舊規當此商販疲敝之際買票運鹽已形喫力若欲責其養竈丁請場辦備倉儲實屬力有未逮此其難一也既不能養竈收倉場鹽卽不能悉數歸官是各商持票到場必須現買現配倘適值場產缺乏無鹽可買非守株待兔浪擲金錢卽往返空勞貽誤課食此其難二也卽使場產極旺可以隨到隨裝而海船每裝數千擔按場捆配一船必三五場始能配齊往返數百里稽延數十日經費益多成本益重此猶就本額而言若西路縣灣各代額竟有一票數場一場數引者每配一船幾於週歷各場瑣屑繁冗於國賦無甚裨益而於商運實有滯礙此其難三也況場產旺絀今昔不同十三場中近惟蓮河潯美

產鹽最多貨色極白西路銷數亦惟恃此二場所產方能暢旺所以運潯之產數銷數均較舊額多至倍
蓰而他場則不及舊額者有之若必責令按場捆配勢必至運潯有鹽而無銷他場有銷而無鹽此其難
四也又運票卽屬成本現今課釐并抽成本益重每裝一船不下數千金目下海盜猖獗風汛靡常萬一
中途遇盜半路遭風此票一失資本全虧此其難五也夫知其難而姑任積弊之相沿不可也知其難而
不思變通以盡利亦不可事至於鹽敗壞極矣而易於鹽卦獨詳事治爰與局員商販悉心講求擬製道
印護照由該商販等到局買票時一併請領轉給船戶收執以憑持照到場採買場員驗有護照卽許裝
載局卡驗有護照卽許放行均不准需索留難以利輸轉至於鹽觔之重輕關係課釐之多寡除東路幫
七縣由東冲口按擔抽收課釐外其西路則有浦下漳龍各屬則有石碼泉永各屬則有南水此三關者
前人設立鹽關專派大使驗盤實爲扼要之地擬俟鹽船到關先將護照繳銷其無護照者仍就職道詳
定章程分別究罰有護照者隨卽呈明販單由各該關盤驗截角按月造具場分引數清冊併截存單角
分別移送各場由各場員自行彙報以符舊制似此通融辦理匪但可以免險阻亦可以別官私便商裕
賦似亦未始非因勢利導之一端也抑職道尤有請者閩省引鹽以西路爲大宗現在節節稽查私銷似
可盡絕而下府地勢散漫偷漏仍多不免擬請分別擔私船私酌量抽收蓋擔私皆近場窮民馭之太急

必至別生事端且鹽價最賤每觔僅值錢一二文若照章抽收課釐每觔約增錢六七文未免強人所難抑恐於事無濟應請格外從寬由各局卡每擔酌抽課釐錢一百文以示體卹其廣浙兩省海船最爲走私大宗與其禁止而徒託空言不若征抽而有裨實用擬製道印三聯運單發給運潯各場海防局員遇有無照船隻到場捆運或經過局卡卽由該局概照西路章程酌加五分之一抽收課釐以衛幫地而裕國課似此利歸公家私梟不禁自絕然此皆因時變通補偏救弊之計若欲復歸舊章必須軍務救平庫款充裕商力漸紓概從根本著手方爲美善

瀝陳閩鹽試行票運情形疏

閩浙總督 左宗棠

竊臣接准戶部咨開議覆閩鹽試行票運一摺同治四年九月十五日奉 旨依議欽此欽遵抄摺飛咨到臣竊維前奏福建試行票運一案實因鹺務積弊相承漸至不可收拾致 國家自有利源盡供中飽因檢閱舊卷見咸豐元年戶部有就場征課按包抽稅之奏咸豐三年御史蔡徵藩有修復收稅舊章按照閩省現商完課數目改收場稅關稅之奏皆奉 敕下詳悉妥議切實具陳維時督撫諸臣皆刳於浮言不敢獨執其咎因循至今全綱頽壞良用慨然因與撫臣會商毅然有改行票運試辦一年之請初不意遽有成效也旋查自本年閏五月起試行票運截至十月底止甫及半年鹽庫實支解司庫暨臣營軍

餉已一十五萬兩一切照例雜支之款亦一萬數千餘兩尚有各商在幫應完未收之一半課釐約計亦可十餘萬兩查同治元年報收銀二十一萬兩有奇實支解京餉及司庫共祇八萬兩有奇二年報收銀一十六萬兩有奇實支解京餉及司庫共祇六萬兩有奇兩相比較試行期內半年之久所收實解之款已抵前此一年及一年半之數此明效大驗一覽而知者臣初亦疑上有所益則下必有所損課釐並納民或有食貴之虞乃詢諸市價則無所增也贏絀相形商或有偏累之苦乃察之商情均以爲便也臣方詫爲始願所不及卽當創議之初腹誹而竊笑之者亦爽然若失不敢妄持異議茲閱部咨部臣亦知以閩鹺敗壞爲可慮亦不以票運爲不可行而特以慎重更張預爲詰責於是有一四可慮之議如原奏云在前嚴定考成尙有挪移之弊此時免計分數能無侵蝕之虞又云現辦各商一經裁撤萬一新販稀少課額虧短再欲復歸舊章勢有萬難一節不知臣所以請免計分數考成者以閩鹺痼弊最深驟議改章難求速效是以援照兩浙成案懇請試辦從前考成雖嚴每屆奏銷僅以五分塞責其中虛抵虛收尙復不少現在試辦票運實收實解方且一洗從前挪移陋習從前解款半而今解款倍之其無侵蝕之事可見舊商只令照額認辦分別買票幫銷完繳課釐不准掛欠一切浮費則概行革除並未裁退舊商全招新販向之疲滯口岸自試行新章漸有商販認辦視前此愈殷富充商以行鹽爲勒捐之計者迴不侔矣

此不足慮者一也部議西路商幫額大課重招徠小販力不能勝又苦陋規太多必致捆運無人則不但虧課而且病民夫陋規不除則由昔之道由今之道均一虧課病民豈有力求整飭而不革除陋規之理今西路世業大商仍任其認岸專辦此外官運亦歸一律而自臣衙門至大小鹽務衙門規費一概革除計所裁之數每年不下七八萬兩又停收一切雜支之款是皆向之所謂以陋規太多爲苦者一經釐革淨盡羣情欣然如沈疴之釋體方且於應完正課外輸釐金捐牙帖開設官行一以彌補雜款一以接濟軍需無加額之名而有裕課之實此不足慮者二也部議閩場濱海民風强悍梟販繁多抽釐更難措手師船彈壓萬一辦理不善得不償失臣查此次試辦章程釐隨課出皆取之買票商販並未沿海散抽商販既完釐課成本較重必須官爲緝私銷路乃暢衛商卽所以顧課也數月以來並無私梟拒捕之案如果奸梟滋事則執法懲之豈有慮民強而廢法之理乎至謂閩省從未報解鹽釐遂謂無從措手則未知從前閩事之積玩有非意想所到者沿海州縣多係縣灣官幫平時包與樸戶官但坐收課費以充私橐而報實銀者寥寥正賦尙缺遑云抽釐今設局招徠不假丁胥之手新販既認口岸與西路商幫無異無不交相感奮以冀暢銷現在縣灣各幫次第遵照新章完納課釐該局隨收隨解並無蒂欠蓋挈向時官吏私攫之款涓滴歸之公家名雖取之於商實則變私費爲公帑益上而不損下此不足慮者三也部議

閩鹽積欠不下數百萬兩雖未能依限清完而軍務肅清可期漸有起色一旦全議更張欠款未便置之不論如票運僅能保完課額前項已無着落現充各商一經裁撤責令如數完欠恐亦甚難臣查閩鹽積欠已至四百餘萬兩之多此非一朝一夕之事亦非始於軍興之時蓋其積疲也久矣票運僅能保完課額前項固無着落然若不早議變通日復一日前項豈歸有着乎卽軍務肅清頓如從前無事人物滋豐之時而利孔百出難行銷日旺亦祇利歸中飽於國計有何裨益未改票運以前求保完課額而猶有未逮部臣不之責也甫試改票運力顧課額而部臣尙欲求多是舉數十年所不能辦者責望於一時恐管晏竭其才桑孔盡其術而亦有所不能譬如力舉百鈞者加以百鈞之重責其負荷已覺不能日中其程若再累而增之其不致顛蹶者幾何況現雖試行改票專顧課釐而舊欠仍未嘗不按期催繳自四月至十月官欠商欠已收回銀五萬餘兩視前此百呼而不一應者亦覺迥異惟閩商貲本素微又值凋敝之後責其趕完課釐又責其清完陳欠恐陳欠未必能清而舊商日益倒罷是以請將積欠帶輸等銀分別減免總期商力稍紓漸能照額買票趕運暢銷或可以盈補絀此不足慮者四也至部議以先清埕坎次查戶口出入兼權可得大概議臣原奏未之及一節竊謂清埕坎查戶口本是鹽務常談非救時急務閩省官埕官坎倒廢奚止百年所僅存者多係濱海窮民自行修整非次第清理不能挈私而還諸官若

驟奪私修之埕坎而歸之官事必有所難行必致如部臣所慮辦理不善得不償失翻不若抽釐之較爲得實至戶口星散稽核難周海濱掬水成鹽人皆食鹽之人卽人皆煮鹽之人必欲計口授食不但徒託空言轉恐益滋煩擾故原奏未之及而但以抽釐權其轉販之鹽也部議務期毫無窒礙確有把握再議試辦果如部臣所言臣能預知毫無窒礙確有把握則當徑奏改票不必以試行爲請試行云者原欲詳察利弊決其可否斟酌行止以俟請旨定奪今必謂試行亦須俟部議而後可則凡外吏遇有試行事件均必先咨部臣定議而後入告亦似與定制不符從前部臣知閭閻之日壞奏議改章若前任督臣肯不計身家利害毅然爲國家長久之計則現在新獲之效早行之十餘年以前計所獲已不下二百餘萬兩何至積欠至四百餘萬兩之多乃從前積欠至四百萬兩不聞部臣參辦責賠茲力排羣議奏請試行而部臣轉持苛論事關國計臣安敢緘默不言總之任法不如任人人存而政斯舉興利不如除弊弊盡而利自生鹽務爲腥羶之場爲奸弊之藪見效最難致謗則易苟無潔己奉公獨立不懼之員卽改行票運臣亦安能保其必無流弊惟據現在而論臣雖不肖斷不敢計及身家利害重負君父鹽道吳大廷尙知自愛又正當感恩圖報之時斷無背公營私之理試行期內雖部臣責臣與撫臣鹽道以參賠並稱如該督等不候命下已竟撤商行票將來課額虧短全綱渙散臣部惟有從嚴參辦並將

虧短課款責成率詳之鹽道與率准之督撫分成賠繳以肅功令而重鹺政臣與吳大廷無所媿亦無所怯也若後此兼管鹽政以及鹽道不得其人則此時試行之章安知非從前相沿之弊是則非微臣所敢任而亦非部臣所能議者可否 飭下部臣將閩鹽試改票運應止應行速議具 奏俾微臣得免意外吹求不勝感悚之至至鹽政原督臣兼管與撫臣無涉鹽道雖係專司之員然主行票運實微臣一時愚昧之見並疊次緘牘責令毋避嫌怨詳議候核非鹽道所能專似可一併無庸置議所有此次覆陳由臣單銜拜發之處合並聲明

請免現商帶輸銀兩疏

左宗棠

竊照閩省鹽商历年積欠按限帶輸一款內除應歸補司道庫墊款銀貳拾陸萬貳千捌百陸拾伍兩剔出照案依限帶完外其餘銀兩曾經臣等 奏請減免奉 旨飭部議覆嗣准部咨飭將此項請免銀捌拾柒萬壹千貳百陸拾陸兩認真釐剔自定案後實在倒革無着應於現商代完若干另造清冊懇 恩豁免統以報部有案爲憑方准列入冊內其或新商認完舊商欠項舊商以館埠器具鹽包作抵此卽與現商應完無異不得朦混列入其現商應完銀若干兩應仍照案依限帶完不准再行請免以示限制等因臣等細繹部議重在分別造冊准免退商仍追現商自係核實辦理慎重款項之意然臣等前請減免

帶輸原欲顧全現商非以庇脫倒商何也商既倒革必已產破家傾雖使追比頻仍亦於國課無補歷
奏帶輸積之既久而爲數過鉅者姑弗具論卽此捌拾柒萬餘兩之中退商約欠肆拾玖萬有零現商
約欠叁拾捌萬有零自是現商欠少退商欠多而應歸司道庫墊銀貳拾陸萬餘兩其中退商無着均責
現商勻完又是現商欠多退商欠少如照部指仍追現商則退商得邀曠典而現商轉抱向隅徒有豁
免之名仍無豁免之實況今行票之商多卽昔時行引之商如此時易於追完則從前不至積欠從前既
至積欠此時何能追完縱令勒比監追間有完納亦無非挪新賦以完舊欠帶輸一分舊欠卽短徵一分
新賦是新賦無全繳之年舊課卽無清完之日也上年甫議改票之時首先請免帶輸蓋以輕舊逋卽所
以重新賦紓商困卽所以保利源留商改票俾得專顧課釐庶幾年清年款可爲一勞永逸之計耳幸改
票以來甫及期年成效大著使從此經理得人將來遞年盈溢之數積微成鉅卽以後日之贏餘償從前
之欠款亦尙綽然有餘是各商旣霑逾格之恩國家亦收無窮之利一時觀之雖若見絀通盤計之
實可取盈也若必謂新商帶輸不可盡豁則商力旣未能紓恐票運翻多窒礙臣等督同司道再四熟籌
若不一律請豁殊與全綱大局攸關合再瀝情奏懇天恩俯鑒愚忱曲賜允准卽將前項帶輸銀兩
除應補司道庫墊款銀貳拾陸萬貳千捌百陸拾伍兩照案依限帶完外其餘銀捌拾柒萬壹千貳百陸

拾陸兩無分退商現商一律豁免俾紓商力而顧課釐

會奏減免兼徵帑息疏

左宗棠
徐宗幹

竊照閩省鹽幫疲敝已近百年司鹺務者設法挽救不出緩征借帑兩策究之緩征徒顧考成而帶輸每多拖欠借帑不無折扣而篷額仍屬虛懸名爲設法挽救實則暗肆侵欺如此而欲裕賦便商譬猶倒行以求前也夫閩商資本雖微但使完課辦運亦何嘗不收微利無如終歲經營半耗於陋規之需索半迫於帑息之虛馱商力幾何其堪此層層剝削而不倒罷相踵乎上年試行票運臣等卽督同該鹽道吳大廷悉心稽察裁革陋規歲約捌萬餘金故改票以來課釐並抽徵額較前加重而數十年疲敝商販尙能拮据趨公踴躍輸納茲屆試辦期滿將欲奏行票運著爲定章而於虛馱之帑息仍事追求非惟不便於商抑實無益於事溯查各款帑息始於雍正年間迄今已百數十載當領本之初雖或不無折扣而尙有現領之銀可資周轉且完息僅止一分不覺其爲累也迨原商倒罷輾轉流交現辦之商未必皆領本之商而積欠帑息無不盈千累萬商旣倒歇豈尙有盈千累萬現銀交完欠息之事其所存抵者無非倉館器具及未運之陳引且有並倉館器具陳引而亦無之者新商接辦不能不隱忍認賠卽司鹺務者亦明知虛馱之帑息斷難如數催徵惟旣無從取償於倒歇之舊商不得不移累於接辦之新商新商旣不

能不爲認完卽不得不挪動正課故帑息未見取盈而正課轉因以大絀也頻年短徵數至肆百萬兩之多受敝之由此居其一然未改票以前尙可執運陳引希冀夾帶偷漏且可停引不領將二三年所得之錢繳元二年應完之款而奏銷仍展之又展責以繳完帑息彼尙無可藉詞洎乎改票以後立將陳引截清不准執運積年影射夾帶之弊一掃而空而按額科票課釐並抽計自上年五月二十二日設局試辦起截至一年期滿已收正雜各款伍拾餘萬兩較之歷屆奏銷徵完正溢課帶輸帑息等款現銀拾餘萬兩已增三倍之多今日行票之商豈非卽昔日行引之商乎何以昔絀今盈懸殊若此蓋以改票之時首先剔除上下陋規繼又請免帶輸並又將帑息項下應發之款設法籌墊不爲無益之追呼紛其心志故各商始得專力於課釐舊累輕而新賦自裕耳於鹽釐見正課之有餘但使能裕庫儲卽帑息暫不取盈可爲以贏補拙之計於試運見票章之已效然非稍輕積累則商情難於持久仍多顧此失彼之虞臣等再四籌商若不將帑息銀兩分別緩免實未足以紓商力而顧課釐合無仰懇天恩俯念商困未蘇力難兼顧准將軍標馬價盤費欽工普育鰲峯等大款帑息歷年官商欠完銀壹拾貳萬陸千貳百餘兩概予豁免並請將年額息銀壹萬肆千捌拾玖兩零遇閏加增銀壹千壹百柒拾肆兩零概予停止惟軍馬盤三息苦累雖較他款爲鉅但有關旗庫支款難容全廢應請量減三分之一此外欽工爲支造戰

船之需普育則孤貧賴以養贍鰲峯則人才藉以作育準理度情均難偏廢擬請按照每年支解實銀數目在於鹽釐項下提解支給於奏銷時造冊咨部查核至於各項帑本未便置之不論請俟商力稍紓察看情形援照風災養竈之案責令各商完息作本陸續歸還原款其風災養竈二款經前督臣慶 於咸豐九年十二月間 奏明停息五年之後完息作本扣至同治二年底止五年限滿三年即應啟徵迄今屢加催迫並無完繳皆因商力未紓難以兼顧請再展限五年照案飭令完息作本似此量為變通可以恤商艱可以顧票運而年額帑息亦較有着落以視頻年追繳徒為商累而於庫款仍無絲毫之益者此固於分別減免之中轉得實際矣

會奏票運一年期滿征收課耗釐等項銀數疏

同治五年

左宗棠
徐宗幹

竊臣等於同治四年六月十五日會 奏閩省鹽務全綱倒塌殆盡亟宜設法變通改行票運課釐並抽請先試辦一年限內儘征儘解免計分數考成一摺奉 旨戶部議奏欽此是年十月十三日准到部咨議以閩鹽改行票運全議更張恐虧課病民應再妥籌期於毫無窒礙等因覆奏奉 旨依議欽此嗣臣宗棠於十一月十六日恭摺覆 奏瀝陳閩鹽試行票運獲有成效情形請再 勅部議覆欽奉 上諭前因宗棠 奏閩省鹺綱疲壞請試行票運一年當交戶部議奏嗣經該部以閩鹽改行票運全議更張

恐虧課病民咨令該督妥籌期於毫無窒礙茲據奏稱自本年閏五月起試行票運甫及半年所收實解之款已抵前此一年及一年半之數向之疲滯口岸自試行新章以來漸有商販認辦各衙門一切陋規所裁不下柒捌萬兩羣情翕然且釐隨課出皆取之買票商販並未沿海散抽數月以來亦無私梟拒捕之案從前縣溥官幫坐收課費以充私橐今則挈向時官吏私攫之款涓滴歸公至閩鹽積欠數百萬兩現雖專顧課釐而舊欠仍未嘗不按期催繳請仍飭部將試改票運行止速行議覆等語覽其所奏於閩省鹽綱之積弊及現辦票運之可行實爲洞悉原委總之鹽務爲國課大宗亦爲奸胥利藪惟在得人而理斯能力挽頽綱票運之行雖不能保其必無流弊倘承辦之員均能潔己奉公不爲私計自足以除從前積重難返之弊而與爲更始該督既稱商情既便市價無增無加額之名而有裕課之實卽著照所請先行試辦一年俟有成效卽行奏明著爲定章以肅鹺政而裕課餉該部知道欽此欽遵在案本年五月十八日復經臣等會 奏備陳同治三年正課二年溢課原請分作四年按限帶完祇因商幫向係先完課銀後發引照前項帶徵正溢各課前鹽道潘駿章任內並未開征亦未給引察看商情又難先行墊完請將三年正課二年溢課免其分年帶徵彙同各年舊欠課款歸於票運案內統收統算應如何按年分別劃收俟 奏銷造報時聽候部臣核示辦理其票運案內徵收銀兩業已統收統算卽從前經督徵及

接徵分數亦無從核計並請免予查參又在案臣等伏查閩省鹽課自國初定制歲僅徵銀捌萬伍千餘兩雍正元年各場委官監管地方官隨處設卡委員收稅先完課而後給單聽其配運售賣至乾隆七年奏定盈餘銀壹拾肆萬壹千餘兩較前幾增兩倍然視兩淮課額不及數十分之一卽較之浙江粵東各省亦遠不如推原其故蓋有數端閩省除汀州府屬向食粵鹽外臺灣一府遠隔重洋無從兼顧西路各幫則嶺嶠迂迴溪河險阻轉運極艱其限於地利者一也地處海濱僻而且瘠富商大賈不屑措意業鹺者僅止本地商人貲本旣微營運又拙其限於人力者一也迨其後僉商定地以當年稅銀作爲引額此法一變商之浮費遂增鹽之行銷亦隘積漸因循至同治元年報收銀貳拾壹萬兩有奇實止支解京餉及撥解司庫共銀捌萬兩有奇二年報收銀壹拾陸萬兩有奇實止支解京餉及撥解司庫共銀陸萬兩有奇至於三年正課二年溢課迭請展緩蓋已岌岌乎有全綱倒歇之勢矣臣等推求弊源力圖挽救於該鹽道吳大廷到任後卽飭痛裁陋規截清陳引舉百數十年之宿垢概與掃除自同治四年五月二十二日留商改票設局試行是時下游官幫各廳縣軍務未靖先從西南路各幫辦起官運商販幸均遵照新章力求整頓課釐並完行之數月漸有成效迨全閩肅清七八月之間先後派委員馳赴石碼泉州一帶招徠販戶改行票運除莆田一縣尙無販戶認辦仍歸該縣官辦臺灣一府暫行酌量抽釐東路

一幫仍復按擔抽課承德田南幫係屬官代商運仍飭道遴委委員開幫舉辦外其福興泉漳各官幫均已設法招販試行票鹽所有未經招販以前仍分別正溢課雜等款另行附冊咨部以示區別而昭核實以上各官幫或招販之遲速不同故造報之日期不一現已試辦期滿自應一律截清統作本年五月二十一日爲止以歸劃一庶下屆期滿造報各冊易於稽核茲查自上年五月二十二日改行票運起至本年五月二十一日止試辦一年期滿共收新鹽課耗釐銀肆拾萬伍千叁百柒拾壹兩伍錢肆分玖釐壹毫肆絲舊鹽釐金銀叁萬捌千叁百柒拾貳兩伍錢陸分玖釐捌捐牙帖子店缸捐共銀叁萬柒千陸百貳拾柒兩貳分捌釐帶征未改票以前正溢課雜帑息帶輸運本等項共銀壹拾貳萬貳千陸拾柒兩玖錢陸分叁釐壹毫玖絲統計共征銀陸拾萬叁千肆百叁拾玖兩壹錢玖釐叁毫叁絲開除支解本省同治乙丑等年兵餉武職養廉解送內閣庶吉士四年分費用銀兩支給俸廉役食祭祀等項支銷製造臺械工料價銀併牙帖子店缸捐鹽釐運本等項撥充軍餉撥解軍標馬價盤費鰲峯辦造金州戰船孤貧口糧鄉闈貢院閩侯兩縣罄貧出旗貧民口糧掩埋棺確義倉經費丁憂場員盤費等款同撥還各款原墊銀兩統共除銀肆拾肆萬壹千肆百肆拾叁兩叁錢叁分肆釐壹毫實在應存庫課耗釐併正溢課坵折等銀壹拾陸萬壹千玖百玖拾伍兩柒錢柒分伍釐貳毫叁絲據福建鹽法道吳大廷分別造冊詳請

奏咨前來除將各冊咨送部科查核外臣等謹合詞恭摺具 奏

裁革陋費稟

吳大廷

竊念天下大利之所在大弊伏焉惟無欲始能祛弊而大利乃出閩省鹺務自道光年間成法屢更於是官皆視爲利藪上下交征侵公肥己至今日利孔百出浸浸乎不可救藥矣職道材質驚下深懼弗克稱職有負恩知計維有以除弊者興利以正己者正人或可補救萬一伏查職道衙門自到任填衙及節壽引費上倉給照驗盤船工津貼門包隨封等項共計紋銀七千九百六十兩番銀一萬九百八十元錢五千八百餘千此可預定者也本道接送差使按道途之遠近派送盤費與夫內署鋪墊傢伙等項約計每年亦不下數千金此不可預定者也凡此浮費皆取於官運商人迫運本日虧商力不繼而浮費則不能減 國課安得不虧所有前項浮費銀錢價計約近三萬金左右今自本道到任起概行裁革另開清摺附呈憲鑒至平餘一項向來各省藩司以及州縣各衙門徵收錢糧正額之外均有此款以備官署辦公之用與浮費究屬有間現查職道衙門凡官課上庫每百兩隨繳銀二兩四錢八分商課上庫每百兩隨繳銀二兩二錢八分前任每年約計銀二千五百餘兩爲在任之員所得現在浮費既除只職道養廉薪水除照部定扣減二成暨各項攤捐外歲僅剩銀二千四百二十三兩九錢二分而核計職道署中伙食

及文案帳房薪水一切什用絲毫皆自己出雖使損之又損不敷尙多又有下平餘一項凡官課上庫每百兩隨繳銀九錢三分五釐商課上庫每百兩隨繳銀四錢八分五釐前任每年約銀五百八九十兩零向爲門印跟班人等所得職道所用隨從雖不及各前道四分之一然抄寫奔走不可無人不能不量予薪金俾免需索加以轎班執事各項人等除由本道自給工食外每遇出城均由商人給發點心酒錢今已裁去概由職道自行給發需用益繁籌墊匪易計自本道到任已逾五旬未動公家一錢皆向稅釐局挪借此可暫而不可常再四籌維所有前項上下平餘可否仍歸職道作爲貼補辦公之需抑應作爲公欸另行存儲聽撥之處合肅稟明仰祈憲臺察核批示遵行

請由道籌給西浦二關薪俸工食稟

吳大廷

竊照閩省場員共一十七缺其中惟浦下西河石碼三關最優每年約收私費均在萬元內外從來官斯缺者大半以鑽營賄賂得之何則官商販戶無不利在夾私然非勾通掣驗關以多報少則不能恣所欲爲是關員之規費愈多商販之夾帶愈甚而國課之額賦益虧卒之關員所得半耗於上下瓜分半耗於應酬揮霍入己者能得幾何而庫藏歲入之常經日朘月削駸駸乎不可收拾矣職道蒞任之初以石碼密邇賊氛未遑議及而西路行銷最旺鹽之進口必經浦下出口必經西河皆係省垣扼要之地是以

遴員接署一切私費飭令概行裁革嚴禁書哨不准串通舞弊以多報少再蹈夾私陋習三月以來該大使戴鐸才汪保駒均尙清苦奉公勤慎無悞惟該二關盤驗弔配公事紛繁丁哨書役勢所必需私費旣裁辛工飯食等項不得不酌量給發而原設各役薪俸工食爲數無多委實不敷辦公自應由道籌給俾免枵腹致若輩有所藉口茲據該二關大使開具清摺請給前來查西河關月需津貼書役工食香燈油燭房租等錢叁拾玖千文浦下關月需津貼書役工食香燈油燭等錢叁拾柒千叁百陸拾文又兼管福廠月需津貼書役匠夫工食香燈油燭等錢陸拾陸千伍百捌拾文三共錢壹百肆拾貳千玖百肆拾文一年綜計共需錢壹千柒百壹拾伍千貳百捌拾文職道現擬在於隨收鹽課耗銀項下按月照數提給庶幾夾私可以漸絕而辦公亦不至無資似乎整飭與體卹兩得其平

經世文編

卷四十五

七

一平利其前無子均自盡於子前百兩皆安願也

一平利其前無子均自盡於子前百兩皆安願也

一平利其前無子均自盡於子前百兩皆安願也

一平利其前無子均自盡於子前百兩皆安願也

一平利其前無子均自盡於子前百兩皆安願也

一平利其前無子均自盡於子前百兩皆安願也

一平利其前無子均自盡於子前百兩皆安願也

一平利其前無子均自盡於子前百兩皆安願也

皇朝經世文續編卷四十六目錄

戶政二十三 鹽課五

晉省官鹽滯銷私鹽充斥請照舊章歸官運疏

鄧慶麟

瀝陳川省鹽務積弊疏

丁寶楨

擬請仍照前奏 飭部鑄頒關防疏

丁寶楨

現擬整頓鹽釐片

崇厚

遼海權鹽私議

胡傳

川引斤兩過重請 飭部減川配淮疏

劉坤一

遵查部議指詢各節據實覆陳疏

劉坤一

爲黔滇官運局還清原借帑項及四綱支存各款作爲運本疏

丁寶楨

兩淮議減濟楚川鹽引張事多窒礙難行疏

涂宗瀛
彭祖賢

鹽務積弊太深宜妥籌良法疏

桂霖

粵省潮橋鹽務廢弛擬委潮郡守兼辦片

張之洞

經世文編

致陳孝廉書

徐廣陞

皇朝經世文續編卷四十六

上海葛士濬子源輯

戶政二十三

鹽課五

晉省官鹽滯銷私鹽充斥請照舊章歸官運疏

鄧慶麟

竊維山西亢旱成災闔境錢糧蒙恩概予蠲緩地方維正惟賴鹽課爲一大宗而山西各州縣辦理鹽務未能畫一有暢銷之區亦有滯銷之區因有私鹽充斥而官鹽干以滯銷亦有領運官鹽夾帶餘私過多充斥正鹽以致引鹽不能暢銷此其弊在地方官招商辦運不得其人故也查山西運鹽舊章向歸官運官銷以濟民食蓋鹽歸官運則價酌其平必不肯與民爭利致滋事端而額引有定地方官自顧考成萬不肯任私鹽充斥致正引銷不足額此官運官銷裕國便民之最善也無如各州縣履任後因政務殷煩勢難兼顧往往招商領運官則坐擁虛名盡由商人把持舞弊而鹽政於以大壞緣辦運之商非地方刁紳劣監卽市僧奸商湊集資本夥謀朋充勾結鹽場各官聯爲一氣漁利分肥弊端不勝枚舉其承運正鹽每引三萬斤應加餘鹽三千斤以爲銷耗之費此定章也而鹽商舞弊手眼每引加帶餘鹽七八斤不止正引愈多餘鹽愈廣其甚者餘鹽夾帶較正鹽則有三分之一鹽商先賣餘鹽希圖利己而正引

之鹽所售無幾則謂之滯銷此餘鹽充斥有礙正引之病官也每鹽一斤制錢三十五文而鹽秤始則十四兩爲一斤近則十二兩爲一斤加以泥水攪和實則不過六七兩百姓忍氣吞聲無如之何此泥鹽短斤以病民也聞近來山西州縣中惟鳳台縣知縣賴令到任卽循定章官運官銷乾鹽足秤不假商人之手百姓頌聲載道亦無私鹽充斥情弊又署陽城縣知縣胡令因紳士呈控鹽商短斤泥鹽出賣深爲民害並查明領運正鹽有夾帶餘鹽等弊將鹽商徐得璫懲責督令書差以乾鹽足秤售賣每日銷鹽不下萬斤闔屬感頌而額引于以暢銷所謂有治法尤貴有治人也夫巡緝私鹽例有明文而各州縣之私鹽仍是鹽場之官鹽奸商設計取巧充斥正鹽匿課肥己其弊伊于胡底相應請 旨飭下山西巡撫查照舊章仍歸官運官銷不准招商辦鹽庶引鹽不致滯銷私鹽悉歸正課而官民亦不至交困

瀝陳川省鹽務積弊疏

署四川總督 丁寶楨

川省鹽務積滯引張之多積欠羨截之鉅爲他省所未有臣詳細體察在同治七八年以前猶可藉口於黔邊岸久未疏通迨同治九十年以後邊岸旣漸有轉機而濟楚引張定爲五邊一計銷行亦暢何至引積羨懸轉甚於前十倍且釐金亦逐年遞減推求其故始知前任四川鹽茶道傅慶貽在任時創爲撥釐作羨之法自此羨釐兩項頗多含混以致收數愈形短絀隨飭清查局司道督飭委員檢查同治九十年

以後鹽署檔案切實核辦茲據詳稱傳慶貽任內創議撥釐作羨係於商人應完釐金項下准其每引一張撥出釐銀二兩抵作應完羨截二兩收庫計自同治十一年三月初一日傳慶貽定章撥收起至光緒三年冬間奏改官運停撥止前後五載有餘僅收過撥釐作羨九七平九九色鹽釐銀一十四萬七千三百七十一兩零折實淨收庫平色銀一十三萬八千八百四十五兩零復按引分算其各任欠收羨截銀數自同治十一年三月初一日起截至光緒二年年年底止除撥釐填羨外各商實共欠羨截銀三十九萬二千五百一十九兩九錢零其光緒三年十一月以前短少銀三萬三千六十六兩有零尙未併計在內綜計自咸豐九年起至光緒四年止前後共積欠鹽羨截銀一百四十萬一千一百八十五兩六錢零該司道查近年奏銷冊籍比較各年欠數同治十一年以前未經撥釐作羨每年積欠羨截不過四五萬兩至同治十二年以後業經撥釐作羨每年積欠羨截轉多至八九萬兩及光緒三四兩年奏改官運停止撥羨每年鹽道衙門計引積欠又不過三萬數千餘兩此中得失較然可觀是傳慶貽創爲此法名爲撥釐作羨實則挪釐減羨耳且稱撥釐之後解羨務令找清一似於釐無損而於羨且有益者一時朦混詳准豈知商人趨利隱壞鹺綱不但應找羨銀不肯找清且比上年解繳之數多寡懸絕卽如富順縣因商人不完新徵羨截續稟請將本年撥收之釐抵解本年新徵之羨一案經傳慶貽嚴批申飭責其抓抄抵

水一面詳明嚴催撥釐之款原爲彌補舊欠不准挪抵新徵今若由縣挪抵每屆新徵商人則專恃此項撥釐作抵新徵之羨必難催收舊欠更何從籌補等語可見撥釐作羨傳慶貽早已洞悉如肯卽時據實更正截然停止其時虧欠無多尙可設法彌補乃因循不改年復一年坐使國家數十萬之正供化爲烏有實爲可惜當日如果爲恤商起見但將一切陋規浮費稍加裁減已足相抵何致挪減釐羨正款如謂減羨撥釐實出於萬不得已則與其減羨二兩不如減釐二兩蓋每引減釐二兩不過二兩而止其未減之數猶可照常徵收也此釐撥收他引之羨又以此釐抵放所撥止一引之釐遂使兩引之羨並歸無着此傳慶貽續詳時所已慮及者也至於已減之羨既經抽釐填補而未減之羨亦並藉釐塘塞撥一引之釐遂使一引之羨全歸無着此則傳慶貽所未慮及者也夫羨截固屬正供而釐銀亦關軍餉同一庫款原無彼此之分何必多此周折遂至得一亡十數年之內商欠羨截積至四十餘萬兩減收之釐尙不在內鹽務積弊至於無處不壞向非奏改官運則此撥釐作羨之弊虧欠正款尙不知伊於胡底今計自開辦官運以來邊計稅羨均由官運總局核入成本照數徵收符先課後鹽之意絲毫不能拖欠而邊引應納釐金又均滴滴歸公無復挪此填彼之弊一年之中一出一入挽回正款不下十餘萬行之十年具數不下百十餘萬川省庫款盈絀卽此一端已可概見惟傳慶貽當日旣知撥釐之舉有礙正供並不據

實更正停止以致虧欠釐羨各款如是之多實難置身事外現查咸豐元年起到同治十一年未經撥釐以前應收羨截欠款容查明官欠商欠引欠分別核追外至同治十一年三月初一日以後劃撥填羨之釐一十三萬有零至今無從還款積欠羨截三十九萬有零至今亦無從徵收據該司道等造冊會詳請核前來臣查傳慶貽創爲撥釐填羨之舉名爲撥釐實係攤釐名爲填羨實係減羨事後既明知其誤又不急爲更正以致頻年羨釐兩項短收愈甚其貽誤要需傳慶貽亦無可置辨但此時若責令原辦商人每引補繳羨截二兩各州縣商人必以遵照鹽道從前定章辦理並非私自撥填爲詞藉口不補且事隔多年商人歇業死亡者亦復不少追呼實覺無益查上年官運一辦邊岸之挪抵早停現在清查已屆計岸之挪抵亦從此永禁以後別無可作弊合無仰懇 天恩准將各前道撥釐作羨之一十三萬八千八百四十餘兩照數開除毋庸飭令再補用恤商力其歷年積欠羨截銀兩仍由臣督飭新任鹽道另行設法催繳以重公項至傳慶貽辦事錯謬敗壞川省鹽法既據該司道等查明具詳何敢因其已經離省代爲隱飾惟核其情節究與扶同商人作弊者實有區別可否懇 恩從寬予以革職免議之處伏候 聖裁

擬請仍照前奏 飭部鑄頒關防疏

丁寶楨

竊臣前因川省邊岸鹽局欸鉅事繁關涉數省責任綦重奏請由部頒發銅質關防俾昭信守嗣准部咨查無辦過成案未便率准等因茲查瀘州設立官運總局已逾三載始則創辦黔省全岸嗣復添辦滇岸並將毗連滇黔之各廳州縣計岸及湖北例食川鹽計岸共四十餘廳州縣一併請入官運統計黔滇川楚四省地界均飭該總局委員設立分卡頒移文告招募商人配發引張分收稅羨嚴禁販私明定界限時有稟移鄰省督撫司道府縣互商事件案牘之煩較鹽道加至倍蓰而催提各分局稅羨勇糧公費及批解數省協餉每年共百數十萬兩途長道險關係更形重大若僅用木質關防文書通行數省地面當鹽案荒廢年久之後事多創行沿途陞驛及隔省官民不免疑信參半慮有貽誤而總局離省尙遠若每辦一事必俟移商鹽道蓋用印信則往返周折動形遲滯勢實難行數年來詳細體察該局事煩欸鉅規畫久遠現在奏銷辦三綱共收稅釐等項三百數十萬兩實爲西南數省另開大宗餉源以後但能恪守定章卽成國家久遠之利迥非尋常公局止辦一省一時之事可比不能不格外慎重況木質關防摹刻甚易行之日久難保無以僞亂真之弊似未便泥於成案致廢遠圖再四思維惟有仍照前議請旨飭下部臣鑄造銅質滿漢篆文四川辦理滇黔邊計鹽務局關防一顆頒發該局應用俾得永昭信守

現擬整頓鹽釐片

崇厚

查東三省自國初至今從未辦過鹽課其中窒礙難行之處節經歷任將軍奏明在案所以同治六年原任將軍都興阿因力籌練餉奏請辦鹽釐亦未議及鹽課今若按照各省配引徵課誠如聖諭奉省鹽斤向未徵收稅課創辦恐亦不易飭令體察情形奴才悉心籌畫當此練兵籌餉之時雖不能遽辦鹽課亦必須整頓鹽釐查東三省及蒙古各王旗所有食鹽均仰給於奉省沿海各鹽灘是奉省產鹽不爲不多銷鹽亦不爲不廣第創辦之始立法本未周密以致日久弊生偷漏侵漁均所不免且原定鹽釐數目太微計鹽六百斤爲一石抽收東錢一吊文現以省城時價而論每石係售東錢十四吊四百文即使酌量加釐不致有礙民食當經奴才崇厚遴委委員前赴各灘逐細詳查酌核擬議現於省城設立籌餉總局並派旗民各員分往產鹽各州縣設局整理每鹽一石抽收東錢二吊四百文仍以八成充公二成作爲局員薪水以及灘長書手局丁巡役工食並心紅紙張一切之需並准灘戶每石加價東錢六百文以恤商力雖較之原定數目不無加增而核計每鹽一斤所收鹽釐仍不及制錢一文似此酌量變通於練餉既少有裨益卽鹽價亦不至驟昂惟從前雖有每石六百斤之說均係私斗私秤每石加至八九百斤不等實不均平現擬仍照原定六百斤爲一石之數頒給官斗責成斗紀於售鹽時按斗過量免滋流弊至嚴杜偷漏等事現已設立三連鹽票蓋用奉天總督關防發交局員無論何項買鹽人等均令到

局領票照數抽釐方准持票赴灘買鹽並遴派得力員弁帶兵巡查倘或無票運鹽及鹽票相離者一經查出卽照私鹽辦理並令各灘戶公舉灘長以便隨時驗票發鹽及按季將時價公議報官定明以免任意低昂藉昭公允現擬議章程派員試辦尙須隨時體察情形酌度定議應俟辦有成數再行報部查核以立定章而垂經久

遼海權鹽私議

胡傳

鹽筴之謹始於管子歷代因之遂爲理財之大政我朝每歲財賦所入鹽課尤爲大宗軍興以來天下產鹽之省抽釐助餉莫不沛然而有餘鹽之利軍國豈淺鮮哉然天下產鹽之省如直隸山東山西兩淮兩浙四川閩廣莫不有課惟奉天沿海各州縣處處產鹽未嘗有課非遼海之鹽不可權也金時上京東北二路食肇州鹽速頻路食海鹽皆征其稅元時北京路徵收遼陽鹽課立隨車隨引載鹽之法史有明文我朝以東三省爲湯沐邑世世無所與所以恤旂民培根本也然吉林黑龍江之旂兵往者以精銳聞天下咸豐以後積弱不振俄羅斯無故敗盟要割我黑龍江以北烏蘇里江以東數千里之地不敢與校遂拱手而畀之甚且地方盜賊竊發亦不能勦捕其故何哉東三省賦稅少兵餉皆給於京師咸豐間內地兵事日亟軍需浩繁戶部之帑不能如額以給東三省兵丁乏餉饑疲虛弱故遂不復可恃同治

以後內地之寇漸平於是加練餉以禦盜近年俄患迫切奉天設防則食河南之餉吉林設防則食戶部之餉黑龍江爲吉林北方屏蔽地尤緊要以餉無所出至今尙未設防夫東三省爲國家根本重地苟有外患卽竭天下之財力以爭之朝廷固亦不惜然必海宇昇平中原無事內地各行省之賦稅以時貢於戶部而後戶部有帑以給東三省萬一內地用兵戶部乏帑則咸豐間之覆轍奉吉現設之防兵必復蹈之此事勢之顯而易見者也近年地方當事大員有鑒於此孳孳汲汲招民開墾間荒搜求百貨釐稅皆欲就地籌餉以給軍食而獨不知權鹽譬以一杯水救一車薪之火其無濟於用也明矣夫山澤之利莫大於鹽古之善理財者莫如劉晏其爲鹽鐵使也初年歲入纔四十餘萬緡至大厯末六百餘萬緡天下之賦鹽利居半夫晏之權鹽豈有他術哉加稅而已矣考唐時鹽價天寶至德間鹽斗價只十錢晏領鹽鐵使時已加稅十倍每斗爲錢一百一十故經理得法一歲能增五百餘萬緡之多近時曾文正公之權淮鹽六百觔爲一引自淮南運至湖廣其初每引抽釐銀十兩三錢其後減定章程每引抽釐銀六兩三錢夫以六百觔之鹽而抽釐銀十兩三錢是民間食鹽一觔官收稅銀一分六釐有奇後減至一分有奇也今奉天沿海各州縣之鹽市價每觔不過制錢二文誠能遠倣劉晏之法近援曾文正公權鹽之例奏請朝廷設官於產鹽之地以制錢二文收買遼鹽加釐課錢十八文每觔爲錢二十以鬻於商縱

其所之遼東之鹽運往承德以東南內地各廳州及吉林黑龍江等處遼西之鹽由錦義運往蒙古各部落引地甚廣銷路必暢如每月能銷鹽百萬觔便可得釐課錢一萬八千千每月能銷鹽千萬觔便可得釐課錢一十八萬千惟遼海之鹽以助奉吉黑設防之用使三省通力合作軍儲饒裕邊防益固永紓

朝廷東北之憂匡時急務似莫切於此矣第我朝自開國以來遼海之鹽未嘗有課民情難以圖始士大夫溺於政尙寬大之說視國計之盈絀如秦人視越人之肥瘠漠然不關喜戚於其心聞權鹽之議必將斥爲苛政詆爲剝民恣騰謗譴冀阻其事或模稜兩可請少加釐稅先行試辦者此皆迂疎之談不知利害之輕重者也奉吉現雖設防常有地闊兵單之慮黑龍江尙未設防宜切綢繆未雨之思一旦有警欲分防則無兵欲添兵則無餉皆意中事也其宜就地籌添鉅款以厚兵力不可緩也自今海宇昇平中原無事朝廷之財力尙難兼顧吉黑廣設邊防如內地有變俄夷亦乘機竊發當此之時中邊交警餉必益絀軍必虞饑亦意中事也其宜就地籌添鉅款以蓄邊儲尤不可緩也此利害之在軍國者也民間食鹽每人每月不過一觔以每觔加釐課錢十八文計之每人每歲不過多出錢二百一十六文民雖甚貧易爲力也湖廣江西安徽之食淮南鹽市價每斤制錢六七十文遼鹽現運吉林市價每斤十五六文運於甯古塔市價每斤二十三四文縱加釐課錢每斤十八文其價尙輕於湖廣等處十之五十之

三也此利害之在閭閻者也東三省旗地無賦民地之賦輕於東南各省數倍十數倍不等而東南鹽之價又重取東南之財以供東三省之餉二百餘年矣未聞東南之民怨及朝廷以爲苛虐也東三省之民沐朝廷之深仁厚澤二百餘年而不知感激圖報吝此鹽釐不亦自同化外哉凡事兩利相較當取其重兩害相較當取其輕居今日而爲東三省深謀遠慮非就地急籌鉅款無濟於事然則遼鹽之權卽援准引初章以定稅則亦不爲過況從輕則哉如慮釐課旣加官價較重小民嗜利販私者衆縱之則虧課嚴緝廣捕則糜費辦理不善正課所入仍不能多則清查各場每日產鹽若干盡數官爲收買使民間無從得私以清其源如慮立法之始商販恐官鹽價重難以出售或裹足不前則倣劉晏常平鹽之遺意及近時各省官運官銷之成案先行官運民間不能淡食不得不市官鹽數月以後價值畫一官鹽通行商販亦可不招而自至遼鹽章程旣定吉之琿春三姓黑之艾輝鹽有從俄界來者照各國通商不准帶鹽條約杜其入境可也因地制宜設卡抽收釐稅亦可也要在當事之人主持大計實力舉行以爲東三省濬莫大之餉源而不爲浮議所搖耳

是議作於光緒七年冬月其時遼鹽每車已加稅東錢兩吊四百文其後每車復加稅兩吊四百按東錢一吊僅得制錢一百六十文合前後兩次加稅并鹽本計之每鹽一斤已值制錢二文半矣

自記

川引斤兩過重請

飭部減川配淮疏

光緒七年

兩江總督

劉坤一

竊淮南鹽務額重課煩鹽產自場引銷於岸全楚引地爲淮綱命脉所繫前督臣如曾國藩沈葆楨于淮
鹽討論最精著有成效屢次上疏請禁川復淮終梗於川楚迄今未行上年十一月臣接准部咨議覆四
川督臣丁寶楨將濟楚川鹽按月酌定七八百引並以減運川鹽徐圖退步卽當增運淮鹽力爭進步令
照湖廣督臣李瀚章原議由淮商提取淨鹽酌配引數運赴鄂省現分川銷之五府一州試辦並銷限一
個月專摺覆奏等因臣查川鹽借銷楚岸曩時連檣下駛累萬盈千漫無稽考今既定以限制足爲復淮
張本惟治鹽以疏引爲先而疏引以籌銷爲急川淮同此銷路必須川鹽能減一分始淮鹽能進一分否
則徒有減川之名而無銷淮之實當經咨商鄂省擬由淮南派員前赴平善壩設立稽查川鹽局每月除
額銷川引外餘均作爲私論以符部議嚴杜明減暗增之弊一面咨詢川省月銷川鹽七八百引是否照
淮南六百斤成引計算抑川省另有科則滿冀川鹽觔兩與淮鹽不相上下便可提鹽配銷卽或贏於淮
南但使所贏之數不甚過多亦尙能逐漸進步茲准四川督臣丁寶楨覆稱川省 奏定章程每水一張
配花鹽五十包每包連皮計重二百二十六觔每引連皮共重一萬一千三百觔等因以淮鹽每引連漚
耗包索六百八十八觔計之是川鹽一引抵淮鹽十六引四分有奇月銷川鹽卽以七百引而論已抵淮

鹽一萬一千四百九十餘引每年共抵十三萬七千餘引川鹽一引較之淮鹽一引增至十六倍有餘無怪淮商聞風裹足溯查湖北五府一州從前皆言每年可增淮鹽十五萬引係按六百觔正引計算臣連涵耗包索細加覆核並確查宜昌川鹽總局歷年呈報加稅數目衰旺不一大致相同光緒六年分僅合淮鹽十三萬三千餘引川省減定之數比實銷之數已屬有盈況繞越偷漏之弊尤難保其必無五府一州祇此銷路已盡被川鹽所占淮鹽雖煞費經營既不獲盈尺之地焉能圖得寸之功卽甘心虧本亦無路可銷此數年以來所以絕無一商認運也部臣謂其中必有窒礙難行之處可謂洞見癥結但楚岸引地上年臣莅兩江後卽派員前赴鄂省與李瀚章詳細熟商一時仍難遽復而淮南場產日增岸鹽日積若并此配銷亦不能辦不特無以慰衆商雲霓之望並有負李瀚章代淮籌運之初心丁寶楨抑川續淮之美意臣督同運司悉心妥籌淮南目前未敢遽存奢望但求每年實減川引若干淮鹽得有銷路無論路途之險成本之重總當責成鄂湘兩局額內各商力任其難酌提淨鹽前赴鄂省五府一州及湘省澧州試銷此項試銷之引李瀚章原議雖令暫免攤派而川引既減鄂省月收川稅未免稍絀且李瀚章來文業已允准設局所收前項課釐不敢留存絲毫擬卽全貼鄂餉儘收儘解庶幾川商不致驟行失業淮鹽或可循序漸進鄂省餉需仍歸有著合無仰懇 天恩 敕部查照楚省每年可銷川鹽合淮實數重

加釐訂酌減川引若干配銷淮引若干行知各省恪遵部議和衷會辦以仰副 朝廷鄭重淮綱漸復舊規之至意

遵查部議指詢各節據實覆陳疏

光緒七年

劉坤一

竊准部咨議覆給事中戈靖條陳淮南鹽務指詢各節行令詳查覆奏等因臣伏查兩淮鹽務甲於天下每年數百萬兩餉源每場數千垣命脈胥是賴焉果有當除之弊可興之利臣亦何敢畏難苟安惟淮鹽新章行之近二十年所收課釐逾六千萬歷次所捐鉅款尙未在内而各商猶復黽勉從事以有餘潤可沾其裨益於公私不得謂非辦有成效就臣歷官兼管鹽務之處淮鹽似較勝一籌該給事中竟稱鹽務之壞以兩淮爲最甚立論殊欠持平兩月以來經臣督飭運司洪汝奎諮採輿情詳稽案卷始知人言之有由來而所陳多不足信部議洞若觀火實令外間官商佩服不忘除減川配淮業由臣專摺具奏外其餘不外增新引包鄂餉疏岸銷裁捐費四端謹就岸務商情悉心參酌爲 皇太后 皇上縷晰陳之治鹺無他專重銷之一字銷果暢商雖少而轉運亦靈銷若疲商愈多而出售彌滯此一定不易之理而官銷之暢滯則視私鹽之多少淮南自被川鹽久占鄂湘引地徧地皆私漫無稽考該給事中原奏亦謂川私山積淮南以現有之商運已認之引抵岸後已須守輪一年或半年之久查鄂岸現在請運丁丑上半年

年之引湘岸現尙請運丙子上半年之引而兩局已存鹽各十餘萬儀棧且有十七萬餘引之多上倉有費住日有費辛工官息又有費成本占擱乏術疏通舊引之積壓如此若再另增新引其敗可立而待譬之治水不問去路之通塞而專事濬源終虞決口治病不問病人虛實而漫言峻補必致傷身部臣不遽頒引而又許將窒礙情形據實陳覆可謂洞見癥結此新引斷難驟增之實情也包餉之議創自前督臣沈葆楨原奏許儘鄂湘原認之引永遠循環不再另招新商以撓其權而奪其利舊商所得足償所失故人人踴躍具結乃至取結達部其確有把握可知臣抵任後該舊商猶復稟催並無異說現在復淮尙無定局將來應否增引增商亦難懸揣今昔情形既不相同辦法不能膠執臣愚以爲鄂中不以引地歸淮則已果以引地歸淮無論舊引新引舊商新商鄂餉斷可無虞短絀蓋銷川鹽則完川稅銷淮鹽則完淮釐但使鹽有去路卽是餉有來源鄂中每歲所收川稅以錢合銀均在九十萬兩左右有案可稽如以淮商包餉爲不足憑式將鄂省向在川稅項下籌解京外各餉奏請改撥兩淮由臣督同運司妥籌解濟鄂餉旣歸有著卽復淮應亦有成一轉移間鄂淮皆無所用其推諉至於入境川釐旣停之後到岸川鹽未盡之先所需鄂餉淮商自應兼顧應俟復淮定議由臣咨商楚督並飭司局設法籌維不至因此貽誤此包餉係屬可靠之實情也課釐之盈虧惟視銷數之旺淡當此度支拮据首宜講求疏銷然查兩淮鹽色

不如川粵之佳價不如川粵之賤疏銷之法惟在緝私自湖北之荊宜等府州及湖南之澧州借銷川鹽兩省門戶盡失在在巡緝爲難即使隨處設局督銷恐亦徒糜經費他如湖南之衡永寶三府方爲粵私所佔浸灌以下府州前督臣曾國藩與臣籍隸湖南明知該三府戶口數百萬准鹽片引不行而未嘗委員前往設局督銷者以該處山路紛歧民情困苦緝私不能嚴密設局亦屬徒勞祇合留爲籬籬以存限制至江西爲臣久宦之區深悉粵鹽一入贛寧四通八達堵截無從與湘鄂情形大略相似皆因私鹽多而官引不行非爲官引少而私鹽始至否則卽無官局商販自可行銷該給事中謂鄂西不多設局分銷以致停滯者非也上年綜核各岸銷數惟皖岸與前屆不相上下其湘鄂西三岸均屬短銷而湘岸爲甚該給事中謂湘岸溢銷至倍爲鄂岸所不及者亦非也夫鹽務貴變通盡利尤貴斟酌合宜以兩淮引地久爲湘鄂所占以致淮引滯銷詎可不圖規復然非步步踏實必至有始無終有損無益現在湘鄂西三岸兢兢保守腹地各府州不使私鹽攙入而於積慣行私之處逐漸經營以冀得尺則尺得寸則寸臣復督同運司力行重淋之法務期鹽色乾潔以敵川粵私鹽而於局卡文武督緝之勤惰廉污分別撤留賞罰並添撥水陸精銳之勇以壯聲威凡此目前整頓之方卽爲將來擴充之計至於淹銷一節實爲鹽務一大弊端然自曾國藩設立章程課輕釐重不特補運之鹽令完全釐卽被淹之鹽亦完半釐已屬無可

取巧又須州縣履勘出結商人亦憚煩難臣嚴飭各局於報淹可疑之案立派親信密查以杜虛捏此則疏銷不敢稍懈之實情也派捐最屬病商當此陳鹽滯積積困未紓誠如部議必須休養商人以期漸復元氣臣接據各商開呈清摺臚列現捐名目分札司棧各局務將一切冗費分別酌裁其中以局用爲大宗鄂西等岸所以不欲多設分局者以此餘則在局候委各員薪水爲款亦鉅臣通飭各局以後不得多收委員卽係熟悉差務堪備差遣之員亦必遇有缺出方准派委至於地方善舉必須察酌事宜量予限制不得一味覓好濫應濫支此浮費現在裁汰之實情也臣查兩淮鹽務近來口舌紛紜無非爲改章加引起見歷考曩時鹽法屢蹶屢振初立一章無不爭先恐後不數年而良規中廢大率前鹽甫暢後引遞增以爲引增卽課充多多益善不思增引而不增銷年復一年積疲成困百病從此而生乾隆嘉慶年間屢有統銷帶徵之奏無非爲積引難銷力圖補救究之挪新掩舊挹彼注茲於課項有何裨益前督臣陶澍創行淮北票鹽意美法良初行盡善厥後加引至四十六萬不特淮北銷疲甚至侵銷淮南邊界而南鹺至道光末年幾於不可收拾前事之失可爲殷鑒曾國藩初定新章之際設局招商迫商認之引足符岸銷遂有撤局停招與李鴻章商定循環轉運之法嗣增湖南辰州碱鹽二十四票輾轉不清久之始定又以協賑天津楚西加引四萬岸商漸形支絀曾國藩頗歉於懷經前督臣李宗羲奏明有案以後從無

增引之事至今楚西各岸銷數雖滯而守輪待售尙有什一之獲各商恃爲恒業局外欲撓越而無從逐逐耽耽乃爲把持壟斷之說以撼舊商而請新引甚至本無辦運之資亦無力運之志欲以新引轉賣漁利始於運司繼於鹽政終於戶部撫拾浮言更端嘗試光緒三年曾有商民信成和等赴部遞呈請增楚引十萬道捐銀四十萬兩淮南奉文日久並無一商來淮一錢繳庫經沈葆楨奏駁在案茲由該給事中奏請由部頒引可見伎倆層出不窮祇知圖利營私不顧攪亂鹺政臣聞此次若輩併力一舉事在必行幸荷 聖明燭照如神部臣維持大體淮綱賴以保全否則大局一爲動搖不堪設想矣臣職有專司責無旁貸深知曾國藩所定鹽法一秉至公歷久不敝故各前任莫不恪守舊章今該給事中以收引地加引票責臣不知二者可合而不可分如以荆澧等六府之地歸入兩淮或可酌增新引至於現在引地於現行引票尙未全銷安得再增以速其敗臣之區區但期裕課不敢存彼我之私但欲便民不敢有恩怨之見然復淮與增引則事在並行能復引地不必如沈葆楨所奏不增新引欲增新引則必如沈葆楨所請收回引地此外成規具在斷不可輕涉紛更臣惟有督飭運司維持整頓以冀銷路日暢仰慰 朝廷重念鹺政之盛心

爲黔滇官運局還清原借帑項及四綱支存各款作爲運本疏

丁寶楨

竊查黔滇官運局自光緒三年開辦後借撥藩庫銀五十萬兩嗣山東解到借款銀八萬兩當由司庫扣收銀七萬七千兩總計官運局祇領到本省借撥鹽本銀五十萬三千兩原議分作八年歸還前經奏報在案茲據官運局新授雲南藩司唐炯詳查官運局前借本省東省鹽本銀兩已於光緒四年還過司庫銀六萬兩五年還過銀十二萬七千兩七年還過銀十五萬兩本年還過銀九萬三千兩共計解還過司庫銀四十二萬三千兩又六年還過東省銀二萬兩七年還過銀二萬兩本年還過銀四萬兩共計解還過東省銀八萬兩所有官運局原借本省東省銀五十萬三千兩均已悉數還清至丁戊己庚四綱徵收稅羨截釐各正款銀兩除每年撥解滇黔兩省協解抵捐及北洋鐵甲船價總共銀八十六萬四千七百五十兩外實存銀一百八十九萬四千七百七十七兩九錢零均經發廠購鹽分運各岸引銷惟查每綱額引邊計各引並帶銷積引約共計引三萬道每配一引鹽價水腳須一百數十兩不等以三萬引而計約須銀五百餘萬兩總局鹽本向係隨發隨收邊岸途遙每年僅可周轉一次計岸則可周轉二三次通計每綱各岸局所解亦約有五百餘萬足敷購運固可無庸加多實亦不能減少辛巳綱以後所收正款除撥解滇黔兩省銀二十五萬一千兩奉撥接濟藏中公費銀一萬二千兩現又奉撥滇餉銀二十萬兩尚可餘銀二十餘萬兩應請將此款銀一百八十九萬四千七百七十七兩九錢零永遠存留局中作爲

運本嗣後所收稅羨截釐各款除撥解滇黔兩省外每年支存餘款應存儲聽候撥用卽自光緒元年爲始按年照辦再山東解到借款銀八萬兩當由藩庫扣收銀七萬七千兩仍係在五十萬之內未經列入撥用以免重複牽混等情詳請奏咨立案前來臣查官運局撥借本省東省帑本原議分作八年歸還現計四年之間卽將所借原本悉數還清是該局此後卽無官本而鹽局仍須購運以利疏銷所有丁戊己庚四綱徵存正雜各款銀一百八十九萬四千七百七十七兩九錢零自應永遠存留在局作爲運本以資購運而裕徵收其自本年辛巳綱以後所收稅羨截釐各款應妥爲存儲以備指撥而重帑項於鹽務庫儲兩有裨益

兩淮議減濟楚川鹽引張事多窒礙難行疏

光緒八年

湖北巡撫

彭祖賢

竊兩江督臣左宗棠擬規復淮南引地禁止川鹽入楚一案前經臣祖賢於兼署督篆任內縷晰奏明欽奉諭旨令臣等悉心會商妥議具奏等因當經恭錄咨行欽遵辦理卽准兩江督臣左宗棠咨以四川既允每月酌減一二百引以讓淮銷自應以川鹽減退之處爲淮鹽漸進之處至湖北徵收釐稅本由湖北專主或仍照舊章或請交戶部酌議兩淮鹽政毋庸參豫等因經臣宗瀛以減川增淮必應遵照部議先由兩江咨四川督臣查封井數按引計並如何酌立限期每月減運若干引議定所減實在數目咨鄂

備查方可照辦然川鹽既經減運則湖北短收釐課爲數甚鉅凡奉撥京協各餉以及本省滿營水路防軍各口糧向來取給于川課者驟少此欸貽誤堪虞鄂省歲入丁漕釐稅皆各省一定出欸別無生財之道若謂准引可以加抽鄂釐而鹽觔能否暢銷尙難預計餉項必致虛懸不得不請兩淮籌撥的餉按照鄂省減收川鹽數目照章包貼解濟要需咨請核示並將引銷川鹽寔有益於國計民生情形詳細聲叙於九月初一日咨覆續准督臣左宗棠咨以准四川總督咨四川惟有每月減二百引之一法舍此無可再議查鄂省應議之處以餉項緝私二事爲重川鹽入楚抽釐歲入鉅欸若驟然議止無以應部撥協餉各項本係實在情形查四川擬減濟楚川鹽每月二百引照鄂章每觔抽釐錢十八文計算湖北每年應短收釐錢四十八萬八千一百六十千文約合銀三十萬兩但准加引湖北亦有坐抽釐稅銀兩此次擬於四川減二百引減至十二個月止由各局核算湖北於收獲准鹽釐稅若干除去此數再由湖北較上屆抽收川稅實短若干由兩淮補解足數此後四川每年再減若干引卽照此辦理至鹽務以疏銷爲貴疏銷以緝私爲先川鹽入楚之平善壩一處擬設局稽查樊城沙市各要地擬添設督銷緝私局武漢各屬應由兩江添撥勇丁協同湖北嚴緝應請查照核覆等因復經臣等會同商酌細加體察當以四川雖有每月允減二百引之說但煎鹽井數曾否查明封禁並未議及伏查前奉部議減運之法必須先由川

督查封井數按引計煎煎有定數而復運之源清今不限其煎運第恃四川減剩六百引之說爲憑限其銷數則限外之鹽勢必盡化爲私等語此乃洞燭隱微誠爲破的之論今不與川省議定煎運數而先議設局緝私是則不清其源而欲絕其流事多窒礙難行仍請咨商四川查明井灶能否封禁每月煎運濟楚鹽觔實計若干引咨鄂備查方免私梟充斥之患然後減引之舉鄂省方可照辦宜昌川鹽釐課爲鄂餉大宗中外皆知茲承代爲籌及感紉無既惟湖北取給於川釐各項要餉均係按月撥解不能稍遲時日今議四川月減二百引則宜局卽短收二百引之課錢若俟減至十二個月止再行比較上屆收數實短若干始由兩淮補解則此年內每月應解應給各項緊餉先已貽誤咎將誰歸此係鄂中全局所關實不敢輕諾者也至所商設局督銷緝私各節應請統俟四川封井減引定有準數兩淮包貼鄂餉議有的實款項再當會議辦理等因於九月初十日會銜咨覆在案乃十一日忽接督臣左宗棠咨開濟楚川鹽旣准減二百引應請自本年十月起每月抵運六百引一年之後再減二百引每月抵運四百引以後每年每月照減二百引至第四年止截清濟楚川鹽除行湖南北督銷局宜昌掣驗局查照辦理並咨覆四川總督暨會銜具奏外相應咨明查照等因前來臣披閱之餘不勝詫異伏讀欽奉光緒八年四月二十七日 寄諭川鹽濟楚行之已久此時議復准引固爲規復舊制起見等因欽此仰見 聖主明鑑萬里

欽佩莫名是此事必須三省會商意見胥同始能定議卽以減引而論亦必先由四川查明灶井立限封禁按數煎運方無流弊今督臣左宗棠既不查照部章咨商四川封井限煎又不候臣等咨覆而于鄂省餉項要需亦尙未確籌遽定以本年十月起按年減運似此操之過蹙無論鄂省餉源所關萬難照辦卽四川商民未見出示曉諭亦必羣相驚疑不肯遵行若強令每月祇運六百引則未運之鹽勢必盡化爲私縱使在於湖北平善壩設局派兵堵緝而巫峽水流鹽船順流下駛瞬息百里人力難施兵少則力不能制多則又恐激成事端淮鹽能否暢銷事未可必而地方已先受其害此尤不可不防總之欲減川引非先從川省按引計煎不可川引既減非兩淮包貼鄂餉不可左宗棠此次來咨臣等再四籌商諸多窒礙實難輕允抑臣等更有請者查淮鹽舊章以六百觔爲一引每引收場地錢糧及課釐共銀六兩九錢有奇川鹽入楚每觔收釐課錢十八文照鹽淮六百觔一引計算每引收錢十千零八百文以錢合銀六兩二錢六分四釐加以川省每引收銀三兩零六分一釐二毫兩省併計每鹽六百觔共收銀九兩三錢二分五釐三毫湖南花畹岡所收隣稅尙不在內兩相比較淮鹽一引較川鹽一引實少收銀二兩七分有奇是銷川誠有益於國計者也且兩湖安襄鄖荆宜五府及荆澧二州居民食慣川鹽誠以川鹽味鮮質美一觔約抵淮鹽兩觔之用淮鹽色味俱劣故皆不願買食小民好惡本有恒情勢難以日用細故

強所不欲若竟勒令舍川就淮必致閭閻騷擾民怨沸騰是銷川亦有益於民生者也今若減川增淮不特下拂輿情抑且上虧國帑徒爭引地之虛名輕棄有著之實餉通盤籌畫似屬不值惟有仰懇天恩飭下左宗棠循照向章將各場提淨之鹽酌配引數運赴襄鄖等五府二州與川鹽一體行銷暫免繳釐不准在武漢黃德一帶私行灑賣致侵正引淮鹽果能講求煎鍊色白味佳其價較川鹽爲輕民間自必樂於買食川鹽價高難與相敵自可漸推漸廣川鹽將不禁而自絕矣卽或必欲議減川引亦應遵照部議先咨四川查封井灶限定煎運觔數咨鄂備查一面將鄂省短收川課卽由兩淮籌備的餉按月如數撥解濟用再由臣等體察情形辦理緝私庶幾餉需不致貽誤商民亦可相安楚省幸甚

鹽務積弊太深宜妥籌良法疏

桂霖

竊維度支所入地丁而外鹽課實爲大宗朝廷不惜繁費設官置吏督課緝奸良以大帑所關期於國計有裨民生無擾而已自軍興以後綱紊商疲國課虧敝近年各省鹽政諸臣雖力求整頓而口岸慘轆梟匪搶攘大吏各持己見成效半屬空談及今若不亟思變通則積弊相沿不獨維正之供日削且恐隱患所伏有不可勝言者謹就管見所及敬爲皇太后皇上陳之夫私鹽之禁法綦重矣然奸宄之徒之敢於抗明禁冒嚴法出死命而爲之者以獲利多也私販之所以獲利者以售價賤也私鹽何以

賤無官府之冗費也無吏胥之蠹蝕也取直輕而銷路易卽民間買食者亦多不利於官而利於私敝壞至此雖日執嚴刑峻法以督繩之無益也然則欲挾其弊道將奚由若悉裁鹽務之官仿唐臣第五琦劉晏之法就山海井竈出鹽之地置官收鹽轉鬻於商任其所之官不過問惟盜鬻者論以法其去鹽鄉較遠之地則轉官鹽於彼以待不時之需或商絕鹽貴則減價糶之使鹽價常得其平官民兩收其益無官私之雜糅無引岸之糾紛民食各就所宜商販各安其業地無遺力人無倖心私梟之輩亦何樂於抗明禁冒嚴法出死命而爲之乎如是則國課豐收一善也匪徒解散二善也利歸實際患弭無形豈非方今之亟務哉昔劉晏之權鹽也初歲入錢六十萬緡末年所入乃逾十倍而人不厭苦天下之賦鹽利居其大半宮闈服御軍餉官祿皆取給焉鹽法之善無以易此奴才亦知財利之說聖朝不取更張之舉事所難行然以國計所關民生所繫至愚一得不敢不詳細披陳可否飭下戶部通盤籌畫核議施行

粵省潮橋鹽務廢弛擬委潮郡守兼辦片

兩廣總督 張之洞

兩廣鹽運分司運同錢晉糊塗濫用欠課甚鉅前經臣之洞奏奉諭旨暫行革職留任勒限運銷在案茲據署廣東布政使蕭韶署兩廣鹽運使蔣澤春詳稱潮橋運同一缺引地行銷廣東之潮州嘉應福

建之汀州江西之贛州甯都地聯三省路隔千數百里額引八百二十一程場課餉項二十三萬有奇自咸豐同治年間各省匪擾引地疲壞埠商倒歇每年 奏銷約在七成以上其銷路有大河小河之分行潮嘉汀州者爲大河行贛甯者爲小河大河官代商辦小河商仍準舊官辦者曬價運腳悉出於官無重資不能周轉商辦者運腳舊商曬價由官亦非重資不能接濟每年旺銷全在於冬魚鹽菜鹽百倍口食全在資本充裕於春秋天氣朗晴之時將一年冬銷預爲曬儲官運商運源源往來若旣無餘資又貸重息不及冬季場埠以少存鹽魚菜大宗半飽私販且船戶不加鼓舞挑販無術招徠亦難一律疏暢流通往來鹽務盛時運同印票商號極爲珍貴以故借易息輕運速課足十數年來銷之七成有餘已形竭蹶至該運同錢晉不諳綜核又多耗累因其虧欠日鉅商號益復不肯通挪以致運到無費曬則無本雖有可銷之略亦無可售之鹽現查該運同自 奏參勒限以後僅將六年分 奏銷正餉解足其七年課餉甫經破白未完尙多似此疲累日深必致虧帑無底應請將錢晉撤任勒限嚴追照例參辦惟揀員接署實難其人各鹽員深知此時難於措手無不視爲畏途竊思此時欲籌補救之方惟有令潮州府知府兼署運同則曬價運腳尙能籌墊巡丁船戶呼應亦靈必能自顧考成力清課項查潮州府知府朱丙壽公事穩練情形熟悉於上年八月委令協同該運同籌運督銷尙能悉心考求陸續催解應卽委該府朱丙

壽兼署潮州鹽運分司運同責令將以前滯引設法疏銷並飭查明錢晉任內有無徵課未解及存鹽未銷詳覆核辦應免潮橋課餉愈久愈誤等情詳請具奏前來臣等查潮橋分司爲粵鹽課餉之大枝其官商兼運章程於通綱大例之外自爲風氣去省遙遠亦非運目之所能代課大率鹽之曬運皆責於官銷之旺歉惟視乎資本近年以來官本久未充裕加以錢晉之昏庸疲玩虧欠尤多若僅將該員叅追而不另籌一變通之策必致潮綱大壞不可收拾雖任任叅追無益於課該司等議令潮州府兼辦實爲因時補救之宜除檄飭遵照分別撤任嚴追督飭籌銷外謹合詞附片具奏

致陳孝廉

喬森書

徐廣陞

天下之大利莫溥於鹽州縣之撫民莫大乎養孝經因地之利以順天下書曰資富能訓聖人策衛必富庶而後教古今循吏必從事於水利農田訟獄刑罰抑末矣廣陞謬攝縣事年餘矣竊見四鄉羣盜如毛動陷刑法細察其故一由於民貧一由於士少民貧則愛生之念輕士少則濡染之習壞然而讀書人少要皆因乎民貧是非廣開利源終無以培原固本統一邑論之資漁者十四資農者十六從前產穀頗饒足以接濟鄰郡近則出口漸少農病矣猶賴花生積薯以補之然地皆坡嶺並無河渠雨水常滋尙有利益亢陽二十日赤地無餘人人作信天翁何可恃也然興水利於康熙乾嘉之際國帑饒富得大吏一

言籲懇 恩綽遂來其勢易迄今軍興之餘部司無蓄萬無上請 國帑之理而籌諸貧瘠之民興此大役無論以爲厲己也卽各踴躍輸將亦屬纖悉無濟實用此水利之難復者也至於採海之徒刀劍以嬉爭鬥素習好勇疾貧之事已覺可虞況有以採海爲名以劫掠爲實乎惟鹽田便民通商其利最溥東海業鹽者亦有數村然不敢公然販售並無巨賈遠來一遇盤查則船鹽兩失商埠挾以行私必賤價以收買兵役挾以搜利必索費以放行其事旣私其行不廣不然電白水東諸大埠景物華好檣帆如雲何以東山一墟蕭索若此鄙意地呈其寶所當因以富民今擬通稟上游准令沿海人戶有願開墾鹽田報官立案所出之鹽准其運赴省河暨別埠銷售與別埠官鹽一體交餉並准各商到地採買價值比照電博兩場如果此利一開採捕勞而曬鹽逸居民競趨乎鹽則業漁者少而海盜亦稀利一東山爲商賈往來有市舶之利則民間可備船工可作擔夫消無數之游惰利二市埠旣開則銀錢流通生理亦因起色利三旣作官鹽百姓可無兵役之擾累而價值亦得多增利四舉數十里之間歲可獲數萬之銀錢以資補苴民戶漸可豐盈利五有此五利實足以轉瘠爲饒然須地方之人有倡率以開其先者則民趨若鶩不煩誥誡而自來矣但利之所在弊亦滋焉尤必須計久遠防遠害以免民困乃可大而可久閣下生長於斯曾亦熟籌之而有說否願賜教焉至官中如何稟陳試辦如何隱恤民艱如何力杜流弊弟雖不敏敢

自任之幸乞條議以示



皇朝經世文續編卷四十七目錄

戶政二十四

權酷

罷關征議

馮桂芬

重酒酷議

馮桂芬

酒課考

陸心源

南宋浙江酒課考

陸心源

召見恭紀

吳廷棟

請禁直境燒鍋片

李鴻章

請將臺屬各項雜餉分別豁除疏

丁日昌

會商整頓關務疏

穆圖善

會查稅課酌擬章程疏

慶裕

酌擬崇文門稅務章程疏

寶鋆

查明梧關病商實情並釐剔一切弊端疏

張之洞

請飭禁抽收賭款疏

補疏一四

鄧承修

湖南文門

湖南

廣東

廣東

貴州

貴州

貴州

丁日昌

貴州

老

貴州

貴州

廣東

廣東

廣東

廣東

廣東

廣東

廣東

廣東

廣東

廣東

廣東

皇朝經世文續編卷四十七

上海葛士濬子源輯

戶政二十四

權酷

罷關征議

馮桂芬

諺云關無善政今驗之而信過而不留散而無紀主關者不能一一臨視之也卽能之而丈量之不諳貨值之不別隱匿轉換之不可知雖視猶不視也於是乎寄耳目於一切之人自儉從而吏胥而差役而拉繹人等商吏不相識其居閒人曰拉繹千百輩之身家妻子攢食於一關矣聞粵海故事司關二人月支薪水各八百兩籤押四人半之餘執事及各小口長隨以千數有差此固非他關所有然浮費之多莫甚於關亦可想見至完稅之法試以所聞潯墅關一端言之運米百石者關吏教之報三十石驗過則云實米四十石應倍罰作八十石仍少完二十石若實報百石所費且不止百石其弊如此大抵田賦之數民之所出者二三而國之所入者一關稅之數民之所出者十而國之所入者一然而州縣浮收往往滋事而關稅則否者農心齊商心不齊也農不可他適不可從業商可他適可從業也農不能增其穫以償賦商能增其價以償稅也農之所謂二三耆多加乎一之外商之所謂十者不甚加乎一之外也故關之弊不甚病商而轉

以蠹 國承平既久生齒益繁需用益多通商益廣以理言之關稅宜倍增乃數十年來徵數日絀虧空

日多轉不及曩時所定戶工二部四百六十萬之額通商各口在外其咎安在嘗閱英國財賦志略咸豐二年歲

入四千八百餘萬內關稅一千八百餘萬又云六年歲入七千餘萬不言關稅若干一通事云七千餘萬

中關稅之增最多夫彼國通商增廣固不止中華而中華實大宗彼增而我無增不惟無增而且益減何

哉不實徵不實解也夫彼之能實徵實解者吾見之江海關矣貨物進口彼鬼役持帳來易我單即憑單

令我役運岸不聞運單中所無之一物亦不聞自運一物亦有奸商漏稅當別論夫以今日之夷燄若以吾吏吾商

處之必十漏七八我亦無如何而彼不爲也於我關如此即於彼關可知往嘗謂洋錢重七錢三分實紋

六錢五分餘鉛八分中國行用輒當銀八錢以上其中國仿造者雖無鉛亦不行何則識其爲夷製即可

信其有實銀六錢五分若彼雜以銅鉛亦非我所能識別而彼決不爲是以通行侯官林文忠公造銀餅

初亦便用未幾即質雜市中析之爲零銀銀餅遂廢又今夷市我購彼貨先銀後貨彼購我貨先貨後銀

甚有寄販名目與貨後輒揚帆西去一年爲期贏縮惟彼所命者要之彼不能信我斷不敢與之交易而

通商之局散矣夫子曰言忠信雖蠻貊可行不謂蠻貊能信我乃爲蠻貊所行可爲太息今觀於關務而

益慨然於彼之能信我之不能信也夫我之不能信爲隱微深痼之疾非一朝夕之故驟欲其洗心革面

斷有所不能莫若舉各關而盡撤之京門則復譏而不征之法以稅額入諸釐捐以代各關責成地方官會同紳董治之釐捐立法尙新依爲蠹蠹者宜少卽亦散而無紀尙非過而不留脫有弊竇有蹤跡可尋有人證可指比之關政猶彼善於此特不得多設卡棚招引關蠹無關之名有關之實而已且釐捐者市征也王制市廛而不征關譏而不征孟子言文王治岐關市譏而不征而周禮有關市之征是其法必始於殷之衰文王去之周公又行之春秋戰國無改管子霸形篇關譏而不征市書而不賦是管子亦嘗云之孟子欲復文王之治以復古雖以周公之法而不謂然也卽今制固亦有關征無市征也落地稅以濟關增釐捐而關市竝征矣釐捐之弊恐將如宋陳邁之經制錢翁彥國之總制錢流毒無窮擇一而廢之又曷可緩哉

重酒酤議

馮桂芬

酒禁由來已古禹疏儀狄酒誥懲羣飲周官司酤禁以屬游飲食於市者漢初羣飲者罰金武帝時桑宏羊始權酒酤而酒禁廢惟武侯治蜀禁酒嚴道無醉人餘不聞焉王應麟謂權酤之害甚於魯之初稅畝無他食爲民天酒爲食蠹統五穀約之以升粟成酒一斤有半爲率統萬民約之以十人而一飲飲亦一斤有半爲率是十人而糜十一人之食也億萬衆必有十分之一受其饑者如之何不禁然而不能禁也大凡民間日用飲食起居貿易一切細故相沿已久習爲故常者一旦欲反之雖臨之以天子之尊威之

以大辟之重亦終於不行不考古事不采近聞不達人情物理或任性或恃才皆不知其不可禁不知其不可禁而禁之適所以擾之而汙無以禁之雍正閒嘗禁銅先定三品以上準用銅器嗣又改爲一品乾隆初尙書海望疏以禁銅不效請弛禁亦嘗嚴酒禁乾隆初孫公嘉淦奏罷之疏中言直隸省一年中被繫者千數百人不勝其株累而釀酤如故世宗朝當鼎盛之時整齊嚴肅中外顯若宜可以令行禁止然而不能禁斯不能禁矣皆前事之師也又何論近年煙禁乎愚竊以爲如酒者止宜重酤以困之釐捐本抽百分之一獨酒可令頓酤十之零酤二十之舞弊倍其罰經三四釐捐而酒值倍矣使貧者不能不節飲尤貧者不能不止飲但得減釐一分卽多若干米亦卽多活若干人有利無弊者也至收捐有效宜量減五穀棉布之捐尤宜廣戒飲之諭加酤酒之律宴饗之事爲之節制沈湎之人勿登薦剡使天下曉然知上意之所在庶其有瘳乎至孫疏有云不釀酒則梁粟棄地轉以病民猶之言賭場妓館貧民轉移執事賴以得食成何議論邪是無足辨

酒課考

陸心源

武帝天漢三年初作酒權

唐德宗貞元二年每斗權錢百五十

按杜詩速宜相就飲一斗恰有三百青銅錢今權百五十則十分抽五矣

宋至道二年兩京諸州收權課銅錢一百二十一萬四千餘貫鐵錢一百五十六萬五千餘貫京城賣麴錢四十八萬餘貫

天禧末權課增銅錢七百七十九萬六千餘貫鐵錢增一百三十五萬四千餘貫賣麴增三十九萬一千餘貫

按會要鐵錢十當銅錢一

慶歷二年閏九月二十四日初收增添鹽酒課利錢每升添一文謂之王福部一文添酒錢

皇祐中歲課合緡錢一千四百九十八萬六千九十六貫

熙甯五年正月四日令官務每升添一文

崇甯二年十月八日令官監酒務上色升添二文中下一文

四年十月量添二色酒價錢上色升五文次三文

政和五年十二月十一日令諸路依山東酒價升添二文

建炎四年十一月十二日曾紆申請權添酒錢每升上色四十二文次色十八文

紹興元年令添酒錢每升上色二十文下色十文

三年四月八日令煮酒量添三十文作一百五十文足

按自慶厯至紹興共增一百一文而曰作一百五十文足則舊課當得五十文矣

五年閏二月每升各增五文

六年二月權增升十文

八年六月令兩浙諸路煮酒增添十文足并臘蒸酒增添六文足

九年以都督府申請權添十一文

又有發運使造缸添酒錢每升上色三文次二文提舉司量添酒錢又以上下色升一文不知所始

按酒之有課尙矣而獲利之厚無過於宋南渡後四川一省歲收至六百餘萬貫故能以江南半壁支持強敵馬騰士飽延百餘年其生財之道善矣蓋酒爲嗜好之物而非日用所需不飲者雖強之而不能嗜飲者卽禁之而不止故雖加價十倍亦不致有累於民較之加賦於田抽錢於丁相去不亦遠哉

南宋浙江酒課考

陸心源

杭今杭州府十務三十萬貫以上

越今紹興府十務

湖今湖州府六務

秀今嘉興府七務

婺今金華府十務十萬貫以上

明今甯波府五務

溫今温州府七務

台今台州府八務

衢今衢州府四務

睦今嚴州府七務五萬貫以上

處今處州府八務三萬貫以上

此宋史食貨志所記慶厯以前未增酒課之所入也其時每斗課錢不過五十文而所入已如此則南宋時增至百五十文每歲當得三百萬矣考文獻通考記南宋浙江戶口四百餘萬我朝承平二百餘年滋生日衆視南宋約增一倍而贏此千萬人中飲酒者當得十之二以每人日飲一斤計

之每日可售酒二百萬斤每斤加錢五文每日可得錢一萬貫一年即可得三百六十萬貫地不改闢也民不改聚也果能參古今之宜得廉幹之人而經理之其於國計豈但小補而已哉

召見恭紀

吳廷棟

咸豐壬子

臣廷棟

由刑部郎中京察一等時在部堂官爲滿尙書恆公春左侍郎全公慶右侍郎書公元

漢尙書周公祖培左侍郎曾公國藩右侍郎彭公蘊章先是書公兼充崇文門副監督奏獲長興店私酒三十六家人犯數十名交部分司審辦其酒五萬餘斤悉付緝役充賞各堂官知案情未確書公執爲漏稅欲加嚴懲承審者擬人予滿杖書公猶以爲寬縱適案犯呈訴問官枉斷各堂官以控涉本部問官應行迴避奏請 欽派大臣審辦奉 硃批以先存成見有意推諉嚴加申飭不准迴避堂官乃改派

廷棟

等滿漢八人覆訊究出書公家人藉查拏私酒遠至城外詐贓未飽所欲始行送部等情先行具奏大概情形並請 旨轉飭監督將委員及家人交出歸案質訊奉 硃批嚴斥昏愎糊塗顯存成見又 諭以

城外片壤皆國家之地何分遠近飭委員聽候傳質家人送部歸案等因欽此 上意嚮書公疑其孤立

同官故爲立異旋調全公吏部書公轉左侍郎以基公溥署右侍郎調曾公吏部彭公工部以呂公賢基

署左侍郎陸公應穀署右侍郎嗣三月京察引 見

廷棟蒙

恩記名以府道用初九日 召見仰瞻

天顏微含怒意首曰汝承問私酒案乎奏曰臣是瀆派覆訊上曰案情何如奏曰此案不得謂爲私酒也長興店離彰義門四十里歸宛平縣管理初不歸崇文門且其所賣之酒皆係買自各處有官帖之燒鍋發票可據亦不得謂爲漏稅也至崇文門之收稅當以城門爲限入城而不上稅方爲漏稅既未入城何名漏稅如必指離城數十里外之酒爲漏稅則何往而非私酒小民何所遵守是徒爲差役所影射以啟訛詐之端耳監督大臣惟以國稅爲急恐有偷漏不得不任家人爲耳目家人不能徧歷城外不得不任差役爲巡邏差役有定額復不得不藉白役供驅使俗名所謂圓扁子是也此輩皆游手無賴之徒既無工食甘效奔走其意果何圖無非爲利而已監督本欲整理稅務而不知受朦蔽於家人家人卽不盡欺主營私而不能不受誑誘於差役至下授其權於圓扁子而閭閻之擾累不可問矣且監督家人敢於至長興店索詐者亦由崇文門兼收城外半壁店酒稅也立法未善故得託以爲辭去歲九月間崇文門奏獲冒充官役妄拏私酒之案卽係臣審辦臣以收稅惟以城門爲限始易稽查無虞偷漏自有城外收稅遠及離城十八里之半壁店巡邏難周實易生弊定案時曾奏請飭下崇文門另議章程以城門收稅爲限當日書元閣奏稿深以此議爲是可見緝私而遠及長興店非監督意也上聞奏未及半爲之霽顏連聲應答廷棟復奏曰長興店旣不得謂爲私酒卽其人無罪可科所獲之酒自應發還詐贓之家

人自應按例懲辦如此方得其平 上應而頷之時同 召見者爲刑部滿郎中多山 上旋問多山家

世數語遂同退出

廷棟

到部謹遵所奏辦結此案繕稿呈堂未及具奏三月十五日

廷棟

奉

旨補授直

隸保定府遺缺知府翼日謝

恩蒙

召見

上問直隸官有汝同年否奏曰祇藩司陳啟邁是臣拔貢

同年

上曰汝常讀何書對曰臣嘗讀程朱之書

上曰何以學程朱者多迂拘對曰此正不善學程朱

之故程朱以明德爲體新民爲用乃由體達用之學天下斷無有體而無用者其用不足必其體尙多缺

陷凡臨事迂拘不通正由平日不能如程朱之格物窮理而徒資記誦非學程朱之過也 上曰明之楊

大洪此等人豈可謂非程朱之學對曰明朝開國卽崇尙程朱之學人人奉爲法守故能培養一代人心

廉恥而節義最著楊大洪節義之士也程朱非無節義只是自盡其性分之常而不得僅以節義名若節

義之士深以涵養亦卽程朱之學但其至性勃發迫於忠愛每近激烈非容納直言之君不能諒其心

皇上深取於楊大洪是崇獎節義之士也而人心將自此振矣 上曰汝識曾國藩否對曰曾國藩曾署

刑部左侍郎

臣

實早與相識其人勵志不苟亦是楊大洪一流人材雖進言近激而心實無他

上曰汝

識倭仁乎對曰

臣

亦早與相識是篤守程朱之學者平日專在身心檢察日自記載以爲考驗

臣

尤佩其

篤實其守道似近迂而能知大體

上曰其記載所著是何書對曰是非著書乃每日自省課程蓋學問

不從身心上講求則根本不立其用處卽不能無弊昔宋臣程頤進說於君有三曰立志曰責任曰求賢
志不立則規模不定 皇上高居九重天下之所瞻仰意有所嚮莫不如響斯應若此志一定何爲不成
志在堯舜斯爲堯舜矣初無難也任不專則大臣得以謝其責羣奉 皇上以乾綱獨運之隆稱自處於
奉令承教而得失兩無所預天下事誰與 皇上分其憂古所謂君逸臣勞正惟各受其任卽各專其責
也天下事無大小首在得人不急於求賢則無與共治然欲得人必在知人知人之道尤歸本於人君之
一心 皇上讀書窮理以裕知人之識而又清心寡欲以養坐照之明深宮寤寐旁求則輔相得人輔相
進賢待用則內而部院外而督撫得人部院督撫各擇其屬則內外司官州縣無不得人斯賢才出矣
上曰如某者才亦可用對曰小人無才不足以售其欺 皇上之驗昔道光年間

是其敢於欺 成皇帝之驗 成皇帝赦其重罪畀以重任復敢罔 上行私其才何

所賴乎 上聞奏默然 廷棟乃悚然而退 廷棟已離部至十八日始具奏所結私酒案奉 硃批嚴斥荒

繆堅執成見著再行細心審訊等因欽此得 嚴旨後部中羣情悚懼惟呂公賢基謂此案無可再訊謹

申明案情實已確鑿無可再訊仍照原擬於二十二日具奏始奉 旨依議欽此此審辦私酒案奏結之

原委也越日 廷棟往謁彭公公告 廷棟曰 上嘗垂詢軍機大臣今之留心理學者祁春圃相國以倭仁

及君名對予亦以曾國藩對君昨 召對後 上告我等曰吳某學問結實廷棟聞公言為之悚惕無已

竊念疎逃小臣一念愛 君之忱發於不自知不覺言之越分乃 聖主不以為忤反虛懷開納誘之盡

言得邀非分之 知正不知所以圖報也然則吾 君之聰明天宣聽言如轉圜尤獨留心正學豈羣下

所能窺測哉苟欲稍裨 高深當知所先矣己未仲冬月 臣吳廷棟 追憶恭紀

請禁直境燒鍋片 光緒四年

直隸總督 李鴻章

直境糧價增昂固由秋成歉薄亦因耗費太甚通省燒鍋約計千餘家每日需用高粱兩萬餘石每月共需六七十萬石即以每人日食一升而論該燒鍋等一日之費已佔二百數十萬人之食境內及外來之糧經往被其購用遂致民食缺乏雖招徠遠近商販源源運糶價不能平查永平宣化順天各屬燒鍋最多其在永遵者並用海船自赴奉省大宗採買今直晉災區皆指奉糧接濟勢難任其爭購夫酒可終年不用日不再食則飢輕重原自有別該燒鍋等每歲應交課銀統共不過三萬餘兩所益于庫欸者有限而佔奪窮民口食貽害於閭閻者實深自來荒政本有禁酒之條山西近已奉 諭飭禁燒鍋直省為畿疆重地際此糧價日增民生困苦更宜舍緩就急應請除熱河承德縣歲豐糧賤可毋庸置議凡直順各屬燒鍋自明年正月起暫行停燒以濟民食俟秋成豐稔後仍准開燒依舊納稅如蒙 俞允即由臣

出示曉諭禁止倘有限內私燒照例治罪並通飭地方官秉公查察不准役胥得規包庇或藉端擾索違則從嚴叅辦分別重懲

請將臺屬各項雜餉分別豁除疏

光緒三年

福建巡撫

丁日昌

竊惟我朝深仁厚澤薄賦輕徭前代所有弊政無不概予豁除凡可以紓民力之艱難培國家之元氣者雖在田賦正供不惜減之又減仰見我皇太后皇上惠澤淪浹損上益下民說無疆實足超軼夏古臺灣雖屬重洋遠隔海外一隅然百姓生計之盈虛無一不厯宸衷之念慮茲因該處所徵雜餉尚有相沿鄭氏舊轍未經釐定者謹卽據實臚陳仰乞聖明采擇查臺郡當鄭克塽歸誠時僅有臺灣鳳山嘉義三縣地界其彰化縣淡水噶瑪蘭兩廳皆係後闢幅員東至內山西至海地皆淺狹惟南北袤長計臺灣鳳山嘉義三縣合長二百九十里共額徵供穀十三萬餘石而後闢之彰化淡水噶瑪蘭三廳縣合長五百八十里僅額徵供穀五萬六千餘石核計彰淡蘭之地比臺灣鳳嘉幾多一半而所徵之穀比臺鳳嘉反不及一半何哉蓋由臺灣鳳嘉三縣開闢較先所徵稅則皆沿鄭成功之舊而彰淡蘭新闢之地則由朝廷新定科則故賦稅較輕民皆樂業議者或慮畸輕畸重然有田而後有糧百姓勉事耕耘尙不致缺虧正額其尤爲民累者則莫如雜餉查雜餉名目繁多內如歸化生番不植稻麥無區畝可計

無田糧可科僅知捕鹿種麥按數納餉卽以鹿皮小米爲名至所謂塏餉者則徵於蓄魚之所所謂蔗車糖蔴者同業異名係各就田園設廠雇工營作按作則徵餉如此之類雖爲苛細然因其稍有贏利酌取一二以益正供不過如四川之有碾榨稅直隸之有榛栗稅於民尙無大損他如海水支流曰港窪深積水曰潭凡可養魚之所卽與塏餉一律徵收日久地勢變易或填成田畝稅項仍不能減若有水道可通之處無論竹筏小船運載貨物卽按照抽資又如草厝瓦厝卽市廛建屋之基牛磨卽磨麪之場旁及瓦窰菜園檳榔番樣莫不徵餉其徵諸漁戶者則曰罟曰罾曰零曰縴曰滾曰落曰網曰滬曰烏魚旗更有採捕小船亦徵稅餉析及秋毫吏役藉此勒索橫徵窮民苦累實甚且所徵雜餉傭戶魚民均皆去來無定官役不能盡悉底蘊則必需熟悉情形之土豪出爲包攬先須於地方官預納承充之費然後壟斷浮收舐糠及米輸於官者十取於民者百臣到臺後查悉各弊卽擬稍爲釐剔而各項名目大爲瑣碎影射牽連非盡斷葛藤終難絕其弊竇除番社所輸鹿皮小米猶有任土作貢遺意暨民間塏餉蔗車糖蔴其弊尙易釐剔應仍其舊外所有港潭等項雜餉統計各屬共有五千二百二十三兩九錢六分五釐均應豁免以除民累其港潭有浮變成田者另行勘明升科飭據臺灣道夏獻綸轉據臺灣府知府張夢元查覆開單具詳請奏前來伏查臺灣府所屬臺鳳嘉三縣正項供穀徵收旣重而雜餉名目尤繁小民終歲

勤動所得幾何而一經胥吏噉突叫囂遂有枷棒在戶鷄犬無聲之歎民困何由而蘇元氣何由而復乎此項徵收名目本屬鄭成功開端向爲內地所無之舉若逢聖主至仁如天與民休息雖江浙數百萬漕糧猶蒙裁減況臺地此起雜餉每年所徵合計不過數千餘兩且各項皆係就地徵納支發歸入奏銷臺灣近年出產茶葉樟腦等項釐金關稅均屬新徵較之此起雜餉多至數倍而臺北現議籌開礦務則地利更可橫興前項雜餉爲數無多謹卽查列清單恭呈御覽合無仰懇天恩俯准將軍開徵收雜餉各款自光緒三年起永遠一律蠲除如蒙特旨允准卽當敬謹謄黃宣示恩德務令僻壤周知以杜吏役藉詞需索規費庶期實惠及民至各廳縣有應支之款當飭該道府另籌撥補亦不至有所窒礙所有請豁臺灣雜餉緣由謹會同閩浙督臣何璟恭摺具陳

會商整頓關務疏

光緒九年

福州將軍
穆圖善

竊臣穆圖善迭准戶部奏咨行令遵奉諭旨整頓關稅設法稽徵務於足額之外力求溢解等因深愧庸愚勉圖報稱與臣何璟臣張兆棟遇事會商和衷共濟竊維徵稅之法在於擇地以設官相時以稅卡扼歧路以杜奸商之走漏循成憲以稽蠹吏之侵漁前因甯德縣轄開墾築堤經臣等奏將稅關移置東冲改白石爲驗卡建議之初人情難與謀始外論不免異同堅持定見行之數月商舶往來一按稅則毫

無例外取贏咸稱利便蓋皆宣揚 朝廷 恩德遵守戶部定章因之納輸日有起色此移關之驗也查原設關稅口岸十九處甯德白石爲北路之二甯德關移設東冲僅於白石填給照單於稅課猶多疏漏至以茶葉爲大宗甯屬白石一口向有徵收茶葉渡稅長徵福安所出之茶始因該處採辦內多茶胚茶梗體恤商艱每擔折收制錢六十文彼時出產有限類皆附入貨稅造報迨光緒初年所徵漸旺始行彙合折報按則科徵每擔徵銀一錢列冊報部有案自白石改爲驗卡福安茶葉不由東冲經過致有漏稅且查北路產茶逐年增旺非獨福安一縣統計福甯所屬五縣處處皆有茶商運茶按其地勢盡屬海濱港汊紛歧易滋繞越與西路延建等處絕無海口者不同非擇要移卡不足以杜偷漏臣穆圖善晝夜焦思與臣璟臣兆棟往返籌商務求 國課得有裨益飭據東冲口委員佐領金生會同甯德縣知縣朱寶書察看海汊勘得離福甯府二百二十里之飛鸞地方爲北路茶商進省必由之路將從前白石徵過茶葉渡稅就該處設立總卡稽徵實足扼五縣要衝查照常稅則例從其輕者不論粗細每擔徵銀一錢其餘雜貨亦照稅則減成折收經臣等聯銜示諭分飭各該地方官轉飭遵辦並飭福防同知王冕南傳諭各茶商毋許推延觀望臣等覆查卡由移置既非創設稅亦循舊並非重徵況屬扼要之區易剔漏私之弊當茲持籌支絀固不敢專求科斂罔恤民艱亦未便任聽奸人私營利藪相應請 旨勅部核議示覆

以便遵行

會查稅課酌擬章程疏

光緒十年

奉天將軍
慶裕

竊查接管卷內本年三月二十九日接准 欽差吏部尙書徐桐刑部左侍郎薛允升來咨奉 命查辦奉天事件奏稱遼陽以稅課盈餘爲每年辦公之用舊章相沿已久勢難一律裁革惟市賣牛馬等稅每價錢五千作銀一兩收市錢五百文按照時價係屬十分稅一以及每年派差分赴鄉屯查稅名曰海查既任聽旗民舉報漏稅往往查傳十餘家僅止二三家應罰未免過于擾累誠恐他城亦所不免等情光緒十年三月十八日奉 上諭着該將軍府尹會同盛京戶部將各城稅務章程詳加釐定奏明辦理等因欽此欽遵知照到奉奴才慶裕裕長到任後當卽會同奴才啟秀揀派委員分赴各城將各項牲畜稅務確查具報旋據先後查明分款開單稟覆前來奴才等按款覆查所有漏稅罰錢一節現經查明各城均無勒罰情弊海查一節現經查明各城或於每年年底派差分赴村中催令報稅或隨時派差查催均無海查名目惟遼陽城守尉衙門於每年秋後查照向章派差分赴四集鎮油粉豆腐客店查催牲畜稅課該商民等按照歷年包納之數呈繳是否與置買牲畜實數相符稅局從不查問是卽所謂海查遼陽稅課與各城不同之情形也其買賣牛馬驛頭稅課一節現經查明廣甯益本牛莊鐵嶺華州錦州熊岳

復州金州等九處均以買價東錢五千作銀一兩收稅銀三分餘另有票錢牙紀多寡不等與遼陽之以錢五千作銀一兩收錢五百不收票錢牙紀錢者不甚懸殊開原以六千作銀一兩收稅錢四百文岫巖昌圖甯遠鳳凰城新民廳中前所中後所均以買價十千作銀一兩收稅自三分至六分不等另有票錢牙紀錢亦多寡不等統計此項稅錢以遼陽等十處爲較多至於豬稅則以岫巖甯遠復州金州中後所中前所爲較多羊稅則以甯遠中後所中前所爲較多此遼陽收稅與各城或同或不同之情形也檢查戶部則例奉天一省獨無稅則爲衙門所收牲畜稅課有始自康熙年間者有始自乾隆年間者有不知始自何年者年久相承各有定章於此而欲勒歸一轍如准其最少之數恐此後各處徵收必難足額如欲以酌中爲斷照向來少收各款均須加增法愈改而弊愈滋自不如仍令各循其舊以免紛歧卽如斗秤釐捐各城收支數目均有不同當日創辦之時原屬因地制宜固不獨稅章爲然徐桐等查辦稅務並未議令改爲一律想已見及於此此項稅課除照額報部外盈餘藉以津貼辦公並開支薪水工食房租心紅紙張等均爲必不可少之款徐桐等摺內聲明稅課盈餘爲每年辦公之用舊章相沿已久勢難一律裁革自係確論至稅課十分取一以及派差海查並漏稅罰錢各節經徐桐等奏奉 諭旨飭令詳加釐定奏明辦理奴才等亟應欽遵會核以籌定章而免漏弊伏查各城收稅旣無勒罰情弊亦無海查名

目應請毋庸置議遼陽稅局向有海差雖非核實納稅之法惟每年納稅一次較之勒限上稅紛紛稽查者尙覺簡易商民相安已久無關弊竇且遼陽所屬之劉二堡南北兩堡商民數百家每逢單日卽有集市買賣牲畜每年固不下百餘匹僅包納東錢一百七十千合銀不過十七八兩油粉豆腐客店均飼羣猪每家每年多則宰猪百餘口少亦七八十口僅包納東錢十千合銀不過一兩較之核實納稅甚爲輕減若必禁止海查不准包納不惟恐滋煩擾且稅錢轉致加增商民必受其累似不必嫌海查包納之名而貽增稅擾民之患惟遼陽所收牛馬騾頭稅課以買價東錢五千作銀一兩收東錢五百係屬十分稅一爲應行酌減之款其廣甯等九處亦以東錢五千作銀一兩雖每兩稅錢不及五百而另有牙票等錢與遼陽不相逕庭亦宜一律酌減以昭公允查奉省自馬稅銀內有按照東錢六千一百合銀一兩解部之款奴才等公同商酌擬將遼陽等十處收稅折銀章程通改爲六千一百合銀一兩每兩照例收稅銀三分其願交錢者准按時價折錢投稅各從其便第以銀兩解部均須庫平庫色且解銀運費亦爲必不可少之款而薪水辦公又宜籌及擬令於正稅三分之外酌收稅銀二分以一半添補平色一半作爲飯食公用此外一切名目悉行刪減永不准再收一文免致變本加厲其各行牙紀在市取用應聽買賣各主酌給未便官爲隨課徵收仍將辦理漏稅章程照例申明以杜胥役借端滋擾至岫巖等處所收牛馬

驛稅向以十千合銀一兩開單向以六千合銀一兩按其每兩所收稅銀均較新章爲輕請仍其舊如蒙
俞允奴才等卽會同出示曉諭使各城永遠遵守倘有額外多收違例勒罰卽行從嚴懲辦庶稅務均
有定章而稽徵可免流弊

酌擬崇文門稅務章程疏

光緒十一年

武英殿大學士 寶 鋆

臣等奉 旨詳改崇文門章程已將尙賢劉恩溥所奏各節遵議具奏竊維崇文門徵收稅課係 國家
維正之供正額盈餘均有定制京師爲萬方輻輳之區地稱首善惠商便民尤屬當務之急近來劣員猾
吏蠹役奸商因緣爲奸遂至上虧 國課下累民生爲害不可勝言亟宜設法整頓以重稅務而除積弊
臣等謹於尙賢劉恩溥原奏內所未經議及者酌擬十六條恭呈 御覽

一嘉慶五年欽奉 上諭各關稅局如再有訛索擾累等事從重治罪等因又道光二年欽奉 上諭嚴
禁崇文門稅局需索蠹弊等因應令該監督將 諭旨二道敬謹繕寫懸挂該衙門大堂俾資永遠遵守
一奏派宜擇本屬也向來正副監督到任後事皆責成奏派委員總理一切文則用印稿司員武則用印
務叅佐其人率以明白幹練心地端直者充選故能上顧 國家正課兼可鈐制驗貨家丁免滋流弊近
來或叅以親故等人以致堂官家丁狎熟牽掣種種弊端在所不免正本清源必自奏派委員始

一堂委宜戒濫派也奏派向止二員恐有別項差故則堂官派委員以佐之此項委員亦當以一二員爲是緣廉正樸實之品本不多覲而人多則牽制亦多近聞堂委之員多至十餘員或二十餘員不等非浮薄少年酒食徵逐卽艱窘末吏或喜事生風實於公務無益亟宜裁汰以端浮囂而杜撓亂

一各口宜擇妥員也崇文門向有分局例設於蘆溝橋東壩海淀半壁店南口穆家峪張家口等處派員駐守以慎分司需人旣多勢不能盡取本屬明幹人員悉派稅差致曠本職故向來監督每擇素識之人量材器使然亦不容純用情面以私廢公且張家口東壩兩處中外商人紛錯於途查核甚非易事奸巧猾商藉端影射亟當詳遴明白曉事之員常川駐局中外茶商交涉倘有疑竇卽稟明監督迅速行文總理各國事務衙門詳察辦理不得漫任冗員有妨稅務

一蘆溝橋東壩半壁店穆家峪海淀張家口等處口岸向設委員分駐稽察近年監督所派委員未能一律在局駐宿一切公事悉由家人書吏經手致滋流弊亟應申明舊章由監督飭令分司稅口委員輪班駐宿督同書役家人認真辦理以除積弊其各口委員每處祇需四員由正副監督各派二員庶免人浮于事

一京城十三門向來監督但派家人書役分駐巡查惟各門距務較遠委員耳目難周致有勒索留難等

弊擬請嗣後安定東直朝陽東便廣渠左安永定德勝西直阜成西便廣安右安十三門均由監督揀派廉勤人員每門二員輪班住宿稽查不准曠悞違者叅處所有十三門委員應需飯食津貼銀兩由監督酌量籌給奏明辦理

一海巡宜調營弁也海巡向用家丁世家大族世僕老練或不敢恣肆妄爲近來仕宦之家僅多招募派一海巡惟知藉端滋擾得財賣放比比皆然未革偷漏之弊徒滋勒索之端營弁究係官屬儘可行文步軍統領衙門調取來署該衙門巡役清冊點交該弁該弁亦得海巡津貼當差並可勤奮矢志倘仍不得力卽由該監督自行叅懲

一光緒九年給事中樓譽奏崇文門海巡請按名給發號衣腰牌嗣經該衙門奏稱若給予號衣腰牌轉恐恃有官物四出招搖流弊更甚且於密查偷漏益多窒礙等語竊惟該巡役無號衣腰牌則恃無查考肆意妄爲有號衣腰牌則奉官緝拿被拏者既不敢拒捕往拏者亦不敢詐擾至巡役藉詞密查實在搜求攫取無所不爲仍請 飭下該監督將巡役每名各給號衣一件並各給印花腰牌均寫明某門海巡姓名有訛索者准商民指名稟究庶幾真偽可辨而棍徒蠹役不得冒充如有偽造號衣腰牌冒充巡役者嚴行究辦其製造號衣腰牌經費准由盈餘項下開銷至巡役向無額數散漫無稽莫可究詰擬請

飭下崇文門監督將巡役酌定額數每門若干名務上及十三門共若干名造冊咨報戶部查核嗣後每屆年終造冊咨部遇有更換隨時咨報

一例載各關徵稅科則責令該管官詳刻木榜豎立關口街市竝責令地方官將稅則刊刷小本每本作價二分聽行戶頒發遵照倘該管官將木榜不行設立或書寫小字懸於僻處希圖高下其手者查叅治罪又例載已革之稅概行刊榜曉諭各等語現在崇文門未將稅則及已革之稅刻榜豎立地方官亦未將稅則刊刷頒發以致商民無從周知亟應申明舊例略加變通所有徵稅科則應由該監督認真詳刻木榜其例應免稅之貨逐款開明另刊木榜一併懸挂稅務衙門門外及十三門暨各稅口竝由該監督將商稅則例現行比例增減新例及免稅各條刊刷成書於每年八月初三日監督到任後發給各行戶經紀一本使商民共見共聞其刊榜刷書經費准由盈餘項下開銷

一例載乾隆四十九年奏定丁梨脆棗最下之物不過近京所產卽有興販亦止於肩挑背負嗣後應豁免稅銀庶近京小民不無所補等語嗣後除水梨係屬客貨仍照例收稅外至近京西山等處所產丁梨毋論是否肩挑背負應一律免其送務徵稅蘆溝橋及各門亦不准私收稅錢飯錢違者懲辦

一例載各關商民輸稅填寫收稅紅單二紙一給商人收執一送部查察其有不給紅單或納銀數多給

票數少及私將紅單撤回多徵勒索者許商民首告究擬嗣後崇文門收稅擬請用三連票根一給商人一存該衙門一送戶部以備稽查如有前項情弊一經商民首告照例究擬

一例載崇文門稅課令本商自行完納若貨到而本商未至准店鋪代報納課等語惟往往有數家之貨該行到務呈遞驗片只寫一家字號易滋弊端嗣後貨物報門無論數家共一貨車總須各分各單不得數家併作一單僅寫一家字號致涉牽混至各門每日送務手本亦須將各鋪字號一一分寫不准籠統以杜行戶影射漏課及巡役朦混誣拏等弊

一行次重責成也商賈納稅必由行次原爲事期簡易責有攸歸乃日久相沿竟成作弊之首平日串通本處書吏臨事賄囑驗貨家丁賣放營私視爲故事而該衙門所辦漏稅不過偶拏一二貧民或負私酒或賣雞蛋者反爲敲撲以示官威行次弊端反置不問是當飭奏委司員隨時逐行詳查倘敢仍前作弊立予嚴懲毋稍輕縱

一崇文門拏獲漏稅客貨該委員過堂時並不言明罰銀數目輒先令畫供認罰迨畫供後委員於原供內批罰銀至數百兩數千兩之多交坊羈押勒繳殊屬不成政體擬請 飭下崇文門監督嗣後遇有應罰之案除按照例定倍數擬罰外務須先將應罰銀數示知該商並於供內寫明令其輸服畫供不得刑

逼勒罰所罰既有限制庶商民力能呈交罰款亦不至虛懸無著每月實收罰款若干分列貨物款項案由分註本稅銀若干罰款幾倍銀若干明示稅務衙門門首咨明戶部庶儆偷漏竝有稽核

一崇文門照例驗貨納稅放行不准留難勒索嗣後每日各門送到行李貨物到務無論天晚必須當日驗完不准押送客店延至次日方驗違者即將委員監督叅處

一崇文門監督到任向係出示曉諭嚴禁官店至每日務上未經驗完之行李貨物押送店內有押至數日之久者其拏獲漏稅貨車有押至數十日之久者無官店之名有官店之實該店串通差役藉漁重利商民受累不堪爲歷年未除之積弊嗣後崇文門附近客店如敢容留務上交押之車准被押之人赴城喊控卽由該城御史將委員查明叅處並將該店勒令封閉店商從嚴懲辦 以上各條或叅核舊例或酌擬新章總之立法必先防弊任事尤貴得人應請 旨飭下崇文門監督隨時督飭委員認真辦理實事求是期於 國課民生兩有裨益所有酌擬崇文門稅務章程緣由謹恭摺具陳

查明梧州病商實情並釐剔一切弊端疏

光緒十二年

張之洞

竊臣之洞於光緒十年六月承准軍機大臣字寄閏五月初七日奉 上諭有人奏廣西梧州關稅加費過多請飭永遠全裁等語又有人奏廣西積弊太深亟宜剔除一摺等因欽此當經臣之洞咨會前廣西

撫臣潘鼎新據實查明會奏迭次札飭西布按二司會查各在案潘鼎新迄無一字咨覆西兩司覆稱潘鼎新於光緒十年奏明梧關公費解交省局久未准抄摺咨會臣秉衡在臬司任內以粵事緊急奉旨駐龍辦理後路事宜旋蒙恩命暫護撫篆又奉光緒十一年六月十八日上諭張曜奏廣西被水成災擬籌賑欸一摺等因欽此經臣秉衡先後提充賑欸一面恭錄轉行署廣西布政使慶愛署按察使沈康保查辦其梧關一案經臣等迭次委員密訪西省委知府黃宏藻東省委直隸州知州陳占鰲通判徐敦詒降補知縣楊銓光鹽大使周志端從九品張祖恩先後分別密查並會委奏留差遣河南候補道朱壽鎔覆加確查會同西藩臬兩司核議稟覆去後茲據覆稱查原奏內稱梧州府關稅自咸豐七年後加抽經費爲招集鄉勇保衛地方起見凡往來貨物於正稅銀一兩外加抽銀一兩每年合計約加抽銀四五十萬兩均收銀而不給票肆意侵漁無從查考加徵過多請飭永遠全裁一節查梧關加抽經費實係咸豐初年艇匪土匪肆擾前任梧州府知府陳瑞之募勇剿捕經費無出集商籌議按貨抽捐以供勇費竟有稅費相等者有費多於稅者嗣後賊平勇少而經費如故商人屢以爲言乃減去舊數之半先設分局十二處陸續裁撤光緒六年復將本隻分局裁去或由粵東會館經費局抽收或由水旱兩關帶抽茲經委員改裝易服前往向來往商民分投密訪或伴作商賈赴關納稅或潛搭貨船觀其收費並傳汎該

局司總梁寶琛等暨平礪館商董東茂興公昌聚豐信全昌等調集水旱關暨各帳簿書巡等私簿互相
叅核計該府每年所收經費約銀十萬兩有奇實無三十萬至五十萬之多該州自兵燹後正稅未能足
額卽以經費撥補又廣西巡撫藩臬鹽道衙門辦公不敷歷年於梧關經費項下撥解公費此款早年出
自稅餘後因兵興稅絀改在經費內動支從前係每年三萬兩此外雖有節壽之說收與不收視乎上司
光緒十年減爲二萬二千兩裁去節壽餘作該府路勇兩營及護關扒船之餉費惟查歷年經費之數官
收雖不過十萬有奇而商人所費實不止此吏胥巡役家丁地棍船戶浮收包吞皆所不免雖無檔冊可
稽追出書巡分銀底帳及船戶木商充經費底簿按月核計全數約略可知約計每年大率收銀十七萬
兩實爲商民巨累此外尙有因頭一款爲原奏所未言及此款係由書吏算船估稅而起定例權算米數
豆麥各船之法以長一丈廣一丈深五尺爲五因一因五千斤五因共作二萬五千斤他貨二三因至七
八因不等皆有定則書吏欺愚商賈如米則謂例應七因今私讓爲六因應納使費若干故曰因頭商人
懇囑關吏不令報足十成甘于稅外私納規費名爲讓減一因實已暗增一因先則商人利其隱漏繼則
關吏踵事多求既屬病商亦兼蠹稅計暗加因數每年約銀二萬兩私得因頭每年約銀五萬兩係書巡
幕丁所得又有外費一款係書巡府差人等所得每年約銀六千餘兩又有現費一款乃上下水零星貨

物若缸瓦挂碎爆竹彩錢筆竹木梢等款皆例不收稅之物係查船丁巡所得每年約銀五千兩又有柴火銀一款乃無稅無費之物每柴一束收錢一文係充該廠日用每年約銀一萬三千兩合而計之正稅尙屬有限而商賈於正稅之外所費至二十餘萬商民怨苦實不能堪羣蠹縱橫人思染指情弊之深至斯而極查該廠經書七名算房七名銀房十名卽官銀匠巡役四十四名內正總四名亦稱籤子手亦稱尺手書巡皆五年一換經書算房銀房及正總更換時各納充費一千兩上下不等此條最爲諸弊之根查梧州一區既有例設稅廠又有釐金總局又有經費局一日之內三次權徵百金之貨完至什一實爲病商苛政且經費一局商民費至二十餘萬兩 國家並不能用其分文尤出情理之外況徵歛愈重商賈愈困趨避走漏勾串影射愈多西省稅釐大局將不可問自應將經費一項卽行裁免抽收以蘇疲商而保正餉竝將該府所募勇丁兩營全數裁撤以節糜費由西省另派防營駐梧巡查彈壓令該府於經收正稅自行竭力稽徵不得藉口缺額別圖彌補從前該廠徵解稅項係前後遞推牽搭淡旺不均或淡月而所解極多或旺月而所解甚少應改令按照定額計日攤解以免藉口賠累此後該廠徵稅俱按定則估算不准浮加一因其餘吏役私收之因頭分費現費等項一律嚴除永免商累並刊給三聯印票分別存發報查其廠書巡役充規概行禁革惟根蒂不除弊端決不能斷應將廠書算房銀房籤子手尺手

等名目年限一概革除廠中查船核算繕寫記簿俱改用司事籤手尺手改募巡丁現無報部額缺充滿年限即可隨時另募隨時革換庶可杜賄充婪索之弊惟向來各項人等仰給此廠者不下數百家此次裁除太鉅若不酌籌飯銀限一定數必致另開需索刁難之弊防不勝防甚至包串漏越轉虧正款擬令按正稅之數每兩止許收飯銀五分分給司事巡丁一切人等統在其內不准多取分毫亦不准別立名目查梧州釐局向有商捐三江緝捕簿一項及鹽包小釐一項以養護商扒船每兩五分每年約銀一萬二千兩現經臣秉衡飭將此項緝捕簿委員勇役扒船概行裁撤另派水師扒船巡護緝捕簿鹽包捐項概行免交計以此項抵稅廠飯銀之處每年商民尚可少納銀七千餘兩此外貨船一隻有紅單銀一錢有挂號錢上水一百文下水二百文有收旗錢三十文皆散役差艇所得爲數甚微應准均仍其舊又查上項所開柴火銀一項銷路甚廣取之甚微積之甚鉅無稅無費尙不致爲商民之累此項一萬三千兩卽遵 旨提充公用查西省鄉闈經費例銷止一千九百餘兩不敷甚鉅向係由各州縣派捐銀一萬四千餘兩其餘由外籌補各屬瘠苦難支應卽於此項內按年提銀七千兩解存司庫備支科場經費以後各州縣應攤闈費立案永遠免派至舊日院司道公費二萬二千兩原係辦公之需臣秉衡及司道等均未提作私用惟現旣停抽經費不宜累及該府惟有極力撙節擬裁減一萬六千兩卽以柴火銀餘款六

千兩分季解交善後局分充巡撫藩臬鹽道各衙門辦公之需並將此次裁革減定各項數目榜示該廠十里內外並勒碑水陸通衢人人共見永遠遵行計稅費均按例定因法徵收一項裁減約二萬兩經費一項官私裁除約十七萬兩因頭一項裁除約五萬兩外費現費兩項裁除約共一萬二千兩緝捕簿捐欸鹽包小釐兩項除抵充飯銀外裁減約千餘兩通計此後商賈過梧關者每年約可省銀二十五萬兩若有浮收勒索逾於定章之外者被人告發或經查出嚴行叅辦並嚴禁梧州府永遠不准餽送上司節壽如有私送私收者與受均一律叅處又原叅內稱廣西藩司衙門有吏一房吏二房向係廣東肇慶府黃姓充當而作弊惟吏一房尤甚盤踞日久視缺分之肥瘠索取規費一節查廣西正佐各缺原有詳定輪委酌委章程前藩司張夢元謹小慎微在任日每有缺出必詳核輪委超委各冊照章辦理現署藩司慶愛一本定章間有人地未宜改爲酌委者隨時稟由臣秉衡酌定始行懸牌詳委傳到各員面給委札不經書吏之手官場並無間言似無延擱索規之弊至補缺本有定例無論酌補輪補之缺均詳由臣秉衡悉心核定分別題奏辦理又官員繳憑例應於到任後扣明程限有無逾違具結列批送司按季彙繳其間有聲明舛錯駁查更正以致稽延亦事之所有並無半年後始行繳憑之事藩署吏一房書吏前藩司張夢元於到任時查閱卯冊見係黃姓居多且籍多肇慶者業已分別更換吏二房書吏查無黃姓

之人署藩司慶愛隨時訪查各書尙無弊竇其有承充年滿者概行撤換一有弊端立予革究又原奏內稱廣西釐金各卡自桂林順流而下省垣上下關兩卡陽朔縣城一卡平樂府城一卡昭平縣城一卡梧州府城三卡自梧州府溯流而上則至藤縣一卡濛江一卡平南縣之白馬塘一卡大烏墟一卡桂平縣之大隍江墟一卡潯州府城兩卡又自潯州府分南北河溯流而上其南河則橫州之南鄉墟一卡永淳縣城一卡南甯府城三卡宣化縣之三江口一卡右江平馬墟一卡百色城一卡其北河則至武宣縣屬之濁水河一卡柳州府城兩卡融縣長安墟一卡古宜墟一卡慶遠府之懷遠鎮一卡皆大河船隻所常經其餘窮鄉僻壤私設之卡尙難盡悉各卡有督辦有幫辦有委員司事有尺手巡丁除耗費侵漁外報解不過十中一二賸削商民應於府城舊設釐卡酌量裁併其外卡除擇要者酌留一二處其餘概行刪汰一節查廣西地瘠山多舟楫可通之處乃有商賈聚集是以開設釐卡皆在濱河口岸而四境多與雲貴廣東湖南等省連界支河歧出並無扼要總口堪以歸併抽釐不得不於桂平梧潯南甯百色柳州慶遠等府屬沿河市鎮設立正分各卡或管抽收或司查驗設卡之數雖似較繁實則杜絕繞漏並非節節重徵蓋西省釐金章程凡商民國貨發行時抽落地釐金一次販運貨物由鄰省入境則抽入境釐金一次由本省運赴鄰省者抽出境釐金一次無論落地入境出境均止抽收一次經過各卡驗票放行概不

重抽辦理多年歷久相安水陸設卡之外陸路祇泗城府屬 甸卡一處稽查滇省繞道入粵之貨其餘僻遠之區實無一卡歷來設卡之所必先詳由撫臣批示大張曉諭方無抗違更不能任意私設卡至各卡有督辦幫辦委員司巡等名目則係量釐物之繁簡分別酌派其應支薪水等費向有定章不能任聽虛耗歷經查察整頓將行爲卑陋聲名平常之試用縣丞蔣錫熊吳桂森從九品尹鋆典史葛森徐溥試用通判程銑先後參革並將開報含混之通判陶用中加平漁利之司事丁憂湖北巡檢孫新原卽孫仲裘參革究辦在案近年釐數每年總在六七十萬之間廣西貧瘠省分貨少商稀抽數尙不爲絀似無侵蝕之弊如果報解不過十之一二則每年收數當在四五百萬從何有此鉅款所議裁汰釐卡一節查前次給事中劉曾戈靖先後 奏請查辦均經澈底查核凡有可裁之卡已欽遵 諭旨裁去二十餘處無可再裁經前撫臣覆 奏有案臣等亦知抽釐爲不得已之舉如能隨時裁撤以惜商艱原屬善政無如邊防孔殷餉需緊迫廣西別無可籌之款惟有仍請循舊辦理嚴飭承辦各員倍加謹慎力杜煩擾容俟時務漸緩再行體察情形酌議裁併又原奏內稱州縣案件株懸太多候質之人概行監押書差私行拷撲停給粥飯必索詐得遂而後已炎暑薰蒸禁卒又不打掃囹圄以致死於饑餓拷撲瘟疫者累累該管官定按月報限期各州縣多空文回覆其時案仍延閣不辦一節查各州縣辦理一切案件先經升任撫

臣張樹聲照直隸清訟章程將積案監禁管押逸犯四種分別管收除在四柱按月冊報專派委員將各屬月冊逐案詳核隨時飭催訊結分別功過自理詞訟一原一被一証或証至二三人而止令頭門外懸挂粉牌將在押人名案由月日及有無刑具逐一開載倘有私押私刑准該家屬喊稟並由省隨時委員密查如並未懸牌及開報不符者懲處臣秉衡起家州縣於恤民一端時兢兢以此爲意前在臬司任內深恐各州縣有名無實復經通查各屬未結各案應辦者依限詳辦應釋者取保開釋各州縣陸續稟報遵行雖才具短長不一尙不至延閣不辦其候質之人分別取保候訊並非槩行羈押並嚴飭各州縣清查監獄羈所勿令禁役勒索凌虐曾經委員密查分別懲儆尙無十分荒謬情弊至署臬司沈康保到任後仍不時嚴加查催惟州縣斷不能人人勤明差役更不能忘情僞詐惟有隨時密訪隨事重懲有被控及查出者決不寬貸或可獄少冤民此又非章程文檄所能爲功者也據該司道等先後查明議擬分別稟覆前來臣等覆查此次飭查各節以梧州經費爲最要此事前曾經言官論及此次奉發片一摺皆論此事其爲病商厲民亦可想見此次臣之洞委員往查書巡等許以重賄加以恐嚇該委員堅拒不聽因遂造言傾陷希冀撤回臣等察知狡謀不爲所動然則積弊之深澈查之難更可概見現經裁撤經費局革除廠書籤手裁減公費禁止節壽改章之案勒石永遵當可於恤商保餉均有裨益丁憂梧州府

知府梁俊未能禁止書役多取病商迭經飭查復不行據實稟明查禁節費充公咎無可辭惟經費局歷經相沿弊端積重已久未便專責一人致有偏枯且該府平日居官尙能辦事似可量予從寬相應請旨將梁俊以同知降補以示薄懲其嚴禁藩署書吏盤踞把持以及整頓釐務清理訟獄各節均係實在情形至光緒十年梧關解存公費臣秉衡與西藩臬兩司鹽道俱係存局存公並未移作私用臣秉衡上年先已 奏明提作賑撫水災之用在案十一年臣秉衡等公費亦已遵 旨提解再此件因臣等六次委員密查始得查核詳實且須察度情形會商定章是以覆 奏較遲合併聲明


請 飭禁抽收賭款疏

鄧承修

竊廣東賭風最熾向有闖姓番攤白鴿票花會等名近年則番攤白鴿票花會經督撫臣明禁雖未能盡絕根株尙不至設局開場抽收經費如闖姓一事者查闖姓之賭起自機房小民漸而相率效尤行於省會經前撫臣郭嵩燾罰繳款項以資津貼奸民因此藉端稟案抽繳經費巧立榜花名目每屆鄉會科期及歲科兩試之先設局投票每票限寫二十姓以中姓多少爲贏輸其投票之資則自一分一錢以至盈千累萬其投票之處則自省會以及各府州縣窮鄉僻壤其投票之人則自縉紳士大夫以及農工商賈婦孺走卒莫不罄其所有各存倖心希圖一擲以致傾家破產歇業潛逃甚而服毒投繯賣妻鬻子凡此

之類難以悉數尤可駭者每遇科年謠言四起或云某姓已通關節或云某姓已託人情其歲科兩考百計鑽營有姓字未登票內或經取錄則畀以多金悉使不行赴覆或尋其瑕隙激同大眾稟攻否則有賂之故犯場規甘遭擯斥者至武闈鄉試並無糊名其監射等弊竇更難縷指以國家掄才之典爲市僧賭博之資阻寒士登進之階啟官紳貪污之漸立心之險設局之奇有如此者伏思粵東素稱富庶自紅匪構亂以來迭經兵燹賈肆蕭條民生凋耗該督撫臣留心民瘼各賭具已行明禁獨闔姓未經裁革其始則借罰款爲名繼則以抽收成例在該督撫之意不過以用項支絀藉資津貼耳豈知其爲害之至於此哉夫番攤白鴿票花會各賭率皆市井無賴之尤稍知自愛者猶不肯爲若闔姓則公然設局明目張膽恃官長爲護符卽父兄何能束其子弟傷風敗俗病國蠹民莫甚於此且賭博之禁朝廷顯有科條今則官爲抽收更復成何政體就令有利無害臣愚猶以爲不可況爲利無幾而貽害如此若不早行禁止恐科場因此而滋事必至釀成巨案百姓由此而並窮必至流爲寇盜其弊更有不忍言者何以仰答我皇上愛民取士孜孜求治之至意相應請 旨飭下廣東督撫臣將抽收闔姓賭款迅行裁革出示嚴禁以肅政體而杜弊端

[The text in this image is extremely faint and illegible due to low contrast and blurring. It appears to be a single column of vertical Chinese text.]





DS
754
K8
2113

皇朝經世文續編卷四十八目錄

戶政二十五 錢幣上

鈔幣議

王塗

經世文續編

卷四十八目錄

二



皇朝經世文續編卷四十八

上海葛士濬子源輯

戶政二十五

錢幣上

鈔幣議

王塗

三代以上君民相通但有足民之事更無足君之事必百姓足而後君足猶子孫富而父母未有貧者也三代以下君民相隔既有足君之事又有足民之事且必君足而後百姓足猶父母富而子孫亦未有貧者也夫欲足民莫如重農務穡欲足君莫如操錢幣之權然而往往不能操其權者何也蓋自毀錢爲器起於工匠而利權一失矣鉛錢私鑄竊於姦民而利權再失矣外洋錢幣行於中國而利權三失矣銀價低昂操於商賈而利權四失矣錢票會券出於富戶而利權五失矣今欲操錢幣之權莫如禁銀而行鈔而又盡去其弊則國用常足而民財同阜矣請綜錢幣之源流論之後魏高謙之曰堯遭大水以厯山之金鑄錢湯遭大旱以莊山之金鑄錢夫古者分國而治資於粟帛者重而資於錢幣者輕故非水旱要可不鑄後人或以珠玉龜貝刀布爲幣未嘗專以銀與錢也鄭司農釋詩抱布貿絲云周人以布廣二寸長二尺憑官司印書其上以爲民間貿易之幣此卽行鈔所昉漢武帝造鹿白幣唐憲宗用飛錢又爲行錢

之漸至宋張詠始行交子宋孝宗以內帑金帛易楮幣藏於內庫一時楮幣重於黃金沿及金元皆用紙鈔明初亦行寶鈔至英宗有米麥折銀之令弛用銀之禁由是有出無入而鈔遂不行迨崇禎十六年生員蔣臣奏行銅鈔帝意欲用紙鈔因流賊渡河其事遂止夫自宋迄明凡行鈔四五百年 本朝順治中亦嘗兼行鈔幣苟其有害無利安能行之如其久哉按明戶部侍郎倪元璐嘗欲行鈔其時省臣條陳十便一曰造之本省二曰行之途廣三曰齎之也輕四曰藏之也簡五曰無成色之好醜六曰無稱兌之輕重七曰革銀匠之奸偷八曰杜盜賊之窺伺九曰錢不用而用鈔其銅盡鑄軍器十曰鈔行而銀不行其銀盡實內帑此十者惟末二條立法尙未盡善蓋鈔可用而錢不可廢也銀雖可廢宜仍散之民間爲器飾而不宜盡實內帑也其餘皆至論名言無可疑者而蒙細推行鈔之利其實不止此如凡以他物爲幣皆有盡惟鈔則無盡造百萬卽百萬造千萬卽千萬則操不涸之財源其大利一也萬物之利權收之於上布之於下則尊國家之體統其大利二也外洋不得以其幣行中國則動遠夷之畏服其大利三也姦民謀逆類皆以財利要結人心國家財用不竭則消姦民之逆志其大利四也用銀有白紋元絲洋錢之不同行鈔歸於畫一則齊天下之風俗其大利五也鈔法旣行收銅以供鼓鑄則極錢法之精好其大利六也鈔直旣有一定商賈不得低昂之則絕民心之詐僞其大利七也富家或以土窖藏銀歷久不用

銀益見少今舉而變之悉出易鈔則去壅滯之惡習其大利八也鈔式宜變從前分爲七等大鈔書孝經其次書印先正格言俾民識字則寓教民之深意其大利九也凡漕務河務鹽務皆有積弊當釐人不敢議者恐經費不足故也若行鈔無難更定章程矣則除萬事之積弊其大利十也國計大裕捐例永停卽捐銜亦可無庸則重朝廷之名器其大利十一也一切取民者從薄予民者從厚則行千載之仁政其大利十二也夫天下無不弊之法而常恃有救法之人而欲圖天下之大功必先破衆人之論人徒見宋金元明行鈔不能無弊遂以爲不可行不知皆立法未周之故耳今試言其弊之大略一則單紙易壞而不知裝潢糊表也二則式印苟簡而不知宜鑲版精工也三則鈔文但書刑律無可觀玩也四則印章不多難於辨別也五則中統鈔自二貫至十文分爲十一等太瑣屑也六則中統鈔止於二貫民猶不便也七則鈔直二貫者止費錢三四文資本太輕紙幅狹隘程式不精也八則有司以出鈔爲利入鈔爲諱也九則民以舊鈔換新鈔必增工墨費每貫三分也十則舊鈔行用每至簡闊也十一則鈔法屢更使民疑也十二則不鑄錢而錢日少也十三則仍雜用銀也十四則專利於上而不能行惠於民也十五則雖設嚴刑而未盡防僞之道也今誠能一一悉去其弊則行鈔者宋金元明之法也而所以行鈔者固非宋金元明之法也豈非理財之善策哉嘉慶年間翰林學士蔡之定曾奏請行鈔然徒言行鈔而不知去弊之方

則無以全收其利而不受其害宜其議之不行也夫自古有治人無治法然苟有治人必有治法而立法之善不過卽弊法而去其弊所謂勝者所用敗者之謀也蒙嘗博觀載籍徧訪通人有言行鈔之利者必與之深心商榷而究其理有言行鈔之害者必與之反覆辨論而窮其故實見鈔法之行利及百姓而非止國家也利及萬世而非止一時也故爲考證八條目四十問答二十以破衆人之論芻蕘之愚俟有言責者擇焉

原鈔之始

元何異孫曰鄭司農釋詩抱布貿絲云周人以布長二尺憑官司印書其上以爲民間貿易之幣此用鈔之始

按司農此條見周禮注余初得之謂可以證鈔法後檢舊本十一經問對則知何異孫已先我言之矣今通志堂經解所刊十一經問對刪去此條

漢武帝時禁苑有白鹿乃以白鹿皮方尺緣以藻纁爲皮幣直四十萬王侯宗室朝覲聘享必以皮幣薦璧然後得行

按一皮而直四十萬其值太重窺此意止欲取王侯宗室之利與民間無預也

唐憲宗行飛錢令商賈至京師委錢給券輕裝趨四方合券取之

按飛錢合券取錢卽交子之權輿

宋太祖置便錢務許商人投牒輸錢左藏庫以諸州錢給之

按此亦飛錢之意

宋仁宗元年置益州交子務初張詠知益州患蜀人鐵錢重不便貿易一交一緡以三年爲一界而換之六十五年爲二十二界謂之交子使富民主之後富民稍衰爭訟不息轉運使薛山張若谷請置交子務以權其出入禁私造者帝從其議立務於益州界以百二十五萬六千三百緡爲額

按商賈憚於重齎交子之設正以便民今民間自行會票則交子之用隱操於富戶矣

造鈔之法

宋史云景定四年以收買逾限之田復日增印會子一十五萬咸淳四年以近頒見錢關子貫作七百七十文公私擅減者官以贓論吏則配籍五年復申嚴關子減落之禁七年以行在紙局所造關子紙不精命四川制使抄造輸送每歲以二千萬作四綱

宋高宗二十四年金使置交鈔庫金以銅少造鈔引一貫二貫三貫五貫十貫五等謂之大鈔一伯二伯

三伯五伯七伯五等謂之小鈔與錢並用以七年爲限納舊易新諸路置官庫受之每貫取工墨錢十五公私便焉宋理宗景定元年蒙古行交鈔法王文統立十路宣撫司示以條格欲差發辦而民不擾鹽課不失常額交鈔無致阻滯遂行中書省造中統元寶文鈔立互市於潁州漣水光化軍交鈔法自十文至二貫文凡十等不限年月諸路通行賦稅並聽收受仍申嚴私鹽酒鈔麴貨等禁

按金元用鈔之初皆見其便迨行之久而其弊漸生於是議更造愈更造而弊愈生其故有由也金之鈔初止十貫而其後乃有二百貫至千貫者元之鈔始止二貫迨桑哥造至元鈔自一貫至五十文凡十有一等每一貫視中統鈔五貫文是方尺之紙直錢五十文也武宗造至大鈔凡十三等每一貫準至元鈔五貫是方尺之紙直錢五萬文也先後輕重不倫無怪乎視爲虛券而不可行也斯固由更法之弊而亦創制之初未能斟酌至精也然則欲行鈔者必立法之始詳審精密先求盡善一定之後更不改造而後鈔可永行矣

金史云初貞元間旣行鈔引法遂設印造鈔引庫及交鈔庫皆設使副判各一員都監二員而交鈔庫副則專主書押搭印合同之事 又曰交鈔之制外爲闌作花紋其上橫書貫例左曰某字料右曰某字號料號外篆書曰僞造交鈔者斬告捕者賞錢三百貫料號衡闌下曰中都交鈔庫准尙書戶部符承都堂

劉付戶部覆點勘令史姓名押字又曰聖旨印造逐路交鈔於某處庫納錢更許於某處庫納鈔換錢官私同見錢流轉其鈔不限年月行用如字文故暗或鈔紙擦磨許於所屬庫司納舊換新若到庫支錢或倒換新鈔每貫量尅工墨錢若干文庫招攬司庫副使各押字年月日印造鈔引庫庫子庫司副使各押字上至尙書戶部官亦押字其搭印支錢處合同用印依常例

按金之制鈔法亦備矣惜其尙未知裝潢精工使不至易壞也至於命善書者書先正格言其上富民而兼寓教民不尤善乎

元史云世祖中統元年始造交鈔以絲爲本每銀五十兩易絲鈔一千兩諸物之直並從絲例是年十月又造中統元寶鈔其文以十計者四曰一十文二十文三十文五十文以百計者三曰一百文二百文五百文以貫計者二曰一貫文二貫文每一貫同交鈔一兩兩貫同白銀一兩至元十二年添造釐鈔其例有三曰二文三文五文初鈔印用木爲板十三年鑄銅易之元至大四年罷行至大銀鈔銅錢楊杲法曰法有便不當視立法之人爲廢置銅錢與楮幣相權而用古之道也何可遽廢耶言雖不用時論是之按以鈔爲不可廢以錢鈔爲宜兼行自是確論

元順帝十年欲更鈔法吏部尙書僕哲篤迎合宰相脫脫意請以鈔一貫文省權銅錢一千文國子祭

呂思誠曰中統至元自有母子豈有以故紙爲母而立銅爲子者乎又曰錢鈔用法見爲一致以虛換實也今歷代錢與至正錢中統至元鈔交鈔分爲五項慮下民藏其實而棄其虛恐不爲國家利俟哲篤曰至元鈔多僞故更之思誠曰至元鈔非僞人爲僞耳至元鈔人猶識之交鈔人未之識僞將滋多俟哲篤曰錢鈔兼行何如思誠曰錢鈔兼行輕重不倫何者爲母何者爲子汝不通古今徒以口舌取媚大臣乎按以鈔爲母以錢爲子鈔數多而錢數少鈔以便總統之用錢以便零析之用此法未嘗不善第當於立法之初先定其規而慎守之元世先廢錢不用至順帝時鈔法極弊之世承仁宗罷行銀鈔銅錢之後而欲更法宜其不可行也俟哲篤誠未達時務而呂思誠之言亦豈極至之論耶

陸世儀曰古有三幣今亦有三幣古之三幣珠玉黃金刀布今之三幣白金錢鈔古之爲市者以其所有易其所無皆粟與械器耳粟與械器持移量算有所不便於是乎代之以金是金者所以通粟與器械之窮也所謂大不如小也物有至微釐毫市易則金又有所不便於是乎又代之以錢錢者所以通金之窮也所謂頓不如零也千里齎持盜賊險阻則金與錢又有所不便於是乎又代之以楮楮者如唐之飛錢今之會票又所以通金與錢之窮也所謂重不如輕也識三幣之情則知所以用三幣之法矣

按此論三幣甚確知重不如輕則知鈔之不當廢矣

高珩云鈔法亦可救急若大糧商稅非鈔不收則鈔法立行上操利權出不盡而用不竭又安用朱提爲乎唐法爲租爲調元明開國之初皆以寶鈔濟用不專重金銀也

究鈔之法

宋史寶祐四年臺臣奏川引銀會之弊皆因自印自用有出無收今當拘其印造之權歸之朝廷仿十八界會之造四川會子視淳祐之令作七百七十陌於四川州縣公私行使兩料川引並毀見在銀會姑存舊引既清新會有限則楮價不損物價自平公私俱便矣有旨從之

宋沈括曰鈔法數易富家不蓄鈔而蓄錢

宋徽宗改四川交子爲錢引新交子一千當舊交子四千交子法大壞

金趙秉文曰比者寶券滯塞蓋朝廷將議更張而已妄傳不用因之抑遏漸至廢絕此乃權歸小民也自遷汴以來廢回易務臣愚謂當復置令職官通市道者掌之

金趙伯成曰更造之法陰奪民利其幣甚於徵之

按前朝行鈔皆在開國之初而行鈔無弊尤在一朝極盛之時元始祖明太祖皆開基之主也宋仁宗金世宗皆一朝極盛之時也宋孝宗亦南渡後之盛時成祖亦當明之盛時故鈔法通行無弊明莊烈

帝當末年危殆之時方思行鈔尙何及哉所以雖有倪元璐之才終於不可行也

本朝順治八年行鈔貫之制是年始造鈔一十二萬八千一百七十二貫有奇自後歲以爲額至十八年卽行停止

按前朝於銅錢之外皆兼以鈔爲幣 本朝始專以銀爲幣鈔惟順治年間曾暫行之後以國用充餘遂行停罷論者謂 國初制鈔甚少故暫行無弊然苟歛散有術制度精工雖多造常行亦可以有利用而無弊也

防鈔之僞

宋史趙開兼宣撫處置使司疏通錢引民以爲便宣司獲僞引三十萬盜五十人張浚欲從有司議當以死開白浚曰相君誤矣使引僞加宣撫使印其上卽爲真矣黥其徒使治弊是相君一日獲三十萬之錢而起五十人之死浚稱善悉如開言

按此亦權時善處之法然僞引加印爲真則當時立法之疎可見矣固不若多爲印特造佳紙尤使之難於作僞也

宋孫甫監交子務或以僞造多犯法欲不用甫曰交子可以僞造鐵錢可以私鑄但嚴治之不當以小害

廢大利

按甫之言可謂通達國體若因有作偽而廢之是因噎而廢食也

宋史高宗三十二年立偽造會子法犯人處斬告者賞錢十串不願受者補進義校尉若徒中及庇匿者能告首免罪受賞願補官者聽

宋史淳熙二年宗正丞韓祥奏壞楮幣者只緣變更救楮幣者無如收減自去年至今楮價粗定不至折閱者不變更之力也今已罷諸造紙局及諸州科買楮皮更多方收減則楮價有可增之理上曰善三年臣僚言今官印之數雖損而偽造之券愈增且以十五十六界會子言之其所入之數宜減於所出之數今收換之際原額既溢舉者未已若非偽造其何能致多如是大抵前之二界盡用川紙物料既精工製不苟民欲爲偽尙或難之迨十七界之便印以雜用川杜之紙至十八界界則全用杜紙矣紙既可以自造價且五倍於前故昔之爲偽者難今之爲偽者易人心循利甚於畏法況利可立致而刑未卽加者乎臣愚以爲抄撩之增添紙料寬假工程務極精緻使人不能爲偽者上也禁捕之法厚爲之勸厲爲之防使人不敢爲偽者次也

按此論防偽之法極精切

金史曰高汝勵言鈔法務在必行府州縣鎮各籍辨鈔人給以條印聽與人辨驗隨貫量給二錢貫例雖多六錢卽止每朝官出使則令體究通滯以通聞

按欲防僞則必爲民間立辨僞之人此法決不可廢

元史林興祖至治中知沿山州沿山素多僞造鈔者豪民吳友文爲之魁友文奸黠悍鷙因僞造致富乃分遣惡少四五十人爲吏於有司伺有欲告之者輒先事戕之前後殺人甚衆興祖至官曰此害不除何以牧民卽張榜禁僞造者且立賞募民首告俄有告者至佯以不實斥去又有告僞造二人并贓者乃鞫之款成友文自至官爲之營救興祖命并執之獄具逮捕其黨悉置之法

按鈔之利厚民必思僞造雖立嚴刑以禁之而僞造者猶冀其事之不敗露也若非立賞募告則人以爲首告者損人而不利己非素有仇怨又誰肯爲之乎興祖之治沿山善矣竊以爲僞造者旣重其罪凡親族鄰里知而不舉者皆當緣坐而首告者必予重賞凡官長能發覺逮治者必立予遷擢如是則人皆畏法悅賞而僞造之弊自絕矣

重鈔之術

宋孝宗以內帑金帛易楮藏於內庫者四百萬行於民間者僅二百萬一時楮幣重於黃金龔茂良奏聞

得商旅往來貿易競用會子一爲免稅二爲省脚乘三爲不復折閱以此觀之大段流通葉衡奏今諸處會子甚難得宜量行支降行使上曰未可向來止緣所出數多致有今日之弊今須少待徐議施行上又曰大凡行用會子少則重多則輕

按孝宗謂會子少則重多則輕是誠然矣然亦不患其出之多而第患其入之少苟收斂有術則鈔亦流轉於上下而無窮奚至於多而輕哉

宋史云高宗因論四川交子最善沈該稱提之說謂官中常有錢百萬緡如交子價減官用錢買之方得無弊淳熙七年以十八界與十七界會子更不立限永遠行使十一年以會價增減課其官吏

金明昌三年敕尙書省曰民間交鈔流轉當限其數勿令多於見錢也

按此亦同宋孝宗之意

明昌中宰臣奏民間所以艱得錢者以官豪家多積故也在唐元和間嘗限富家過二千者死王公重貶沒入以五之一賞告者上令參酌定制令官民之家以品從物力限見錢多不過三萬貫

按唐制過五千者死其法太重富家多蓄錢罰之足矣鈔法行恐民蓄錢而不蓄鈔斟酌此法行之可也

金承安二年宰臣奏舊立交鈔法凡以舊易新者每貫取墨工錢十五文至大定二十三年不拘貫例每張收八文既無益於官亦妨鈔法宜從舊制便若以鈔買鹽引每貫權作一貫五十文庶得多售上曰墨工錢實可收十二文買鹽引者每貫可權作一貫一百文

按工墨費錢愈少則民愈便宰臣以爲有妨鈔法者謬也若一貫之鈔而權作一貫一百文使民樂於用鈔則可行

金高汝勵曰隨處州府庫內各有辨鈔庫子鈔雖弊不僞亦可收納去都邑遠之城邑既有設置合同換錢客旅經之皆可相易更慮無合同之地難以易者令官庫凡納緡鈔者受而不支於鈔背印記官吏姓名積半歲赴都易新鈔如此則緡鈔有所歸而無滯矣

金泰和時從遼東按察司楊雲翼言以咸平東京兩路商旅所集遂從都南例一貫以上用交鈔不得用錢

又孫鐸言民間鈔多正宜收斂院務稅諸名錢可盡收鈔秋夏稅納正色外亦令收鈔不拘貫例農民知之則鈔漸重可以流通

按此三說皆所以使鈔之必行 或問行鈔可決信民之樂從否曰可但當圖之以漸而用之有術爾

蓋鈔之利厚必分散於官與民使各享其利然後行鈔可常久不廢此能使鈔必行之術也

日知錄云洪武八年三月辛酉朔禁民間不得以金銀爲貨交易違者治其罪有告發者就以其貨給之其立法若是之嚴也九年四月己丑許民以銀鈔錢絹代輸今年租稅十九年三月己巳詔歲解稅課錢鈔有道里險遠難致許易金銀以進五月己未詔戶部以今年秋糧及在倉所儲通其數除存留外悉折收金銀布絹鈔定輸京師此其折變之法雖暫行而交易之禁亦少弛矣

按既用禁金銀所以重鈔也而未幾卽許民易金銀以進是自壞其法也顧亭林先生錢糧論謂不收錢而收銀則河北之響馬必多矣此可知用銀之弊易長盜賊蓋錢貨重實盜賊所取無多則因而止者多矣若用鈔則又輕而易藏盜賊既不能知覺又可多爲標識則竊之必易於敗露亦弭盜之善術也夫以鈔之虛爲之母以錢之質爲之子子母相權民已甚便又何爲而必用銀乎明初覲於用銀之利故自弛其禁而不知其長盜賊之風啟謀財害命之端卒至開礦殃民而國用益以不足此計之失也

論鈔之用

金史曰有司言交鈔舊同見錢商旅憚於致遠往往以錢買鈔蓋公私俱便之事豈可罷去

金史曰濮王守純以下奏曰自古軍旅之費皆取於民間朝廷以小鈔殊輕權更寶券而復禁用錢小民淺慮謂楮弊易壞不若錢可久於是得錢則珍藏而券則亟用之唯恐破裂而至於廢也今朝廷知支而不知收所以錢日貴而券日輕然則券之輕非民輕之國家致之然也不若量其所支復歛於民出入循環則彼知爲必用之物而知愛重矣今徒患輕而卽欲更造不惟信令不能且恐新券之復同舊券也

按量其所支復歛於民自是善術第患奉行之不力耳

金宣宗問鈔法如何而通劉炳對以歛散相權則鈔法通

元世祖嘗問太保劉秉忠錢弊之法秉忠對曰錢用於陽楮用於陰華夏陽明之區沙漠幽陰之域今陛下龍興沙漠君臨中夏宜用楮弊俾子孫世守之若用錢不週於宜于是絕不用錢

按用鈔自有便處然何必廢錢劉秉忠不以正對而爲此穿鑿之談何也

鈔弊條目四十

一鈔分爲七等曰五千貫曰千貫曰五百貫爲大鈔曰百貫曰五十貫爲中鈔曰十貫曰二貫爲小鈔大

中鈔當今會票之用小鈔當今錢票之用

一二貫以下無鈔更鑄當百當十大錢以便民用錢爲三等

一紙類甚多造鈔務選佳紙潔白光厚耐久者既用造鈔卽禁民間不得買賣此紙以防作偽竊擬高麗紙佳者卽可造其劣者聽民間行用

一五千貫鈔用紙三丈闊尺二寸千貫用紙二丈五尺五百貫用紙二丈百貫用紙一丈五尺五十貫用紙一丈十貫用紙五尺二貫用紙三尺大鈔命善書者書孝經其上真草篆隸俱可中鈔半書半印用先正文如原道西銘之類小鈔用桐板印文其上如程子四箴朱子家訓之類務極精工

一大鈔中鈔裝潢成卷小鈔亦糊裱行用以防易壞

一大鈔中鈔行用時或以金石木革爲函小鈔以絹素爲函

一以金玉水晶銀銅倩好手雕爲五印各有官掌之又分三等大鈔用大印五中鈔用中印五小鈔用小印五以硃砂好印色印其上違者罪之

一造二貫之鈔尤貴精工必費本二百餘文鑄大錢必極工巧以防僞鑄

一行鈔先從京師起以次漸及於各省約數期年然後徧及天下

一造鈔發於各省布政司爲印記發於各府又爲印記發於各縣又爲印記發於錢莊錢莊又爲印記然後行之民間則易於辨僞

一以大鈔中鈔發與各銀號卽禁其不得私出會票如領一萬貫鈔者半年之後覈其換銀若干如已用完則收其銀如鈔十千貫之數以一分之利與銀號

一以小鈔及當百當十大錢發與錢莊卽禁其私出錢票民以銀易錢卽以小鈔與之如銀數不滿二貫有零者則以大錢與之半年之後覈其所入銀數而收其十之九以一分之利與錢莊

一民以銀易鈔在下令半年之內准如一分之利與之一年之內加五釐之利與之一年之後照時價不加

一民以錢易鈔以鈔易錢錢莊准取百分之一不許多取

一鈔之出入經吏胥之手亦准取百分之一但取之官不取於民如有勒索嚴治其罪

一隨在設立辦鈔之人官給以祿

一鈔既各分省分易於稽察又令通衢大邑設立官局民以他省鈔至者驗明准其換本省鈔行用

一民以鈔納錢糧及關稅者二貫之鈔準作二貫二百文用

一小鈔行用既繁雖糊裱尙不免易於霉爛但辨其非僞許將霉爛之鈔納錢糧關稅惟止作二貫用更不加二百文既納之後解部焚毀以免倒換之弊

一下令二年之後鈔法通行禁民間不得以銀爲幣惟爲器皿不禁私以銀交易者沒入其銀與物以其半賞告者

一禁銀之後募商人領銀開設官局撻造銀器以減半之價售於民間使銀價益賤民以銀易鈔者亦作半價

一設立收銀之局民間有賣銅器者官爲重價收之以供鼓鑄禁絕撻造銅器之鋪惟鎖鈕樂器不禁其餘銅器不准民間買賣胥吏不得向民間搜括舊藏銅器以致騷擾

一鈔貫文有一定私減鈔價者有罪

一造鈔之後必二十年然後添造新鈔

一監造官鈔時不得刻減工費以致不如程式違者罪之

一僞造者斬決梟示出首者賞鈔百貫更籍犯人之產予之胥役能捕獲者亦如之官長能發覺立予遷秩鄰族知情不舉首者同坐如始係同謀而能自首者免罪受賞

一各處官庫俱令積錢如民間鈔多卽發錢收買不令民間壅滯

一小民誤用僞鈔更不加罪惟更究其僞造之人

一民間藏錢非典當錢莊字號不得過一千貫如違禁沒入其錢十之五卽以五之半賞告者

一鈔之初內外官俸各加一倍本俸暫與以銀加俸悉給以鈔俟鈔法通行後官俸各加數倍悉給以鈔

一書鈔之人予以重祿如有官爵者紀功遷秩造鈔出力者立予議叙

一行鈔之初必加惠於民蠲免逋欠優卹耆老以新天下之耳目

一地方官能奉行鈔法無弊者必予加級紀錄

一令學中稽察貧士給鈔周卹

一民有鰥寡孤獨及遇水火凶荒之災皆發鈔賑給

一地方有水利當興及荒土可耕者皆發鈔修治

一行鈔之後關稅田賦鹽課皆議減

一商人與外洋交易准以鈔向沿海地方官局易銀去及還准以銀易鈔出入之價如一銀器不准載入外洋

一外蕃貢使入朝欲市中國之貨者准以銀易鈔行用則外蕃亦重中國之鈔矣

耕當問奴織當問婢錢幣當問商賈予鄉里多富商大賈故與精於會計者參酌事情思其興利防弊之法略備於此非敢據史冊陳言徒侈書生之論也

附鈔幣問答三十

或曰國家之成法不可改答曰世祖章皇帝八年嘗造鈔每歲十二萬至十八年因國用充裕停止則用鈔正所以復祖制何嫌於改法且語云利不百不變法今行鈔視用銀豈止百倍之利乎

或曰天下方處全盛之時若行鈔則示民以貧矣答曰苟財匱已極之世雖欲行鈔而民不信正惟當全盛之勢而生齒日繁經費浩大主制所謂積三十年之通者不可不豫爲之計耳此乃所以開富足之源安得謂示民以貧哉

或曰鈔乃末世之所用恐不可行之答曰宋太祖始立便錢務至仁宗時立交子務正宋極盛之時金元兩朝皆開國時用鈔金世宗有小堯舜之稱其時亦盛行鈔明太祖開基之主亦造寶鈔至崇禎時欲行鈔而不及行非鈔之有害於國也而論者以爲末世之政豈不冤哉

或曰恐僞造者多答曰既特造佳紙多爲印信鈔直重者又令善書者書之則作僞者必先造僞紙又刻印信再摹字跡有一不肖其姦立破較之私鑄錢僞造銀其難數倍而又隨處皆立辨鈔之人重法以誅

作僞之人重賞以獎告僞之人則僞造自可息矣

或曰恐民不樂行鈔答曰今京師民間貿易皆用錢票遠方商賈皆用會票已不異於用鈔矣間有錢莊歇閉而票不能取錢則民受其害而民終肯用錢票者以便易故耳況國家所用之鈔有散有收永保無虞錢可易鈔鈔可易錢便易之極而民翻不樂從乎

或曰今錢漕一經胥吏之手卽有浮收若行鈔則弊更不可測答曰錢漕所以能浮收者以每縣各分疆界也故胥吏得以持權若換鈔則所設官局錢莊甚多隨地可以換易胥吏安得持權且錢漕不許包完故胥吏得以勒制小民若以鈔納稅儘可託紳士代納胥吏又安敢勒制之乎又按錢漕之浮收也彼亦有所藉口也曰米色之醜也解費之重也若行鈔彼又無所藉以爲名矣吾正恐胥吏之無可作弊而奉行不力故加百分之一以予之豈懼其侵漁乎

或曰銀與銅乃堅剛不壞之物而鈔不可久答曰昔之造鈔制度苟簡故易於毀壞今之造鈔程式精工紙料堅厚大者裝潢成卷藏之於函可數百年不壞小者裱糊行用二貫以下仍用錢則不至於甚繁雖小鈔亦可十數年卽有霉壞仍准其納糧充稅解部焚毀可以免倒換之累於民無損若慮水火之虞則以皮木爲函可以入水不濡以金石爲函可以入火不熱何易壞之有

或曰以楮爲幣是以無用爲有用近於欺民之術答曰銅之爲物寒不可衣飢不可食聖人制爲錢以奔走天下是亦以無用爲有用也設令三代上有紙安知聖人不以之造幣乎若必以有用爲幣則有用莫如帛然固不可以爲幣明也

或曰恐物價騰踴答曰物價之所以貴者以物少而錢多也今以鈔易銀錢不爲之多而物不爲之少物價何以騰踴乎

或曰恐犯罪者多答曰僞造既難則犯者自少至於民之換鈔既獲一分之利彼自願從朝廷未嘗強之使換也蓋立法但禁僞銀不禁藏銀何犯罪之有且從此而鉛錢僞銀之弊絕盜賊剗銀之風亦絕則獄訟可省而論者反慮犯罪者多謬矣

或曰用鈔但利國耳於民何預答曰國用既足則官加俸吏增祿田賦可減關稅可輕鰥寡孤獨皆養之由是興水利墾荒田積義倉修學校使將天下無一夫之不獲豈止利國已哉

或曰何不銀鈔兼用答曰苟欲兩利而俱存之則銀與鈔必互相低昂而其價不能畫一也明之已事可徵矣明初禁銀不用而鈔行其後自弛其禁而鈔漸不行故必廢銀不用而後鈔重也

或曰何不并錢廢之答曰既用鈔則用錢之處自少若必并錢廢之則鈔必瑣屑而不可行也

或曰天下之銀盡收於上民間不慮其空乎答曰銀既收於上上亦無所用之則當減價仍散之於下使民間得爲器皿但當嚴禁其爲弊耳如是則銀價必甚賤而鈔益寶貴此本齊高帝金土同價之意而善用之者

或曰宋孝宗言行用會子少則重多則輕今準天下銀而制鈔無乃太多答曰以天下論銀之行用本慮其少則以銀易鈔適如其數雖倍加之尙未至於多而輕也且必二十年後添造自不患其日多也

或曰宋富公弼言交子之法必積錢爲本今行鈔而不以積銀爲本安在可行答曰此又古今時勢之不同古人以鈔代錢相輔而行故必積錢爲本今則以鈔易銀廢銀不用安用積銀爲本哉百姓有萬億之銀國家造萬億之鈔以易之民間所有之銀卽國家用鈔之本與宋之時勢異矣

或曰馬端臨言用鈔則下無犯銅之禁今何以用鈔而復禁銅答曰必禁銅爲器方可絕私鑄私毀之兩弊又不遽禁銅而以鈔買之則民亦樂從矣較之賈誼七福之說劉秩五利之議更爲便易

或曰銀可分用而鈔難零折答曰鈔既分爲七等又有錢三等以佐之亦何事其分折乎

或曰恐事涉煩擾未免駭民答曰今天下簿書出納律例科條其事甚瑣不聞厭其煩擾豈以操天下錢幣之大權而可慮其煩擾乎且因民之所利而利之民又何駭

或曰中國既不以銀爲幣銀必入於外洋答曰外洋欲市中國之貨必先以銀易鈔彼之銀有盡而吾之鈔無窮則外洋之銀且入於中國而中國之鈔且行之外洋矣豈慮銀之入洋外哉

或曰萬一國家復用銀而不用鈔豈不害民答曰天下既安於行鈔之利後世必無廢鈔之事正不必過慮也

或曰國家何不徑自行鈔而必易民間之銀乎答曰以鈔易銀非貪天下之銀也蓋徑自用鈔則銀歸無用而富家之藏銀者受其害矣惟以銀易鈔則民之貧富適如其故富者自不怨矣

或曰民以鈔虛銀實終藏銀而不易鈔則何如答曰民之欲藏銀者恐鈔有時不用耳今若明示以歷久不改彼百姓安肯舍目前現用之鈔而藏不准爲幣之銀乎

或曰恐富家藏錢而錢少則如何答曰宋金元鈔法屢更故富家不蓄鈔而蓄錢若一定不移則藏錢繁而藏鈔簡民又何樂爲此乎且國家可做唐時設立限制使藏錢不得過多自不至於錢荒矣

或曰設民以數萬之鈔盡欲易錢則錢莊何以給之答曰大鈔惟准易小鈔小錢方准易錢且民間藏錢不准過一千貫又豈慮其難給乎

或曰顧氏日知錄嘗極言鈔法不可行通人之論似不可違答曰顧氏見鈔之廢以爲帝王之權有所不

行而不知特由於錢糧不收鈔之故也且顧氏所惡者宋金元明之鈔耳今能盡舉其弊而去之雖亭林先生復生亦必以爲可行矣

或曰鈔行而財用足則風俗奢侈亦一弊也答曰沃土之民不材理固有之然加以教既富方穀亦易爲善豈反慮其足耶

或曰如此不幾於聚斂乎答曰所惡於聚斂者爲其剝民以利國也若鈔法則並未取民分毫之利而民反受其益豈可與桑弘羊之平準王安石之青苗同日語哉

或曰恐奉行者不皆得人雖良法豈能無弊答曰天下之法皆可以生弊然立法之初必先求其盡善而後行至其小小利害又當隨時變通之而大體卒不可改但得賢者一二人操其權則其下奉行之人又誰敢舞弊乎

或曰此外豈別無足財之策何事行鈔答曰天下之財止有此數損上則益下損下則益上故計臣言富國之道未有不病民者司馬公所以言不加賦而國用足必無之理也惟行鈔則取之不盡而非取於民也實爲法之良者第前人行之尙未能盡其妙耳

金史云有司乞罷七年釐革之限交鈔字昏方換而收斂無術出多入少民寢輕之

按出多入少最是行鈔大病鈔之所以輕也況更有出而無入耶至於鈔輕而議更造則民病而鈔益輕矣

金宣宗貞祐三年胥鼎上言曰今之物重其弊由於鈔窒有出而無入也雖院務稅增收數倍而所納皆十貫例大鈔此何益哉今十貫例者民間甚多以無所歸故市易多用見錢而鈔每貫僅直一錢曾不及工墨之費臣愚謂宜權禁見錢自是錢貨不用富家內困藏鏹之限外變交鈔屢弊皆至窘敗謂之坐化商人往往舟運貿易於江淮錢多入於宋矣

按錢與鈔當相需爲用欲重鈔而禁富家之多藏錢可也竟欲禁錢不用過矣

金史曰在官利於用大鈔而大鈔出多民益見輕在私利於得小鈔而小鈔入多國亦無補於是禁官不得用大鈔已而恐民用銀而不用鈔則又責民以鈔納官以示必行先造二十貫至百貫例後造二百貫至千貫例先後輕重不倫民益眩惑及不得已則限以數年限以地方公私受納限以分數由是民疑日深其間易交鈔爲寶券寶券未久更作通寶準銀并用通寶未久復作寶泉寶泉未久織綾印造名曰珍貨珍貨未久復作寶會訖無定制而金祚訖矣

按金之未造疲於用兵雖使貨財山積亦必不足於用矣而急急屢更其鈔法有何益哉若以金之亡

而歸咎於鈔法之不可行是不揣其本而齊其末之論也 按在官利於用大鈔在民利於用小鈔此亦金之時勢使然若天下承平中外一家商賈流通則民亦甚便于用大鈔也今之會票或萬或千何不便之有乎

元史劉宣言原交鈔所起漢唐以來皆未嘗有宋紹興初軍餉不繼造此以誘商旅爲沿邊糴買之計比銅錢易於齎擎民甚便之稍有滯礙卽用見錢尙存古人子母相權之意日增月益其法寢弊

明史云憲宗令內外課程錢鈔兼收官俸軍餉亦兼支錢鈔是時錢一貫不能直錢一文而計鈔徵之民則每貫徵銀二分五釐民以大困正德三年以太倉積錢給官俸十分爲率錢一銀九嘉靖四年令宣課分司收稅鈔一貫折銀三釐錢七文折銀一分是時鈔久不行錢亦大壅益專用銀矣

按宋金元用鈔皆與一代相終始雖其間不能無弊然未有廢鈔而不用者獨明至中葉鈔竟不行何也以銀幣盛用故耳而銀幣所以盛一壞於太祖立法之初旣禁用金銀而九年復許以銀代輸租稅所以兩浙江西閩廣之民重錢輕鈔至以錢百六十文折鈔一貫而物價翔貴也再壞於英宗卽位收賦有米麥折銀之令遂減諸納鈔者而以米銀錢當鈔弛用銀之禁由是朝野率皆用銀其小者用錢而鈔壅不行也邱濬云鈔法不可行以用之者無權也信哉

明史鈔法自弘正間廢天啟時給事中惠世楊復請造行崇禎末有蔣臣者申其說擢爲戶部司務倪元璐方掌部事力主之然終不可行而止

按崇禎時國勢方殆卽欲行鈔民安肯信之哉所以當時識者皆追咎弘正間之廢鈔法也使鈔法行而不以銀爲重卽萬厯時礦稅之害亦何自而興哉

韓文公策問曰今天下穀愈多而帛愈賤人愈困者何也耕者不多而穀有餘蠶者不多而帛有餘宜足而反不足此其故又何也

按此乃錢荒之弊唐人用錢其弊如此今天下用銀能無銀荒之弊乎欲救其弊固莫如用鈔也

日知錄曰唐宋以前上下通行之貨一皆以錢而已未嘗用銀漢書食貨志言秦并天下幣爲二等而珠玉龜貝銀錫之屬爲器飾不爲幣孝武所造白金三品尋廢不行舊唐書憲宗元和三年六月詔曰天下有銀之山必有銅礦銅者可資於鼓鑄銀者無益於生人其天下自五嶺以北見采銀坑並宜禁斷然考之通典謂梁初惟京師及三吳荆鄧江湘梁益用錢其餘州郡則雜以穀帛交易交廣之域則全以金銀爲貨而唐韓愈奏狀亦言五嶺買賣一以銀元稹奏狀言自嶺南以金銀爲貨幣自巴以外亦以鹽帛爲交易黔巫溪用水銀朱硃綵繒巾帽以相市宋史仁宗紀景祐二年詔諸路歲輸緡錢福建二廣易以銀

江東以帛於是有以銀當緡錢者矣金史食貨志舊例銀每錠五十兩其直百貫民間或有截鑿之者其價亦隨低昂遂改鑄銀名承安寶貨一兩至十兩分五等每兩折錢二貫公私同見錢用又云更造興定寶泉每貫當通寶十五又以綾印製元光珍貨同銀鈔及餘鈔行之行之未久銀價日貴寶泉日賤民但以銀論價至元光二年寶泉幾於不用哀宗正大間民間但以銀市易此今日上下用銀之始

按銀之用始盛於金末至明中葉而益盛物莫能兩大此鈔法之所以壞也唐以前無鈔尙不用銀則旣用鈔用錢又何爲必用銀哉

日知錄云議者但言洪武間鈔法通行考之實錄二十七年八月丙戌禁用銅錢矣三十年三月甲子禁用金銀矣三十五年十二月甲寅命俸米折支鈔者每石增五貫爲十貫是國初造鈔之後不過數年而其法已漸壞不行於是有奸惡之條充賞之格而卒亦不能行也蓋昏爛倒換出入之弊必至於此乃以鈔之不利而并錢禁之廢堅剛可久之貨而行輒熟易敗之物宜其弗順於人情而卒至於滯閣後世興利之臣慎無言此可矣

按此一條可知明初立法之未善蓋金銀可禁銅錢則豈可禁乎亭林先生所以深惡鈔法者不過以其昏爛倒換出入之弊耳今若以佳紙製造大鈔選天下善書者書之裝潢糊裱行用時以函藏之又

何有昏爛倒換之虞乎小鈔必自二貫起則程式亦可精工行用者必加慎重而昏爛亦少唐宋人字畫傳至今者有矣豈以紙處其易壞哉又鈔之昏暗者准其納錢糧則陰用倒換之法而無其害矣惜乎前人造鈔見未及此恨不起亭林先生一質斯論也

日知錄云國初民間所納官糧皆米麥也或折以鈔布百官所受俸亦米也或折以鈔其後鈔不行而代以銀於是糧之重者愈重而俸之輕者愈輕其弊在於以鈔折米以米折鈔以銀折米而世莫究其源流也

此不善用鈔之弊後人所宜鑒也

文獻通考云歷代多卽坑冶附近之所置監鑄錢亦以錢之置日輕其用日廣不容不多置監以供用中興以來始轉而爲楮幣夫錢重而直少則多置監以鑄之可也楮輕而直多則就行都印造足矣今既有行在會子又有川引淮引湖會各自印造而其末也收換不行稱提無策何哉蓋直會子之初意非卽以會爲錢蓋以茶鹽鈔引之屬視之而暫以權錢耳然鈔引所直者重只令商人憑以取茶鹽香貨故必須分路會子則公私買賣支給無往不用且自一貫造至二百則是明以之當現錢矣又況齎輕用重千里之遠數萬之緡一夫之力尅日可到則何必川自川淮自淮湖自湖而使後來或廢或用號令反覆民聽

疑惑乎

按此見前人行鈔分地之弊

行鈔之功

宋張慤字伯誠高宗爲兵馬大元帥募諸道兵勤王慤飛輓踵道建議卽元帥府印給票鈔以便商旅不聞旬得緡錢五十萬以佐軍高宗器重之慤善理財論錢穀利害猶指諸掌

河間府志

按此見行軍時用鈔之便

宋陝西河東觀察使官自搬運置務拘賣兵部員外郎范祥始爲鈔法令商人就邊郡入錢售鈔請鹽任其私賣得錢以實塞下省數十郡搬運之費

衍義補

按此見行鹽用鈔之便

宋高宗時錢端禮知臨安府建言楮幣已行累月合支官錢造會子詔入都茶場置會子務錢端禮爲六務出納制用皆有法

按鈔法亦在奉行之得其人端禮亦善於立法者

宋史嘉定五年制臣劉光祖乃會總所以第六界新會五萬緡令軍民以舊楮二而易其一繼又令軍民

以一楮半而易其一又請於朝添給新楮十萬軍民賴之

元劉肅洛水人擢正定宣撫使中統新鈔行罷銀鈔不用正定以銀鈔交通於外者凡八千餘貫公私囂然莫知所措肅建三策一曰仍舊鈔二曰新舊兼用三曰官以新鈔如數易舊中書從其第三策遂降鈔五十萬貫

按此良吏之能惠其民者行鈔先以利民爲主其次則不累民可也

廣鈔之利

金史云大定八年民有犯銅禁者上曰銷錢作銅舊有禁令然民間猶有鑄鏡者非銷錢而何遂併禁之十二年上曰金銀山澤之利當以與民惟錢不當私鑄今國家財用豐盈若流布四方與在官何異

按文獻通考云上無搜銅之勞下無犯禁之苦亦一便也以此爲行鈔之利然行鈔亦豈能全不用錢乎旣用錢則必防私鑄私毀之弊是銅禁仍未可弛也要之用鈔之利豈止於此

李紱請嚴禁銅疏云錢文入銅鋪之爐卽化爲銅而未化之前原係制錢不可得而捕也旣化之後已成廢銅又不可得而捕也惟禁斷撻造銅器之鋪則銷毀亦無所用而銷毀之弊不禁而自除矣今現在功令止禁黃銅未禁白銅與紅銅也議者以白銅非制錢所用不知今之所謂白銅皆黃銅也議者以紅銅

非制錢所化不知今之紅銅皆黃銅也銅爲錠鏤煮以藥水可爲假銀豈不能爲白銅嘉興洪爐以藥水染之作古銅色豈不可充紅銅故臣謂今所行紅白銅皆黃銅也臣請自鑄鏡及樂器而外一切撻造黃銅白銅紅銅之鋪盡行禁絕犯者發充邊遠則國寶流通矣

戶部尙書海望奏言錢文爲民間日用所需近年以來鼓鑄無缺價直昂貴建議者莫不多求禁銅之法而奉行不善易滋弊竇夫銅器久布民間一旦禁之勿用則其情不便胥吏借此需索刁民借此訛傳得賄則賣官法不得則入人罪搜括難盡用法不均其弊一也民隱旣難上聞有司未必皆賢民間交納銅器或有侵蝕扣剋僅得半價者或有除去使費空手而歸者名爲收銅實爲勒取其弊二也此等銅質本極粗雜加之銷壞一經錢局鎔化折耗甚多所得不償所失其弊三也又況黃銅乃係紅銅白銅配搭而成是以百萬斤之黃銅器皿其中卽有紅銅五十六萬斤今禁黃銅而不禁紅銅是較之未禁之先銅又多費而適以昂其價直速其私毀故旣禁黃銅之後白銅甚多皆姦匠銷毀制錢攪藥煮白以成器皿其弊四也

按禁銅之令自古行之漢賈誼以爲七福可致唐劉秩有五利之說考之前史並申禁令若我朝銅產豐饒礦冶之利自足以流轉而不窮原無藉民間所有之銅以充鼓鑄然欲絕私鑄私毀之源不得

不嚴銅器之禁雍正四年嚴禁造用黃銅器皿是時每銅器百斤官給價銀十一兩九錢而贏鑄錢除工料外以每串爲銀一兩計之實止得八兩四錢有奇故同一禁銅也古者專欲爲利於上而我朝之暫行於一時者專欲止弊於民海望請罷銅禁恐其擾累於民然苟能嚴飭官吏何至累民且行之數年銅器收畢胥吏亦無可騷擾矣至於黃銅能變而爲白銅自當并紅銅白銅而禁之不當因此而并黃銅罷之海望李紱二疏論者終以李疏爲是

邱家穗銅鈔議曰錢法之所以壅滯不行者非患其太簡而失之重卽患其過繁而失之輕也要存權爲母子之制而簡以統繁繁以分簡俾其輕重兼行以相爲流通而已矣今天下之錢大率準於漢之五銖唐之開元而無前代甚輕甚重之患然猶慮其勢日趨於輕而不足以爲重者以其一文僅當一釐之用繁而不簡分而無統而子母之制不立故也竊見自漢武令諸王侯製白鹿皮爲幣而後人易以楮至宋元明三朝始有交子會子寶鈔之法皆自一貫至百千貫以代現錢之用究其爲製不過方尺之紙印文其上而可以易數十百錢之物其費省於錢十倍而利用無疆又不啻過之顧楮之爲弊也用勞而易毀質薄而難全而其上刊有定式專視區區之印文以爲照驗卽使製造者極其工緻而傳染未幾已歸於斷爛而不可以復辨上之人始不得已屢取而更造之而新陳出入之間動多詐僞抑勒不可禁止如前

明行寶鈔法每一貫準錢一千銀一兩曾未及中葉而已漸輕漸減其後一貫之鈔不足抵一二文之用竟以字跡漫滅濫惡不堪而罷蓋以累朝數十百年之永利而終莫之能守者由此故也竊謂鈔法之廢久矣苟欲神明變通而爲可久之計固不必襲紙幣之虛名亦不當用虛薄易爛之紙莫若取白銅之精好者銷鑄爲鈔如今之錢式而稍加重大鑊以文字面曰康熙寶鈔背曰準五準十之類以至準百爲止而其孔中則別之以圓取其內外圓通流行錢法之意要使內局自鑄定爲一式輕重纖毫不容增減以杜僞造之弊用是雜行於散錢之中有鈔爲母以統錢之繁有錢爲子以分鈔之簡既不若前明寶鈔之易爛而又可收宋元交子會子之用其亦庶幾古人作輕作重之意而足以救古人錢法之靡也歟

按銅鈔與古人之鑄大錢無異此法非嚴禁銅立造僞之賞殆不可行也且至於當百而止則民猶未便豈若紙鈔之無窮乎彼特患霉爛耳不知易於霉爛者因其製作苟簡而行用多也若鈔值既重則行用較少儘可裝潢成卷藏之以函又豈患其易弊哉且旣行紙鈔又可兼鑄當百大錢也

陸世儀曰今朝廷用錢每便於發不便於收此由純用小錢無子母相權之法故也愚謂今後官民易交勢當用錢者小錢難於箇數竟用當十大錢出入瞭然無耗損兌折之弊亦一法也 又曰宜於各處布政司或大府州處設立銀券司朝廷發官本造號券令客商往來者納券取銀出入之間量取路費微息

則客商無道路之虞朝廷有歲收之息似亦甚便

高珩曰鑄當十當百之錢則可以輕齎而遠行矣

按鑄大錢設銀券皆與鈔法相輔者也若既行鈔而復鑄當百之錢則鈔可自二貫起而二貫以下悉用大錢百錢以下悉用小錢不患於零折之難矣又造百貫以上之鈔即可當銀券之用而得古人飛錢之遺意以鈔收買民間之銅而鑄錢極其工巧則私鑄者無利而自息鑄大錢者尤必選最佳白銅鑊爲龍鳳文費本與價直略相當則私鑄無利禁民間行用銅器則私毀者無所售而亦自息此誠利國足民之要務也財用既足則仁政可以次第舉行矣 塗嘗擬時務策十數篇觀者頗不以爲非後閱諸書則前人多有先我而言者特所論有詳略耳因不欲存惟鈔法一事疑者十人而九前人亦罕有論及此者陸中丞切問齋文鈔賀方伯經世文編僅載銅鈔之說而於紙鈔之利則未之及故詳考諸書反覆思維求其有利無害之方著爲此編以就正四方有道焉



皇朝經世文續編卷四十九目錄

戶政二十六 錢幣下

籌議銀錢出入陝省礙難改易疏

林則徐

陛見恭紀

吳廷棟

平定州專用鐵錢流弊議

黃輔辰

銀幣論一

馬敬之

銀幣論二

馬敬之

用銀利幣論

姚文枬

請派大臣查辦疏

張楷

請將年終應解物料變通辦理疏

張之洞

請將晉省例解綢絹紙張折價解部片

張之洞

奏陳整頓滇省銅政事宜疏

岑毓英

請變通鼓鑄疏

張之洞

請開爐鑄錢疏

楊昌濬

閩省試鑄制錢改由機器局籌辦疏

楊昌濬

福建巡撫臣楊昌濬奏為

奏為

鑄錢局設在福州府城內

奏為

鑄錢局設在福州府城內

奏為

鑄錢局設在福州府城內

奏為

鑄錢局設在福州府城內

奏為

鑄錢局設在福州府城內

奏為

鑄錢局設在福州府城內

奏為

鑄錢局設在福州府城內

奏為

鑄錢局設在福州府城內

奏為

鑄錢局設在福州府城內

奏為

白

皇朝經世文續編卷四十九

上海葛士濬子源輯

戶政二十六 錢幣下

籌議銀錢出納陝省礙難改易疏

林則徐

竊照前准部咨奉 上諭穆彰阿等奏遵旨會議御史劉良駒條奏銀錢畫一章程一摺銀錢並重本係制用常經果能隨時酌覈不使輕重相懸裕國便民兩有裨益未可輒稱窒礙不思設法變通著該督撫等各就地方情形詳細體察悉心妥議具奏務使法立可以推行不致滋弊毋得任聽屬員巧爲推諉稍存畏難苟安之見僅以一奏塞責欽此又軍機大臣會同戶部議覆內閣侍讀學士朱嶠條奏貴錢濟銀一摺奉 旨依議欽此並抄錄各原奏咨行到陝當經前撫 臣 轉飭司道暨各府州酌覈籌議 臣 到任後復經諄飭細加體察設法變通不許畏難推諉去後茲據司道彙覈屬稟會議具詳前來 臣 思銀錢相輔而行利散於民而權操自上果能廣用錢之路自足持銀價之平惟變通本以濟時而制宜首須因地查部議章程四條本以陝西列入陸路六省之內固已知其非比東南各省一葦可杭而仍議令查明有無內河水路原冀一處能通舟楫卽於一處先令試行無如陝省七府五直隸州所屬九十一廳州縣之內

錯處於南北兩山者計已五十九處重巒疊嶂車轍尙不能通此外三十二處雖屬平原之地亦無內河水路可達省垣是以行旅往來非車卽馱並有馱載亦不能通之處則須雇夫背負脚費愈繁此費若出諸官則恐滋虧空之端若取諸民又恐增派累之弊是陸路之難以運錢實係限於地勢似不能勉強而行也且陝省銀錢市價長落無常有時竟與別省迥異如本年七月內臣甫到西安省城每紋銀一兩可換制錢一千八百餘文迨至九十月間每兩僅換錢一千二百文不等較前兩月頓減錢五百餘文之多衆人皆以爲詫異訪詢其故則僉稱歲歉糧貴之時銀價必然跌落其理亦不可解如果此後銀皆落價似亦相宜然又忽低忽昂不能豫料且當陝省銀賤之際鄰省銀價仍昂而未聞有市僧販錢來陝買銀以圖獲利者可見陸路運費太大不能取贏若以市僧所不能爲者責令有司爲之其勢自更不易查內閣侍讀學士朱嶠原奏請將各屬銀錢視省垣時價爲準今以陝省觀之卽有難以作準者如省城現在銀賤而各屬之銀偏貴則領錢而回者不能與該處銀價相敵州縣不甘賠累卽難強以遵行且缺分衝僻不同錢糧多寡亦異有此屬之所解而爲彼屬之所領者領錢之人非卽解錢之人稍有參差遂滋爭執似亦非上司所能強制若論常年稅課原可銀錢並收但查陝省額徵商稅以及地畜牙當鹽茶磨鐵各課每年共銀六萬八千五百餘兩內除鹽課項下支給西安將軍養廉銀一千六百兩外其餘皆

應報部候撥此正部議所云撥解之款應照舊徵銀不能改議者也以工程言之近年應修各工概因經費短絀奉文停止卽間有刻不可緩奏准辦理之工亦係爲數不多通年無幾或因本有息款始准支銷與其改用錢文仍不如加意撙節之爲有益也惟陝省留支項下有可以變通用錢之處如文武各官養廉公費並各屬額支夫馬工料及各關局額支收稅書役口食等款俱可搭放錢文查道光二十三年覆奏陝局減卯開鑄案內卽已議准凡養廉等項每領銀一兩內搭錢一百文抵作銀一錢每年共搭錢三萬六百四十三串三百六文共扣回庫銀三萬六百四十三兩三錢六釐按季報部現仍遵行無異是變通用錢之議陝省所辦已在他省之先其未經搭錢者現扣六分平頭計每年扣銀亦在二萬兩以上若再加搭錢文則減平一項轉覺扣不如數且卽使此等款內再令減銀添錢亦不過杯水車薪於大局似仍無濟至兵餉項下未便再搭錢文則前撫臣李星沅先已奏荷 恩俞自毋庸議當此權衡制用上厯宵旰疇咨臣但有一得之愚斷不敢存苟安之見惟就陝局情形細加體察實有難以改易者亦有業已變通者應請仍循舊章庶免轉生窒礙

陸見恭紀丁巳

吳廷棟

丙辰歲黃河潰決大名之開東長被水成災請賑奉 旨派 臣廷棟 稽查賑務仲冬蒙 恩升授山東藩

司時農部以大錢壅滯不行歸咎直省不肯疏通行使奏奉 諭旨飭下直督自明歲上忙爲始兼收三

成大錢三成鈔票完納錢糧合省皆知勢不能行諸多窒礙因 諭旨嚴切有不如奉行私收實銀以枉

法贓論之語督臣不敢上陳懼干阻撓之罪合省人心皇皇迄無補救善策 廷棟於丁巳仲春 陛見直

督因奉部文疏通大錢之條陳於現行大錢二成奏明推廣行使三成臨歧諄屬 廷棟面奏情形 廷棟至

京二十一日進見 上問賑務及河決情形一一據實陳奏二十二日再進見 上卽問直隸能否行使

大錢對曰直隸市肆前曾出示行使大錢二成今春復推廣行使三成小民謹奉公令原屬行使其實市

中買賣價值百文之物因行使大錢二成卽索價百二十文今行使大錢三成卽索價加三成暗中折算

除去三成大錢不計 臣不敢一言欺飾竊謂此雖名爲行使實不得謂爲流通 國家立法必先便於民

方可行必先信於民方能行現奉 諭旨直隸自今歲上忙爲始錢糧卽收三成大錢三成鈔票是十成

實銀已遞減去六成在百姓似宜歡忻鼓舞急於奉行乃反懷疑觀望隱生顧慮者必有所不便不信也

直隸計二百餘萬錢糧若收三成大錢以京錢四串抵銀一兩計收二百餘萬串大錢民間安能驟得如

許大錢將來私鑄必由此充斥恐誅之不可勝誅如不收私鑄則可指爲阻撓或折收制錢又干枉法姦

民得以挾制其上矣倘謂旣收大錢如部文所言京中必有商販自然疏通將大錢由京運直竊謂商販

所圖者利耳今以十文制錢買一當十大錢運至直省仍賣十文制錢初無利息空增運費川資謂自多興販必無是理設有興販定是私鑄而影射官錢其弊何可勝言至各屬所收大錢運交藩庫其運費又將何出臣駐開州以一州而論應收錢糧將及八萬以三成大錢而計合二萬四千兩以四串京錢抵銀一兩合九萬六千串每車運大錢六百串計車一百六十輛至省十一站每車四串一站計一車四十四串共需七千串有零此費取之民則爲浮收出自官必無力賠墊況由藩庫支放又需車費此亦窒礙難行之一端矣官民之情如此上忙錢糧恐難照常輸將直隸乃畿輔重地畿輔安靜足以拱衛京師前此所收銀七票三支放則銀票各半藩庫多此二成實銀方足以供周轉卽去歲大賑及今春展賑計用實銀十九萬有零皆賴此二成實銀撥發否則豈能鈔票大錢分給災民乎今年黃河決口未塞直隸水災必重若議賑卹費將何出又

東陵

差借資民力必先由藩庫墊發方不至緩不及事倘無款可撥必將

預取於民操切太急恐抗糧抗差別滋事端必所不免外省情形各有不同在因地制宜酌量辦理督撫大臣受恩深重當此經費支絀之時如大錢可以疏通豈肯不盡心籌畫臣非謂大錢必不可行似宜以大錢爲母以制錢爲子必子母相權而子多於母方可漸次通行尤必禁令畫一不致朝更暮改庶足取信於民上始而靜聽繼則連聲相應曰據此無論官運商運仍是不行對曰若能行自然流通不待

販運情事實是如此臣不敢一言欺飾各處行使大錢城內行使城外卽不能行使如何得謂流通今市中但見大錢不見制錢小民實是不便窮民日用零星之物僅值數文卽物價亦必有奇零市上只有當十大錢並無當一制錢豈非不便今百物騰踊實由於此蓋官以一錢爲當十民以當十爲一錢欲救此弊只有添鑄鐵制錢停鑄大錢以平其勢臣國家用鈔票大錢原爲每月搭放兵餉起見惟多搭幾成制錢放散則多一成制錢自能平一成物價今戶工兩部不肯多鑄制錢臣曾訪問其故據云工本太費須兩文錢鑄一文似是物料工價底本太貴臣在直隸見寶直局所鑄鐵制錢雖無大盈餘不致如是之費國家錢法惟無餘利則私鑄不禁而自息其利權可操之自上今市上不見制錢非是無制錢乃是市僧居奇銀一兩換大錢八串換制錢四串臣朝廷多方疏通大錢立一法卽增一弊皆爲市商所假借以遂其操縱伸縮之計愈欲重大錢而大錢愈輕實由科條太多朝更夕改民無適從之故臣國家先不自信何能取信於民前聞順天府出示不准挑剔大錢姦徒因故持破爛大錢買物有不收者卽勾通差役以阻撓大錢向其訛詐順天府查知前示生弊又出示准挑剔破爛大錢不用遂有借挑剔而不收大錢者民間遂訛傳不行使鐵大錢而鐵大錢竟廢而不用此禁令不一之一端也現在市上並不見有當十鐵大錢則民間不用可知乃戶工二部猶日鑄鐵大錢何也臣國家設法疏通報捐則收鐵大錢二成今

方平糶又全收鐵大錢將來大錢盡歸於官只有搭放兵餉一途兵持鐵大錢無處使用貧民小賈所得鐵大錢亦成棄物是兵民交困矣且御史條陳各持一說固有目擊時艱爲民生起見者恐或因皇上意在疏通大錢揣摩迎合附和進言議論紛然徒足惑人聽聞亦所不免若因之多立章程流弊愈甚卽如銀票鈔票本係一例頒行乃無端自分輕重欲廢銀票而專用鈔票又准以銀票而換鈔票無怪銀票日輕也 問曰直省物價已騰貴否對曰收三成大錢之騰貴初張物價實已漸長直省錢糧舊章似未可輕改或於三成銀票內有願交大錢者當聽其便其零星小戶銀不成兩者亦聽交大錢似不宜限定成數致有窒礙今歲上忙錢糧若不早定畫一章程必多觀望 臣竊謂三成大錢章程未免操之太急人見諭旨嚴切懼干阻撓之罪勢既難行必至陽奉陰違諸弊叢生 皇上問及 臣臣實不敢一字欺朦上領之 臣廷棟退出嗣至 朝房見大農翁協揆問及大錢可否流通謹以所奏對大農亦以爲然先是戶局日鑄大錢八成制錢二成卽因是易爲制錢八大錢二成繼見少農沈公兆霖時管理錢法堂 廷棟亦進言如前少農稱快囑 廷棟具摺上陳 廷棟以現爲山東官 皇上問及故不敢不直陳究不敢出位具摺陳直隸事少農復親至寓諄切言之 廷棟謹謝謂可俟新任直督譚公廷襄奏止之 廷棟復謁樞庭穆公蔭敬述奏對之言穆公亦擊節謂胸中鬱氣今爲一暢 廷棟因問曰公旣以 棟言爲然當日與

農部會議時何不阻止公曰諸邸力持此議余力不能禁耳

廷棟

至東省後卽以所奏對寄書直省錢方

伯炘和方伯亦深稱之謂制軍將蒞任可以奏明挽回後制軍

陛見與諸邸會議遂得停止收三成

錢之議而民心始靖足徵時政之弊特患無人上達今

聖主從善納言雖

朝議意在必行之法但能

明指其弊無不立卽

俯從而舉朝每以

詔令已行遂諉爲不能補救何耶己未仲冬月

臣吳

廷棟

追

憶恭紀

平定州專用鐵錢流弊議

黃輔辰

晉省平定州設立戶部寶泉分局原係移鑪就鐵鑄錢運京以濟銅錢之乏繼因錢質過低復令就地行銷除工本外將每歲餘息解部咸豐七年據分局咨稱每年鑄錢十九萬餘串平定一州難於行銷請各府州縣一律行使鐵錢不分成數當體察輿情礙難更變咨部在案本年添設三鑪鑄錢愈增十月間平定紳民呈請漸次搭用銅制錢由院批飭在案而分局部員總以阻遏爲辭查晉省鐵錢難於暢行實因各鎮集銅幣尙數周轉民間行使不願更張咸豐五年奉准部咨行令搭放鐵錢當經王撫憲率屬捐資於省城試鑄鐵錢復經分局陸續解到鐵制錢二萬串由省城試行搭放一成當時民間雖無阻撓而行使究多勉強至省城數十里外商民仍不收用是以分局解到之鐵錢一年有餘始能放完而省城試鑄

之鐵錢則始終未能搭放若布爲號令以數十萬鐵錢向各州縣市易必至高擡銀價貽誤錢糧正供此
晉省鐵錢礙難通行曾經咨部之情形也嗣後平定壽陽盂縣等處因鐵錢時價較銅錢甚賤商民惑於
小利凡以銀易錢者均取鐵而棄銅奸商更將銅錢藏匿凡客商過往有易銅錢者得借此以居奇因是
銅錢日少鐵錢日增而銀價日貴矣據分局前咨每歲鑄鐵錢十九萬餘串之多即使此外無分文私鑄
行銷已屬不易況復增鑪鼓鑄有加無已直豫兩省以爲平定鐵錢暢行紛紛載運入境鐵錢愈多而愈
滯銀銅遂日少而日昂小民逐末所得鐵錢不足償本則百物騰貴貧民無以聊生必然之勢也查從前
試行鐵錢原未禁用銅錢現以銀價日昂民間仍請銅鐵並行不過欲借銅錢以減銀價并非棄鐵錢而
不用實因專用鐵錢則無從得錢而生計日感此又民間呈請銅錢並用之實在情形也查分局所重惟
在餘息易銀計每歲解部從前不過三萬餘兩而鑄錢則無有限制將欲行布於通省則征收錢糧必至
鐵多銅少難於易銀批解近年以來平定州徵解錢糧諸多窒礙固分局所目睹晉省錢糧爲數甚鉅奉
撥京協各餉全賴丁糧接濟稍有遲滯貽誤匪輕以數萬兩之餘息致礙數百萬之正供利害相懸固屬
不值若止平定行使則一州之用銀有限而分局之鑄錢無窮銀竭害生卽欲嚴法重刑勉強行使其勢
有所不能在分局之意以爲不費帑金坐獲餘息豈知利害相因利所在則衆爭趨之害將至則衆爭避

之爭趨之而利固難久爭避之而害更可虞且平定轄境皆在萬山之中平時稽查巡防已屬不易自設鑪以後匠作夫役并挖鐵運鐵及外來趁利各項人等日聚日多難免匪徒混迹其間久則易聚難散是歲出之利甚微而流貽之害甚大此更不可不慮也

銀幣論一

馬敬之

天下之大害曰飢寒天下之大利曰菽粟曰布帛菽粟極圭撮布帛極分寸權之以錢幣交易始鬯銀幣者權錢幣者也利宜與錢分行明中葉國賦頽徵銀迄本朝銀幣遂盛乾隆嘉慶間隩區廣郡婚喪之酬飲賓友之惠詒匪錢幣意若嫌天下之幣乃壹出於銀乃以錢權銀今置數者其前銀所欲也錢所欲也菽粟布帛所欲也然菽粟布帛提挈蹇頓卽以今制錢準之緡若重七觔一人所勝率二十緡而止或數百緡數千緡則非舟車運般末由致遠奔走天下惟銀幣乎銀幣生錢幣病菽粟布帛死貲累鉅億緡束局鑄囊橐篋焉便官吏便商賈便盜賊官吏商賈盜賊便吾農吾氓彌甚不便今夫不便而輾轉而已得銀猶可說也坑冶之設向兼采銀厥今永行禁閉市舶之集向資來銀厥今反虞透漏禁閉嚴銀源絕透漏多銀流決而又釵釧銷鎔去其一杯簪鑲嵌去其一椎箔研泥及雜物塗毀去其一是故銀幣耗農夫織婦畢歲勤動低估以售之所得之錢不可輸賦更進而權銀

近日鄉中并未聞以銀羅買者

日復一日錢并壅於

商賈不能得銀且不能得錢金之用珍於銀天下不憂金之耗者國家制幣在銀不在金也錢之用浩於銀天下不計錢之耗者鼓鑄未停抑供億所亟在銀不在錢也譬諸身菽粟布帛心膂也錢血脈也銀指爪毛髮也譬諸家菽粟布帛父母也錢子弟也銀傭隸婢妾也先指爪毛髮傭隸婢妾而後血脈子弟吾見心膂之堙鬱父母之軒囂而已矣以錢權銀菽粟布帛益賤銀益難得天下之人駸駸乎背棄閭井驚爲商賈必至愚至劣者自念孱懦姑隱忍緣隴剛而旬園廬而氣固囂然其不靖官吏則貪冒橫城府盜賊則攘奪橫江湖遲之數十年恐釋耒而倚市投杼而刺文者尙良民焉耳易曰物窮則變變則通通則久又曰節以制度不傷財不害民處極敝之時而不思變通之術節制之經坐令上虧帑藏下毒黔黎有志之士所欲搯擊而抵掌也宋熙甯中張方平疏言比年公私交困并苦乏錢農民皆變轉穀帛輸納見錢錢既難得穀帛益賤人情窘迫謂之錢荒方今天下豈不謂之銀荒者與

銀幣論二

馬敬之

救銀幣之耗不在不用銀幣也天之所施地之所生凡濟於用英君喆相方將輟宵旰創起宣導之矧乃銀幣天下不廢銀幣斷斷矣譚者顧踵沼輒云古未嘗以銀爲幣魏源氏近之達者也其軍儲篇亦云宋明以前銀不爲幣此惟漢書食貨志稱秦并天下幣爲二等而珠玉龜貝銀錫之屬爲器飾不爲幣爾太

皐始鑄金禹湯鑄歷山莊山之金不必其銀不必其非銀矣荆揚貢金三品梁州銀鐵并貢爾雅白金謂之銀其美者謂之鐐不必其幣不必其非幣矣漢武帝元狩四年造白金及皮幣少府多銀錫又造銀錫白金其後官鑄赤爪白金稍賤民弗寶用貢禹上諫宜罷采珠玉金銀鑄錢之官亡復以爲幣王莽卽眞溺信圖讖忌劉金刀乃罷錯刀契刀五銖錢更作金銀龜貝錢布之品名曰寶貨其銀貨二品則朱提八兩爲一流直一千五百八十他銀一流直千晉武帝保定元年河西諸郡或用西域金銀之錢如今通典梁初交廣之域全以金銀爲貨幣韓愈奏五嶺買賣一以銀元稹奏狀自嶺以南以金銀爲貨幣雖遐陬僻壤兼之市舶銀未通行固爲幣矣源又曰銀鑛開采唐以前史書從無其事而下篇引周禮卅人掌金玉錫石之地而爲之厲禁以守之若以時取之則物其地圖而授之巡其禁令謂冶坑開閉禁令之始庸當時獨遺銀邪後魏宣武延昌三年有司奏長安驪山有銀鑛二石得銀七兩其秋恆州上言白登山有銀鑛八石得銀七兩錫三百餘觔其色潔白有逾上品詔并罷常令采鑄云從無其事何邪貞觀初侍御史權萬紀上言宣饒二州銀大發采之歲可得數百萬緡帝以崙言稅銀之利黜萬紀一時燬意千古經制乎哉道不變者也法世變者也變法以牟利害卽階變法以斥利害卽祚錢子也菽粟布帛母也母可權子子可權母例錢於銀銀子而錢母錢幣不可權銀幣錢幣權銀幣錢幣痛輕菽粟布帛痛輕管商把

牢盆蕭留典會計不能使裕矣而況材管鑰量斗筭詰以大計弱晒強罵一二畸儒碩士罔顧事勢之宜與否矯枉偏持務伸己說徑行其說其不毒天下也幾希畢初所聞可以闕其口而奪之氣也

用銀利弊論

姚文枬

古之爲市者以其所有易其所無皆粟與器械而已上之取於民亦粟米布縷而已至不得已而後以錢權之而又未嘗專用錢也降及後世泉貨交易因時遞變而日趨於難至今日之用銀而極矣蓋嘗論之銀之爲用行之一方則可以之通行天下則不可行之一時則可行之以爲久遠之計則不可聽民之自爲交易則猶可征收支給上下通行則大不可何言之唐時嶺南買賣一以銀見韓愈元稹奏狀通典亦載梁初交廣之域全以金銀爲貨蓋地瀕南海坑冶多而海舶利也宋仁宗時詔諸路歲輸緡錢福建二廣易以銀蓋亦因之此則行之一方有餘而無不足者也夏有水患禹發歷山之金作幣以救民商有旱災湯發莊山之金作幣以救民此行之一時有利而無弊者也自元以來銀竟通行浸不可救至明初禁用甚嚴乃未幾而通行如故漸至賦稅俸工無一不銀積重之勢極矣當時議者極陳用銀之便行之既久吏民亦尙相安然而征收支給上下通用行之天下垂之久遠愚終以爲大不可者何也夫人心風俗國家之元氣也食貨者天下之元氣而國與民之所賴也銀旣通行則銀貴而粟賤粟賤而田輕於是天

下皆棄本而逐末夫務本則安於樸厚逐末則習爲黠詐其勢然也民務本則田野日闢食貨自饒而人皆飽煖民逐末則田多拋荒食貨日絀而人受飢寒又其勢然也黠詐之甚流爲姦惡飢寒之極歸於盜賊而銀者輕而易齎又適足以便奸惡之侵欺而使盜賊有所勸於是循環相生世變日增而靡所底止天下之元氣日耗一日此其不可者一也古者民有恆產朝廷制之故天下之利權皆歸於上後世井田旣廢寢不可問然錢之行也猶足以權食貨之輕重至上下通行一皆以銀則粟帛賤而民困制錢滯而國困獨所謂黠詐之民逐末致富起而爲豪商巨賈者稱貸則重利剝民居奇則厚貲積滯銀錢輕重之權出其操縱官民拱手而聽之夫朝野交困而豪猾擅其利已不可言朝野交困而豪猾擅其權尙可言乎此其不可者二也銀之出也非由於滇之各廠卽來自番舶然銀廠之設不耕而食者約有十萬餘人漢貢禹所謂一歲受飢且七十萬人者昔人指爲根本切實之論銀廠之置何以異此且近廠之地食貨必貴盜賊必多又煎煉之爐烟萎黃菽豆洗礦之溪水損削田苗至若供億一切九種種難罄是資於課者無多而害於民者實甚非計之得者也若專恃番舶則棄國中本有之貨而轉仰給於外番常變旣不可知漏卮已所難塞抑尤謀國者之所宜深念者矣此其不可者三也銀者飢不可食寒不可衣平時視爲至寶設遇干戈水旱而粟帛無可得易銀亦廢物而已故征給用銀無論逋賦愈多度支愈絀也卽能

府庫充盈亦非至計前明正統間以官倉儲積有餘令所在出積滯變輕齎乃自折銀之後不二三年水旱頻仍設法勸借至千石以上以賑凶荒者謂之義民詔復其家然空虛已見而相沿用銀仍未議改既而郡國大祲倉無見粟民思從亂國隨以亡豈非百世之鑒歟此其不可者四也夫合此四者言之則是銀之通行授權豪猾日耗元氣於不知且所出之途隘而積之府庫又緩急不足恃然而數百年來征收支給上下通用行之天下垂之久遠而未嘗廢然返者何也曰用銀則軍民省輓運之勞倉庾免紅朽之患其爲利也顯而四不可者害雖中於本原其爲害也隱顯者其利淺隱者其害深庸人見其顯不見其隱見其淺不見其深是以數百年來官民受困數倍於前而不知其由於用銀也卽有一二見及者又畏難苟安一誤再誤可勝歎乎夫物極則變變則通用銀至今日可謂極矣前此竟未議改或者變通之舉將留以有待於今日誠能詳考昔人之言赫然改法征收支給概不用銀使制錢流通食貨饒裕俾天下後世知盛朝之所爲超出尋常萬萬也豈不盛哉

請派大員查辦疏

光緒六年

張楷

本年十月二十五日奉 上諭此次戶部盤查寶泉局庫當十大錢有無虧短是否未將制錢盤查著戶部據實覆奏欽此十一月初四日戶部覆奏奉 旨將同治九年後歷任各該監督大使分別議處等因

欽此及見該部原摺所 奏盤查當十大錢尙爲明晰至所 奏宙宇庫制錢未能盤查情形則避罪諉

過含混模稜尙多不實不盡之處如原奏云錢質輕小多不如式夫式由部定豈有本部鑄錢而不如式者既不如式何以歷任監督交代時絕不驗明是非於停止盤查後陸續抽換斷不至此又云字樣模糊重六七分不等查係咸豐七年以前所鑄夫字樣模糊僅可以備數者私錢也豈有煌煌泉府預藏私錢之理此中情弊不問可知且字樣既已模糊矣安知非七年之後以私鑄而必斷爲七年以前之官鑄耶其抽換與否部臣何無一言及之至云此次奏借經費二千兩費用過半若全數穿出費用仍多不敷等語則愈不然夫錢質輕小不適於用一見了然不待穿出六萬餘串而後知也乃約略其詞謂大數不甚懸殊豈果爲經費起見乎抑別有難言者乎在部臣以事隔多年無從深究而不知關係大局非淺鮮也

帑項係該部職守此錢既不可用自當卽時舉發究詰其所由來而原奏乃云不值以可節之費盤無用之錢徐圖設法變通辦理若爲不甚愛惜也者是未經盤查以前該典守者憚其發覺尙思彌補既經盤查以後竟以無用入 告該典守者直可置身事外矣此風一倡異日銀庫中設有一鉛錫抽換者亦將諉爲某年以前所收援此例以邀免追究耶各直省庫欸設有如此類者亦將不之問耶是棄此項制錢事猶小而將來虧空 國帑不可究詰貽誤事機患更大也竊惟今日事勢其所最棘手者莫如餉糈

而餉糈之盈絀自戶部始戶部之綜核自庫儲始當此帑項奇絀積弊至於如是猶復支吾避就何以專責成而警慢藏相應請旨另派大臣認真嚴查有無抽換情弊再行辦理庶政體益肅流弊可除矣

請將年終應解物料變通辦理疏

光緒九年

山西巡撫

張之洞

竊惟晉省額解之物其大端有五曰鐵曰綢曰絹曰紙曰礪每年例解平鐵一批共八萬四百九十八斤好鐵四批共二十萬斤大潞綢一批共三十疋小潞綢一批共五十疋農桑絹一批共三百疋生素絹四批共一千二百疋遇閏加四十疋呈文紙一批共四萬張毛頭紙一批共一萬張硫礪一批共十萬斤各項物價運脚例皆動支地丁然價脚之不敷者數倍例欸有限各官攤捐不敷行戶幫貼騷然煩費官民苦之臣於上年六月具疏瀝陳晉省苦累情形請免攤捐並請將平好鐵一項議給津貼均蒙恩旨允准在案至綢絹紙三項前請折價解部經戶部工部內務府議覆仍令照舊造辦並准工部迭次催解硫礪前來查以上各宗物料在物產豐盈之時價廉之省尙以勞費無度以致累年均有積欠大祿以後官吏工商無不大困欠解愈多自臣抵省極力經營籌款設專局選擇廉幹之員厘剔弊端盡除冗費甘爲怨府力任其難計自上年正月至本年十一月共籌解平鐵二批好鐵十六批大潞綢二批小潞綢二批農桑絹二批生素絹八批呈文紙二批毛頭帑三批硫礪三批除臣任內兩年所解已足兩年之數外並

爲補解鐵礦帑十批論晉之物力實已竭盡無餘通計從前積欠截至光緒九年除戶部議免光緒三四五等年平好鐵十五批外尙有未解平鐵一批好鐵四十四批大潞綢四批小潞綢四批農桑絹十一批生素絹三十二批呈文紙六批毛頭紙十三批硫磺三批就此次欠數合而計之例價例腳之應動地丁者共需銀十萬六千六百餘兩帑價帑腳之應出攤捐者共需銀三十萬七千六百餘兩若必一一補解不惟攤捐已裁帑費無從取辦卽例應正動地丁之欸爲數已逾十萬庫儲未免太傷伏思以上數端但使年額無虧自可不闕於用而各物又皆由庫欸購辦而來非如官民逋欠錢糧多追一分於帑藏有一分之益今當度支匱乏之秋若耗損重金以求府庫充物積此纍纍不急之需輓轡轉輸致此陳陳相因之物似爲非計況攤捐所有自來自府州縣以至佐雜無不有之查欠此攤捐者遠近二十年外大小五百餘員或已物故或已叅劾或已離省在晉者十不存一凡欠解攤欸於例不能叅追卽使追呼亦終無濟至於工少商疲行戶乏絕更不待言如此時而欲追集此三十萬之攤欸竊恐雖以劉晏之才商鞅之法必亦有所不能徒令官民愁嘆文牘煩滋亦非所以修吏治而存政體也臣審度時勢綜核盈虛惟畫分新陳區別緩急查潞紬爲典禮之用硫磺乃軍實所資無論晉省如何竭蹶亦必新陳並辦擬自光緒十年爲始每年辦解本年大小潞綢硫磺各一批並搭解舊欠各一批至鐵絹紙三項質旣重滯數更

浩煩質重則轉運艱數煩則工費大正欵既鉅攤帑尤多今方仰沐 聖慈埽除積弊官民交慶喘息稍舒若此三項亦責以新陳並辦舊攤現不能追收新攤又不便科派如此鉅欵籌措何從且歷來部檄敦催責舊則移新責新則遺舊以致貽此鉅累牽搭拖延永無廓清之日此等辦法原可掩飾一時但事理既有所不可微臣愚拙之性亦有所不爲不得不瀝誠呼籲量請裁免合無仰懇 天恩俯念晉省彫敝之區公私交困准將同治三年分起至光緒八年分止欠解各批平鐵好鐵農桑絹生素絹呈文紙毛頭紙概予免解俾臣得以專力於額運年清年欵斷不至再有所虧卽按年認解之潞綢硫磺新陳各一批亦可兼籌無誤庶幾庫儲既節額運亦清官累既舒民困亦減種種皆有裨益出自 逾格鴻慈

請將晉省例解紬絹紙張折價解部片

光緒八年

張之洞

晉省常年例解大小潞紬八十疋生素絹一千二百疋毛頭紙一百萬張呈文帑四萬張上項諸色爲物甚菲而累及官民甚重所役馱載甚多潞紬並不出於潞安潞民但能養蠶不習機杼向在澤州織辦或雇澤匠到潞織辦或寄絲至豫省織辦大襪以後桑植不蕃機匠寥落如澤州機戶前約千有餘家五年前三十餘家今存米山鎮劉氏一家此不惟災餘之衰亦足見地利之遷移餘則外郡解絲供匠省城織造近年欠絲甚多解匠者十一州縣今有九州縣皆報故絕招募無人通計絲價織工運脚雜費解絹一

疋費銀十兩紙戶向以承應官差爲行頭胥吏所擾而蒲州紙戶流亡失業尤爲困苦屢次呈訴求免綜計綢浮于例價五倍絹紙浮于例價十倍又各項價腳不敷攤之通省一縣不齊則全批停運臣到任後多方督催甫於四月內各解一批綢解至光緒四年止絹紙解至光緒元年止此就解多者言之其餘各府積欠尙在十年以上查晉省土性彊蘖產絲犮縲水色沈闇練染無方織爲衣料不惟非江浙四川紬緞之比亦遠不如南陽鄖陽之繭緞僅與雲南所產相等並無足貴若生素農桑等絹質地尤爲疏薄略似京師羅底稀紗至毛頭呈文等紙裏粗色黯卽京師市肆通行之皮紙而潔白遜之竊考山西地產他無可稱惟煤鐵兩端利於民用其出最蕃而其質最良甲於他方鐵之爲物旣爲農器家人日用海疆機局之所必資而平日本爲薊遼秦豫江淮以南商賈轉販之所及所宜講求推廣招徠工商以爲足國富民之計故平好鐵一端臣此次疏中但懇津貼不請折納以其非他省所產之可敵故也若夫隨地皆有之物又不精良宜無關於任土作貢之義但使可以備用似不必輸之遠方按綢緞紙張皆以江南所產爲勝近年華商輪船暢行江海絲貨紙貨充牣津沽達于輦下由其轉輸輕利故物美而價廉都市之中何求不得卽如毛頭紙一百萬張呈文紙四萬張合計包裹繩索箱篋氈席解役行李共重三四萬斤晉地山路艱難任載有限用大車五十餘輛用驢羸則須三四百頭再加以他項綢絹勞民重役抑又可

知全省之中騷然煩費而運致此粗重之物此固因時制宜之制道所當斟酌者也合無抑懇 天恩俯念晉省積累物微運艱量予變通可否將此項綢絹紙張折支價例腳解部此外再由晉省籌款按照例價例腳解部現已行減實銀之數津貼銀二千七百一十四兩零一分三厘並舊章部飯一併附京餉之便搭解戶工兩部就近採買應用如此一轉移間內府曹司不闕需用不煩催迫而晉省承辦之民戶攤捐之州縣委解之佐雜微員均免賠累之苦共戴 皇仁實無涯涘伏查潞綢一項乾隆中葉以前額解大綢一百疋小綢三百疋乾隆三十四年減爲今之數旋又復舊嘉慶十一年工部奏准停止至嘉慶十五年始又飭令織辦遂減定爲今日之數絹疋一項咸豐二年戶部有籌議節用之疏奏准停其織辦至咸豐六年復舊毛頭紙一項乾隆三十九年戶部奏准停辦折價解部至乾隆五十一年始又飭解本色呈文紙一項原額一萬張乾隆三十四年增至今數嘉慶五年戶部奏准停解嘉慶八年復舊咸豐三年戶部奏准停辦折價解部以節帑項至咸豐六年始又飭解本色又如晉省原有辦解高錫黃蜡之例於乾隆道光年間先後停止此皆 先朝舊典屢有變通可見核減有曾奉之 恩綸而折解有可稽之故事 聖人時中所謂化而裁之與民宜之者矣

奏陳整頓滇省銅政事宜疏

光緒九年

雲貴總督

岑毓英

竊據藩司唐炯詳稱滇省承平時額運京銅及各省採辦本省鼓鑄不下數百萬廠務之盛如此軍興後遂爾廢弛同治十三年奏請試辦無異創始歷年以來加本脚免抽課銅籌復經費體恤調劑不爲不至而每年湊運五十萬猶復拮据非必銅老山空其故略有數端一則砂丁招集不易從前六廠動輒十數萬人小廠亦不下數萬非獨本省窮民凡川湖兩粵力作功苦之人皆來此以求生活滇諺所謂丁由利集銅由丁出也自經兵燹加以疾疫戶口凋歿僅存十分之一而商賈不能流通田土又多荒蕪凡百生計艱難外省客民遂爾裹足砂丁既少雖有美礦無憑攻採一則爐戶虧折太甚向例銅砂煎出每百斤徵課十斤耗銅四斤二兩餘銅歸官收買乃法久弊生於是銅本則扣減平色留難守候收銅則私製大料重兌浮收加以看銅改煎種種需索每銅百斤爐戶獲價有僅得銀四五兩者不敷開銷勢必填舊挪新日久積成巨欠而本省市價每百斤值銀十餘兩鄰省二十餘兩小民趨利罔知犯法良善歇業狡黠走私而廠務日形棘手矣一則民間資本不厚向來辦廠見功遲速不能預期而分尖洩如置備器具修橋開路以及油米柴炭需費甚鉅從前賴外省富商挾資來滇開採百物流通民間生計藉以裕饒至於本省戶鮮殷實不過零星湊集朋充夥辦軍興後常年衣食率多不給更無餘資以謀廠利各廠爐戶既無實本以開新山又不忍舍舊時礮硎但陶荒洗燥藉領官項圖混目前而承辦之員大都見小欲速不

謀久遠長此不過冀復額運恐竟無期一則地方官辦理弊多從前定章本有駐廠委員原以地方官事務煩多不能親駐廠中勢必假手親幕丁胥官商情隔徒滋弊竇自前署藩司倉景愉請改歸地方官辦理東川永北等處爐戶虧折拖欠日深不獨民間視爲畏途不肯與官交涉卽其餘有廠各屬地方官亦皆畏累卻顧率以硃老山空一稟搪塞此時若不改併更張勢必江河日下以後益無從整頓該司抵任以來凡遇官紳商賈稍知廠務卽向其諮訪利弊各令條陳並派員弁徧歷東昭永北各廠就詢熟悉廠務老民旣得悉受病之源因考求補救之法咸謂銅非丁不出丁非利不集現在蜀患人多滇患人少宜先開辦附近川邊之東昭永北武定各廠以次及於曲靖楚雄順寧開化臨安庶便招集惟人情轉徙無常必使其謀生有資然後視爲樂土相率而至是宜復還運道俾商賈流通口岸日開謀生路廣遠近窮民移家就室生聚滋多不但日前廠務有益而各屬田土亦可冀次第開墾此實事理相同有必然者至於裁革使費以絕弊端預借底本以示體恤寬予年限以資調劑別開新廠以圖久遠官商並辦以期合作得以順協人情鼓舞興作一年之間必有起色三年之後決著成效該司非確有把握萬不敢遽議更張等情詳請具奏前來臣覆查滇省銅務開辦已將十稔迭經督同各任藩司竭辦幾於寢食俱廢法經屢變而效尙難期推原其故求循法之人易求核實籌畫善於行法之人難茲該司視力旣堅體察亦均

真切所議各條經臣等逐加商度意見皆同立論已具端倪辦理當收實效自未便稍拘更張之見致悞整頓之方謹將詳到章程五條另繕清單恭呈 御覽並請 旨飭部核議立案以便遵行其餘一切事宜容飭司隨時體察情形再行酌議辦理

請變通鼓鑄疏

光緒十一年

兩廣總督

張之洞

黔省寶黔局鼓鑄事宜向係在于貴陽大定兩府設局興辦軍興後因工本無出停鑪略已二十餘年其京鉛一項陸續運存四川永瀘兩局積至二千餘萬斤雖奏明變價濟餉而銷路阻滯計先後委員運銷不過百餘萬斤迄今未經售竣現并除去撥滇之鉛斤所餘尙多臣嗣以需費愈繁軍事甚棘協餉不至羅網俱窮艱窘情形至斯而極當萬無可籌之中爲瑣屑權宜之計舍銷鉛別無生財良策第賣鉛必須與鑄錢相輔而行而鑄錢又非寬籌工本不可當茲庫儲如洗之時萬難有此鉅欸因查前雲南撫臣林鴻年前因滇省銅廠久廢奏請在於東川府屬招商墊本開廠辦銅欽奉 諭旨允准在案黔省與滇省同一艱難採銅既可招商鑄錢自可興辦溯自雍正年間滇省運錢赴漢口交易曾經辦有成案茲值黔餉支絀似亦可仿照變通辦理且設官局之貴陽大定兩府賊氛未靖道途多阻亦非商民所樂趨臣與軍需局司道悉心籌議查得仁懷廳界連川省商賈輻輳舟楫可通買銅運鉛較爲便捷當將鑄錢章程

賣鉛價值妥議條款委員前赴該廳相度地勢設立鼓鑄局出示曉諭招集殷富商民由永瀘兩局領買官鉛赴局興辦凡建造鑪房屋覓工匠及製造一切器具之資皆歸商民墊本措辦鑄錢一釧完納釐金錢一百文其錢質之輕重乃銷路之通塞所關卽成本之盈虧所係聽該商因地制宜酌量配鑄亦不限以制錢成法該商所領官鉛并鑄出錢均准其運往川省等廣爲銷售鉛斤仍照舊章按例價繳銀水陸運資概不另作開銷所有應繳錢釐鉛價責成委員隨時稽查催收彙總解省以濟軍餉不得任其拖延現在各商屬集均照遵行布置已有端倪不日卽可開辦仰懇 天恩俯准興辦俾借商本以鑄錢卽用鑄錢以銷鉛非惟成法不致久廢於釐軍需亦均不無補助臣并咨雲南四川湖南湖北各督撫臣查明通飭各屬遇有商民買運銅鉛及領辦錢文過境一體驗明放行免其完納厘稅勿得留攔阻滯外臣爲籌餉起見是否有當理合附片具奏

請開爐鑄錢疏

光緒十一年

閩浙總督 楊昌濬

竊查閩省市廩制錢缺乏各錢鋪盡出錢帖零星以小錢攙雜行用雖迭赴江浙購錢接濟價脚固多虧折而且杯水車薪隨散隨盡上年海防吃緊錢帖更難取信幾致紛擾曾經奏明提動公款暫借各錢鋪以銀折支始獲綏定是閩省錢法關係甚鉅不能不急籌鼓鑄也查錢文輕重本無一定大約錢重則私

毀必多錢少則盜鑄更熾補偏救弊貴乎因時損益伏考 大清會典順治年間初鑄每文一錢嗣加鑄一錢二分至一錢四分康熙年間改鑄一錢嗣又鑄一錢四分雍正年間改鑄一錢二分乾隆以後皆以一錢二分爲則迄今制錢日見其少由於舊錢銅質較重私毀盜鑄逐漸消磨欲除其弊莫若輕貨使毀之無利可圖不禁自止否則法律雖嚴仍難禁絕是議辦鼓鑄不能不酌改銖銓也省垣原設寶福局本歸藩司糧道會同管理需用銅鉛委員分赴滇黔辦運遵照部頒錢模按卯開鑄工本尙須籌貼自咸豐年間改鑄鐵錢鈔錢之後停辦已二十餘年匠工流散爐座傾圮所剩屋宇改儲軍裝欲循舊制驟難規復是鼓鑄之地又不能不變通另籌也同治四年間前督臣左宗棠在閩奏請製造輪船聲明輪機來後兼可鑄錢因創造之初趕辦船工一時不能兼顧現在錢價日昂百物因之俱貴竊思船政廠屋有餘添爐調匠無須另行建蓋船料出洋採購順途附運銅鉛亦較便捷在廠員紳本以考工爲事併請求算學化學兼司監鑄測算尤精廠員之上設有提調就近督率稽查自無流弊通盤籌畫較之城內專設一局辦理尤稱簡易經費亦可節省至攤鑄錢文必須先計工本官辦無虧私毀無利方能垂諸久遠據船政後學堂監督刑部主事鍾大焜確切校核以紅銅白鉛各重一百斤入爐一五火耗應除三十斤可鑄成錢一百七十斤以枚計之得三十二千文東洋紅銅每百斤連運腳共合錢一十八千二百六十文白鉛

每百觔連運腳共合錢七千三百四十文工炭每千需錢二百文共應錢六千四百文與鑄出新錢數目相準試鑄之錢每文重八分五厘民間堪以行用似此變通辦理係爲嚴杜私毀利益民用起見據福建布政使沈保靖會同兼署按察使督糧道劉瑞麒善後局司道詳請奏明請 旨如蒙 恩准卽在辦防經費內籌銀二三萬兩作爲成本在船廠設爐募匠照此鼓鑄按月將出鑄新錢照價發賣換回銀兩再購銅鉛轆轤周轉毋使間斷毋使虧耗其應行酌貼廠紳丁役薪資及製辦模範自定局費二百兩另於外銷欸內籌支以免使用成本等情前來臣等竊維歷代錢文法以漢之五銖唐之開元爲最善昔賈誼有言錢重則利深盜鑄雲起重刑不足以禁之前明譚綸謂國家鑄錢以濟銀之不及就使鼓鑄之費與銀相當而多鑄一萬金之錢卽多增一萬金之錢流布海內是藏富之術也近來各國通商金銀流出外洋每歲以千萬計各直省利源漸竭惟有推行錢法尙可補民用之不足閩省民貧土瘠地不產銅一紙相沿歷年已久去歲馬江失事各錢鋪支取爲難紳民始知鼓鑄之益若因其勢而利導之便民之政莫大乎是據呈錢樣輪廓頗似開元雖分徑差小而體質殊厚經臣訪諸紳耆均稱尙可適用惟事關更改舊制錢法處分綦重臣等未敢擅便合無仰懇 天恩俯念閩省制錢缺乏民用維艱准予籌欸變通鼓鑄以杜流弊而溶利源地方幸甚再現錢輕重旣與舊制略殊銅鉛耗三項價目亦與例價稍有未符惟

科本鑄錢並無賠貼之處應許免其核計合併聲明除咨部外謹會同署理船政大臣裴蔭森恭摺具奏

閩省試鑄制錢改由機器局籌辦疏

光緒十二年

楊昌濬

竊照閩省前因制錢缺乏原設寶福局停鑄已久驟難復設議請在船廠設爐鼓鑄借資輪機以省人工酌改銖兩以杜私燬等情當據前福建布政使臣沈葆靖會詳具奏嗣奉部覆准在辦防經費內籌銀二三萬兩作為成本其購辦銅鉛各價及運腳錢文核例無浮亦准照辦惟每文鑄重八分五厘分兩過輕行令查照咸豐二年京局鑄錢分兩辦理又銅鉛折耗工炭局費與例未符鑄出新錢如何搭放搭收妥為籌辦等因轉行遵照在案現在船廠工程緊急廠員不及兼顧並無餘屋可騰原設寶福局改儲軍裝不得不另行擇地委員辦理查省城機器局尙有空屋隙地堪以修建該局委員候補知府張冕辦事認真兼熟考工當經札飭福州府張國正會同妥籌試鑄並於辦防經費內先行籌提銀二萬兩飭發承領據報將局內空屋修葺完竣並添建房屋設爐五號每號五爐召匠製模購買銅鉛添派委員監工巡督於本年六月初四日開爐試鑄惟前准部議每文鑄重一錢以杜盜鑄而盜鑄之徒意在牟利現鑄八分五釐僅敷工本非特私鑄無利即防照鑄造亦無利可圖若鑄重一錢則工本虧折必多且恐錢重利深旋鑄旋燬不數年而仍前缺乏應請仍照原議鑄重八分五釐以期經久至銅鉛火耗定例每百斤准

銷折耗九斤內配滇銅五十四斤白鉛四十六斤合銅鉛百斤按一五折耗雖較例耗有多惟係銅鉛每五十斤勻配較之例配斤數銅少鉛多且東洋銅質不及滇銅折耗加增實毫無浮冒工炭一項卽係工料定例每發淨銅鉛一百五十觔准銷工料銀三兩二錢二分七釐今鑄錢一百七十觔需工炭錢六千四百文銅鉛觔數有則工炭自宜增益邇來匠工炭價昂於昔年以錢合銀多亦有限局用一節前議月定銀二百兩係擬船廠兼辦而言在廠員紳提調就近督率稽查毋復另籌薪水現在船廠不能兼顧改就機器局啟鑄所有創設爐座製辦模範以及監工委員丁役薪費一切較前又復不同仍月定經費銀二百兩委難再減且在外銷欸內籌支不動成本工欸應請准予照支至新鑄錢文向例以錢一千作銀一兩搭放兵餉等項其時銀價每兩不值一千是以人皆樂從迨嘉慶二十三年銀價增昂每兩換錢一千三百餘文卽經奏請停搭現在銀價更昂於昔若照向例搭放兵情恐未必願從稅課等項收欸向係收解銀兩間有零星搭繳錢文因閩省山高灘險運載維艱由各外局易銀解省現查各府缺錢與省相等若令收錢起解此盈彼絀似亦非宜此項議鑄錢文原因銀價日增各錢鋪缺少制錢以爲救敝扶偏之計應請仍照原議將鑄出新錢發鋪承領按照時價繳換銀兩收回成本一俟銀價低平新錢充足再行籌議搭收搭放章程以臻妥善除將新鑄錢樣另送併飭地方官訪私鑄私燬棍徒從重治罪一面嚴

禁行使私錢以重圖法據福建布政使張夢元會同善後局督糧道詳請奏咨前來臣維歷代錢法以五銖開通爲最善部議咸豐三年奏定之例適與相埒洵不刊之良法也然定例固當遵守而時宜尤貴變通是以元嘉四銖民稱其便天禧祥符重俱一錢以外而顧棟高所得祥符官錢有輕至九分者 國朝康熙年間開鑄制錢重至一錢四分亦兼鑄八分九分以濟行用當時謂之小制迨乾隆四年重錢日小而小制錢尙存前湖北撫臣晏斯盛開源節流疏內亦欲再從輕減使銷者無利自止現議八分五釐臣再四籌商先令照樣試鑄一俟鑄有成效再行擴充辦理至工耗局費籌款以及一切收放情形仍由臣督同司道隨時考察分別運籌總期民用無滯官帑無虧於錢法稍有裨益以仰副 聖主興利除弊至意

皇朝經世文續編卷五十目錄

禮政一 禮論

請崇儉疏

倭仁

繹禮堂記

劉蓉

復曾相國書

劉蓉

復劉中丞蓉書

曾國藩

筆記一則

曾國藩

書儀禮釋宮後

曾國藩

禮理說

俞樾

經義雜說二則

俞樾

燕寢攷序

張文虎

四禮權疑自序

顧廣譽

經世文續編



卷一百一十五

一

皇朝經世文續編卷五十

上海葛士濬子源輯

禮政一 禮論

請崇儉疏

倭仁

本年二月準內務府行知各衙門恭查 大婚禮節敬謹預備等因伏思宮廷係四表觀瞻節儉始於躬行斯風化及於海內上行下效理固然也昔漢文帝身衣弋絺罷露臺以惜中人之產用致兆民富庶天下乂安明帝馬后服大練之衣史冊傳爲美談此古事之可徵者也我 朝崇尚質樸 列聖相承無不以儉勤爲訓伏讀 世宗憲皇帝聖訓朕素行不喜華靡一切器具皆以適用爲貴此朕撙節愛惜之心數十年如一日者人情喜新好異無所底止豈可導使爲之而不防其漸乎 宣宗成皇帝御製慎德堂記亦諄諄以作無益害有益示戒 聖訓昭垂尤足爲法萬世近聞內務府每年費用逐漸加增去歲借動部庫百餘萬兩 國家經費有常 宮廷之用多則軍國之用少況內府金錢皆閭閻膏血任取求之便踵事增華而小民徵比筆敲之苦 上不得而見也咨嗟愁歎之聲 上不得而聞也念及此而痼瘼在抱必有惻然難安者矣方今庫藏支絀雲貴陝甘徇氛猶熾直隸山東河南江浙等省髮捻雖平民氣

未復八旗兵餉折減衣食不充兼之他族偏處尤須預儲財用以備不虞此焦心勞思之時非豐亨豫大之日也 大婚典禮繁重應備之處甚多恐邪佞小人欲圖中飽必有以鋪張體面之說進者所宜深察而嚴斥之也夫制節謹度遵 祖訓所以檢身心崇儉去奢惜民財卽以培 國脈應請 飭下總管內務府於所有應備之物力爲撙節可省則省可裁則裁總以時事艱虞爲念無以粉飾靡麗爲工則 聖德昭而天下實受其福矣

釋禮堂記

劉蓉

物生而後有倫倫立而後有法法修而後有教詩書禮樂皆聖人因倫物之粲殊立法度以垂教者也予讀儀禮郊廟邦國之大居處服食之微鬼神祭祀之幽莫不明著等威彰示節文使各有所遵循而不踰其矩以是知聖王綱紀天下所以範民心思耳目而納之軌物意義深矣士之生其時者有動作威儀之則以閑其外有道德仁義之訓以養其中其君子被服雍容敬慎以成其德其小人亦謹守法度而恥納於邪故成康之治稱爲至盛則禮教之浸淫於人心積久以成風俗豈一朝一夕之故歟東周以降上多失德之君下無名世之佐人紀紊而禮意寢微然其時朝聘會同以及戰陳干戈之際猶必誦說先王陳典禮以決得失勝負之數至於執玉高卑俯仰之容或愆其度君子猶以觀德厚薄而休咎之徵亦果應之

則知聖王所以定志凝命養人心之和平至五六百年之後敬怠斂肆尙警動於不自覺傳所謂範圍天地之化而不過曲成萬物而不遺何其神也漢承秦燔書之後禮經殘缺諸儒掇拾煨燼存什一於千百微言幾於絕矣雖有願治之主慨然復古之思然文獻無徵抑無以備制作之德卽其勦襲前聞緣飾經術亦數陳而義失未合而本離唐宋以來得失之數略可觀矣由是政治隆替特隨世運推移遞升遞降無與維持於不敝者治術所以趨於苟簡民俗所以卽於澆漓曾不百年盛衰異視亦理勢之必然者歟昔之君子蓋有憂之網羅舊文列爲經傳以著古昔哲王治天下之大經大法將以儀型四方綱維萬事後有王者取而讀之由幹以達枝窮源而竟委則古人所以制治保邦化民成俗之意可坐而得堯舜禹湯文武周公之盛治可端拱而致也卽或聖伏神徂曠絕千祀然日月經天江河緯地乾坤未毀固將百世俟之子生也晚不及躬與斯文之盛少承庭訓篤好禮書遭時多艱濫竊祿位馳驅執掌不遑安居然抱此區區未嘗一日或釋近獲歸休竊窺墜緒迢迢千古獨契予懷於是始作釋禮之堂取周官儀禮經傳及杜君卿氏之通典江慎修氏之禮書綱目秦蕙田氏之五禮通考陳諸凡案朝夕紬繹而詠歌之上窺往聖制作之原下較百代修廢之迹與旨宏綱曠然心會以爲善讀者挾其精微綜其條貫則以進退百王權衡萬變而莫淆予鑒卽後世事變紛歧文質異尙因革損益不主故常然大綱之昭垂莫易曠百

世而可知也世有魁儒碩德篤學嗜古欲崇德而廣業必於此會其歸新學小生詳其品節服而習之優游矩矱之途淪浹肌膚之會亦將由之以弗畔焉余之樂此而不厭也舍此欲奚適乎當春融和萬景畢會天穹然其上地隕然其下山川草木鳥獸森殖蕃滋其文粲然其序秩然於以仰思聖王肇修人紀經世宰物之意先民有作庶幾旦暮遇之至若較馬鄭之異同探名物之繁賾嗜奇綴瑣以資證附則近世小儒有好之者非予志之所存也

復曾相國書

劉蓉

畿輔苦旱吏事廢墜誠賢者勞心焦慮之時南中乃患水潦楚鄂江皖所在皆同陰陽乖爭各相偏勝世局殊可念也第自還山後閒居無事懶復出門日取先聖昔賢之書端坐而誦之夢寐與俱警歎相接意趣所至動與古會自疑身在兩漢周秦以前非今世也古之去今遠矣人之爲類繁矣或竝處世字促膝談笑而曠渺遼闊抵死不相聞知或世邈代殊懸隔千載而神明往來如共几席故莫遠於並世之士莫近於邃古以上之人爲其精神志趣之載簡編者曠千世而相感也禮書自周官儀禮戴記下逮儒先所述並得粗讀一過近世江慎修氏篤志研討白首一經可謂勤矣綱目一編具見條理惟墨守康成頗襲緯書之謬其於禮之大者往往昧所由來秦樹灃氏網羅舊章別爲五禮歷代掌故燦然明備可謂博矣

然亦特類書之較有倫序者其所據以折衷頗泥古禮之迹而莫通其意但取器數之備而不揣其情不可謂非蔽也蓋先王禮制之大備不盡傳於後世其僅存者又頗爲傳記殺亂迷失本旨學者非能究觀義理之原精思而默識之固無由達其意義法度數之等雖頗備具然非德積於躬誠溢於外亦莫能稱其情故不特知其義者之難而襲其文以行之者之尤難也執先王之禮不審其時度其德而強後世以必行不可也取後代沿襲之似塗飾膠附以謂能合古人之轍不可也蓋凡一代之興必有一代之禮禮之興替視其德德厚者禮從而隆德薄者禮從而污上者神合焉次者文具焉其下則苟而已故善法先王之禮惟其德之肖而不必其蹟之同也後世倘有王者得禮經之精意化裁變通以成一代之制而繼周家之盛苟協於中何必古人如非其人雖在文武成康之子孫循規襲矩從容以適進退之節亦所謂薄於德於禮虛者況於漢唐以後之紛紛乎然且膠執成憲懸一軌以較轍蹟之離合期不失於尺寸何其陋也區區之愚竊思取禮制大端若祭祀朝聘燕饗冠昏射喪紀之屬据經援傳薈萃羣言而頗抉發其精意爲禮經發微一書以著聖人所以體性達情經世宰物之大經大法亘萬世而不可易者至若周之叔季及漢唐以來僭竊苟簡緣飾塗附疏漏雜揉之制與夫秦漢間傳記雜述及後儒論纂失旨繁碎支離乖戾悠謬之說所以蠹壞人心蕩佚風教之故亦皆縷析條辨爲或問以附之期以羽翼聖經扶植

人紀延墜緒以詔諸無窮後聖有作庶幾取而法之於以建中立極挽末俗而還之隆古意在茲乎蓋天地之運無時或息則所謂天秩天叙正彝倫以協中和之極者不容泯絕於人心雖時有晦明道或從而升降要必有聖者起承其後踵前哲之隆規復三代之盛治此天運循環之自然數往知來剝極而復其理未有或爽者也弟今年五十有四顛毛凋落餘髮蒼蒼大半白老矣然心盛志強殆逾壯歲方思追古人千載之上而躬駕以從之若吾生固未可涯吾志終於必酬者術者見謂壽當逾耄雖心知其謬言然頗自喜且意其誠然以謂天尙欲使斯人有知固當錫之大年以覺後世之昏昏者其不忍遽奪之也至於文章之事常自病弱於才度終不逮古人如司馬氏韓氏皆所謂天授非但人力之爲次則歐陽氏曾氏王氏固亦能者然歐文之盛者不能過二十篇曾與王不能過十篇皆有轍蹟可尋未嘗絕人攀躋之路努力爲之殆不難到去歲試作五七篇謂頗賢於疇昔及取三子之盛者較焉猶似遠遜之者非學識論議之不逮其機趣氣運之得於自然者未可驟而幾也彼積其功與力之勤動於其天而詣力適與之會莫知其然而自至者也然且不能皆然則功與力其所自致而天不可以常遇也嘗自度欲與之並非更十年二十年殆未可期顧生平志願又有大於此者竭十年二年之心與力僅以文人自名尤私心所弗屑以是屏去不復爲今一年矣然時用往來於心公愛我者謂當決然棄之邪抑且羈靡勿絕兩利而

俱存之邪藝之至者不兩能播種多者抑無求而不獲公將何以教之兒子鴻業質地拙魯頃又委以家事遂廢學次者以後季弟資亦中人文義淺者粗能省悟而已遠近來問學者數輩類非傑特之才近日湖湘間人材稍替有高資者又好爲閎大自肆之談誦說西京而薄視唐宋以下文章經學大抵皆然亦風會之一變也南屏敦篤好古脩然塵壒之外南中殆罕比倫惜其皤然老矣頃約秋涼來訪並相攜爲衡嶷之游不卜能否必踐雲仙成縣志後又任通志之役敝精力於考訂而身心少所資裨歲月滔滔殊可念也其他朋游中少相益者年歲漸增雅不喜與浮華少年相接人亦不樂近之孤陋岑寂頗以寡聞自弔此其酷耳先人之葬越十年形家多不謂吉且疑其水懼不可以久託乃復躬自營度已別卜地於六月改厝矣久思乞銘閣下慮事冗或不暇爲遲遲至今然終不敢以屬他人以夙無相知之雅徒飾浮詞以誣先德非心所安也謹具行述大略敬求賜之銘章以光泉壤世世子孫感幸無似撰成時並乞妙墨書寄已卜期臘月修墓文到便上石也

復劉中丞蓉書

曾國藩

十二月初接八月二十六日惠書及繹禮堂記敬承興居康勝勤學不倦所居疑在蓬島之間置身若在周秦以前非泊然寡營觀物深窈翫希聲而友前哲殆未足語於此研究三禮洞澈先王經世宰物之本

達於義理之原遂欲有所撰述以覺後世之昏迷甚盛甚欽企何窮國藩亦嘗粗涉禮經之藩官事繁冗莫竟其業所以沮滯而不達者約有數端蓋禮莫重于祭祭莫大于郊廟而郊祀裸獻之節宗廟時享之儀久失其傳雖經後儒殷勤脩補而疎漏不完較之犧牲少牢饋食兩篇詳略迥殊無由窺見天子諸侯大祭森嚴之典軍禮既居五禮之一吾意必有專篇細目如臧元敬氏所紀各號令者使伍兩卒旅有等而不干坐作進退率循而不越今十七篇獨無軍禮而江氏永秦氏蕙田所輯乃僅以兵制田獵車戰舟師馬政等類當之使先王行軍之禮無緒可尋國之大事在祀與戎而古禮殘闕若此則其他雖可詳考又奚足以經綸萬物前哲化民成俗之道禮樂並重而國子之教樂爲專精樂之至者能使鳳儀獸舞後聖千載聞之忘味欲窺聖神制作豈能置聲樂於不講國藩於律呂樂舞茫無所解而厯算之學有關於製器審音者亦終身未及問津老鈍無聞用爲深恥夫不明古樂終不能研窮古禮國藩之私憾也郊廟祭儀及軍禮等殘缺無徵千古之公憾也是皆用以自沮而不達者也所貴乎賢豪非直博稽成憲而已亦將因其所值之時所居之俗而創立規制化裁通變使不失乎三代制禮之意來書所謂苟協于中何必古人是也然時俗亦有未易變者古者祭祀必有主婦聘饗亦及夫人誠以在宮雍雍在廟肅肅妃匹有篤恭之德乃足以奉神靈而理萬化所謂有闕雖麟趾之精意而後可行周官之法度也自陽侯殺

繆侯而大饗廢夫人之禮後世若以主婦承祭則驚世駭俗譏爲異域然全行變革則又與采蘋采蘋諸詩之精義相悖古之宮室與後世異議禮之家必欲強後代之儀節就古人之室制如明史載品官冠禮幾與儀禮悉合不知曰東房西墉曰房內戶東曰坳明世固無此宮室也然稍師儀禮之法則堂庭淺陋必有齟齬而難行者誠得好學深思之士不泥古法亦不輕徇俗好索之幽深而成之易簡將犁然有當於人心國藩於昏喪祭三禮亦頗思損益涑水書儀紫陽家禮纂訂一編以爲宗族鄉黨行習之本守官少暇不克斟酌時俗之中卒未能從容爲之斯亦自沮而不達之一端也閣下山居靜篤將爲禮經發微及或問等書何不先取此三禮撰箸鴻篇使品官庶士可以通行用今日冠服拜跪之常而悉符古昔仁義等殺之精倘亦淑世者所有事乎來書又以文章欲追歐陽公輩而與之並而願有大于此者將決然而棄去抑兩利而俱成就鄙人而卜取舍國藩竊維道與文之輕重紛紜無有定說久矣朱子讀唐志謂歐陽公但知政事與禮樂不可不合而爲一而不知道德與文章尤不可分而爲二其譏韓歐裂道與文以爲兩物措辭甚峻而歐陽公送徐無黨序亦以修之於身施之於事見之於言分爲三途夫其云修之身者卽叔孫豹所謂立德也施之事見之言者卽豹所謂立功立言也歐公之言蓋深慕立德之徒而鄙功與言爲不足貴且謂勤一世以盡心於文字者皆爲可悲與朱子譏韓公先文後道譏永嘉之學偏重

事功蓋未嘗不先後同符朱子作讀唐志時豈忘歐公送徐無黨之說奚病之若是哉國藩之愚以爲事功之成否人力居其三天命居其七苟爲無命雖大聖畢生皇皇而無濟於世文章之成否學問居其三天質居其七秉質之清濁厚薄亦命也前世好文之士不可億計成者百一傳者千一彼各有命焉孔子以斯文之將喪歸之天命又因公伯寮而謂道之行廢由命孟子亦以聖人之於天道歸之於命然則文之興衰道之能行能明皆有命焉存乎其間命也者彼蒼尸之吾之所無如何者也學也者人心主之吾之所能自勉者也自周公而下惟孔孟道與文俱至吾輩又法孔孟固將取其道與文而并學之其或體道而文不昌或能文而道不凝則視乎性之所近苟秉質誠不足與言文則已閣下旣自度可躋古人何爲舍此而他求哉若謂專務道德文將不期而自工斯或上哲有然恐未必果爲篤論也僕昔亦有意於作者之林悠悠歲月從不操筆爲文去年偶作羅忠節李忠武兄弟諸碑則心如廢井冗蔓無似乃知暮年衰退才益不足副其所見矣少壯真當努力光陰邁往悔其可追姻丈於上年六月改葬行述未蒙寄到若果爲銘章必不足稱盛意南屏亦已衰頹其游衡嶷之說果踐約否筠仙修通志之議事甚浩博未易卒業近又喪其愛子憂懷何以自遣寒門已嫁四女三家未生子郭氏女生子而早寡感愴無涯內人失明之後諸病叢集醫藥相尋家婦亦多病次兒於元日得舉一子差爲忻慰賤軀粗適惟目光日蒙于

筆記一則

曾國藩

書儀禮釋官後

會國藩

經世文讀編

卷五十 禮政一

左右攜僕詩之趣馬左右而證注中稱樂正僕人正者之謬特牲士有私臣而嘆注謂士無臣者之疏其說既允矣至於曲證旁通往往卽一事而洞見本原先王之制禮也因人之愛而爲之文飾以達其仁因人之敬而立之等威以昭其義雖百變而不越此兩端先生以爲士喪既夕二篇所言甸人管人夏祝商祝冢人卜人隸人遂匠之屬皆公家之臣來執事者也又以爲諸侯之官其爵必降等於天子聖人別嫌明微之意寓乎其間使周之諸侯遵而守之何至有僭越而置六卿稱縣公者由前之說則臣下之喪君既臨其小斂又遣官助其百役有若家人骨肉愴惻纏綿由後之說則侯國之百職庶司不敢毫髮僭擬於天王恩誼之篤如彼名分之嚴若此皆禮之精意祖仁本義又非僅考核詳審而已儀禮一經前明以來幾成絕學我朝鉅儒輩出精詣鴻編迭相映蔚而徽州一郡尤盛自婺源江氏永崛起爲禮經大師而同邑汪氏紱休寧戴氏震亦皆博洽爲世所宗其後歙縣金氏榜凌氏廷堪并有纂述無慚前修先生世居績溪與諸儒地相比時相接宜入國史儒林傳列於江氏汪氏之次而哲孫培翬又能紹其家學著儀禮正義薈萃羣言衷於至當徽州爲朱子父母之邦典章文物固非他郡所敢望而胡氏世傳禮教故家文獻綿延無替亦足使篤古之士低徊而興慕也

禮出於理乎理出於禮乎曰禮雖先王未之有可以義起也是禮固出於理也然而聖人治天下則以禮而不以理以禮不以理無弊之道也且如君臣無獄父子無獄若是者何也禮所不得爭也禮所不得爭故以無獄絕之也使不以禮而以理則固有是非曲直在矣君臣父子而論是非曲直大亂之道也是故聖人治天下以禮不得已而以理何也天下之人而皆從吾禮則固善矣不幸而有不合乎禮且大悖乎禮者不得不以理曉之此古治獄之官所以名之曰理也禮者治之於未訟之先理者治之於既訟之後也然而遇君臣父子之獄則仍不言理而言禮舍禮而言理是使天下多訟也且禮者天下無一人不可以遵行而理則能明之者尠矣孔子曰麻冕禮也今也純儉吾從衆此在聖人則可耳使胥天下之人而使之斟酌乎理以定從違則必有得而有失矣幸而從純之儉可也不幸而從拜下之泰將奈何固不如一概繩之以禮爲無弊也夫天理之說已見於樂記非宋儒剗爲之然聖人治天下以禮不以理理也者不得已而用之於治獄舍禮言理是治獄也治天下非治獄也以治獄者治天下而人倫之變滋矣今夫婦人從一而終周公著其文于易理固如此也及其制禮也則有同母異父昆弟之服是又許之再嫁矣然後知聖人之于人繩之以禮不繩之以理也故中材以下皆可勉而及也後之君子以理繩人則天下無全人矣嗚呼是司空城旦書也

經義雜說二則

俞樾

禮之不近人情者非其至者也吾觀曲禮一篇無非戒人之不近人情耳並坐不橫肱共飯不澤手毋踐履毋踏席戶開亦開戶闔亦闔有後入者闔而弗遂將上堂聲必揚君子欠申侍坐者請出矣如此之類其於人情委曲周到學者能留意於此馴而至於動用周旋中禮不難矣若其繁文曲節古今不能通行者皆禮之末也非其至者也

儀禮十七篇而射居二焉春合諸學秋合諸射先王之世所以士兼文武也記曰射者男子之事也因而飾之以禮樂焉蓋聖人以弧矢威天下故欲人人習之而以禮樂爲之飾民可使由之不可使知之此類是也若夫樵夫笑危冠之飾輿臺恥短後之服此則後人高論而非先王之教矣明初取士之制中式者復以五事試之而首以騎射厥後此制廢而專以帖括取士於造就人才之道或猶未盡乎

四禮推疑自序

顧廣譽

禮之端起於微渺而冠昏喪祭所以筦人事之始終不由其道則百度無稟承而放僻邪侈隨之風俗人心日益以不古昔方君子春嘗屢與廣譽言之是時廣譽適究心大清通禮旁及徐氏秦氏禮書遂諾任此事不辭積年餘之力成家行四禮一書其體皆先儀節各繫集說而以附論終焉道光戊子己丑間

事也丙午夏奉諱讀禮因出是編參覽所見已不盡合時有更正蓋禮也者先王遞有因革而集其成者周公孔子經世理物深微曲至惟漢儒猶有遺意而禮時爲大一執古義以概近今其施諸事也容多格閼而難通故嘗謂康成爲禮學大宗溫公朱子則久絕復續之別子書儀家禮功不在高密注經下變通者法守之善則也居恆默持此意又一折衷於通禮之書以明當今之所尙凡得若干條自顧學殖蕪淺未敢出以問世往年冬右目失明懼遂不見天日乃芟去儀節集說端就附論所存而更增益之詮次爲四禮摧疑八卷嗚呼子春不可作矣用正之四方知禮君子幸有以發其心之矇焉若夫旁推交通益擴所未備請以俟諸異日

燕寢攷序

張文虎

自鄭君以人君左右房大夫士東房西室注禮而後儒紛然辨難莫得其意然鄉飲酒記之薦出自左房鄉射記之出自東房此行於庠序不得據以難鄭也惟聘禮賓退賓右房而立賁疏以爲正客館案上文有司入陳注云入賓所館之廟及廟門注云大夫行舍於大夫廟下文公館賓賓辟注云君在廟門正與記卿館於大夫語合賈蓋曲爲之說且何以處少牢饋食禮有司徹二篇之屢言東房也或謂東房西室鄭專論寢然公食大夫禮宰夫筵出自東房鄭注天子諸侯有左右房此非明對大夫士之廟而言乎或

謂士喪禮遷于祖正柩于兩楹閒注云象向戶牖也戶牖閒得與楹閒相向其室必正中似鄭君亦以士廟爲有左右房公食大夫禮注偶失檢耳案特牲饋食禮豆籩鉶在東房注云東房房中之東東夾北鄭蓋以士廟不當有東房故以房中之東解之然則東房西室鄭意固兼廟寢也明甚且如或說以東房西室專屬之寢亦有可疑者昭四年左氏傳使饋置於个而退杜注个東西廂東西廂爲左右房之制昭子之寢既有東西廂則非東房西室可知夫三禮爲鄭學體大物博非可輕議顧攷之於經而不合當別求其故是惟好學深思者能心知其意耳續谿胡竹邨農部湛深經術尤篤于禮嘗謂鄭君之說當有所受必非意造讀斯干詩箋乃悟東房西室專爲燕寢之制鄭君注禮時槩諸宗廟正寢係傳聞之誤當以詩箋爲正又參之內則玉藻士昏禮褻二十五年左氏傳尙書大傳而知自諸侯以下其燕寢皆東房西室東房西室之制室則東向開戶以達於房房則南向開戶以達于堂由堂入房由房入室而室之南無戶證之經傳皆合作燕寢攷二卷於是東房西室之說明而注疏以下凡後儒所論之是非亦各見農部爲歎儒淺次仲教授入室弟子教授箸禮經釋例爲禮家斗杓農部又以賈君淺略撰儀禮正義猶未脫稿其好學深思能通古人之意於此可見一斑矣歲己亥秋晤君武林傾蓋如故訂忘年交癸卯夏以學海堂刻本燕寢攷篇秩錯亂郵示原藁屬爲校訂錢錫之通守爲編入指海甲辰冬復寓書屬序文虎學識

荒陋無以證成君義於其刊竣謹揭君箸書大指于簡端云



皇朝經世文續編卷五十一目錄

禮政二 大典上

歷朝郊祀分合攷

姚文枬

遵議大禮疏

曾國藩

謹獻 升祔大禮議 附片

張佩綸

續陳會奏未盡之意疏

鍾佩賢

遵 旨覆議 升祔典禮疏

李鴻章

以一死泣請 懿旨豫定大統之歸疏

吳可讀

闡明 聖意疏

翁同龢

徐桐

潘祖蔭

遵 旨妥議疏 附片

寶廷

遵 旨謹陳管見疏 附片

張之洞

糸廿三糸糸

糸廿三糸糸

糸廿三糸糸

糸廿三糸糸

糸廿三糸糸

糸廿三糸糸

糸廿三糸糸

糸廿三糸糸

糸廿三糸糸

糸廿三糸糸

糸廿三糸糸

糸廿三糸糸

糸廿三糸糸

糸廿三糸糸

糸廿三糸糸

糸廿三糸糸

糸廿三糸糸

糸廿三糸糸

糸廿三糸糸

糸廿三糸糸

糸廿三糸糸

糸廿三糸糸

糸廿三糸糸

糸廿三糸糸

糸廿三糸糸

皇朝經世文續編卷五十一

上海葛士濬子源輯

禮政二 大典上

歷朝郊祀分合攷

姚文枬

案歷朝郊祀分合稽之各史惟前漢宋明三史紀志具有本末其餘多須旁搜參證而得之今分代詳考如右至其是非得失前人之議論詳矣不贅

秦并天下而三代之禮亡故南北郊至漢成帝時用匡衡之議而始建其前雖有甘泉汾陰之祠而創制之初不由稽古故論郊祀者必以是爲始焉案成帝本紀建始二年正月始郊祀長安南郊三月始祠后土於北郊此分祭之明證也郊祀志載王莽奏定孟春正月上辛若丁天子親合祀天地于南郊以日冬至使有司奉祠南郊日夏至使有司奉祭北郊此合祭始於王莽之明證也本末具詳班史茲其大要云續漢祭祀志建武二年初制郊兆于洛陽采元始故事爲圓壇八陛中又爲重壇天地位其上皆南向西上則合祭無疑也又中元元年初營北郊本紀作二年初立北郊此以初營言故書元年則二至之祭不廢可知也禮儀志稱正月上丁祠南郊禮畢次北郊明堂高廟世祖廟謂之五供而不言二至之祭豈以非親祀而不志耶本紀

自建安元年外未嘗書郊祀志亦無之豈東漢諸帝皆未嘗親行郊祀耶抑常事不書而建安以因變得書耶馬端臨亦深以爲疑要之東漢承王莽之制而合祭與分祭並用則可無疑也

陳氏三國志不立書志三家祀典不可得詳惟於蜀志先主傳載章武二年詔營南北郊於魏志明帝紀載景初元年詔定郊邱祀典如是而已於祭之分合遂不可考宋書禮志稱二漢郊禋之制具存魏所損益可知據是以爲魏承漢制合祭亦殊苦其影響惟景初詔書稱號圜丘曰皇皇帝天方丘曰皇皇后地天郊曰皇天之神地郊曰皇地之祇據此則似無合祭者豈郊丘旣分而合祭之禮亦革耶案晉書禮志太常顧和稱魏承後漢正月祭天以地配時高堂隆等以爲禮祭天不以地配云云考魏世郊祀載於本紀者二黃初二年春正月郊祀天地當卽和所謂承後漢以地配者景初元年十二月壬子冬至始祀皇皇帝于圜丘則明非合祭殆因隆等之言而更定耶西晉承魏制但從王肅之議并二丘於二郊而祭之分合紀志苦無確證然考之前則曹魏改制之後未聞又合考之後則江左相沿之制未改前規以是知西晉之亦未嘗合祭也

東晉之初未立北壇地祇衆神共在天郊至成帝咸和八年立地郊而康帝建元元年定以正月上辛祀

南郊次辛祀北郊遂爲宋齊梁陳郊制之祖

齊建元二永明三陳永定二天嘉元三五皆以正月上辛祀南郊次辛祀北郊載在各史本紀北郊專祭地

固不待言不知南郊祭天仍以地配與否紀志均無明文詳按宋書禮志齊書禮樂志隋書禮樂志

按隋書十

志原係梁陳齊周隋五代史志故梁陳典制亦據此而稱引仍用今名

但有分祭之儀分祭之樂而無合祭用者惟宋書樂志載顏延年歌

詩均以天地郊標目然安知非一詩兩用者未得據爲合祭之證也宋元豐六年陳襄疏稱南齊以上辛

祀昊天次辛瘞后土此亦足爲不合祭之證陳則本紀書親祠北郊者八若南郊合祭則當無此矣

元魏祀天有南郊有西郊有圜丘樂志稱孟秋祀天西郊禮志稱天賜二年四月復祀天於西郊本紀書

太和十八年三月罷西郊祭天此西郊非合祭之明證也禮志載南郊壇位稱天位在其上南面神元西

面此南郊非合祭之明證也圜丘在委粟山景明二年改築於伊水之陽禮志載太和十九年甲申長至

祀昊天於委粟山

本紀書有事於圜丘

是委粟山圜丘不合祭之明證也惟宋蘇軾奏疏引酈道元水經注伊水篇

以爲合祭之證據此幾疑景明以後圜丘改爲合祭今按酈注本文上云大魏郊天之所下云祭昊天上

帝於此明是專祭天而不以地配者中間天地位其上一語乃酈氏引司馬彪郊祀志之文軾巧爲牽合

有類舞文蓋不足信況魏書禮志云其後冬至祭上帝於圜丘夏至祭地于方澤牲幣之屬與二郊同若

景明改制史志豈得但據初制而言乎是伊水圜丘亦斷非合祭之明證也至高齊宇文周據隋書禮儀

志亦均有分無合隋開皇議定祀典天地分祭史志尤明無待考矣

唐時郊制一定於武德再定於開元皆有分無合武德定令之後至則天天冊萬歲元年親享南郊始合祭天地新舊唐書志皆特筆書之則其前恪遵定令並未合祭可知也其後長安二年本紀亦書親享南郊不知合祭與否惟考音樂志有則天大享昊天樂章既但以昊天標題而詞中言元穹言紫極言乾儀言上帝而未嘗及地其非合祭之樂可知則疑武后合祭天地亦惟天冊萬歲一次而已至景龍三年樂志亦有祀天樂章太極元年即舊書之景雲三年新書之先天元年賈曾之表不行是中宗睿宗亦未合祭可知也開元新禮之後至天寶元年遂合祭天地於南郊禮樂志稱終唐之世莫能改按開元二十年是年奏上新禮至天寶元年中間九年考諸紀志未嘗行郊祭之禮然則開元定禮以後有合祭而無分祭也夫武德定令以後雖有武后之合祭而卒未嘗改開元新禮乃未嘗行而及身廢之亦可異矣

宋初合祭天地元豐詔罷合祭纔六年一祭而元祐七年仍合祭至紹聖詔罷合祭纔元符元年一祭而建中靖國元年又稱權合祭是年仍詔罷合祭自是祭天者八祭地者四而紹興十三年復合祭遂終宋世合祭此有宋郊祀分合之大略載在本史紀志者也據禮志有圜丘方丘雩祀祈報明堂感生帝神州凡七祭是分祭之禮仍在但非天子親行故當時議禮諸臣數典皆不及此茲亦弗詳列焉

遼合祭天地於木葉山未立郊制金自天德以後始有南北郊之制冬至合祭天地於圜丘夏至祭地於

方丘史載甚明亦無待考元自憲宗之二年合祭昊天后土成宗大德六年始合祭於南郊九年始從羣臣之議專祀昊天而祭祀志載文宗時壇位昊天上帝位中少北皇地祇次東少卻皆南向則仍合矣據春明夢餘錄知合祭之復行始於泰定中而史不之及其疎也又志載文宗時儀注仍專祭昊天而攝祀儀注則合祭天地蓋北郊未建故歧於兩端如此然則泰定以後親祀則專祭攝祀則合祭固無疑也明初立圜丘方丘分祭天地洪武十年建大祀殿於南郊合祭天地成祖遷北京如洪武制嘉靖九年建圜丘方澤復分祭遂終明之世本末具在明史茲撮其大要如此

自漢元始合祭至魏景初始分祭自唐天寶合祭至宋元豐始詔罷合祭自紹興十三年合祭至元大德九年始議分祭自明洪武十年合祭至嘉靖元年始分祭此歷朝分合大略也然其中又有辨特主合祭者漢之元始明之洪武而已不主合祭而徑行合祭者則唐之天寶宋之元祐紹興是也

天冊萬歲後數不相沿故不

不徑行合祭而猶權合祭者東晉初及宋之建中靖國是也并不權合祭而仍未罷合祭者元之泰定以後是也罷合祭而仍未盡分祭之禮者魏景初至西晉及南梁北齊宋之元豐元符及大觀以前元之大德以後明之嘉靖及萬曆以後均未親祀地祇是也必罷合祭而仍親兩郊者乃爲盡分祭之禮則惟漢之建始晉之建元南朝之宋齊陳北魏之天興太和周之建德隋之開皇唐之延和宋之政和宣和明之

洪武二三年及隆慶元二年足以當之

秦尙書五禮通考云考天地之祭漢時或分或合後惟魏文帝之太和周武帝之建德隋高祖之開皇唐元宗之開元宋神宗之元豐元文宗之至順明世宗之嘉靖特主分祭餘皆主合祭按元豐至順嘉靖固特主分祭開元二十年以前之不合祭蓋沿舊章至二十年以後則未嘗分祭然因其新禮定分祭而遂目爲特主分祭雖非核實尙屬有因至北魏北周史志本無合祭之文安得有太和建德特主分祭之事耶反覆考之秦氏蓋沿春明夢餘錄之誤而春明夢餘錄乃誤讀宋陳襄等疏也按文獻通考載元豐時樞密院陳襄等上言有云由漢歷唐千有餘年之間而以五月親祠北郊者惟四帝而已如魏文帝之太和周武帝之建德隋高祖之開皇唐睿宗之先天皆希闊一時之舉也據此則襄等本但舉五月祠北郊者故非惟不合祭而不親祠北郊者不舉卽祠北郊而不以五月者亦不舉及春明夢餘錄誤襲其文以爲由漢及唐分祀者惟四祭而已已爲謬誤而於唐則以並未分祭之開元易確係分祭之先天尤爲極謬大抵自唐以前史書所載率無要領可尋故明李善長等言王莽奏以正月合祀由漢歷唐千餘年間皆因之合祭張璠言合祭之說實自莽始漢之前皆主分祭漢以後亦間有之均見明史禮志語均模稜然未有如春明夢餘錄之謬也秦書卓然成家特恐學者復沿其偶然之誤故附糾之如此自魏景初至唐開元惟東晉初合祭權也

天冊萬歲偶也餘但有分祭之證
秦氏餘皆主合祭一語尤爲草率

遵議大禮疏

道光三十年

曾國藩

奏爲遵 旨敬謹議奏事正月十六日 皇上以 大行皇帝硃諭遺命四條內無庸 郊配 廟祔二
條命 臣工詳議具奏 臣等謹于二十七日集議諸臣皆以 大行皇帝功德懿鑠 郊配斷不可易 廟
祔尤在所必行直道不泯此天下之公論也 臣亦欲隨從衆議退而細思 大行皇帝諄諄誥誥誠必有精
意存乎其中 臣下仰測 高深苟窺見萬分之一亦當各陳其說備 聖主之採擇竊以爲 遺命無庸
廟祔一條考古準今萬難遵從無庸 郊配一條則不敢從者有二不敢違者有三所謂無庸 廟祔
一條萬難遵從者何也古者祧廟之說乃爲七廟親盡言之有親盡而仍不祧者則必有德之主世世宗
祀不在七廟之數若殷之三宗周之文武是也 大行皇帝于 皇帝爲禰廟本非七廟親盡可比而論
功德之彌綸又當與 列祖 列宗同爲百世不祧之室豈其弓劍未忘而蒸嘗遽別且諸侯大夫尙
有廟祭況以 天子之尊敢廢升祔之典此其萬難遵從者也所謂無庸 郊配一條有不敢從者二何
也古聖制禮亦本事實之既至而情文因之而生 大行皇帝仁愛之德同符大造偶遇偏災立頒帑項
頻年賑貸薄海含哺粒我蒸民后稷所以配天也 御宇三十年無一日之暇逸無須臾之不誠純亦不

已文王所以配上帝也既已具合撰之實而欲辭升配之文普天臣民之心終覺不安此其不敢從者一也歷攷列聖升配惟世祖章皇帝係由御史季周琬奏請外此繼統之聖人特旨舉行良由上符昊眷下愜民情毫無疑義也行之既久遂爲成例如大行皇帝德盛化神卽使無例可循臣下猶應奏請況乎成憲昭昭曷敢踰越傳曰君行意臣行制在大行皇帝自懷謙抑之盛意在大小臣工宜守國家之舊制此其不敢從者二也所謂無庸郊配一條有不敢違者三何也壇壝規模尺寸有定乾隆十四年重加繕修一磚一石皆考律呂之正義按九五之陽數增之不能改之不可今則每幄之內僅容豆籩七幄之外幾乏餘地我大行皇帝慮及億萬年後或議增廣乎壇壝或議裁狹乎幄製故定爲限制以身作則世世可以遵行今論者或謂西三幄之南尙可添置一案暫爲目前之計不必久遠之圖豈知人異世而同心事相沿而愈久今日所不敢言者亦萬世臣子所不敢言也今日所不忍言者亦萬世臣子所不忍言也經此次硃諭之嚴切盈廷之集議尙不肯裁決遵行後之人孰肯冒天下之不韙乎將來必至脩改基址輕變舊章此其不敢違者一也古來祀典興廢不常或無其祭而舉之或有其禮而罷之史冊所書不一而足唐垂拱年間郊祀以高祖太宗高宗並配開元十年從張說議罷太宗高宗配位宋景祐年間郊祀以藝祖太宗真宗並配嘉祐七年從楊敞議罷太宗真宗配位我朝順

治十七年合祀天地日月星辰于 大享殿奉 太祖 太宗以配厥後亦罷其祀祀典改議乃古今所
常有我 大行皇帝慮億萬年後愚儒無知或有援唐宋罷祀之例妄行陳奏不可不預爲之防故 硃
諭有曰非天子不議禮一經 斷定巍然七幄與天常存後世增配之議尙且不許罷祀之議何自而興
所以禁後世者愈嚴則所以尊 列聖者愈久此其計慮之周非三代制禮之聖人而能如是乎 大行
皇帝以制禮之聖人自居 臣下何敢以尋常之識淺爲窺測有尊崇之虛文無謀事之遠慮此其不敢違
者二也我 朝孝治天下 遺命在所尤重康熙二十六年 孝莊文皇后遺命願于遵化州 孝陵近
地安厝 臣工皆謂遵化去 太宗昭陵千餘里不合祔葬之例 聖祖仁皇帝不敢違 遺命又不敢違
成例于 孝陵旁近建 暫奉安殿三十餘年未敢竟安地宮至雍正初敬謹歲事嘉慶四年 高宗純
皇帝遺命廟號無庸稱祖我 仁宗睿皇帝謹遵 遺命故雖乾隆之豐功大烈 廟號未得祖稱載在
會典先後同揆此次 大行皇帝遺命一條森嚴可畏若不遵行與我 朝家法不符且 硃諭反覆申
明無非自處于卑屈處 列聖于崇高此乃大孝大讓亘古之盛德也與其以尊崇之微忱屬之臣子孰
若以莫大之 聖德歸之 君父此其不敢違者三也 臣竊計 皇上仁孝之心兩者均有所歉不奉升
配僅有典禮未備之嫌遽奉升配既有違 命之嫌又有將來之慮是多一歉也一經 大智之權衡無

難立判乎輕重 聖父制禮 聖子行之默契精微不待臣僚擬議而後定臣職在秩宗誠恐不詳不慎
皇上他日 郊祀之時上顧 遺訓下顧萬世或者悚然難安禮臣無所辭答是以專摺具 奏于冒
宸嚴不勝惶悚戰栗之至

謹獻 升祔大禮議

附片

張佩綸

竊臣恭閱邸抄三月十四日奉 上諭朕奉 慈禧端裕康慶昭和莊敬皇太后 慈禧端佑康頤昭豫
莊誠皇太后懿旨惇親王奕誼等奏遵 旨相度太廟中殿位次請飭廷臣會議一摺據稱我朝自順治
初年創立廟制迄今 列聖廟享中殿龕位已與九間之數相符等語穆宗毅皇帝孝哲毅皇后神牌升
祔供奉位次鉅典收關着王大臣大學士六部九卿翰詹科道虔詣 太廟敬謹相度後會同惇親王奕
誼等妥議具奏欽此仰見我 皇上詳求禮制博采羣言之至意臣謹案 本朝之制與歷代異歷代賢
君誼辟或數世一作或間世一作故親盡而祧我 朝 列祖 列宗 聖 聖相承皆當爲百世不遷
之廟欲酌古準今垂諸久遠非立 太宗文皇帝世室不可伏考國語及祭法皆言殷人祖契而宗湯據
商頌則湯實稱祖故賀循云殷有二祖三宗是殷之特廟蓋有四矣朱子序殷武之詩曰高宗中興爲百
世不遷之廟不在三昭三穆之列此詩則廟成而祔祭之詩劉歆曰周懿王時始立文世室於三穆之上

孝王時始立武世室於三昭之上諸儒多是其說由此言之殷以一祖三宗有功德特立廟周以文武有功德特立廟我朝太宗文皇帝有功德特立廟實至當不易之經也說者慮特立一廟嫌於近祧顧何楷有言武丁當世數未盡時必仍居七廟中及親盡應毀之日乃始遷其祖於新廟與七廟同享祀不與群祧等列然則在七世中則祔於太廟以明有親在七世外則創立新廟以明有功廟有定數宗無定數家語引孔子曰諸見祖宗者皆不毀可爲明証至廟宜立於何所考劉瑾之說謂中宗當穆高宗祖甲當昭各立其廟於太祖廟之兩旁今同堂異室與古制少殊若於中殿垣外旁建世室已居群昭群穆之次不足以示尊崇且中廣於後旣非古式卽相度規模亦嫌未稱似宜展後殿兩旁短垣左右各建世室旣居昭穆廟之上仍在太祖廟之旁與文世室在西北武世室在東北之制相合地非神路所經儘可鴻規大起將來世室告成奉太宗文皇帝孝端文皇后孝莊文皇后神牌於左爲世室一切禮儀悉視中殿其中殿龕位則自世祖章皇帝孝惠章皇后孝康章皇后神牌以次遞遷恭奉穆宗毅皇帝孝哲毅皇后神牌於第九室揆之古今禮制頗無窒礙如蒙飭下王大臣等詳核定議請旨施行庶上慰列聖在天之靈下綿萬世無疆之祚我朝制度直與三代同風矣再事關升祔大禮原宜博采群議考証異同但傳說不一所執各殊若不剖別是非無以折衷至當或

擬展 中殿爲十一室意謂歷代增置具有成規事既易行工亦較省不知天子七廟一壇一墀定爲九室無可議增自晉人謂廟以容主爲限無拘常數故至元帝明帝皆十室至穆帝簡文帝皆十一室唐宋金元沿爲故事或多至十八室然詳繹當日增展之由則皆以兄弟相及者合爲一代下則世次等倫難分昭穆上則高曾未盡難卽祧遷故雖狹小其制猶得以室逾九間數仍九代爲解倘今日踵而行之不獨與古人立廟之制未符亦且與後世增室之意未合況因陋就簡本係叔季衰風設當重熙累洽之朝則自十一室後以兩遞加必至無地可容鼎俎宋展太廟爲十二室孝宗升祔而東室尙虛朱子以爲非祝延壽康之意深不然之酌理衡情無適而可國家敬修祀典當準萬世不易之經不當爲一時權宜之計若苟且遷就但顧目前度 聖人議禮之心當必不願出此也或又擬於 中殿旁別建九楹將中一間爲 穆宗毅皇帝新廟意謂 前殿爲廟 中殿爲寢似乎父子異宮不失禮意而歲時合食亦與古義無乖然禮名升祔不入太廟尙得謂之祔乎在昔殷盤庚時陽甲別出爲廟漢光武時孝成別出爲廟晉主賀循議惠帝別出爲廟唐主陳貞節蘇獻等議中宗別出爲廟是數主者本無功德於民當時建議別祀禮家猶且非之欽惟我 穆宗毅皇帝削平大難承烈顯謨他日當定爲功德之廟百世不祧今甫當 升祔豈宜因 中殿九室已盈擬建新廟轉類於殷漢晉唐舊事乎我 朝經學昌明禮儀詳慎王

大臣等欽承 懿旨必能斟酌盡善仰副 聖謨而臣鯁鯁過慮誠恐衆論紛紜淆於疑似不得不亟爲之辨

再昭穆之次自漢以來紛如聚訟何洵直張璪之論朱子之圖詳且盡必然皆爲都宮異寢者言之若同堂異室而拘於昭常爲昭穆常爲穆必至子居父上曾在孫先極其流弊實有如馬端臨所慮者惟宋陸佃爲周以后穆爲太祖王季爲昭文王爲穆武王爲昭成王爲穆康王爲昭昭王爲穆至穆王入廟王季親盡而遷則文成昭宜居昭位武康穆宜居穆位其言著於禮志最爲明晰臣再四尋繹如佃所云昭穆者父子之號方其爲父則稱昭取昭以明下方其爲子則稱穆取其穆以恭上實較昭穆定名之說爲長如佃所云同堂合食穆居父行則宜爲昭昭居子行則宜爲穆又較昭穆定位之說爲長況壇立於右墀立於左以周制考之太王親盡去右壇而爲墀王季親盡去左祧而爲壇左右遷徙無嫌倘以佃爲不足據豈昭必越壇而經墀穆必有壇而無墀乎我 朝 郊 廟位次東西互殊實與陸佃之說相合誠使中殿龕位以次左右遞遷並非創爲新論仍係率由舊章應請 飭下王大臣等一併核議以垂萬世之式

續陳會奏未盡之意疏

內閣侍讀學士 鍾佩賢

本日會奏 穆宗毅皇帝 孝哲毅皇后升祔位次摺內一切規制業經敬謹臚陳恭候 欽定惟制既協平時宜事必規諸久遠歷代廟制太祖而後有功德者則不祧實爲古今通義我 朝 聖 聖相承功德巍煥以故 三祖 七宗俱爲百世不祧震古鑠今曷乎莫尙已顧尊親之意無窮而禮制之行有限功德之在將來方興未艾 廟室之有定位非可屢增此非臣子所忍言必待 聖人之定論伏查郊壇配位道光三十年二月初六日欽奉 諭旨以 三祖 五宗爲定永遠遵行以 文宗顯皇帝如天之 德升奉 郊配誰曰不宜然而 聖懷冲挹慮後世或有窒礙是以 垂訓煌煌仰見 大聖人識量恢宏迥非尋常所能擬議臣敬念 廟祀不祧與 郊祀配饗均關鉅典事異理同今 穆宗毅皇帝升祔 太廟 三祖 五宗百世不祧固炳然爲不刊之典以後於萬斯年不祧之禮是否永行無窒恭候 皇上春秋鼎盛 聖心自有權衡若蒙 特降綸音使他日聖子神孫欽承恪守則 廟制得聖言而永定與當日 文宗顯皇帝欽定 郊壇配位異世同符矣

遵 旨覆議 升祔典禮疏

李鴻章

竊臣承准軍機大臣字寄六月十四日欽奉 慈安端裕康慶昭和莊敬皇太后 慈禧端佑康頤昭豫莊誠皇太后懿旨本日據禮親王世鐸等奏遵議穆宗毅皇帝孝哲毅皇后神牌升祔位次一摺又據醇

親王弈謨詹事府少詹事文治鴻臚寺卿徐樹銘內閣侍讀學士鍾佩賢鴻臚寺少卿文碩國子監司業
寶廷另行陳奏各摺片已明降諭旨令惇親王弈諤恭親王奕訢醇親王奕譞御前大臣軍機大臣大學
士侍郎翁同龢夏同善禮部太常寺將王大臣等所奏各摺片詳細閱看再行妥議具奏矣 廟制關繫
鉅典必須考核精詳方足以昭慎重着再派李鴻章悉心妥議具奏禮親王世鐸等摺一件醇親王奕譞
等摺片九件並侍郎袁保恆等說帖五件均着抄給閱看將此諭令知之仰見 皇太后慎重鉅典聿求
厥中之至意臣查禮親王等議增 龕座志在斟酌時宜諸臣請改廟制志在考求古禮要皆出於尊崇
祖宗之忱未易折衷定論以臣所聞禮文殘闕古制難詳七廟五廟之文漢世已無定說都宮別殿與
同堂異室昔人亦互有是非卽朱子宗廟圖議馬端臨邱濬等皆病其過拘臣考周官匠人營圖世室明
堂皆止五世鄭註五室並在一堂據此則朱子所圖世室親廟以次而南似亦未必盡合古制至於特建
寢殿增修方殿等說更爲古制所無禮親王等奏稱侍講張佩綸請建世室事涉更張應毋庸議等因
宗廟事重未便輕議改作該親王等所奏不爲無見我 朝 廟制定於 國初 祖宗神靈協會一
室已二百餘年一旦遷改 神明必有不妥 太廟重垣周二百九十一丈 殿陛庭墀各有定式皆一
成而不可變今欲就增數室位置必難得宜又 升祔吉期禮不宜誤戴記所稱不忍一日未有所歸者

也準古酌今改 廟實有難行禮緣人情可以義起因時立制自以倣照 奉先殿成案增修 龕座爲宜議者或以簡略爲嫌臣考古禮祔廟迭遷亦止改塗易檐並不大更舊廟今之 龕座略如晉宋以來之坎室晉太常華坦建議廟室以容主爲限無拘常數厥後王導溫嶠等往復商榷議增坎室宋增八室蔡襄爲圖此皆達禮君子度時之宜以成一代之典彼豈未聞世室親廟之說亦謂禮樂不相沿襲事異殷周禮從而變也今之增 龕實其比例或又謂 奉先殿乃古原廟之制與太廟事體不同查會典所載雍正十一年奏准 奉先殿 神牌供奉與 太廟理應畫一是 太廟如 奉先殿制久有 成憲可循不得謂 奉先殿可以增 龕獨不可仿行於 太廟也仰維 列聖家法皆 躬行節儉以先天下今日援案增 龕之議事屬權宜意從儉樸未必無當於 列聖降鑒之心廷議旣已允諧似應無煩疑慮至祧遷之禮雖古之常制而藏主之室則禮無明文鄭康成禮經大師其言周制祧主藏於太廟及文武世室是已祧之主與不遷之祖同處一廟故廟亦名祧晉代之制藏於西儲夾室當時已疑其非禮後世竟沿爲故事儒家每謂祧於夾室爲古制殆臆度之辭廟旣與古不同祧亦未宜輕議惟 太廟規制有定 國家統緒無窮醕親王議請 明降諭旨曉示天下自今以往親盡則祧並請以 後殿東西二稍間永藏祧主此則導 皇上以太讓酌廟制以從宜禮貴因時讓爲美德非天子不議禮應否 允

行自應一秉 聖裁非臣下所敢妄擬矣

以一死泣請 懿旨豫定大統之歸疏

吳可讀

竊罪臣聞治國不諱亂安國不忘危危亂而可諱可忘則進苦口於堯舜爲無疾之呻吟陳隱患於聖明爲不祥之舉動罪臣前因言事忿激自甘或斬或囚經王大臣會議奏請傳臣質訊乃蒙我先皇帝曲賜矜全既免臣於以斬而死復免臣於以囚而死又復免臣於以傳訊而觸忌觸怒而死凡犯三死而未死不求生而再生則今日罪臣未盡之餘年皆我先皇帝數年前所賜也乃天崩地折忽遭十三年十二月初五日之變卽日欽奉 兩宮皇太后懿旨大行皇帝龍馭上賓未有儲貳不得已以醇親王之子承繼 文宗顯皇帝爲子入承大統爲嗣皇帝俟嗣皇帝生有皇子卽承繼大行皇帝爲嗣特諭罪臣涕泣跪誦反覆思維竊以爲 兩宮皇太后一誤再誤爲 文宗顯皇帝立子不爲我 大行皇帝立嗣既不爲我 大行皇帝立嗣則今日 嗣皇帝所承大統乃奉我 兩宮皇太后之命受之於 文宗顯皇帝非受之於我 大行皇帝也而將來大統之承亦未奉有明文必歸之承繼之子卽謂 懿旨內既有承繼爲嗣一語則大統之仍歸繼子自不待言罪臣竊以爲未然自古擁立推戴之際爲臣子所難言我朝二百餘年 祖宗家法子以傳子骨肉之間萬世應無間然況醇親王公忠體國中外翕然稱

爲賢王觀王當時一 奏令人忠義奮發之氣勃然而生言爲心聲豈能僞爲罪臣讀之至於歌哭不能
已已倘王聞臣有此 奏未必不怒臣之妄而憐臣之愚必不以臣言爲開離間之端而我 皇上仁孝
性成承我 兩宮皇太后授以 寶位將來 千秋 萬歲時均能以我 兩宮皇太后今日之心爲心
而在廷之忠佞不齊卽衆論之異同不一以宋初宰相趙普之賢猶有首背杜太后之事以前明大學士
王直之爲國家舊人猶以黃珌請立景帝太子一疏出於蠻夷而不出於我輩爲愧賢者如此遑問不肖
舊人如此奚責新進名位已定者如此況在未定不得已於一誤再誤中而求一歸於不誤之策惟有仰
乞我 兩宮皇太后再行明白降一 諭旨將來大統仍歸承繼 大行皇帝嗣子 嗣皇帝雖百斯男
中外及左右臣工均不得以異言進正名定分預絕紛紜如此則猶是 本朝 祖 宗來子以傳子之
家法而我 大行皇帝未有子而有子卽我 兩宮皇太后未有孫而有孫異日繩繩緝緝相引於萬代
者皆我 兩宮皇太后所自出而不可移易者也罪臣所謂一誤再誤而終歸於不誤者此也彼時罪臣
卽以此意擬成一摺由都察院轉進呈底 奏底俱已就草伏思罪臣業已降調不得越職言事且此何
等事此何等言出之親臣重臣大臣則爲深謀遠慮出之疏臣遠臣小臣則爲干進希名又思在諸臣中
忠直最著者未必卽以此事爲可緩言亦無益而置之故罪臣且留以有待洎罪臣以查辦廢員內蒙

恩圈出引 見奉 旨以主事特用仍復選授吏部邇來又已五六年矣此五六年中環顧在 廷仍未
有念及於此者今逢我 大行皇帝永遠奉安 山陵恐遂漸久漸忘則罪臣昔日所留以有待者今則
迫不及待矣仰 鼎湖之 仙駕瞻戀 九重望 弓劍於 橋山魂依尺帛謹以我 先皇帝所賜餘
年爲我 先皇帝上乞 懿旨數行於我 兩宮皇太后之前惟是臨命之身神志瞽亂摺中詞意未克
詳明引用率多遺忘不及前此未上一摺一二繕寫又不能莊正罪臣本無古人學問豈能似古人從容
昔有赴死而行不復成步者人曰子懼乎曰懼曰既懼何不歸曰懼吾私也死吾公也罪臣今日亦猶是
鳥之將死其鳴也哀人之將死其言也善罪臣豈敢比曾參之賢卽死其言亦未必善惟望我 兩宮皇
太后我 皇上憐其哀鳴勿以爲無疾之呻吟不祥之舉動則罪臣雖死無憾宋臣有言凡事言於未然
誠爲太過及其已然則又無所及言之何益可使 朝廷受未然之言不可使臣等有無及之悔今罪臣
誠願異日臣言之不驗使天下後世笑臣愚不願異日臣言之或驗使天下後世謂臣明等杜牧之罪言
雖逾職分效史鱗之尸諫祇盡愚忠罪臣尤願我 兩宮皇太后我 皇上體 聖祖 世宗之心調劑
寬猛 養忠厚和平之福任用老成毋爭外國之所獨爭爲中華留不盡毋創 祖 宗之所未創爲子
孫留有餘罪臣言畢於斯願畢於斯命畢於斯再罪臣曾任御史故敢昧死具摺以陳又以今職不能專

達懇由臣部堂官代爲上 進罪臣前以臣衙門所派隨同行禮司員內未經派及罪臣是以罪臣再四面求臣部堂官大學士寶鑒始添派而來罪臣之死爲寶鑒所不及料想寶鑒並無不應而派誤派之咎時當 盛世豈容有疑於古來殉葬不情之事特以我 先皇帝龍馭永歸天上普天同泣故不禁哀痛迫切謹以大統所繫冒陳悽悽自稱罪臣以聞

翁同龢

闡明 聖意疏

徐桐

潘祖蔭

閏三月十七日 發下主事吳可讀一摺 命王大臣等妥議臣等謹於四月初一日齊赴內閣公同集議竊思吳可讀所陳豫定大統此窒礙不可行者也我 朝 家法不建儲貳此 萬世當敬守者也臣等恭繹同治十三年十二月 懿旨於 皇子承嗣一節所以爲統緒計者至深且遠 聖諭煌煌原無待再三推闡今吳可讀既有此 奏而 懿旨中復有卽是此意之諭 特命廷臣集議具 奏若不將聖意明白宣示恐天下臣庶轉未能深喻 慈衷臣等以爲誠宜申明 列聖不建儲之 彝訓將來皇嗣蕃昌默定大計以 祖 宗之法爲法卽以 祖 宗之心爲心總之紹膺 大寶之元良卽爲

承繼 穆宗毅皇帝之 聖子揆諸 前諭則合準諸 家法則符使薄海內外咸曉然於 聖意之所
在則 詒謀久遠 億萬世無疆之休實基於此矣

遵 旨妥議疏 附片

寶 廷

竊聞三月十七日吏部代 奏故主事吳可讀遺摺請 皇太后明降 懿旨豫定將來大統之歸奉
懿旨此次吳可讀所奏前降旨時卽是此意着王大臣大學士六部九卿翰詹科道將吳可讀原摺會同
妥議具奏等因欽此仰見 皇太后慎重統緒博采羣言至意奴才竊以爲大統之歸固已早定本無異
議無須再降 懿旨詔命 皇上惟當引伸前 旨以喻天下臣民恭繹同治十三年十二月初五日
懿旨之意蓋言 穆宗毅皇帝未有儲貳無可承繼將來卽以 皇上所生之 皇子承繼 穆宗毅皇
帝爲嗣非言生 皇子卽時承繼也言嗣而統賅焉矣引伸之蓋言將來卽以 皇上傳統之 皇子承
繼 穆宗毅皇帝爲嗣也因 皇上甫承大統故渾涵其詞含意未伸留待 皇上親政日自下 明詔
此 皇太后不忍歧視之 慈心欲以孝悌仁讓之休歸之 皇上也而惜乎天下臣民不能盡喻也廣
安不能喻故生爭於前吳可讀不能喻故死爭於後旣可讀遺摺意亦如此而詞意未克詳明可讀不自
云臨命之身神智瞽亂乎不然我 朝夙不建儲可讀豈未之知耶奴才竊痛可讀死殉之忠而又惜其

遺摺之言不盡意也可讀未喻 懿旨言外之意而其遺摺未達之意 皇太后早鑒及之故曰前降旨時卽是此意也且 皇太后之意亦卽 皇上之意也就令無當日 懿旨 皇上親政日必首降將來傳統之 皇子承繼 穆宗毅皇帝爲嗣之 諭況明有 懿旨在前乎 皇上天生 聖人入承大統豈忍負 皇太后 撫育深恩 穆宗毅皇帝付託之重而自私 神器哉遺摺以忠佞不齊異同不一爲慮此固可讀之忠心而實過慮者也宋太宗背杜太后明景帝廢太子見深雖因臣下妄進邪說究由二君有私天下之心故諂佞之言得乘之而入伏讀 高宗純皇帝御批通鑑輯覽謂太宗傳子私念不待趙普贊成而早定於胸中見深之立旨由太后至於廢黜之際則不復請命東朝是并蔑視其母聖智深遠燭見隱微推而論之明世宗之於興獻忘所後而重本生任私恩而棄大義亦不得專咎張桂諸臣也我 朝 聖 聖相承迥邁前代縱有趙普黃琬之輩 皇上仰遵 祖 宗彝訓遠鑒宋明不惟其言不能入且必重加之罪況 兩宮懿旨懸之於上孤臣遺疏存之於下傳之九州載之 國史皇上若竟信佞臣諂媚之語違背 慈訓棄置忠言何以示天下後世背義自私之事鄉黨自好者不爲而謂 聖人爲之乎此固可讀之忠心而實過慮也此次廷臣議上 皇太后降旨時但請將同治十三年十二月初五日 懿旨之意詳爲引伸俾天下臣民永無疑義我 皇上孝悌仁讓必能以 皇太后

之心爲心無須諄諄 申命並請將前後 懿旨與廣安吳可讀及此次與議諸臣 奏議存之 毓慶宮俟 皇上親政日由 毓慶宮諸臣會同軍機大臣恭呈 御覽自必明降 硃諭宣示中外將來傳統之 皇子承繼 穆宗毅皇帝爲嗣俾天下後世咸知我 朝 家法遠越宋明 皇太后至慈 皇上至孝至悌至仁至讓且以見 穆宗毅皇帝至聖至明付託得人也豈不懿歟如是則綱紀正名分定天理順人情安倫常骨肉無嫌無疑又何至違我 朝 家法蹈前代覆轍遺憾於母子兄弟君臣之間哉本月初一日恭赴內閣會議因意見微有不合事關重大未敢遷就謹另摺具陳以備 采擇再王大臣等所議亦非不得體惜未盡妥前降 懿旨因詞意渾涵致有吳可讀之請此事不議則已既下廷議豈可仍復渾涵其詞廷議謂將來 穆宗毅皇帝繼統之義已早賅於 皇太后前降 懿旨之中將來 神器所歸 皇上自能斟酌盡善固也然 懿旨意深詞簡意存言外苟泥於其詞難免害意不及此時引伸明晰異日 皇上生有 皇子將卽承繼 穆宗爲嗣乎抑不卽承繼乎不卽承繼則似違 懿旨若卽承繼又嫌跡近建儲就令僅言繼嗣不標繼統之名而天下臣民亦隱然以儲貳視之是不建之建也而此 皇子賢也固 宗社之福如其不賢將來仍傳統乎抑舍而別傳乎別傳之 皇子仍繼 穆宗是亦不廢立之廢立也豈太平盛事乎至此時卽欲 皇上斟酌盡善不亦難乎廷議之意

或以 皇上親政 皇子應尙未生不難豫酌一盡善之規然國君十五而生子設 皇子誕育如在撤簾之前又何以處之乎與其留此兩難之局以待 皇上何如及今斟酌盡善乎且 皇太后懿旨非皇上所當擅改此時不引伸明晰將來 皇上雖能斟酌盡善敢自爲變通乎竊謂諸臣既奉 命會議當將前降 懿旨之意引伸明晰預定擬一盡善之規以備異日 皇上御覽卽以釋今日天下臣民之疑若乃渾涵其詞何取此盈廷一議乎此未妥者一也廷議又謂繼統與建儲文義似殊而事體則一似也然 列聖垂訓原言嗣統之常今則事屬創局可讀意在存 穆宗之統與無故擅請建儲者有間文義之殊不待言矣乃廷議不分別詞意漫謂於我 朝 家法未能深知則日前 懿旨卽是此意之謂何天下聞之不更滋疑四海九州莫不觀聽立言似未盡得體此未妥者又一也奴才非有心立異因廷議實有未能詳明允協者不顧煩瀆附片覲陳

遵 旨謹陳管見疏

附片

國子監司業

張之洞

閏三月十七日欽奉 兩宮皇太后 懿旨以吏部主事吳可讀遺有密摺請豫定大統之歸前降 旨時卽是此意 命諸臣妥議具奏竊謂爲 穆宗毅皇帝立嗣繼嗣卽是繼統此出於 兩宮皇太后之意合乎天下臣民之心而卽爲我 皇上之所深願乃萬古不磨之義將來必踐之言臣敬吳可讀之至

忠至烈然謂其於不必慮者而過慮於所當慮者而未及深慮也恭查爲 穆宗繼嗣之語同治十三年十二月初五日光緒元年正月十七日及本年閏三月十七日三奉 懿旨炳如日星從來人君子孫凡言繼嗣者卽指續承大統而言天子諸侯並同一理蓋人君以國爲體諸侯不得祖天子公廟不設於私家苟不承統何以嗣爲下至三代之世卿大夫漢魏以至 本朝之世爵世職但云以某爲嗣卽是紹封襲蔭故繼嗣繼統毫無分別編稽羣經諸史從無異說其分繼統繼嗣爲兩事者乃前明張璁桂萼之怪妄謬說 高宗純皇帝 欽定儀禮義疏早已辭而闢之矣今 懿旨申命至於再三金匱寶錄何待他求設有迷妄小人舞文翻案則廷臣中凡讀書識字者皆得執簡而爭所謂不必慮者一也前代人君授受之際事變誠多然就該主事所舉二事論之宋太宗背太祖而害其姪沂王德昭非太宗子也明景帝背英宗而廢其姪太子見深非景帝子也若 皇上以 皇子嗣 穆宗名曰 先朝之繼體實則今日之麟振有何嫌疑有何吝惜以 皇上仁孝之聖質受 兩宮皇太后 高厚之殊恩起自宗支付之神器必不忍負 皇太后必不忍負 穆宗且夫遵 慈命孝也篤 天顯友也使 皇子廣孝思於不匱慈也 躬膺寶祚而使大統名分歸之於 先帝讓也無損於實而四美具焉中主亦能勉爲之況聖主乎所謂不必慮者二也該主事所慮趙普黃玠之輩誠難保其必無然忠佞不齊數年前曾有請頒

鐵券之廣安矣大小臣工豈遂絕無激發明世宗素大統而昵私親者以興獻王已沒故得藉口親恩恣爲越禮羣臣不能抗也假使興獻王在必尙能以禮自處少加裁制今醮親王天性最厚忠直恪恭該主事既知其賢萬一果如所慮他日有人妄進異言醮親王受累朝之厚恩必能出一言以救正所謂不必慮者三也然而竟如該主事所請明降懿旨將來大統仍歸穆宗之嗣子意則無以易矣詞則未盡善也緣前奉懿旨謂生有皇子卽承繼穆宗爲嗣今若叅以該主事之說是一生而已定爲後之義卽一生而定大寶之傳合併爲一將類建儲我朝列聖以立儲爲大戒高宗九降綸音萬分剴切今若建之有違家法所謂未及慮者一也前代儲貳讒搆奪嫡流弊已多今被以紹統之高名重以承繼之形迹較之尋常主器尤易生嫌所謂未及慮者二也然此尙非其弊之最甚者也天位授受簡在帝心所以慎重付託爲宗社計也帝堯多男非止一索聖意所屬知在何人此時早定豈非太驟所謂未及慮者三也今者承命集議伏讀此次懿旨卽是此意四字言簡意賅至堅至確天下萬世誰敢不遵無可移易者也獨是聖意宜遵家法亦宜守今日之事約有二說淺之爲穆宗計者則但如諸臣之議並請一渾涵懿旨略謂屢次懿旨俱已賅括皇上孝友性成必能處置盡善似乎無所妨矣然而生卽承繼卽是此意一語字字當遵託諸文辭則可避建儲之名見諸實事則

儼成一建儲之局他日誕皇子命承繼廷臣中爲公爲私不可知皆必將援祖訓以爭之則承繼之事中止此日以恐類建儲而承統之說不能定異日又以恐類建儲而承繼之旨不能宣是令皇上轉多難處矣然則深之爲穆宗計而卽爲宗社計惟有因承統者以爲承嗣一法皇子衆多不能遽指定何人承繼將來續承大統者卽承繼穆宗爲嗣此則本乎聖意合乎家法而皇上處此亦不至於礙難伏請兩宮聖裁卽以此意明降懿旨皇上親政之初循覽慈訓感惻天懷自必仰體聖意再頒諭旨祇告郊廟宣示萬方則固已昭於天壤堅於金石矣如此約有五利守彝訓一也待宸斷二也無嫌疑三也無更變四也精擇賢五也至於精擇賢而其利宏焉在兩宮慈愛之念惟期於繼嗣繼統久遠遵行豈必亟亟焉指定一承繼之人而後慰卽穆宗在天之靈當亦願後嗣聖德永綏洪祚又豈必斤斤焉早標一嗣子之目而後安此固爲我國家億萬年之至計卽使專爲穆宗嗣子策之似亦無善於此者矣或謂禮制精深動關名義由此以承統爲承嗣之說安保日後無泥古聚訟者則臣請得條舉其說而豫辨之一曰禮爲人後者爲之子三代人君凡繼先君之統者卽爲先君之後雖無父子之名而用父子之禮皇上承穆宗之統矣何以又別立後不知父子之說漢唐來久已不行且皇上承繼文宗顯皇帝爲子已有明文文宗有子則


穆宗無子矣豈有 御宇十三年功德溥四海之 先帝而不爲立後者其不足辨一也一曰禮嫡子不得後大宗不知此爲臣庶言之非爲 天家言之也古來擇取親屬入承大統則本宗不敢私其嫡子尊也若 嗣君爲 先君立嗣則嗣君亦不得私其嫡子蓋 嗣君與 先君當日固有君臣之分者也亦尊尊也然入承大統者既承 累朝之大宗則本支應自爲繼別之宗並不得以小宗論於禮於法當立別嗣者也 嗣君既爲大宗則雖以子爲 先君後於禮於法不能別立嗣者也然則就今日事勢論之將來 皇子雖爲 穆宗之嗣子仍無妨爲 皇上之嫡子尊尊亦親親也 皇朝律令對承繼之文則曰本生父母他日稱謂區別 聖心自有權衡 兩宮以聖而行權 皇上以聖而制禮一舉而忠孝慈友之人倫備焉尊尊親親之禮意賅焉義協而禮起何爲不可其不足辨二也一曰春秋傳云君子大居正故兄弟叔姪輾轉授受每難帖然不知從父從子乃生釁隙若 皇子承 先朝但存名義豈判親疎其不足辨三也凡此皆羣經之精言而實不切於今日之情事設有迂儒引之以撓夫 國是佞夫藉之以文其莠言 大智聰明豈能惑哉今者往事已矣 惠陵永闕 帝 后同歸旣無委裘遺腹之男復鮮慰情勝無之女傷心千古夫復何言承嗣承統之說不過於禮制典冊之中存此數字空文俾 穆宗在 天之靈爽雖遠而不遠幾忘而不忘庶可稍慰 兩宮嚮閔之 恩且伸 皇上友于之愛夫吳


可讀區區一貶謫小臣耳尙且昌言以發其端致命以期其許何況子道弟道兼盡之 聖主哉昔漢景帝欲悅竇太后之意至有千秋萬歲後傳梁王之語梁王非有應嗣之分者也宋高宗以太宗之後乃閔太祖子孫零落而以太祖七世孫孝宗爲嗣孝宗非有承統之約者也 皇上聖明遠在二君之上竊謂今日者惟在責成 毓慶宮侍學諸臣盡心輔導培養 天性開陳至道 皇上孝悌之心油然而自生尊尊親親之等秩然而不紊任賢去佞內修外攘則所以仰體 兩宮上慰 穆宗者固不僅在繼嗣承統一端而已也卽以此一端而論其沃心正本之方亦在彼而不在此伏維 皇太后與 皇上名分已定 恩誼日篤 皇太后視 皇上所生 皇子無論承繼 穆宗與否同爲己孫 皇上視所生 皇子無論承嗣 穆宗與否同爲己子君臣一德共濟艱難此 宗社之福而臣民之願也臣恭繹 懿旨中卽是此意妥議具奏二語文義是者是其將來大統宜歸嗣子之意議者議夫繼嗣繼統並行不悖之方臣工應 命陳言豈敢以依違兩可之游詞貽 廟堂他日之籌慮是以謹竭愚悃專摺具陳無任悚惕屏營之至


再此次 懿旨中卽是此意一語乃此議之緊要關鍵 天地神祇實所共聞 朝野臣民咸所共喻諸臣心知其意而苦於恐涉建儲不敢發揮故不便述此四字之文而專駁吳司讀之摺以爲如此便可不

類建儲矣豈知 聖意已經宣播若不善爲會通乘此時畫一良策究其事勢轉恐終必類於建儲而後已且 懿旨上言豫定下言卽是語意相連今不爲之疏解分明以妥議具奏始以無庸置議終傳之四方實駭物聽雖其所謂無庸議者係指原摺而言誠恐迂儒以文害辭誤疑 兩宮有游移之意更恐他日讒佞附會正藉此議爲翻案之端一言之微語病甚大竊謂此事關繫至重伏望 兩宮聖裁熟思權衡至當再降 懿旨臣愚不勝大願

恭讀四月初十日 慈安太后 慈禧太后懿旨略謂 皇帝受 穆宗毅皇帝付託之重將來誕生皇子自能慎選元良繼承統緒其繼大統者爲 穆宗毅皇帝之嗣子守 祖宗之成憲示天下以無私 皇帝必能善體此意也所有吳可讀原奏及王大臣等會議摺徐桐翁同龢潘祖蔭聯銜摺寶廷張之洞各一摺並閏三月十七日暨本日 諭旨均著另錄一分存毓慶宮至吳可讀以死建言孤忠可憫着交部照五品官例支卹蓋略用竹坡學士疏中語意而可爲天下萬世爲人臣者勸矣







DS
754
.K8
v.14

皇朝經世文續編卷五十二目錄

禮政三 大典下

奏定 文廟祀典記

文廟祀典私議

孔忠移祀崇聖祠議


請將漢儒許慎從祀疏

請升先儒韓愈祀位配享孟廟疏

遵議先儒從祀請 旨準行疏

稟撫部院

續修會典事例請 飭妥議開館章程疏



俞樾

俞樾

汪鳴鑾

鈕玉庚

潘祖蔭

薛福成

延煦



糸世系

糸世系

糸世系

糸世系

糸世系

糸世系

糸世系

糸世系

糸世系

糸世系

糸世系

糸世系

糸世系

糸世系

糸世系

糸世系

糸世系

糸世系

糸世系



皇朝經世文續編卷五十二

禮政三 大典下

上海葛士濬子源輯

奏定 文廟祀典記

俞樾

咸豐六年十有一月河南學政臣樾言昔孔子周流列國同時賢大夫其克協聖心者於衛則有伯玉於鄭則有子產而觀論語所載則於子產尤稱道弗衰蓋孔子在鄭嘗以兄事之及其卒也爲之流涕今文廟從祀有蘧瑗而無公孫僑非所以遵循聖心修明祀事也臣比因校士再至鄭州登東里之墟渡溱洧之水緬懷遺愛想見其人夫附驥益顯非必及門衛鄭兩賢事同一體瑗既從事僑胡獨遺臣愚以爲先賢鄭大夫公孫僑宜從祀 文廟大成殿兩廡又按孔子有兄曰孟皮故論語稱孔子以兄子妻南容而史記弟子列傳有孔子兄子孔忠蓋皆孟皮之子也孟皮言行無所表見然既爲孔子之兄則亦祀典所不可闕者孔子曰所求乎弟以事兄未能也今以孔子爲帝王萬世之師京師郡縣莫不崇祀上及其祖下逮其孫而獨缺其兄揆之至聖之心或者猶有憾乎臣愚以爲孟皮宜配享 文廟崇聖祠奏上詔下其議於禮部僉曰宜如臣樾言爰定公孫僑從祀大成殿西廡位林放上孟皮配享崇聖祠位西向

第一 天子俞焉于是上自 國學下至郡縣學咸奉行如 詔禮也其明年樾以人言免官自惟奉職無狀不稱朝廷遣使者之意惟此二事祀典存焉且孟皮之議實發於先臣蓋先臣有詠古詩四章其次章爲孟皮未與配享而作奉承先志幸無失墜念漢世如乙瑛請置卒史韓勅造立禮器咸刻石勒名垂示後世作而不紀後無述焉爰著本末以誌方來乃爲頌曰英英子產君子之風兄事勿替尼父所欽宜祀于廡以尊孔心扶彼蘧氏爲聖作朋孟皮弱足不良能行有開必先實惟聖兄所求未能聖心悲傷配食先代祀事孔明

文廟祀典私議

俞樾

咸豐六年樾在河南學政任 奏請援蘧瑗之例以鄭公孫僑從祀 文廟兩廡又請以孔子兄孟皮配享 崇聖祠 詔下禮部議皆如所請樾旋以人言去職跼伏草野又經兵亂流離奔走靡有定居然念文廟祀典尙有宜增益者樾故官學政俎豆之事固所職也茲雖放棄敢默而息乎謹私議之如左
一曰今所傳毛詩故訓傳者大毛公亨所爲也謹按陸德明經典釋文序錄曰毛詩者出自毛公徐整云子夏授尙行子尙行子授薛蒼子薛蒼子授帛妙子帛妙子授河間人大毛公一云子夏傳曾申申傳魏人李克克傳魯人孟仲子孟仲子傳根牟子根牟子傳趙人孫卿子孫卿子傳魯人大毛公是大毛公之

詩其原出於子夏鄭康成本之而爲箋孔穎達因之而爲正義至今學者誦習謂之毛詩齊魯韓三家之詩皆不傳而毛詩獨行昔唐貞觀二十一年詔以左丘明卜子夏等二十二代用其書華於國胄自今有事大學並令配享若大毛公之故訓傳非所謂代用其書者歟徐堅初學記載大毛公之名曰亨是較高行子之徒傳其氏而不傳其名者其迹之顯晦有殊矣乃 文廟從祀有小毛公葺而無大毛公享禮曰三王之祭川也先河而後海或原也或委也此之謂務本今祭小毛公而不及大毛公無乃飲其委而忘其原歟非先河而後海之誼也是宜增入者一 一曰義理存乎訓詁訓詁存乎文字無文字是無訓詁也無訓詁是無義理也然則文字所繫顧不重歟漢太尉南閣祭酒許慎生東漢中葉去古稍遠俗儒或詭更正文以耀於世慎學於賈逵從受古學著說文解字十四篇五百四十部九千三百五十三文敘篆文合以古籀使學者得以考見六書之原因文字而通訓詁因訓詁而明義理厥功甚巨其稱易孟氏書孔氏詩毛氏禮周官春秋左氏論語孝經皆古文也凡古文舊說散失無傳者賴其書猶存什一鄭康成注禮嘗徵引及之鄭之於許年代未遠而其書已爲鄭所刺取慎又著孝經孔氏說及五經異義是其貫通經學著述非一而說文解字一書尤爲言小學者所宗士生今日而欲因文見道舍是奚由哉伏念我朝同文之治超踰前代家有許氏之書人習說文之學而春秋有事 文廟慎不得與配享之列無

乃闕歟是宜增入者二

孔忠移祀崇聖祠議

俞樾

謹按家語孔忠字子蔑孔子兄子蓋卽孟皮之子也今從祀大成殿東廡其位在狄黑之下公西赤之上說苑載孔子弟子有孔蔑者與宓子賤同仕孔蔑卽孔忠也其賢固不若子賤然旣爲孔子兄子則子思子之從伯叔父也子思爲四配之一祭於殿上而孔忠祭於廡揆之倫理有未順焉伏思顏路曾皙竝孔子弟子宜從祀大成殿兩廡而今入崇聖祠者避其子顏子曾子也孔忠於子思固非父子然而禮曰兄弟之子猶子也竊謂孔忠宜移祀崇聖祠以安子思之神樾於咸豐六年奏請以孟皮配享崇聖祠而未見及此因著其說俟後之君子焉

請將漢儒許慎從祀疏

汪鳴鑾

竊惟聖人之道垂諸六經而經之義理非訓詁不明訓詁非文字不著周公作爾雅雅者正也所以正文字也古者曰文今世曰字孔子論政必先正名且極之禮樂刑罰然則文字所繫顧不重乎漢太尉南閣祭酒許慎生東京中葉去古稍遠俗儒或詭更正文以耀於世慎於是著說文解字十四篇五百四十部九千三百五十三文叙篆文合以古籍古聖人創造書契之意得不盡泯者賴有此書之存後漢書儒林

傳稱慎性篤學博又曰五經無雙許叔重其爲當時推敬亦可概見伏讀高宗純皇帝 欽定四庫全書
總目於說文一書稱其推究六書之義分部類從至爲精密然則士生今日而欲因文見道舍是奚由夫
說文之學至我 朝而始大顯如惠棟朱筠錢大昕王念孫段玉裁戴震孫星衍嚴可均阮元桂馥等諸
家撰述各有發明稱極盛矣而春秋有事 文廟未有議及配享者 臣愚以爲兩漢傳經之功莫大於鄭
康成而鄭康成註禮嘗徵引許書鄭之於許年代未遠而其書已爲剽取其服膺可知 欽定四庫全書
總目謂兩漢經學極盛若許若鄭尤皆一代通儒非後來一知半解所可望其津涯 聖訓煌煌允爲千
秋定論許鄭並稱無所軒輊雍正二年已復康成從祀士林僉稱盛舉而許慎大儒事同一例則慎之應
從祀者一也訓詁之學首推毛氏而善承毛學者惟許慎故說文之義往往與毛傳相合 欽定四庫全
書總目定詩傳爲毛亨所撰同治二年 允御史劉慶之請列祀毛亨于東廡而慎獨未與則慎之應從
祀者二也漢人說經喜用讖緯雖大儒猶或不免惟說文一書不雜讖緯家言其稱易孟氏書孔氏以及
論語孝經皆古文也凡古文舊說散失無傳者猶存什一於千百七十子之微言大義賴以不墜魏晉以
來注書者奉爲科律往往單辭片義引用者多至十餘家他傳注所未有其有功於經訓誠非淺鮮則慎
之應從祀者三也朱子崛起南宋躬行實踐上承孔孟之傳而四書集註引用說文者不可枚舉朱子語

類云讀書不理會字畫音韻卻枉費無限詞說牽補而卒不得其大義甚害事也是宋儒之講求義理非本訓詁文字而亦無由以明說文解性情二字獨主性善之說與孟子董仲舒之言相表裏則慎之應從祀者四也綜其網羅古訓博采通人天地山川王制禮儀靡不畢貫實足爲聖經之羽翼示後學之津梁核與咸豐十年奏定章程均屬符合應否將漢儒許慎從祀 文廟之處合無請 旨飭下部臣集議

請升先儒韓愈祀位疏

鈕玉庚

竊惟自古帝王型方訓俗無不崇學術正人心顯示儒宗享報之隆卽隱杜邪說誣民之漸是以孔顏曾孟歷朝祀典昭垂並及門弟子後世賢儒有功聖教者悉皆從祀兩廡甚者配饗 廟廷用意至深且遠況逢 列聖相承修明文教咸豐十年大學士軍機大臣遵 旨議定嗣後從祀 文廟應以闡明聖學傳授道統爲斷近歲以來如許慎張伯行等先後增祀固已有美必彰無遺不舉 臣伏念孔孟之學發明於宋儒是以周敦頤等特稱先賢入祀 孔廟兩廡並以朱子升列哲位顧自宋以前秦漢五季佛老肆行道脈幾墜賴有唐儒韓愈力持其後躬任其難所稱孔子之道獨孟氏之傳得其宗嘗推尊孟氏以爲功不在禹下又曰孟氏醇乎醲者也其原道一篇推本於堯舜禹湯文武周公孔孟正學賴以昌明諫迎佛骨一表陳善閉邪引君當道凡所著述皆有關於千古世道人心與孟子息邪說距跛行放淫詞以承三

聖者遙相授受孟子亦嘗以能言距楊墨爲聖人之徒且孟子距楊墨去孔子二百年韓愈排佛老乃去千有餘歲時代愈遠儒術愈歧其間匡扶世教之人尤不可少是孟子以後闡明聖學傳授道統當以韓愈爲最其振興墜緒先於孔廟西哲之朱子授受心傳匹於孟廟東配之樂正臣奉命視學山東按試兗郡瞻謁鄒縣孟廟恭查乾隆三十一年奉旨飭下禮部更定從祀坐次十九人先儒韓愈孔道輔各居兩廡之末在部臣典習明禮已知以食報馨香爲重而盛世禮隆激勸尤必以有功名教爲尊東省爲聖賢桑梓重地亟宜追崇正學加意闡揚如韓愈之舐排異端攘斥佛老浩然之氣塞乎兩間是上接洙泗鄒嶧之宗傳下開濂洛關閩之正軌獨守先待後於其間其功德之隆若僅從祀孔孟兩廡臣愚猶謂不足以示尊異擬請援朱子升列孔廟哲位之例將孟廡舊設先儒韓氏祀位升列東配樂正子之次改稱先賢韓子爲亞聖西配並將孔廟西廡舊設韓愈祀位先儒改稱先賢按代序次升列兩廡宋先賢之右以示一律尊崇之處應請飭下禮部會同大學士九卿國子監詳議具奏請旨定奪如蒙俞允由部臣通行各直省敬謹遵行俾薄海內外臣民咸曉然於聖朝崇正黜邪維持世教之至意以最後之學者誠能私淑聖賢不惟升堂且可入室似於世道儒風不無裨益謹就管見所及會同山東巡撫臣周恆祺繕摺具陳

遵議先儒從祀請 旨准行疏

潘祖蔭

竊臣等准禮部咨以前任江西學政陳寶琛奏請以故儒黃宗義顧炎武從祀 文廟欽奉 諭旨命臣

等赴內閣會議臣等謹按從祀之典古無所見禮記文王世子凡學春官釋奠於其先師秋冬亦如之又凡始立學必先釋奠於先聖先師鄭元注先聖周公若孔子先師漢禮有高堂生樂有制氏詩有毛公書有伏生億可以爲之此爲言從祀之始漢魏以還闕焉未舉唐貞觀二十二年詔左邱明等總二十二座春秋二仲行釋奠之禮繼遂以周公配成王而以孔子爲先聖此爲定從祀之始推原事始蓋本樂祖瞽宗之義凡從祀先聖者皆博士弟子所從承學轉相授受之本師沒則各以其師附祀所謂將習其道必各祭其師証之古誼斯爲最合濂洛諸賢挺生宋代卓然爲世大師元明以來迭爲增祀亦因士習其教故以崇德爲報功追契始初並非相悖厥後請祀紛紛無關茲義我 朝禮教昌明動循古法道光九年特旨不准李容從祀蓋懼空談心性者冒越其間實與唐人創始之心若合符節臣等遠遵其義近懍聖謨謹核黃宗義顧炎武之生平及素所服習該故儒之遺書竊謂宗義炎武皆有傳經之功衛道之力崇正遏邪之實效敢舉其合於從祀之誼者條列上 聞不厭煩瀆一一爲我 皇太后 皇上陳之我 朝文治昌明經師輩出諸經各有專家各有疏義精研小學淹貫羣經者尤難指數蓋自三代以來

經學至國朝而極盛而上溯淵源並推至黃宗義顧炎武而止卽至辨書古文之僞發古韻之微深通天算博稽地理凡樸學之專門皆該二儒之遺緒迄今著述炳在人寰傳授旣繁淵源有在是凡讀其書習其言者皆以該二儒爲轉相授受之本師故道光年間京朝各官特建顧炎武祠於京師春秋祀事直省學人咸爲執事迄今不絕蓋亦未有之創舉矣臣等以爲人心所在卽定論所憑各省名臣達宦實不乏人何以區區獨祀該故儒此卽所謂將習其道必各祭其師皆發於人心之不自覺臣等準之古誼以爲黃宗義顧炎武當從祀者此其一然僅合古誼而相乖今制臣等亦不敢妄請伏讀道光九年聖訓先儒升祔學宮祀典至鉅必其人學術精純經綸卓越方可以俎豆馨香用昭崇報又咸豐十年議准從祀先儒應以闡明聖學傳受道統爲斷臣等查黃宗義編定明儒學案綜二百年學術升降之原會通融貫雖出自戴山而於姚江未派痛予斥絕故河東姚江兩得其正創修宋元學案條分派別只斥邪而扶正不伐異而黨同其稱朱子謂致廣大盡精微綜羅百代推挹可云極至顧炎武不立講學之名而有蹈道之實其論學之旨謂聖人之道曰博學於文曰行己有恥又謂今之理學禪學也不取之論語五經而但資之語錄不知本矣故所學一以臆篤精實而無囂張之氣門戶之私至推崇朱子其所著日知錄皆可覆按夫亦足以當學術精純之目矣然猶未証諸實效也明季心學盛行顏山農何隱李贄之徒標

目狂禪蕩無禮法細行不謹束書不觀學術既壞國運隨之黃宗義排斥其根株顧炎武痛絕其支蔓自二儒興而禪學息矣禪學息而樸學起矣絕續之交固由景運之隆亦該故儒教澤之力所謂闡明聖學傳授道統者非歟至於經綸卓越之稱該二儒皆以經濟交推特以身丁末運心在勝朝自不能奮跡昌期各抒偉略如顧炎武日知錄所載正定之轄五州二十七縣蘇州之轄一州七縣而蘇州之糧三百三萬八千石正定止一十萬石王者則壤成賦豈有大小輕重之不同若此者後之王者審形勢以制郡縣則土壤以起徵科乃平天下之先務此卽列聖減定蘇松浮糧及增設直隸州改併州縣之議其他鑒明人之失開我朝之法者不可枚舉而肇域志宅京記諸書具有深意尤非徒輿地之學蓋與宗義明夷待訪錄同爲經濟家必資之書矣夫空言經濟能欺一時而不能垂之後世至流傳二百餘年而讀者猶思取法則其非空言經濟可知矣臣等準之今制以爲黃宗義顧炎武當從祀者又其一凡若此而無列聖欽定之評猶未敢遽定也黃宗義顧炎武經四庫著錄之書原案已經詳列提要褒許之語學者無不周知臣等毋庸復爲引叙惟欽定國史儒林傳於黃宗義傳內稱其上下古今穿穴羣言自天文地志九流百家之教無不精研又稱宗義之學出於蕺山聞誠意慎獨之說縝密平實於顧炎武傳內謂其斂華就實扶弊救衰又謂國朝學有根柢以炎武爲最至篇末特筆謂其在華陰於雲臺觀

側建朱子祠則隱然以紫陽嫡派歸之矣如謂四庫提要中有一二糾正之語遂卽寢議此正不然提要爲叙錄之體意在解題係專爲一書而發非是統論全書譬如詩有正變書有真僞而至今並籌爲經未嘗有所偏廢遠者無論矣臣等卽就國朝之得列從祀者言之如陸世儀思辨錄提要則謂其不免迂闊之失陸隴其問學錄提要則謂其過於主持孫奇逢四書近指提要則謂其不免高明之病至張伯行所著理學各書斥入儒家存目一字不登向使當時禮臣必據提要之辭以爲論定諸儒之案則陸世儀等卽不應俎豆於兩廡矣湯斌國朝從祀之儒之至純至正者也而推黃宗羲之詞曰黃先生論學如大禹導水導山脈絡分明吾黨之斗杓也其與顧炎武書謂道之衰久矣得大力闡明豈非斯人之幸茲數語者苟非宗羲炎武孰敢當此苟非湯斌深知宗羲炎武亦何能發此況湯斌在史館得黃宗羲一書謂宋史之道學傳乃元人之陋遂示於衆而卽去之其志同道合略見也聖君之評如此賢臣之評如此殆幾乎無可致疑矣此臣等準之成憲以爲黃宗羲顧炎武當從祀者又其一以上三端容有未盡之語而初無溢美之詞俎豆馨香洵無愧色乃者禮臣具稿力從駁議臣等實不敢苟立異同亦不敢隨事附和卽如陳寶琛疏中有宗義倡於前炎武繼於後二語查二人生旣同時初無先後之分學又異派更無倡繼之說該學政措詞偶誤臣等亦不曲爲之諱然因此而遂謂其不明學術因並斥其所請之

人則固不可也

臣

等稽之古訓求之輿論以爲該故儒之從祀實順人心而不違成例況我皇上緝熙

典學正當審辨學術以風示天下將因以求所謂師以賢得民儒以道得民者以爲平治天下之本是該故儒從祀之典似亦繫乎時政而非徒滋議論者已

臣

等公同商酌擬請

旨准將黃宗羲顧炎武從祀

文廟倘因

祀典重大未能驟定應請

旨飭下大學士六部九卿翰詹科道再行詳議具奏

稟撫部院

薛福成

竊惟崇德報功神道所以設教禦災捍患禮經列於明禋浙東沿海各郡自去年法人渝盟肇釁馬江臺北迭經開戰警信頻聞羣黎驚駭迨本年正月敵艦撲犯鎮海口門與我炮臺兵輪相持數月之久而甯紹一帶衆心帖然相安無事若忘大敵之在門者屢聞民間傳言有朱將軍葛將軍顯著神靈保護郡邑謂闔境必可安全狡寇斷難逞志兵民流播異口同聲是以砲聲隆然而市肆不驚敵氛環逼而士氣益壯每當事勢危急之際若見狂風異雲由西而起倏嚮海隅者或云陰兵無數助戰却敵或云夜見南北岸砲臺神燈有萬字朱字敵中遙望我軍常隔烟霧以致測量莫施砲無準的職道初聞此說曾發書馳訊營務處杜丞鎮海縣廖令旋據先後函復杜丞則稱與將領指揮禦敵往來於砲彈如雨之中無一受傷敵以數百磅重之炸彈日對口門轟擊多不開花誠不可謂非神助廖令則稱詢訪紳民招寶山等處

神燈萬目共觀事實非誣職道伏查葛將軍卽故定海鎮葛壯節公諱雲飛道光二十一年與故壽春鎮王剛節公錫朋處州鎮鄭忠節公國鴻同守定海血戰六晝夜敵刀劈公面去其半砲洞胸穴如盤猶手刃十餘人而死世所稱定海同日殉難三總兵者也葛公原籍山陰祠墓所在忠靈布濩庇及一方理固有之職道已於核轉統領貞字等營成守詳文內籲請憲核分別 奏咨將定海三忠祠列入祀典春秋致祭以順輿情在案朱將軍卽故 誥贈武顯將軍金華協副將朱公諱貴方英吉利兵船之踞甯波也將軍率陝甘官兵九百名扼守慈谿之大寶山敵衆由大西壩及丈亭水陸並進將軍親執大旗麾兵迎戰自辰至申殺傷過當會長溪嶺大營忽自驚潰勢孤援絕將軍怒馬斫陣手斬數十級身中兩槍馬蹶復躍起奪敵矛左右盪決最後一火槍中要害乃仆其子昭南同時戰沒部下弁兵猶力戰不退死者二百餘人敵亦輿尸纍纍相與痛哭驚悸謂自入寇以來未有如斯大創者自是大寶山上常有雲氣隱隱聞鼓角聲夜或見火光上徹旌旗往來敵之在郡城者頗皆驚恐亦遂逡巡退去此道光二十二年事也既奉 優旨賜卹慈谿士民釀貲建祠以申報饗迄今四十餘年廟貌常新靈應丕著客歲夏秋之交附近居民夜聞祠中擂鼓若治軍然連十餘夕祠前有流丐棲宿聞人馬行聲絡繹孔道或如身被馬足踐踏遂致疾病是時法燄方張咸謂將軍鬱忠憤於地下且當敵愾以佑海疆遐邇爭傳民心大定職是之

故茲者 國威遠播強敵受盟氛祲潛消封圻靜謐立功將吏旣蒙 殊恩晉秩有差職道亦濫叨非分之榮豈敢貪天之功俾神靈顯蹟湮沒不彰除將府縣送到冊結備文轉詳外理合據實具稟擬求憲臺 察核 奏請 敕加封號抑或與定海三忠祠同給匾額列入祀典庶表忠盡而答神庥

續修會典事例請 飭妥議開館章程疏

延煦

竊 會典一書肇始康熙二十三年續修於雍正二年乾隆十二年嘉慶六年康熙間七年成書雍正間九年成書乾隆間十八年成書嘉慶間十七年成書蓋制作愈詳攷訂愈密雖書成遲速相懸然大要以十年爲率未有不開館進書者也自嘉慶朝以至同治相距五十餘年承 列聖之詒謀合 四朝之闡見大方小策允宜勒爲一書以昭法守是以醕親王有重修 會典之請旋經內閣等衙門會議援照嘉慶六年舊例先令在京大小各衙門將嘉慶十八年以後案件檢查編次事繁衙門予限三年事簡衙門予限二年再行奏明開館辦理畫一等因於同治十二年正月具奏奉 旨依議在案現今距奏准立限之日已閱十年限期久滿各部院新修則例有已編次者有未編次者若聽各衙門之懸宕而不開專館以定責成深懼歲月虛糜汗青無日殆非所以重 典章而降述作也查嘉慶年間所議章程雖有例案分辦之議而慎擇纂修酌定館局卽經同時具奏旋經 簡派總裁開館辦理其原奏大指以 會典爲

朝廷遵守之書爲期幾五十載倘不勒限趕辦勢必曠日持久難於蒞事此次閱時已六十餘年所有斟酌損益儀禮制度之事較乾隆嘉慶兩朝爲繁至今總裁何人館局何地尙未議及日復一日案牘不無散佚文獻不克詳徵始蹈因循終歸舛漏伏思 穆宗毅皇帝 實錄本紀 聖訓均已次第編輯刊成應及是時敬遵 前訓舉辦續修 會典事宜可否請 旨飭令大學士九卿等再行集議將 會典館正副總裁等官查例 簡派酌定開館章程以挈綱領而便編摩以開館日爲始再立年限勤核功課修明憲章使大經大法罔或失墜亦 聖人繼 志述事之基也



皇朝經世文續編卷五十三目錄

禮政四 學校上

說士上

管同

說士下

管同

重儒官議

馮桂芬

戒諭學官

李棠階

江甯府學記

曾國藩

舉行鄉課議

劉汝璆

勸置學田說

張之洞

請定鄉試考官校閱章程並防士子勦襲諸弊疏

林則徐

請陝甘鄉試分闈並分設學政疏

左宗棠

奏設味經書院疏

許振禕

請整頓宗學疏

王榕吉

THE
JOURNAL
OF THE
ROYAL ANTHROPOLOGICAL INSTITUTE

1997
1998
1999
2000
2001
2002
2003
2004
2005
2006
2007
2008
2009
2010
2011
2012
2013
2014
2015
2016
2017
2018
2019
2020
2021
2022
2023
2024
2025
2026
2027
2028
2029
2030
2031
2032
2033
2034
2035
2036
2037
2038
2039
2040
2041
2042
2043
2044
2045
2046
2047
2048
2049
2050
2051
2052
2053
2054
2055
2056
2057
2058
2059
2060
2061
2062
2063
2064
2065
2066
2067
2068
2069
2070
2071
2072
2073
2074
2075
2076
2077
2078
2079
2080
2081
2082
2083
2084
2085
2086
2087
2088
2089
2090
2091
2092
2093
2094
2095
2096
2097
2098
2099
2100
2101
2102
2103
2104
2105
2106
2107
2108
2109
2110
2111
2112
2113
2114
2115
2116
2117
2118
2119
2120
2121
2122
2123
2124
2125
2126
2127
2128
2129
2130
2131
2132
2133
2134
2135
2136
2137
2138
2139
2140
2141
2142
2143
2144
2145
2146
2147
2148
2149
2150
2151
2152
2153
2154
2155
2156
2157
2158
2159
2160
2161
2162
2163
2164
2165
2166
2167
2168
2169
2170
2171
2172
2173
2174
2175
2176
2177
2178
2179
2180
2181
2182
2183
2184
2185
2186
2187
2188
2189
2190
2191
2192
2193
2194
2195
2196
2197
2198
2199
2200
2201
2202
2203
2204
2205
2206
2207
2208
2209
2210
2211
2212
2213
2214
2215
2216
2217
2218
2219
2220
2221
2222
2223
2224
2225
2226
2227
2228
2229
2230
2231
2232
2233
2234
2235
2236
2237
2238
2239
2240
2241
2242
2243
2244
2245
2246
2247
2248
2249
2250
2251
2252
2253
2254
2255
2256
2257
2258
2259
2260
2261
2262
2263
2264
2265
2266
2267
2268
2269
2270
2271
2272
2273
2274
2275
2276
2277
2278
2279
2280
2281
2282
2283
2284
2285
2286
2287
2288
2289
2290
2291
2292
2293
2294
2295
2296
2297
2298
2299
2300
2301
2302
2303
2304
2305
2306
2307
2308
2309
2310
2311
2312
2313
2314
2315
2316
2317
2318
2319
2320
2321
2322
2323
2324
2325
2326
2327
2328
2329
2330
2331
2332
2333
2334
2335
2336
2337
2338
2339
2340
2341
2342
2343
2344
2345
2346
2347
2348
2349
2350
2351
2352
2353
2354
2355
2356
2357
2358
2359
2360
2361
2362
2363
2364
2365
2366
2367
2368
2369
2370
2371
2372
2373
2374
2375
2376
2377
2378
2379
2380
2381
2382
2383
2384
2385
2386
2387
2388
2389
2390
2391
2392
2393
2394
2395
2396
2397
2398
2399
2400
2401
2402
2403
2404
2405
2406
2407
2408
2409
2410
2411
2412
2413
2414
2415
2416
2417
2418
2419
2420
2421
2422
2423
2424
2425
2426
2427
2428
2429
2430
2431
2432
2433
2434
2435
2436
2437
2438
2439
2440
2441
2442
2443
2444
2445
2446
2447
2448
2449
2450
2451
2452
2453
2454
2455
2456
2457
2458
2459
2460
2461
2462
2463
2464
2465
2466
2467
2468
2469
2470
2471
2472
2473
2474
2475
2476
2477
2478
2479
2480
2481
2482
2483
2484
2485
2486
2487
2488
2489
2490
2491
2492
2493
2494
2495
2496
2497
2498
2499
2500
2501
2502
2503
2504
2505
2506
2507
2508
2509
2510
2511
2512
2513
2514
2515
2516
2517
2518
2519
2520
2521
2522
2523
2524
2525
2526
2527
2528
2529
2530
2531
2532
2533
2534
2535
2536
2537
2538
2539
2540
2541
2542
2543
2544
2545
2546
2547
2548
2549
2550
2551
2552
2553
2554
2555
2556
2557
2558
2559
2560
2561
2562
2563
2564
2565
2566
2567
2568
2569
2570
2571
2572
2573
2574
2575
2576
2577
2578
2579
2580
2581
2582
2583
2584
2585
2586
2587
2588
2589
2590
2591
2592
2593
2594
2595
2596
2597
2598
2599
2600
2601
2602
2603
2604
2605
2606
2607
2608
2609
2610
2611
2612
2613
2614
2615
2616
2617
2618
2619
2620
2621
2622
2623
2624
2625
2626
2627
2628
2629
2630
2631
2632
2633
2634
2635
2636
2637
2638
2639
2640
2641
2642
2643
2644
2645
2646
2647
2648
2649
2650
2651
2652
2653
2654
2655
2656
2657
2658
2659
2660
2661
2662
2663
2664
2665
2666
2667
2668
2669
2670
2671
2672
2673
2674
2675
2676
2677
2678
26

[illegible]

12345678910111213141516171819202122232425262728293031323334353637383940414243444546474849505152535455565758596061626364656667686970717273747576777879808182838485868788899091929394959697989910010110210310410510610710810911011111211311411511611711811912012112212312412512612712812913013113213313413513613713813914014114214314414514614714814915015115215315415515615715815916016116216316416516616716816917017117217317417517617717817918018118218318418518618718818919019119219319419519619719819920020120220320420520620720820921021121221321421521621721821922022122222322422522622722822923023123223323423523623723823924024124224324424524624724824925025125225325425525625725825926026126226326426526626726826927027127227327427527627727827928028128228328428528628728828929029129229329429529629729829930030130230330430530630730830931031131231331431531631731831932032132232332432532632732832933033133233333433533633733833934034134234334434534634734834935035135235335435535635735835936036136236336436536636736836937037137237337437537637737837938038138238338438538638738838939039139239339439539639739839940040140240340440540640740840941041141241341441541641741841942042142242342442542642742842943043143243343443543643743843944044144244344444544644744844945045145245345445545645745845946046146246346446546646746846947047147247347447547647747847948048148248348448548648748848949049149249349449549649749849950050150250350450550650750850951051151251351451551651751851952052152252352452552652752852953053153253353453553653753853954054154254354454554654754854955055155255355455555655755855956056156256356456556656756856957057157257357457557657757857958058158258358458558658758858959059159259359459559659759859960060160260360460560660760860961061161261361461561661761861962062162262362462562662762862963063163263363463563663763863964064164264364464564664764864965065165265365465565665765865966066166266366466566666766866967067167267367467567667767867968068168268368468568668768868969069169269369469569669769869970070170270370470570670770870971071171271371471571671771871972072172272372472572672772872973073173273373473573673773873974074174274374474574674774874975075175275375475575675775875976076176276376476576676776876977077177277377477577677777877978078178278378478578678778878979079179279379479579679779879980080180280380480580680780880981081181281381481581681781881982082182282382482582682782882983083183283383483583683783883984084184284384484584684784884985085185285385485585685785885986086186286386486586686786886987087187287387487587687787887988088188288388488588688788888989089189289389489589689789889990090190290390490590690790890991091191291391491591691791891992092192292392492592692792892993093193293393493593693793893994094194294394494594694794894995095195295395495595695795895996096196296396496596696796896997097197297397497597697797897998098198298398498598698798898999099199299399499599699799899910001001100210031004100510061007100810091010101110121013101410151016101710181019102010211022102310241025102610271028102910301031103210331034103510361037103810391040104110421043104410451046104710481049105010511052105310541055105610571058105910601061106210631064106510661067106810691070107110721073107410751076107710781079108010811082108310841085108610871088108910901091109210931094109510961097109810991100110111021103110411051106110711081109111011111112111311141115111611171118111911201121112211231124112511261127112811291130113111321133113411351136113711381139114011411142114311441145114611471148114911501151115211531154115511561157115811591160116111621163116411651166116711681169117011711172117311741175117611771178117911801181118211831184118511861187118811891190119111921193119411951196119711981199120012011202120312041205120612071208120912101211121212131214121512161217121812191220122112221223122412251226122712281229123012311232123312341235123612371238123912401241124212431244124512461247124812491250125112521253125412551256125712581259126012611262126312641265126612671268126912701271127212731274127512761277127812791280128112821283128412851286128712881289129012911292129312941295129612971298129913001

人

1

1

1. The first step is to identify the problem or question that needs to be answered. This involves understanding the context and the specific requirements of the task.

254

皇朝經世文續編卷五十三

上海葛士濬子源輯

禮政四 學校上

說士上

管同

今之士不外乎三等上者爲詩文次者取科第下者營貨財爲詩文者獵古人之辭華而學聖希賢無其志也取科第者志一身之富貴而尊主庇民建立功業無其心也至若營貨財則輕者兼商重者兼吏甚者導爭訟事欺詐挾制官府武斷鄉曲民之畏之若虎狼毒螫歷觀史傳以來士習之衰未有甚於今日者也論者憫焉或曰教之無其具也或曰養先於教今士無以養雖善教若之何是二者皆得其一端而未知其原本今夫士之爲物也其名甚貴而其品甚尊其名貴則其實不得以多其品尊則其選不可以濫三代以前茲不具論考諸漢史太學之士及所謂郡文學博士弟子員者合海內而計之其爲人蓋無幾是以士風之美莫如漢世至唐太宗增廣生員沿及宋元其人益衆循至有明遂開以貲入監之例迄今日而府州縣學間歲所入少者十餘人多者至二三十人蓋不待十年而一縣之號稱爲士者數百十人矣嗚乎何其多也山有金水有珠其爲物不可卒致也逐日而取之定數而求之不問精粗不論真僞

經世文續編

卷五十三 禮政四

則砂石之來必有倍於金玉今取士者間歲之間一縣輒增數十夫一縣之大安得間歲輒有數十人足以當士名而無慙士品者上昧昧而求之則下混混而應之士之所以雜出不倫無所不至者由此故也而世之人不深維其原本輒切齒痛恨歸咎於士習之衰嗚乎取砂石以爲金珠不中用則曰金珠非寶彼金珠其負屈矣取非類以當真士旣爲惡則曰士習之衰彼真士抑含冤矣故爲今之計莫若寡取士裁其額遠其期使一學不過數十人則士尊貴而其風必變士風變而益於國家者多矣古之名臣有言曰願陛下十年不行科舉則天下太平曩嘗疑其過言以今思之蓋信或曰今取士者考之以無用之言定之於一日之際雖裁其額而遠其期彼賢不肖亦何由知耶應之曰誠不敢知也雖然有國家者多獲一賢不若少收一不肖故取士者與其廣額而賢不肖之皆多不若減額而賢不肖之皆少

說士下

管同

廣士之額不惟多收不肖而教養皆虛減士之額不惟少收不肖而教養皆實教之虛實愚當別論請先以養言之今夫爲士之法不可商不可吏不可爭訟欺詐挾制官府武斷鄉曲然則爲士者舍童子之師蓋無可爲者乎童子之師一縣至數千有非士而爲之者有士爲之而不足自給者然則爲士者將使閉門而凍餓乎士固有守死之道而聖王不以守死責人且守死者可以得之賢人而不可得之中材以下

之人 國家知之是以養士之法有廩膳有學租有書院之膏火恩德至渥不可復議而天下之士則猶汲汲營貨財無所不爲如前之論若是者何哉曰人衆故也一縣之士得廩膳學租者二十人得書院膏火者七八十人合之僅及百人而號稱爲士者則多至千人彼百人或生矣而八九百人者何以自給孟子曰無恆產而有恆心者惟士爲能若民則無恆產因無恆心苟無恆心放僻邪侈無不爲矣今之諸生號稱爲士而其實十九皆民耳以民之實冒士之名而使無恆產以自給是以輕者兼商重者兼吏甚者導爭訟事欺詐挾制官府武斷鄉曲放僻邪侈一如孟子之論也嗚乎分五人之食以飼十人而十人皆餓不若減去五人而使五人皆得飽廩膳膏火學租之屬養千人數百人則不徧併而養數十人則可當中人之產也然則養士者與其廣額而人人使不足不若減額而人人使有餘人人使有餘斯養歸於實可以責其不爲非矣周之時士有士田蓋盡人而養之故其時士貴而多賢至於戰國而士有無恆產者縱橫捭闔之流遂蠶起而不可復禁孟子以爲有恆心指其賢者言之耳沿及後世士額益多則擇人而養夫擇人而養不惟無以敦士風而實足以壞士習蓋宋胡瑗在太學舊制士每月有試瑗曰學校禮讓之地而月使之爭非所以成就人才也於是改試爲課更不差別高下有不率教者召而教之而已夫有試猶恐其爭況於廩膳膏火或予或不予而使之爭利乎哉鄧志宏言崇甯以來蔡京羣天下學者納之

黌舍 其文藝等爲三品飲食之給因而有差旌別人才止付於魚肉銖兩間學者不以爲羞且逐逐然貪之學校之壞自崇甯始嗚乎是法也蔡京爲之也

重儒官議

馮桂芬

先儒言師道立則善人多師儒之盛衰人才升降之原本也今郡縣莫不有學學莫不有師諸生以百數僅識面者廩生耳增附皆陌路歲時斂學租候伺學使者按部爭新生之費諸生獲譴爲州縣典守如獄掾此外無事絕無所謂教育人才之意於乎師道之不講久矣無他位既卑權亦微流品近益雜漢成帝詔所謂爲下所輕非所以尊道德者也今天下惟書院稍稍有教育人才之意而省城爲最余所見湖南之岳麓城南兩書院山長體尊望重大吏以禮禮賓之諸生百許人列屋而居書聲徹戶外臬比之坐問難無虛日可謂盛矣獨惜其所習不過舉業不及經史所治不過文藝不及道德而楚南多才往往發跡其中矧能由是而進於經史道德也哉考宋史晏殊知應天府延范仲淹以教生徒蓋書院也厥後因其制爲學校然則學校之初固如是後乃陵夷衰微以訖於今也朱子曰須是罷堂除及注授教官請本州鄉先生爲之陸氏世儀曰教官不當有品級亦不得謂之官蓋教官者師也師在天下則尊於天下在一國則尊於一國在一鄉則尊於一鄉無常職亦無常品惟德是視顧氏炎武曰師道之亾始於赴部候選

又曰教官必聘其鄉之賢者以爲師而無隸於仕籍昔賢論說如彼今時情事如此愚以爲惟合書院學校爲一而後師道可尊人材可振也移書院於明倫堂側建精廬可容一二百人郡縣主之省會則督撫學政主之春秋祀事及學政試事歸州縣出納瑣屑領以城紳合通學之人而教之學貢願至者與焉同其甲乙童生則簡其尤者與焉異其甲乙擇師之法勿由官定令諸生各推本郡及鄰郡鄉先生有經師人師之望者一人官覈其所推最多者聘之不論官大小皆與大吏抗禮示尊師也厚諸生廩餼居院者爲內課使足以代訓蒙不能居院者爲外課半之月官課一親詣以重其典有事則改日師大課一小課一家遠又不能居院者爲埵課季一課不給餼非游學連三季不至者山長告於學政而黜之有敗行亦然小過降童舍期而復之篤疾給冠帶愈而復之其黜陟略用宋元明三舍積分法而變通之法以大課名次并計以得數少多爲先後造積分冊隨課升降歲終簡其積分居最而品行亦優者數人送學政參定之以次貢入太學經歲科十試凡十五年而出書院願留者仍聽行之數年文風不日上士習不丕變者未之聞也或曰文風固進矣士習何與焉曰亦在擇師得人而已師得其人見正事聞正言行正道習與正人居之不能無正芳臭氣澤之所及有潛移默化於不自知者夫聞風猶將興起況同堂乎且夫觀人之法不惟暫惟常不惟顯惟微不惟矜惟忽而能見於常於微於忽獨有朝夕與居之人責之以保舉

其有濫焉倖焉者鮮矣豈與夫一人之薦牘一日之文字所可同年語哉於是大學中人皆天下之選非一百八金之流可比司成諸職必極天下之選始足副人望亦宜由諸生公推翰林官請簡例屋以容千人爲率廩之如郡縣居監讀書三年與之官所謂天下文章莫大於是彬彬乎盛矣哉

戒諭學官

李棠階

士子爲風化之原而教職實士子之倡導司訓課人心風俗之本係焉將相牧令之才基焉所關綦重故按月課定例甚嚴乃者因循故事職多不舉而書斗等又或借爲勒索之資名存實掩士奚由進本院奉命視學學校是其專責觀士習之末端文風之末純惻然痛心然通省地遠人多勢不能周知而遍教之不得不仰重各學以分其責而廣其教訓且各屬皆言教職等桑梓之地士子優劣與有榮辱豈得漠焉視爲無關痛癢之事夫來學有贄禮所不廢近聞諸生入學延玩者多雖屬伊等無禮然亦必實有迫於饑寒者究而論之我輩亦未必無過蓋師之受贄將以教之也清夜自思士子之品行果由我敦否士子之學問果由我進否設真能肫肫勸課視如子弟誰無良心方將致敬盡禮之不暇而肯故爲玩延乎必無是禮矣今與各學約本案新生及在學舊生按定人數分爲一月四課屆期彙集明倫堂先教以敦倫立品反覆勸諭然後命題面試秉公甄錄將所取優等每一課呈解數本每三月呈解一次其餘每課

一二三等但造清冊呈送其文理通順屢取優等者本院量加獎勵劣者反此如無故三月不解卷子本院定行查究至武生亦於每月定期傳集默寫武經一段及 聖諭廣訓一二百字伊等更宜宛轉訓戒或與之講 聖諭一二段令伊等拱聽久亦可化其桀慢之氣如有三次不到者照例嚴傳戒飭無故終年不到者詳請斥革誠能實力奉行認真訓課激勸之方無不曲盡則諸生卽間有不肖而守分好學之士必多本院按臨從優獎異決不辜負苦心若仍視爲具文諸生等毫無進境本院定行嚴懲亦不能格外寬貸也

江甯府學記

曾國藩

同治四年今相國合肥李公鴻章改建江甯府學作孔子廟於冶城山正殿門廡規制粗備六年國藩重至金陵明年荷澤馬公新貽繼督兩江廣續成之鑿泮池建崇聖祠尊經閣及學官之廡宇八年七月工竣董其役者爲候補道桂嵩慶旣敕旣周初終無懈冶城山巔蓋朝天宮舊址道士祀老子之所也道家者流其初但尙清靜無爲其後乃稱上通天帝自漢初不能革秦時諸時而渭陽五帝之廟甘泉泰一之壇帝皆親往郊見由是聖王祀天之大典不掌於天子之祠官而方士奪而領之道家稱天侵亂禮經實始於此其他鍊丹燒汞采藥飛昇符籙禁呪徵召百神捕使鬼物諸異術大率依託天帝故其徒所居之

宮名曰朝天亦猶稱上清紫極之類也嘉慶道光中宮觀猶盛黃冠數百人連房櫺比鼓舞毗庶咸豐三年粵賊洪秀全等盜據金陵竊泰西諸國緒餘燔燒諸廟羣祀在典與不在典一切毀棄獨有事於其所謂天者每食必祝道士及浮屠弟子並見摧滅金陵文物之邦淪爲豺豕窟宅三綱九法掃地盡矣原夫方士稱天以侵禮官乃老子所不及料迨粵賊稱天以恫羣神而毒四海則又道士輩所不及料也聖皇震怒分遣將帥誅殛凶渠削平諸路而金陵亦以時戡定乃得就道家舊區廓起宏規崇祀至聖暨先賢先儒將欲黜邪慝而反經果操何道哉夫亦曰隆禮而已矣先王之制禮也人人納於軌範之中自其弱齒已立制防洒掃沃盥有常儀羹食肴馔有定位綏纓紳佩有恆度既長則教之冠禮以責成人之道教之昏禮以明厚別之義教之喪祭以篤終而報本其出而應世則有士相見以講讓朝覲以勸忠其在職則有三物以興賢八政以防淫其深遠者則教之樂舞以養和順之氣備文武之容教之大學以達於本末終始之序治國平天下之術教之中庸以盡性而達天故其材之成則足以輔世長民其次亦循循繩矩三代之士無或敢遁於奇袤者人無不出於學學無不衷於禮也老子之初固亦精於禮經孔子告曾子子夏述老聃言禮之說至矣其後惡末世之苛細逐華而悖本斲自然之和於是矯枉過正至譏禮者忠信之薄而亂之首蓋亦有所激而云然耳聖人非不知浮文末節無當於精義特以禮之本於太

一起於微眇者不能盡人而語之則莫若就民生日用之常事爲之制修焉而爲教習焉而成俗俗之旣成則聖人雖沒魯中諸儒猶肄鄉飲大射禮於冢旁至數百年而不絕又烏有窈冥誕妄之說淆亂民聽者乎吾觀江甯士大夫材智雖有短長而皆不屑詭隨以徇物其於清靜無爲之旨帝天禱祀之事固將峻拒而不惑孟子言無禮無學賊民斯興今兵革已息學校新立更相與講明此義上以佐聖朝匡直之教下以闢異端而迪吉士蓋廩廩乎企嚮聖賢之域豈僅人文彬蔚鳴盛東南已哉

舉行鄉課議

劉汝璆

今課士之法可謂密矣科場之外又有書院學官之課然鄉居之人或不能肄業書院而學官月課近已視爲具文不知設立月課之意原期學官與士人朝夕相見訓迪時親不徒知其文並知其素行故功令於學政試文之外別令學官報其優劣以憑黜陟誠以風簷寸晷之中不能猝辨其文又況能憑文以見行哉然學官之職輕不若守令之權重足以興起人心磨礪士習是以舉行鄉課誠爲教士良法讀書者皆樂從而好學能文之士又得以其名上達卽場外作文寬其程途假以時刻得以從容研鍊其器識不凡者可以自抒其抱負與長民者借筆談心或值課期兼可詢考時事命剴切詳對陳民間之疾苦俾長官得悉下情相其緩急而張弛之固不僅以一詩一文第其優劣而云畢乃事也且爲士者知官與民

親而後不甘於暴棄爲民者知讀書之可貴而有以自愛不獨訟獄可清卽人才亦藉以興起也至於花紅膏火等項就地籌備無須動支公帑此尤易舉之事其收效甚大然欲正人心厚風俗必自教化始現在金衢嚴等郡均已舉行不可緩也

勸置學田說

張之洞

養民養士經傳恆言不養而教未之前聞夫養民之道豈能衆濟人悅惟在上者不奪其生理不擾其生計斯卽養之之術也養民固爾養士亦然今日士多而貧卽使書院義學賓興之屬百計培植猶懼不濟況忍重剝削之乎川省學校事體使者於所當爲所得爲者竭力圖之獨有一端蒿目疚心寢饋不適莫如新生覆試計較束脩一事曩年川省風氣新進謁師贄幣豐腆實緣生理富饒學額矜貴沿爲成例動必取盈常有一朝進學毀家大半負債終身雖甚孤寒亦索常例結費之券未剖扣除之牌已懸通省習貫而視爲固然使者少見而駭爲怪事每至覆試之日終日旁皇如芒在背若操之過感則恐狡黠生童藉詞挾制若聽其遲緩更恐貪惡書斗逼勒孤寒操縱皆非無從停決故使者不以晝夜考校不寢不食爲勞而以覆試日爲苦由衷之言有如皦日試思童生應試躡屣擔簦三旬九食欲謀一館艱如移山終歲脩脯不供事蓄甚者寄食無門敝履無下倖而獲雋安得多金卽或饘粥粗給而博一青衿遽責其破

家棄產亦可謂忍情拂理傷心慘目者矣特是廣文一席自唐代以來卽號冷官束脩自行尙非在禮法之外若必并此禁絕何以自存送考辦公資糧用度於何取之其富而好禮者自願致敬亦將不許乎且將令其藉案訛詐句結劣生屬託公事因以爲利乎夫校官子弟亦望遊庠諸生之家豈無司鐸何乃不平不恕惟務責人使者按部所到不憚嚴切禁戒多方督催今日諸校官固多能砥厲廉隅自甘刻苦然不肖書斗造言剔剔設謀串陷變怪百出又豈人意料所及尤可患者由今之道書斗利舞弊倖進者之一切從豐必致包庇串合無所不爲而陸續送覆隨棚帶覆單身補覆下屆補覆諸弊終亦不能禁絕頂替鬻販百弊伏焉試事安望澄清真才安望吐氣此川省積年之痼疾已然之明事皆士類所目擊之身受之搔腕拊心而歷歷言之者也若不思一兩利經久之方仍爲本省師生終古之累今日止有一策汝等可自爲之川省尙稱殷實各州縣公局義舉欸目甚多士民樂善急公捐施恐後夫四民以諸生爲翹楚地方以讀書人爲元氣此之不講好善何爲若得各處紳宦糧民感發集議公捐一款置買學田計其三年收穫之租足敵兩考束脩之數各學豐歉不同須就本處歷屆情形酌議之分年勻給送考時酌加資斧如此則遠郡署考亦不至困踣難歸取進後限定止以千錢爲贄一切書斗小費認號轉案補廩幫增出貢舉優報丁起復錄遺諸費取辦於此陋款槩爲湔除士民定議於下然後稟請長吏督率行之官吏勸捐則滋弊由本州縣詳明士民籌辦則可行

立案立石永永不得變革若不能籌此買田巨款者或每年仿照他項公事之例酌議定數按年捐助或別籌他款取息給用惟地所宜不必一轍其瘠土狹鄉不能辦者聽之不願辦者聽之倉卒不能辦者徐圖之通省辦則通省之士林利一縣辦則一縣之士林利斯則貧士不病冷官不饑諸生寬然無累然後可壹心而讀書學師廉介無求然後可抗顏而訓士豈惟庠序之樂抑亦化導風俗之源也夫川省公舉之費亦多矣然飽衿棍飽衙蠹不如飽寒畯之爲得也三費局之設誠善矣然恤捕衙恤汛官不如恤學師之爲要也三費大是善政如或吝財惜費則更有說以喻之要知富室大戶孰無子弟孰不望其成名既有公款則異日子弟入學不致受無名之抑勒費無益之脣吻就云自謀亦復甚善縱使家無儒士可決其後必昌旣擅樂施之令名兼獲濟物之美報況此日之孝秀卽他日之縉紳此日獲助於鄉人他日必思造福於桑梓無往不復更非他項捐資所可同年而語者也如校官者雖非本縣人士要是同省寒儒卽云於彼有益亦是楚弓楚得並非波及局外此舉在他省則甚難在川省則甚易在他省則可緩在川省則甚切此者南川縣令文昌黃君際飛卽持此議設法勸捐有志竟成置買學田千有餘石計其所入足與往歲相當章程皆與右所說同前年歲試招覆時師生同歡確有成效黃君之賢能愛士南川士民之好義知本使者敬之獎之願通省百六十州縣效之

若欲查照南川縣辦法者准赴本衙門鈔案

語云富者贈人以財仁

者贈人以言使者庸愚不能別畫一養士之策敢以此一隅小補之言進可乎

請定鄉試考官校閱章程並防士子勦襲諸弊疏

林則徐

竊臣欽奉 上諭本年壬辰科江南鄉試著派林則徐入闈監臨欽此臣到蘇接篆後已近闈期當卽遵照科場條例將監臨應辦事宜預爲布置伏查本年四月內欽奉 上諭三載賓興爲掄才大典各直省主試經朕特加簡任宜何如滌慮洗心認真校閱務求爲國得人順天同考官及會試同考官俱係翰詹科道部屬該員等甲第本高又經朕親加校試尙無荒謬之人充選所以得人較盛各直省同考官則年老舉人居多勢不能振作精神悉心閱卷卽有近科進士亦不免經手簿書錢穀文理日就荒蕪各省督撫雖照例考試簾官仍恐視爲具文全恃主試搜閱落卷庶可嚴去取而拔真才嗣後各直省督撫將簾官認真考校不得以年老荒謬之員濫行充數等因欽此又上年十月內欽奉 上諭著各直省督撫將書肆小木板片概行銷燬其貢院左右如有公然售賣小本文策者枷責嚴辦倘士子尙有不知檢束懷挾徼倖者卽著斥革其恃眾逞強不服約束者枷號示衆治以應得之咎士子中式後除策學援引經史語句相同毋庸議外其四書經文有全篇勦襲舊文者一經磨勘官簽出立即斥革務期永絕此弊以端士習等因欽此仰見我 皇上慎重掄才清釐積弊之至意竊查江南爲人文淵藪入闈士子多至一

萬四五千人額設同考官十八房每房約須校閱八百餘卷稍有草率卽恐遭濫交譏臣聞近科房官每有爭先薦卷之弊以爲薦早則獲雋者多薦遲則中額已滿難於入彀故於頭場分卷到手輒將首藝中幅略觀大概謂之望氣其合意者彙爲一束以備加圈呈薦稍不稱意卽置落卷之列不爲下筆原其初心仍欲俟佳卷薦完再將落卷覆加細看以決去取乃頭場薦卷未畢而二三場試卷已陸續送入內簾因又趕覓已薦之字號連經文策問一併加圈亟隨頭場呈薦蓋恐別房之薦卷三場均已齊全而該房僅有頭場不能早供考官比校則所中卽不及別房之多是以相率效尤總以趕早薦完爲分房之捷訣直至三場薦卷俱已畢事然後將先前略觀大意之落卷批點塞責彼時中卷已定意興闌珊縱或見爲佳文亦諉諸其人之命於是悞分段落者有之悞讀破句者有之並有文非荒謬僅點首藝開講數句而卽擯棄者其批駁之詞不曰欠精警卽曰少出色此等批語竟可豫先書就不論何等文字皆得以此貶之似此校閱情形定棄取於俄頃之間判升沈於恍惚之際誠如 聖諭迴思未第之先與多士何異乃於落卷漠不關情設身處地於心何忍臣前任京職曾充鄉試考官二次會試同考官一次自揣學疎識淺惟有細心勤閱庶少屈抑人才歷在闈中刊刻批語板片刷成批紙分別首藝次藝三藝及詩凡頭場四篇逐篇皆有批語被黜之卷必將如何疵累之處分篇批出自錄底本不使有一篇批語相同者此次

臣職任監臨除考試簾官必擇文理優長精神振作之員不敢以年老荒唐濫行充數外竊擬將臣逐篇分批之章程責令該簾官循照辦理除二三場批語不拘外首场四篇必使逐一批出凡泛而不切字樣如欠精警少出色之類概不許用蓋三藝統批往往藉口賅括轉不切當逐篇分批則於此一篇之得失利病非了然於心不能了然於口該簾官受此繩束不敢草率了事於衡才似有裨益至揭曉之後臣仍將落卷復加查核如首场文藝非有大疵僅點數行而止者據實參奏予以處分尤足以儆惰心而免物議惟思頭場三文一詩每卷約有二千餘字如果認真校閱則窮日之力只能以四十本爲度每房卷帙八百餘本約須兼旬始可了一首场查例載大省於九月十五日內揭曉不得匆促儻辦等語近科揭曉之期往往趕早此次欽遵新奉諭旨主考官須將落卷全行校閱江南卷帙最繁則揭曉之期自應照例以九月十五日爲斷如臨時尙虞匆促或再仰懇聖恩寬展數日總不出九月中旬之期庶主考官官均得悉心細閱真才自不致有遺矣至士子敦品自愛者固多而希圖倖獲者亦復不少科場搜檢自當從嚴惟人數至一萬數千之多難保全無遺漏且往往因搜檢而愈形擁擠因擁擠而不免稽遲查嘉慶癸酉科江南鄉試因首场封門太遲奏請議處是於認真搜檢之中又須不悞日時方爲得體臣查夾帶之弊約有三端一則專帶文中典故以及經解策料雖有所取資而尙須運用一則坊刻小本成文之

類明知不可抄襲只圖採掇成篇一則分倩多人將四書題文全行製就攜帶入場見題卽抄不費思索聞近科以此倖獲者頗不乏人是以平時言館地者教讀之外別有作文席面每撰一篇自二三百文至洋錢一圓不等文名愈著之士攬作愈多則衆人爭託其名以售文藝大半脫胎錄舊並非獨出心裁而一篇或售賣兩家一稿又傳抄數手如斯之類必犯雷同但簾官眼力不齊雷同者未必均在一房故有通篇一樣之文此中而彼黜者臣前在江西典試取中之文已經發刻及搜閱落卷竟查出許多雷同將已刻者復經黜去雖彼時未被倖獲而事後無所示懲究恐不知自愛之徒仍存僥倖萬一之想查錄舊倖中例有斥革之條但闡墨祇刻前魁其通榜中式之文榜後卽已解部未必人人得見卽聞有錄舊雷同之卷而事無左證孰肯壞其已成之名是以勦襲倖售仍無忌憚惟於場內閱卷之際對出雷同卽記檔冊於撤闈後加以懲儆庶可杜其惡習且本科欽遵諭旨將落卷通行校閱雷同勦襲者更無所逃臣請移行主考簾官記其字號揭曉之後移臣查辦除策學援引語句毋庸議外其四書經文雷同至三行以上者正途貢監生員照考案事例以次降等罰令對讀若係俊秀監生以後不許應試至全篇雷同勦襲者毋論正途俊秀概行斥革永不准考如此則士子皆有畏憚之心不敢錄舊而倩人作文者恐其無益有害則懷挾之弊似可立除而真才輩出矣

請陝甘鄉試分闈並分設學政疏

左宗棠

竊維甘肅地處西北邊荒舊隸陝西行省統轄康熙年間拓地日廣始設甘肅巡撫駐紮臨洮乾隆年間又改臨洮爲蘭州府後設總督駐之兼管巡撫事地當西陲衝要南北界連藩服荒服漢蒙回番雜處其間謠俗異宜習尚各別漢敦儒術回習天方蒙番崇信佛教亘古至今未之有改置省以來諸凡建設或創或因於武備尙詳而文治獨略其異於各省者兩大端各省除壤地毘連一水可通之安徽一省鄉試歸併江南取中士子久習爲常此外均就全省適中督撫駐紮處所設立貢院屆期考官入闈校閱照額取中獨甘省距陝道阻且長而鄉試必須赴陝陝甘學政遠駐陝西三原三年一度按臨甘肅舉行歲科兩試均與各省不同故自改建省治以來甘肅士人經明行修能自淑其鄉里者尙不乏人至巍科上第以文章經濟取重當世者概不多見非各省皆知稽古之力爭自濯磨甘肅士人獨安固陋不求聞達也計甘肅府廳州縣距陝近者平慶涇鞏秦階兩道約八九百里千里蘭州一道近者一千三四百里遠者一千六七百里蘭州迤西涼州甘州西甯迤北甯夏遠或二千餘里或三千里至肅州安西一道則三千里或四千里鎮迪一道更五六千里不等邊塞路程寫遠又兼驚砂亂石足礙馳驅較中原行路之難奚翅倍蓰士人赴陝應試非月餘兩月之久不達所需車馱僱價飲食芻秣諸費旅費卷費小者數十金多

者百數十金其赴鄉試蓋與東南各省舉人赴會試勞費相等故諸生附府廳州縣學籍後竟有畢生不能赴鄉試者窮經皓首一試無緣良可慨矣軍興以來學臣不按臨甘肅者已餘十稔幸前學臣許振禕不避艱險以次按試生童踴躍歡呼迎拜馬首計補行各屆歲科諸試取入新生不下萬人而從前取進生員尙不在內徒以資斧無措不能遠行加之夏秋暑雨水潦縱橫有無從問津者有中道迍邐致悞場期廢然而返者有資斧耗盡抑鬱成疾以歿者其得抵陝完試事者不及三千人然則甘肅士子之赴鄉試者合新舊諸生計之不過十之一二而已臣自肅州凱旋歷甘涼各郡途間見諸生迎謁道左初疑其秋試被放者比詢以試事則僉稱無力赴陝不知其詳言已欬歔不絕慰諭遣之前接准學臣許振禕咨送甘省赴試士子公懇分闈呈詞當行兩司議詳昨由肅凱旋後又據紳士前刑部主事滕烜道員曹炯及漢回士紳等聯名呈稱捐建貢院擇定袖川門外地基籌備磚瓦材木已有頭緒請援照湖廣雲貴鄉試分闈取中前來並稱甘省武試本係分闈文試宜可做照懇求具 奏臣惟湖廣雲貴等省鄉試道路險遠歷蒙 列聖恩旨分闈取中士林感頌至今茲甘肅赴陝鄉試道路險遠較各省數倍有加 皇上 一視同仁軫念士人赴試維艱儻 恩允分闈取中俾邊徼寒微得照各省一律就近應試則投戈講藝 士氣奮興 文治之隆可計日而待也惟是分闈取中額數應定若干難以擬議蓋陝甘鄉闈向係合兩

省取中從未分析茲甫議分闈取中若將兩省額數平分各占一半則陝省應試人員向多於甘省現且有增無減甘肅如占額一半致陝西中額頓形減少殊非情理之平若照臣度隴之初奏准甘肅取中二十一名成案計算無論當時因賊氛正熾赴試人稀一時權宜酌擬本非甘省定額況當隴境肅清應試士人自必增多數倍而中額僅此翻致向隅亦無是理若按照永廣中額部章計算甘肅軍興以來各府廳州縣派捐糧料餉需均值人物彫殘市價翔貴之時調核各廳州縣歷年案卷稽核捐輸之款爲數甚鉅而又限於部議永廣中額不得過十名定章無從推廣此擬議中額鮮可依據之實情也溯考從前兩省合中時道光丁酉己亥咸豐壬子等科甘肅每榜曾取中三十餘名同治九年庚午科鄉試臣接陝西撫臣蔣志章緘稱主考評場中試卷甘肅獨優殊嫌額滿本年癸酉科鄉試據陝西藩司譚鍾麟稟主考所論亦同是陝甘文風無容軒輊而甘肅分闈後人文日新月盛尤在意中合無仰懇 皇上天恩逾格特准比照各省中額最少之貴州每科取中四十名滿營應試士子每科取中二名合共四十二名作爲定額遇 簡放主考學政之年另 簡甘肅正副考官各一員甘肅學政一員俾合省士子得以就近鄉試而歲科按屆舉行學臣得免跋涉之勞生童得以時親承訓迪習舊學而啟新知不獨邊方士習文風可期丕振已也臣自西征以來目覩民俗陵夷泯斁日甚不但劫殺爭奪視爲故常動輒嘯聚多人恣

爲不法而民間倫紀不明禮教久斁干名犯義之案誅不勝誅緣地雜華戎習俗漸染旧深正恐夏變爲夷靡所止極不得已設局鄂省刊刻四書五經小學善本分市各府州廳縣師行所至飭設立漢回義塾分司訓課冀耳濡目染漸移陋習仍復華風邇來漢民敦崇儒術誦習六經回民亦頗知嚮慕爭請設立義塾延師課讀儒書前學臣許振禕次第按臨多方激厲回生得附學籍貢成均者所在不乏益欣欣然以得附宮牆爲意外榮幸食桑黌而懷好音斯其時乎若荷 皇恩允其分闈就試屆時簡派學政按期校閱則經正民興邊氓長治久安之效基於此矣臣亦知聖賢之學不在科名士之志於學者不因科名而始勸然非科名無以勸學非勸學則無讀書明理之人望其轉移風化同我太平無以致之固非謂科第文章足以歆動庸耳俗目兼可博取民譽也愚見所及謹以附陳

奏設味經書院疏

陝甘學政 許振禕

竊惟風俗之盛衰視乎人才而人才之隆替由乎學校學校者教士之地實養士之地也士人有廉恥而後鄉里有風化庠序有秀異而後在官有循良其始僅章句誦讀之爲其究則生民休戚之寄故一人爲之衆人從而效之方正邪僻分類殊趨謂之風氣一人倡之衆人遵而行之學問議論先入爲主謂之師承其源甚微其流甚大不可不謹也夫欲有所用以收得人之效則必有所養以爲儲才之基臣伏見

國家作育人才府縣設學復聽所在舉行書院法良意美得人稱盛惟奉行日久教官往往視爲具文平時因循居半迨學政按臨所駐不過旬日而又不逐日校藝卽有所啟迪亦不過布條教舉大綱至於教士之實竊以爲莫如書院若書院山長得人而謂不能挽回風氣振興人才者未之有也伏查近日書院之弊約有二端一由山長爲紳士退休之資其延訂也或論名位或徇情分官場以爲一歲之應酬紳士以爲一家之取給評點甲乙苟簡從事而於學問人品概未之及如是者不得謂之教且經費悉隸官吏凡印官兼轄書院往往虛領其名而未查其實其款項生息支發一切皆書吏主之積年旣久侵蝕失計日見支絀士無所藉難以棲止如是者不得謂之養臣自抵任以來因查西安有關中宏道兩書院培植兩省規模稍大關中督撫主之宏道學政主之惟自軍興以來士多苦貧不能自食又不能從師雖欲聞經明行脩之要其道無由況甘省流寓於此者殊不乏人臣愚以爲似當添一書院以收兩書院之所不能容因擇兩書院適中地方於涇陽城內設一味經書院其規模與關中宏道相等臣捐廉爲之倡而各屬紳士好義急公者大率皆醵金襄事業已設立講堂開課舉行其定章有不同他書院者三他書院專課詩文味經之設則要以實學爲主令諸生逐日研究欽定七經及通鑑史漢大學衍義文獻通考等書引之識義理稽故實手抄口誦日漸淹貫匪惟腹笥可充卽政事亦差知大略其設課也則合制藝論

策經解詩賦法戒錄分課一一爲之使知學古之爲貴他書院除閱課外師弟不嚴接見今則山長日登講堂傳集諸生將經史大義及小學諸條講貫察其課程閱其札記別其勤惰嚴其出入令其由嚴憚以生清明本講貫而得服習使之知植品之爲先他書院屬之於官官有遷移則法必中變官有職務則事難兼涉卽如宏道書院歸學臣董理如臣終年在外按試相隔千里何能稽查今味經之設臣悉擇一方之望以之共理一方之學雖創始由臣而日久經理究以責成紳士爲當蓋權不歸官則延師可免徇情敷衍之弊非物望素孚學品兼優者必不能居此席費歸實用則經理可免侵蝕支絀之虞非廉介自持鄉里推服者必不能與其事羣力維持思培子弟使之知成法之可繼此臣倡建味經書院之初意如此也臣徧查陝甘人望所歸得保升同知前平利縣教諭史兆熊學有本原體用兼備延爲書院山長訂期十年而以城固訓導姚劭誠澄城教諭王賢輔協理講席兆熊品端學粹遊其門者多所成就前在興安勸辦一府堡寨一千數百餘所賊犯興安不能逞志全活甚多厯經大吏保薦兆熊每爲學徒攀留不能出仕其澹泊而有實用如此劭誠長於經學志在誘迪賢輔澹然無欲留心風化此皆關中方聞之士正學之選置之訓迪必有可觀記稱七年小成九年大成臣之責以十年者亦準斯義如造士無效臣請受謬舉之咎其承管經費課程膏火責成紳士候選知縣怡立方教職張樞楊彝珍吳乙東謝洪猷從九牛

興宗等立方廉正勤懇才識素優歷年籌衛地方久著成效其餘諸人亦皆物論推重以之經理書院不僅培養人才日有起色卽義倉蠶桑諸事亦可次第舉行不動公家纖毫之歛而又興地方無窮之利似教養可收實效臣觀諸人俱誓心竭力願任培植不求保獎不居成功良由關中風俗之厚士習之美以之責成經管實足垂久遠而無流弊合無恭懇 皇上天恩飭下陝甘總督學政臣各立案嗣後督撫學政及各衙門分月輪課其山長堂課規條卽乞照臣所擬辦理一并責成紳董承管

請整頓宗學疏

王榕吉

竊維 國家設立宗學所以爲國儲才亦以明親親也學分左右兩翼每翼宗學額設教習官四員總管二員副管八員復有總理之王公統司其事又欽派科甲出身三品以上之京堂二員專司稽察法至密意至深也誠以宗室子弟生長富貴派衍天潢必使之入學肄業擴其聞見以免固陋陶其性情以化驕矜遜志時敏破除世習氣乃可以長保富貴也教習官三年俸滿須查有實在功效方由稽察大臣加具切實考語送宗人府帶領引 見請 旨施恩錄用獎其勤勞卽以嚴其督課 國朝宗室代有偉人莫不仰荷 列聖之所教育迄於今而宗學幾成虛設矣臣自同治九年奉 命稽察左翼宗學當向該管官切實致囑課程務須認真初次入學尙有教習數員肄業生二十餘人在學接晤此後時復前往則

日形疏懈荒署或無一人稽察教習者難得與宗學生晤面出題課試交卷亦復寥寥詰其何以如此據該管官僉稱宗室之廢學大都爲貧所累餬口無資實有萬難認真者緣宗學肄業生向章每名月給米三斗紙筆墨按時給領夏季以冰冬季以炭自經費不敷月米裁減又改爲折色向之領米三斗者今領米不及二分其他更無論焉每月所領僅數兩日之食欲責令常常入學讀書作文勢必有所不能是宗學之設有名無實矣其充裕之家亦或自行延師課讀然力能延師者十之一不能延師者十之九誠恐乃逸乃諺旣不知稼穡之艱難又不得詩書之進益坐誤聰明大爲可惜在各學教習不過敷衍歲月藉爲出身之階而職司稽查者扶同隱忍實覺負疚於中臣在順天府尹任時於金臺書院考課之期遇有宗室子弟應試者必酌予獎勵拔置一二等俾稍分膏火之資愛其才又憐其貧也伏思我皇上誼篤親親推恩錫類之仁無所不至獨入學讀書之子弟月米未復舊規似無以示優異而昭激勸且兩翼宗學每年所擢節者不過梗米五六百石地方水旱偏災一經奏報朝廷不惜截漕十萬石二十萬石立予恩施卽京師之普濟堂功德林及通州之王恕園每冬尙蒙恩賞倉米五六百石及三四百石不等豈以宗室子弟培養所關而稍有靳惜耶可否請旨飭下宗人府王公妥議整頓章程肄業生月米應如何復舊勤學與不勤者應如何分別勸懲教習官應如何專以責成儻俸滿並無實效應否再留數

年以觀後效獎勤警惰庶教習專心以納誨學者崇德而象賢將見宗室子弟經明行修大可爲楨幹之才小亦不失爲圭璋之品則 聖朝之恩明誼美歷久彌光矣

糸世之糸糸



三十三

一

皇朝經世文續編卷五十四目錄

禮政五 學校下

會籌整頓 咸安宮官學章程疏

寶昌

請國學增設舉監疏

王先謙

請 恩准職官入監片

王先謙

請停武闈片

沈葆楨

臚陳站丁不准考試可疑可憫情形疏

王家璧

請 飭酌加海門廳學廩增各額片

黃體芳

請添設張獨多三廳學額疏

李鴻章

續陳苗民改裝暨整頓義學情形片

林肇元

口外七廳取進學額請援案辦理疏

奎斌
呂鳳岐

請造冊送考疏

文緒

新設縣治請立學校疏

慶裕

改建船山書院片

彭玉麟

船山書院記

口快士職是職學而精於義理者

呂昌

船山書院記

楊瑞

船山書院記

李斯

船山書院記

李斯

船山書院記

王

船山書院記

王

船山書院記

王

船山書院記

王

船山書院記

王

船山書院記

船山書院記

皇朝經世文續編卷五十四

上海萬士濬子源輯

禮政五 學校下

會籌整頓 咸安宮官學章程疏 光緒八年

詹事府少詹事 寶昌

竊 咸安宮官學創自雍正七年教習學生定爲員額以內務府大臣管理學務而選滿漢翰林稽察之立法之始既稟稱事品課有章高選經師橫舍闡溢百餘年中 列聖恢儒右文深沐雅化學官益惇誨以道藝士食舊德支葉蕃滋彬彬稱盛自道光以後用度不足例支稍稍省併亦會戎馬方殷未遑庠序之事師徒怠散進趣雜博士僅有虛名學生遂寡成業失今不治舊典兩渝臣等伏念 咸安宮官學翹材夙衆 恩例獨優遠固下庠西序之規近亦上臺東宮之制際茲 皇太后 皇上崇儒重道籲俊求才方屢下 詔書意在整飭官學臣等稽察課程同有綜理之責謹與管學大臣吏部尙書廣壽兵部尙書志和反覆集議僉謂齋室未傾徒屬粗備振衰拾墜宜及是時輒參稽舊制酌以今之便宜分別條上伏祈 聖明鑒察

一慎挑選咸安宮官學學生例選八旗及內務府三旗滿洲舉貢生監官學生及閑散人內充補嘉慶十

四年議准臣學體制較優若學生年歲太幼僅責以背誦經書不足以觀成效嗣後凡由官學生及閑散人等挑選者定以十五歲以上二十歲以內入學至十年限滿不能考中生員卽行出學舉貢生監三經正科鄉會試不中者如之是臣學學生必文理清通材堪造就者方能入格非如八旗景山向以幼童充數者比且教習期滿例以名下學生中式進士舉人取列生員筆帖式爲考課若準十年就傳之條恐無三載通經之效揆之事理妨礙實多此次釐定學規應將學生傳齊面試校藝署年一準成例如不及額卽咨取各旗俊秀子弟續加遴選惟向章由管學大臣取定送學比廣壽志和議以臣等會同挑選稽察尤周具見該大臣等無分畛域之意應俟得旨允行臣等與聞選政仍當於拔充選額之中一材必庸一藝必錄以宏樂育而廣譽髦

一分課程官學生額缺一百十名向例習漢文者七十七名習清文者三十三名乾隆二十六年改歸清書者二十名今學務久廢不但清書全不通曉卽文藝亦甚空疏近年漢書房經廣壽酌復月課尙有基緒可尋至於繙譯清書殆乏專門幾成孤學臣等公同商榷擬仍以七十七名學習漢文以三十三名學習清文旗員當以國書爲根本而繙譯實以漢文爲權輿如果教導有方諸生敬業樂羣親師取友將旁通藝事舉所謂十二字頭三合切韻實無難兼綜條貫應俟數年以後擇學中高材異等數十

人清漢並習亦不必預爲定員以免愛博不專之弊

一復公費查戶部例載臣學教習共十五員月給銀三兩季米五石三斗官學生一百十名各月給銀二兩歲支米二十一石二斗道光咸豐年間以次核減教習月得銀一兩八錢學生月得銀一兩四錢米皆每季一石有餘在今日教習具官學生輟業尙復月支奉稍亦近於苟祿素餐若經臣等酌復月課兩次教習小課六次旣懲惰逸宜恤清貧擬懇 恩施將臣學教習學生月銀季米均准實支無庸減成給發計每年增銀千餘兩米千餘石在部庫倉儲所耗無幾而冷官寒峻所獲已多體恤旣至始能專其責成衣食旣周始能奮其志慮學務持久之基實在於此至教習應給衣裘學生應給紙筆各費管學大臣已經籌給無俟臣等瑣陳

一嚴考成臣學教習期滿由管學大臣出考咨部照例引 見候用自學務日弛該教習等功課無憑考核期滿報部流弊孔多久之將視教習一官徒爲舉貢入仕之借徑殊失論定後官初意管學大臣與臣等詳行定議擬於到學以後將該教習名下分教各生註冊存案其間或有事故改派加派者均隨時登記期滿將臣等所定課簿咨由該管大臣出考並冊送部以憑稽核其不能實心訓課教法平常者仍照例分別叅處駁回教習之考成準以學生之功課則學業玩愒必不肯曲與通融子弟梗頑必

不願仍爲掩護斯視公事如私事自能以身率教收循循善誘之益矣

一端學術臣學課試久廢試辦之初不得不就文取士漸與薰陶但整頓官學本期造就人才若不深探本源狃於俗學久之學中但得數十工時文精試律擅楷法之士不足見國家厚待八旗甄陶品類之至意伏考乾隆元年臣學恭奉諭旨令學生學辦稿案及諸藝業嘉慶年間諭士人讀書致用若但知從事文藝而置聖賢誠正修齊之學於不問卽倖獲進階服官登仕其於修己治人之道懵無所知何以副興賢育才之意至尙儉黜奢尤爲興廉善俗之本官學子弟蒙養初基着管理官學各人員嚴誠教習人等務與受業各學生講明四子之書剖析五經之義有心性浮華與服侈肆者隨時嚴加戒飭欽此是知經行貴於交修體用宜於兼備臣等旣酌復課試於繙譯詩文之外當漸試以經史策論觀其志識至先儒性理之書本朝掌故之學亦擬令教習等隨時講求因其資稟咸使通明其常行書籍由各生自行購置惟臣學苦乏秘藏善本宏編訪求匪易所有列朝聖訓御纂七經御批通鑑輯覽以及御定清文鑑及補偏總綱補總綱御定滿蒙漢三合清文與武英殿國子監等處所有官刻書籍及近年各省局刻書籍應懇恩準臣學擇要咨取俾諸生肄業之餘得以縱覽異書研究實學斯教化宏而學術正矣

一請 恩試臣學學生向例五年考試一次由吏部請 簡大臣分別等第一二等錄用間有 賜給三等留學四等革退乾隆間改爲三年一試二十三年改爲不定年分考試繙譯中書筆帖式四十一年復准咨送吏部考試庫使臣等查近日侍郎錫珍請整頓官學侍郎寶廷請教導六部筆帖式均奉諭旨允行卽今事例停而繙譯中書各部筆帖式庫使亦實有乏才之患若申明舊章集各學之良以爲各衙門之用仍酌予年限準將各學學生請 旨考試分別錄叙則子弟有進身之階少吏皆明經之士似與學務政務均有裨益是否有當應請 飭下吏部妥議具奏 以上六事準舊制定新章酌時宜除夙弊似亦教養兼全情法互盡如蒙 俞允臣等卽當詳定條規嚴立程課時進諸生而訓迪之以期徒衆嚮風相觀而善臣學近隸 禁垣較四姓小侯二品士門七營飛騎尤爲優厚八旗子弟又類多開敏高明仕路旣寬穎異之資騰上必速若童年收辨志之益幼學定育德之基較之鄉貢進士州郡文學困於科舉習非所用等當有事半功倍之益以 國家治理之隆誠使實事求是久道化成或有一二瓌偉之士出於其間以副 聖明振興學校之意此固臣等可爲八旗子弟深殷期望者也

請國學增設舉監疏

光緒十一年六月

國子監祭酒

王先謙

竊維臣監六堂向以各直省貢監生彙送考試入監肄業而舉人例不與焉推求立法之意蓋以國初仕路疏通儒生一中乙科卽登官籍不應更廁身太學致妨貢監生甄用之途康熙以還科目日盛銓選因而擁擠伏讀乾隆七年聖訓已有舉人日積日眾需次多年不得一官之旨至今日而勞績捐納充滿天下銓法愈滯士子名登甲榜始爲筮仕之期舉人非由大挑教習得官謄錄議叙及兼藉他途出身者鮮不皓首一經困窮終老此亟宜加意者一也學人旣列賢書已出貢監生之上進掇巍科則內廁朝班外膺民社莫非爲國任事之人正當及尙未釋褐之時使之肆力簡編養成器識乃以限於成格轉不得與貢監等同沐聖主之教思旣無當於育才亦非所以勸學此亟宜加意者二也明代學校之制入國學者通謂之監生有貢監有廩監有例監有舉監卽舉人也洪武初擇年少舉人趙惟一等入學永樂中舉人會試下第輒錄其優者俾入學以俟後科嗣後遂爲定例欽定明史選舉志可考按也今舉子春闈報罷其欲留京者不少資生乏術覓館維艱無不願厯事上庠一霑廩餼以爲奮志潛修之地若不加以收錄實不足作士氣而順羣情此亟宜加意者三也如一體入監肄業厥有三便自捐例減成粟監且盈天下於是太學重地恆貢少而監多其潛心問學者固不乏人而射利者流惟圖竄名入籍得以霑潤直隸山東兩省監生重名代替寔繁有徒每值考錄住學幾於防不勝防詰不勝詰舉人則皆

係本身凡入監者取同鄉官認識印結爲憑可無蒙冒之弊考選既得其真稽察尤易爲力便一監生多在本省應試無事來京雖有通材何從廣爲羅致舉人則三歲計偕畢萃輦轂拔尤宏獎易收英才樂育之效便二明初歷科進士多出太學洪武朝戊辰辛未廷對第一者皆太學生撰題名記立石監門進士題名碑由此相繼不絕 國朝進士立碑尙沿故事而其由來無復深考矣誠令舉人入監則明經飭行孰不爭自濯磨貢舉之年必多成就人才鼓舞之機端在於此便三臣等伏惟成法貴於遵循而時宜必當參酌矧立教培才之道不厭精詳果於學校有裨敢不權衡變通上副 聖主作人之化爲此合詞具奏懇 恩將臣監肄業生增設舉監名目准以各直省舉人入監肄業卽於貢監生員額內通融錄補以廣甄陶而資鼓勵出自逾格 鴻施

請 恩准職官入監片

光緒十一年

王先謙

再向來臣衙門無職官入監肄業之例惟近日捐例減成樂輸頗多士子戎行著績刻章半列儒生幸邀頂戴之榮弗與膠庠之選求仕不得願學未能揆厥情形允宜矜恤擬嗣後無論舉人貢監生除由捐納勞績得有正印職官投供候選者卽係已入仕途無庸收錄外其非正印職官未經投供仍情殷向學者懇請 恩准入監肄業至舉貢考取教習傳到需時者請一併入監肄業以廣裁成

請停武闈片

兩江總督 沈葆楨

樽節經費各省情形不同而就大局言之日節無用以裨有用而已 國家文武並重論求才之道原謂取多則用宏然文職以科甲爲正途而武職科甲升階獨居行伍軍功之後則 祖宗立法之精意不可不深長思也歷科武闈報部經費每省已數千金而不合部例又不能徑裁歸於外銷者不與焉其院試郡試縣試則爲牧令虧累之一大端果所拔者爲 朝廷折衝禦侮必不可少之才卽所費滋多亦不當吝惜顧自軍興而後竊計 國家所以收得人之效者多半由額兵練勇而來科目之榮遠不逮焉卽以京旗論人才輩出者首推火器營健銳營今則神機營出色當行矣何者習其所用也臣到任日武舉聯銜稟訴投營幾及十年不得一差心焉憫之然詳細察看其曉暢營務實不足與行伍出身者比其奮勇耐勞實不足與軍功出身者比何者所用非所習也夫歸標効力者尙能束身自愛勉就範圍而無事家居者往往恃頂戴爲護符以武斷鄉曲蓋名雖爲士實則游民有章服之榮而無操防之苦故以不守臥碑註劣者文生少而武生多則又非徒無用也誠奉 廷旨飭停武闈例銷之款提解部庫每科合各省亦可得數萬金而綜計州縣所省虧累尤屬不少爲州縣省一分虧累卽爲民間留一分元氣其有志向上者或兵或勇任其所托早得窺見行陣真際以自奮於功名樸厚者歸農無從沾染習氣則財與才均

化無用爲有用矣可否請 旨勅下部臣通籌定議出自 聖裁

臚陳站丁不准考試可疑可憫情形疏

光緒四年

王家璧

臣恭查道光二十四年 欽定禮部纂修則例內開盛京兵部所屬站丁係吳三桂戶下逃丁及僞官子孫承充八旗戶下帶地投莊頭與家奴無異本身及子孫均不准其捐考等語臣查旗民家奴尙有伊主放出後扣足三代所生子孫與平民一例應考之條而此項站丁節經歷任盛京兵部侍郎永福兆惠富德花尙阿書敏書元戶部侍郎延煦等奏請照戶禮工三部所屬官丁一體准其考試均經部駁在案在部臣屢議而屢駁者固守先年之例案而諸臣屢駁而屢請者實察歷久之情形臣謹詳查歷次成案考証乾隆嘉慶年間部頒 欽定學政全書及近時續增科場條例竊見其中有可疑者三有可憫者三請爲 皇太后 皇上陳之永福兆惠富德花尙阿四次奏請見於 欽定學政全書者皆在嘉慶十九年以前部駁皆以驛站緊要恐准考則有力之家盡以讀書爲名規避差使致誤驛務並無一語謂係吳逆逃丁也至嘉慶十九年將軍和甯與書敏不合始有係康熙年間招安吳三桂戶下逃丁四百四十名編爲二站之語此可疑者一也永福初次奏請在雍正八年其時去吳逆平時未遠欽維 世宗憲皇帝聖明英察無事不在 聖鑒之中臣恭查雍正五年杭州織造孫文成奏事奉 硃批凡百奏聞若稍有不

實恐爾領罪不起須知朕非生長深宮之主係四十年閱歷世情之雍親王也 聖諭嚴明莫能欺飾若此乃永福此奏惟奉 上諭事雖應行但此途一開俱各染於漢習而於漢仗武藝正項差使恐不無懈弛之處等因欽此若站丁皆偽官子孫永福隱飾不奏復爲陳乞 天語有不譴責及之乎此可疑者二也和甯謂康熙中招安逃丁編爲二站亦未指明何站其實盛京兵部所屬二十九站皆設自順治二年人數既多歷年又久生齒自必蕃衍今日皆吳逆逃丁之後豈原設二十九站各丁竟無一丁有後乎且逃丁但編二站卽陸續投回並拿獲者及偽官等家口亦撥其中必不至合二十九站全額一律換盡也此可疑者三也不特可疑亦實可憫原設二十九站站丁世受 聖朝豢養例准考補驛丞何敢必希上進但因一二站編有招安投回之人遂使二十九站站丁祖父子孫同受不韙之名不准上進必非其心所安其可憫者一也臣又查咸豐四年部駁書元所奏內稱若因其情殷報効遽准代懇 恩施破除成例是但爲數千餘兩之微資贖二百餘年之大法等因臣敬思卽和甯所奏編管二站係在吳逆初平之際其時去明亡未遠或因頑民尙多不得不嚴爲之法以一人心今海內涵濡 聖澤二百餘年卽髮逆擒逆回逆迭起終不能動搖人心況隨吳三桂入滇兵丁初本非逃幸沐 聖祖仁皇帝寬大恩施招回根本重地迄今時歷 八朝七逢 大赦罪由緣坐愈遠愈輕例文所云本身及子孫若通始初編管

之人扣算則除去原丁及其子其孫今之站丁早在四世以下矣其望澤之心正不敢自外生成之心也其可憫者二也且近自軍興以來朝廷義正仁育其脅從投回者出力則貴顯之散歸則安插之並未錮其子孫罰及後世莫不感戴皇仁而該站丁等但以國初至今年代久遠冊籍難稽二十九站中莫能分別無以自明以近年脅從投回仰沐天恩浩蕩比較未免向隅其可憫者三也臣愚以爲留都實根本之地豢養本予以自新現今站丁生齒益繁驛務不至懈弛拔其秀雋於移郊移遂之後正以昭列聖教化之神育才之中卽以固本臣不敢以案經屢駁緘默不言謹據見聞所及並考證前後欽頒諸書臚陳聖聽可否准照莊頭及旗民家奴放出例除去始編站丁本身及其子其孫外再扣足三代所生子孫旂檔有名入旂籍考試旂檔無名入民籍考試其服官限制亦查照辦理出自皇太后皇上逾格天恩伏乞聖鑒訓示事關盛京根本重地屢駁之案似應廷議僉同以昭慎重如果臣言可採伏請飭下王公大學士六部九卿翰詹科道持平定議會奏施行

請飭酌加海門廳學廩增各額片

光緒八年

江蘇學政黃體芳

江蘇設立海門廳肇始乾隆年間劃通州崇明錯壤沙洲別爲沙籍嘉慶十七年撫臣朱理等以該廳觀風應考四百五十餘名奏請額設文生十五名武生八名廩增各十五名經部核查續稱該廳童生在通

州考試者一百六十四名在崇明考試者三四十名請設文生六名廩增各四名部議以前後人數不符且據學政按臨考試統計人數不過二百照循化廳例取進文章四名廩增各二名期於核實取材甯缺毋濫惟海門轄境縱橫百餘里自乾嘉迄今幾及百載近十數年來每屆廳試視年豐歉與試者或六百七百有差同治三年部議紳民捐餉准加學額二名七年部議紳民續捐餉准加學額二名各在案而廩增額數仍各二名有半世窮經而廩精未逮有屢膺首選而挨補無期且以通共二名之廩生保六七百名之童生識認殊難爲力據署海門同知汪承福呂賢彬先後詳據紳士陳子蘭等以考試人多廩增額少等情呈請奏懇加廣廩增額數前來臣查學政全書所載各省廳學如江西蓮花廳額進八名廩增各十二名定南廳額進八名廩增各二十名浙江玉環廳額進八名廩增各八名湖南鳳凰廳額進六名外額進二名廩增各六名乾州永綏兩廳各額進四名外額進二名廩增各四名甘肅循化廳額進四名廩增各二名四川石柱廳額進六名廩增各十四名理番廳額進六名廩增各十七名雷波廳額進三名廩增各六名雲南蒙化永北兩廳各額進二十名廩增均各四十名貴州仁懷廳額進四名廩增各八名普安廳額進十名廩增各二十四名松桃廳額進四名廩增各二名在當時因地制宜原無成見多士循塗守轍豈有他求惟現在海門學額多於循化雷波理番仁懷松桃等於蓮花定南玉環鳳凰乾州永綏而

廩增額數僅與極邊之循化松桃相埒同處 右文之世均爲新設之區彼此相形不無向隅興嘆若謂數多無據則近時並無跨考之風若云額定難增則入學已有加多之例卽如同治十年歲試廩生二名相繼丁憂時保結祇有增附擇人旣費周章按例亦形歧異臣上年歲試該廳考童已逾五百以外現屆科試密爾秋闈人數必衆廩生難於保認自係實在情形伏思 國家取士自有限制以該廳目前進額而論迭經加廣原不能援人數文風之說再乞 殊恩但學額旣至八名而廩增額數未與並增合計僅得半之數無論童生或增或減察弊總有所難周卽附生愈積愈多進步亦傷於太溢倘蒙 飭部核議於廩增原額外各酌加數名庶幾鼓舞士林共樂榮名之寸進稽查童試俾有責任之分司旣廣 皇仁亦符禮制

請添設張獨多三廳學額疏

光緒八年

李鴻章

竊查迤北之宣化張家口獨石口多倫諾爾三廳地面本係塞外荒區從前經商種地之人皆自他處遷往戶口甚少來去靡常是以向無學校近年荒地日闢生聚日繁白草黃沙變爲阡陌望衡對宇漸有市廛臣前派員清查墾地升科諮詢民間疾苦其民之秀良者亦有志讀書蒸蒸日上已奏准將該三廳理事同知改爲撫民要缺並於多倫移駐武職大員添設三廳捕盜兵弁保護商民在案惟學校缺如士子

尙乏進取之路且塞外民多强悍尤宜澤以詩書誘以禮教俾可化稟質而格愚頑據藩司崧駿口北道奎斌以因時制宜設學誠不可緩酌擬應辦事宜詳請核奏前來臣查熱河承德府屬之平泉豐寧灤平建昌赤峯朝陽六州縣初無學校嗣於乾隆四十一四十三等年議准添設漢民學額每州縣歲科考試各取進文童四名歲考各取進武童二名平泉豐寧文風較盛各設廩生四名增生四名灤平建昌赤峯朝陽各設廩生三名增生三名二年一貢因未建設學宮教官統歸承德府教授兼管其先在密雲等處原籍入學各生改歸寄居平泉等州縣管轄內有現係廩生令其各保寄居州縣童生如該州縣中現無改歸廩生暫取地隣保結收考等因今張獨多三廳議設漢民學額與熱河情事相同擬援照成案卽自光緒八年科考爲始每廳歲科考各取進文童四名歲考各取進武童二名如佳卷不敷姑缺無濫該三廳亦比照灤平建昌等縣之例擬各暫設廩生三名增生三名二年一貢現值經費支絀勢難建設學宮教官擬將張家口廳考試事宜歸附近之萬全縣教官兼管獨石口多倫兩廳考試事宜歸附近之赤城縣教官兼管府試事宜卽歸宣化府知府教授管理該三廳本少土著民人多係他地流寓應查明已在該三廳屬寄居二十年者准其改歸如該廳考試其先在宣化等州縣原籍入學各生今改歸寄籍者卽不准再回原籍應考內有現係廩生令其各保該廳童生如該廳現無改歸廩生暫取該童生地隣保結

收考俟補有廩生再由廩生保結仍嚴杜原籍寄籍兩處跨考及附近州縣居民赴該三廳冒考之弊如此分別辦理庶邊外文教振興漸知孝弟忠信之義殊於地方風俗有裨其有未盡事宜容飭該道廳隨時察議詳辦所有張獨多三廳擬請添設學額緣由理合會同順天學政臣孫詒經恭摺具陳

續陳苗民改裝暨整頓義學情形片

光緒九年

林肇元

臣於本年三月二十二日將勸化苗民改裝情形恭摺具陳五月初五日准兵部火票遞回原摺奉 旨知道了欽此欽遵在案臣當卽恭錄行知該地方文武遵照飭仍善爲開導毋許稍有勉強擾累嗣於六月間復據統帶練軍委用提督陶茂林會同地方官將鎮遠黃平清平施秉凱里各處續行改裝苗民三千一百五十二戶丁口一萬二千九百零六名造冊呈報前來臣查核無異伏思化苗固宜改裝以革其面尤貴設學以革其心必使之讀書明理陶染漸深變化自易現經選派候補知縣梁貢璆將臣所刊訓苗義學章程功課暨纂輯族譜樣本婚喪禮簡明儀節並多購小學應讀各書攜往苗疆各屬會同地方官實力董勸隨處整頓持之以久冀克有成以期仰副我 聖主教澤覃敷一道同風至意

口外七廳取進學額請援案辦理疏

光緒十年

奎斌
呂鳳岐

竊查晉省歸綏道屬之歸化薩拉齊和林格爾托克托清水河與現在奉准改隸之豐鎮甯遠七廳地面

遼闊戶口繁增民俗敦龐不乏俊秀可造之士祇緣該處向未設學士子進身無路未免向隅上年升任撫臣張之洞奏請設立各廳文武學額經部議以各省未經設學之區經各該督撫奏請設立專學者向係查明應試人數若干有無附考他學取進有人報部定額酌量添撥光緒八年直隸張獨多三廳設學成案卽係照此議辦今山西歸化等廳土著及寄居合例人民亦應查其現在應試人數並向來曾否附考他學有無取進之人行令詳查辦理等因正在飭議間欽奉光緒十年正月二十五日 上諭王廣榮奏邊民服教有年請添設廳學一摺着山西巡撫山西學政綏遠城將軍會同妥議具奏欽此欽遵分別咨行併案核議去後茲據署布政使高崇基詳稱七廳寄居民人多在百年內外儼成土著無籍可歸卽或本籍間有親朋亦以離鄉日久勢成隔絕冒昧赴考必致阻攔而阻攔之人所以嚴防冒越卽可以藉端訛賴有如該御史王廣榮所云者原籍如此附考他籍更無論矣旣無赴試之所卽難計其應試之人惟歸化廳舊有書院查其現在赴院考課者計數業有三四十人今若准其就近應考自必聞風興起人數日增各廳亦均有奮志讀書之人更必同斯踴躍因查直隸張獨多三廳設學事宜係按應試人數查照宣化府取士規模酌量取進於光緒八年經部議准有案晉省七廳情事相同擬卽援案自下屆歲試爲始七廳文童由各該廳就近招考一俟學政按臨大同府屬時照案錄送附棚應試仍由學政按其實

到人數多寡比照大同府現在取士規模酌量取進數名考過三五次後察看情形如果人文日盛再行議定學額以及廩增名數奏明辦理其現無廩生之先照章暫取地隣保結送考此後續有寄居者仍須照例扣滿二十年方准入考免致跨冒武歲試一體照辦惟查張獨多三廳所附萬全赤城兩縣學本係均隸口北道屬兼管自易今歸化等七廳均隸歸綏道大同府分隸鴈平道不相統屬若附大同縣學兼管未免諸多窒礙自應酌於歸化廳設立總管七廳學校事務教諭一員卽將臨縣教諭查照原奏裁缺移改該廳本有文廟無庸重建應置學署俟奉准部覆後再行勘估工需銀兩卽在新徵豐甯押荒項下動支至綏遠駐防向隨右衛考試今歸化既有專學自應卽予改歸原奏請設土默特繙譯學額現在漢學旣歸專設是否一律舉行應候部議此外如尙查有未盡事宜隨時報明立案等情具詳請奏前來臣等查邊方煩要之區本應導以文教況復七廳地面生聚日衆絃誦日多自非澤以詩書無由振興士氣惟是事屬創始應設學額一時旣難遽定自應因地因時酌籌通變可行之法覆核該司所議均尙切實易辦亦與直隸成案符合臣等詳細籌議意見相同所有七廳學額現擬酌量取進援案辦理緣由謹合詞恭摺具奏

請造冊送考疏

光緒十年

文緒

竊照黑龍江滿蒙漢八旗並水師營官屯人丁二百年來向讀清書自經吉林設立考棚准其一體附考各項子弟均知延師誦讀經文近年考中文生每遇歲科不下二三名文風日漸蔚起奴才等前因延師不能核實恐爲純盜虛聲致壞心術曾經捐設官學奏請揀發大教習前來啟迪培養業經奉 旨交部議准咨行在案查八旗滿漢人丁戶口清冊向送京旗遇有鄉試到京應驗騎射自應由京旗叅佐加結詳送毋庸再議外其水師營官屯兩項人丁向未編設旂分歷遇審比之年戶口冊送戶部存案茲據水師營總管海昌詳請前經送歸合字號考中文生李成章等二名壬午科進京鄉試嗣據該生等稟稱蒙發咨文到京投交值年旗始知除帶領該營官缺引 見外向不保送考試不得已折回屢經呈懇該管總管以既隸旗署考中合字號文生不得入場鄉試情形嗷嗷瀝陳轉詳請辦前來奴才等飭司詳查緣水師營人丁係勘定邊界時由吉林撐船前來康熙二十三年將軍薩布素奏設缺分立營駐防專司船務如升營內總管四五六品官向送值年旗帶領引 見有入衙門各司効力貼寫練達公事者亦准與八旗滿蒙漢人一體挑升無品級筆帖式升授倉屯站官年滿以本營六品官用官屯陳丁亦係該將軍於二十七年由奉天官莊人丁內撥來屯田設有領催缺分管轄莊頭約束莊丁種地交糧以備接濟口食其後添新官莊人丁係乾隆四十四年因發遣子弟及另戶旗丁家奴在軍營得力放出共四百餘名

經將軍傅玉奏淮安設新莊給與牛隻與舊官莊人丁種地納糧一體挑選領催等缺本年奴才等又將該官兵由軍營攜來幼丁無籍可歸者五百餘名奏准一併歸官屯管束作爲壯丁等因各在案奴才等伏查奉天水師營人丁係招撫海洋島人編爲鑲黃正黃正白三旗設有佐領防校等官奉天官莊原有兩項隸盛京戶部六品官管下者係爲鑲黃旗漢軍隸錦州副都統所管官莊衙門管下者歸京內務府漢軍旗分謂之大糧莊頭均准與八旗漢軍一體考試合字號歷登仕進者實繁有徒茲江省水師營查明原係康熙年間由吉林隨大軍前來駐防於此立營設缺又與八旗滿蒙漢一體升授文職現在奴才等衙門各司當差者實不乏人官屯陳丁係由奉天官莊撥來無論何處均係有旗分之人其後添壯丁內除家奴放出外雖有遣犯子弟亦係無罪之人根基均無不清之處查我朝凡隸旗籍者莫不均有旗分今此兩項人丁旣隸旗署充當旗體差使並未編旗揆厥由來邊荒地方風俗樸厚只知與八旗一體當差而未計於此也現在該生等旣經值年旗駁回不爲保送此外又無京旗叅佐加結不得觀光若從此淹沒阻其上進之路不特有所向隅且失我皇上拔取人材一視同仁之意奴才再四詳核新舊官屯人丁內有家奴放出者雖經納糧當差已越數輩若遽准登諸旗籍考試未免過優應請照旂檔無名之王公府下人丁一體歸於民籍投考仍另行記檔存查以免弊混外所有水師營及新舊官莊正

項人丁合無仰懇 天恩俯念該生等奮志讀書可否照依奉天營莊旂分將江省水師營亦編爲漢軍鑲黃正黃正白三旂官屯新編爲漢軍鑲黃旂將丁冊分送 京旗存照以備該士子進京鄉試該參佐有所保結用登上進以廣 皇仁之處 恩典出自 鴻慈

新設縣治請立學校疏

光緒十年

奉天將軍 慶裕

竊查昌圖府屬之康平縣自設縣以來已逾三載考試人數漸多文風日有起色該縣地處邊陲民情强悍若非設立學校不足以資教化前因規模草創應試人少暫附府學考試現在該縣應試文童已有一百五十餘名之數其中文理通順者頗不乏人武童弓馬亦多嫻熟可觀自應設學定額以勵人材經康平縣紳士楊毓東等聯名稟縣詳府由昌圖府知府趙受璧轉詳請奏前來奴才等伏查治民以教化爲先掄才以取士爲重從前改設昌圖府治添置懷德奉化二縣均已奏准設學定額在案康平設縣在後學校尙復闕如既據該紳士等聯名呈請自應按照懷德奉化二縣設學成例一律辦理以順輿情而符體制合無仰懇 天恩俯准於康平縣地方建學設官定額取士以興文教如蒙 俞允擬請添設訓導一員歸部銓選並請 飭部鑄造康平縣儒學條記一顆頒發該學以昭信守額設文學二名武學二名外撥府學一名應請在於舊撥府學額內加廣文學一名共計府學七名並添設廩增額各二名五年一

貢從前附府考進各生均令改歸康平原籍不准跨考以清籍貫至修建 文廟學署需用經費暨官俸役食月課等銀均照懷德奉化二縣在於斗租項下動支如有不敷卽在河稅項下撥給循例造冊報銷

改建船山書院片

光緒十一年

彭玉麟

臣本籍衡陽士紳奉前學臣朱迥然面諭創建船山書院於南城外擇師主講已閱一年因院地逼近城市湫隘囂塵殊不足以安絃誦復由臣捐資改建於湘水中之東洲查船山爲前明遺臣王夫之隱居地在衡陽蒸水左岸夫之爲崇禎十五年舉人逢亂未赴會試明年流賊張獻忠陷衡州迫脅士類從亂不降者投之湘江夫之走匿南嶽賊執其父朝聘爲質以索之夫之因自刺兩臂作重創昇往易父賊乃俱免之順治三年明桂藩子永明王由榔稱號肇慶其大學士瞿式耜疏荐夫之於桂授行人司行人屢疏劾王化澄等幾蹈不測康熙十八年吳三桂僭號於衡覓夫之作勸進表夫之潛逃去後乃隱居石船山築土室著書其中學者稱船山先生 聖清大定巡撫鄭端聞夫之曾拒僞命又爲我 朝員士屬郡守饒粟帛請見夫之受粟返帛辭不見年七十四卒所著書四百餘卷其論學以漢儒爲門戶以宋五子爲堂奧尤神契張載之說作正蒙釋義與所著思問錄內外篇互相發明論者謂我 朝鉅儒輩出或攻良知捷獲之說或辨易圖之鑿或詳考名物訓詁音韻正詩集傳之疏或修補三禮時享之儀號爲卓絕而

夫之皆已發之於前與後賢若合符契不愧命世獨立之君子臣案夫之當時海內碩儒北有孫奇逢西有李中孚東南則黃宗羲顧炎武雖皆肥遯自甘力辭徵辟然荐紳多從之游著述亦行於世名稱稍彰獨夫之匿跡韜聲不欲身隱而文著故世亦鮮知之者沒後四十年督學潘宗洛稍訪求其遺書洎乾隆中四庫館開而夫之所著易詩書春秋諸經釋疏始備著錄聖朝闡幽崇賢浚列夫之儒林傳於是天下始知其名學臣朱迥然既倡立書院期講明夫之之學兩江督臣曾國荃復將家藏所刻船山遺書三百二十二卷板片捐置書院又捐助膏獎銀兩嘉惠來學臣與夫之生同里閉親讀其書私淑其人敢不勉竭棉薄力任重建書院之舉惟是該書院係集衡永郴桂府州所屬舉貢生監肄業其中則凡延聘師儒甄別生徒整飭院規給發膏獎皆應歸衡州分巡道主持其事其肄業生先由巡道札飭各府縣及各學公同詳慎舉報出具切寔考語送道應試每年期定二月初旬由道甄別一次覆試以定錄取課分超特一三等限定額無多載在章程內俟經費稍足再行推廣至書院掌教山長應聘何人不以借才異地爲嫌及外省籍貫皆可惟擇學問品望素優者由本籍士紳商請巡道關聘仍由巡道轉達學政不得徇私由人濫荐亦不得掌教不到院致送乾修以昭慎重而節虛糜當此海氛不靖異教龐雜補救之術惟在扶植人才出膺艱鉅而人才之賢否端賴學校之陶成臣以諸生遭際聖明忝竊踰分無濟時艱

所望二三豪俊景仰鄉賢乘時奮勉養其正氣儲爲通才是臣區區之私心所竊願者可否仰懇 天恩
飭湖南撫臣學臣札行衡永道實力將船山書院一切應辦事宜妥速議定舉行實於 皇上興學育才
之道不無裨益其南城書院舊址改作船山祠宇祀夫之栗主其中可否請 旨飭有司春秋致祭俾士
民有所觀感而昭激勸之處出自 逾格恩施除將所擬船山書院章程咨部存案外所有微臣改建船
山書院及明遺臣王夫之事跡緣由理合附片具陳再船山書院延師獎士動用經費由衡永郴桂士紳
捐集書院則由臣買地改建業已告成未支公款應請 恩免造冊報部合併聲明



皇朝經世文續編卷五十五目錄

禮政六 宗法

爲人後者後大宗說

吳定

與子敦論宗子不必有爵書

張履

上湯尙書論兼祧服制書

張履

答陳仲虎爲小宗殤後宜還服本生書

張履

再答仲虎書

張履

復宗法論

馮桂芬

宋濮議論

張錫恭

濂溪大宗支裔零陵青山譜序

宗稷辰

郭氏族譜序

楊彝珍

南邑唐氏續修族譜序

葛學禮

張堅填諱

書賈丈湖山展墓圖記後

葛學禮

張堅填諱

咨湖南撫院

胡林翼

提督出後異姓疏

曾國藩

據情代奏疏

靈桂

已故大員子亡無嗣準令擇立賢愛疏

慶裕
濟祿

皇朝經世文續編卷五十五

上海萬士濬子源輯

禮政六 宗法

爲人後者後大宗說

吳定

傳曰爲人後者孰後後大宗也何休云小宗無後當絕此定論也難之者曰小宗子之繼父祖者父爲之斬而忍聽其絕乎大夫之庶子爲適兄弟不降而忍聽適長繼祖父者之絕乎嗟嗟是未達乎先王不輕以子後人之旨也今夫恩之不解者父母也易父母而伯叔焉易伯叔而父母焉君子以爲此人道之大變也孝子處此必有隱忍負痛終其身者先王雖憫小宗子之絕然絕之者天也而顧令後小宗者日抱其離棄父母之傷則先王亦爲之戚焉而不欲強矣大宗則後之者何傳曰大宗者收族者也不可以絕蓋自其先世繼別子以來世奉宗廟之靈族人賴焉如魚鼈之依大水深淵也久矣今無後而遂絕之非所以尊祖也非酬德大宗以固宗盟也非惠答諸父昆弟之道也酌輕重之義而權起焉先王曰是可對夫爲人後者矣且孔子曰宗子爲殤而死庶子弗爲後也何則義處於無可通雖大宗亦其倫代之況小宗乎或者曰代之而不後之別子之爲祖者毋乃不血食與應之曰不必後之而祀之此先王未言之禮

也傳曰適子不得後大宗又曰何如而可為人後支子可也先儒謂以次適無次適則以妾子又無則以長適俟其生子還爲所生後夫長適可後人則傳不可從矣如果俟其生爲所生後天下豈有無父之子乎吾謂大宗無後後以昆弟之支子昆弟無支子則後從昆弟之支子又無則由族昆弟廣推之奚必適長乎或者曰設別子傳未及五世而大宗絕或雖過五世而世世孤傳或一二昆弟相間以傳而大宗絕小宗惟適子無支子將奈之何曰大宗未及五世而絕雖有大宗之名而其功猶之小宗也無支子則以其倫代之而已若傳之已久而大宗絕後以適子則絕小宗不後則絕大宗準以宗子殤死庶子弗後之例意者亦代之以其倫乎嗟乎權者禮之精焉者也如母因立孤而嫁則不絕其服仁也大宗之祀不斬義也非大宗而議後是不忍無子而忍無父母也不忍於人之父母而忍於己之父母也豈非人道之大變也哉

與子敦論宗子不必有爵書

張履

讀尊著爲人後者爲本生服議上篇深用嘆服履往年上湯尚書書論兼祧服制亦力破不貳斬一說而於今人以小宗爲大宗之謬不甚置辨也得尊著乃無遺義矣下篇論宗法引孔穎達云殷制有爵及它國來仕者若子孫祿位不絕卽爲大宗周則百世不遷之祖獨別子而已又別子若身無爵至子孫始有

爵及宗衰而復興者皆但爲小宗不得爲大宗履按大傳喪服小記但以繼別繼禰分大小宗鄭氏注王

制謂太祖別子始爵者雖非別子始爵者亦是謂太祖必始爵未嘗謂宗子必有爵也蓋別子始爵者

及非別子而始爵者其得爲太祖也定於其身其爲廟也立於其子自是以後其世適爲大夫爲適士與

得立祖廟禰廟喪服小記正義宗子有太祖者不立曾祖廟而此太祖不遷也爲下士與得立禰廟而此太祖不遷也至無能

而列於庶人不得立廟而此太祖廟將廢之乎抑不廢之乎廢之則祖非不遷也宗亦非不遷也不廢則

有百世不遷之宗不必有百世不遷之爵也王制曰大夫不世爵又曰諸侯之大夫不世爵祿正義曰惟

有大功乃得世而太祖不皆有大功也則宗子不皆世爵祿也喪服小記注曰宗子去國以廟從曾子問

謂無去國則位絕仕它國未可必也然必以廟從使舉族而去則猶將宗之也會子問曰宗子有罪居於

它國庶子爲大夫其祭也祝曰孝子某使介子某薦其常事宗子以罪去且然則宗子在國雖失爵猶當

宗之也陳祥道禮書云惟其有疾不肖然後易之故史朝言公孟非人也將不列於宗賀循言奸回淫亂

宗也故曾子問云然又曰宗子去在他國庶子無爵而居者望墓而爲壇以時祭若宗子死告於墓而後祭於家正義

後說宗子稱名不言孝身沒而已注云孝宗子之稱不敢與之同辭至子可以稱孝夫無爵之庶子其子

不必有爵也而稱孝則已代爲宗子也祭於宗子家祖廟稱孝喪服小記又曰庶子不祭禰者明其宗也

注宗子庶子皆爲下士得立禰廟雖庶人亦然正義曰若庶子是下士宗子爲庶人此下士立廟於宗子

之家

曾子問告於墓而後祭于家注云祭于家容無廟正義前說云是祭于庶子之家容宗子之家無廟也宗子所以無廟者宗子無爵不合立廟惠氏棟批云宗子大宗之後安得無廟無廟安得爲宗子

○案宗子無爵當無然則宗子有庶人鄭氏言之孔氏亦言之矣又何子孫祿位不絕方爲大宗及中衰

而復興者不得爲大宗乎哉抑履又有說鄭注大傳別子謂公子若始來在此國者正義始來在此國謂

非君之戚或是異姓謂之別子以其別於在本國不來者據此又似凡始遷者卽爲祖并祖亦不必始爵

也今令甲凡聚族而居者得立始遷祖廟民間爲之宗祠是宗法人人可立凡族之所出之祖或始爵或

始遷立之廟而置之祭產求其世適主之如古大宗禮可也

世適久絕無可立則如今俗主以族長

近人魯氏仕驥爲宗祠

主祭議以有爵者爲主而廢其宗子爲庶人者履曾爲駁議一篇於宗子不必有爵一說尙未詳復因尊

簪發之是否幸不吝往復

履又案大宗百世不遷小宗五世而遷雖有定制然又當有別宗之法如古之諸侯比者起家爲卿大

夫如古之始爵比者賜專祠者從祠文廟及入賢良昭忠名宦鄉賢祠者其子孫皆當世世祀之雖本

支庶得尊爲祖其世適別爲大宗而仍宗其所謂百世不遷之宗此卽大小宗而參其變妄意如此未

知當否 自記

漢梅福云諸侯奪宗謂父爲士庶子封爲諸侯則庶子奪宗嫡主祭祀也

通典禮十二

○案今自親王以下

至公侯伯子男五等爵宜竟依古諸侯之例奪宗

上湯尙書論兼祧服制書

張履

竊見禮部議據例大宗子兼祧小宗小宗子兼祧大宗均服大宗三年爲小宗期小宗子兼祧小宗爲其父三年爲所兼祧期若小宗子後小宗嗣以本宗絕改爲兼祧舊一依爲人後例降其所生今議若未爲所後持重服宜還服其父三年惟己爲所後服重則爲其父宜期禮不貳斬履愚竊以爲禮不貳斬爲支子後大宗者言非爲今之後小宗而還承本宗者言議者之說猶爲未盡也禮爲人後者爲其父母期傳曰何以期也不貳斬也何以不貳斬也持重於大宗者降其小宗也爲人後者孰後後大宗也又曰大宗者收族者也不可以絕故族人以支子後之適子不得後大宗然則不貳斬者爲支子後大宗者言也今法目長子支子爲大小宗在古皆屬小宗而兼祧之與爲人後也又異爲人後者重在所後兼祧者重在所生惟小宗兼祧大宗則大宗重耳今以小宗後小宗本宗絕己還本宗其爲兼祧仍以此兼彼非以彼兼此重在所生而輕在所兼雖已重所輕者於前要不得輕所重者於後今以還承本宗之宜重而不使得與爲人後者比是輕重失倫也以今後小宗而還承本宗而執古支子後大宗之不貳斬是名實違異

也蓋不貳斬者緣義有輕重非爲並隆者言也並隆則並斬子爲父臣爲君父爲長子

喪服傳女子一適人者下疏云丈夫

容有貳斬故有爲長子皆斬

近則子爲母爲繼母是也非獨此也婦人亦有貳斬禮女子已嫁者爲其父母期傳曰婦

人不貳斬也而賈疏謂天子女嫁諸侯諸侯女嫁大夫爲夫斬仍爲其父母不降是也夫禮非從天降也非從地出也人情而已矣如旣還承本宗而僅同降服遂無人焉爲之重服者人亦安賴有子人子之心又何以安焉且古者小宗無後絕今則有以大宗後小宗者矣使大宗絕而還承將亦謂已爲所後服重而不爲所生大宗斬耶大宗禮不可絕雖孤不嫌爲後將孤子已服父斬而後後大宗亦不爲所後大宗斬耶故有未及爲所後持服亦不得爲所生服重者所以明爲人後之義也有已爲所後持服亦必爲所生服重者所以明還承本宗之義也然則爲母如之何曰母猶父也其爲所後母已服斬無論未服則爲之期可也此係禮制之重而夫子方以事出使未得主議故不揣鄙陋獻其瞽說如此是否伏俟斟酌

又見禮官議引刑部則例爲人後者之子孫於本生親屬祇論所後宗親屬服制獨子兼祧非出繼比獨子之子專承別房者仍依爲人後禮爲本親降一等至其子孫爲本親宜一如刑部例履謂如此則所後在五服之外身爲父母服期而其子遂卽無服矣按禮爲人後者其妻爲舅姑大功舅姑義服且不再降豈祖之正服而再降

用王彪之答謝襲書語○鄭注以不貳降釋文降一本作隆校勘記云考文引宋本作隆衛氏集說同盧云宋本作隆是也案王彪之在唐以前引

作不二降而其說如此是所見本作降惟注意似謂以不貳故降非作不再降解而不再降之義固經旨中所具蓋爲人後或在五服外而妻爲舅姑定以大功非不再降而何 且至於絕爲人後者與女子子之嫁者同以出降女子子嫁他族其子猶爲母黨服豈爲同宗後者其子反不得爲本親服○且古者族人爲宗子齊衰三月使出後者之子繼爲宗子其祖當以宗子服服其孫豈孫獨不服其祖竊以爲人後者之子孫爲其本親禮雖無明文要卽統於爲人後者從降一等禮官引例似所未安或謂五服之親有犯刑以服定旣重所後不絕本親則罪名兩重恐非恤刑之意履謂刑以弼禮禮非以徇刑恐刑之重而預輕其禮則禮適以啟人犯刑也刑適以啟人犯禮也刑禮兩乖進退失據鄙見如此乞並賜裁酌

答陳仲虎爲小宗殤後宜還服本生書

張履

承示貴邑廩生某丁本生憂學師欲其開缺詳某爲殤後未曾服斬今本生子已亡不應無重服之人請令某持三年服而尊意謂次房子嗣長房而本生絕或以孫承長房身自歸宗或以所生次子還承本生今某之本生有孫承重服斬未便禁其降服惟降服期當與服官一例開缺而据學政全書無開缺例以是疑履愚竊謂閣下所疑是也至謂某之當降服似有可商不自揆淺陋輒抒鄙見幸大雅裁之蓋立後者宗法也宗法明而後服制之輕重可得而徐辨案古惟世適爲大宗餘自高祖以下之適並爲小宗今

則概目長子爲大宗是大宗之名與古同而小宗之實與古異也古惟大宗立後小宗無後則絕今則長

房必立後一依古持重大宗之例降其本生

爲次房立後亦如此尤非禮不復論

是立後之義又與古異也然世俗之所行

功令之所許沿襲已久良難遽正則既爲之後雖本生絕身亦不得歸宗或兼承其祧或以次子還承無

不可者若本生不絕則固降服無疑也雖然此固爲後成人者言之若爲殤後則又有說禮殤無爲人父

之道曾子問云宗子爲殤而死庶子弗爲後也注云族人以其倫代之是也小記云丈夫冠而不爲殤爲

殤後者以其服服之謂在殤而蚤冠爲之後者卽服以三年之服

此從吳澄陳灝說

所謂爲人後者爲之子是也

是則古之殤不殤立後不立後繫乎冠與未冠

古及冠之期必冠故此專指年未及冠者

今俗冠禮行於昏而律未昏不立後

惟陳亡及聘妻守志者得立後又獨子天亡而族中實無昭穆相當可爲其父之繼者方準爲未昏之子立後

是今之殤不殤立後不立後繫乎昏與未昏

殤不

乎昏與未昏是指年未冠者立後不立後繫乎昏與未昏是兼指年已逾冠者

則試據古法之大小宗權之其爲大宗與

謂世適

雖未及冠之年而

既冠且昏立後宜也已及冠之年而未冠未昏立後亦宜也

今既因昏而冠則冠或因昏而遲要當以冠之年爲斷

其爲小宗與

謂長

房○若父在并不得謂之小宗

未及冠之年而既冠且昏立後可也卽踰冠之年而未冠未昏不立後可也

小宗則當以昏不昏爲斷

今某之爲殤後豈世適大宗當如小記所云以其服服之者耶殆亦小宗之殤未冠未昏日月已過待其

弟之子生而爲之後者也此於禮與律並不當立後爲之後者過然則爲本生之降服與否亦從可以意

斷矣爲大宗後也者雖未及爲所後重服亦不得爲本生之無後者服斬卽爲殤後亦然以承宗子祭祀之重不得顧其私親也爲小宗後也者苟未及爲所後重服且當爲本生之有後者服斬誤爲殤後者又不待言以與持重大宗者異不得薄其本親也然則如某者揆諸情禮本生雖有後直當爲之服斬今學師欲爲之開缺而徒以本生無人服斬爲辭某又不自請爲本生服斬而待學師之詭詳其意各有所爲不僅禮教之不明已也閣下以爲何如民間一子承雙祧兩家各爲娶妻並爲正室此豈禮之所有某身任部曹而下同草野之俗以瀆夫婦之倫閣下議之誠是案嘉慶十九年禮部議及常州劉禮部逢祿禮無二適議辨之已詳謹錄以奉覽

再答仲虎書

張履

前奉答廩生某誤爲小宗殤後當還爲本生之有後者服斬來書未蒙駁難想不以爲謬也又承問貴鄉長沙太守之伯祖有子某年逾冠未昏以不才被逐不知所終太守爲伯祖後服重古有以孫後祖者然功令三代不能無父故仍以某爲父旣請封所後祖因並封其所父而以本身之封貤封其本生本生自有後太守當仍請歸宗爲本生服斬否乎又云某雖逾冠而未昏旣以昏不昏斷殤不殤則某仍爲殤太守雖爲祖後並爲殤後似當還服本生斬矣然某旣邀封典今太守又歸宗以奪其嗣是某旣爲父逐又

爲其父所後之孫遂將有衛輒以子拒父之嫌履案某非殤也然父之而請封非也而太守固不當歸宗服本生斬也曷言乎某非殤也蓋鄙人所謂古之殤不殤繫乎冠不冠今之殤不殤繫乎昏不昏者據年未及冠者言之也若年已逾冠雖未昏不爲殤故曰某非殤曷言乎父之而請封非也今律未昏不立後則某雖非殤而實同於殤況又以不才被逐不知所終乎崩殯實生輒靈雖不子其子輒不可不父其父若太守之於某非其所生不得以崩殯比太守爲伯祖後而功令三代不能無父則當據實請於有司有司不能決則當咨於部部議當依古間代立後法直以從孫繼伯祖而闕其父其官而請封也例封及祖則兼封本生封不及祖亦以爲人後者爲之子之義變例以封其祖而以本身之封貶封本生斯爲得之今乃以未昏被逐不知所終之某爲父謂他人父可如是其苟且乎而又爲之請封 朝廷之 恩典可如是其濫邀乎且幸太守官高封得及祖耳假令封不及祖將遺其爲後服重之祖而顧加於未昏被逐不知所終之某揆諸情禮不已僨乎故曰父之而請封非曷言乎太守之不得歸宗服本生斬也據喪禮爲人後者爲其父母期雷氏次宗云不言所後之父以其所後父或蚤卒今所後者或後祖父或後曾祖父來諭謂古有以孫後祖是也然則太守旣爲伯祖後卽所謂爲人後者旣爲伯祖後而服重卽所謂持重於大宗降其小宗者

今旣概目長子爲大宗伯祖雖非世適亦如此

本生無後亦當依今兼承祧爲小宗服期之例況本生固

有後乎故曰太守不得歸宗服本生軒且服本生斬亦與歸宗不同歸宗者去其所後而歸本宗服本生斬者所後非世適大宗苟未及爲重服則還爲本生服斬以盡其情如前書所云非必歸宗也太守固不當還服斬者非獨不得歸宗已也或曰然則三代以某爲父其籍在官且請封矣是可以更正乎曰此非鄙人所敢議也論其禮之失及不當還服斬而已閣下以爲何如來諭又云一子承兩祧不得並娶禮制昭然豪無疑矣若支子嗣支子原娶卒無子無力更娶本支欲廣嗣育爲續娶可乎以爲並娶而所娶既卒則無並娶之嫌矣以爲止宜納妾而所娶既卒則不必守納妾之條矣續娶生二子一爲本支後又以一爲承嗣支後爲承嗣支後者固以前母爲母矣其爲本支後者將亦以爲前母乎子封典及之乎不以爲前母則不當封以爲父之前妻則當封夫封典及續娶乎非妾則當給封非承嗣支所娶則不當封兩門並娶先後不同時與部文微異禮有疑焉履按無嫌並娶及不必守納妾之條固已若謂非承嗣支所娶而夫之封典不之及則似不然何則妻之義從夫未有夫屬彼支而妻得獨屬本支者也故原娶而在也本支但可爲之納妾而不可爲之娶妻原娶而卒也本支雖可爲之續娶而不可使自別於夫續娶所生子還爲本支後者以父前妻爲前母與否當先問此子仍以所生爲父乎抑別以本支之世叔父爲父乎仍以所生爲父則父前妻固卽前母也若別以世叔父爲父則卽同出後之義而以其父爲本生父母

爲本生母父之前妻爲本生前母封典之不得先及又豈獨前母乎然以義度之則固當以所生爲父何以言之假令本支之世叔父而無子則當父其世叔父以祖其本生祖世叔父而自有子則雖還承其本生祖而仍當父其出後之父今本支但以欲廣嗣育之故爲出後之子續娶而以其所生之子歸宗是本支固未嘗絕也歸宗之子仍當繫於出後之父明也此又於來書之外推說之如此幸有以正之抑鄙人有臆見古者小宗無後絕今槩曰長子爲大宗爲之立後又有爲支子後者又有以長子之子後支子者此古所無也又小宗子兼承大宗祧者爲大宗服斬爲小宗期大宗子兼承小宗祧小宗子兼承小宗祧者並爲本生服斬爲所兼承之小宗期似斟酌盡善矣而所謂大宗要非古之大宗也鄙人前書所謂今既曰長子爲大宗則爲之後者本生雖絕身亦不得歸宗或兼承其祧或以次子還承又謂爲之後者苟未及爲重服且當爲本生之有後者服斬及此書所謂既爲伯祖後而重服則不得還服本生斬而封典先及伯祖支子嗣支子所生子還宗苟本支之世叔父無子卽當父其世叔父云云猶皆徇今爲說竊意小宗無後絕之義斷不能行於今而持重大宗降其小宗之禮亦斷不可冒乎古除世適大宗當一如禮經而外凡今所謂爲大宗後爲小宗後又凡所謂小宗子兼承大宗祧大宗子兼承小宗祧小宗子兼承小宗祧者當槩爲本生服斬爲所後所兼承者期而爲所後及所兼承大宗者之期宜爲之杖禪丁憂以

異夫凡爲旁期者其官而請封也槩先及本生而以本身之封貤封其所後所兼承三代直書本生爲父而兼書所後所兼承之大宗爲嗣父大宗子兼承小宗及小宗子兼承小宗者三代籍貫本不以所兼承之小宗爲父若本生絕則出後者槩行歸宗而以所生子後之亦仍以本爲重惟自幼被撫養以至成立者則爲所後服重而降其本生如此方爲義之至當而惜乎世必不能行也閣下通儒請更以質之是否幸不吝往復

劉端臨遺書喪服小記爲慈母後者案爲妾母後者賀瑒曰雖有子道服於慈母三年而猶爲己母不異異於後大宗而降本也愚謂今世爲人後者不必皆大宗而輕降其父母之服甚無謂也當準此例雖爲後不降本生庶合禮意

復宗法議

馮桂芬

三代之法井田封建一廢不可復後人頗有議復之者竊以爲復井田封建不如復宗法宗法者佐國家養民教民之原本也天下之亂民非生而爲亂民也不養不教有以致之牧令有養教之責所謂養不能解衣推食所謂教不能家至戶到尊而不親廣而不切父兄親矣切矣或無父無兄或父兄不才民於是乎失所依惟立爲宗子以養之教之則牧令所不能治者宗子能治之牧令遠而宗子近也父兄所不能教者宗子能教之父兄多從寬而宗子可從嚴也宗法實能彌乎牧令父兄之隙者也詩曰君之宗之

公劉立國之始卽以君與宗並重左氏傳晉執戎蠻子以畀楚楚司馬致邑立宗焉以誘其遺民正與公劉詩相表裏蓋君民以人合宗族以天合人合者必藉天合以維繫之而其合也彌固嬴政并天下始與井田封建俱廢秦亡之後叔孫通等陋儒不知治本坐令古良法美意浸淫漸滅不可復故漢初知徙大姓借其財力實邊實陵邑而不知復宗法魏晉知立圖譜局而不知復宗法唐重門第至以宰相領圖譜事而不知復宗法惟宋范文正創爲義莊今世踵行者列於旌典又令甲長子沒必立承重孫二事頗得宗法遺意自可因勢利導爲推廣義莊之令有一姓卽立一莊爲薦饗合食治事之地莊制分立養老室恤嫠室育嬰室凡族之寡孤獨入焉讀書室無力從師者入焉養病室篤疾者入焉又立嚴教室不肖子弟入焉立一宗子復古禮宗子死族人爲之服齊衰三月其母妻死亦然以重其事又有宗婦死夫雖之長子死爲之斬衰三年則駭俗不可行矣名之曰族正副之以族約桂林陳文恭公議○公於乾隆中年撫江西有此令未及成而去繼之者以他獄連及祠戶遂一律毀祠追譜與公意正相反族正以貴貴爲主安陽許三禮議先進士次舉貢生監貴同則長長同則序齒無貴者或長長或賢賢族約以賢賢爲主皆由合族公舉如今義莊主奉法無力建莊者假廟寺爲之嫁娶喪葬以告入塾習業以告應試以告游學經商以告分居徙居置產斥產以告有孝弟節烈或敗行以告一切有事於官府以告無力者隨事資之一莊以千人爲限逾千人者分一支莊增一族約單門若稀姓若流寓有力者亦許

立莊無力者擇所附如吳則同出泰伯之類又如昌黎所謂何與韓同姓爲近之類無可附者則合數百人爲一總莊亦領以莊正莊約期於億萬戶皆有所隸而止周禮宗以族得民賅詞也有謂庶人無宗者非是前人已辨之立莊之後敦勸集資令經費充贍另議永停捐例惟存民爵正可爲獎勵立莊之用夫宗法旣爲養民教民之原本其有功於國家甚大膺茲上賞不爲過也竊以爲今天下之大患有可以宗法弭之者不一端一宗法行而盜賊可不作人性本善孰不知廉恥孰不畏刑罰盜賊之甘於扞法網者迫於饑寒而已宗法旣行民無饑寒自重犯法大傳云愛百姓故刑罰中顧氏炎武爲之說曰天下之宗子各治其族罔攸兼於庶獄而民自不犯於有司又云庶民安故財用足顧氏曰收族之法行而歲時有台食之恩吉凶有通財之義本俗六安萬民三曰聯兄弟六行之條曰睦曰恤不待王政之施而鰥寡孤獨廢疾者皆有所養矣此物此志也一宗法行而邪教可不作宗法之善在有餘則歸之宗不足則資之宗邪教之宗旨大都竊此二語以聚無賴之民始則濟其不足終則括其有餘鄉愚無知徂目前之利陷於畔逆而不之悟宗法旣行誰不願以其從教主者從宗子哉一宗法行而爭訟械鬪之事可不作今山東山西江西安徽福建廣東等省民多聚族而居強宗豪族桀黠之徒往往結黨呼羣橫行鄉里小則糾訟

乾隆中江西諸大族多互訟輒釀大獄巡撫輔德至疏請禁止毀祠追譜可謂因噎廢食大則械鬪閩廣最多爲害甚鉅皆其族之不肖者號召近來尤甚

之夫一族中豈無賢者無權無責閉戶不與聞而已宗法既行則賢者有權有責君子道長小人道消卽有一二不肖者何難以家法治之哉一宗法行而保甲社倉團練一切之事可行宗法以人人有所隸爲主是億萬戶固已若網在綱條分縷析於是以保甲爲經宗法爲緯一經一緯參稽互考常則社倉易於釀資變則團練易於合力論者謂三代以上之民聚三代以下之民散散者聚之必先聚之於家然後可聚之於國宗法爲先者聚之於家也保甲爲後者聚之於國也彼商鞅什伍連坐之法亦其時同并未盡離宗法未盡壞之證如後世之民無常居五方雜處比鄰或不相識顧欲與以連坐鞅雖酷亦勢不可行鞅借宗法以行其令而卽廢宗法小人舉動往往如此今保甲諸法之不行者以無宗法爲之先也尙書黎民於變時雍始於親九族詩以關雎麟趾爲王化之始孟子人人親其親長其長而天下平大學家齊而后國治國治而后天下平天子自齊其一家爲治平之始億萬姓各齊其億萬家爲治平之終而已矣

宋濮議論

張錫恭

宋英宗以濮安懿王子入繼仁宗不爲濮王立廟京師稱親而不稱帝酌尊尊親親之中應經義而協典禮此固英宗之盛德亦由中書持議之正也按禮經喪服斬衰三年章爲人後者傳曰何以三年也受重者必以尊服服之蓋全乎尊尊也齊衰不杖期章爲人後者爲其父母報傳曰不貳斬也持重於大宗者

降其小宗也蓋以不貳斬者全所後之尊尊而以稱父母者不沒所生之親親也喪服傳又曰昆弟之子何以亦期也旁尊也不足以加尊焉故報之也然則其父母之報之者蓋亦以旁尊自處雖存父母之名而不分所後者之尊也先王制禮之意其微矣哉英宗之於濮王也不於京師立廟蓋以己禰仁宗不得復禰濮王卽傳所謂持重於大宗降其小宗之義也卽園立廟令王子孫奉祠而已不與祭焉蓋推濮王之心旁尊不足加尊且以專奉祭之誠於仁宗也太后詔濮王宜稱皇三夫人宜稱后而英宗辭免則又非漢諸帝所及何論明世宗哉當是時主此議者魏公亮公然此數事者亦無以異於溫公尊無二上之議也中書爲臺諫集矢者稱親一事而已夫固其父母也不立廟不與祭不追尊則尊尊之義旣不分施於彼矣而必沒親親之恩使不得稱爲父母非惟典禮無據亦非人情所安以人情所難安強天子以必爲激則變矣曾魏公亮公而爲此乎且禮經爲其父母之降服何爲也哉向使父母之名可沒則降服亦不必制善乎曾子固之言曰爲人後者不必皆親昆弟之子族人同宗者皆可爲之使當從所後者爲屬爲服則於其父母有宜爲大功爲小功爲緦麻爲袒免爲無服眞者矣而聖人制禮皆爲其父母期使足以明所後者重而已非遂以爲當變其親也親非變則名固不可得而易矣子固發明禮經親親之意甚詳且盡亦當日中書之議所未申者哉夫中書於濮議親親與尊尊可謂並行不悖矣而或以英宗稱

親謂爲貳本干統不識英宗所貳所干者安在乎竟公濮議惟漢魏五君篇其言偏激而失當其他皆酌尊親之宜而無大拂乎經義者此所以能與魏公成英宗之盛舉歟

濂溪大宗支裔零陵青山周氏譜序

宗稷辰

今天下明德之後莫盛於山東孔顏曾孟四子繼四氏而興其盛相埒者惟濂溪氏之宗耳續辰鄉在江浙閒見周氏多祖濂溪詢之皆派出道國公長嗣及前歲修永州郡志撰世家道州五經博士承宗以濂溪志來讀之知大宗從官他徙以小宗嫡裔爲後世其官祿故其譜詳小宗而略大宗初未知大宗仍有居楚壤者今年夏零陵青山周氏士琦戒溢兩茂才持其宗譜至濂溪書院請匡其謬誤且爲之序按其系始隨息國公歸仁爲一世祖四傳至道州參軍如錫又十二傳至道國公皆居道州道國移家江州長孫廣昌令虞仲遷泰和元孫汀州丞時泰省墓舂陵遭南宋兵亂禦寇臨武及歸留妻子居之自此八傳至元時支孫名九十一者始分遷零陵之青山爲始遷祖自息國至青山爲世二十有九自道國至青山爲世十有二廣昌汀州實爲道國大宗青山以上則皆支子也然則濂溪大宗一派固亦蕃衍於舊邦昔之謂大宗在江左右者猶所見之未廣矣夫世之談譜學者大都如推源忠孝侈陳勛閥勛閥與時盛衰君子所弗尙若忠孝之子孫誠貴矣然究不如聖賢之家貫古今而不敝人幸而爲聖賢遺胄天地之所

佑相山川之所降鍾分枝析葉於深巖絕阻之鄉而元氣深厚其生無窮非徒恃流澤長而食福永也宜奮然緝其家學篤行敬宗以嗣前哲之休美將見譜學明而宗法可行宗法行而三代之禮教可復也茂才纂修是譜庸但以出濂溪爲榮其諸繼承之責必因是而重任之豈可作尋常族譜觀哉以宗法論之濂溪之小宗世爲後承大宗之事卽爲大宗大宗流轉天下其宗孔蕃惟世居江州守道國墓者分最尊爲世居濂溪之亞其餘各守其遷祖之墓雖大宗夷於支庶自不得執長次爲等然其先固大宗也今不得復爲大宗亦不得稱爲小宗故定其宗曰大宗支裔也今禮先聖先賢子孫世官之外其有遷居別祠者許奏舉宗長一人世奉其祀零陵自宋以來故有濂溪專祠視私祠較重青山之宗祀此爲合他日大夫師長引禮以修祀典錄賢裔其肇基此譜乎若夫孝弟忠信之大端道國所得於孔顏曾孟以教萬世者爾宗人敬聽而服行之優優乎其備矣續辰不敏又何述焉

郭氏族譜序

楊彝珍

昔蘇明允爲族譜引云情見於親親見於服無服則親盡親盡則相視如途人幸其未至於途人也使之無至於忽忘焉此譜之所爲作也意蓋謂以一人之身分而爲兄弟又分而爲兄弟之子再遞分而衍爲不可紀極之支屬其中豐悴不齊勢每播遷散處多茫然不能悉其世次遂至喜不慶憂不弔且不惟喜

不慶憂不弔或因睚眦之釁積不相能卽劊刃於其腹中而其怨毒猶不可解何天性至於是之忍哉蓋由服屬蕃則勢日離情日疎常不得綢繆相浹洽復用苟道以各營其私故忍而至於斯極也由是言之則欲維繫畔散乖異之情莫若爲之譜以紀其世繫使之日取而省覽焉知若者爲昭屬若者爲穆屬等而上溯之其初皆一人之身也以一人之身循其趾至頂少有所創則痛必徹心其全體亦皆爲不適若欲引刃以自殘其肢體是雖獷悍猛勇如賁育成軻之徒有斷然不忍爲此者匪惟不忍爲此苟猝遇水火盜賊之變與夫猛鷲毒螫之戾近於前無不亟引手捍蔽之使無災及其體也然等體也豈愛同體不如愛其體哉故曰觀於譜而孝弟之心油然而生者謂此也桃邑郭氏久爲方雅之族其蘭生孝廉又族望也夙慨末俗宗法之敝嘗以輯睦之義勉其宗人茲因修家譜成問序於余余因取明允之旨發明之以弁於首使郭氏之宗人覽之益當油然而生孝弟之心也

南邑唐氏續修族譜序

葛學禮

張堅
填諱

南邑唐氏之有族譜也始於乾隆乙亥成於庚辰補於壬午言不崇華事必據實具見於鄉先達序文中同治建元之三年其所譜始祖之十二世孫善培以七十二歲之老諸生當兵燹之餘續而修之而請序於余余惟譜所以收族續修之志與勦始同而所遭有難焉者然此猶一人一家之事無庸余言也夫自

周道衰而姓氏不講庶姓別於上而戚單於下有世數未遠而通昏姻者矣文中子云任薛王劉霍盧爲昏非古也何以視譜夫任薛同出黃帝王劉同出唐堯霍盧同爲姜姓則氏別而姓同者爲昏古人猶非之況姓氏俱同而可相與爲偶邪取妻不取同姓禮有明文律有大禁而或且貿貿以犯之甚至有讀書能文章而亦躬蹈此失者彼蓋意先世非同出耳使家有一譜而以時修之以時視之豈復有此失邪若夫合族屬治際會長幼有恩親疏有別此尤視譜者所當知而無俟余言者也然則族譜之修其有關於世道豈不大哉余故不辭而爲之序

書賈丈湖山展墓圖記後

葛學禮

張堅填諱

周官大司徒以本俗六安萬民二曰族墳墓孟子之論井地亦曰死徙無出鄉夫同宗者生相近死相迫故太宰以九兩繫邦國之民有曰宗以族得民而亭林顧氏以爲宗法之存所以扶人紀而張國勢也若唐河中解之柳聞喜之裴皆歷任數百年冠裳不絕汾陰之薛憑河自保於石虎符堅割據之際而未嘗一仕其朝猗氏之樊王舉義兵以抗高歡之衆此非三代之法猶存而其人之賢者又率之以保家亢宗之道何以能久而不衰若是自唐之亡而譜牒與之俱盡至於五代之季大族高門降爲皂隸靖康之變無一家能相統帥以自保者蓋由上之人不能復封建之治而又不重氏族故也夫封建之不可復不待

經世文編

言上欲重氏族而不能以禮教使士大夫家冠昏喪祭人倫日用之間咸遵定則而無有踰越以倡庶人而成禮俗則奢儉貞淫各行其意雖有賢者力明禮法而乖忤末俗易致族人之疑甚或憎其異已反援無稽之說以相詰難張衆盛之勢以相劫制使之心孤自遠而後已如是則氏族逾大爲害於風俗亦逾大而氏族亦何益於人國哉且北方土重而氣厚南人則輕而易散苟無禮義以壹其好尙固其心志雖一姓數十百人里居相望臨事則各去而不相顧耳何則賢者旣多貧力不足以相及富者又多庸識不足以相統故也雖然散者時也勢也散而不忘聚者情也性也記曰樂樂其所自生禮不忘其本蓋先王制禮之初實因人情之不忘其本故唐以前之禮俗雖不復見而水源木本之思往往發於牽車服賈之子況嘗學問知義理者乎同邑賈丈雲階其先世本浙西之錢塘人自家於海上以貧不省湖上墓者三世矣往歲余表兄王君慶勳攝嚴郡篆會試事引君自助旣過武林省墓遂繪圖作記而寄示余於海曲余今之無家可歸者也爲書其後如此

咨湖南撫院

咸豐七年

胡林翼

例載無子承繼先儘同父周親次及大功小功總麻如俱無許立遠房爲嗣又無子立嗣擇立賢能及所親愛者若於昭穆倫序不失不許宗族指以次序告爭又無子立嗣族中勒令承繼以致涉訟者地方官

立卽懲治仍將所擇賢愛之人斷令立繼又道光九年禮部通行內開大宗子可承祧小宗小宗子可兼祧大宗各等語此特爲尋常立繼而設若係軍營陣亡尤應原情酌辦副將銜儘先叅將驍勇巴圖魯周清元前因克復省城受傷身死本部院專摺請卹奉 硃批照副將陣亡例議卹摺內聲明伊兄千總周敦厚已爲撫立一子取名繼熊是周清元立繼之事業經上呈 天聽況久立功勳打仗陣亡之大員自以其胞兄周敦厚及其妻周柳氏之所擇立爲斷豈容親族妄生覬覦現聞其族人爭繼等情實屬刁詐卑鄙夫男子之承繼猶女子之出嫁設女子自欲嫁人必爲人所恥笑況軍營陣亡無論已未成婚按例均應立後卽如嘉慶年間提督李壯烈伯陣亡後異姓撫養子爲李提督夫婦所鍾愛奉 旨特准撫立爲子可見陣亡之承繼應以其夫婦所鍾愛者爲定不准外人干預查詢周清元之妻柳氏稱立夫堂兄周家明之子繼熊爲嗣立有承祧字據並無願立周南汀兒子爲嗣之語則周繼熊自係周柳氏擇定賢愛之人核與昭穆倫序不失其卽持服承襲世職以符奏案而杜爭端並將原存銀三百一十一兩七錢及現送來銀五百六十七兩又本部院另籌銀一百兩共計六百六十七兩擇傳公正紳耆代置田產明晰立案并祈嚴飭湘陰縣將周南汀爭繼之案嚴行懲處俾令周柳氏撫孤守節以慰忠魂而垂久遠

提督出後異姓疏

曾國藩

再江南提督李朝斌本姓王氏襁褓中爲李氏父母撫養教育至於成立迭遭艱虞王氏本生父母隔絕不相聞問李朝斌初不自知爲王氏所生也本年三月間有善化縣人王正儒來臣處稟稱李朝斌係所生子自幼育於李氏請飭復姓歸宗等語臣當卽詢之李朝斌究竟是否有因李朝斌茫然不解卽寄書至家詢其族叔李傳成等始據詳告顛末蓋李朝斌未生以前王氏本生父母已有子三人世俗之見以多子爲累王正儒與李朝斌之父相識故指腹訂定墮地後卽任聽李氏攜去王氏父母固已棄之如遺也事隔四十三年忽有呈請復姓之議李氏族人謂王氏恩誼已斷寄書詳論極陳不應歸宗之義其言亦頗中肯臣覆加查核此事關係綱常名義未可憑空臆斷查本朝言禮之書尙書秦蕙田所纂五禮通考最爲精核其於異姓爲後之事反復辨論一以原情爲主所引金史張詩一事詩本李氏子育於張氏閱三十年始知之初議歸宗終以張氏無子遂仍其舊秦蕙田稱張詩爲孝今王氏本生之父母有子三人而李氏撫養之父母別無立後正與張詩之事相類伏查定例出嗣之子歸宗亦以所繼父母有無子嗣爲斷若令李朝斌歸宗則在王氏本生之父母不過於三子之外又增一子而在李氏撫養之父母竟至斬焉不祀撫子者必抱恫於九泉爲子者將難安於畢世核諸古禮參以今律李朝斌應於李氏別爲一家但後其撫育之父母而不祭其以上之祖宗於王氏則不通婚姻一以報顧復之深恩一以別族

屬之大義其於王氏之父母則未盡教養自難責以子道該提督天性肫摯未忍自決臣爲之參酌定議
詳晰批示遍諮宗人情義既可兼盡衆論亦已僉同惟以提督大員異姓爲後必應奏明立案以昭鄭重
而垂久遠用敢詳陳本末上達 宸聽

據情代 奏疏

禮部尙書 靈 桂

據前任工部尙書李鴻藻呈稱竊鴻藻之父兄弟三人本生父爲長房嗣父爲三房鴻藻胞兄一人緣嗣
父自幼痼疾多年不痊嗣母過門未久嗣父旋即病故本生父母因命鴻藻出繼爲嗣本房胞兄既壯病
歿無子以鴻藻長子兆瀛還爲本房胞兄後以奉大宗咸豐五年本生父病故時有兆瀛爲承重孫故鴻
藻遵例降服期年同治五年嗣母姚氏病故遵例制服三年不幸迭遭鞠凶本年九月十三日本生母姚
氏病故 隆恩褒奠存沒銜結爲長子兆瀛先於同治九年既娶而天又無子息長支承重遂無人鴻藻
現雖有次子焜瀛若令其再繼長房則兩嫡並立既無以處冢婦若爲兆瀛立嗣俾作承重曾孫則五服
之內猝無倫序相當之人痛念本生母溘然棄養抱恨終天若使鴻藻拘守降服之文則是本生母身後
竟無一制喪三年之人有子有孫而與無子同既爲情之所萬萬不安且本生實係長房目前之喪主既
闕日後之祭主亦虛厚小宗而薄大宗尤爲義之所萬萬不可泣血椎心焦灼無計伏思 本朝定例原

許一子雙祧查禮部則例內載長房兼承次房爲其所生父母丁憂三年於兼承宗祧之父母持服期年學政全書內載嘉慶十六年禮部議準長房獨子出繼次房者大宗爲重於長房本生父母自當持服三年又載例準一人承祧兩房亦應俟生有多子始分嗣兩房爲似續之計各等語揆情論事正與鴻藻今日所處之境相同在當日原係專嗣三房而今日本支無人則不得不歸大宗而爲兼祧在當日有胞兄而今日兄故姪亡無人承重則昔日爲次子而今爲獨子惟有縷晰聲明願作爲長房三房兼祧竊擬援據禮部則例並比照學政全書各例案爲本生母姚氏持服三年至嗣父母已故在前均服三年其時因大宗承重有人並無妨礙俟日後次子焜瀛得有子息再行出嗣兆瀛以繼胞兄之後庶幾此時母殯有主喪之子異日兄支亦有繼續之孫反諸寸心稍可自盡惟情事紛歧與成例成案皆係意合跡異不得不呈明辦理伏懇據情代奏等情到部謹抄錄原呈恭呈 御覽伏候 訓示遵行

已故大員請準令擇立賢愛疏

光緒十一年

盛京將軍 慶裕

竊查原任大學士文祥之子籤分 盛京戶部員外郎世襲騎都尉熙治於光緒十年五月十一日病故其妻瓜爾佳趙氏於六月間結稱氏夫並未生子亦無同胞兄弟嫡堂兄凱肇凱元均已去世伊二人僅遺一子尙有氏之胞孀母在堂例應承重惟同曾祖從堂兄卓麟之子瑞昌乃氏夫妻素所親愛謹照擇

賢擇愛之例將瑞昌過繼爲嗣以承宗祧而襲世職並據卓麟結同前因該佐領取具各甘結加具印結並聲明伊等係盛京正紅旗滿洲德恆佐領下人由該協領轉呈經奴才等咨行戶部查核辦理嗣准戶部咨稱本部辦理族人繼嗣案件如有世襲者向由各該處繪畫襲官印譜送部今此案並未繪譜該署協領景祥亦未出具印結再查瑞昌係屬獨子是否情願承祀兩房文結內又未聲叙至伊嫡堂兄凱肇凱元僅有一子係何名字曾否與結內列名畫押本部無從查核行文咨查到奉當經轉飭遵照嗣據該協領呈稱據孀婦瓜爾佳趙氏呈稱嫡堂兄凱肇凱元均已去世僅有一子取名英華現年八歲氏之孀母在堂例應承重惟有同曾祖從堂兄卓麟之子瑞昌現年十歲乃氏夫妻素所親愛情願照依擇賢擇愛之例將瑞昌過繼爲嗣前已呈請在案茲查氏從堂兄卓麟尙在中年且現有胞弟二人不致乏嗣情願將伊子瑞昌過繼爲嗣並非承祧兩房實無鑽營圖謀情弊復據卓麟以前情來案呈明族長永祥等亦遞到聯名押結惟英華一名下未畫花押正在傳喚間卽據凱肇之妻瓜爾佳宗室氏呈稱嫡堂弟熙治乏嗣前經族長永祥調處過繼卓麟之子瑞昌爲嗣氏未敢畫花押現聞到部覆查氏不敢瞞匿氏子英華現年八歲情願出繼嫡堂弟熙治名下爲嗣專承長房等語旋據瓜爾佳趙氏以擇賢擇愛將瑞昌過繼爲嗣並非族長永祥等調處過繼等情遣抱呈明並據文祥之親女喜他拉瓜爾佳氏遣抱申

訴並聲明胞弟婦瓜爾佳趙氏患病危篤勢甚增劇不能執筆畫押囑令該氏代畫等語奴才等伏查原任大學士文祥之子熙治病故無嗣亦無同胞弟兄其嫡堂兄凱肇之子英華雖係近支惟凱肇與其弟凱元現均病故兩門只此一子祖母在堂尙須承重本非可以出繼之人且凱肇凱元曾經文祥將祖遺家產全給承領並將自置產業分給一半又分給現銀一萬兩相待極爲優厚迨文祥病故後凱肇因伊弟凱元病故遂唆令凱元之妻倭氏向熙治索取銀五千兩光緒四年間經前署將軍崇厚據實 奏奉 上諭將凱肇革職追繳始據將銀繳還出具永不滋擾甘結與熙治已成嫌隙熙治之妻瓜爾佳趙氏不願過繼伊子呈內雖未明言而爲難情形亦可想見卓麟之子瑞昌爲熙治之從堂姪雖較之英華支派稍遠惟瑞昌爲熙治夫婦素所鍾愛其本生父卓麟亦願出繼且卓麟尙在中年又有胞弟二人無虞其乏嗣查例載無子立嗣若應繼之人平日先有嫌隙則於昭穆相當親族內擇賢擇愛聽從其便於族中希圖財產勒令承繼或恣意擇繼以致涉訟者地方官立即懲治仍將所擇賢愛之人斷令立繼等語是瓜爾佳趙氏之願繼瑞昌不繼英華原與定例相符且族長永祥等均已具供畫押惟因案關世職經戶部行文咨查而凱肇之妻瓜爾佳宗室氏不令伊子英華畫押以致瓜爾佳趙氏迄今未能立繼現在瓜爾佳趙氏業已病篤此次具呈已不能執筆囑令文祥之女代爲畫押具呈實有岌岌可危之勢若

待英華畫押再行繪譜呈請咨部而英華之母現經爭繼何肯令其出具押結一經提訊輾轉需時瓜爾
佳趙氏病疾垂危萬難久待倘或繼嗣未立而該氏飲恨以歿無以慰孤孀望嗣之志且文祥子亡無後
亦大負 朝廷篤念盡臣之 恩奴才等再四思維實深焦灼惟有籲懇 天恩俯念原任大學士文祥
歷受 四朝恩遇公忠體 國勲著旂常爲我 朝社稷之臣身故後僅遺一子熙治又復病故無嗣孀
媳煢獨無依現因擇立賢愛被族人藉詞爭執往返經年本能辦結該氏命在旦夕待立嗣以瞑目情殊
可憫且卓麟胞兄弟三人尙可生子不致乏嗣合無仰懇 天恩特沛 恩施准令擇立賢愛以卓麟之
子瑞昌爲嗣毋庸拘守常格先送宗譜甘結以慰忠盡而恤孤孀出自 逾格鴻慈



皇朝經世文續編卷五十六目錄

禮政七 家教

訓子瑣言

牛作麟

送弟之江甯序

莊慶椿

桐城麻溪姚氏登科記

姚瑩

筆記十二則

曾國藩

與王叶庭書

曾國藩

與瑟庵從弟書

劉蓉

與培基培垕

劉蓉

家書一則

吳廷棟

遺訓八則 錄二

張兆熙

與子書

賈履上

甘節婦傳

管同

書楊氏婢

梅曾亮

皇朝經世文續編卷五十六

上海葛士濬子源輯

禮政七 家教

訓子瑣言

牛作麟

士之以文詞見者恃有才學以投世人之所好然吾嘗讀古人書見其忠孝節義有大過人者不自知其何以重於人並重其文或大節有虧則以薄其人者並其文而亦薄之嗚呼以余一人之心絜天下後世人之心亦概可知矣士之欲以文詞見者抑亦知所本歟

不妨二字最害事今人喪品敗家其初非不辦事之是非但動於心之所喜爲而又以偶一爲之稍稍爲之爲不妨遂駸駸乎濫觴而不可防矣雖桀紂之惡豈知其必喪亡而故爲之哉其初亦必以二字自恕而其後遂至於不可救嗚呼一念之動一事之舉凡有關於身家名教者但審其可與不可耳豈可以不妨自寬哉

程子教學者必曰敬此字合久暫動靜而無間者也願體集曰一生做人要訣被孟子一句道盡曰君子行法以俟命而已矣又曰古人教人聽言莫精捷於伊尹二十一字曰有言逆於汝心必求諸道有言孫

於汝志必求諸非道此三者處心處世接人之方也父於接人聞言處不慮兒知其是便己之欲而不從慮兒知其非恐拂人情而勉從此便是吾前言柔弱處遇此等處須要貌愈和而心愈剛不可易其所守也昔唐太宗與魏徵言或有不當徵甘不言不輕應諾況平人乎

駿馬日馳千里苟有所誤其失必多人家子弟亦猶是也故天生庸才無能爲善亦無能爲惡惟大有才而誤用者務外必行不軌歷代亂臣是也務內必壞天常歷代邪教是也故父母之生才子者可喜而亦可憂

送弟之江甯序

松陵文錄

莊慶椿

王君某將宰江甯邑延吾弟於幕中弟且行矣吾可無言哉昔范匄對秦客知武子擊之惡其掩人也掩人者人亦掩之故告之一曰願無伐善蓬生麻中不扶自直榛莽雜種隨風俱靡故告之二曰勿狎淫朋學問之道無窮柳子厚所謂若器焉必隆然大而後可以有入若牆焉必基之廣而後可以有出故告之三曰凡事貴自擇而善取資傳曰宴安鴆毒不可懷也懷安非獨能敗名亦能敗性君子尤惡之故告之四曰在職當思其所司吾先人世有冠冕子孫乃不振如此衣食奔走甚或槁項黃馘名不出里閭故告之五曰孝莫大乎顯父母夫富貴聲名人所同欲知欲而不知足則失所欲弟其慎之抑吾重有感焉司

徒文子問於子思曰親喪三年則何服子思曰三年而未葬則服不除今吾與弟方奉府君憂然母孺人沒已六載慢葬之罪其何以文忍告吾弟哉惟交勗之可也

桐城麻溪姚氏登科記

姚瑩

桐城麻溪姚氏其先當宋元之際有仕於安慶者悅桐城山水卜居於東鄉之麻溪遂家焉數世隱於耕及明正統閒始顯自明景泰元年始至今上嘉慶十六年凡三百六十二年登科者四十四人成進士者二十皆麻溪之後也其生平宦蹟事功文章著於史傳與夫他途拔起及以節孝言行著於邑志家乘者不載焉茲獨次其科目先後而記之曰嗟乎祖宗之德不其遠哉自古未有無德而興不繼而長者也造業之祖起微賤服勤勞行修於身功及於物天乃昌其後以報之故孫子之盛衰卽視其先功德之大小以爲修短之數昔黃帝之子五德代興而后稷啟周祚至八百蓋稼穡食人功爲大也其次莫如立法教世故契之王亦六百祀觀於往事而天可知矣國之與家大小雖殊其義一也姚氏系出吳興唐宋之間嘗有興者而舊譜所載南渡後軼其名疑莫能考麻溪府君則吾遷桐始祖也歷元迄明正統之代務農者一百五十餘年其所食之人則旣多矣而家法所傳惟以忠厚爲本自我參政府君通籍至今又十四世人且數千百計孝弟未衰皆清貧自守其登仕者百數朝有賢良之襲外無貪酷之吏而捐身殉

節立志守貞者相望也今考其科目之數又如此嗚呼天之所以報吾宗者不亦盛哉覽圖籍所載古碩人偉德起家微賤衆矣方其崛起驟興嘗分茅胙土貴爲王侯彪炳之勢赫赫一時如吾家者不啻十倍然或及身而敗或一傳再傳而敗不及百年榮謝頓殊至且絕嗣矣推尋其故豈不由造物忌盈德薄而享豐之所致與抑吾聞太行之山繇亘千里者非一阜之勢黃河之流橫絕中國者非一勺之源其中十里一巒百里一川起伏曲折所以延其脉而長其委者甚衆夫是以不竭絕也草木之華太繁者必不實驟茂者罕再榮此常理也然有培沃之者日養而月息之不傷其本不翦其枝安在不復茂乎觀於山川草木之理而人又可知矣且世有豪傑之士身處孤露或際阨危恆思發憤自振起雖彼材智絕人而無尺寸之藉其勢極難然奮袂而興登高第仕華膺功立才見猶足以濟大業世家之子文學論議嫺習旣優苟有中材藉先世之資其勢足以倍之乃反百不及一者何也諺曰勦業者多勞守成者多逸夫勞者乃成之資而逸者實敗之券也不思盛業所由來徒以祖功宗德爲可恃不惟無培養之勤且日加脔削雖有盛德之父大功之祖何以克昌哉善乎周公之戒成王曰所其無逸惟知稼穡之艱難夫成王天子也而戒以稼穡之事不忘其先也帝王之祖皆有聖德世功然且不敢自暇自逸況士民之家乎故爲子孫者必有勦業之志而後可以守成必有戒禍之心而後可以保世嗟乎科目之名天下榮之久矣此海

內之所共爭造物之所不輕與也吾宗雖非盛大然自明以來得之者嘗兼數姓矣其他庶姓或數十年不得一人夫豈無才而莫克以振雖盛衰之數不可知然久鬱者必昌已盛者不再盈虧往復信如著龜求所以保垂絕而留其有餘者吾猶未得其道也以是兢兢乃次其先世以逮今茲與此選者爲之記遺吾宗人相與觀之無恃祖宗之功德耳嗚呼有明達誠篤之士覽吾斯文其能無戒心乎哉

筆記十二則

曾國藩

士大夫之志趣學術果有異於人者則修之於身式之於家必有流風餘韻傳之子孫化行鄉里所謂君子之澤也就其最善者約有三端曰詩書之澤禮讓之澤稼穡之澤詩書之澤如韋玄成議禮王吉傳經虞魏之昆顧陸之裔代有名家不可殫述我朝如桐城張氏自文端公而下鉅卿碩學世濟其美宣城梅氏自定九徵君以下世精算學其六世孫梅伯言郎中曾亮自謂莫紹先緒而所爲古文詩篇一時推爲祭酒高郵王氏自文肅公安國以下世爲名儒而懷祖先生訓詁之學實集古今之大成國藩於此三家者常低徊歎仰以爲不可及禮讓之澤如萬石君之廉謹富平侯之敬慎唐之河東柳氏宋之藍田呂氏門庭之內彬彬焉有君子之風余所見近時搢紳未有崇禮法而不興習傲慢而不敗者稼穡之澤惟周家開國豳風陳業述生理之艱難導民風於淳厚有味乎其言之近世張惇復之恆產瑣言張揚園之農

書用意至爲深遠國藩竊以爲稼穡之澤視詩書禮讓之澤尤爲可大可久吾祖光祿大夫星岡公嘗有言曰吾子孫雖至大官家中不可廢農圃舊業懿哉至訓可爲萬世法已

吉凶悔吝四者相爲循環吉非有祥瑞之可言但行事措之咸宜無有人非鬼責是卽謂之吉過是則爲吝矣天道忌滿鬼神害盈日中則仄月盈則虧易爻多言貞吝易之道當隨時變易以處中當變而守此不變則貞而吝矣凡行之而過無論其非義也卽盡善之舉盛德之事稍過則吝隨之余官京師自名所居之室曰求闕齋恐以滿盈致咎也人無賢愚遇凶皆知自悔悔則可免於災戾故曰震无咎者存乎悔動心忍性斯大任之基側身修行乃中興之本自古成大業者未有不困心橫慮覺悟知非而來者也吝則馴致於凶悔則漸趨於吉故大易之道莫善於悔莫不善於吝吾家子弟將欲自修而免於咎尤有二語焉曰無好快意之事常存省過之心

論語兩稱敏則有功敏有得之天事者才藝贍給裁決如流此不數數覲也有得之人事者人十己千習勤不輟中材以下皆可勉焉而幾余性魯鈍他人目下二三行余或疾讀不能終一行他人頃刻立辦者余或沈吟數時不能了友人陽湖周弢甫騰虎嘗謂余儒緩不及事余亦深以儒緩自愧左傳齊人責魯君不答稽首因歌之曰魯人之皐數年不覺使我高蹈惟其儒書以爲二國憂言魯人好儒術而失之皐

緩故二國興師來問也漢書朱博傳齊部舒緩養名博鬻髯抵几曰觀齊兒欲以此爲俗邪皆斥罷諸吏門下掾賴遂耆老大儒拜起舒緩謂賴老生不習吏禮令主簿教之拜起閑習又以功曹官屬多褻衣大貂不中節度敕令掾史衣皆去地二寸此亦惡儒術之舒緩不足了事也通鑑涼驃騎大將軍宋混曰臣弟澄政事愈於臣但恐儒緩機事不稱耳胡三省注曰凡儒者多務爲舒緩而不能應機以趨事赴功大氏儒術非病儒而失之舒緩則從政多積滯之事治軍少可趁之功

古者英雄立事必有基業如高祖之關中光武之河內魏之兗州唐之晉陽皆先據此爲基然後進可以戰退可以守君子之學道也亦必有所謂基業者大氏以規模宏大言辭誠信爲本如居室然宏大則所宅者廣託庇者衆誠信則置趾甚固結架甚牢易曰寬以居之謂宏大也修辭立其誠所以居業謂誠信也大程子曰道之浩浩何處下手惟立誠纔有可居之處誠便是忠信修省言辭便是要立得這忠信若口不擇言逢事便說則忠信亦被汨沒動盪立不住了國藩按立得住卽所謂居業也今世俗言興家立業是也子張曰執德不宏信道不篤焉能爲有焉能爲亡亦謂苟不能宏大誠信則在我之知識浮泛動盪指爲我之所有也不可指爲我之所無也亦不可是則終身無可居之業程子所謂立不住者耳

古之英雄意量恢拓規模宏遠而其訓誡子弟恆有恭謹歛退之象劉先主臨終敕太子曰勉之勉之勿

以惡小而爲之勿以善小而不爲惟賢惟德可以服人汝父德薄不足效也汝與丞相從事事之如父西涼李暠手令戒諸子以爲從政者當審慎賞罰勿任愛憎近忠正遠佞諛勿使左右竊弄威福毀譽之來當研覈真僞聽訟折獄必和顏任理慎勿逆詐億必輕加聲色務廣咨詢勿自專用吾莅事五年雖未能息民然含垢匿瑕朝爲寇讎夕委心膺寵無負於新舊事任公平坦然無類初不容懷有所損益計近則如不足經遠乃爲有餘庶亦無愧前人也宋文帝以弟江夏王義恭都督荆湘等八州諸軍事爲書誡之曰天下艱難國家事重雖曰守成實亦未易隆替安危在吾曹耳豈可不感尋王業大懼負荷汝性褊急志之所滯其欲必行意所不存從物回改此最弊事宜念裁抑衛青遇士大夫以禮與小人有恩西門安于矯性齊美關羽張飛任偏同弊行已舉事深宜鑒此若事異今日嗣子幼蒙司徒當周公之事汝不可不盡祇順之理爾時天下安危決汝二人耳汝一月自用錢不可過三十萬若能省此益美西楚府舍略所諳究計當不須改作日求新異凡訊獄多決當時難可逆慮此實爲難至訊日虛懷博盡慎無以喜怒加人能擇善者而從之美自歸己不可專意自決以矜獨斷之明也名器深宜慎惜不可妄以假人昵近爵賜尤應裁量吾於左右雖爲少恩如聞外論不以爲非也以貴凌物物不服以威加人人不厭此易達事耳聲樂嬉遊不宜令過蒲酒漁獵一切勿爲供用奉身皆有節度奇服異器不宜興長又宜數引見佐

史相見不數則彼我不親不親無因得盡人情人情不盡復何由知衆事也數君者皆雄才大略有經營四海之志而其教誡子弟則約旨卑思歛抑已甚伏波將軍馬援亦曠代英傑而其誡兒子書曰吾欲汝曹聞人過失如聞父母之名耳可得聞口不可得言也好議論人長短妄是非政法此吾所大惡也甯死不願子孫有此行也龍伯高敦厚周慎口無擇言謙約節儉廉公有威吾愛之重之願汝曹效之杜季良豪俠好義憂人之憂樂人之樂父喪致客數郡畢至吾愛之重之不願汝曹效也效伯高不得猶爲謹敕之士所謂刻鵠不成尙類鶩者也效季良不得陷爲天下輕薄子所謂畫虎不成反類狗者也此亦謙謹自將歛其高遠之懷卽於卑邇之道蓋不如是則不足以自致於久大藏之不密則放之不準蘇軾詩始知真放本精微卽此義也

自好之士多講氣節講之不精則流於傲而不自覺風節守於己者也傲則加於人者也漢蕭望之初見霍大將軍光不甯露索挾持王仲翁譏之望之曰各從其志魏孫資劉放用事辛毗不與往來子儆諫之毗正色曰吾立身自有本末就與孫劉不平不過令吾不作三公而已宋顧覲之不甯降意於戴法興等蔡興宗嫌其風節太峻覲之曰辛毗有言孫劉不過使我不爲三公耳人稟命有定分非智力可移因命弟子原著定命論以釋之此三事者皆風節之守於己者也若汲黯不下張湯宋璟不禮王毛仲此自位

高望尊得行其志已不得以風節目之矣然猶不可謂之傲也以傲加人者若蓋寬饒之於許伯孔融之於曹操此傲在言詞者也嵇康之於鍾會謝靈運之於孟顗此傲在神理者也殷仲文之於何無忌王僧達之於路瓊之此傲在儀節者也息夫躬歷詆諸公暨豔彈射百寮此傲在奏議者也此數人者皆不得令終大氏人道害盈鬼神福謙傲者內恃其才外溢其氣其心已不固矣如蓋孔嵇謝殷王等僅以加諸一二人猶且無德不報有毒必發若息夫躬暨豔之過忤同列安有幸全之理哉

裴子野曰夫有逸羣之才必思衝天之據蓋俗之量則儼常均之下其能守之以道將之以禮殆爲鮮乎大抵懷材負奇恆冀人以異眼相看若一概以平等視之非所願也韓信含羞於噲等彭寵積望於無異彼其素所挾持者高誠不欲與庸庸者齊耳君子之道莫善於能下人莫不善於矜以齊桓公之盛業葵邱之會微有振矜而叛者九國以關公之忠勇一念之矜則身敗於徐晃地喪於呂蒙以大禹之聖而伯益贊之以滿招損謙受益以鄭伯之弱而楚莊王曰其君能下人必能信用其民矣不自恃者雖危而得安自恃者雖安而易危自古國家往往然也故挾貴挾長挾賢挾故勳勞皆孟子之所不答而怙寵怙侈怙非怙亂皆春秋士大夫之所深譏爾

陳容有言曰仁義豈有常蹈之則爲君子違之則爲小人大哉言乎仁者物我無間之謂也一有自私之

心則小人矣義者無所爲而爲之謂也一有自利之心則小人矣同一日也朝而公正則爲君子夕而私利則爲小人同一事也初念公正則爲君子轉念私利則爲小人惟聖罔念作狂惟狂克念作聖所爭祇在幾微君子無終食之間違仁造次必如是顛沛必如是一不如是則流入小人而不自覺矣所謂小人者識見小耳度量小耳井底之蛙所窺幾何而自以爲絕倫之學遼東之豕所異幾何而自以爲蓋世之勲推之以子子爲義以硜硜爲信以齷齪爲廉此皆識淺而易以自足者也君臣之知須積誠以相感而動疑主恩之過薄朋友之交貴積漸以相孚而動怨知己之罕覲其或兄弟不相容夫婦不相信父子不相亮此皆量褊而易以滋疑者也君子則不然廣其識則天下之大棄若敝屣堯舜之業視若浮雲宏其度則行有不得反求諸己己所不欲勿施於人烏有所謂自私自利者哉不此之求而詡詡然號於衆曰吾君子也當其自詡君子深信不疑之時識者已嗤其爲小人矣

司馬溫公曰才德全盡謂之聖人才德兼亡謂之愚人德勝才謂之君子才勝德謂之小人余謂德與才不可偏重譬之於水德在潤下才卽其載物漑田之用譬之於木德在曲直才卽其舟楫棟梁之用德若水之源才卽其波瀾德若木之根才卽其枝葉德而無才以輔之則近於愚人才而無德以主之則近於小人世人多不甘以愚人自居故自命每願爲有才者世人多不欲與小人爲緣故觀人每好取有德者

大較然也二者既不可兼與其無德而近於小人毋甯無才而近於愚人自修之方觀人之術皆以此爲衡可矣吾生平短於才愛我者或謬以德器相許實則雖曾任艱鉅自問僅一愚人幸不以私智詭譎鑒其愚耳

開國之際若漢唐之初異才畸士豐功偉烈飄舉雲興蓋全係乎天運而人事不得與其閒至中葉以後君子欲有所建樹以濟世而康屯則天事居其半人事居其半以人事與天爭衡莫大乎忠勤二字亂世多尙巧僞惟忠者可以革其習末俗多趨偷惰惟勤者可以遏其流忠不必有過人之才智盡吾心而已矣勤不必有過人之精神竭吾力而已矣能剖心肝以奉至尊忠至而智亦生焉能苦筋骸以捍大患勤至而勇亦出焉余觀近世賢哲得力於此二字者頗不乏人余亦忝附諸賢之後而於忠勤二字自媿十不逮一吾家子姓倘將來有出任艱鉅者當勵忠勤以補吾之闕憾忠之積於平日者則自不妄語始勤之積於平日者則自不晏起始

雖有良藥苟不當於病不逮下品雖有賢才苟不適於用不逮庸流梁麗可以衝城而不可以窒穴犂牛不可以捕鼠騏驥不可以守閭千金之劍以之析薪則不如斧三代之鼎以之墾田則不如耜當其時當其事則凡材亦奏神奇之效否則鉏鋤而終無所成故世不患無才患用才者不能器使而適宜也魏無

知論陳平曰今有尾生孝己之行而無益勝負之數陛下何暇用之乎當戰爭之世苟無益勝負之數雖盛德亦無所用之余生平好用忠實者流今老矣始知藥之多不當於病也

魏安釐王問天下之高士於子順子順以魯仲連對王曰魯仲連強作之者非體自然也子順曰人皆作之作之不止乃成君子作之不變習與體成則自然也余觀自古聖賢豪傑多由強作而臻絕詣淮南子曰功可強成名可強立中庸曰或勉強而行之及其成功一也近世論人者或曰某也向之所爲不如是今強作如是是不可信沮自新之途而長偷惰之風莫大乎此

與王叶庭書

曾國藩

甥初入京總以勤儉敬信四字爲本而以擇交爲用無四字則凡事皆無根柢縱有才華亦浮榮耳不擇交則無觀摩規勸之益故須物色賢者明以爲友暗奉爲師乃借以約束身心之資也

與瑟庵從弟書

劉蓉

來書言邇來家中用度較侈固知內外大小無能守儉樸務節省之人然何以遂增至什伯倍蓰之多我所增加者惟先生修脯一事蓋冀基屋輩能敬服名師之教謹飭儒雅稍知修身持己應事接物之道則於居家涉世皆當有以自處不至浮慕乎世家統袴驕盈之習則一時之所費雖多將來之所省甚大故

於此獨所不惜此外惟囑於舊戚外家饋贈加厚至於家中用度則屢書囑弟一循舊章不宜稍事浮華世局益壞而人情日競於奢不惟非惜福之道抑慮其召災速禍而致瑣尾流離之變也十餘年東南遘禍舉凡衣冠文物競逐紛華之國無不殘破故家世族之所留遺巨賈豪商之所積累莫不蕩爲灰燼化爲飛煙子女化離乞食道路獨湖南晏然無恙吾鄉又因此躋致名位廣積金錢舊時鑿井耕田之子椎牛屠狗之夫皆高牙大纛美衣華屋以自豪於鄉里果有何功德在人宜食此報以長保富貴而無後災哉智者見禍機於未萌凡無功而享厚報無德而致大位皆智者之所視爲不祥而深自警惕者也矧各省皆罹於難吾鄉獨蒙其庥其於盈虛消息倚伏循環之理亦已灼然可見願吾弟時以此說之基屋輩毋事華侈以重吾不德而務撙節退讓積善修身時存戒懼修省之意異時桑梓或致禍災尙可倖免於難爲祖宗更延一綫之祀不同歸於淪沒天道禍淫昭然不爽斯言痛切幸勿忘之此聞羅氏新婦入門妝奩甚厚輜重之外又有奩金三百聞之殊不愜意我與羅忠節公道誼至交聯爲姻婭其所期於子女者非欲其席豐履厚爲富翁富姬亦冀其守禮敦倫垂家範以綿世澤耳今存流俗之陋習厚致奩具非所以仰承忠節之遺意古人有言賢而多財則損其志愚而多財則益其過吾見世家之婦恃有厚奩而驕傲舅姑壞家法者多矣今羅家所以贈遺其女者如此吾懼夫新婦之長其傲而培基之益其過也且

羅氏亦非素封者侈泰如此豈保家之道培基如體吾意當舉此項還之並傳諭新婦家有弟妹尙未婚嫁不宜先取此以自益且吾家衣食粗足蓄此亦無所用新婦如能婉聽吾言庶於羅氏爲賢女於吾家爲佳婦耳吾與同邑曾羅二公神明至交起家儒素三人者經術淺深學問大小不必盡同然於富貴不淫貧賤不移威武不屈三語則皆毅然有以自立滌翁名位冠一時然覽其書疏皆業業兢兢常懷憂

國奉公持盈保泰之意羅忠節公積苦兵閒固未嘗一日自逸其遺書教誡子弟尤爲切至今三家聯爲姻好子弟往來要當率由庭訓交相策勵庶不失故家軌範豈可競爲奢靡自墜家風若於勤儉持家之道或不之講其於居亂世而圖自存之意或未之及此吾所私以爲憂者也兩明允古皆樸茂亦未染世家習氣昨者奩具或出於堂上愛女之過培基當以吾意曉之彼此皆以道義相處乃不失先人結納之意亦所以綿世澤於無窮也家中穀米儲蓄有年當可次第發糶糶得錢文切不可浪用浮費將來置買蟹形山護墳田畝卽可取之於此吾去歲在制府處所餘幕脩尙千餘金八月當以付回卽圖另購先贈公護墳田宅此外卽不能另謀家計將來歲入仍不幾何非節儉無以供朝夕日用願吾弟守吾屢次誥誡之言一切悉仍其舊除先生脩脯及舊戚饋贈外不可稍增繁費基屋輩讀書稍進甚荷鏡舅先生誨導之力惟其志趨未定根基未立擬請鏡舅先生預定五年之約俾渠輩久資陶鑄之益望吾弟早以吾

意告之免致秋後又復紛紜亂我心曲也吾邇來於家事百不關懷獨於基屋兩兒讀書一事盼之甚切冀其發憤刻勵爲端謹儒雅之士守儒素家風以延世祚他非所望也近來仕宦之家好以官爲世業此閒藩臬道府莫不爲子姪輩捐州縣者自以爲光耀門戶而不知祇以斲喪元氣中材之士一涉仕途外誘日多根器日壞卒至落魄蕭條不可名狀不如令業詩書守寒素之可綿世澤也去冬拜署理藩司之命自以服制未闋不肯冒褻入仕僚友中多勸之者謂一赴任卽值皇上登位覃恩可廕一子爲七品官如待至服闋接篆則在恩詔以後不能膺茲盛典蓋世情皆以子弟得官爲榮故所見往往如此不知子孫能賢卽不蒙廕襲亦自能振起家聲如其不肖卽幸而得廕祇爲辱耳吾前書言爲基兒納監亦不過藉此爲激勵之助非欲其具冠帶以夸耀世俗也培屋年旣長亦當爲議婚事比來宦場相識多約聯姻者吾意殊不欲卽諸女亦不願使適富貴之家蓋朱門子弟之賢者實不多得而一種紈袴習氣令人憎厭不如鄉里詩書家子弟之循謹少過耳弟前次來書尙託吾爲諸妹擇壻不知官場中實無佳選也蜀藩向稱優裕每歲所入節壽陋規可五萬金吾悉却之以此費用頗窘乏吾不能取非義以肥吾家望吾弟諸從節省慎守先人舊業度他日罷官歸來尙得飽噉蔬食則充然無世累之嬰吾懷矣

與培基培屋

劉蓉

比屢接湖南友朋信多稱爾謹飭退讓循循弟子之職吾聞之甚以爲慰凡宦家子弟往往趨於驕淫矜夸一路彼不知父兄之勤苦艱辛以爲富貴吾家所固有侈然自得以放佚其心志而漸卽於浮薄其見之者又往往以爲貴游子弟而異視之賢者謹避焉不肖者或加趨奉由是子弟之過日聞而爲父兄者常不及知卽爲之父執者亦惟有私相竊歎而不欲遽以相聞以吾生平所聞見往往皆然故屢書誡爾兄弟爲爾擇明師以資觀摩之益望爾歸於謙謹一路又嘗舉寬厚和平四字爲諄切言之今各處來書所稱如此果爾之能遵吾誠乎抑友朋之姑譽詞以慰吾意也然吾卽明知其未盡然而私心不能不以爲喜爾如能時體吾意而時以自省則所謂悅親順親之謂孝者不外夫此矣

心術好自是長厚一路惟言語無度往往令人生嫌亦是大病凡有大福者必有容人之度犯而不校觸而不怒則人自服其量而不相忤豈得動與他人口角爭勝吾前書教爾常學喫虧常肯退步讓人亦是此意人品何常但能反躬責己者卽爲君子開口責人者便爲小人小人何嘗無見識何嘗不善議論但其見識議論專用以責人而不以自責此所以墜於下流而不自知耳此吾切至之言近常以此爲觀人之法厯厯不爽爾與培屋當時以吾言爲戒凡事反躬自責至要至切

屢作書寄爾兄弟計陸續可到所囑覓師讀書各事不次諄諄言之計亦必悉吾意所重遵命而行惟西

垣先生不審究已聘定未甚以爲念鄉村中實難得良師能教時文不落恆蹊者已是好手能教人敦品行務正學者已覺難得至於學問有淵源有家數於義理考據詞章三家之學皆能窮其源而竟其委使後生學子聽其緒論有門戶可入有階級可循不至迷於所向而不至汨沒於俗學之陋以錮其靈明墮其志趣者則固未可以望諸吾鄉之人而以爾兄弟之天資學力亦尙未足以語此是以姑就本邑之賢者聘請而教之爾兄弟果能刻志講求盡一師之所長又更一師則將來自可更擇有道德經術文章者爲之開導而誘進之但恐志趣卑陋略有一知半解便覺自足則終身無復長進日子耳培基今歲在子壽先生處講大學衍義歸家後曾否細讀培屋近日頗入理否凡人不學問任是好資質終不見有長進祇是混然與世俗之人相游處同一般見識而已吾從前年少時在鄉村聞時俗所稱文人議論心中總不謂然以爲讀書人所見所期何止於此其後往長沙住嶽麓取友亦少當意者其中傑出之士不過數人雖學尙未成而志趣識量實能超出流俗不肯與世浮沈今果皆卓然有樹立爲國家梁棟之臣可見士人總以志趣識解不落庸俗者爲可造就爾兄弟不可不自勉也

家書一則 節錄

吳廷棟

某居官惟自刻苦生平不妄拜一人有先施者以禮答之亦必擇而後交故無因至前不敢妄受人一錢

至于千求請謁尤所深恥常守孔子志士不忘在溝壑之訓不怕餓死不稍存自私自利之心而已

遺訓八則 錄二

張兆熙

一世俗兄弟嫌隙皆起於爭些便宜不知兄與弟爭弟當思曰兄我同父之兄也我失便宜兄得之是猶父母得之也何較焉弟與兄爭亦當作如是觀兄弟間苟能一念不忘父母則忿爭自平利益莫大於是但家門之和古人尤有要訣所謂不聽婦言是也

一士人一舉一動衆所屬目行止不容不謹煙賭狹邪尤宜深戒毋自恕曰暫暫卽常之階也每見世俗子弟不知戒此不旋踵而辱身敗行者多矣汝輩無論讀書營生總當持重戒輕無失古人守身如玉之旨不可以小德出入爲藉口也

與子書

賈履上

汝蒞任大通後兩遞家書並附通稟稿閱之甚慰民風土俗切實講求臨事方有把握不狃書生之見亦不隨俗吏之爲因利而利擇勞而勞尊五美屏四惡官箴已備所患求治太急與之爭耳漢士番回氣類雖殊性情則一朱子曰民雖衆畢竟只是一個心甚易感信斯言也何爭之有闔邑生童應試不過卅人文風安得興起宜設書院義塾培養之而書院義塾須從讀書入手弗徒作時下帖括工夫乃可造就後

進吾鄉文風日盛而士品日衰豈非習俗陷溺邊地天真未鑿故望汝之敬用此民也田中樹藝五穀不生惟麥生之乃雜糧中有稞子考本草云大麥卽今稞麥是亦麥也又莞豆查回鶻豆名豌豆唐書作畢豆豌豆是否傳訛但如蠶豆一物農政全書極言其利又云張騫使外國得胡豆種以歸西人用豆麥和磨作餅餌食之甚美何陝右不聞用豆和磨至蠶桑之利現由侯中堂通商惠工廣開織作爲闔省萬年之利益較淘沙鑿礦奚啻倍蓰

甘節婦傳

管同

節婦金氏江甯金智洪女年十七歸同縣甘元勣五載而嫠所生惟一女節婦忍死養寡姑立族子文陞爲嗣文陞娶婦劉旋卒亦無子節婦守義二十八年年四十八卒當卒時女已適人矣而寡姑猶無恙婦疾革謂其子婦曰吾命將終不能終事而祖姑吾死不瞑目矣歿後五年族人福遂爲請旌而述其事乞予作傳婦人嫠居守義其事蹟比比相同不必具述節婦所異者家有田僅二十畝能以十畝養寡姑而以十畝入宗祠爲祭祀費夫先王之制卿以下必有圭田而士無田則不祭所以尊祖敬宗緜血食於長久也今豪富之家市買膏腴動連阡陌而罕置祭田何者市田私子孫而祭田必公諸宗族迨其久田入他人而家益困則祖宗之靈有不血食者矣嗟乎棄根本而欲肥枝葉豈可得哉甘節婦者於荼苦困

阨中獨能知此義可舉以風今世士大夫予故樂爲之傳或曰節婦歿後常見形如生時蓋旣死而猶念其姑也其事怪予不論云

書楊氏婢


梅曾亮

楊氏之寡妾以貧故不安於室嫁有日矣未嫁前一夕呼其婢不應者三怒曰汝我婢也何敢如是婢叱曰我楊氏婢耳汝今誰家婦者曰我婢我婢妾方持剪刀落於地起環走房中至天曙呼其婢曰汝今竟何如吾復爲爾主矣婢叩頭泣妾亦泣竟謝媒妁不行後將嫁其婢婢曰人以我一言故忍死至今我亦終不去楊氏門亦不嫁妾之夫楊勤恪公錫紱子也



糸廿三糸糸







皇朝經世文續編卷五十七目錄

禮政八 昏禮

與張鐵甫論昏禮書

周官媒氏說

昏問

昏問

親病納婦論

再答陳秀才書


霍勒霍屯氏守義論

歸葬於女氏之黨議

書劉貞女紀略後

書歸震川貞女論後

書清芬集後



黃式三

錢儀吉

林柏桐

鄧瑤

鄧瑤

李惺

袁翼

方東樹

王廷植

張文虎

書應觀察所記張貞女事後

俞樾

書應觀察所記張貞女事後

王世貞

書應觀察所記張貞女事後

袁宏道

書應觀察所記張貞女事後

袁宏道

書應觀察所記張貞女事後

袁宏道

書應觀察所記張貞女事後

袁宏道

書應觀察所記張貞女事後

袁宏道

書應觀察所記張貞女事後

袁宏道

書應觀察所記張貞女事後

袁宏道

書應觀察所記張貞女事後

袁宏道

書應觀察所記張貞女事後

袁宏道

書應觀察所記張貞女事後

袁宏道

書應觀察所記張貞女事後

皇朝經世文續編卷五十七

上海葛士濬子源輯

禮政八 昏禮

與張鐵甫論昏禮書

張士元

蒙惠手書并示歌詩雜文反復讀之見足下用心與時人迥異文亦雅贍有體竊幸鄉里知識中有足下斯道未爲孤也獨昏禮問答一篇與鄙見有未盡合者謹陳其大略士昏禮自納采問名納吉納徵請期親迎主人皆迎賓入廟記云凡行事必用昏昕受諸禰廟孔穎達曰女家每事告廟則男氏將行六禮必皆告廟不徒卜而已此昏禮告廟之明文其不言婿家之告廟者以女家推之而可知禮文固有互見者非闕逸也婿家告廟當在醮子命迎之時醮子在寢而命詞曰往迎爾相承我宗事則告廟可知也左傳鄭公子忽先配後祖杜注禮逆婦必告廟而後行此亦告廟之證也以爲昏非入廟之時則時未昏也婦既至則不復告廟至三月而後祭行蓋告廟命子之後祭行之前無容瀆告也文乃云告廟當在質明見舅姑之後恐非禮意也謂三月廟見爲舅姑既沒奠菜之禮與三月祭行不同誠是也然必俟三月者以三月一時人之善惡可得而知此與留車反馬之禮相合白虎通義之言亦未可盡非也若以七出駁之

則又不然蓋婦之出乃家庭大不幸之事而廟見之慎重則戒之於始雖以此戒之而不聞於未廟見之前嫌於婦行之惡遽使乘車馬而歸者此以見先王制禮之意所以防患于未形而非爲是刻急之法也至謂白虎通義言娶妻不告廟顯背經義則通義固未嘗言娶妻之始終不告廟也通義云娶妻不先告廟到者示不必安也辭意蓋謂婦至不告至于廟耳或其中有脫誤未可知也至士昏禮篇首云下達納采用雁鄭注賈疏於下達之義已明言之朱子復釋之云大夫執雁士執雉而士昏下達用雁言士庶得通用雁也此解甚明不必疑其有闕逸也

周官媒氏說

傲居集

黃式三

周官媒氏禁遷葬者與嫁殤者依鄭君注繹之遷葬者謂生時本無婚議各葬一處後議遷之爲夫妻是無論其未成人已成人皆禁之也嫁殤者謂生前有婚議女未嫁而死而歸葬于男家必禁之也曾子問曰女未廟見而死則如之何孔子曰不遷于祖不祔于皇姑壻不杖不菲不次歸葬于女氏之黨示未成婦也夫女既娶近三月夫妻已成矣未廟見舅姑雖成妻未成婦主既不祔于皇姑墓亦不葬于夫家彼遷葬嫁殤者墓已合葬之將主亦祔之乎主不祔而合葬之合葬而主亦祔之禮之無一可者也遷葬始魏武之于倉舒嫁殤始魏明之于女淑徇一己之私墮悖先王之法禁此所謂衰世之事意似從厚而

禮滋益壞矣近時遷葬之風行而立繼之規紊繼子貴而鰥夫寡女晏然受追贈之典固爲失矣甚者爭繼訟起汚吏上下其手莫之誰何其弊甚大嫁殤之風行而墓葬之次紊使元配之妻下夷于繼配固爲失矣否則元配不從則女家訟之于吏吏不言嫁殤之失禮而反責葬禮之不備可恥孰甚焉名不正則禮不興刑不中則民無所措手足不可不辯

昏問 循石齋記事續稿

錢儀吉

道光十一年山東兩縣令約爲婚媾已爲前後政爭官穀壻父戕女父死焉女不忍事仇自繆死 詔旌其孝或謂女不死當離婚敢問

曰是生民之至窮而王政所加閔也夫親讐之復門不反戈海外之避官爲和難春秋子沈子曰臣不討賊非臣也子不復讐非子也今以嬛嬛孤女銜痛立庭乃使繼笄而朝執笄而祝忘親事讐生理盡矣又告期請吉必稱先人此旣辭窮於何成禮或謂昏儀壹與之齊終身不改又謂婦人內夫家外父母家又以先儒謂夫有惡行妻不得去者地無去天之義也是女也雖爲終身之哀亦將無所逃命不知女子無專制之行有三從之道當其未嫁不制於夫故喪服之制在室爲父齊衰三年未嫁夫死旣葬除服本無三年之恩非有貳斬之嫌也春秋女在其國稱女在塗稱婦若然終身不改施諸同牢也外其本親責之

成婦也若乃妻之事夫猶子事父臣事君也彼所天之失德必槩諫之是資誠怙過而弗從雖號泣而難絕抑所謂至親無去志在感動者與故趙阿自殞情疑於過中龐娥刺仇世稱其純孝是則夫惡之與親讐權其輕重又非等倫已案離婚之條前史多有昔在曹魏犯大逆者誅及已出之女夫黨見刑又有隨姓之戮時則有特聽離婚因而貸命者夫叛家告絕繫於其君讐家告離繫於其父平時則資敬是同臨難豈在心或異白虎通義嫁娶篇曰悖逆人倫殺妻父母廢絕綱紀亂之大者也義絕乃得去也唐律戶婚章云諸凡義絕者離之又云諸違律爲婚當條稱離之正之者雖會赦猶離之正之義絕者長孫無忌等注謂若夫妻祖父母父母外祖父母伯叔父母兄弟姑姊妹自相殺雖會赦皆爲義絕然則斷罪之文罪有當赦恩義之絕絕不復還也且尋漢議唐律之文皆關諸已嫁況某令女猶在室讐不戴天若不離婚曷由教孝竊謂某令之女以死成名無俟評議後有此比有司治獄宜請離婚

昏問

林柏桐

謹案昏禮者將合二姓之好二姓不好則不合矣父相攸而歸之婦人謂嫁曰歸內夫家外父母家承父志耳若乃親傳刃于其父之腹而與其子偕老事仇爲翁世安有是人乎春秋公羊傳曰禮仇讐不交婚姻穀梁傳曰仇讐之人非所以接婚姻也夫魯仇齊而使主王姬歸齊之禮猶見惡于春秋況可事仇乎

穀梁又曰不使齊侯得與吾爲禮也仇國不可與吾爲禮仇家顧可與吾爲婚乎其當離婚似無疑義謹對或曰許婚父命也一與之齊終身不改父志也父生而命之于父死而背之乎曰禮有常有變父命適人終身不改常也先婚後讐非父所逆料則變也推父之志必不許事仇推女之志且不共戴天傳曰不若于天者天絕之也不若于人者人絕之也婚姻而相殺不順已甚不絕何爲或曰禮婦人不貳斬故爲夫斬衰而爲父暮夫則重矣又可離乎曰女子在家從父既嫁而後從夫故在室之女爲父三年親迎而女之父母死則女反女未廟見而死則歸葬于女氏之黨示未成婦也爲處子者安得以既嫁例乎或曰戕女父者壻父耳非壻也曷不念此乎曰文姜于魯桓與聞乎弑耳非手刃之也而公羊有曰念母者所善也則曷爲于其念母貶不與其念母也母與聞乎弑不許其子念仇與成乎戕獨可使未成婦者念乎或曰昏禮者千古公義也不事仇者私恩也無私恩非孝無公義非忠君子不以私害公有在上者主之其可曰魯主王姬之婚周王命之而公羊所云以我主書者其意在惡周然則有命之者猶未可公義不謂是也或曰臣子重受命父死矣其離婚安所受乎曰魯莊公娶于齊夫人姜氏入穀梁傳曰入者內弗受也何用不受也娶仇人子弟以薦舍于前其義不可受也又況以先人遺體嫁仇人子弟其何以辭于宗廟乎以此義通之其受命有在矣或曰然則雍糾之妻慶舍之女當離乎當死乎曰彼皆爲人婦也宜

有補救之道焉善其道而兩全上也不得則死之無待離矣女則知有父而已仇讐非所願見也是不同或曰女不死猶可改適乎曰婚未離則壻也婚既離則仇耳雖改適疑無嫌焉倘痛其父之非命而怨此生之不辰不事仇亦不它適縞素以終身君子必深悼之以爲無惡于志也

親病納婦論

鄧瑤

親病不得納婦不待知者辯之矣鄉俗家有疾病輒令其子迫遽成婚意以婦新入門病者見之而喜冀其速痊也士昏禮請期之辭曰惟是三族之不虞使某也請吉日鄭注不虞謂卒有死喪此卽世俗尅期娶婦之意顧云三族者就主人言謂父昆弟已昆弟與子之昆弟也至人子值父母有病侍藥求醫籲天祈代之不暇而乃亟亟納婚猝有不虞此豈人子所忍言耶故言親迎女在塗而壻之父母死者蓋受命往迎時父母本無恙中途驟聞大故非父母已病迺忽然行親迎之禮也然則親病之不宜納婦豈待辨哉於是有戚某母病母言於父欲爲子納婦趣令將事者其子以侍病倉皇堅執弗從母病因是少增客過而問曰將從其母乎抑從其子乎余曰子之不肯娶情也亦禮也顧其母之必欲納婦者蓋自料不起猶冀倖於屬續之先一見新婦覘其容止動靜以卜能宜室家與否而後甘心瞑目其意重可哀矣人子事疾苟可以求順其意而少紓其病者無弗爲之卽權宜娶婦未爲不可第躬侍湯藥不得執親迎之禮

選族子弟之嫺於禮儀者致命女之父母告以病姑迫欲見婦之意卽日就途請女之母及親兄弟送之來如徼福先靈新婦入門姑病旋愈實爲兩家之福儻遂不諱則援親迎女在途而婿之父母死女改服布深衣縞總趨喪之文入門號哭隨家人治喪禮也或曰女改服者以婿親迎之故雖未成婚而婦之分已定故聞婿父母死而趨喪也今婿不親迎儻在途聞變必責其趨喪乎答之曰父母無恙自不可廢親迎大禮此則母病在牀忍死以待爲之子者猶且委蛇容與爵弁纁裳緇袍乘墨車往迎之子之門爲之御輪始歸乎卽不親迎女在途聞喪將遂偕其姆中道而返乎此非準禮之論也或又曰女旣奔喪矣旣葬將如之何禮經未有明文意者隨其母歸婿除喪而後成婚乎則又答之曰婦人以夫爲家旣入婿門無庸歸卽若今之童婦執縫紉浣濯井臼饔飧之役以事君舅三年之喪畢主人乃治酒食大召鄉黨僚友爲其子成夫婦之禮蓋昔之以母病納婦倉卒不親迎者達權也今之以父命成昏慎重而合卺者所以厚別也如此則於禮甚宜而於義亦協客退遂書之以質議禮之君子

再答陳秀才書

鄧瑤

承示賢配有母喪逾月思召之歸恐於義理未安懇懇下問善哉足下之問也禮女子適人爲父母服期傳云不貳斬也喪大記曰喪父母旣練而歸期九月旣葬而歸注云歸謂歸夫家也其旣葬而歸乃婦人

爲祖父母爲兄弟之爲父後者耳先王之意以女子舍其父母而從人旣已易斬爲期矣若更不令其在家持服薄情滋甚故有旣練而歸之文所以達其私情也朱子門人葉味道之婦喪母旣葬而歸味道後讀喪大記乃知其誤令反終其月數蓋古人用情之厚如此足下之婦新喪母逾月卽促其歸準諸古制未免過促宜足下之心有未安也顧婦人有主中饋之義且足下有父母在婦事舅姑之禮不宜久闕必責之旣練始歸勢亦未便無已則以三虞卒哭爲期不猶愈於踰月卽歸乎昔者味道亦有言矣以爲婦在母家久彼此多未便欲不待練而召之歸朱子謂或有未便歸而不變其居處飲食之節可也衣服則不可不變此論未爲害理足下其遵行之雖然言豈一端而已夫各有所當也婦人遭父母喪若遇舅姑有病或夫病且亟則不俟踰月但已視含殮宜卽遄歸所謂權也如夫家幸無事酒食之役有娣姒能代而舅姑又許其循古禮以達私情則爲之夫者又何必不使之旣練而歸而必令其銜恤蘊憤匆遽離父母几筵乎蓋視他人之父母甚重然後視己之父母不敢或輕而謂人之待親無庸過厚者必於己之親待之至薄者也風俗之偷久矣有識者能勿思所以矯之使之日趨於厚乎

霍勒霍屯氏守義論

李惺

蒙古正白旗護軍校蘇隆阿之女霍勒霍屯氏字於繡譯生員瑞祥未昏而瑞祥沒女欲以死殉其家防

之嚴不得死乃以奔喪請父母哀其志許焉至塋家則撫棺大痛瑞祥之父母泣觀者皆泣徐出袖中刀截其髮誓守義以終此道光十三年事也金純甫太守爲瑞祥之叔父余蓋聞之太守云或曰霍勒霍屯氏貞女也余曰霍勒霍屯氏節婦也或曰婦人之義從一而終未爲人婦而守婦人之義非禮也余曰義之所在卽禮之所在霍勒霍屯氏之守義也禮也今夫禮莫重於君臣父子夫婦父子以天合君臣夫婦皆以人合以君臣論爲人臣者無有貳心至未委質策名則似乎分之所不屬然而古之節士不幸當國家之變卽不必捐軀以殉而匿跡銷聲終身不出彼其心恆若有耿耿難忘者豈不謂吾固有君哉君臣之義無所逃於天地之間孰非王臣而得謂其未爲人臣乎哉然則爲人婦者可知矣女子未嫁是未爲人婦也未嫁而已許嫁不得謂非人婦也禮言女子許嫁纓纓之義取乎繫身有所繫卽義無可絕義無可絕而絕以其未嫁也而寬之義無可絕而心有所不忍絕轉以其未嫁也而苛之夫以守義者爲非禮豈義無可絕而絕之者之有當乎禮耶禮準乎義義不關乎嫁與未嫁而視乎能守不能守余故曰霍勒霍屯氏之守義也禮也且人苟盡乎其實卽不當靳之以名未爲人婦而無媿乎爲人婦婦之可也春秋之法可進者進之則卽以霍勒霍屯氏爲節婦也亦宜雖然有奇節者必有盛名名之所在好名者趨焉世家大族門楣相尙其未嫁而守義者或爲勢之所迫而非其心之所安夫卽使其心未必如是而其跡

如是論者猶不能不以節予之而況霍勒霍屯氏之毅然決然初非有所迫而然其至性爲何如也於戲可以風矣余聞是事不勝嗟歎而又惡夫人之好爲苛論而適以便其苟且之私也因力辨焉以祛世俗之惑卽以爲天下之爲人婦者勸而天下名教之所繫有類乎爲人婦而較重乎爲人婦者其亦可以自決也夫

歸葬於女氏之黨議

袁翼

曾子問篇云女未廟見而死不遷於祖不祔於皇姑死則歸葬於女氏之黨示未成婦也予嘗讀而疑之及反覆於漢唐宋明諸儒之說而愈疑也屯之六二曰女子貞不字十年乃字後漢書百官志曰凡有孝子順孫貞女義婦皆扁志其門女之所謂貞者貞其節以從一無二天也故昏禮旣納幣壻之父母死則停昏旣葬致命於女氏曰有喪不得嗣爲兄弟女氏許諾而弗敢嫁也旣免喪女之父母使人請之而後嫁之女之父母死壻亦如之蓋男女有三年之喪嫁娶愆期可以易偶而女猶弗敢遽嫁者纓有所繫繫之於一爲正也請昏之始納采者被采擇也問名者知名字也納徵以皮幣者徵之言成至是而夫婦可以成也親迎之日父親醮子欲以上事宗廟下繼後嗣重之至也主人受禮及醮女皆於廟以先祖遺體與人亦重之至也昏之厥明棗栗脯脩贊見舅姑入室盥饋舅姑同日饗婦禮以一獻舅姑降自西階婦

降自阼階示傳付之義亦重之至也不幸猝然朝露不及廟見而不遷不祔歸葬焉何前之鄭重若是而後之忽置若是歟賈服曰禮婦至不成昏無問舅姑在否必俟三月祭祖廟後始配之故春秋譏先配後祖爲非禮未配則未成婦死而歸葬奚爲不可賈之言是矣然曷以斷爲不可先配也士昏禮合卺後御衽婦席在西媵衽席在東皆有枕北趾墀入親脫婦纓燭出媵侍於戶外當夕衾裯相共儀禮顯有明據而三月未配之說經無明文夫女無二天已侍墀寢卽爲所天豈所天而不使同兆乎況廟見與未廟見其間僅有相去數日者廟見而卽死得以祔姑先廟見一日死遽令歸葬此豈近於人情乎且前之昏禮鄭重如是旣昏之後枕席之久又如是而成婦不成婦必定於入廟投地區區之一奠又豈非理之至悖者乎晉江應元疑之而不得其通強作成妻成婦之說國朝毛奇齡從而附和之彼但知子婦廟見之爲孝而不知女子以身屬人名節大關有夫而不得同兆之爲至痛也班固曰廟見必以三月則善惡可知夫善者固廟見矣惡者將不廟見而出之耶設有介乎善惡之間者將廟見耶抑不廟見耶不廟見而衾裯業已交矣舅姑業已事矣婦人非祭不得入廟三月之中一旦有斬衰之喪不得復行告廟之吉禮或遲至期而婦死遲至再期而婦死則亦以未廟見而歸葬耶如曰某氏來歸祖禰之靈未接祖禰不知有是婦也故不遷不祔則不得葬於夫之黨然始至之時墀與婦並拜以告至朝廟矣此廟非卽祖禰之

廟耶祖禰之靈豈必待三月廟見而始知有是婦耶且曾子問篇又云親迎在途壻有齊衰之喪男女改服於門次卽位而哭除喪不復昏禮夫不復昏禮則不復廟見不幸於三月中婦死又將何說以處此耶國朝吳定因援儀禮舅姑已歿三月莫采之文以爲不遷不祔者未見祖廟也歸葬於女黨者未見禰廟也若舅姑逮存已執筭見焉則雖未見祖未見皇姑先王必許其葬於夫之黨而特不遷不祔也疑經而遷就以圓其說可乎哉愚考古禮有傳之於今而當時未行者有行之數十年而旋廢不行者禮之近人情者聖人弗禁則廢不近人情之禮又安得而禁之乎六經燬於秦火戴記皆漢儒補綴成篇魚目混珠纍纍不少非若儀禮之尙爲聖人完書也晉時易三月廟見爲三日之期溫公書儀朱子家禮並從其制三月中必無不克廟見之事而女子以身事人之義全受全歸矣我心匪石不可轉也我心匪席不可卷也邶風是詩爲衛夫人而作夫人至城門而君死入持三年之喪不返於齊此事在夫子定禮以前矣婦之報夫者如此其貞夫之報婦者如彼其恕吾故曰非夫子之言也

書劉貞女紀略後

方東樹

嘉興錢侍御儀吉言其巡視西城之年平谷民婦某氏自絞死下指揮驗狀無他傷民之父婦之父母列辭皆曰婦以舅怒其夫懼而死死愚也無冤余察婦所以死者甚可疑日訪於其旁近粗得其顛末趣召

民受辭一如其父言問諸鄰人亦如之乃獨引婦之父母及兩弟反覆導之卒皆如民父之言蓋婦家愿而畏事鄰人懼訟之及而不以實告余雖顯然明白而終不能引道路之言證成於訟廷惟自疚身有土地之責而不能爲匹婦伸理冤枉因書其事以著某氏之隱節侍御後遊廣州因以語於祁中丞竹軒中丞曰是獄不窮治則死者之心安因尙論夷齊衛輒事曰求仁得仁此婦亦是心耳侍御所讞獄在道光十三年而十六年又有劉貞女事劉貞女者儀徵人許字某氏年十七爲歸妻於其夫家而實未卽成婚居半歲忽自歸誓不再返父母驚而詰之泣不言旣而亦喻其有難言之隱不卒詢而聽之女勤鍼黹操苦役爲父母服勞未幾而父沒踰年而母又繼喪女侍疾奉湯藥不解帶者百餘日弗懈父母沒女哀毀欲以身殉不飲食數日賴諸親勸勉始節其哀自是以後代其兄經家事兄本貧窶疊遭大故兼頻年水患饑饉相仍家一歲而數遷女食不飽衣不溫曾無幾微愠恚意至十六年某月日夜忽自經死女兄澍實爲文以紀其事而曰妹不死於初歸之日懼以死傷父母心也不死於父母沒之日不忍以事重累兄弟也不死於飢寒播遷之日恐人謂其不堪貧也及今家稍裕而卒以死是妹之善其死以全其貞也方子曰女未嘗一日忘其死而顧以死不得其宜不遽死文信國至柴市之殉而心始畢王炎午乃欲早迫之非但不能知信國抑由於義之辨析未精也嗟呼聶政之姊能顯其弟貞女之兄能表其女弟豈非賢

哉豈非賢哉若平谷民婦之兄弟雖愚而卒得錢侍御祁中丞爲之表其微炳如日星矣又何憾焉余故爲牽連書之以著其義

書歸震川貞女論後

王廷植

此歸氏震川貞女論也震川爲有明一代文人言古文者多取法焉幸哉貞女何因而得有此論也貞女之事不著於古其姓氏亦不顯自歸氏之論出而辨之者多矣而貞女遂傳於千古矣其言曰女未嫁人而或爲其夫死又有終身不改適者非禮也是則以改適者爲禮矣其於禮引壻之父母死與女未廟見而死兩條而不引夫死一條何也曾子問曰娶女有吉日而女死如之何孔子曰壻齊衰往弔既葬而除之夫死亦如之謂夫死則女亦以齊衰往弔或又曰斬衰往弔既葬而除也經已明言夫死矣既令其服又令其弔謂非夫婦乎其爲夫死或終身不改適又何非禮之有若以改適爲禮則弔者一夫改適者又一夫而可爲禮乎先王制禮不强人以所難經言既葬而除而不言嫁與不嫁禮貴通而行之也除服而嫁禮也除服而不嫁尤禮之至者故曰禮順人情又曰禮之近人情者非其至者也彼女子有貴賤智愚賢不肖之不同必以一例繩之則非天下之通禮矣歸氏以女子在室惟父母爲之許聘而已無所與焉又謂女子不自知其身之爲誰屬焉又曰一禮不備壻不親迎無父母之命猶爲奔也非禮也是則以改

適爲父母之命矣夫娶女有吉日女年已二十矣納采問名納吉納徵請期五禮皆行皆父母之命也所未行者惟親迎耳豈女子尙不知其身之屬於何人乎孟子以親迎爲禮之輕者親迎則成夫婦此婚嫁之常禮也今不幸事變不能親迎而夫卽死夫死矣而於女遂無所與乎以前父母之命皆無有也又將請媒妁寫庚書壻家親迎以俟父母之後命乎禮所謂齊衰往弔亦以女雖未嫁而於夫之死不能愀然雖嫁之必待服之除也今之未嫁而夫死者有齊衰往弔者乎不齊衰往弔而卽改適其於夫亦薄矣何歸氏不責其非禮乎夫天地陰陽之氣在下爲河嶽在上爲日星女子之貞烈者其氣自足以壯山河而光日月豈乖之傷之之云乎彼改適者徒以陰陽之氣之有待於調和非是則不改適則未免言之太刻矣歸氏又以此爲廉恥之防焉夫以未覲面之夫哀其死而殉之而守之此禮義廉恥本於性生純乎天理絕無一毫情欲之私其往歸夫家是聞喪而捐生赴難並非私逃爲誰氏之妾也而竟詆之爲奔豈不詆夷齊爲篡乎何其言之背謬至於如此乎天地所賴以立者三綱而已君臣之位無敢干犯其委贄爲臣者皆名籍吏部者也及至國破君亡之時樞臣則開門矣宰輔則勸進矣百官有司則投名授職矣天地易位何有君臣而名達禮部之諸生乃以一衿之微誓不共戴與匹夫抗節効忠者不可勝數其得不謂之君臣乎父子之親毫無假借必有生育而後有子女今有族人男婦不存嗣已絕矣而親屬爲之立

後其爲後之名某字某而族人生前不知也而爲後者第於神主上書其奉祀名字祝告祠堂而爲後之子孫卽族人之子孫其得不謂之父子乎有婚嫁而後有夫婦至於勢窮事變未嫁而夫死者其女來歸夫家則其夫猶爲有婦是以女子而守夫婦之義也於俗人之已婚有室而死者則爲立後其無室者則否以子立繼不能有父而無母也今夫死是舅姑無子也夫死因未婚不能有後是夫絕嗣也女若曰吾姓氏年月吾父母書之綵帖經媒妁送之夫家矣委禽奠雁卽是聘禮而又受夫家之首飾衣帛是吾之夫父母命之也有夫婦之名焉有夫婦之義焉今夫死吾無夫也吾可以無夫而夫不可以無婦有女歸夫家則夫雖死而有婦舅姑無子而有子婦夫無後而可以立後矣其得不謂之夫婦乎天崩地傾之時必賴有爲之柱礎者而乾坤始得以不敝君臣之義絕而諸生守之父子之義絕而嗣子守之夫婦之義絕而女子守之國亡矣家亡矣身亡矣而皆有以使之不亡此以人事救天命之窮者也而其事之至苦至難則莫如女子其聞訃自經或見喪自盡則舍生取義者也在母家終身不改適則明哲保身者也至於歸夫家持喪服事奉舅姑撫一尺之孤撐柱夫家門戶則立大節名大義孔子所謂君子人也於至難至苦之事而爲至中至庸之行其闕喪哀痛仁也不改適義也爲夫持服禮也矢之以死確然知此是而彼非智也盟書在前生死不貳父母不能奪其志舅姑不能阻其來舜不告而娶未婚妻不告而嫁君子

以爲猶告也信也曾子聞諸夫子曰父母全而生之子全而歸之可謂孝矣斯言也惟古今之貞女足以當之矣歷觀書冊所載類皆秉性溫良知禮法專以貞白自砥雖境處艱難而甘之若飴履之若素舉凡世之富貴貧賤禍福利害歡戚憂懼患難死生皆不足以動其心而矢之一日卽持之百年可以赴刀兵可以蹈水火可以感天地可以泣鬼神宜乎與忠孝節義同爲國典所褒志乘所錄文人學士所傳述而鄙薄頑懦之夫所感奮而興起三綱立矣五常植矣雖聖人亦許其爲天地之完人也而歸氏且曰先王之禮不必以此勵世也噫婦女而不以貞節勵也亦安有所謂先王之禮也哉或曰今之改適者非禮歟曰禮也父母以其未嫁而嫁之則嫁之是已禮並未言嫁之非禮也不改適者重在以身許人旣許之不必有夫婦之事要必守夫婦之義也改適者重在以身嫁人必嫁之以行夫婦之事而後成夫婦之禮也夫婦之義無可逃夫婦之禮亦不可廢也但改適者其事多有曲折而亦不免有所忌諱其女家庚書必向夫家收回其定婚首飾儀物必退而還之夫家其改適之家必與前適之家非戚族又不親厚不如是則不免有隔礙而於心有所不安也而以爲非禮亦不可也

書清芬集後

張文虎

明歸熙甫以女子未婚守志爲過禮近世江都汪容甫復作議以佐其說甚哉二君之不知禮也古聖人

緣情以制禮度夫中人所能行者著之而不責以卓絕過高之行此禮之所以通於天下萬世也然其中有隱微疑似之間不能顯著之令者則以俟知其意者之善擇焉哀公問於孔子曰禮男必三十而有室女必二十而有夫也豈不晚哉孔子曰夫禮言其極也不是過也男子二十而冠有爲人父之道女子十五許嫁有適人之道推此則禮文之不可泥明矣是故三年之喪禮也世有若劉瑜之服除二十餘年布衣蔬食常居墓側者君子不以爲非也不能食粥羹之以菜有疾飲酒食肉禮也世有若張數杜栖隱之不食鹽菜哀毀傷生者君子不以爲非也師沒心喪三年禮也世有若子貢之三年以外築室獨居者君子不以爲非也汪錡殤也能執干戈以衛社稷則喪之如成人君子亦不以爲非也若如二君論則茲數子皆可議矣且二君所執者曾子問之文也其文曰旣納幣有吉日壻之父母死已葬致命女氏曰某之子有父母之喪不得嗣爲兄弟使某致命女氏許諾而不敢嫁壻免喪女之父母使人請壻弗取而後嫁之夫其不敢嫁者正以女已許人而重之也壻弗取而後嫁而不責以堅守者所謂度中人所能行也而後嫁者難辭也又曰取女有吉日而女死壻齊衰而弔旣葬而除之夫死亦如之注曰女服斬衰何服也服以斬衰則儼然其夫矣而不責以守節者亦度中人所能行也設於時有矢志不嫁或以身殉或願事舅姑者君子亦悲其情而許之而容甫氏乃比之齊楚之君死魯衛之臣號呼而自殺則必爲狂易失心

之人烏呼是何言也昏禮納采主人筵于戶西西上右几注曰將以先祖之遺體與人故受其禮於禰廟

曲禮女子許嫁纓注曰女子許嫁繫纓有從人之端也許嫁之初其重如此而比之魯衛之臣於齊楚之

君其不爲狂易失心之論乎昔者齊侯之女嫁於衛至城門而衛君死保母曰可以反矣女不聽遂入持

三年之喪弟立請同庖女不聽衛慙於齊齊使人告女女作詩曰我心匪石不可轉也我心匪席不可卷

也見列女傳蓋本韓詩說又衛女嫁於齊太子中道聞太子死問傅母曰何如傅母曰當往持喪喪畢不肯歸終之

以死見樂府詩集引揚雄琴清英此二女者豈不知有既葬除服之禮哉矢志不嫁節著千載容甫又將比之魯衛之

臣號呼而自殺乎高子問於孟子曰夫嫁娶者非己所自親也衛女何以得編於詩也孟子曰有衛女之

志則可無衛女之志則怠見韓詩外傳此卽所謂卓絕過高之行不可以責之中人者也以卓絕過高之行而

謂之狂易失心吾不知容甫之心何心也熙甫氏曰女子在室惟其父母爲許聘於人而已無與焉夫己

身父母之身也以己身許嫁者父母也父母許之而曰己無與焉此復成何說乎且夫禮非強人而束縛

之馳驟之也亦求其心之所安而已微箕比干皆諡爲仁伊周夷齊各成其是孔子聞孔悝之難曰柴也

其來由也死矣而無所褒貶於其間此所謂各求其心之所安也禮三代不相襲今古異宜父在爲母婦

爲舅姑服皆期而今則皆三年二君其能執古禮以反之乎孔子曰禮與其奢也甯儉喪與其易也甯戚

以今世俗波靡日趨浮薄苟有卓絕過高之行實足以激厲人心而二君者又從而非議之其亦異乎孔子之論禮矣然熙甫亦自知其言之過故於張氏女貞節記幹旋之舉三仁夷齊爲況而容甫遂怙終焉奉賢徐母吳孺人未婚夫死在室守志十五年聞姑病泣請歸徐事姑撫嗣子得厚成立事聞於學使者旌其廬士大夫有歌詠其事者得厚彙刊爲清芬集乞言於虎虎讀臨川昆明兩學使序辨熙甫之謬引而未發又未及容甫所議故爲推而詳之不自覺其辭費也

書應觀察所記張貞女事後

俞樾

余同年生應敏齋觀察出所記張貞女事示余余大書奇貞苦節四字於其卷首或問余曰未嫁而爲夫守節禮與余應之曰禮記曾子問篇曾子問曰取女有吉日而女死如之何孔子曰壻齊衰而弔既葬而除之夫死亦如之鄭注曰未可期三年之恩也女服斬衰孔氏正儀曰以壻服齊衰故知女服斬衰夫婦人不二斬在室爲父母已嫁爲夫今聞壻死斬衰往弔是固以夫之服服之也惟是聖人制禮本乎人情使必斬衰三年終身不嫁則是強人以所難行而中人以下之人其不能仰而跂者衆矣故爲之制既葬而除之除之而女得嫁于他族斯禮也所以全中人以下之人而使天下可以通行也世之儒者執此以繩天下之女子見有未嫁夫死而爲之守者輒以非禮詆之嗚呼過矣士昏禮鄭注曰婦人年十五許嫁

笄而禮之因著纓明有繫也是許嫁之後此身已有所繫屬矣故必待成昏之夕夫親爲脫纓今不幸夫死此纓孰脫之乎將遂不脫而又繫於他族乎是一繫再繫也將自脫之待其許嫁他族而又著纓乎是繫而不繫也以是言之設有壻死往弔而遂不歸奉舅姑撫嗣子數十年如一日者聖人必深許之也必不以非禮詆之也列女傳曰衛寡夫人者齊侯之女也嫁於衛至城門而衛君死保母曰可以還矣女不聽遂入行三年之喪作詩曰我心匪石不可轉也我心匪席不可卷也聖人錄其詩於邶風不以爲非禮明矣且夫聖人之禮豈獨未嫁夫死可以改嫁乎雖已嫁夫死亦可以改嫁也是故禮有同母異父昆弟之服使執此而謂夫死改嫁禮也可乎不可乎或據曾子問篇昏禮有吉日壻之父母死致命女氏曰某之子有父母之喪不得嗣爲兄弟使某致命女氏許諾而不敢嫁禮也壻免喪女之父母使人請壻弗取而後嫁之禮也是壻之父母死且得改嫁況壻死乎是固不然夫禮經之晦久矣此經兩曰禮也具有深意女氏許諾而不敢嫁禮也此禮之正也壻弗取而後嫁之禮也此禮之權也曰壻弗取而後嫁之可知壻取則仍歸此壻矣古人昏禮自納采問名至請期而成禮爲時初不甚久非如後世之論昏於髫鬢之年也故遇父母之喪待至三年之後已爲曠日持久聖人知久要不忘之義非可概責之中人以下也故其制禮委曲如此亦所以全中人以下之人而豈謂女必改嫁乎余所著羣經平義曾詳言之世儒不達

禮意遂謂昏禮成於親迎未親迎之前猶塗人也改嫁不爲過嗚呼豈有塗人而聖人爲制斬衰之服者乎推不二斬之義女已爲壻斬衰矣設壻未葬而已之父母死必降而服期乃旣葬之後又還爲父母斬衰聖人制禮有如是浮游不定者乎夫斬衰之服三年之喪也聖人旣爲制斬衰之服必欲其終三年之喪苟不欲其終三年之喪必不爲制斬衰之服是故旣葬而除之聖人之不得已也或又曰禮女未廟見而死不遷於祖不祔於皇姑壻不杖不菲不次歸葬於女氏之黨示未成婦也是未廟見且未成婦況未成昏乎是又不然婦者對舅姑而言未廟見故未成婦非謂其未成乎妻也妻之道成於親迎而實始於許嫁許嫁之後已有夫矣傳曰六禮不備貞女不行此因夫在而然若不幸而夫死則固當奔赴矣且其斬衰往弔也見舅姑乎不見舅姑乎旣往弔矣其必見舅姑可知也旣見舅姑矣其已成婦又可知也是故女未廟見而死不遷於祖不祔於皇姑示未成婦道也未成昏而夫死斬衰往弔示已有妻道也聖人制禮或遠之或近之豈可執一而論乎昔延陵季子一劍之細不因生死易心況女子以身許人而忍負之國家定制凡未昏守志者皆旌如例考之禮經則有斬衰之服稽之功令則有旌表之典然則子於貞女何譏焉余旣以應問者因次叙其詞而書其後

皇朝經世文續編卷五十八目錄

禮政九 喪禮

淵亭日錄一則

李文炤

喪禮論上

雷士俊

喪禮論下

雷士俊

雨不克葬論

張士元

貽某縣令書

全祖望

卑幼初喪不當受賀議

雷士俊

喪歸宜入家論

鄧瑤

請禁停喪稟

舒化民

東安禁金罐示

翁普恩

復曾滌生侍郎書

鄧瑤

墳塋禁步應遵 定制疏

駱秉章

丁憂定制疏

吳元炳

請旨仍飭丁憂道員回籍守制片

周瑞清

請嚴禁火葬積習疏

錢寶廉

釋哭補錄

湯金釗

皇朝經世文續編卷五十八

上海萬士濬子源輯

禮政九 喪禮

淵亭日錄一則

李文炤

親親也長長也貴貴也賢賢也此天地之常經雖越宇宙而不可易者也聖人之制服緣是以爲差而已矣第親親長長之服自古行之貴貴之服成周明之而尊賢之服則未嘗勒之爲經獨於孔氏師弟子見其略耳記曰孔子之喪顏淵若喪子而無服喪子路亦然蓋情厚則哀重不較其材也又曰顏淵之喪饋祥肉孔子出受之入彈琴而後食之是再朞而哀素以嫡長子方之也而師之於弟子倣焉而準矣記曰門人喪夫子若喪父而無服文有所不敢備也又曰孔子之喪二三子皆經而出情有所不敢忘也孟子曰孔子沒三年之外門人治任將歸入揖於子貢相嚮而哭皆失聲然後歸則哀無已而制有所限耳而弟子之於師倣焉而準矣記曰朋友麻去其緦服以別於三黨同其經帶以別於常人禮之經也又曰朋友皆在他邦袒免歸則已同族則用族屬之制既歸則反弔服之常禮之變也子游曰吾聞諸夫子喪朋友居則經出則否喪其師雖經而出可也於同道之中而復有所差焉所謂稱物而平施者與而朋友之

相爲也倣焉而準矣蓋先王之制民生於三事之如一隨其學之大小情之厚薄而莫不有師袁逢之於荀爽桓鸞之於向苗懷薦舉之恩尙爲之制服而況於教育之者乎其兼有五服之恩者則月數終而服除心喪免而經去伊川之於明道期年之外猶經也勉齋之於晦翁三月之外仍經也倘一時而賢聖並生幸而皆親炙之若蘇季明呂與叔之於程張雖各爲之服可矣若夫朋友之交居五倫之一輔仁責善莫不資之必俟虞祔之後乃釋弔服而脫經帶焉其在師友之間者當更餘數月然後爲安耳號叔之喪閔天泰顛散宜生南宮适皆爲之服故老聃曰朋友之服古之達禮者爲之也

喪禮論上

雷士俊

古之禮繁今之禮簡古之禮有其名必有其實今之禮名不存十之一矣而名僅存者實又亡焉世人從而雜附其見傳之日久其弊益熾以至於不可挽吉凶諸禮莫不皆然而喪爲甚吾試論之古斬衰三年之禮斬衰裳苴經杖綬帶冠繩纓菅屨居倚廬寢苦枕塊歆粥朝一溢米夕一溢米既虞窮屏柱楣寢有席疏食水飲既練舍外寢食菜果飯素食既祥始飲酒食肉復寢斬衰三年之禮如是則齊衰三年者可知矣夫錦繡之爲麗也而被之如有刺於其體也羊豕之爲甘也而嘗之如有毒於其口也家室之爲歡也而遇之如有病於其懷也先王知其然於是乎使之斥錦繡戒羊豕屏家室定以爲制今之人無故奪

其錦繡羊豕家室之適則相與嗷嗷矣奪者不樂而奪之者亦不樂先王斷嗜禁欲創爲喪禮古人守之不以爲難者悲切於內而躬安其際也嗚呼善矣今則不然親之始死惟衰裳經杖帶冠履不廢而飲食居寢大抵悉準於常數月之後輒章甫逢掖以與慶賀或采服不加於身又宴樂佚遊不以爲怪人非不愛其親也始於一二僞狂誕之徒放言高議直情矯世而壞聖賢之制以自使人樂其便己也而相與效之效之者日多聖賢之制日益壞世之人乘其敝乃無不爲耳目習慣狃爲當然雖有孝稱者頻顛不安亦懼世之指詈而無以自拔於流俗此甚可歎也嗚呼喪禮之復也難矣喪哀戚之隱也行立坐臥而不忘乎哀戚其文繁其事難此夏殷之隆也三月不違仁顏淵之學冉閔而下不可語矣而三年之久聲色美好之屬無所動其念進退升降一依於禮如順水之舟無待強勉此中心安仁天下之一人也由唐宋而視秦漢邈乎遠矣而繩以夏殷之隆彼所謂士凡庸委瑣同於工商而望以中心安仁天下之一人喪禮之復也難矣雖然君子之所謂師古者師其意也孟子陳井田畫地經野更張紛紜歸於潤澤夫潤澤者變而通之之義也觀其與滕文公言喪止於齊疏飭粥二大者而已識此可與言禮矣今夫衰裳經杖帶冠履旣未盡廢而飲食居寢可裁以先王之意由是而練而祥自重殺之以至輕使其不違衆不拂理儕之流俗而無駭考之聖賢而無愧奚爲不可哉德之盛者於人不必求備先王定制令過者俯而就

之不至者跂而及之後生小子喜於苟且弛懈自恣過此者少矣而不至者講說浸灌循其性之所近俛焉孳孳自勵於此可也喪禮廢久如吾說用其復也庶可幾乎古今相去遠甚也竹策篆書易以紙而尙隸豈可同哉拘禮而禮亡得其意以爲之不屑屑於細節而大體未嘗不存此孟子所謂潤澤也而人之致力於禮者雖一端亦有所益若其孔步孟趨周旋中規折還中矩則豪傑可以爲百世法者也

喪禮論下

雷士俊

今之葬無定期遲緩者或五六年或十餘年甚至數十年子孫累傳而後葬其祖父母曾祖父母者世俗之大失也然則當於何期葬記之所云是矣三月而葬也國子高曰葬也者藏也喪遲緩不葬是死無以藏也死無以藏可謂得其所乎人之死而墳墓也猶生而宮室也今夫人露棲野處則憂寒暑之患風雨之苦四體顛隳而心志拂鬱以生推死勢異道同且人雖近而三年以外必有其冠婚慶賀之禮既有冠婚慶賀之禮則必有絲竹燕饗之節以喪在殯而罷之是廢冠婚也懼廢冠婚而不罷是喪殯未葬而樂也晉荀盈卒於戲陽殯於絳未葬晉侯飲酒樂膳宰屠蒯趨入曰辰在子卯謂之疾日君徹宴樂學人舍業爲疾故也君之卿佐是謂股肱股肱或虧何痛如之夫臣之喪殯未葬君飲酒樂屠蒯猶有譏況其上焉者乎今世俗遲緩成風或難盡如古三月而葬矣三月之後大祥之前其擇而行焉不可以有踰者也

或者難曰今之久而後葬者非敢怠也蓋待於天時之利求於地理之善也子貢之甚何不思乎曰儒者知親之生而事死而葬已矣僥倖小人乃有拘於天時地理以冀得貴富者非儒者之所尚也君子行一不義而得卿相不爲而暴其親之遺骸以求貴富乎如世俗之惑而惟是之信則大祥去屬纊凡二十五月天時地理必得其吉而可以葬者也古之君子之盡於其親者何有禮也其居喪也始沒朝夕奠將葬祖奠既葬而虞既虞而卒哭期小祥小祥之祭再期大祥大祥之祭中月而禫禫祭其免喪也春夏秋冬必祭夫喪莫約略無文陳饌酌酒而已猶未及乎二獻與侑食也自虞逮禫三獻繼以侑食矣猶未及乎受胙與餼也至春夏秋冬之祭則三獻而侑食而受胙而餼彬彬情儀悉盡由此言之春夏秋冬之祭全其爲祭矣虞雖變而之吉祭未正其爲祭之禮也而世俗於居喪不當吉祭而遽吉祭其免喪後當吉祭而又不吉祭遂至終其身子孫與祖考絕不相接者廟不立而祭之禮不講也嗚呼古之宗法亡矣所恃糾合乎子孫者惟春夏秋冬致祭子孫羣集則相親相親則冠婚必告死必訃有善相勸有過相戒今五服之親疏遠如路人平昔殘狠不肯往來有忿則聚而爲訟以爭錙銖之利廟不立而祭之禮不講豈獨薄於祖考哉而於祖考薄者此猶可痛也

雨不克葬論

張士元

春秋宣公八年冬十月己丑葬我小君敬嬴雨不克葬庚寅日中而克葬定公十有五年秋九月丁巳葬我君定公雨不克葬戊午日下昃乃克葬左氏曰雨不克葬禮也禮卜葬先遠日辟不懷也穀梁氏曰葬既有日不爲雨止禮也雨不克葬喪不以制也是二子之說不同將何所從乎吾嘗考之禮矣士喪禮藁車載蓑笠鄭康成曰備雨服也雨服備則葬固有行于雨中者矣王制記天子諸侯大夫士庶人之喪禮而繼之曰庶人縣封葬不爲雨止獨言庶人則士大夫以上得爲雨止矣說者曰當在廟未發時雖庶人亦得爲雨止及其已發在路及方葬時則不爲雨止此卿大夫士庶人之所同也若天子諸侯則無論在廟在路及方葬皆爲雨止其說美矣然亦不可泥也經言貴賤喪葬之制甚詳而獨於雨中之克葬不克葬則言之頗略何也以其事難預定而貴賤之等不可以天雨別之也天子諸侯之葬也禮儀多則固當爲雨止士庶人之葬也禮儀少則固不當爲雨止而雨亦有大小時亦有蚤暮其行之者亦有貧富豐儉豈可一概言之哉然則左氏與穀梁氏之說果孰爲得春秋之旨乎曰吾有見于曾子問矣曾子曰葬引至于壙日有食之則有變乎且不乎孔子曰昔者吾從老聃助葬巷黨及壙而日食老聃曰止匱就道右止哭以聽變既明反而後行曰禮也反葬問之曰夫匱不可以反者也日有食之不知其已之遲數則豈如行哉老聃曰柩不蚤出不暮宿見星而行者唯罪人與奔父母之喪者乎日有食之安知其不見星也

且君子行禮不以人之親戚患夫日食不可以遽葬兩獨可以急葬乎以此言之則左氏所謂辟不懷者允矣

貽某縣令書

全祖望

祖望於乾隆三年十二月遭先君大故四年十二月接丁先太孺人憂持服至乾隆七年三月不計閏已滿喪期然而二喪各應有二十七月之期則未足也祖望私心未安又念禮制有所限故行心喪至八年八月以足五十四月足下過之以爲律之所無夫惟律之所無故以心通其窮不然何以謂之心喪也明時有疊遭丁憂之例如此者請於提學蔡文成公文成不以爲然以爲三年之喪本於心之至痛後喪之至也豈能抑其至痛之心使待前喪之畢而後以次相及此必不能之事也則至痛歷三年不得不除不必踰定制而過於厚也文成之言是矣但祖望以爲是在人子自返其心苟其心之痛已盡則除之可也如其未盡雖引而伸之以至五十四月亦可也宋史天禧四年御史臺言文武官并丁憂者相承服五十四月別無條例乞下太常禮官議太常議引喪服小記小喪除服以及鄭康成賀循杜預說謂無通服五十四月者宜隨其先後而除是卽文成之說也乃寶元中王恪以父母相繼不祿乞持五十四月服仁宗特許之則事固有可變通不盡泥也喪禮大事變禮至多宜以參考今執事驟聞而駭之懼爲大部所詰

不知不足懼也大部果詰其罪亦詰祖望而罪之耳於他人無與也且祖望守律於服則已除之而心喪則未除較宋明人所行似已竝全而無窒礙儻必以爲有犯定律則卽揭不孝之罪請秩宗諸侯博議之不孝已行之矣無所諉咎也

卑幼初喪不當受賀議

雷士俊

崇禎十三年五月丁未余弟淑度沒六月己未余生日也余於是年三十矣廣陵之俗雖三十遐邇必庀觴豆承筐篚以爲壽如八九十者是日人咸壽余不以有弟喪而止余力卻之七月庚子余繼祖母春秋六十家君以其事問余余請罷祝而於來年行焉通國之士咸怪而駭余曰是不讀書故不曉也乃援引古今以爲議先王之制喪禮自三年而外有期有大功有小功有緦麻非以飾觀也蓋哀動於內而服其服因以惡其飲食變其居處哀之有餘者非此無以安哀之不足者觀其服而勉以致焉所謂以故興物也而哀有不同服亦有差哀之重者其服重服何準乎準於哀也三年之外期爲尤重其服在尊者不論卑者若父之於子兄之於弟夫之於妻皆彝倫至戚而不能忍者乃死亡之際金石管絃不輟一家之中而胡越隔視一人之身而吉凶殊類恣睢錯亂猶可謂之禮乎今三年之喪世之失多矣或猶知其謬而不以爲然也而期之喪未數月而壽辰或從而婚嫁鄉黨宗族往賀之遭喪者受賀恬不爲怪是事也尊

者於卑者尤甚雖粗有見識之輩莫覺其謬者其意但曰家統於尊尊者之慶不當以卑者止也吾謂其不可者也期之喪次於三年一等其冠綏之式衣裳之儀皆酌於三年之喪而稍輕焉既葬而始飲酒食肉矣而終其喪不與宴會今於其不宜飲酒食肉之時而遽宴會其不可一也飲酒食肉與宴會禮有其限而無分於尊卑也而期之喪莫重於父之服子何也父與子分之相去雖遠而其義則一父之於子如子之於父也子於父悲痛者累年父於子方死而嬉笑猶常無是理也故古禮父之服子有三年有不杖期國朝之禮長子衆子皆以不杖期依古之道推而祖之於孫亦有然者今以父而屈其子之喪又或以祖而屈其子服子之喪皆是臆說其不可二也賀必備音聲招賓客以爲歡禮鄰有喪春不相里有殯不巷歌父子之親非鄰里可比音聲之設踰於相歌其不可三也鋪几筵以招賓客而作音聲以悅之將服衰麻與而娛耳目快心志是廢其實將棄衰麻而不服與是又廢名也服與不服俱爲舛乖其不可四也晉知悼子卒殯未葬而平公鼓鐘樂杜蕢揚觶爭之祖父雖尊子孫雖卑不過君之於臣數月之喪殆猶殯焉喪殯而樂是謂樂哀其不可五也禮爲殯服降有長殯中殯下殯無服之殯非殯則服不降服不降則其執喪之禮可知也今冠而有室年踰二十不謂殯矣而齊於短折之嬰兒但服其服而已是誣乎死者其不可六也會典期年喪服不許守制凡律之所禁者其必有爲此者也先賢期喪令之所著尙乞守

制以伸其哀今禁守制矣禁之所不及而猶違禮以便其私是何今不如古其不可七也則賀與受賀之非禮昭昭矣而婚嫁者其失又不在賀與受賀也人之所以異於禽獸者有情以相愛有文以相接若殘忍刻薄而率意徑行幾何不爲禽獸詩曰人而無禮胡不遄死言人之所以生者以其有禮無禮者當速死也

喪歸宜入家論

鄧瑤

世俗有狃於舊習忍心悖理絕不爲怪者喪歸不入家是也夫幽明雖隔情理無殊今人離鄉井遠出或數年十數年始歸而其子孫舍於宅外不使入家已之心安乎遠歸者許乎則不幸以客死喪抵里門爲之子孫者乃不迎請入室遽送之荒郊墟隴間猶有鬼神其肯許乎子孫之心又能安乎吾知死者必不許子孫之心亦必不安也然而終不能改者則亦狃於習俗無以古義責之耳禮曾子問曰君出疆以三年之戒以棊從君薨其入如之何孔子曰入自闕升自西階如小斂柩入自門升自阼階君大夫士一節也雜記諸侯行而死于館喪至於廟門不毀牆遂入適所殯大夫士死於道至於家載以輜車入自門至於阼階下而說車舉自阼階升適所殯此皆喪歸入門事死如生之明證聖人準情定禮至當不易之道也又周禮殯在西階之上惟死於外者殯當兩楹之中示不忍違之也蓋待死於外者尤有加禮古人用

意之厚如此左傳載齊莊公以襄公二十五年爲崔杼所弑葬諸士孫之里二十八年齊人遷莊公殯於大寢此則死已三年以其先殯不成禮猶從郭外出而遷諸路寢爲之改殯齊人卒無所忌以爲必如是臣子之心始安也今之爲人子者不幸親死於外奈何不援禮治喪使其親魂魄遠歸竟不得一入家門少紓客死之慟耶今制以王事死於外者許入城治喪都邑之有城門猶人家之有大門也朝廷於臣子之喪曲加恩卹許令入城子孫於祖父之喪乃不許其入家悖孰甚焉或曰一家之中有諸父兄弟在且多聚族而居以尸入慮衆有違言顧有異宅而處亦不肯以親喪入門者此豈慮諸父昆弟之有違言乎且諸父昆弟不令以喪入門心亦豈能自安耶蓋有與尸入門其家不利之說據於中遂相率背禮雖孝子慈孫不免爲所惑豈不大可傷歟夫世俗之說固已然有未嘗與尸入門而潭潭第宅不數年轉鬻他人且或夷爲田圃者又何解耶夫家門之興敗關繫豈在於此仁孝之心未篤故利害之見得而淆之也抑近時閭閻百詩在京邸易簀時語其子曰汝扶櫬回淮到則位我本宅葬宜速其子從之以是知客死者其魂夢固眷眷家門游處之所必以親至爲慊卽歸土無遺憾也嗚呼世之忍死其親於數千里外不迎喪入門者抑何薄耶悖謬之俗不可不易因援引禮經以明其惑世有讀書守禮君子尙其敬念之哉

請禁停喪稟

舒化民

竊維俗奢示儉禮貴稱財州境地瘠民貧風俗日趨華靡冠昏交際皆然而喪葬一事尤甚惟夫競事奢華而力有不逮遂有停喪不舉停柩不葬或數年或數十年甚有終身不葬者訪諸城鄉比比皆是似此習俗相沿伊于胡底某當於三月間出示並傳集地方莊長將所管保屯查明未葬之柩共有若干開單彙齊呈報去後嗣據各地方稟報城關內外共有停棺二百七十一柩四鄉三十四保共有停棺一千九百二十六柩各衛屯所共有停棺二千七百二十九柩查閱之餘不勝駭異遂復剴切曉諭定限三個月內一律埋竣頃定期已屆現據城鄉稟報已葬者二千三百餘柩其有實因山向年月不利者懇請展限秋以爲期四百二十餘柩當示限之初士庶之家中人之產多有以爲不便者迨催促再三諭令紳士作倡百姓遂多觀感興起者某誠恐紳士中相沿向來飾外之觀驟難破除門面之習先於一應旌杠執事及吹手擡夫人等咸禁其平減受值毋許多求篷廠賓筵概從節省稱家有無隨宜辦理則又咸以爲便計城鄉停喪之家此時已葬去十分之九矣因思此種風俗各處皆然卽如某前曾任長清歷城等處詢悉民間俱不免蹈茲積習則他處可想而知合無稟請憲臺俯賜通飭各屬頒發告諭凡停喪之家俱示以限期一律埋葬其無主暴露者飭令地方官給掩埋之資該地保人等亦無不樂於從事者如此則無論家之貧富時之久暫在亡者皆可以得土爲安而生者皆可以量力終事似於人心風俗均有裨益矣

東安禁金罐示

按東安縣屬湖南永州府

翁普恩

照得 朝廷立法首嚴不孝之誅人子事親當繹無違之旨蓋喪葬惟期乎盡禮而墳塋尤冀其永安此貴賤所同然而智愚所固有者也乃聞此間風俗於其祖父之死卽存一將來改葬之心殮以薄材瘞之汙壤故令水淹蟻蛀以速其朽且化而後邀同族衆畚鍤相偕發塚劈棺取骸檢驗其尙有枯筋纏絡血痕漬滯者則以刀銼刮剔之以鼎鑊糜煮之傾置盆中混加洗滌然後請之入甕其甕與常製異上下相合如缸高廣俱不盈尺底鑿數孔以吸地氣有專門業此以濟惡者美其名曰金罐祇此尺餘金罐中舉所謂三百六十五節骨殖者無論爲首爲足爲面爲背羣焉顛倒錯亂於其中而人子之心於是乎大慰矣遂乃邀請地師購求吉壤選時擇日重奠牛眠戚友親鄰咸相走送鮮不以爲發福發祥可計日待迨至久無佳耗甚或轉見衰頹則又將此金罐再發再剝再洗再瘞竝聞有一歲屢遷卒至拋棄而不敢聲張者蓋以金罐取攜甚便費用無多可以爲所欲爲不若昇棺遷葬之艱於舉事也然此猶不過惑於風水之說罔知禮義之厚將其祖父之枯骸以爲子孫邀福之具耳又有貪人吉地詭謀侵葬私將骸罐偷附他人墓側以盜其吉及被主家知覺投族告官受罰受刑仍然斷令遷葬未得其利先受其害亦何樂而爲此然此猶不過意在吉地成此陰謀而非有訛詐勒索於其間也又有奸狡之徒或因貧困難堪或

因訛詐不遂特挖祖骸一具葬入他人墳山騎頂當胸故礙風水勒索幫錢改葬方肯遷回者並有用罐盛取猪狗他骨暗埋入墳誣人換易者亦有埋一空罐誣人拋棄者且有預埋破罐誣人毀罐棄骸者種種虛誣不堪枚舉然此猶不過捏詞詐索非真有毀棄換易之事也豈意焚吉之徒因見無人守墓竟於昏夜挖塚出骸投諸水火卽以其祖之骸易置罐內修築完好主家不知猶時時拜祭他人之祖父以祈福祐而不效且歸咎於此地之無靈又復挖出再遷更求吉地而此盜葬者之子若孫方竊幸詭計之獲售而亦卒無一效甚且不轉瞬而同歸滅絕斯固焚吉者之棄人祖父以便私圖自必難逃天譴而實由主家之自用金罐自毀祖骸自貪吉壤有以啟之也向使有封有樹有墓有棺其能容盜葬者之得所藉手耶又有盜葬之罐被人知覺密爲挖出其骸遺之糞廁或與牛骨同燒而暗以猪狗他骨仍藏罐內照舊掩埋而此盜葬之家見無速效亦復再挖再葬竟以猪狗之骨爲其祖骸又爲主家所竊笑而稱快者卒之兩敗俱傷同歸於盡又天理之可奪乎地理者也他若懷仇挾恨怨毒難伸而暗棄其仇之祖骸以爲報復之計者尤不可以罄述何莫非自用金罐之所致耶然此猶不過陌路仇讐傷天害理爲此凶狠忍毒之行而非有水源木本之思也尤可異者則以一脈之親互相殘賊同一父也而有利某子不利某子之分於是長忽遷諸東仲忽遷諸西叔與季忽遷諸南與北而母之爲嫡爲繼爲庶者更無論矣至若

支分派衍子姓繁多聽信形家之言謂此地於某房爲利於某房爲害於是以長房之祖骸盜葬於次房之墓側又或以三房之金罐竟易以四房之祖骸而水火之投糞廁之遺以及雜諸牛骨之燒又皆所弗計者矣嗟乎此金罐之害之粗可舉似者也其中情弊詭譎萬端有非人情所能擬議以故此爭彼拒殺伐相尋訟棍土豪從而構訟禍連鄉里仇結子孫累月經年傾家蕩產而猶鰥鰥焉抱此金罐以爲奇貨可居而至死不悟然則金罐之害可勝言哉所以 聖朝制律備極周詳不孝之誅至嚴且密而鄉愚無識竟皆毅然爲之毅然認之亦若分所當爲而略無妨礙也者今若驟繩以法未免陷於不知合行恭繹律文明白曉諭爲此示仰闔邑軍民人等知悉爾等如有從前已用金罐未經入土者限於一月以內趕緊安厝以後不得再遷違者重究其自出示以後再有發掘祖父屍骸改用金罐者卽行照律治罪其有製造金罐售賣與人者准人捉送到官一併嚴究茲將律例分列於後庶使一目了然知所儆戒無自罹於極典以力挽夫頹風則仁孝之心釀爲和氣是則守土者之厚望也切宜懍遵毋違特示

復曾滌生侍郎書

鄧瑤

五月十四日接手書敬悉先丈窀穸已於近宅覓得安厝之所天佑巨孝必能速獲吉壤奉安先靈此理之所必然也承示復吳南屏學博書於奪情大事反復詳言具見孝子仁親忠臣愛國至意而讀至欲守

制則無以報吾 君高厚生成之恩不守制則無以報吾親三年鞠育之懷諸語尤不禁感喟泣下兩次奪情從古所無閣下不幸遭之設身處地實難爲懷故自得書以來月餘未報非故遼緩誠慎之也奪情之舉史不絕書在唐已有世俗衰薄士以奪服爲榮之語至明代益難枚舉羅一峯所云朝廷以奪情爲常典搢紳以起復爲美談也茲事誠非仁人孝子所忍言然以今日時事與閣下遭際論之則若難固執禮經徑行一己之私也閣下自壬子冬 詔起督辦團防并奉統率水師肅清江面之 命任重責隆優眷無比而閣下在軍中首尾六載竭誠盡瘁以忠義鼓勵衆將恩威撫馭士卒故能力支危局漸有轉機朝野皆倚爲辦賊重臣謂不可一日不在軍也今奉諱歸里軍中亟望勉起視師速殄羣寇閣下必泣守聖室不出自是守禮之正羣議所不能奪顧二三知好必欲促之使出屢以違禮之言強聒寢苦枕由者之聽蓋其意實出於萬不得已也昔者子夏問金革無辟孔子旣斥爲從其利矣顧又曰魯公伯禽有爲爲之鄭注云伯禽有徐戎作難喪卒哭而征之急王事也然則魯公以三年之喪起而急王事孔子固未嘗以爲非矣卽前代李文達奪情視事一峯先生極疏劾之末乃云脫有金革之變亦從墨衰之權使任軍事於外盡心喪於內則羅先生亦未嘗禁人墨絰從戎但大臣無故起復則斷不可耳閣下值此滄海橫流中外倚賴之際勢旣不可不出出亦必難免物議如來書所云四五年後卽當有起而議其後者

顧以吾夫子伯禽有爲爲之之言與一峯脫有金革之變數語相質論者當亦不肯深訾而曲爲之諒至孔子所謂從其利者則爲至不肖者言之閣下講道數十年忠信久孚於衆四海之大無智愚賢不肖斷不忍以此疑吾滌生先生者也昔先友江忠烈公居父喪當事迫令從軍及以功敘薦剡忠烈知之則泣辭曰吾滌生曾侍郎屢書戒我卽有勞必不可受保薦貽譏清議忠烈嘗手書徧告知交今其書尙存吾篋可共白也雖然閣下至性純孝不幸兩次奪情吾知必不肯違禮輕出無已則固請終喪 朝命必不許號泣告墓以行事平之日請於 上家居心喪三年少報生我鞠育深恩庶幾忠孝兩盡而於義理似爲不悖閣下其采擇之江忠烈之歿 朝廷旣命於江西湖南各省建立專祠頃商之邵樸山太守於寶慶濂溪書院爲忠烈特立一祠申鄉里私祀而以新化鄒叔績觀察漢勳邵陽周光庭副將雲耀及忠烈弟汝舟觀察忠濟從弟誠甫副將忠信附祀此今日激揚忠節廉頑立懦之舉當爲大賢所願聞故敬以告

墳塋禁步應遵 定制疏

四川總督 駱秉章

竊臣於同治五年十二月初三日接准廣東撫臣蔣益澧咨准戶部咨行會議廣東督撫等奏官山塋葬請照山糧升科一摺同治五年三月二十八日具奏本日奉 旨依議欽此抄錄原奏知照前來竊臣於

同治四年閏五月十五日具奏粵省墳山禁步應遵照例定丈尺不宜以省章斷案六月初四日內閣奉

上諭墳塋禁步自應恪遵定例辦理若概用本省章程等因欽此仰見 聖明洞燭 諭旨煌煌自當

欽遵辦理不意郭嵩燾固執已見復理前說臣本粵人見聞有素竊謂升科固足昭覆載之公而禁步仍應遵 皇朝之制不宜舍定例而用章程臣祖塋被鄧輔廷盜葬之案已結非敢屢以私事冒瀆 聖聰

第以前署廣東撫臣郭嵩燾陳奏各情涉於迴護矯強既舍 朝廷向來通行之定例而用未經奏定畫

一之省章則官吏無所遵循可以高下其手民間愈多侵佔不免爭鬪日煩有關通省大局且因臣一人

祖塋之案郭嵩燾遽改定例使粵民受無窮之累臣不敢緘默敬請爲我 皇上縷析陳之如原奏謂粵

籍例定官民禁步恃勢強佔地方官至不能成讞乾隆年間詳定橫直二丈穿心四丈之章程不論紳民

統以橫直各得二丈爲限其前次來咨又稱粵省穿心四丈章程計由墳心數至邊每面實止一丈與定

例庶人塋地九步穿心十八步之說不惟丈尺迴殊卽當日如何用此穿心二字已無可究詰等語是郭

嵩燾故以穿心二字爲不可解強就其每面各得二丈之說不過欲爲侵葬者開脫罪名遂以穿心四丈

前後左右應各得二丈者臆斷爲每面實止一丈固執省章以廢定例竊以例定墳塋丈尺卽所以杜強

佔地方官按照例定丈尺斷案何至不能成讞豈斷以 朝廷之定制而敢不遵斷以本省之章程轉相

懾服者若謂粵省塋地盡列官山與別省情形不同臣詳譯例定墳塋禁步正爲官山而設如係契買之業則凡在四至之內無論前後左右若干丈尺皆非他人所能進葬又何必以禁步爲限耶故定例於有主墳地切近墳旁盜葬及止於田園山場內盜葬論罪各有等差是契買之業不必限以禁步可見禁步專指官山而言郭嵩燾於例意未免誤會原奏又稱以省章爲斷丈尺多少出價承受紳民猶可通融辦理以例定禁步爲斷則直授豪強以兼併之資等語查例定墳塋禁步蓋示以一定之限制而後爭端可息若謂斷以省章則丈尺多少出價承受猶可通融是富者力能出價即可踰越於省章丈尺之外貧者無力出價必須拘守於丈尺之中是以貧富爲強弱而不以曲直定是非也卽此通融二字實授豪強以兼併之資勢必至大啟爭端無所禁止何如有定例可循官民皆知所遵守也事必察其虛實例定墳塋禁步頒天下二百餘年薄海臣民無不遵守不聞別有豪強藉此兼併向來粵東一省亦不聞有藉此爲兼併之資豈朝廷之制度久已通行寰宇今獨格於粵東耶原奏又稱近年捐例廣開一命之榮皆得捐請封典按照品級援例爭論禁步則富強有勢力者其侵佔倍甚於從前貧民復何所措其手足等語查墳塋禁步官民各有例定丈尺可循揆諸父爲士子爲大夫葬以士祭以大夫之義總以歿者之有無官職爲斷豈得藉捐請之封典爭禁步之丈尺而進佔他人之地界耶原奏又稱粵東紳富有勢力

者頗多若皆據例定禁步爲詞祖墳附近進葬者皆可援例責以侵葬其已葬者亦可呈請押遷訐訟將無已時等語查歿者若無官職其墳塋禁步應照庶人九步爲斷儻被人侵葬於禁步之內自應控官押遷照例辦理至遠年所葬舊墳彼此已相安於無事亦無人混請押遷設有逞刁妄控者官可繩之以法亦何至訟無已時現今奉 旨升科既經升科者則官山變爲己業自無豪強侵佔之弊至無力升科者其禁步仍應遵照定例庶人塋地九步穿心十八步爲限以昭公允而息爭端不宜以省章定斷益滋侵佔盜葬之風致釀發掘毀棄之獄總之官山固應升科禁步須遵定例省章流弊孔多必至紛爭不息有妨大局終不可用郭嵩燾所報省章不過迴護一己之偏見臣請仍遵定例實關繫通省之風俗相應請 旨飭下廣東撫臣體察輿情申明定例妥議覆奏則全粵軍民幸甚臣不勝悚懼屏營之至

丁憂定制片

吳元炳

再各省丁憂人員從前因軍務 奏留在營或因道路梗阻或因無籍可歸准其在服官省分廬墓守制服滿就近咨報起復嗣於同治八年吏部議覆御史王師曾條奏摺內軍務肅清省分丁憂人員均令回籍守制並申明回籍起程限期等因奏奉 諭旨咨行通飭在案定例何等嚴密無如官場積習相沿往往有實缺候補各官丁憂後逗遛省垣鑽謀局務各項差使延至服滿時僅遣家屬回籍呈報到籍並起

復請咨到省始則偶有一二繼則習爲故常臣已飭令藩司與各局司道逐一查明在省丁憂人員一概勒令回籍不准委派差事本在各局當差者亦不准藉口留差現在道路通達該員等並非無籍可歸不過希冀差事貪戀薪水避匿喪之名而有忘親之實此等屬員本原旣薄辦事必無實心迹其流寓不歸之日無非爲貪緣奔競之謀而於仕習官方尤有關係相應請 旨飭下各直省督撫一體嚴查所有實缺候補各員呈報丁憂後如有在省逗遛者遵照奏定章程勒限回籍倘查有遺屬虛報到籍請咨起服者立予嚴參以肅官常而符定制

請 旨仍飭丁憂道員回籍守制片

周瑞清

再臣伏讀本月二十四日 上諭御史李桂林奏請將丁憂道員破格留用一摺前任直隸天津道丁壽昌現在丁憂開缺旣據奏稱該員潔己愛民輿情感戴著俟百日孝滿後准其留於直隸交李鴻章差遣委用該部知道等因欽此竊惟奪情非盛典不孝非美名該御史于丁憂例應終制之員暫請仍留本任不知大體顯背常經此端一開則忘親貪位之徒皆將百計貪緣藉詞聳聽于人心風俗關繫匪輕欽奉諭旨僅准留直差遣不准仍回本任原所以示限制抑臣更有請者軍務省分差委需人曾將丁憂人員留營以資熟手揆諸墨經從戎之義尙不大背直隸現無軍務天津並非軍營 畿輔多才豈尙乏人

差委未必多丁壽昌一人公事始濟少丁壽昌一人則公事皆廢也名雖止於差委蹟終近於奪情丁壽昌果係賢員必感焉不能終日若其貪戀榮利思炫己長則李鴻章亦將謂其本原既薄必不仍前任用所益者少所損者多應請 旨仍飭該道照例回籍毋庸留於直隸差委以免效尤似于吏治倫常大有裨益至李桂林應 詔陳言首以違例背禮之詞上瀆 宸聽嗣後有似此冒昧陳奏者伏乞 嚴旨申飭以杜莠言亂政之漸

請嚴禁火葬積習疏

錢寶廉

竊維 聖朝之治世教孝爲先人子之事親慎終尤重自世俗創爲火葬之法竟有燬墓燒屍殘忍其親而不顧者此風臣雖習聞而未得其詳近於同鄉公車中訪之則情形更慘習染更多誠爲蔑倫悖理之尤不可不速行禁止也查火葬之習浙江杭嘉湖三府皆有之而莫盛於嘉屬之石門桐鄉等縣彼處民多業蠶以其不便於種植乃於中元冬至兩節前後相率而爲火葬之舉其發塚開棺而不燒屍者謂之明葬其發塚燒棺而不見屍者謂之暗葬舉先人之遺骸而付之一炬火初發則柩之中嗚咽有聲火既息則骨既煨燼間有年久屍僵者乃以斧斤支解之仍復投諸烈燄傷心慘目所不忍言而爲之後者方且延僧衆召親朋飲譙歡呼金錢揮霍紳民勸之而不顧官長禁之而不悛冥愚荒誕舉國若狂實是風

俗人心之患況由嘉屬而推之他府由浙江推之他省漸染效尤其貽害伊於胡底查例載子孫於祖父
母父母墳墓燒棺槨者杖一百徒三年燒屍者絞又載於他人墳墓燒屍者杖一百徒三年若總麻以上
尊長杖一百流二千里定例本爲嚴密但鄉愚無知不諳例禁而地方等官又以爲不急之務玩忽縱之
遂致積久盛行釀成澆俗若不嚴行申禁誠恐頑梗鄉民罔知悛改可否請 旨飭下各直省督撫通飭
所屬各州縣曉諭嚴懲並責令紳耆地役人等分段訪查多方勸諭如有仍前火葬者無論父母尊長以
及卑幼他人均卽報明按律治罪至實在無力殯葬查各省州縣中向俱置有義塚兵燹之後廢弛尤多
每經紳富等捐建公阡應由地方官再查各鄉中拋荒絕產添設義塋聽其報明附葬其有不願附葬者
有地則諭以及時安厝無地則權宜檢骨坎埋均不准私行火化以挽澆俗而勵孝思再臣查嘉興府各
屬更有一種刁惡棍徒往往遇有葬事糾約無賴多人攘取物件訛索阻撓致令貧富善良皆以葬親爲
難事而停閣暴露莫可如何此等阻葬刁風尤爲地方之累相應請 旨一併飭令地方州縣官嚴示查
獲重懲俾鄉邑良民得以及時營葬似亦教孝施仁之一助

釋哭 補錄

湯金釗

哭從叩主聲不主涕也泣從水有涕而無聲也故泣曰泣血言如血之出濡而無聲也哭則號之而已哭

泣兼則聲涕俱有專言哭則不必盡有涕孔子遇舊館人之喪入而哭之出使說驂賻之曰予鄉者哭之遇於一哀而出涕予惡夫涕之無從也是初不意其出涕也是不出涕不害其爲哭也孟子以哭死而哀爲性者之聖是非至聖固不能自然而哀也伯高死赴於孔子孔子曰吾惡乎哭諸兄弟吾哭諸廟父之友吾哭諸廟門之外師吾哭諸寢朋友吾哭諸寢門之外所知吾哭諸野於野則已疏於寢則已重夫由賜也見我吾哭諸賜氏聖人從容中道不可得而知若論常人之情聞赴時擬議如此未必一哭便出涕也陳莊子死赴於魯魯人欲勿哭縣子曰今之大夫交政於中國雖欲勿哭焉得而弗哭且哭有二道有愛而哭之有畏而哭之於是哭諸縣氏夫旣欲勿哭矣焉得出涕畏之故不敢不哭焉得有涕然而君子不謂之不哭也此哭不必有涕之明徵也古之人弔喪必哭聞喪必哭情有親疎誼有厚薄固未必其欲涕斯涕至卽執親之喪自始死而小斂而大斂而成服而朝夕奠而遷奠祖奠遣奠而葬而反哭而虞而卒哭而祔而小祥大祥而禫哭不知凡幾始而無時繼而有時行之無數歸於有節安得人人出涕節節出涕然而君子不謂之不哭也不謂其不如無哭也噫今之觀禮者吾惑焉見哭無涕謂之僞哭哭者亦遂慮人譏議且自慚其哭之不以情也慚與慮分其哀心而涕愈不可得而聲遂不敢出諸口卽哀至涕下亦忍不放聲於是乎禮當哭而不哭而喪禮或幾乎熄矣不知哭主聲不主涕也不必論其有涕無涕

也猶之當杖而杖不必其果身病體羸也當衰絰而衰絰不必其身果不安美也當食粥蔬食而食粥蔬食不必其口果不甘味也當居倚廬寢苦枕由而倚廬苦由不必其果哀親之在外在土也故人可勉也若以涕責哭是兼泣以訓哭也是猶訓飲而兼食訓衣而兼裳也是不通之論也或曰然則不相率而爲僞乎曰先王制禮過之者俯而就不至者跂而及賢如子張猶曰先王制禮不敢不至焉於是中焉旁皇周浹固不能望之大賢以下也而責人人將畔而思去矣是不可以不辨明也



皇朝經世文續編卷五十九目錄

禮政十服制

父在爲母斬衰三年說

張錫恭

爲人後者爲所生服議上

沈珪

爲人後者爲所生服議下

沈珪

爲人後者爲本生祖父母服辨

馬樹華

爲人後者爲本生祖父母議

張履

獨子兼承兩祧孫爲祖父母服議

張履

獨子兼承兩祧服制論

王人定

論獨子兼祧之服

俞樾

論爲衆子婦之服

俞樾

爲人後者爲出嫁姊妹報服期議

張湘任

服問

錢儀吉

服問

林伯桐

服問

李能定

妾服或問

沈曰富

再醮不得爲繼妻論

王廷植

殤不當立後議

沈珪

與張生辛未書

顧廣譽

皇朝經世文續編卷五十九

上海葛士濬子源輯

禮政十服制

父在爲母斬衰三年說

張錫恭

律子爲父母俱斬衰三年按禮經喪服子爲父斬衰三年父在爲母齊衰杖期父卒則服齊衰三年唐上元中武后表請父在爲母齊衰三年後代因循旋革旋復明洪武中定爲斬衰三年之制國朝因之永爲成憲敬按禮時爲大周公制禮因時以定爲制度後世人心日偷風俗日薄聖皇損益因革正以維持其衰不可妄以非古爲疑也古者父在爲母雖以厭降而期然喪服傳又云父必三年然後娶達子之志也是則子之喪於志者因必以三年矣中庸曰三年之喪達乎天子父母之喪無貴賤一也論語曰子生三年然後免於父母之懷夫三年之喪天下之通喪也論三年喪而兼舉父母者明爲母雖或降期而心喪則必三年也善哉草廬吳氏之言曰喪服者其文也不飲酒不食肉不處內者其實也不服其服而有其實者謂之心喪古人父在爲母杖期子服雖除而居喪之實如故則所殺者三年之文而已見日鳴呼此古人不以公義廢私恩不以私恩害公義情之至而禮之極者歟世道衰微人情異於古矣方其持

斬衰也而飲酒而食肉而處內覲然無愧色雖曰三年而心久已不行喪矣乃降其母之服爲期而責以三年之心喪此必不能然者也且夫服章於外者也心潛於隱者也章於外者猶畏人之多言潛於隱者將恃其狡以逃譏議方且謂人藏其心誰得而測度之卽能測度誰得而顯斥之窮其弊天下將有夷其母於世叔父母者矣 聖王知末世人心不可遽復於古也故沿其三年之制庶自好者覩其所服有以隱觸其哀而因其文以致其實此所爲損益因時小大共由者也奈何生乎今之世妄議反古之道哉儒者多疑爲母當從禮經者因推律意而作此說

爲人後者爲所生服議上

沈 珪

自唐以來輕重服制屢變先王之舊獨於爲人後者爲所生之服則持不貳斬之說相沿不革珪竊以爲過矣夫禮緣義起制隨時變立後之意今古絕殊古者惟大宗立後今則無人而不立後今所謂不可絕者古所謂可絕者也以可絕之宗而亦服後大宗之服是過禮也非受重於大宗而亦降所生創鉅痛甚之服是奪情也予奪之不當莫此爲甚然則繩今人以古禮而亦使不立後乎曰此必不能何也古者喪有無後無主有後而妻穉子幼亦使人主其喪主喪者爲大功之親則祥而退小功緦麻練而退朋友虞祔而退今無有爲人主喪者不立後則喪無主矣古殤與無後者祭於宗子家當室之白尊於東房親

者共其牲宗子主其事今宗法久廢無從祖祔食之禮不立後則祭薦無人矣古者大功之親異居而同財有餘則歸之宗不足則資之宗今則人人各私其財有積貲而不立後則爭端紛起而亂獄滋豐矣故不當立後而亦立後者後王之所不得已也夫欲正近世立後之失則必復宗法宗法既復則喪祭有主而爭競自消然宗法與井田封建相維豈近日所能遽復者哉不能復宗法不得已而徇情立後以止人之爭則不當仍援古人後大宗之制以妄傳於不貳斬之義孔子曰子生三年然後免於父母之懷三年之喪天下之通喪也爲尊祖故不絕大宗後大宗以敬宗尊祖故必降小宗今意皆異是而引以爲比其於禮不亦比擬失倫乎故愚竊謂所後非百世不遷之宗則所生亦不妨並重而皆服三年此則權之於義而差安反之於情而較順者也所謂事異殷周禮隨而變者此其類也曰古者婦爲舅姑期後世加至三年論者以爲非不貳斬之義今之所議得毋類是曰婦爲舅姑從服也從服則服餘於情不當加者也非不貳斬之謂也爲人後者爲其父母期降服也降服則情餘於服有所特重而不得申者也苟非特重而可以申所謂雖加一日愈於已者也又何貳斬之嫌乎

爲人後者爲所生服議下

沈 垚

宗法既廢士大夫無封邑世祿可以庇後嗣而又無古人家法子孫克世其家者蓋鮮當世所推爲望門

甲族猶有宗法遺意者海內不數家然此數家固有不襲宗法之名而陰合宗法之實者矣夫古之宗法原行於士大夫非行於庶民也有爵祿故有宗廟有宗廟故有宗子宗子主收族故孤寡廢疾者得有所養焉殤與無後者得有所祭焉無能而列於庶人者得有所統焉所謂以族得民也若夫蚩蚩之氓則不但無廟且有不知其姓者矣又安可以宗法部分之哉孔穎達曰殷制始有爵及它國來仕者若子孫祿位不絕卽爲太祖周則百世不遷之祖獨別子而已又別子若孫無爵至子孫始有爵及中衰而復興者雖別子亦不得爲太祖夫不爲太祖則但爲小宗不爲大宗矣然則周之大宗蓋寡於殷矣惟天子諸侯之子孫世有爵祿保宗祔者得爲大宗則得立後而降所生之服者一國之內有幾族哉今宗法雖不行然特不襲其名耳未嘗無其實也何以言之周之宗法非封建之天下不能行後世當以殷制爲準今之親王猶古之同姓諸侯也今之有大功受封爵者猶古之異姓諸侯也以無分土故次子不得爲別子而長子襲爵者則大宗也若夫身經百戰以死報國天子嘉其忠節予世職俾子孫承襲者亦古世祿之遺也海內豪傑起隴畝至大官以才識幹略自見於世舉世推爲名公卿者卽古始爵之比也令子孫能世濟其忠長爲國家效奔走禦侮之用卽其祖爲百世不遷之祖也豈非不襲宗法之名不能不有宗法之實者哉夫有大宗之實而爲之後者不如後大宗之制則悖於禮矣故王公貴人凡有官祿適長相

承者其立後當仍用古後大宗不貳斬之禮記曰禮不下庶人古之不貳斬原爲士大夫家言非爲庶人言也王公貴人適長相承而立後則用不貳斬之例雖爲大官而非適長相承及庶人以止爭而立後則用並尊得並斬之例庶幾兩不相悖也夫

爲人後者爲本生祖父母服辨

可久處齋文鈔

馬樹華

予鄉俗凡爲人後者之子不爲本生祖父母服期謂服制圖有降服子無降服孫孫則嗣祖父母之孫也嗣祖父母在亦必心競力爭不使其孫服其本生之祖父母予詰之曰父之本生父母子竟同於從孫再從孫三從孫可乎或曰按之服制圖例無明文是今制固無服也稽之喪服傳亦未之載是古禮已無服也夫春秋有比事之義今律有比例之文獨不見夫女子乎女子出嫁爲其父母服期爲其祖父母亦服期其例可比也或曰爲父母服期爲祖父母服期爲不降無別則奈何夫女爲父母降服者禮不貳斬服夫斬衰故爲父母降期也爲人後者爲其父母降期其義同也爲祖父母不降者無貳斬之嫌故不敢降其祖也出繼之子生子爲其本生祖父母不降其義一也今竟悍然不顧同於從孫再從孫三從孫之服豈非悖禮傷義之甚者乎是不可以不辨

予作此辨於嘉慶中以例無明文也道光四年部議爲人後者爲本生祖父母大功爲本生曾祖父母

小功爲本生高祖父母總爲伯叔父母兄弟之子大功謹識於此

爲人後者爲本生祖父母服議

張履

爲人後者爲本生祖父母之服自禮經及古今喪服諸書俱無文徐氏讀禮通考載宋崔凱議謂當大功而汪氏中述學謂小功兄弟之服不可服其祖齊衰三月降則無服準之經意服本服無疑女子適人者爲其父母期爲曾祖祖父母不降傳曰不敢降其祖也此其例矣其嗣子戶部喜孫力持此論以余座主大宗伯蕭山湯公方主禮典謂余宜請於公準此定制爲萬世明法余以女子適人有歸宗之義故上不降祖下不降昆弟之爲父後者

此崔凱議中語儀禮喪服傳曰爲昆弟之爲父後者何以亦期也婦人雖在外必有歸宗曰小宗故服期也孔氏倫曰婦人歸宗故不敢降其祖

爲人後者持重大宗降其小宗與歸宗義異故於昆弟之爲父後者無不降之文則爲本生祖父母亦未可以女子不降其祖爲例然服以功服實義所未安此當深求此類未易以臆見言也粵日謁公於邸第遂以戶部說進并陳所疑公曰然宜降其月數而不變其服若得齊衰九月之例則揆諸情而安協諸義而協可以折禮之中矣余退而考之禮記大傳注曰公子不得宗君君命適昆弟爲之宗使之宗之所宗者適則如大宗死爲之齊衰九月孔氏曰以君在厭兄弟降一等故九月以其爲大宗故齊衰儀禮喪服不杖期章注丈夫婦人之爲小宗各如其親之服辟大宗疏大宗則五服外皆齊衰三月五服內月算如

邦人亦皆齊衰無大功小功總麻

案喪服記宗子孤爲殤條下鄭注與此疏不合亦自與大傳注乖異存考

案此則齊衰自期以下三月以上

並有九月雖於經無文而經師推校所得自足依据況禮可義起爲曾祖服齊衰三月後世增爲五月未
有非之者也今如注疏說既有齊衰九月則爲人後者爲其本生祖父母可援以爲制無疑矣既以復於
公遂私存其議如此

程易疇答段若膺論爲人後者服其本生親降一等書云爲其祖父母世叔父母本期而降當爲大功
爲其曾祖父母本齊衰三月而降當爲總麻沈果堂集亦云爲祖大功九月爲曾祖總麻三月又云還
爲本親自曾祖而止○案曾祖父母無月算可降則不得已降總麻可矣後世旣爲之齊衰五月則降
當齊衰三月

自記

獨子兼承兩祧孫爲祖父母服議

張履

乾隆間山東單金鼇父凌雲以獨子兼承兩祧生金鼇兄弟六人遂分承之金鼇兄弟上請爲凌雲作何
持服爲兩房祖父母又作何持服部議獨子之子分承兩祧皆獨子親子無降服之文應各爲其父母服
斬衰三年獨子於兩房父母不皆服三年者

例大宗子兼祧小宗小宗子兼祧大宗均爲大宗父母三年爲小宗父母期小宗子兼祧小宗爲所生父母三年爲兼祧

父母

期限於不貳斬之義不得不從其變兩孫分祧則孫之服應從其正各爲祖父母服齊衰不杖期父故

嫡孫承重俱服斬衰三年案部議獨子之子爲其父母服無可疑者至其孫之服似未分曉解之者曰獨子之子各爲所分承之祖父母不杖期獨子死則兩房之孫各以長者爲嫡而爲所分承之祖父母皆三年蓋獨子之子唯於其父母無降服之文則承大宗後者於本生祖父母有降所謂孫之服從其正者意主承本生祖父母者言也或曰獨子之子雖分承兩祧而各爲本生祖父母不杖期自古嫡子無二父故嫡孫一人承兩房祖父母重俱三年所謂孫之服從其正者謂於本生概無降也如其有降則部議何無一言及之耶則解之者又難曰嫡孫一人承兩重則分承兩祧之說旣無所屬而兩房之祧將至何代而分耶於是有舉以叩於余者余曰孫之服視其父而父之服莫先於辨宗夫古所謂大宗者承始祖之世適百世不遷者也今所謂大宗者特長子云爾在古亦小宗也今使誠爲古之大宗與無後則族人以支子後之族人而止一子則任大宗之絕與絕父以後大宗均非情之所安而兼承兩祧一法可以通其窮焉夫獨子而兼承大宗則大宗重爲大宗服三年爲本生期宜也亦當杖期以別于出後子獨子之子各爲所分承之祖父母不杖期而承大宗後者爲本生祖父母降宜也徐氏乾學謂爲人後者之子爲本生祖父母降大功余嘗議以齊衰九月兼承大宗者亦當如此獨子死嫡孫爲大宗祖父母服承重服其本生祖父母自使爲祖後者服重而承大宗者從其降焉亦宜也若分承兩祧者各爲其本生祖父母不降旣失持重大宗之義獨子兼承大宗雖非出後而爲之三年卽是持重之義而嫡孫一

人承兩重則獨子不貳斬而獨子之子顧可以貳斬乎此其說亦不攻而自破矣使爲今之大宗而古之

小宗與古法小宗無後絕微獨不得立後卽兼承之義亦非所當及也古法旣不行於今爲之後者亦當

爲之服期

當杖期以別于世叔父母

而自爲其本生父母三年卽爲之服重亦仍當爲本生不降

此則劉氏台拱已言之

況獨子

兼祧尤非出後之比乎今世所稱獨子兼承大宗者雖於本生有降而實非所宜降則獨子之子無論其分承各爲本生祖父母不杖期可也獨子死嫡孫一人爲兩房祖父母俱服爲祖後三年之服亦無不可

也

小宗無重可承而爲祖後者服自應三年

是降與不降二說一可施於兼承大宗者一可施於兼祧大宗而實非大宗者而

兩家之爭可以息矣曰然則不貳斬之義如何曰不貳斬者爲持重大宗降其小宗而言非今之爲後及兼承者所得援然則兩房之祧果至何代而分曰至曾孫可矣且服窮親竭則亦無不分者矣然則獨子之後又獨子如何曰是猶之獨子也兼承大宗者重其所兼而輕本生兼承小宗者並重可也

獨子兼祧兩房服制論

王人定

鄉人有子二弟死無子以次子繼之子爲所後服斬衰三年踰數年長子大已亦未再生子而身死其族謂大宗不可絕仍欲取其子還以承祀其弟俟別擇他房者爲繼然子年已十六禪後其弟婦爲之娶妻且報捐填寫所後父矣乃堅執不可於是議以一子兼祧兩房議定又疑所服請於予予曰我朝自乾

隆四十年欽奉 特旨准以獨子兼承兩房宗祧所以補古禮之缺濟人道之窮曠古未有之令典也而兩房父母服制具載禮部則例至嘉慶十八年又載大宗獨子兼承祧次房者本生父母故丁憂二十七日箇月次房承祧父母故治喪一年次房獨子兼承祧大宗者本生父母故治喪一年承祧大宗父母故丁憂二十七日箇月嘉慶二十年又載同屬小宗而以獨子兼承兩祧自當以所生爲重爲所生父母服三年爲兼承祧之父母服朞朞內不准應試出仕其平日考試報捐應填寫所生父名道光九年又載小宗子出繼小宗如已爲所後父母丁憂持服嗣經兼承兩房者自應照禮不二斬之義爲本生父母服朞如雖出繼在前尙未爲所後父母丁憂持服旋經兼祧兩房者應仍以本生爲重爲本生父母服三年爲兼祧父母服朞今此子爲大宗兼承祧次房應服本生父母三年而此子已爲所後服矣謂已爲所後父母持服丁憂服本生父母朞而此子又非同屬小宗者然出繼與兼承兩祧有殊此子初有兄而已出繼次房雖屬大宗之子自應爲所後服三年至後而兼承大宗之祧雖以本生爲重而禮無二斬亦不得不降爲本生服期然則喪禮之狀刺不可書孤子乎予曰然書降服子猶是書出繼子也何以見爲兼承兩祧者予曰禮無明文又律例所未及無已則降服子上書明兼承兩祧第未識世之議禮者以爲有當否也旋又以其本生母擬於服滿後別爲之娶各以婦之所育者爲後問予曰可此又有例也獨子承祧兩房只

應娶嫡妻一人其置側室以廣嗣育例所不禁不得兩門均爲娶妻

案道光十八年秋南昌張子畏太守丁生母艱陳情自請歸宗以其父同產四伯仲無子叔有子一孫三季則二子太守其長也出繼仲爲子次弟亦出繼伯爲子季年未四十自謂必又有子以自爲嗣續乃竟老而無出太守亦未生子次弟更無子而卒不得已以叔之次孫繼伯爲孫復以叔之三孫自繼爲子卽繼仲爲孫矣仍自請歸本生父母上其事於大府詳咨吏禮二部准其兼祧禮部議其旣爲嗣父母持服三年本生父母應持服期年吏部議其旣爲嗣父母持服三年本生父母亦應持服三年部議兩歧第禮議本照禮不二斬之義具載則例者太守則專從吏議以遂所生爲重之情

論獨子兼祧之服

俞樾

一子兩祧爲國朝乾隆間特制之條所謂王道本人情也所謂禮以義起也此洵足補前聖所未及而爲後世之所法守矣道光間議定服制大宗子兼祧小宗則爲所生父母斬衰三年而爲兼祧父母齊衰不杖期小宗子兼祧大宗則爲所生父母齊衰不杖期而爲兼祧父母斬衰三年禮重大宗固宜爾也然於人情則似有未鑒者夫爲人後者爲所後父母斬衰三年古今之通禮也小宗無子而以大宗子後之未聞有所降也徒以大宗亦止一子以此子兼祧小宗乃降而爲齊衰不杖期於禮則允洽矣而小宗父

母有嗣子之名無嗣子之實仍無有人爲持三年服者小祥之後几筵猶在而服制已除在人情得無未
鑒乎然此猶未鑒之小者也其尤未鑒者則小宗子兼祧大宗而於所生父母改服齊衰不杖期也夫大
宗不幸而無子小宗固幸而有子也乃奪以予大宗而使小宗之父母有子而無子則小宗亦無子矣夫
爲人後者於所生父母齊衰不杖期固古今之通禮也然其父母猶有他子在非無人執三年之喪也今
此小宗之父母則獨子也無他子也設使父亡而母在則小祥之後其母猶斬焉在衰經之中而其子若
婦已衣錦而食稻矣顧視其後竟無一人與己同凶服者有不盡然傷心者哉此實於人情尤未鑒者也
夫不曰爲人後而曰兼祧兼之云者齊等之謂也然則獨子兼祧者於所生父母所兼祧父母並宜服斬
衰三年或亦禮之所許歟

論爲衆子婦之服

俞樾

古者爲適子斬衰三年爲衆子齊衰不杖期重適也夫古今異制爲適子斬衰三年行之於今則爲已重
矣明會典改爲齊衰不杖期至今循之古者爲適婦大功爲衆子婦小功唐改適婦爲齊衰不杖期衆子
婦爲大功亦至今循之夫適子之服如此之重而爲適婦之服如此其輕此古制之可疑者唐改爲
齊衰不杖期則從適子斬衰三年等而下之得其宜矣適子適婦既有區別則衆子與衆子婦亦宜有區

別衆子之服齊衰不杖期則衆子婦之服大功九月等而下之亦得其宜矣乃自明人改適子爲齊衰不杖期則適子與衆子同也適子與適婦亦同也於是適子也適婦也衆子也同爲一科而獨此衆子之婦不得與之齊等夫降則俱降明人旣降適子爲齊衰不杖期則衆子與適婦宜降爲大功而衆子之婦宜降爲小功然明人旣未議及則相沿至今不可復降也夫禮與其失之薄也不如其失之厚也婦爲舅姑之服自古至明遞有增加至明制舅姑同斬衰三年則重之至矣以重服服我亦宜以重服報之且子之於父母無適子衆子之別也婦之於舅姑亦無適婦衆子婦之別也古者世爵世祿故重適以絕覬覦之心今則無復是嫌矣父母於適子衆子之服同則於適婦衆子婦之服亦宜同父母於適子之婦與適子同服則於衆子之婦亦宜與衆子同服然則舅姑於衆子婦改服齊衰不杖期或亦禮之所許歟

爲父後者爲出嫁姊妹報服期議

張湘任

考之禮女子子適人者爲其昆弟之爲父後者服期盛氏世佐曰爲父後者父之適長子也不云適昆弟而云爲父後者容立庶子及族人爲後也應降而不降重其繼世故也 本朝通禮及律亦皆載此條聖人制禮其精微周密如此惟昆弟之爲父後者於姊妹之適人者亦應服期以報之而禮與律俱未有明文敖氏繼公以爲此昆弟不言報亦爲之服大功耳夫敖氏之說非也傳載姑姊妹適人無主者齊衰不

杖期姑姊妹報

欽定義疏謂憐我而厚我不可以徒受也然則重我而厚我獨可以徒受乎夫之昆弟

之子世母叔母爲之服期傳曰何以期也報之也夫夫之昆弟之子其分卑矣其情疏矣而猶爲之報服況於同父之姊妹乎敖氏之說非也且敖氏嘗論姑姊妹適人無主者之服及姑姊妹之報服矣其言曰姑姊妹出適者降大功今以其無主乃加於降服一等而爲之期其姑姊妹於昆弟姪亦不容不以其所加者服之據敖氏之論一報不一報何也不過以一則傳有明文一則傳無明文故耳不知經傳所言往往彼此互見如姑姊妹女子子適人者服大功而不杖期條不列在堂服期云云蓋以爲已嫁服大功則在室皆期可知此郝氏敬之說也由是論之無主之姑姊妹旣爲昆弟姪報服期則兄弟之爲父後者自不容不爲已嫁之姊妹報服期矣其不言報者省文也亦互文以見意也是豈獨禮爲然哉又嘗稽之律矣律載喪服各圖與服制總類多有互異故服制總內卷末有云考服制者必先後參看方無錯誤又如出嫁女爲本宗降服圖祇言兄弟而不及兄弟妻服制總類亦然而議禮者謂律載妻爲夫姑姊妹無論在室出嫁皆小功則出嫁女亦應有報服且云出嫁女爲本宗伯叔祖母堂伯叔父母已列服制總麻之內此外可以類推夫言類推則所該者廣在乎神而明之矣今出嫁女爲本宗兄弟妻亦服小功舉世行之無舉律以相詰者蓋得其意於律所不載是謂善讀律者而亦知禮者所嘉許也然則出嫁女爲兄弟

之爲父後者服期禮與律既有明文則兄弟之爲父後者於出嫁之姊妹亦必報以期也斷斷然矣今者予無兄弟則爲父後者予也故予於姊之喪探禮與律之意而爲之服期或問予曰子殆寡兄弟而弗忍除乎是固予之心也而所以服期者則在彼不在此也兄弟爲分形同氣之人故古人曰兄弟者左右手也姊妹何獨不然出嫁而服不得不降者義有所限也其心固無窮也有可以不降者則爲之加服焉是孝子弟弟之所樂聞也昔昌黎韓子鞠於嫂鄭氏嫂沒爲服期以報之夫以嫂叔之無服猶引而近之如此況姊妹乎卽以爲過儻所謂賢者之過與

服問

錢儀吉

浙人有生數月失父母爲它姓子長爲縣學生乃復姓然其居猶所撫育之家也迎養父母終事焉已而所撫育之氏母沒無子人曰當爲之服宜何服敢問

曰其齊衰期乎其齊衰三年乎禮喪服齊衰不杖期章繼父同居者傳曰何以期也傳曰夫死妻穉子幼子無大功之親與之適人而所適者亦無大功之親所適者以其貨財爲之築宮廟歲時使之祀焉妻不敢與焉若是則繼父之道也同居則服齊衰期異居則服齊衰三月也鄭君曰天不可二此以恩服耳賈疏謂子家無大功之內親繼父家亦無大功之內親繼父以財貨爲此子築宮廟使四時祭祀不絕三者

皆具爲同居闕一爲異居予則謂經所言者非三事也蓋古之人重祭大功同財斯禮也下于庶人同財則其死而無後者於祭也宜祔故子有大功之親雖從母適人而其先人之祀可不絕也所適者有大功之親則繼父又不得私有其財以爲妻之前子築宮廟也是以經兩言無大功之親者明宮廟之所由築耳妻嫁子幼又無大功之親則祀其絕矣授之宮廟而使之祀有父道焉故曰繼父雖祀而妻不敢與焉父之云者非由母生也故凡不同居不得有繼父名有曰不同居繼父者末流之失經無是言也昔子思居衛魯穆公卒縣子問於子思曰奈何不服子思曰禮不得也臣而去國君不歸其宗廟則爲之服寄公寓於是國而爲國服吾旣無列於魯而祭在衛吾何服哉故服繼父者其亦祭在衛之義與今某生於其撫育之母自有生數月以至於今恩篤厚矣又有其貨財使之養父母守祭祀比於同居繼父築宮之恩且無嫁母之憾今使沒而不爲服不可也服而不及於期亦不可也是不卽於人心而薄於行也已或曰有由進焉爾齊衰三年章慈母如母傳曰何以期也傳曰妾之無子者妾子之無母者父命妾曰女以爲子命子曰女以爲母若是則生養之終其身如母死則喪之三年如母貴父之命也鄭君曰此謂大夫士之妾而子游問喪慈母如母禮與孔子曰非禮也古者男子外有傳內有慈母君命所使教子也何服之有喪慈母自魯昭公始也孔子言君命又言魯昭公故鄭以爲國君是也然則慈母不爲服者惟國君今

某生士也其育於它姓也受父之命與否不可得知也雖然父有子數月而無能撫育之者有能撫育之者而請於其父其父命之必也以視子之無母而有妾無子者卽不命而妾猶宜慈之也卽不慈而猶有父在也其命爲母子也彼尙可已而此尤急是則某生之爲母子假未有父命謂與有命同可也且其居猶撫育之家也是且使常守其祭祀以傳無窮非特一時築宮廟而已恩以加隆疑斯從重雖爲之三年其亦可夫若夫祭祀之禮如前賢四孤之論或賣或棄而成於它人田瓊王朗之徒皆謂戴異姓而弗易祭所生於門外是但知成我之恩而不悟天性之無絕也若某生已還本宗自宜別築宮廟祀所撫育者善乎庾蔚之之言曰神不歆非類謂舍己族而取它人之族爲後者也若己族無所取而養它人者生得養己之老死得奉其先祀神有靈化豈不嘉其功乎予觀近代仕宦之族多有承其先人撫育之姓禮官不斥其非神明亦蕃其類高安朱文端論異姓爲後亦云苟所養之家無後則世世祀之別室若某生者必有別子置以爲所撫之後使常有祭祀庶幾無德不報而卽於人心也已

服問

林伯桐

謹案人之有生必資撫養若數月嬰兒失其父母雖有賢智無能自全有收之者鞠育顧復推燥居溼恩斯勤斯是爲再造且資其教誨遂以成名因其室家得以迎養竭人之力伸己之情其與尋常爲人後者

迴不同也夫拾兒路旁斷以父子之律加杖所生附于不坐之條

兩事皆漢董仲舒氏論斷疑獄俱見晉賀喬妻于氏所上表

伸養紬

生古也有志當爲之服宜攷禮文伏讀通禮自有本條齊衰期年所宜遵守

齊衰不杖期一條云若三歲下遺棄子不知本宗卽從所

養家姓氏應考出仕者爲養父母之服同並令輟考解任

抑人亦有言未名之子死而不哭旣名之後哭而不服數月失去父母望絕

矣匍匐呱呱恩移撫育矣且所生二老旣得終養所撫之家熒熒無人報生以死伊誰之責期服雖畢心

喪三年禮順人情固莫之禁與謹對或曰齊衰期年禮也但子旣復姓卽非一家奈何曰禮許復姓不欲

亂宗也而其應考固從所養之姓矣且古人不必復姓魏田瓊曰旣是必死之人它人收以養活褻姒長

養于褻便稱曰褻姓無常也云云又漢秦嘉早亡其妻徐淑養它姓爲子徐淑亡後子還所生朝廷通儒

移會鄉邑錄所養子還繼秦氏

俱見通典

今安得藉口復姓而降其服乎或曰爲人後者受命父母而往也此

安所受乎曰宋庾蔚之有言不得存養其子豈不欲其子之活推父母之情豈不欲與人爲後如此則與

父命後人亦何異云云然則昔人亦有定論矣或曰雖爲之服神不歆非類奈何曰本有族人而取之它

姓謂之非類今則不得已也庾蔚之曰若己族無所取後而養它子者生得養己之老死得奉其先祀神

有靈化豈不嘉其功乎云云是則禮之變也或曰繼父同居者視此何如曰繼父之志在妻不在子其子

之志在隨母不在繼父今則父母以爲其子子以爲其父母其志如一非繼父所得同也然儀禮爲同居

繼父且齊衰杖期喪服傳曰何以期也妻穉子幼與之適人所適者以其貨財爲之築宮廟歲時使之祀焉則繼父之道也今迎養父母于撫育之家視儀禮所言有加多矣其服期何疑焉或曰其父母待於迎養必無它子矣謂可於所養心喪三年得無少過乎曰此子既失其父母無子久矣苟無撫養者子必填溝壑父母安有迎養者乎庾蔚之曰唯所養之父自有後而本親絕嗣者便當還其本宗服所養父母依繼父齊衰周若二家俱無後則宜停所養家魏王朗曰收捐拾棄不避寒暑且救垂絕之氣而肉必死之骨可謂仁過天地恩踰父母者也以上所引各條俱見杜氏通典然則古人於此皆欲從厚禮以節情不敢過也若不爲心喪則莫之禁而弗爲矣

服問

李能定

受人之恩不可不報也而喪服之制則斷不容於或素蓼莪之詩有云父兮生我母兮鞠我拊我畜我長我育我顧我復我出入腹我人子之所以報德罔極者報以此也人子之所以喪服三年者喪以此也然則大凡能拊我畜我長我育我顧我復我出入腹我者其皆可以生我鞠我者一視之乎是又不然子夏喪服記子爲父服斬衰三年父卒則爲母服齊衰三年父在則爲母杖期古禮不以母並父厭於尊也至開元時不分父存沒子爲母仍齊衰三年至明會典始通改爲斬衰繼母如母慈母有父命亦如母如未

得父命則服庶母慈己之服爲小功服至出爲人後則服本生之服期年而爲所後之父母三年誠以名分不容淆而喪服有定制也昔子游問於孔子曰喪慈母禮歟孔子曰非禮也古者男子外有傳內有慈母君命所使教子也何服之有昔魯昭公少喪其母有慈母良及其死也公弗忍也欲喪之有司以聞曰古之禮慈母無服今也君爲之服是逆古之禮而亂國法也若終行之則有司將書之以遺後世無乃不可乎夫慈母爲父之衆妾雖極劬勞鞠育而未得父之命則僅爲之小功而慈母之外概可知矣浙人生數月而失怙恃爲它姓撫養及長終事其本生之父母而撫養之氏母沒無子人曰當爲之服夫服制準諸先王不容或紊也撫養者之服未之有聞也無已而必欲爲之則檀弓記有云事師無犯無隱服勤至死心喪三年夫子謂古者男子外有傳內有慈母若所撫養者慈母類耳與慈母類卽與師傅類是當心喪三年若喪父母而無服

以慈母無服爲例謂當爲撫養者心喪三年心之喪與否不可得知但如浙人之生甫數月卽爲它姓教育以至成人以迎養父母其家恩義亦至隆矣及撫育之氏母沒而竟謂禮不爲服雖欲準之先王竊恐非情之所安也姑存此以質世之知者

妾服或問

沈曰富

或問妾之喪其子宜何服曰于律也與父母同孫何服曰與祖父母同曾孫元孫有服乎曰律不載以子若孫推之當曾祖高祖同矣曰父亡而生祖母卒有加服乎曰有何由知其有也曰例有之雖微例有之律所不禁準於禮而爲之加猶可也其準于禮奈何曰經言慈母如母記以爲庶母後爲祖庶母後釋之夫爲祖庶母後猶喪之如母則親爲其孫者之得加固也然則何以別于君祖母曰例無君祖母無嫡子嫡孫加之可也無君祖母有嫡子嫡孫則不加也無嫡子嫡孫有君祖母則不加也然而加之猶可也何以言加之猶可也曰古者父厭母嫡不厭庶故父在爲母期父卒祖在不爲祖母三年庶子爲父後爲其母總不爲後亦爲其母期父卒雖君母在猶爲其母伸三年今旣比而同之則是父且不厭況於君母乎況於君祖母乎吾是以云加之猶可也曰嫡不厭庶旣聞命矣敢問宗不厭支何也曰宗何由而厭之夫庶孫不繼祖而繼禰繼禰而加厚於禰之所生義係于禰而不係于祖也于宗乎何嫌宗何由而厭之曰庶昆弟之子旣相率而宗于嫡昆弟之長子今又相率而宗于庶長昆之長子不鄰于二宗乎曰妾之喪其子主之子雖衆爲主者必一人于其孫亦當然我聞爲主而已不聞宗也況庶子有同母弟則同母弟主之其子不必加也王氏廷相之說可採也惟無同母弟而後其子加之則與嫡長之承重其禮異矣烏得謂之二宗哉曰王氏旣爲書以辨庶孫之不承重矣若近世柴氏紹炳張氏篤慶馮氏浩又各爲說以

論之今子必斷以爲三年其于古亦有所據乎曰儀禮經傳通解子朱子之書而授勉齋黃先生以成之者也其于五服沿革列祖父母卒而后爲祖母後者三年之目而引漢薄太后東晉太后李氏及宋集賢校理薛紳之祖母事以實之未嘗議其非也予之說亦竊取于此焉爾曰薄李之事皆帝王之禮若紳之祖母則固已膺封典而許加者也可得而通行之乎曰惡是何言也大夫之庶子爲其母視士而已殺矣焉有帝王而反加隆哉如必膺封典而後加是子孫之服其父母有議貴議賢之條矣不亦悖理之論乎且今之辨者必以受重爲加尊而以施于妾爲奪嫡夫奪嫡之嫌在乎廟之配墓之祔而已服之重所以順生者之情聖人所謂三年之愛也非以加增于死者也曰如子之言然則彼皆非歟曰未見其概非也顧彼之說執乎禮之正而予之說通乎禮之變彼之說準乎古之制而予之說酌乎今之宜予之不敢附於彼者亦爲其勢不行也敢問何爲不行曰今之喪非殤與無後者几筵必再期而奉週而易吉是几筵爲虛設矣不將并几筵而撤之乎夫庶子爲父後不爲其母三年者不敢以私喪廢祭也不爲後而得伸者以不祭也庶孫雖祭所祭者父母乃死者之子婦今以子婦之祭而撤其生母少姑之几筵揆諸父母之心大不安矣况服之制至今時屢變禮之所當厭者今皆得伸不容庶孫之獨屈其祖生祖母也且子以爲朱子勉齋之言禮視王柴張馮之言禮果孰可據哉曰使妾惟一子爲父後子亡孫已爲祖父母承

重矣更爲其生祖母三年可乎曰例之所言正指此矣以愚視之旣爲祖後則已服其本服而使其弟加之可也此記所謂爲祖庶母後之義若有二子而俱死長子之子爲祖後則使次子之子加服而主其祭若無次子而長孫又無弟然後加之而于一期之後遇祖父母之祭又當釋服以祭旣畢事而反喪服于其祭則以正祭之次日或別擇日以祭之而後恩義兼盡焉曰子論妾服于其子孫旣詳矣而其餘亦可推而論之乎曰凡我所以言者固爲其子孫其餘則于義宜若可略姑由今制推之律言長子衆子爲庶母期其妻同而例長衆孫爲庶祖母小功則視伯叔祖母也然則庶曾祖母亦可視曾伯叔祖母而爲之總矣禮君爲貴妾總而無女君之服鄭氏以爲報之重而降之嫌解者以爲嫌者嫌若姑爲婦服然然夫所爲服而妻從者多矣情所不忍從君而服總可也傳曰相與居室中則生小功之親焉則喪之如嫡姒婦而無服亦可也若君之父母雖不必爲制服然傳曰有死于宮中者則爲之三月不舉祭若其子在父之室則亦爲之變服不樂不賓燕以終三月可也

再醮不得爲繼妻論

王廷植

再醮之妻所以異於娶室女爲妻者以不能受夫與子之封也其所生之子服制同也妻死續娶再醮之婦爲妻所以異於娶室女爲繼妻者亦以不能受夫與子之封也其所生之子服制同也惟前妻之有子

者是爲嫡子其服制則不能以不辨春秋胡氏傳曰古者諸侯不再娶左傳惠公元妃孟子卒繼室以聲子生隱公隱公三年君氏卒傳曰君氏卒聲子也不赴於諸侯不反哭於寢不祔於姑故不曰薨不稱夫人故不言葬再娶之不得爲繼妻也如此禮記喪服傳曰繼母如母家禮爲繼母義服三年今律云繼母服斬衰三年繼母之同於親母也如此大清律例母出服期繼母出則無服母嫁服期繼母嫁則無服又婦人夫在被出及義絕不改嫁者親子有官一體封贈又父母毆殺子孫者杖繼母毆殺子孫擬徒毆殺前妻之子致其夫現無子嗣者照律擬絞監候繼母之不同於親母也如此然此所謂繼者皆男子聘在室之女而二姓好合六禮咸宜如初婚者然女家有嫁禮男家有婚禮父之繼妻所以爲子之繼母也爲繼母者與親母嫡母尙有不同而況不得謂之繼母者乎再醮之妻古人亦有生子而賢達者迺千百中之一二此不可以例常情也其醮惡者則不必言說合之初多係下賤媒婆婦與夫必先面見相與母家或姑家利於錢財只得身價並無禮書必俟夜深避人而行不准在於境內上轎見者以爲不祥或在媒婆家出門此各省鄉俗皆然所謂黃夜私奔賤莫賤於此矣而竟稱之曰繼妻其嫡妻所生之子有服官在仕者亦使其生而母之死而丁憂持服斬衰三年而喪之乎古之再娶曰後妻其於子也爲後母大孝如虞舜與曾子閔子騫輩皆事後母而孝者惟事後母乃可謂之眞孝吾知其所謂後母之非再醮無

疑也或曰爲子者知尊父命而已父以爲繼妻子卽不敢不以爲繼母不計其爲再醮也不服三年孝子恐傷父之心也答曰先王制禮過者俯而就不至者跂而及酌中定制所以合天下而遵行之申生孝己伯奇之行不能以爲常例也且今之所言者正爲天下之爲人父者言之也明乎再醮不得爲繼妻之爲禮而爲父者不敢縱情而犯禮爲子者可以緣禮而抑情矣如是而其父猶必令其子服三年之喪其子敢不委曲以從命乎此乃事之至變立法者止言其正而不言其變也或曰有生而母死而爲後母所撫育者雖再醮其子不服三年不忍也答曰母死父命他妾撫養者爲慈母律應服斬衰三年也曹續祖之議曰娶再醮之婦而又無子者止當以妾論不得使其子喪之曰繼母蓋據封典不及再醮婦之例而謂喪服之與封典不宜兩歧噫孰是說也又何以處夫再醮之有子者再醮不能受子之封若親生之子卽不能不爲之服其不能受封者失節之懲所以重夫禮教之防也其必爲之服者懷抱之恩無所逃於天地之間也故雖下賤淫婦其親子必服三年而豈可以概之嫡子乎況禮不二繼繼妻死再娶室女爲繼夫之封典亦不及焉雖准捐請不在應封之例而謂再醮之妻嫡子應服三年設有再繼三繼或三醮四醮者又將何以服之買婢女爲妾生子尙可請封再醮則婢女之不如愚謂再醮之婦是否得爲繼妻禮經本無明文其不言及者其不必言及者也但此等失節改嫁多係夫喪未滿律應離異如被搶奪或被

強姦卽照犯姦之婦科斷其不得謂之繼妻也明矣京中八旗家法凡失節之婦祠堂不准附主祖塋不准附葬此如何懲戒也卽此以觀其不以爲繼妻也又斷然矣前夫有子是其親生止於期服何以前妻之子應服三年予得而論之曰凡再醮之婦婦家無嫁禮夫家無婚禮無論初娶再娶俱應以妾論如有嫡子及庶子應照是否生有子女之父妾持服父妾之有子女者爲庶母庶母例准貤封嫡子衆子皆服期年無子女則無服吾鄉有孝廉某娶再醮逾年而歿其嫡子不報丁憂人有議之者因作此以答之以備議禮者之採擇焉

殤不當立後議

沈 珪

乾隆時有爲殤請立後者援陳澹喪服小記注爲證大吏據以入奏禮部失攷遂準其請且著爲令夫殤無爲人父之道陳澹注禮多誤此則謬更顯然不可爲訓宗子殤死但爲大宗立後不爲此殤立後喪服記曰宗子孤爲殤大功衰小功衰皆三月鄭康成曰謂與宗子絕屬者也記又曰親則月算如邦人鄭康成曰與宗子有期之親者成人服齊衰期而長殤大功衰九月中殤七月下殤小功衰五月有大功之親者成人服齊衰三月卒哭受以大功衰九月長殤中殤大功衰五月下殤小功衰三月有小功之親者成人服齊衰三月卒哭受以小功衰五月其殤與絕屬者同緦麻之親成人及殤皆與絕屬同然則宗子爲

殤族人皆以殤服服之矣曾子問曰宗子爲殤而死庶子勿爲後也鄭康成曰族人以其倫代之不敘昭穆立之廟孔穎達曰宗子兄弟行無限親疏皆得代之不以父服服此殤喪服小記曰爲殤後者以其服服之鄭康成曰言爲後者據承之也殤無爲人父之道以本親之服服之孔穎達曰族人後大宗不得後此殤者爲之子以殤者之父爲父而以兄弟之服服此殤然則爲殤後者爲殤者父後也爲殤者父後則與此殤爲齊衰兄弟之親長殤服大功衰九月中殤七月下殤服小功衰五月矣以其服服之者此之謂也若謂爲殤後卽爲殤子則與曾子問之言不合宗子殤吉祭特牲不舉肺無胾俎不告利成以無尸故無元酒以禮降故若謂爲後卽爲子則子無殤父之義何不以成人禮祭父而但爲陰厭也陳氏於曾子問注襲用鄭義而於喪服小記忽創爲新說前後乖違其謬本不足辯然貽誤後人頗不小矣夫孔疏謂爲殤者父後誠恐人之誤解也然卽謂爲此殤後亦不得如陳澧之說蓋爲後卽爲子者指昭穆相當者言也爲後不爲子者指昭穆不相當者言也不爲子而服子服者天子諸侯之禮也雖子行不服子服者大夫家後大宗者服殤之禮也天子諸侯繼統不繼世孫繼祖兄繼弟皆爲後非爲子也或以諸父繼從子或且以諸祖繼從孫亦爲後非爲子也雖不爲子其服則斬而禮亦如子以先有君臣之分而天子諸侯之喪皆斬衰無它服不獨受重者必服尊服也衛文公大布之衣大白之冠是其證也雖不爲子本宗

則絕天子諸侯爲所生之服無明文或亦服期或練冠以燕居如庶子王服母之制皆未可知而斷無加尊於所生之禮則可以義斷者也卿大夫有田邑者亦繼爵不繼世春秋列國大夫有辜見誅或出亡其先祀未可滅則皆得立後而昭穆不必盡相當宗子爲殤而死假令兄弟行無可繼主宗事者得不以子行爲後乎又無得不以孫行爲後乎又無則大宗究不可絕得不以父行祖行代主宗事乎子行而爲後則服此殤如服叔父之殤孫行而爲後如絕屬者服宗子之殤父行而代主宗事如服昆弟之子之殤祖行而代主宗事亦如諸屬者服宗子之殤所以然者後大宗以承尊統義亦非繇繼世也子行孫行而服此殤之母則服爲人後之重服父行於此殤之母則嫂也祖行於此殤之母則昆弟之子之妻也服窮矣當亦如絕屬者服宗子之母之服而於所生之小宗則降此亦可以義斷者也喪服經言爲人後而不言爲人子原容昭穆有不相當故也然則爲殤後者雖子行亦不服子服矣豈得如陳氏服卽子爲父之服之說哉夫爲殤後而不服重服則仍後大宗而非後殤矣讀書者豈可以辭害意使小記之言與曾子問相戾乎陳氏之誤徒以丈夫冠而不爲殤婦人笄而不爲殤因謂不爲殤則得立後不知禮正不如此也不爲殤甚多而得立後之人甚少年少而爵爲大夫則不爲殤然不必立後也能執干戈以衛社稷亦不爲殤然亦不爲立後也鄭康成曰未踰年之君魯子般子惡皆不稱公書卒弗諡不成於君也不成於君

則不立廟敘昭穆凡無廟者爲壇祭之夫未踰年之君不必未冠然不得廟祭則爵爲大夫而蚤死雖不爲殤禮亦必有所降若是大宗雖得立後不必與此大夫爲子況不爲殤之大夫不必皆不可絕之大宗乎又安可謂不爲殤卽得立後以爲子哉夫記明言爲殤後而陳氏乃言不爲殤則得立後陳氏言不爲殤得立後今雖爲殤而亦援陳說以立後於是無父道之殤居然有服重服之子而貪利喪心之徒公然棄其父而父此無父道之殤也不可謂非陳氏釋經之誤有以啟之故君子立言不可不慎古者女未廟見而死歸葬於女氏之黨言未成婦也今則有未婚而歸女柩於夫氏者矣古者娶女有吉日而女死壻齊衰而弔旣葬而除夫死亦如之言未親迎之未定爲夫婦也今則有壻死而女歸其家與鬼壻爲婚者矣一生一死非禮相接瀆亂陰陽媒嬖人鬼嫁殤遷葬古媒氏所禁今則相習成風莫識其非或不如是反以爲無情不義其故總繇禮教陵遲風俗衰敝或情緣於溺愛或意起於防爭有整頓風俗之心者方當禁之不遑忍導其流而揚其波也夫爲殤立後固與冥婚遷葬之事相連者也陳氏之說不合體制當請於 朝亟加刊正

與張生辛木書

顧廣譽

日昨見詢令姑母服制與兼祧孫名帖所當稱僕已牒陳梗概嗣又考之詳以奉告世俗於女失所倚恃

歸在父母家動以在室女言之此大非也女子在室禮文有二喪服斬衰三年章云女子子在室爲父此未適人之在室者也又云子嫁反在父之室爲父三年馬氏謂犯七出還在父母之家鄭氏謂遭喪後而出者二說微異馬氏爲允而以其反在父室爲被出則同故今制直云已嫁被出而反在室者此旣適人之在室者也令姑母秉性淑慎琴瑟和諧特早喪所天有子不育歸依父母親兄贊襄內政其與此風馬牛不相及也明矣唯齊衰不杖期章姑姊妹女子子適人無主者姑姊妹報傳曰無主者謂其無祭主者也何以期也爲其無祭主故也今制略同此於令姑母情事爲近足下於令姑母似得服齊期然自乾隆中創有兼承兩房宗祧之制而無後者得以變通其法令姑母雖無子而有夫兄之子若孫兄子大宗法無出繼允以其子兼承兩祧則有主後矣足下服大功可也又案道光九年禮部奏准爲承祧祖父母齊衰不杖期令姑母之兼祧孫名帖謹遵此文稱承祧齊期孫某爲是

皇朝經世文續編卷六十目錄

禮政十一 祭禮

家廟記

謝濟世

祠堂記

馬樹華

答汪孟慈書

馬樹華

與張淵甫書二

沈垚

答祭外祖父母問

王人定

答陳仲虎雜論祭禮書

張履

答陳仲虎論殤祭書

張履

題主說

李棠階

齊必變食說

顧廣譽

華亭南蕩張氏支祠記

張文虎

經世文緯

卷之四

一

經世文緯

卷之四

經世文緯

卷之四

經世文緯

卷之四

經世文緯

卷之四

經世文緯

卷之四

經世文緯

卷之四

經世文緯

卷之四

經世文緯

卷之四

經世文緯

卷之四

經世文緯

卷之四

經世文緯

卷之四

經世文緯

皇朝經世文續編卷六十

上海葛士濬子源輯

禮政十一 祭禮

家廟記

謝濟世

禮將營宮室宗廟爲先大夫三士一吾家自曾祖以下幸沐國恩皆爲大夫然先世本土族也故止立一廟一廟者考廟也不稱考者高曾祖咸在也其制三間有堂無室五龕中一龕藏始祖堯卿公以下五十七代本支世次圖其旁左高右曾又其旁左祖右禰考妣同龕皆南向以祔始向東廟惟向南爾雅戴記可考也爾雅云東西廂祭統云北面而事之高昭曾穆高祧則曾昭祖穆祖不越曾而僭高之位子不先父也殤也無後

也伯叔也兄弟也妻妾子婦也其耐食喪服小記言之矣然中士以上亦不必蓋暫祧與未祧同昭穆尙無定也祭用五簋不焚紙錢紙錠雖有地府錢錠無所用紙雖焚亦不能爲錢錠也秋嘗冬烝祫三獻生辰牲一獻忌辰不祭素饌奠而不獻吉凶不相干也春夏不祭四時不敢備也諸侯不備故中元不祭我祖宗世修厥

德無禁錮地獄中元赦歸之理也吾觀近世士大夫雖世職罕有立廟者其故何哉庸俗子惑於地府之說既疑廟爲虛設間有欲立廟者又惑於先儒廟制廟位及祧耐之說廟制皆云東向廟位則云西上或

云向南西上或云東上至於祧祔又云穆不遷昭子寧先父言既無徵理亦未順兩歧三岔何所適從是以徙倚遷延而不果立也或曰廟之不立誠如子言方向位次先儒固非子亦未必盡是世無周孔其孰能折中之曰吾固折中於孔子者也不曰事死如事生乎今夫生者之必有室也室之必南向也南向之中爲首席左爲二席右爲三席也首席虛則二席三席者之依次而升也夫人而知之也死者亦若是而已矣特生也父坐子立死則父昭子穆耳敢以質之議禮家及士大夫之祭於寢者

或問文昭武穆似有一定不易者曰已祧者百世不易周自后稷遞數以下太王文王昭王季武王穆其子孫亦以爲序昭之子孫卽稱昭穆之子孫卽稱穆此太祖廟次之昭穆工史掌之者也未祧者一世一易以主祭之人爲主昭主祭不易穆主祭則暫易此四親廟次之昭穆宗祝掌之者也

祠堂記 可久處齋文鈔

馬樹華

古者公卿大夫士皆有廟見於經者有五廟三廟二廟一廟之典唐開元中曾定其禮宋大觀中亦有更定之制程子謂人本乎祖服制以高曾相屬則時享宜及高曾冬至宜祀始祖違祖自是士大夫多遵用之而朱子不祭始祖明初仿朱子祠堂凡家廟皆祀四親成化中令皆立一廟以高卑廣狹爲殺嘉靖中定三品以上五廟以下四廟猶是同堂異室焉耳而五廟述大觀之制祔五世祖議者以爲未當固不若

遠取別子爲祖之義近依程子人本乎祖之義奉祀始祖之爲善也而統祀四親中奉始祖又不若專廟奉祀合乎百世不遷之義且使族有所統而不渙也王制大夫三廟一昭一穆與太祖之廟而三大夫得祀始祖此其明證朱子不祭曰疑于僭或謂其僞寓于閩族在婺源故不祭程子則有奪宗之說謂己之官法得立廟也 國朝會典品官皆祀高曾祖禰四世而士大夫之族多有始祖祠堂功令亦不復爲之程方望溪侍郎謂人情所安不可強抑是也吾祖自明永樂初更姓居桐于今十有八世而未有合食之廟贍族之田先大夫每慨歎之歲乙未樹華自汝南乞養歸樹章經營義莊釐有端緒思先大夫之志意乃購城西地更籌貲用庇財興工閱十六年而告成前堂奉一世祖文學府君而二世三世四世五世祖從祀後堂奉六世祖太僕府君而七世八世祖從祀九世以下仿鄞桓谿全氏吾鄉麻谿吳氏祠例凡賢而有德能而有功貴而有爵才而有文者從祀焉夫始遷之祖始爲卿大夫之祖禮得不祧專祀固其宜也其他先祖從祀禮可以義起也且古九命今九品或謂元士視附庸古自附庸卽得立五廟或謂九品當古之一命古一命今九品並得立廟太僕公以下得有廟者衆矣而今皆萃于一堂楊文定公有言比于古人規模簡略則雖祀及遠祖固無嫌于越分也咸豐壬子仲春初將祀事自後歲以二仲禮以三獻行以一跪三叩祇遵祭禮毋敢差忒至于少牢特牲不特殺之等俎鉶敦籩豆之數隆殺必視爵祿則采

李文貞公朱文端公李穆堂侍郎諸議定以有祿于朝者主祭執爵奠獻庶幾子子孫孫更迭以其祿位主斯祭焉樹華樹章德薄懼不足自致其誠敬惟義必依于古而宜于今後人能恪守之則于敬祖收族之道或猶有什一之存也與樹華謹記

謹按 大清通禮家祭吉禮主人朝服子弟執事者盛服今定有服制者不與祭與祭者皆吉服著韉夏秋緯帽

通禮家祭及時節薦新朔望獻茶均行一跪三叩禮不揖不四拜四拜係相沿舊禮今不可

通禮家祭之期歲以春夏秋冬仲月擇吉致祭蓋祭四親廟也今祠始祖以下謹定春秋二仲朔日恪遵典禮而敬行之

通禮一品至三品官羊一豕一四品至七品特豕八品以下豚肩不特殺祭器三品以上每案俎二賓牲體鉶二實羹敦二實飯籩六實時果餅餌魚腊獸腊之屬豆六實炙醢時蔬之屬七品以上俎一鉶敦皆二籩豆皆四八品以下俎一鉶敦皆二籩豆皆二禮有等差不得僭越故應以有爵者主祭今定前堂後堂族中有爵者延景有爵者各一人主祭各一人贊禮一人讀祝各二人分獻每案各子弟二人執事餘衆序立主祭分獻之次層行禮職七品以上應用特豕一俎二鉶二敦四籩四豆異日有仕

至三品者乃用少牢若僅微官卽不特殺必宜恪遵典禮昭薦馨香

通禮家祭先祭三日主人及在事者咸致齋前一日主人率子弟盛服入廟眡潔除拂拭設供案鑪檠具設祝案於香案西設尊爵案於東序設盥槃於東階眡割牲辨祭器之實 屆日五鼓主人朝服與祭執事者盛服入廟執事者陳鑪鐙於供案南陳尊爵於東序案陳祝文於祝案實水于盥槃加巾質明子弟之長者盥詣各室前跪一叩興奉主以次設畢贊禮立堂東檐下西面諸執事分立東西階相向贊就位主人盥詣中檐拜位立族姓立東西階上皆北面贊參神主人入堂左門詣香案前跪執事二人一奉香槃一挹尊酌酒詣主人左右跪左進香主人三上香右進爵主人酌酒於地以爵奠於案興退出右門復拜位及族姓行一跪三叩禮贊初獻薦匕箸醢醬于案北庖人解牲體實於俎執事者奉以升各薦于供案主人詣案前執爵者奉爵主人獻爵奠於正中跪叩興分薦者徧獻訖退立於拜位贊讀祭文主人跪族姓皆跪祝詣祝案跪讀祭文曰維某年月日幾世孫某謹告於某考某官府君某妣某氏之靈曰氣序流易時維仲春追感歲時不勝永慕謹以潔牲庶品粢盛醴齊敬薦歲事以某親某氏等耐食尙饗讀訖興以祭文復於案退主人以下一叩興贊亞獻庖人和羹實於鉶實飯於敦薦於案及腊肉炙胾主人獻爵於各位之左贊三獻薦餅餌果蔬主人獻爵於各位之右分獻者徧獻

均如初獻儀贊受嘏祝取供案酒饌降至香案旁主人詣香案前跪祝代祖考致嘏於主人主人啐酒嘗食反器於祝接以興主人一叩興復位贊送神主人以下一跪三叩贊望燎祝取祝文由中門出送燎主人退避東階下衆咸降階主人詣燎位眡燎畢與祭者出主人率子弟納神主上香行禮徹祭器傳於燕器潔滌謹藏之闔門各退日中迺餞

族中行尊年長有未便序立次層隨同行禮者卽贊禮讀祝執事諸人亦未能隨同行禮按會城大祭有糾儀一員祭前行禮然後排班謹仿其意定于奉主設畢焚香獻茶後卽先序立行一跪三叩禮各退然後贊就位其後堂左室前祀貞烈節孝諸位後祀無嗣諸位謹定是日前堂後堂祭畢父兄各一人子弟各二人分詣致祭跪上香奠爵叩興陳俎鉶敦籩豆訖行一跪三叩禮各退

近世大族家廟有不爲婦人作主者有夫婦共作一主者吾鄉衆子分居卽仿其制考妣共作一主不書神主而書神位是也按穀梁文公二年作僖公主疏麋信引衛次仲云宗廟主皆用栗右主八寸左主八寸廣厚三寸左傳昭公十八年疏引作左主七寸右主謂父左主謂母也汪中容甫述學婦人無主富問歷引雜記喪服小記若婦人無主婦與妾於何而祔王母何以得專其祭是不爲婦人作主實爲非禮必不可從至考妣共作一主於古雖無可證而儀禮少牢饋食禮筮尸命曰孝孫某來日丁亥

用薦歲事於皇祖伯某以某妃配某氏以某之某爲尸尙饗是夫與婦共筵一尸也周官司几筵鄭注周禮雖合葬及同時在殯皆異几體實不同祭於廟同几精氣合孔疏引祭統鋪筵設同几以其精氣合故也準同几同尸之禮考妣共作一主尙協於義且祠堂合食異於四親之廟今謹用之

吾鄉吳氏祠堂左祀崇報右祀顯揚而有文者不與鄧全氏祠堂祀有德有爵有文而有功者不與今謹參定四者並列凡沈潛學問身體力行著有忠節孝弟之行者是謂賢而有德凡正途京職九品外官八品以上援例京職八品外官知縣教職以上及封贈如其官者是爲貴而有爵凡力保先塋捐修族譜捐祭田義田租穀三百石以上或白金一千兩以上者是爲能而有功凡有經學史學箸成子部成書詩文專集足以傳世者是爲才而有文均得作主一體附祀惟有爵有文而無行者亦不得祀其有原配繼配者遵用朱子之說並以配食

會典命婦因子孫受封加太字受贈則否若夫在亦不加蓋婦不得以尊臨其夫之義姚薑塢先生筆記太皇太后升祔僂皇后正此義也世俗府君太君並僂殊誤今定配僂封號無封號者則用邱文莊公說亦僂孺人

答汪孟慈書

可久處齋文鈔

馬樹華

日前語及劉學博玉麟所著經說略疏其概適客至未及詳言還寓後旋得手書殷殷垂問曩見劉氏之說多從說文生義非愚淺所能盡知惟士大夫廟無主辨明暢閤通又惜其實亦未覈祭法鄭注謂士大夫之廟無主惟天子諸侯乃立主古制實然劉氏据祭法大夫三廟適士二廟曲禮措之廟立之主謂有廟斯有主据士虞禮男男尸女女尸特牲少牢禮皆有尸雜記祭祀之有尸也宗廟之有主也謂有尸斯有主非所謂臆斷者邪其据左氏傳孔悝反祔於西圃杜註祔藏主石函許叔重曰祔宗廟主也謂爲大夫有主之證不知此特季世之事他經傳無可證也其据公羊何注引士虞記喪主不文吉主皆刻而諡之謂士虞士禮旣吉凶皆有主是士亦有主之證不知何注下言蓋爲禘祫時別昭穆明此記通言天子諸侯之禮於士無與也古今損益多矣度數典章世愈降則制愈盡後世廟皆立主誠善於古先然安得以後世之善疑三代之制乎惜抱軒集有富袁簡齋書引曾子問當七廟五廟無虛主聘禮賓介所館皆廟爲士大夫廟不設主之徵且引公羊何注及左傳凡君薨卒哭而祔祔而作主杜注言凡君者謂諸侯以上不通於卿大夫證何杜皆與康成同意其說極爲精當吾兄嘗歎惜翁文章純粹經史湛深世俗譏爲空疏者殊妄諒哉斯論蓋先生醞釀之精迴非騁博以爲觀美者所可同日語也

承示大著三篇父卒爲母服論及變葛辨皆精當惟毀廟論私心竊不謂然士喪禮曰卒哭明日以其班祔祔廟之期也穀梁傳曰作主壞廟有時日於練焉壞廟壞廟之道易檐可也改涂可也壞廟之期也廟壞後卽遷與否傳無明文鄭康成盧辯皆以壞廟卽遷廟有練而遷廟之說服虔注左氏傳謂特祀於主在寢三年喪畢遭烝嘗則行祭於廟見士虞禮疏而不言遷廟在何時杜預則謂三年喪畢乃遷廟楊士勛疏穀梁并謂壞廟在三年喪終朱子據遷廟禮君臣皆元服疑遷在除喪之後足下因謂於練壞廟非遷廟於三年遷廟非壞廟茲反復讀遷廟禮而歎鄭說之未可非也遷廟禮曰君升祝奉幣從在左北面再拜興祝聲三曰孝嗣侯某敢用嘉幣告于皇考某侯成廟將徙敢告至於新廟祝奠幣于几東君及祝再拜興祝聲三曰孝嗣侯某敢用嘉幣告於皇考某侯今月吉日可以徙於新廟敢告再拜君就東箱西面祝就西箱東面如食頃君反位祝從在左祝聲三曰孝嗣侯某絜爲而明薦之享案吉祭祝辭無噫歆警神之禮惟曾子問君薨而世子生告及生子見殯皆祝聲三士喪禮將啟商祝祖免執功布升聲三啟三命哭然則噫歆警神之禮非吉禮矣遷廟禮曰贊者盥升適房薦脯醢君盥酌奠於薦西反位孔廣森曰聘禮釋奠于廟雖無尸猶一人舉爵此奠不舉者未卽吉也昔者魯昭公練而舉酬行旅非禮也然則遷廟不舉爵與曾子問練不行酬合矣十三月而練二十七月而喪畢改涂易檐不稽時日遷廟禮一則曰成

廟將遷再則曰成廟將徙是毀廟卽成廟成廟卽遷廟相去必不遠若成後遲至歲餘始遷與遷廟禮文不合杜預三年喪畢遷廟之說不足據信至以君臣元服爲疑則古人居喪固有釋服時矣檀弓曰弁經葛而葬與神交之道也鄭康成曰接神之道不可以純凶也是葬時冠服有變也喪服小記曰練筮日筮尸視濯皆要經杖繩屨有司告具而后去杖鄭康成曰臨事去杖敬也夫三者皆祭前事而猶去杖則祭時可知矣是練時有變也小記又曰大祥吉服而筮尸吉服者朝服也鄭康成曰凡變除者必服其吉服以卽祭事不以凶臨吉也是祥時有變也然則以安神之故釋凶服而服元服豈足怪哉且以禮差之大

夫吉祭朝服故祥祭朝服諸侯吉祭冕服則祥祭亦當冕服祥祭冕服則遷廟在練時當弁服故盧辯以

未卽吉略同爵弁服解元服下諸侯豐廟篇亦君臣元服而雜記作爵弁純衣故盧釋爲爵弁服若諸侯祥祭亦朝服則遷廟在練時當元

端服故孔廣森以冠元端解元服而爲之說曰吉事之始故假吉服易衰經也不申祭服者未純吉也夫

元服之爲爵弁與元端雖未可定而服元服之不必待除喪則固可斷矣鄭說安可非哉足下據殷練而

祔周卒哭而祔遂謂練時壞廟猶殷禮周於卒哭已壞廟而以檀弓舍故諱新爲卒哭壞廟之證則姦竊

謂舍故諱新未見有壞廟之實據而練時壞廟亦未見其必爲殷禮也已壞廟祔廟合爲一事遂謂壞而

祖主升升而新主祔則姦竊謂祔廟于卒哭壞廟于練截然兩事不可混合也又據曾子問天子崩國君

薨祝取羣廟之主藏祖廟卒哭成事而後主各反其廟遂謂祧者因而遂藏祧者因而遂升事不再舉則
姪竊謂孫從祖祭故謂之祔若祖主已升則所祭者但新主耳不得名之爲祔矣惟孫從祖合食故喪服
小記士祔于大夫則易牲若祖以升而但祭孫不必易牲矣士虞記曰卒辭曰哀子某來日某濟祔爾于
皇祖某甫尙饗明日以其班祔曰適爾皇祖某甫以濟祔爾孫某甫尙饗鄭曰欲其祔合兩告之若但祭
孫而不祭祖不必兩告之矣古人解經皆本師授又礪精覃思左右攷覈而後定一說新說不易創也創
一新說初似可喜細校之全經皆不合矣足下以爲然否幸再賜教

答祭外祖父母問

王人定

鄉人黃某學者也有外祖父母木主立於家堂龕上清明冬至家祭時亦設祭焉其族人有責其非禮者
某乃以告予曰此吾母命也母無昆弟迎養外祖父母於家以終其天年喪葬後立木主祀之今吾母已
沒而外祖父母之祀未廢者不忍背吾母愛敬之心也且聞伊川禮亦有之而彼乃以非禮責予何也予
曰外祖父母之祭經傳所無而惟程子行之第伊川集有其母上谷郡君行狀云郡君得疾未卒前一日
謂伊川曰今日吾在宜爲我祀父母明年不復祀矣朱子嘗舉以告門人謂伊川亦曾祀其外家何氏燕
泉云上谷明年不復祀一語是謂此祀止於其身卒後可廢此禮也今人未考程集細審上谷臨終之語

遂以節時家祭前一日祭外祖父母爲伊川禮殊失之矣汝非學者則已耳汝學者汝族責汝以非禮汝其奚辭而汝不忍背母心者卽宜以上谷郡君明年不復祀之語裁之毋致終失於非禮也某唯唯而退

答陳仲虎雜論祭禮書

張履

承示古祭禮以貴賤定世數今通禮士庶亦祭四代履按士庶祭必及高祖程子已云然近萬氏充宗論之尤詳蓋證以小宗法五世則遷自見祔廟云云亦理在不疑至謂支子之子後長子承祖重則當主祭其本生父當在陪祭之位爲嫌履於此情誠若有所不安者然譬之尸君所不臣於祭者爲子行而父北

面事之

曲禮爲人子者祭祀不爲尸鄭注然則尸卜筮無父者孔疏郊特牲注大夫以孫之倫爲尸言倫明非己孫皇侃用崔靈恩義以大夫用己孫恐非也此云子行亦非己子然要是不以尊卑爲嫌

比又譬之斬衰三年乃子服父之服而父以服其長子此並似情所不安而古人安之今支子之子既後

長子此並似情所不安而古人安之長子以承其祖卽宗子也雖本生父亦不得先之矣古者長子不爲

人後閣下以長子後伯兄非也既爲之後以祭高曾祖禰

若是承高曾之宗可祭高曾非承高曾則祭當在承高曾者

禰卽閣下之兄

閣下不當與

若每代爲一案可不與若合爲一案又不能不與矣

祖卽閣下之考也既宗子祭之閣下與之而又別設祭考妣不及

於祖以通禮言既異祭及四代之文以宗法言又非支子不祭之義似兩失之今閣下雖以長子後伯兄而未嘗異居度祭之品物皆閣下所具是於考妣既有以自盡又何煩別設一祭乎古者天子諸侯始祖

之祭並不在冬至冬至乃祭天圜丘耳士大夫冬至祭始祖乃程子伊川所剗朱子初依行後以為僭始

或為受姓之祖或為厥初生民之祖朱子亦無定說今通禮又無之是固不可行矣然古者大夫士之為大宗者固祭別子始祖王制

祭法一大夫有始祖一大夫無始祖乃殷周之別今世俗宗祠必有始祖或始爵或始遷以古宗法言之宜於祠之中間專設始

祖一主求其世適以為大宗主其祭而族人咸侍若無世適可推爵齒德之尊者主之今俗專重族長族長之名古有之非今之所謂族長也其高曾

祖禰宜各自為室其祭也惟同出者侍祭高則同高者侍祭曾則同曾者侍祭祖禰亦然而族人皆不與其餘旁支之主宜悉歸

所出子孫之家其祭亦如之今世宗祠合族數十百主咸在似起於元之季世觀宋潛溪林氏重建先祠記可見林氏分三支統為神牌五死則書名其上各為主今俗亦有之

而皆不及始祖如此乃於古今禮兩無悖矣祫祭及毀廟惟天子諸侯則然大夫于祫已止及高祖士又

可知程子時祭止於高祖高祖而上於立春設二位統祭之朱子初亦依行後亦以為僭閣下謂今民間

宗祠祭自始祖而下無祧制不必論而歲暮相沿遷主皆祭案朱子却無歲暮之祭亦祫之遺而疑於有舉者不可

廢無禮者不可踰履謂不可踰是也不可廢非也蓋所謂有其舉之莫敢廢也者亦在分所可祭者耳若

求之古禮而不合考之今制而又違徒出於習俗相沿而失之僭則正賴知禮之君子起而正之又何有

舉不可廢之有耶履禮學極淺姑以意論之是否幸賜裁正

答陳仲虎論殤祭書

張履

來諭古殤祭皆男然殤服兼女子子姑姊妹父妾有女卽有庶母名而爲制服則女殤亦不可遺何祭禮無女殤之祭履按古非獨女殤不祭卽庶殤亦不祭也祭法王下祭殤五諸侯三大夫二士庶人止於子鄭注凡庶殤不祭喪服小記殤與無後者從祖祔食注凡所祭者唯適子耳曾子問凡殤與無後者祭於宗子之家注凡殤謂庶子之適也宗子之適亦爲凡殤過此以往則不祭也雜記於殤稱陽童某甫不名神也注陽童謂庶殤也宗子則曰陰童此以適殤對宗子言故曰庶耳据此則殤祭止於適不及於庶女殤之不祭又何疑矣夫庶殤女殤與適同服不與適同祭原夫聖人制禮之意蓋以服以飾哀祭以追養並屬所生則死亡之戚無異非將傳重則鞠育之恩有終然而柩羹孟飯設位別室使其兄弟主之曾子問宗子殤吉祭特牲不舉無所俎無元酒不告利成注無尸及所略也凡殤則特豚也是庶殤當更略矣曾子問凡殤祭於宗子之家此從祖祔食而宗子主之者庶殤女殤異此○文獻通考殤祭無祝不拜一獻而止此亦緣情之爲而聖人所不禁者乎或曰子論非宗子不祭始祖雖大夫不祔祧主禮如此其嚴也而於庶殤女殤之祭獨循俗爲說何與曰不然也上祀主敬主敬者物必備故當守其分之常下祭主恩主恩者禮從略故可通乎例之變質諸有道以爲何如部文引例載獨子承祧兩房所嗣係大宗準其兼承不得並行三年喪其本生父母仍服期者正謂爲所兼承之大宗三年而本生父母仍同出後降服之期耳此大宗未必世適而服制如此未嘗與鄙論合來諭云云似誤讀例文幸更詳之履頓首

曾子問疏熊氏云殤與無後者唯祔食與除服二祭則止此言吉祭唯據祔與除服也庾云吉祭通四時常祭若如庾言殤與無後之祭不知何時休止未有聞焉喪服小記疏庾云此殤與無後者所祭之時非惟一度四時隨宗子而祭也履案合曾子問小記觀之皆無以見其不與四時吉祭且有父母兄弟而唯祔與除服二祭卽止亦非人情孔疏於小記仍引庾說而無駁固不敢以其說爲非也若何時休止之疑如近儒惠氏謂所祔之祖祧則止夫祧必親過高祖殤與無後之祭必至是而始止似又太遠又不知三殤如何分別仲虎據通禮載祔位伯叔之成人無後及其長殤兄弟成人無後及其長殤中殤子姓成人無後及其長殤中殤謂下殤之祭終父母之身中殤之祭終兄弟之身長殤之祭終兄弟之子然通禮言子姓長殤中殤不言下殤則似下殤不祭仲虎所云下殤之祭終父母之身亦與通禮未合

題主說

李棠階

世俗題主皆虛王字一點臨時請顯者點之徧考諸書皆無此說明儒呂新吾及本朝劉山蔚皆闕其謬今年仲冬張雲階先生葬其母以尊翁主已用朱點此時用墨一匱二主朱墨不同於心不安命某題主仍用朱點雲階先生某父行也何敢有違但其援唐宋題主墨書訖以光漆重模爲據則有疑通典所

載乃天子禮宋朱震引之亦天子事非士大夫之禮也唐宋士大夫禮不可考而今世遵用朱子家禮朱子固南宋士大夫也家禮只有題主并不言點主若用朱則必如通典特言之不容概言也據家禮則宋之士大夫不敢援光漆重模之說可知矣至本朝通禮品官止言題主卽國喪亦止言大學士題主若用朱則亦必如通典特言之不容概言也以墨筆其常朱其變也宋之士大夫不敢援用當時大喪之禮而今日乃用之今又不援時制而援唐宋大喪之禮無乃不可乎又謂尋常素書遇誥勅字用朱書示敬誠然然必全書其字豈有止用一朱點爲尊敬乎止用一朱點則實係以上行下牌票告諭所用此外無有此山蔚先生之言似未爲謬也今題主止用一朱點果出於尊敬否乎抑僅隨俗沿用乎俗固不可遽變一人亦何能變俗但考之於古今皆無據問之於心則不安果宜何從乎

齊必變食說

顧廣譽

世以茹蔬不肉食爲齊朱氏錫鬯作釋齊辨之一引周禮膳夫王日一舉王齊日三舉注殺牲盛饌曰舉證齊日仍肉食且有加一據論語齊必變食以下至不多食邢疏云此以上皆蒙齊文而孔子惟酒無量證齊日并酒亦飲之夫以齊戒茹素不肉食其法蓋始於釋道朱氏正以周禮明文允矣若鄉黨分節朱子不從注疏此有卓見衣服飲食人生不可一日而缺衣服則每事詳之至於飲食乃專詳於齊而盡遺

平素可乎齊舉明衣舉變食舉遷居事皆平列而於食獨悉數之乃爾無此文法也昔儒徒見下有祭於公祭肉之文遂舉而盡歸之齊耳然則執是以斷齊之飲酒其然也耶朱氏又謂不飲酒不茹葷出莊子文似未足據原其意殆以不飲酒茹葷雖非卽茹蔬之謂而茹蔬或自此始故并斥之然未剖言茹葷與食肉之不同幾若不茹葷之卽不食肉者則亦無以服莊子之心何則致齊食肉不茹葷葷者何說文云臭菜是也荀子述孔子之對哀公曰夫端衣元裳纓而乘路者志不在於食葷斬衰菅屨杖而啜粥者志不在於酒肉又曰黼衣黻裳者不茹葷楊倞注禮祭致齊不茹葷則齊之不茹葷荀子亦言之矣語類云不茹葷是不食五辛未嘗謂不茹葷卽茹蔬也周語虢文公論藉田之禮曰王卽齊宮百官御事各卽其齊三日王乃涇濯饗醴及期鬱人薦鬯犧人薦醴王裸鬯饗醴乃行或據以證齊亦飲酒而不知正不飲酒之明證周禮辨五齊之名二曰醴齊而內則飲重醴醴糟並設鄭氏謂五齊止用醴爲飲者取醴恬與酒味異也閒傳禪而飲醴酒始飲酒者先飲醴酒注不忍發御厚味始免喪者不嗜味故先飲醴齊者不極味亦飲醴而不飲酒矣先王之立此制所以沖和其身體而又不使得至於醉也古者慎齊之意賴是兩言以見其遺未易輕議

語類問變食謂不飲酒而今之致齊者有酒何也曰飲酒非也但禮中亦有飲不至醉之說按飲不至


醉禮無明文蓋朱子斟酌禮意爲此言後世無所爲古之醴酒而善飲者必絕其飲將至於枯寂無歡亦非禮意故爲變通之如此家禮於時祭前期三日齋戒日飲酒不得致亂食肉不得茹葷正與此條相表裏

華亭南蕩張氏支祠記

張文虎

南蕩張氏支祠華亭令西充周君煒記之矣道光十二年系孫布政司理問斌等洎羣從兄弟承先志而廣之建堂曰敦睦左築留景軒以備齋宿左右夾室爲藏祭器及餽餘之所前爲亭以處樂人整而不華質而不陋君子以爲有禮或曰禮大夫三廟適士二理問於秩視士不當及曾祖曰今家廟實祠堂也廟之制有室有寢祠堂則一室而已不可以廟例且古無廟之鬼有禱則爲壇以祭大夫士有大事省於其君于祫及其高祖然則無廟者非常祭耳非常祭則無主今何以有主曰自仕不世祿而宗法亾廟制廢於是有祠堂此古今之變也禮緣人情而作喪服父在爲母及婦爲舅姑皆今重於古而合於人情則制禮者因之程子言高祖自有服不祭甚非今會典品官皆得立家廟庶士庶人則爲龕於寢北自禰以上皆得及其高祖從今制有主宜矣曰古者左廟右寢朱子家禮君子將營宮室先立祠堂於正寢之東今立於墓側禮與曰權也唐會昌間敕百官京內置廟者但準於所居處置然居處偏狹鄰里無可開廣者

卒不能如制蓋勢有所格不必盡繩以制漢人多建祠堂於墓所仿而行之不亦可乎曰記以大夫聲樂皆具爲非禮特牲少牢二篇無奏樂之文作樂於亭不已盛乎曰禮嫌聲樂兼備非嫌用樂也大夫判縣士特縣顯著經文饋食禮文不具耳衆仲之對羽數曰天子用八諸侯用六大夫四士二有其舞斯有其樂豈徒虞身而已乎夫陳於階下則褻雜於堂上則逼此亭之所由作也是故禮者通上下之情達古今之變殷周損益各因乎時從宜從俗行之而無所窒礙者也世俗不知禮意輒執古制以相稽率發其凡於此若張氏源流世系與其彙代隱德周君記詳矣故略之云





DS
754
.K8
v.16

皇朝經世文續編卷六十一目錄

禮政十二 正俗

文昌宮碑陰錄

鬼神篇上

周元鼎

鬼神篇下

周元鼎

衛武公殺共伯辨

汪能蕭

士庶昏喪遵制正俗議

李德騫

與友人書

鄧瑤

與計二田書

顧廣譽

請飭學政整飭士習疏

黃德濂

訪舉隱逸疏

胡林翼

金山張堰鎮義塾記 代作

張文虎

送王季年學博之任崇明序

張文虎



請飭屬延師訓課回族各塾片

劉錦棠

救時芻言一則

張煥綸

皇朝經世文續編卷六十一

上海葛士濬子源輯

禮政十二 正俗

文昌宮碑陰錄

惲敬

古者天子祀天地社稷宗廟五祀而已祭法有天下者祭百神山林川谷邱陵是也周官大宗伯以鬯辜祭四方百物八蜡是也漢用方士之說祀典多無稽後世佛氏日昌所祀神皆託之西域及所謂四天下焉道士生中土祖方士之言效佛氏爲誑誘陶宏景寇謙之杜光庭諸人妄構真靈紀官纂職復舉中土君臣之名迹及叢祠淫鬼錯入徵之其說至後世益乖歧無可信考者文昌帝君之祀不知其所始崔鴻後秦錄姚萇隨楊安伐蜀至梓潼嶺見一神人謂之曰君早還秦秦無主其在君乎萇請其姓氏曰張惡子也後據秦稱帝卽其地立張相公廟祠之常璩華陽國志梓潼縣善版祠一名惡子民歲上雷杼十枚璩志終於永和三年在萇稱帝前五十年是萇之前已祀惡子矣唐封順濟王宋改封英顯王元以道士之說封輔元開化文昌司錄宏仁帝君於是山經地志稗乘外書附會不經之辭布滿天下道士悉刺取之以意牽合錄爲化書而學士大夫之好怪者竊其妄說捕聲附影瞶聽瞽說嗚呼可謂不祥也已

前明之季年大臣議禮者以爲宜罷其祀是又不然夫王者受命進退羣神之祀凡以爲民已耳其合乎天神地祇人鬼之典法者秩宗之所掌縫掖諸生之所誦習百世不廢者也其不合乎天神地祇人鬼之典法而能見靈爽爲徵驗捍禦水旱兵革爲天下所奔走王者亦秩而祀之所以從民望也 本朝承平既久上下以休養爲福愚氓積煽遂盜兵戈今全蜀就平楚陝亦靖 皇帝以文昌帝君爲蜀之神歸功底定祇闕其祀有司考定禮樂頒之四埏意以天下之集甯則將士之宣力不暇百姓之效順也然以天下之大智者愚者皆赫然於天人之交際百神之呵護則國家之大祉百世之所以治安也敬以愚瞽隨肩州縣下吏無以仰輔 朝廷之制作竊以私見鄙識窺測萬一如此若夫道士所言如里巫巷祝視鬼造妖以惑蚩蚩者之視聽豈足信哉豈足信哉敬以其行世已久恐爲大蔽爰取其太甚者條辨之列於左方使天下知 朝廷所以祀文昌帝君在彼不在此庶幾后夔伯夷之倫所是許焉

王氏見聞錄雋州越雋縣張翁畜蛇令欲殺之一夕雷電縣陷爲巨湫蛇爲陷河神張惡子謹按梓潼嶺卽七曲山華陽國志五丁迎秦女見蛇拽之山崩卽其地也因五丁之說附會蛇爲梓潼嶺之神遂取卬都地陷之說益之卽見聞錄所傳是也考後漢書西南夷傳武帝初置卬都縣無幾而地陷爲污澤因名爲卬池無陷河神之說卬都至隋始改爲越雋縣見聞錄之言其出隋唐間野人歟又明一統

志稱神爲越嶲人報讐避居梓潼蓋始以神附會爲蛇繼復以蛇附會爲人化書又託之戚夫人趙王如意皆可謂無忌憚也

太平寰宇記濟順王本張惡子晉人戰死而廟存文獻通考從之謹按華陽國志元和郡國志俱無晉人戰死之說是後人以秣陵尉蔣子文戰死爲神附會之無疑

路史黃帝子揮造弓矢受封於張爲張氏詩傳張仲賢臣也箋吉甫之友也化書以張仲著於詩附會神爲張仲且以爲張宿之精謹按史記天官書張素爲廚主觴客晉書天文志張六星主珍寶宗廟所用及衣服於張氏何與耶於張仲之孝友何與耶西陽雜俎天翁姓張名堅竊騎劉天翁白龍至元宮易百官劉天翁失治爲太山守是張角謀代漢之妖言也竈神姓張名單有六女皆名察以張爲廚故竈神張姓張六星故神六女皆妖言不可從

晉書天文志文昌六星在北斗魁前天之六府也四曰司祿司中司隸賞功進與天官書四曰司命五曰司中六曰司祿不同星經又曰六曰司法蓋古之言天者以四獸配四時占生殺其附天樞者皆占宮廷命名徵驗取近是而已化書旣以文昌帝君爲魁前之司祿又以爲外垣之上相吾誰欺欺天乎蓋唐宋之時士大夫及進士過梓潼嶺得送者皆爲宰相得殿魁如鐵圍山叢談所記多矣妄者遂有

司祿之說其尤妄者證以星之司祿並尊以星之上相以相煽動而不知二星之不相屬也 本朝朱錫鬯氏求其說而不得謂文昌祀蜀之文翁何其益誕耶

說文魁羹斗也從斗鬼聲臣鍇曰謂斗首爲魁柄爲標也蓋器名耳星象之取北斗南斗小斗中斗同名皆以首爲魁柄爲標於是傳訓爲首者爲魁漢書里魁黨魁是也復轉訓試名之冠其曹者爲魁老學菴筆記宋元憲夢大魁天下揮塵錄呂文穆等以大魁至鼎席是也令乃以斗倚鬼爲魁星之神復以文昌在斗魁之前而祀之於文昌宮大可訖也其他如化書所言以白羸進僖宗乃因明皇青羸入蜀而附會之朱衣神則因歐陽文忠公而附會之不知侯鯖錄所言乃刺關節者得售以誣文忠不可訓也

鬼神篇上

周元鼎

鬼神者何陰陽也陰陽者何氣也氣之所以爲氣不可名則名之爲太極耳陰陽之所以爲陰陽仍不可名則名之爲鬼神耳蓋旣爲氣矣其在於天不得不闢也闢也日月星辰不得不東出而西沒也不得不晝而夜夜而復晝也春夏秋冬不得不長生而收藏也凡萬物不得不以枯以榮以化以育也是闢也出也晝也春夏也生長也榮而育也皆神也是闢也沒也夜也秋冬也收藏也枯而化也皆鬼也而其在人

乃有呼有吸有動有靜爲氣爲血爲魂爲魄爲寤爲寐爲生爲死皆氣之陰陽爲之也則皆鬼神之爲之也又極而言之心太極也性其體也爲鬼情其用也爲神耳目其體也爲鬼能視能聽其用也爲神四肢百體無一非氣之爲陰陽之爲則無一非鬼神之爲也人如是凡萬物之含生負氣莫不如是所謂不見不聞體物而不遺也所謂鬼神之德之盛也明乎此也天地間之鬼神卽吾心之鬼神然惟吾心有鬼神而後天地間有鬼神何也日月星辰之昭昭此鬼神之常可視可指者也習焉而不之異矣風雨霜雪之與雷霆此亦鬼神之常候有而候無不知其來與所往也亦習焉而不異之矣卽以人言心之馳也倏忽於千萬里之外而目如視之耳如聽之游於千百年之上下而可以論世可以俟之百世凡此豈不甚奇甚怪大可驚愕乎又自其最近者言之人之飲食也陳物於杯盤意欲之而心動也則體就之肘赴之腕趨之指執筆而採取之口以啟舌以舐齒以截嚙咽以氣而喉爲納之乃入於腹由外以至入腹各任其職共效其能凡其委曲者多矣而一瞬之間效用之神速乃不謀而授不待言而喻而莫知其所以然不又爲至靈至妙極神極奇大可驚愕矣乎然亦習焉而不以爲異也其心不見爲鬼神天地間亦安有鬼神乎而乃於聞非常聞見非常見如伯有之厲曹社之謀竈之煬沈之履以爲鬼矣而乃於臺駘寶沈降於莘言於宋以爲神矣自爲鬼神而獨異乎物之有鬼神終日在莫非鬼神之地而忽獨有可驚可愕之

鬼神均此鬼神均此見聞者之皆鬼神不之異也而忽以一人所見所聞之非常有者以爲至靈至妙極神極奇之鬼神也蓋亦不思而已矣聖人者與鬼神合其吉凶者也於怪神不謂之有亦不謂之無而但正之以不語

鬼神篇下

周元鼎

惟聖人與鬼神合其吉凶也故明則治人幽則治鬼神何以治之治之以禮而已莫大於天地而南郊北郊以地判之冬至夏至以氣判之燔柴瘞埋以形理判之朝日夕月六宗是禋星辰寒暑各有其位以及山之嶽鎮水之江淮河漢爲望爲旅有委凡皆所以治神也社稷以句龍后稷主之凡有功德與扞大災禦大患則祀之祀其先祖則由七廟五廟三廟一廟至祭於寢廟有等器有制禮有數祀有時凡皆所以治鬼也夫非以鬼神之果有而不得不治也亦非以鬼神之果無而可以不治也所以盡乎人之道而本於人之心有必如是而後快者何也人之施於人也不必望其報而人之受施於人也則必思所以報不報焉而其心不能安也夫受施於人且若此而況戴者天履者地乎況其照臨之所被雨露之所濡草木貨財禽獸之生殖以利用乎況其始爲之播種以養我乎況其屬毛離裏以生我乎彼其爲鬼爲神不必望報而人之報之容可已乎禮尙往來者也聖人之所以治鬼神者本於人心而盡其道則亦以

禮治之已耳夫以不望報者待鬼神是待鬼神之厚也故謂其未嘗有可也以不可不報者待人是亦待人之厚也故謂其未嘗無可也孔子曰敬鬼神而遠之其敬也以鬼神之未嘗無也其遠也以鬼神之未必有也且吾既思報之矣又不之遠而有求於鬼神則卽報施於人且不可也是無厭之求也可乎哉後人之事鬼神也不以禮其所敬者則必有所求其所遠者則必無所求且當有所求則敬之及其無所求卽遠之充其求之之心名爲鬼神者益多而所以事之益大倍於禮卽使鬼神果靈亦不至任人之忽敬忽遠而給其所求也可不謂大愚乎且夫鬼神之非吾之及奉事者多矣卽吾之先祖不及奉而事亦已多矣人之所及朝夕奉事則莫如父母吾以鬼神之道事之於廟於寢何如以人之道事之於堂上於膝下父母豈望報哉人子之報其愛日之誠可得已乎所以守身思顯揚之志可不力乎此聖人之所以勤拳拳教人以孝治天下之意也若夫生無以養死無以顯乃至求遺澤於爲鬼神之時葬者藏也至數十年而弗藏或且狐埋之而捐之其非子也夫

衛武公殺共伯辨

汪能肅

史記曰釐侯卒太子共伯餘立爲君共伯弟和襲攻共伯於墓上共侯入釐侯諱自殺衛人葬之釐侯旁諡曰共伯立和爲衛侯是爲武公索隱曰和殺共伯自立此說蓋非也按季札美武公之德又國語稱武

公九十有五矣猶箴誠於國恭恪於朝作抑自倣至於沒身謂之叡聖又詩序衛世子共伯蚤卒不云被殺若武公殺兄而立豈可以爲訓而形之於國史乎肅以爲共伯先釐侯卒無疑也春秋左氏之例君存稱世子君薨稱子旣葬稱君成爲君也釐侯旣有墓矣是共伯成爲君也何衛人猶曰共伯詩序猶曰衛世子共伯耶史記武公立凡五十五年而卒國語武公作抑詩時年九十有五是其卒時當及百歲其立時當及五十歲共伯長於武公其被殺當及五十餘歲何詩序猶曰蚤卒耶髦者人子事父母之節喪大記云小斂主人脫髦釐侯旣有墓共伯旣成君則脫髦久矣何柏舟詩猶曰髦彼兩髦耶且以弟殺兄而代立此天下萬世所大不平者也季札國語豈得不言詩序豈得不言柏舟詩共姜所自作尤當致其不平矣何皆無一語刺武公而憫共伯耶毛傳鄭箋本不引此以解經則孔疏亦不應及之及之則力辨其非可也乃反曲伸其說豈以逆取順守無害武公之賢隱爲太宗文過耶然太宗之誅建成元吉以惡意先發於彼也使成吉無誅太宗意太宗亦未必肯出此況武公耶索隱得其實矣錄之以正史記并正孔疏焉嗚呼使天下之人薄於兄弟君臣者史記孔疏之說也始雖殺兄弑君而終得爲叡聖則人何憚而不殺兄弑君矣以殺兄弑君之罪尙可以政事學問之善沒之則何罪不可沒矣季札國語詩小序其肯以此爲訓哉其肯以此爲訓哉

士庶昏喪遵制正俗議

李德騫

考儀禮昏喪之禮尙存士昏士喪既夕士虞諸篇然士爲有爵之士其禮不下庶人後如溫公書儀朱子家禮皆有爵位時所作其儀節猶繁亦難槩施於庶人也恭讀大清通禮酌古準今於品官禮外更制庶士禮庶民禮俾家家知禮而講之人人循禮而行之典盡善矣但藏在官府民間罕見故閭里雖窮而奢風究莫能挽等威未辨而僭分實不自知其有志世道者援儀禮書儀家禮諸書欲以矯時而未免反古茲議謹遵大清通禮及大清會典大清律例所制士庶之昏喪以正邑俗之僭侈庶幾率由有準而民德歸厚民俗還淳云

大清會典云無品級人及生監軍民不得用執事庶民婦女不得用執事大轎而邑俗庶民迎婦悉用執事大轎此僭而違禮者也大清通禮云品官昏請期備禮物三品以上羊酒四品以下鵝酒庶人昏請期用鶩夫四品猶僅一鵝而邑俗乃用八鵝八鷄十鷄此僭而違禮者也通禮云舅姑饗婦婦退饗婦送者是饗送者必先饗婦而後及耳兩饗亦一日耳且饗婦其儀詳饗送者則略以送者卽布壻席之媵耳媵亦一二人耳通禮云媵布壻席於東注云媵婦家送者而邑俗送者男女十餘人甚至數十人而饗送者肆筵設席必大宴至三日四日五日之久此奢而違禮者也通禮云諏日壻以贄見婦之父母主人醴壻此亦一日事

耳而邑俗壻家必備禮物送婦黨而婦黨亦各家宴壻必延二十餘日或月餘之久此奢而違禮者也繼自今酌禮俗之宜請期紳士祇雙鵝庶民祇雙迎鴛婦庶民祇小轎送嫁婦女祇二人饗送者祇一日婦家宴壻祇三日齊之以禮違則有罰庶幾僭奢之風可革也且邑有不明女父母因壻家貧遂聲言請期必備八鵝八鷄迎婦必具執事大轎明知其力不能辦而藉此難之以致男年當娶而不得娶女年當嫁而不得嫁甚至延之多年陰爲毀婚之計者良可慨焉誠能以禮爲防匪特僭奢可革更能婚姻以時矣斯杜離婚之漸也況邑俗溺女亦原嫁娶之奢蓋因婦家送者必男女多人非裝奩盛不足爲送者光又因壻家饗送者必開筵數日非裝奩盛不致爲饗者喜又因此女異日將送人嫁鬪美競多服飾必豫爲求備非裝奩盛不能滿其女意邑俗送者女客十餘人服飾彼此相形若一人不齊則恥甚且燕數日必易服十數次若一次不齊則恥甚故嫁女必預備之以此嫁女裝奩不得不盛因求盛不得不負債鬻產因慮嫁女鬻產故邑多溺女若送者婦女不過二人饗送者不過一日則女之服飾無須乎多嫁女亦無慮其難而產女自無庸溺矣斯清溺女之源也惟望民之父母曉以定制正其習俗敦典則民知禮崇儉則民知義保赤則民知仁行一物而三善皆得者此之謂也

大清通禮云品官喪初祭大祭一品官羊五二品官羊四三品官均羊三五品六品七品官均羊二是品官喪祭祇用羊猶不敢兼用豕而邑俗成服用羊豕二牲此僭而違禮者也通禮云成服後親賓

各以其服弔具酒果香燭厚則加財貨而邑俗親賓之弔用紬段爲輓帳此奢而違禮者也若未成嫁娶

之生親家は無服之親不宜訃不宜弔者而邑俗喪主必訃生親弔儀必重尤奢而違禮者也邑俗已成嫁娶謂之

熟親慶弔恆相往來若未成嫁娶謂之生親則喜不相慶而喪反相訃相弔已不合乎情矣通禮明言各以其服弔生親無服而弔又大違乎禮矣況邑多繡綵結親親家祖父母喪及夫妻喪皆訃皆弔

有累訃累弔之後或男亡則女另許人或女沒則男另擇配不得復稱親家矣是前訃弔悉付子虛通禮云擇宗親善書者一人題主而邑俗必延官紳點

主俗寫主字無點待官紳加之前儒已辨其謬張筵宴客族戚咸吉服如慶賀此奢而違禮者也通禮云凡喪三年者百日薙

髮而邑俗三年喪者四十九日薙髮卽除喪服是違禮且忍心也通禮云喪遏音樂大清律十惡條七

曰不孝居父母喪作樂而邑俗喪事用鼓吹以哀爲樂是違禮且罪重也請自今凡民有喪禮律可覈祭

止一牲或用羊或用豕輓毋用帛薙髮限期音樂盡革乃如題主必宗親是擇且夫喪禮之不講民德所由薄也

嘗見人家有神龕而無神主者矣推尋其故則以爲力不能延官紳也力不能燕族戚也夫宗親題主貧

亦優爲顧何以拘於俗見致令先人之神無所妥而蔑於禮之甚邪若夫豐裕之家以官紳點主爲榮以

鼓吹燕會爲慶以紬段輓帳爲光而初祭大祭虞祭祔祭禫祭之禮曾未一行焉豈知所爲費金錢

竭人力以行之者究越於禮邪凡此者皆積習相沿而未見通禮士庶喪禮之故耳爲民上者誠援定

制以正之出示以曉之有不爽然失廢然返乎雖然猶不能無扞格於其閒者邑有阻喪惡俗或人父母

沒則族屬生事或婦人沒則外戚生事挾嫌挾勢刁難多端不用音樂弗已不用羊豕弗已不張筵宴弗已不多給白衣弗已

通禮云親賓各以其服用是自具其服而來非待喪家給服也況無服之賓奚必給服邪若喪家貧力何能給邪

稍未遂意輒肆阻撓不許

大殮不許發引致令恆產之家因是糜費而破產講禮之士因是支吾而失禮尤宜禁此惡俗嚴戒重懲庶幾禮教得以通行也然則喪禮之講明迴狂瀾於既倒溥孝治於無涯豈非大有益於世道人心哉

與友人書

鄧瑤

日前足下爲瑤言有愛女早寡無子擬俟賢郎生子令寡女子之既又言太夫人存時嘗有是命故不忍違且稱近時謝濟世梅莊示螟蛉子遺令詞甚美欲仿行之嗚乎君固讀書守禮之儒者也既稱儒者則有一事之不合於禮卽爲世病瑤又烏能默默無一言然瑤初聞足下言唯唯不之辯者以足下意甚感愴故亦效婦人女子之仁嚙無一語今乃咎其非以誠待人之道也烏可終無言禮姊妹其夫死而夫黨無兄弟使夫之族人主喪妻之黨雖親弗主夫若無族則前後家東西家無有則里尹主之聖人制禮之嚴如此妻黨旣不宜主喪其不得以妻之姪爲嗣明矣又晉太常博士秦秀曰昔鄧養外孫莒公子爲後春秋書莒人滅鄧謂立異姓爲後滅亡之道也春秋之義甚嚴宜熟審之罪不孝之罪莫大於改姓君欲愛其寡女而使繼之者冒不孝之名賢女當有所弗受執事亦乖所以愛孫之道非兩全之策也梅莊以

幼子嗣其蔣氏寡妹亦受命母氏文雖美識者病之其言姑親其姪夫因其婦祀應享之似也顧不以兄弟之子或族子爲嗣而覲顏因其婦享此一盂麥飯鬼而有知其肯歆耶又言姓從蔣郡仍名陳留自爲一宗無亂人之宗夫旣爲蔣氏子矣尙謂無亂人宗乎至云蔣氏產甚薄因以田三十畝益其出繼者之子而明之曰汝爲姑後無所利而爲之者也不知貪利之罪小害義之失大其咎尙不在於利人之產與否也謝氏昧於妻黨雖親不主之義故有是舉足下不宜爲謝氏之續鄙意謂宜令寡女求其夫家親子撫之無以姪爲子使夫族有亂宗之嫌而繼者重改姓之舉若實無可嗣則昔者子朱子嘗有說矣其門人葉賀孫有姑無子而寡依母家以居賀孫以他日旣無所耐又不忍其神之無歸爲問朱子謂古禮旣廢鄰家里尹必不肯祭他人之親則從宜祀之別室其亦可也此論得從權之正賢嗣若生子卽令其姑育之視如己出他日私祀之別室并及姑之夫以慰苦志守衷且以報撫育之德斯足下父子之情無憾而於義理亦安且可慰太夫人於地下而無遺憾矣足下爲讀書守禮之儒於瑤又有久敬之雅故不欲足下以恩害義輒敢貢其愚忱書不盡言伏惟亮察不宣

與計二田書

顧廣譽

前承枉駕諄諄以令先考妣誌銘見命悚惶奚似念盛意不可虛辱謹草就呈覽恨才力凡弱無能闡揚

潛德惟是行文體例不敢自我作古亦不敢徇俗習非庶以仰副孝思於萬一惟垂鑒焉夫婦合葬敘事皆以夫爲主篆蓋標題亦止書某君而不及配王止仲錢蒙叟黃梨洲汪堯峯以來已成定論及見徐健庵讀禮通考王惕甫碑版廣例持說又異梅崖朱氏文首行亦通加暨元配某氏等字廣譽竊以爲此非統於一尊之義也且徐所據者亭林金石文字記所載澤王府主簿梁府君并夫人唐氏滎陽鄭府君博陵崔氏合祔二碑止耳而王又益以洪氏隸釋數事夫自唐及宋其誌銘何限而摭拾止此已見其不足爲典要況數碑者時與韓柳互後先宜不明於古文之義法韓柳盛行而其文已盡廢後此垂千餘載復從陵谷變遷之後獵得其殘碑斷碣輒據依之以與韓柳相牴牾何弗思之甚與諸家所豔稱者以其時之近古廣譽則謂古莫古於漢依漢碑之例且略婦氏不一見無緣并篆額標題而書之顧當論其是不是勿論其古不古耳文中不書子婦亦然乃名人集所同而廣例中引漢唐雜碑亦間書之王氏論古時出卓見而概不加辨正何邪陽湖惲氏又謂昌黎例不書孫固是然此說理難執一故歐陽已間通融而在府君尤不可不書何者以非此不足以彰爲善久遠之報也足下虛懷若谷兼熟於唐宋大家之書數者定當釋然無疑而廣譽辭繁不殺者爲諸書方流布於世易淆觀聽故信筆辨駁非謂足下有疑於此而爲是覲縷也

請飭學政整飭士習疏

黃德濂

竊惟治民之道教化爲先而欲興教化必先端士習各省督撫司道以及守令固皆訓課士子之責然或簿書錢穀執掌未遑至於各省學政則專司教化之事自宜董率各學教官盡心化導以風俗人心爲己任臣恭查嘉慶二十一年欽奉 上諭各省學政皆慎簡儒臣畀以教化之責且按試州郡遠邇必周於該省風土人情無難察訪周知奸民倡爲邪說顛蒙從而習之或誘於財利或溺於淫邪各有受蔽之由著該學政各就按試之地察其人民所易惑者作爲論說剴切化導至士爲四民之首該學政於接見士子之時尤當諄切訓誨使以孝弟忠信禮義廉恥倡率其鄉閭身以先之言以喻之由寡以及衆由親以及疏蚩蚩者氓耳濡目染有所觀感而興將日用飲食羣黎徧德久之遷善遠惡翕然成風斯邪說不足誘之矣等因欽此仰見 聖諭煌煌爲世道人心計者至深且切各省學政果能敬謹遵行自可收經正民興之效乃近日愚民之惑於邪說者如山東之大乘教兩廣之添弟會及白陽天主等教雖法律森嚴猶復轉相傳習且漸蔓延於鄰境省分此等匪徒左道惑衆法所不寬但與其懲之於既犯之後而莫淨根株不若導之於未犯之前而使之悔悟夫鄉愚縱屬無知然各有身家當其傳習之初若該處士子有能明斥其非恍之禍福者亦必惕然改悔蓋士者民之表率與民復相近雖窮鄉僻壤亦自有一二青衿

果能敦品勵學以式化其鄰里親戚自較之官長之禁令尤爲親切無如近日士子能表率其鄉里者少不自檢束者多或武斷鄉曲或把持官府架詞上控者有之相率罷者有之甚至如山東省所辦周添明案內貢生劉島於孫文治等傳習邪教猶爲之書寫綾額懵然不知其非士習如此愚民復何所觀感其爲累風俗人心者不小相應請 旨飭下各省學政於案試州都時實力整飭如生童中有不守學規武斷把持等項情弊者一經訪聞立加懲戒其束修自好者卽文理平通亦列之優等以昭獎勵併於接見之時將尊親之大義明白開示俾各知束身名教以轉導其鄉里期於比戶可封奸邪悉化且飭各學教官平日實心迪牖不得視考課爲故套尤宜自端模範以身設教使諸生無可議其短長如此則懲勸旣彰坊表復植庶賢良蔚起而民俗日淳矣臣更有請者道光五年卽係選拔乃十二年始一舉行之大典各州縣皆例得拔取一人非同鄉試之通省合校可比且不糊名易書正可將文章品行二者並衡夫十室之邑必有忠信一州一縣之衆豈無行誼敦篤素爲鄉里矜式之人乃近來取士者往往比較文詞之高下與字畫之工拙而不以器識爲先甚非所以勵士習也況選拔貢生一經 朝考取入一二等者卽得以小京官及知縣教諭等官分別錄用其登進之階視他途爲最捷尤當核其猷守不得專憑文藝亦應請 旨飭該學政等屆期慎重考取務求經明行修才能出衆者以充是選卽於現在舉行歲科兩試

時預爲察訪亦不得輕聽教官之言致起奔競營求之漸所拔取者果得其人則各學之士有所激勸而入於善各屬之民亦有所觀感而恥爲非於士習民風均有裨益

訪舉隱逸疏

胡林翼

竊惟鄂居天下之中水陸四達平時富商巨賈往來聚集競尙繁華閭閻耳濡目染相習成風變本加厲識者蓋隱憂焉迨經兵燹迭擾民氣凋殘遷播流離四民同困此固循環剝復之自然亦天心人事轉捩之機會也臣維移風易俗教化爲先顧官之於民條告或視爲具文刑章亦倖圖苟免不若其鄉之賢士大夫朝夕與處情易通而言易入者亦勢使然也特以側陋寒微不求聞達當道者又不搜羅汲引任其淪沒巖阿無怪乎滔滔皆是提倡無人而浮僞之士且以爲積學立品如某某者卒亦無所表見甚至窮餓終老人亦何樂爲君子而恥不爲君子哉此世風之所以日下而人才之所宜亟舉也鄂之興國州爲江西入楚門戶逆匪頻年岨負蹂躪特甚處士萬斛泉結茅山中讀書講道賊至時正襟端坐絃誦不輟賊亦不敢逼自相引去平日以朱子小學暨近思錄爲宗尤精研大學衍義並性理諸書家貧性孝取與不苟前學臣龍啟瑞杜翰將拔爲秀才遂不應試延主崇正書院講席深裨士林其弟子宋鼎鄒金粟均布衣不求仕進安貧樂道砥礪廉隅爲鄉里所矜式臣徵之皆不肯出復加採訪輿論翕然竊以造物生

才原關氣數 國家選士不限雲泥當茲力挽頽風得才士百不若得醕士一可否仰乞 天恩准將興國州處士萬斛泉給予國子監學正銜宋鼎鄒金粟均給予翰林院待詔銜庶幾觀感奮興頑廉懦立共率由於仁義道德之域實於人心風俗大有裨益

金山張堰鎮義塾記

代畢子筠大令

張文虎

古者閭里之塾設之於官由是以達於庠序既立之師矣自閭胥以至州長又各以其期屬民讀法考其德行道藝善則書之惡則糾之而又於庠序之中行興賢序賓正齒位之禮使人知尊卑長幼之誼衣冠揖讓之文誠以爲化民成俗莫先於學也後世制不如古而義學之制猶近於古之里塾然貧人所求數與方名而已而或者猶諱入義學忍使其子弟日游敖以入於不肖夫徒以貧爲諱而不知不肖之可恥此俗之所以日壞也昔原伯魯不說學而閔子騫知周之將亂不學之敝一至於此張堰鎮距金山治南三十里士商工賈羣萃而處蓋二百年於斯輒近俗靡敝習日甚往往有棄其恆業而嬉於浮博者頑獷之徒攘臂市肆以強凌弱童稚習於聞見效爲謔浪亦遂有羣聚叫囂睥睨自雄者於乎不有以維持之其流失敗壞未有所底止也咸豐五年錢廣文熙泰創置義塾延吳江徵舉孝廉方正董君兆熊爲之師凡貧無力者皆得就學又設立賞罰以示懲勸廣置經籍以備成材者觀覽意使編戶之子稍知字義易

於就業而不爲游手好閒其有可造之材則亦不至於湮沒廣文之用心可謂厚矣抑予有進者鄉飲酒之禮尙矣鄉官講約卽周禮屬民讀法之意今旣久不行宜略放其意而酌減其儀節以時行之於塾俾有所觀效又約凡往來於塾者衣冠端肅言行必擇如是耳濡目染恍然知尊賢之可慕而禮節之不可失奇袤之可恥而刑罰之不可冒其能讀書爲士者於此始基或罷而爲農工商賈亦不至入於不肖則一閭里之塾而轉移風俗之幾在是矣記有之君子尊讓則不爭絜敬則不慢不慢不爭則遠於鬪辨而無暴亂之禍夫事固有作于數十年之前而效見於數十年之後者廣文其有意乎廣文介海甯李善蘭茂才屬爲之記余老且病而胸中怲怲時有不得已於世者遂略言之若夫究其端緒則茂才其聞之矣

送王季平學博之任崇明序

張文虎

吾友王廣文季平將攝任崇明行有日矣或曰季平與子厚古人臨別贈言獨默爾可乎予曰固也凡校官之職督率士子佐有司教民整風俗而已故其秩不高而任與令等其見於上官也禮貌有加焉吾吳俗尙浮靡他郡不暇論蘇松所屬爲州廳縣者二十有二雖肥瘠不同而皆不免於敝太倉嘉定少減焉惟崇明孤縣海中力田務本俗尤樸儉雖富厚者亦與他邑甯人等豈成邑在後風氣未開與抑產於是土者秉質獨醇與國家功令校官除授不出省惟辟本郡自粵寇內犯迄今餘半江以南郡邑無完境

獨崇宛然無恙蓋隔於海故也或曰亦由其民樸厚富者不暴殄天物貧者循業守分耐艱苦苟免凍餓幸矣故不生盜心其免於寇宜也季平遂嘖然曰不亦善乎此固吾桃花源也予曰不然蘇松之人辟地於崇者多矣以爲桃花源可也子則非徒辟地而已固以正士習移民俗爲職守者也崇之俗信善矣吾不知辟地於此者能欣慕而從其敦樸乎不然崇之人將轉相慕效而長其浮靡以漸漬於諸邑之敝俗則官斯土者病也風俗之興倡於士其壞也亦始於士子且以身督率而誨喻之由士以及於齊民俾保其善俗而不至於敝其庶幾無負此行與此吾所以期季平也乃書之以爲贈

清飭屬延師訓課回族各塾片

劉錦棠

新疆各城向設阿奇木伯克等員其職銜有三四品者現議建置郡縣擬設丞倅牧令各員官階旣非甚崇若回官仍循舊章殊有枝大於本之嫌似宜量爲變通以歸妥善郡縣設定後擬將回官各缺暨阿奇木伯克等名目槩行裁去各廳州縣另行酌設頭目額數略如各省辦公紳士不可以官目之遇有缺額卽行就地選舉出具切實考語詳由該管道轉請邊疆大員發給委牌惟須照回官向例撥給地畝作爲辦公薪資免滋需索侵吞諸弊又南路纏回愚懦者居其大半彼教中所謂條勒阿渾往往捏造邪說肆其誘脅之術人心易爲搖惑禍亂每由此起纏頭語言文字本與滿漢不同遇有訟獄徵收各事件官民

隔閼不通阿奇木伯克通事人等得以從中舞弊是非被以文教無由除彼錮習自全疆戡定以來各城分設義塾令回童讀書識字學習華語其中儘多聰穎可造之資授之以經輒能背誦學寫楷書居然端好爲之講解義理亦頗能領會足見秉彝之良無分中外雖不必侈言化民成俗而其效已有可觀此時建置南路郡縣教職等官暫可不設惟宜設法鼓勵使回族爭奮於學庶教化可期漸興所有原設各塾應由各廳州縣延師訓課以小學孝經論語孟子大學中庸詩經易經春秋教各回童擬每歲令各廳州縣考試一次有能誦習一經熟諳華語者不拘人數多寡卽送該管道衙門覆試詳由邊疆大員援照保舉武弁之例咨部給予生監頂戴待其年已長大卽准充當頭目如有勤學不倦能多習一經或數經者無論已未充當頭目均准各廳州縣考送由道覆試請獎再行遞換五品以下各項頂戴仍不得逾六品以示限制惟曾任三四五品阿奇木伯克者裁缺後仍應准其照舊戴用翎頂充當頭目其各項頂戴頭目人等如果承辦差使異常出力仍隨時酌量保奏懇 恩賞給三四五品頂戴用昭激勸

救時芻言一則

張煥綸

粵民最信鬼神故淫祀徧地寺廟之鉅麗僧道之豪富鮮與爲儷因之銷耗民財窟穴奸盜禱祀之費急於醫藥巫覡之命尊於父師蠹國殃民莫此爲甚前時大吏鮮有悟其非者反從而崇奉以邀福此固習

之所以愈深也又粵人最信風水往往停柩不葬及爭地起釁甚有夜半掘人祖父之墳而易以己之祖父者惡習尤宜早除惟公博學能文宜爲文以開導之立法以嚴禁之民當有幡然悟者

皇朝經世文續編卷六十二目錄

兵政一 兵制上

松筠

伊犁駐兵書始

姚文棟

八旗兵制攷

曾國藩

簡練軍實疏

倭仁

論直隸添設六軍疏稿

江忠源

答劉霞仙茂才書

龍汝霖

整頓營務議

沈葆楨

請整頓額兵疏

經世文編

卷之十二

論學

論學

論學

論學

論學

論學

論學

論學

論學

論學

論學

論學

論學

論學

論學

論學

論學

論學

皇朝經世文續編卷六十二

上海葛士濬子源輯

兵政一 兵制上

伊犁駐兵書始

松筠

新疆滿洲綠營官兵分布南北兩路有駐防換防之分駐防者攜眷之兵永遠駐守惟伊犁及烏魯木齊古城巴里坤滿洲綠營皆然土魯番滿營兵亦如之北路之塔爾巴哈台滿兵則自伊犁調撥南路之喀什噶爾英吉沙爾葉爾羌烏什阿克蘇滿兵則自烏魯木齊古城巴里坤調撥其綠營兵則自內地調撥皆輪班更替非常駐者也伊犁地極西徼又爲將軍帥庭故較之烏魯木齊駐兵尤多有滿洲蒙古八旗兵有綠營屯兵有錫伯索倫察哈爾厄魯特等兵環衛森嚴所以靖邊圉而資控馭最爲整肅溯其始駐之年各有不同惠遠城滿營始自乾隆二十九年至三十一年由熱河涼州莊浪移駐惠甯城滿營始自乾隆三十五年至三十六年由西安移駐錫伯營始自乾隆三十年由盛京移駐索倫達虎爾營始自乾隆二十九年由黑龍江移駐察哈爾營始自乾隆二十九年由張家口外移駐厄魯特有自乾隆二十九年由熱河移駐者爲達什達瓦厄魯特達什達瓦者準噶爾台吉小策零敦多卜之子爲其汗喇嘛達

爾札所殺屬衆投誠安插熱河事在準噶爾未滅之前有自準噶爾既滅於乾隆二十五年以後陸續招撫並由哈薩克布魯特投出者又有沙畢納爾人等於乾隆三十六年隨土爾扈特歸順安插伊犁者此外綠營屯兵則自乾隆二十五年以後三十五年以前由陝甘兩省陸續移駐至四十三年始改爲攜眷者此各營官兵先後駐防之大略也

附
官制兵額

南北路疆域底定參贊大臣阿桂於乾隆二十五年由南路帶兵至伊犁鎮守開屯爲辦事大臣

二十七年設伊犁將軍總統新疆南北兩路

二十八年設領隊大臣一員管理察哈爾營官兵事務

二十九年設領隊大臣一員管理索倫營官兵事務

三十年設領隊大臣一員管理厄魯特營官兵事務

將軍統轄外夷設營務處派協領佐領等官總理其事沿邊卡倫嚴禁私行出入如本管某營領隊大臣巡查所管卡倫由某卡至某卡各該卡倫侍衛隨時具報營務處稟知將軍雖領隊大臣亦不得擅出卡倫凡應出卡倫公幹者俱由營務處請示將軍傳檄爲憑除照例貿易者外如有外來夷衆卡倫

侍衛立即具報營務處稟起將軍定奪至各營官兵缺出其應選者營務處查其功過稟知將軍揀選挑補所有將軍閱操一切事務俱隸營務處

滿營檔房派協領佐領等官總司八旗官兵一切事務印房掌關防司員一員幫辦一員專管一切日行事件及吏兵各部應行咨覆者俱由印房承辦稿案內由京派來司員一員本處保陞主事職銜一員

摺奏處印房兼管派本處協領及保陞主事職銜併筆帖式等專司其事

功過處印房兼辦專管八旗官員功過登記檔案

糧餉處掌關防司員一員幫辦三員專管錢糧支發文案及年終造冊報銷並關涉戶工二部事件一切稿案俱由糧餉處承辦內由京派來司員一員由京廢員賞給職銜派來者二員本處保陞主事職銜一員

駝馬處掌關防司員一員幫辦一員專管各部落牧放孳生牛馬冊籍及哈薩克貿易牲等事由京廢員賞給職銜派來一員本處保陞主事職銜一員

管倉糧員四員分駐惠甯城固爾札綏定城塔爾奇城四處專司各倉收放糧石或請由京廢員賞銜

派來更換或由現在伊犁糧餉駝馬等處當差之已賞職銜廢員內奏請調補遺缺仍請由京補派以上共十二員由京派來者九員年滿時請派京員更換本處保陞者三員缺出仍與本處筆帖式揀選奏請補用本處如不得人仍請京員

管糧同知一員由陝甘同知官內調取管理倉庫錢糧綢緞布疋各項收放等事三年更換

筆帖式四員內印房二員糧餉處一員駝馬處一員俱由本處筆帖式內挑補三年期滿願進京者以部缺用願留本處者以驍騎校用如本處筆帖式內保陞主事職銜委署章京及七年期滿願進京者引見以部缺用願留本處者以防禦用其由主事職銜保陞本處同知者七年期滿送部引見開缺另行奏補

委筆帖式八員內營務處二員滿營檔房二員印房二員糧餉處一員駝馬處一員南北臺站七員俱由本處滿兵帖寫內挑補報部准載六品頂五年期滿保列一等者以驍騎校用二等者撤回本營當差

卡倫侍衛十五員除在城營務處酌留一二員餘俱分撥卡倫卽帶各營官兵駐守俱係由京侍衛章京派來三年更換

撫民同知一員管理九城牲畜煤審稅賦並房租地租錢局廠工及一切商民緣營命盜詞訟案件

理事同知一員管理兩城滿營各部落回子等一切命盜脫逃各案及旗民交涉事件

巡檢四員內惠遠城一員專司監獄惠甯綏定霍爾果斯三城各一員俱由陝甘現任內調補三年俸

滿調員更換俟新任到後協辦半年回至本地候陞

乾隆二十九年止三十一一年止調熱河涼州莊浪滿兵蒙古官兵攜眷移駐惠遠城

協領八員 佐領四十員 防禦四十員 驍騎校四十員

內空藍翎八員

世襲恩騎尉二員 催總四十名 領催一百二十名 前鋒三百二十名

內委金頂藍翎前鋒校四十名小旗

四十名另由佐領內選委前鋒翼長二員以爲前鋒統轄馬甲二千八百名 砲手四十名

又由佐領防禦內選委前鋒章京八員各管一旗前鋒

內八旗共委前鋒二百名

步甲六百名 匠役八十名 養育兵二百四十名 五十五年將軍保甯奏明添烏鎗步甲四

百名

乾隆三十五年起三十六年止調西安滿洲蒙古官兵攜眷移駐惠甯城設領大臣一員專管

協領四員 佐領十六員 防禦十六員 驍騎校十六員

內空藍翎四員

世襲恩騎尉三員 委筆帖式二員 催總十六名 領催六十四名 前鋒一百六十名

內委金頂藍翎前鋒校十六名小旗十六名由佐領選委前鋒翼長一員以馬甲一千四百五十六名內為前鋒統轄又由佐領防禦內選委前鋒章京四員每員專管兩旗前鋒

旗共委前鋒手十六名 匠役四十八名 養育兵六十四名

乾隆三十年自盛京調錫伯營官兵一千戶移駐設領隊大臣一員專管

總管一員 副總管一員 佐領八員 驍騎校八員 委藍翎侍衛四員由領催披甲內挑補輪住卡倫

委筆帖式二員 領催三十二名 兵九百六十八名

以上錫伯營官兵現在伊犁河南駐牧屯種自食隨時操演鳥鎗騎射

乾隆二十九年調黑龍江索倫達虎爾官兵一千戶移駐設領隊大臣一員專管

總管一員 副總管一員 佐領八員 驍騎校八員 委藍翎侍衛四員由前鋒領催內挑補輪住卡倫

委筆帖式二員 前鋒校四名 前鋒三十六名 領催三十二名 兵九百六十八名

養育兵二百名

以上索倫官兵在奎屯薩瑪爾地方游牧種地自食達虎爾官兵在霍果爾斯科河一帶建蓋房屋居

種地自食隨時操演鳥鎗騎射

乾隆二十九年自張家口外移駐察哈爾八旗官兵一千八百戶三十二年將軍阿桂奏明分八旗左

右翼每翼九百員名設領隊大臣一員專管

左翼

總管一員

副總管一員

佐領八員

驍騎校八員

委藍翎侍衛三員

由領催披甲內挑補輪住卡倫

委筆帖式一員

領催三十二名

兵八百六十八名

右翼

總管一員

副總管一員

佐領八員

驍騎校八員

委藍翎侍衛三員

由領催披甲內挑補輪住卡倫

委筆帖式一員

領催三十二名

兵八百六十八名

前因該營閑散幼丁甚少不敷挑補甲缺於乾隆三十八四十四五十五等年奏明由厄魯特營閑散

內三次撥入察哈爾營四百二十戶

以上察哈爾左右兩翼官兵現在博羅塔拉哈布塔海賽里木淖爾一帶地方游牧種地自食並分司

官馬牛羊牧廠隨時操演矛桿鳥鎗間習騎射

乾隆二十九年自熱河攜眷移駐達什達瓦厄魯特官兵五百員名編爲左翼除設總管佐領驍騎校等官原設領催兵丁五百名

乾隆二十五年起陸續招撫厄魯特及由哈薩克布魯特陸續投出厄魯特編爲右翼除設總管佐領驍騎校等官原設領催兵丁七百名

乾隆三十三年將軍阿桂奏明左翼列爲上三旗右翼列爲下五旗各總管一員副總管一員每旗佐領一員驍騎校一員管轄自二十九年移駐熱河厄魯特後三十年設領隊大臣一員專管

乾隆三十七年將軍舒赫德奏言投誠土爾扈特內安插伊犁之沙畢納爾人等共八百六十七名歸入下五旗厄魯特添設副總管佐領驍騎校等官管束欽奉

恩旨伊犁厄魯特生齒日繁又有隨土爾扈特投來沙畢納爾人等著加恩給賞錢糧以資養贍等因欽此經將軍舒赫德奏明上三旗添給五錢錢糧一百九十六分下五旗添給五錢錢糧二百三十八分沙畢納爾添給五錢錢糧二百六十七分

乾隆六十年將軍保甯因伊犁厄魯特閑散人等出差鞍馬等項俱係自備不能官爲辦給奏奉諭旨上三旗加添錢糧四百六十八分下五旗加添錢糧七百六十分沙畢納爾加添錢糧三百零四分上三旗

總管一員

副總管一員

佐領六員

驍騎校六員

委藍翎侍衛三員

此缺在兵數內食二兩

領催二十四名 食一兩五錢披甲三名 食一兩披甲四百七十三名 食五錢披甲六百

六十四名 領催披甲共一千一百六十四名 內有筆帖式一員 又世襲雲騎尉三員 頭等臺吉一員

四等臺吉三員

下五旗

總管一員 副總管一員 佐總十員 驍騎校十員 委藍翎侍衛三員 此缺在兵數 食二兩

領催四十名 食一兩披甲五百名 食五錢披甲一千零七十七名 領催披甲共一千六

百一十七名

又世襲雲騎尉二員 現存拜唐阿二名

沙畢納爾營 此項官兵俱屬下五旗總管副總管所轄

副總管一員 佐領四員 驍騎校四員 食二兩領催十六名 食一兩委領催十六名

食五錢披甲五百七十一名 領催披甲共六百零三名 又土爾扈特三等臺吉一員

以上厄魯特官兵上三旗在特克斯察林塔瑪哈一帶地方游牧種地自食下五旗在霍諾海崆吉斯

一帶地方種地自食並分司官馬牛羊駝隻牧廠隨時操演矛桿鳥鎗間習騎射

乾隆二十五年起陸續調撥綠營兵三千名駐守伊犁屯田按期更換四十三年將軍伊勒圖奏明將屯田兵改爲攜眷移駐額缺三千名以一千八百名種地一千二百名當差隨時操演設屯鎮總兵管轄

總兵一員專理屯田及兵丁操防等事

中營駐綏定城

游擊一員 守備一員 千總二員 把總四員 經制外委六員 額設外委六員

馬步兵各三百名

左營駐廣仁城

游擊一員 守備一員 千總二員 把總四員 經制外委六員 額設外委六員

馬步兵各三百名

右營駐瞻德城

都司一員 守備一員 千總二員 把總四員 經制外委六員 額設外委六員

馬步兵各三百名

霍爾果斯營駐拱宸城

叅將一員 守備一員 千總二員 把總四員 經制外委六員 額設外委六員

馬步兵各三百五十名

巴彥岱營駐熙春城

都司一員 千總一員 把總二員 經制外委三員 額設外委三員 馬步兵各一

百五十名

塔爾奇營駐塔爾奇城

霍爾果斯營
叅將兼轄

守備一員 千總一員 把總一員 經制外委二員 額設外委二員 馬步兵各一

百名

乾隆五十五年署將軍永保奏准設北關汛稽查盜賊派撥守備一員把總一員外委二員兵丁一百

名駐北關汛地

嘉慶十年將軍松筠奏明惠遠城北關汛原派兵一百名不足以資巡防請於中左右等六營抽撥差兵一百移赴北關汛一同駐守原設守備員弁照料難周並請於鎮標左右營內添撥把總一員經制

外委額設外委各一員移駐彈壓奉 硃批知道了欽此

附額設兵書向例由涼州西甯各鎮選派三年期滿咨調更換其辦事奮勉者再留一年移咨陝督以經制外委補用副將將軍伊勒圖奏明准照部院繁缺書吏年滿免考以各項微員選用嘉慶五年接准部咨准照新疆書吏五年役滿咨部掣籤未入流職銜發給執照令其承領如遇該書吏辦事勤謹留駐二年於年滿時出具考語咨部請照新疆議敘書吏年滿之例歸於雙月陞選十缺之後選用駐冊若再留二年始終奮勉期滿咨部照例卽選嘉慶五年將軍保甯奏明伊犁印房糧駝馬三處原設額缺書識十四名向例由內地涼州西甯二鎮營調派六名作爲三年更換其餘八名俱在伊犁屯田兵丁內挑派頂補伊犁自乾隆四十四五等年移駐鎮標攜眷兵丁以來迄今二十餘年該營幼丁習學文字者日漸增多書算頗不乏人況由內地撥書識自本營起程例得驛價安家等項銀兩及至出口又須乘騎台馬支食鹽菜口糧殊多糜費今本處兵丁旣書算得人其內由內地調撥書識六名似可停其咨調以節糜費倘日久遇有缺出伊犁一時實在頂補乏人再爲照例由內地調派等因遵行在案

八旗兵制攷

姚文棟

國家龍興之初初立八旗八旗兵凡六萬人合滿洲蒙古漢軍爲一天聰間分蒙古爲八旗兵萬六千八百四十崇德間又分漢軍爲八旗兵二萬四千五十自後歸附日衆生齒日繁兵亦日增無定額順治元年世祖章皇帝定都燕京各八旗兵從龍入關者不下二十萬其時都統準塔征山東英王征陝西豫王征江淮每路兵各五六萬而京師宿衛之兵及內大臣和洛輝留守盛京者亦各數萬蓋不啻再倍於從前矣天下既定乃別八旗之色而定其方位於所勝之方正黃鑲黃位北方正白鑲白位東方正紅鑲紅位西方正藍鑲藍位南方位藍於南方者以藍代黑故也今攷乾隆嘉慶來八旗之兵制大略有二端曰禁旅曰駐防京師禁旅分隸於八都統八都統者八旗各一滿蒙漢都統所統曰驍騎營其隸驍騎營者曰馬甲馬甲之優者選以司檔冊俸餉曰領催領催馬甲之外掌治軍器者曰匠役凡滿蒙漢領催馬甲共三萬四千六百二十七匠役名目不一有弓匠鐵匠鞍匠鍍匠銅匠及箭匠骹頭匠之別共千三百九十一皆屬於八都統其不屬八都統者曰前鋒營曰護軍營又有圓明園護軍別爲營曰火器營曰健銳營各隸於統領及總統大臣與領侍衛內大臣所屬之親軍皆司宿衛扈警蹕焉前鋒護軍八旗之精銳親軍惟上三旗有之健銳卽雲梯兵亦爲前鋒火器亦卽護軍所屬有礮甲有鳥鎗護軍統計親軍前鋒各千七百七十護軍萬五千四十五健銳二千礮甲鳥鎗護軍六千一百九十五之萬七千七百十人者皆滿

洲蒙古兵漢軍不得與而漢軍驍騎營所附設之礮甲三百二十人藤牌兵八百人昇鹿角兵二千一百六十八人亦滿洲蒙古驍騎營所無惟步軍營領催步軍二萬一千一百五十人則合滿蒙漢以爲營與驍騎營同而別隸於統領他如虎槍營兵六百人善撲營勇士三百人各簡大臣以統之此八旗禁旅之大略也八旗兵之駐防在外者其制與禁旅不同禁旅滿蒙漢各爲營而駐防則合滿蒙漢以爲營也駐防之地畿輔凡二十五東三省各城凡四十四各省凡二十新疆等處凡八大抵受治於城守尉防守尉而統之將軍都統及副都統其新疆之伊犁烏嚕木齊則以領隊大臣治之如城守尉防守尉之制東三省盛京吉林黑龍江以及福州廣州乍浦皆於騎步外別設水師營吉林黑龍江又有火器亦別爲營凡駐防畿輔兵八千七百五十八新疆兵萬五千一百四十東三省兵三萬五千三百六十各省兵四萬五千五百四十此外則有守陵寢守圍場守邊門之兵二千九百七十總計邊腹地駐防兵十萬七百有奇與禁旅數略相同焉若夫打牲游牧之隸八旗者除吉林三姓城打牲壯丁不編佐領外黑龍江打牲九十七佐領及察哈爾呼倫貝爾游牧諸旗百七十佐領共兵萬五千有奇此八旗駐防之大略也夫開國以來涵濡休養者二百餘年八旗佐領丁壯當愈增而兵則有定額故嘉慶來會典所載京師滿洲佐領六百八十一蒙古佐領二百有四漢軍佐領二百六十六駐防佐領八百四十共二千佐領之數當

有壯丁三十萬駐防佐領之外又有防禦所轄者亦不下數萬而中外禁旅駐防額兵常不過二十萬人此外惟養育兵二萬七千有奇著有定額計旗人閒散無口糧者尙不啻十萬有餘其人不能爲農工商賈而朝廷又無以給其欲而遂其求則其事育無資俯仰皆窘固可概見當事者所當量爲變通而汲汲然爲謀生計也若夫八旗左右翼之界限上下包衣之次序不詳著云

按魏源撰聖武記在道光季年述稱八旗兵二十萬而咸豐元年曾

文正疏言八旗兵三十五萬兩人時代甚近所言各殊意曾據佐領數言之而魏舉兵額實數也

簡練軍實疏

咸豐元年

曾國藩

臣竊維天下之大患蓋有二端一曰國用不足一曰兵伍不精兵伍之情狀各省不一漳泉悍卒以千百械鬪爲常黔蜀冗兵以勾結盜賊爲業其他吸食鴉片聚開賭場各省皆然大抵無事則游手恣睢有事則雇無賴之人代充見賊則望風奔潰賊去則殺民以邀功章奏屢陳諭旨屢飭不能稍變錮習至於財用之不足內外臣工人人憂慮自庚子以至甲辰五年之間一耗於夷務再耗於庫案三耗於河決固已不勝其浩繁矣乙巳以後秦豫兩年之旱東南六省之水計每歲歉收恆在千萬以外又發帑數百萬以賑救之天下財產安得不絀宣宗成皇帝每與臣下言及開捐一事未嘗不咨嗟太息憾宦途之濫雜悔取財之非計也

臣嘗卽

國家歲入之數與歲出之數而通籌之一歲本可餘二三百萬然水旱偏

災堯湯不免以去年之豐稔而江浙以大風而災廣西以兵事而緩計額內之歛收已不下百餘萬設更有額外之浮出其將何以待之今雖捐例暫停而不別籌一久遠之策恐將來仍不免於開捐以天下之大而無三年之蓄汲汲乎惟朝夕之圖而貽 君父之憂此亦爲臣子者所深恥也當此之時欲於歲入常額之外別求生財之道則搜括一分民受一分之害誠不可以妄議矣至於歲出之數兵餉爲一大宗臣嘗考 本朝綠營之兵制竊見乾隆四十七年增兵之案實爲兵餉羸絀一大轉關請卽爲我 皇上陳之自康熙以來武官卽有空名坐糧雍正八年因定爲例提督空名糧八十分總兵六十分副將而下以次而減下至千總五分把總四分各有名糧又修製軍械有所謂公費銀者紅白各事有所謂賞卹銀者亦皆取給於名糧故自雍正至乾隆四十五年以前綠營兵數雖名爲六十四萬而其實缺額常六七萬至四十六年增兵之議起武職坐糧另行添設養廉公費賞卹另行開銷正項向之所謂空名者悉令挑補實額一舉而添兵六萬有奇於是費銀每年二百餘萬此臣所謂餉項羸絀一大轉關者也是時海內殷實兵革不作普免天下錢糧已經四次而戶部尙餘銀七千八百萬 高宗規模閎遠不惜散財以增兵力其時大學士阿桂卽上疏陳論以爲 國家經費驟加不覺其多歲支則難爲繼此項新添兵餉歲近三百萬統計二十餘年卽須用七千萬請毋庸概增旋以廷臣議駁卒從增設至嘉慶十九年 仁

宗觀帑藏之大絀思阿桂之遠慮慨增兵之仍無實效 特詔裁汰於是各省次第裁兵一萬四千有奇
宣宗卽位又 詔抽裁冗兵於是又裁二千有奇乾隆之增兵一舉而加六萬五千嘉慶道光之減兵
兩次僅一萬六千 國家經費耗之如彼其多且易也節之如此其少且難也臣今冒昧之見欲請汰兵
五萬仍復乾隆四十六年以前之舊驟而裁之或恐生變惟缺出而不募補則可徐徐行之而萬無一失
醫者之治瘡癰甚者必剷其腐肉而生其新肉今日之劣弁羸兵蓋亦當量爲簡汰以剷其腐者痛加訓
練以生其新者不循此二道則武備之弛殆不知所底止自古開國之初恆兵少而國強其後兵愈多則
力愈弱餉愈多則國愈貧北宋中葉兵常百二十五萬南渡以後養兵百六十萬而軍益不競明代養兵
百三十萬末年又加練兵十八萬而孱弱日甚我 朝神武開國本不藉綠營之力康熙以後綠營屢立
戰功然如三藩準部之大勛回疆金川之殊烈皆在四十六年以前至四十七年增兵以後如川楚之師
英夷之役兵力反遠遜於前則兵貴精而不貴多尤爲明效大驗也八旗勁旅亘古無敵然其額數常不
過二十五萬以強半翊衛京師以少半駐防天下而山海要隘往往布滿 國初至今未嘗增加今卽汰
綠營五萬尙存漢兵五十餘萬視八旗且將兩倍權衡乎本末較量乎古今誠不知其不可也近者廣西
軍興紛紛徵調外兵該省額兵二萬三千土兵一萬四千聞竟無一人足用者粵省如此他省可知言念

及此可勝長慮臣聞各省之兵稍有名者如湖南之鎮筸江南之壽春浙江之處州天下不過數鎮裁汰之法或精強之鎮不動而多裁劣營或邊要之區不動而多裁腹地或營制太破歸而併之或汛防太散撤而聚之是在兵部之精審督撫之體察未可鹵莽以從事耳誠使行臣之說缺出不補不過六年五萬可以裁畢以一馬二步計之每年可省餉銀一百二十萬十年以外於經費大有裨益此項銀兩不輕動用督撫歲終奏解戶部另行封存專備救荒之款永塞開捐之路養兵爲民也備荒亦爲民也塞捐以清仕途尤愛民之大者也一分一毫天子無所私利於其間豈非三代公心賢於後世搜括之術萬萬者哉若夫訓練之道則全視乎皇上精神之所屬臣考本朝以來大閱之典舉行凡二十餘次或於南苑或於西廠或於蘆溝橋玉泉山天弧親御外藩從觀軍容一肅藩部破膽自嘉慶十七年至今不舉大閱者四十年矣凡兵以勞而強以逸而弱承平日久京營之兵既不經戰陳之事又不見蒐狩之典筋力日懈勢所必然伏求皇上於三年之後行大閱之禮明降諭旨早示定期練習三年京營必大有起色外省營伍勢難遽徧求皇上先注意數處物色將才分布天下要害之地但使七十一鎮之中有十餘鎮可爲腹心五十餘萬之中有十餘萬可爲長城則緩急之際隱然可恃天子之精神一振山澤之猛士雲興在我皇上加意而已昔宋臣龐籍汰慶厯兵八萬人遂以大蘇邊儲明臣戚繼光練金華

兵三千人遂以蕩平倭寇臣書生愚見以爲今日論兵正宜法此二事謹抄錄乾隆增兵嘉慶道光減兵三案進呈伏乞 飭下九卿科道詳議斯道甚大臣鮮閱歷不勝悚惶待 命之至

論直隸添設六軍疏稿

倭仁

前聞戶部尙書羅惇衍以直隸添設六軍有十可慮一疏奉 旨交總理各國事務衙門王大臣妥議具奏臣不知該衙門如何議覆惟事關軍國大計雖不與議不能默默竊以直隸練兵以捍衛京師誠至計也然利與害相權與其藉外援以資聲勢而流弊滋多不如練京兵以固本根而緩急可恃練京兵約有數利請爲我 皇上陳之軍興以來餉糈折減旗兵艱苦異常若月益五萬之餉得資養贍不至流爲盜賊利一加惠旗僕可以固結其心益知親上之義利二近在輦轂之下倉卒有事一呼可至利三旗兵各有身家不比招募游民易聚難散利四按期操演之外仍可在家休息別作生理并非長年戍守或擾居民利五外省撥項或有缺乏亦可輪流操練不至恃衆鼓噪別滋事端利六強幹弱支無尾大不掉之患利七京師歲得數十萬餉銀旣可以實庫儲兼可以濟民生利八至於兵得實用餉不虛糜要在乎得人而理否則有練兵之名無練兵之實折衝禦侮仍不足恃京師與直隸其弊一也

答劉霞仙茂才書

江忠源

仲來接奉手書驚悉太夫人於夏間棄養忠源遠在戎行未及稍致生芻歉甚歉甚并悉五月初旬曾承賜書至今並未奉到筠仙亦無音信想道遠均浮沈也忠源冒大不韙墨經從戎又復戰陣無勇致賊擾及桑梓遂攻會垣深愧進退失據乃承垂詢賊情不棄諸不可與言之列聞命之下悚惶萬端竊惟逆匪自滋事以來蔓延兩省展轉兩年非賊衆而我寡賊強而我弱也其弊在兵不用命將不知兵兵與將不相習將與將又各不相下遂至潰爛不可收拾至於如此今年六月賊至桂平新墟時忠源方在烏都護幕中力主圍賊之議都護深韙其言因諸將各懷意見其後遂有官村之敗自賊據永安以東路空虛爲都護作書請兵十上而說不行遂有古東之敗賊自桂林竄出致陷全州忠源先軍橋頭堵其西竄新甯之陸路並釘塞河道斷其北竄零陵之水路請於河東紮營以爲合力攻剿之計時都護因傷不起向軍門臥病未來諸將無所統紀互相推諉賊來從河東小路竄出鏖戰兩晝夜奪獲賊船三百餘隻賊之精悍若無幾矣斯時吾楚若稍有防堵前後夾攻何難聚而殲旃乃自入永州境土匪之迎降會匪之入黨日以千計而地方之文武又皆望風先逃一至道州勢遂復熾惟時和鎮軍初統諸軍忠源與之熟商冀其可以集事因諸將不用命以致江華永明相繼失守追賊至七里江竄走定議以萬一千人攔頭九千人追尾無奈攔頭之師遲延不進而所過州縣又皆開門揖盜無能守住一二刻以待追兵之至者自嘉

禾以至桂陽郴州賊皆入無人之境賊又知我兵之不能攔頭也而以後隊敵追兵以前隊攻城池由是而永興安仁攸醴一帶遂不保且漸漸逼近省垣矣然其首逆大隊尙在郴州也忠源以前無堵禦恐省城有失則爲禍愈烈遂請和鎮軍於九千人內挑選千餘人並自帶楚勇五百名於初四日自郴起程是夜行至油榨墟接省中來信始知賊之前隊已於二十八日逼攻省垣遂兼程前進於十三日申刻抵省軍於小烏門外次早縋城而入周歷各城防堵雖不盡如法然賊勢尙單逼攻不甚緊急十五日督兵進剿小挫兇鋒十六日賊遂不敢復出惟於周圍高築牆壘我兵進攻賊從牆眼施放鎗礮不能得手十七日移軍蔡公墳一帶逼攻賊壘晝夜用礮轟擊賊船鳳凰廳士兵移紮河西以堵賊匪西渡十九日向軍門自桂林起病來省父老留住城中省垣想無顧慮二十日我軍奮力進攻殲賊數十百人二十二日探報郴州賊匪竄到我軍迎擊於仰天湖時賊衆我寡黔兵稍卻勢甚危險忠源帶勇向前衝擊短兵相接骹受矛傷落馬軍士殊死戰將賊擊退扶救回營日來創口漸合惟尙不能行動耳見在賊之後隊一萬餘人已陸續到齊屯聚南門城外湘水在其西會垣在其北忠源與和統領軍其東聞後路追兵日內即可趕到再軍其南而該逆四面受敵可以一鼓成擒惟各路鎮將除和統帥外實無可靠之人未必能如願以償也忠源嘗料賊之詭計總思北竄貴邑既有湘水之隔對河又有重兵似可無虞但恐擊敗之後

四處分竄急何能擇耳然賊亦無他伎倆不過未到之先遣奸細以虛詞恐嚇之將到之際遣前隊以甘言籠絡之既到則殺戮淫掠無所不至愚民至此始知被給而已悔不可追也至於賊衆雖稱萬人敵其實能打仗者不過二三千人且此二三千人亦非異常驍勇我前彼仍卻我卻彼乃前惜各營將備不能忍此須臾耳忠源身經數十陣所歷驗不爽者務望宣示鄉勇俾臨陣須有把握又駐紮地方必須先築營盤深溝高壘賊初來時但在營中用鎗礮擊俟賊勢既竭然後出而擊之靡不勝矣應選擇曉暢軍務熟悉地形刻下實難其人但於賊勢緩急必當隨時奉聞也

整頓營務議

龍汝霖

某謹案體察晉省防務情形一疏奉 硃批着卽實力整頓毋得稍涉疎懈欽此伏思整頓營務之法首曰練兵而其要領一曰選將其機括一曰除弊而已近來各省營伍積習日深牢不可破卽如營員之補署不考技藝賢否以奔走應對爲能而鑽刺貢緣亦間有之及挑補兵丁除虛冒廩糧稽延虛曠外又復以老弱與吸食洋煙者充數而各署之伴當以及雜色夫役占侵不少復不入伍同操加以經制月餉本屬無多而無名之攤派一一取給焉兵丁所得益微不得不兼營別業以餬其口於是視訓練爲虛文卽按期應操不過飾爲美觀之具甚且因平素駕馭無方兵丁挾制千把千把挾制參遊瞻顧因循苟且由

此而生廢弛因此而甚雖經大吏隨時整頓而相習成風幾有積重難返之勢近年迭奉部咨蒙 奏准防剿之事武員各歸文員調遣緝拏搶劫重案不准營弁捏報協獲挑補兵丁亦由營員報明地方官揀選等因原於調遣稽核之中寓整飭戎行之意卽從前頒行中樞政考各書所以蒐軍實者條例亦纖悉具備今欲除積習而挽頽風亦惟就舊制而申明之由部議而推廣之事總期其可行弊亦去其太甚但能行以實力營務當爲改色請撮舉其節目曰慎補署課材略嚴考察是爲擇將之法除雜派籌犒賞禁洋煙是爲卹兵之法和文武聯兵勇合操防是曰化散爲整之法革名糧核虛冒稽遲曠是曰化貪爲廉之法勤緝捕戢縱恣斥干預是曰化暴爲良之法挑精銳習技藝繕器械是曰轉弱爲強之法然自古有必勝之將無必勝之兵是又在將領得其才操縱得其術耳抑更有請者時窮固不妨補苴法制以救時而法敝又當損益時宜而變法竊查山西額設兵丁二萬二千八百五名咸豐三年裁兵案內兩鎮共裁去兵二千一百六十六名於省城添募精兵一千名實存兵二萬一千九百三十九名除撫標及兩鎮標額設標兵外分爲四十餘營再分爲各州縣之城守塘汛以爲協守城池監獄及查拏盜賊護送糧餉遞解人犯傳送營中公文之用立法之初原以承平無事一則散強悍之徒使無尾大不掉之患一則塞空虛之地使無照顧不及之虞其用意至深且遠無如日久弊生事事皆同虛設轉爲缺額影射老弱充數

地步及一旦征調往往於各墩汛零星抽撥兵與兵不相知兵與將不相識陣武散漫心志猜離在朝廷養兵原欲收梟悍之輩以衛人之生及其用兵不啻驅烏合之衆而致人之死以故經制之兵無益不得已而用召募召募之費太煩不得已而行團練庫帑日匱賊勢日張未必不由於此竊以爲無事之日兵制合不如分有事之秋兵制又分不如合擬請仿明于忠肅立十大團營之制於通省營汛中抽調精壯者一萬三千人以爲選鋒一千名爲一營立爲十三團營統以副參大將分布四邊要隘劃境而守南則蒲州茅津澤州各置一營相聯之地歸其控制東則潞安孟壽靈邱新平各置一營北則得勝路殺虎口水泉營西則保德磧口吉州各置一營以附近之營兵併之不願遠駐者聽於防所另募平時聯絡一氣每年冬間與左右鄰營會哨一次其操練之法用實藝不用虛套按日由總統官校閱習熟勤慎者記名分別犒賞拔補而嚴重缺額役使之禁大閱之年親巡各營試其優劣待以不次之賞必行之罰期年以後可以成勁旅倘一旦有警如賊來中路以本路之團營出戰命近左之團營爲策應近右之營爲犄角以佐之而南北鎮帥更率銳師以爲後援賊來他路亦如之逗留爭妒因而失事者繩以法俟各省肅清之後仍歸舊制如此則每營兵弁朝夕相依平日易於稽查臨陣互相捍衛其利一千人同練窳惰有所激勸陣伍亦能整齊其利二安心營所卽同土著水土漸服疾病不生其利三駐守旣久路徑明習無顧

此失彼之虞其利四賊去則守賊來則戰無調撤奔馳之苦其利五門戶既固腹地晏然不至一方有警
全局爲之震動其利六衝途州縣少供帳車馬之費官民之困以蘇國帑亦可節省於大局尤有裨益其
利七特思建立新營事事創始非得廉明素著有膽有略之將不足以資統練而收實效故昭義軍得李
抱真而雄山東明之四衛得周遇吉黃得功而亦稱健卒故謂練兵其要領尤在於選將也且查常例馬
兵月給餉銀二兩戰兵一兩五錢守兵一兩近又遵章扣去二成縱本營無一苛派已屬不敷贍養責飢
寒之卒伍欲令常川操練戰守兼資雖日繩以軍法勢亦有所不行故再四籌思練兵必須選鋒選鋒必
須加餉非奏請將每年籌防經費仍舊由外截留厚其廩給卽以防兵之費作練兵之費勢必仍舊粉飾
鋪張徒有紛更改制之名絕無起弊扶衰之效以言乎戰則不足以言乎守亦不能轉不如循照舊章補
苴罅漏尙可相安無事也

請整頓額兵疏

同治元年八月十二日

沈葆楨

竊臣承准議政王軍機大臣字寄同治元年五月初十日奉 上諭御史華祝三奏江西福建情形喫重
亟宜訓練士兵以資戰守一摺沈葆楨在江有年熟悉地方情事該省何縣鄉兵最爲得力其紳士中有
謀勇兼備者卽著該撫實力訪求激勵而鼓舞之令其招集勇敢鄉民數千人統歸該撫訓練俾成勁旅

以備緩急所需餉項並著曾國藩妥籌酌撥等因欽此伏查江省頻年被擾向藉楚軍之力爲之驅除凡精銳營頭多在前敵緊要之地一經掣動必費許多幹旋災黎望救情殷每以後予爲憾臣自入江境接見官紳咸以留本地之財養本地之勇衛本地之民爲請該御史所奏可謂詢謀僉同其法有三善聞警卽發不煩遠調一也兵民有桑梓之誼不致十分騷擾二也土著之人事平易於遣散三也然有四難一曰籌餉難養勇八千口糧夫價馬乾薪水軍械鉛藥之費歲計六七十萬江省民力竭矣兵燹之後災疫間作方拊循之不暇豈容於丁漕釐金之外再事誅求皖浙諸軍以江省爲餉源解款愆期各營皆欠至六七箇月不等若再劃協濟之數以募新集之兵萬一前途稍有參差匪惟大局不堪設想卽江省面面受敵此七八千人者豈足以自固藩籬強分畛域坐失事機非計也二曰擇將難爲萬人之將必其才識器量超出萬人之上人不易知以一技之長一言之合授以重任鮮不僨事古今名將皆由偏裨洊躋統帥蓋經事多則才智愈出成效著則威望日隆所統之人信之而不疑而後萬衆一心如撼山之不可動今著名將領當前敵者旣不便改置閒散之地而紳士之公正者多以未臨大敵不敢自信其少年喜事抵掌談兵者又多不足信江省前此非無土著之勇旋招旋散迄用無成其明驗也三曰選募難鄉兵在鄉休戚與共故令不必嚴而心一賞不必重而力齊聲勢聯絡動輒數萬所恃在衆山川形勢生長其間

所恃在熟若調之他往其殷實之家既不願輕棄本業其樸野之性亦不能遽就範圍紳士以鄉里等夷威令有格不得行之勢雖曾經小勝以之獨當一面猝臨大敵勝敗之數未可知也四曰訓練難練技練力可教之平時練膽練心必試之實境凡新募之卒必參入老營隨行打仗方能漸成勁旅蓋勇怯無形惟於生死呼吸之場如錐處囊中其末立見勇敢之士有起家卒伍不數年而躋提鎮者相與觀感羣思自奮其怯懦者知非偷安之地不待裁汰而無敢自容若於腹地設一大營虛糜歲月其急欲自見所長者倦而思去而甘於坐食者只以排隊應操爲常例乘堙守堞尙能勉強從事望其摧鋒陷陣難矣常見得力營頭移置閒散之地一二年卽廢弛不可收拾況未經大敵者耶臣愚以爲謀江省自立之策莫如先練額兵議者咸謂兵不可用以目前而論兵之與勇強弱懸殊然兵不可用又不可裁則國家養兵義將奚取夫兵不可用非兵之過也其月餉不及勇糧四分之一其升途有終身求拔一外委而不可得者名利俱窮無怪稍有所長者皆辭兵就勇司兵柄者置之不論不議之列而濫廁行伍者亦甘爲人下而不辭誠能鼓舞而奮興之人同此心豈有不可振作之理江省地處腹中額兵較他省獨少然通省計之亦萬二千有奇臣擬嚴汰老弱增補精銳分作兩班一班調省及兩鎮操演一班留本營汛彈壓半年一換除在本營汛者照舊領餉外其調赴操演者酌加練費以資津貼較募勇之費不及其半練熟之後

責成兩總兵輪流帶赴皖浙助戰俾智勇出衆者得以及時自效萬一江省有警自拔而歸則士卒皆曾經戰陣不致畏縮不前臣竊以爲有五便焉所費少而所成就者多一便也尺籍伍符按戶可稽將備千把本有常職節節相生鈐束較易二便也營汛可恃土匪不敢生心稍有萌芽立即撲滅銷患未然三便也一人學戰教成十人臨時慮兵力太單責成每兵募一精健餘丁給以勇糧其事易集此項餘丁有兵缺可補無煩遣散四便也行伍精強將來軍務肅清散勇有所憚而不敢滋擾永杜後患五便也惟近來賊數動逾十萬遇有大股非本省兵力所及仍不能無藉督臣之援臣才識之短時勢之難均不敢諱節只求腳踏實地盡心力爲之以仰副 皇上軫念東南之至意除調操及練費章程與督臣縷析函商外合將遵 旨籌議緣由會同協辦大學士兩江總督臣曾國藩恭摺附驛具陳

皇朝經世文續編卷六十三目錄

兵政二 兵制中

會議長江水師營制疏

曾國藩

長江水師事宜三十條

曾國藩

長江水師營制二十四條

曾國藩

續陳長江水師未盡事宜疏

附擬大銜借補小缺片并未盡事宜十條

曾國藩

酌議江蘇水師事宜疏

曾國藩

酌議長江水師事宜疏

彭玉麟



終世之終終

終世之終終

終世之終終

終世之終終

終世之終終

終世之終終

終世之終終

終世之終終

皇朝經世文續編卷六十三

上海葛士濬子源輯

兵政二 兵制中

會議長江水師營制疏 同治四年

曾國藩

竊臣曾國藩同治元年二月覆奏安徽省城仍建安慶案內請設長江水師提督及總兵以下各官奉旨交軍機大臣會同該部議奏旋經吏部等於五月二十三日定議具奏准其設立長江水師而於總兵副參以至千把應設幾缺暨分汛修艦各事宜令臣體察情形再行詳核議奏三年四月奉旨以淮揚鎮總兵黃翼升補授長江提督之缺六月克復金陵濱江五省戰事大定卽應將前募之水勇改爲經制之水兵核定章程會議具奏特以勇丁之口糧較多額兵之口糧極少相去懸絕難於酌中定議展轉籌思是以覆奏稍遲臣曾國藩於咸豐二年冬初招鄉勇維時長沙甫經解圍各路兵勇往來湖南絡繹不絕臣徧查向章參差不齊惟張國樑之勇每月五兩四錢江忠源之勇每月四兩五錢該兩軍最爲有名於時逮三年夏間勝保奏請招募陸勇月餉四兩五錢戶部議准江南大營循而行之遂定爲報銷之常例臣於三年冬間招募水陸兩軍陸勇酌減爲每月四兩四錢而親兵什長稍有增加水勇酌減爲每月

三兩六錢而礮手舵工稍有增加厥後銀價日賤米價日昂咸豐十一年楊載福等請將水勇每月加爲三兩九錢至今未改臣復詳加詢訪除山東河南餉章漸少外其餘楚閩浙等十省勇餉均係四兩有奇目下各路招募陸勇紛紛未已若將軍餉驟爲大減則人皆去爲陸勇誰願復充水兵故臣所議章程於兵餉一案暫從其優俟軍務告竣再行酌量覈減審時度勢有不能不出於此者非敢與陸勇戰守糧額故示懸殊也自古養兵本無善政南宋之招財晚明之增餉皆爲兵多所累識者病之我朝綠營兵丁五十餘萬較之宋明已極少然乾隆四十六年議增缺額名糧大學士阿桂會上疏力爭臣國藩亦於咸豐元年疏請裁兵五萬戶部初未議准後乃通行各省酌辦溯自洪楊倡亂捻回繼變軍興十餘年惟向榮和春大營用兵稍多其餘皆倚勇丁以集事國家養兵之費歲逾二十萬當此多事之秋乃未聞綠營立一奇功出一良將今各省勇丁合計約在三十萬以外而昔年經制之兵仍未能議裁減且守戰各兵在營之坐糧雖少而出征外省加以鹽折夫價餘丁等款每兵一名月支亦在五兩上下平日有糧少之名臨事無省費之實百年受養兵之累臨急無破寇之效統籌全局殊非長策臣愚以爲軍務全竣後仍當綜覈名實裁減陸兵其必不可裁者卽當增加口糧此又因今日設立水營而卽預爲異日陸營之地也謹議事宜三十條營制二十四條分繕二摺恭呈御覽計戰船七百七十四號除提督已頒關防

外新設總兵四員撥出兼隸之總兵一員副參游三項營官二十四員都守千把外委等哨官七十四員兵數一萬二千餘人兵餉船價廉俸雜費修艦之費約計每月五萬有餘凡選將練兵餉項捕務暨考覈教演之設莫不嚴定章程冀垂令典請 旨飭下軍機大臣會同吏戶兵工等部暨總理衙門核議施行所有會議長江水師營制事宜緣由謹會同漕運督臣吳棠護江蘇巡撫臣劉郁膏安徽巡撫臣喬松年江西巡撫臣劉坤一湖北巡撫臣鄭敦謹湖南巡撫臣李瀚章恭摺由驛具奏

長江水師事宜三十條

第一條提督建衙蕪湖

長江水師提督駐紮原議在於蕪湖建立衙署查蕪湖內河甚小冬令水涸不能安泊戰艦若泊大江之中則洪濤巨浸其患莫測查江南太平府河外通江內通湖可紮戰船數十營右達皖南甯國府南漪固城諸湖左達江蘇高淳溧水兩縣石臼丹陽諸湖兼可扼東壩之要隘擬以提督駐紮太平府設立衙署

第二條提督立行署於岳州

長江水師提督管轄之地上自荊州岳州下至江蘇崇明兩岸支河內湖均歸統轄計程近五千餘里

分列五省若僅駐紮太平府恐其照料難周擬於岳州府設立行署該提督分月輪駐以半年駐下江太平府以半年駐上江岳州府每年周歷巡查駐上江則巡閱至洞庭湖荊州止駐下江則巡閱至狼山止

第三條提督單銜奏事

長江水師提督統轄較遠責任甚重擬請單銜奏事以專責成如遇有與各省地方公事及陸營交涉之件則會商該省督撫分別奏咨辦理如地方公事及陸營有與水師交涉之件該省督撫亦會商長江提督分別奏咨辦理提督之官其初本係文職明末李如松始以武臣而爲提督初尙文武兼用後乃專用武職惟九門提督一缺尙是文臣兼領江皖晉豫等省提督之缺尙以巡撫兼領略存舊制今長江提督一缺擬請文武兼用蓋緣長江通商處處與外國交接朝夕相見必須提督平日稍有威權乃足以資彈壓該提督仍歸兩江總督湖廣總督節制

第四條長江共立六標

長江水師共立六標提督駐紮太平府所轄提標五營岳州設一總兵所轄鎮標四營漢陽設一總兵所轄鎮標四營湖口設一總兵所轄鎮標五營瓜洲設一總兵所轄鎮標四營狼山鎮總兵兼隸長江

所轄鎮標二營通共二十四營

第五條長江與各省水面分界

長江水師與各省河湖交界之處應卽畫分界限各有汛地以專責成湖北除江面千餘里全歸長江提督外其自荊州以上泝江至宜昌巴東漢陽以上泝漢至襄陽鄖陽及各支河湖汊應由湖北另行設防歸湖廣總督湖北提督統轄湖南除江面及洞庭湖歸長江提督外其湘沅二水應由湖南另行設防歸湖南巡撫湖南提督統轄江西除江面及鄱陽湖歸長江提督外其吳城以上省河及東西支河應由江西另行設防歸江西巡撫統轄安徽除江面與傍江之湖歸長江提督外其淮河自正陽關以下至洪澤湖止并接連蘇屬之支河湖蕩應另設淮揚水師歸淮揚鎮總兵統帶兩江總督漕運總督安徽巡撫兼轄江蘇除江面歸長江提督外其自鎮江以東凡江南之支河湖蕩應另設太湖水師歸兩江總督江蘇巡撫江南提督統轄其舊設海口之狼山福山蘇松三鎮除福山蘇松二鎮悉仍其舊外擬以狼山鎮兼隸長江提督標下仍聽兩江總督江南提督節制

第六條副叅游沿江建衙

副將叅將游擊各有專營自應設立衙署惟長江水師營汛其責任專重在水面并無防守城池彈壓

市鎮之責其立汛建署須擇有港汊內河可收泊戰艦者庶免風濤覆溺之患雖孤洲野岸亦可修造衙署宜距城市稍遠乃爲妥善

第七條都司以下不立衙署

水師官兵皆宜以船爲家不准登岸居住如違例住岸上者官卽革職兵卽革糧自都司以下皆係哨官卽以哨船爲辦公之所不准建衙陸居至長江提鎮除例給坐船外各給督陣舢板二號每船額設守備哨官一員兵二十名內舵兵一名頭兵一名礮兵二名槳兵十六名凡提鎮衙門巡捕跟丁執事人等皆輪流派此船之人值班聽差下班仍以船爲家不准在岸居住副叅游督陣舢板各一號悉如之

第八條營制船數

副將營制戰船四十三號內長龍船二號舢板船四十號督陣大舢板船一號叅將營制戰船三十三號內長龍船二號舢板船三十號督陣大舢板船一號游擊營制戰船二十三號內長龍船二號舢板船二十號督陣大舢板船一號其雖係游擊營制而用船三十三號者惟岳州漢陽二營凡專立之營皆以都司二員管駕長龍爲領哨其各散哨員弁均受約束左領哨專管本營錢糧右領哨專管本營

船礮軍裝及一切差遣巡查諸務其舢板之以守備充哨官者爲副領哨每守備率領船十號

第九條戰船人數

長江水師額兵副將營督陣舢板船一號兵二十名長龍船二號每船二十五人共兵五十名舢板船四十號每船十四人共兵五百六十名稿書書識十四名共額兵六百三十名共哨官四十三員叅將營督陣舢板船一號兵二十名長龍船二號每船二十五人共兵五十名舢板船三十號每船十四人共兵四百二十名共額兵四百九十名共哨官三十三員游擊營督陣舢板船一號兵二十名長龍船二號每船二十五人共兵五十名舢板船二十號每船十四人共兵二百八十名共額兵三百五十名共哨官二十三員其游擊營亦有用三十三船者全倣叅將營之例稿書書識均不在內

第十條都司於本船之外另有打仗舢板

領哨都司除長龍戰船一號有兵外另給無兵之舢板船一號如遇出兵入小河港汊恐長龍遲滯則由長龍撥兵歸此舢板乘坐領哨出隊以期便捷

第十一條設立書吏

長江水師提督用稿書四名書識八名總兵用稿書二名書識六名副叅游皆用稿書二名書識四名

都司用稿書一名書識二名守備用書識二名千把各用書識一名

第十二條兵丁糧額

咸豐四年初立水師之時較陸軍勇糧稍減槳手每月三兩六錢舵工四兩五錢頭工四兩二錢不等厥後因銀價日賤米價日貴槳手加爲三兩九錢今將水勇改爲額兵而各處陸營紛紛招勇若遽將水兵口糧太減則人皆去爲陸勇誰復肯當水兵自應酌量暫從其優長龍戰船額設兵二十五名內舵工兵一名每月給銀三兩六錢每日一錢二分管艙兵一名礮手兵四名每月給銀三兩每日一錢槳手兵十八名每月給銀二兩七錢每日九分舢板戰船額設兵十四名內舵工兵一名頭工兵一名礮手兵二名槳手兵十名督陣大舢板額設兵二十名內舵工兵一名頭工兵一名礮手兵二名槳手兵十六名月餉均與長龍戰船同稿書與舵糧同月支三兩六錢書識與槳糧同月支二兩七錢俟軍務大定各路并無招勇之事再由長江提督江楚總督專案具奏議將口糧酌減乃爲定額亦須優於陸兵庶不至似今日綠營之廢弛

第十三條哨官額缺

長江水師副將營協標哨官額缺應設都司二缺守備三缺千總十缺把總十二缺外委十六缺叅將

營哨官額缺應設都司二缺守備二缺千總八缺把總九缺外委十二缺游擊營哨官額缺應設都司二缺守備一缺千總四缺把總六缺外委十缺以上各營哨官皆以各員所管之船爲缺不設衙署

第十四條另給座船

長江水師提督給座船四號總兵給座船三號副叅游給座船二號各營哨官都司守備以下直至外委皆無衙署每哨各給座船一號以抵陸營衙署馬匹之費提督每座船月支價銀十六兩總兵副叅游每座船月支價銀十四兩都守以下每座船月支價銀十二兩

第十五條出缺遴補

長江水師哨官缺出都守千把外委五項應全歸長江提督主政卽就長江水師中遴員題補其營官缺出副叅游三項擬以七成歸長江水師中題補以三成由兵部就各省水師中推補至總兵缺出由長江提督兩江總督湖廣總督三人各保堪勝人員平日開單保奏屆時恭候 特旨簡放

第十六條餉項出入報銷

長江水師上下五千里分防五省若向五處藩庫領餉分歸五省報銷殊覺散漫無紀戶部難於稽考而各省入款出款俱有常額若添此項兵餉殊覺別籌維艱查沿江釐卡皆係水師恢復之地水軍歷

年口糧多取諸此今長江既立經制水師酌定永遠章程凡俸廉糧餉船礮子藥一切費用應酌留釐卡數處在兩江境內者歸江甯鹽道經收在兩湖境內者歸武昌鹽道經收每年屆發餉之時其在楚境各營造冊呈明湖廣總督長江提督赴武昌鹽道庫支領其在江境各營造冊呈明兩江總督長江提督赴江甯鹽道庫支領江楚兩總督每年各自具本題銷不彙入各省藩庫奏銷案內以免牽混

第十七條三處設藥彈局

長江水師礮位大者千餘斤次者亦數百斤所需子藥最多須常設子藥局以資操演而備不虞查湖北省城安徽省城造藥均有牛礮最爲穩便該二省應各設火藥局常川製造江蘇江西應辦硝斤協濟安徽藥局湖南應辦硝斤協濟湖北藥局至生鐵產於湖南應在長沙設立子彈局常川製造封門大子熟鐵羣子分解湖北安徽兩省所有楚境各營均赴武昌請領子藥江境各營均赴安慶請領子藥至三局造辦子藥之費由武昌江甯兩鹽道庫於釐金項下撥給

第十八條三處設立船廠

上江戰船大砲震驚最易朽壞議定每屆三年修理一次十二年卽行更換應於湖北之漢陽江西之吳城江南之草鞋夾三處各設船廠排定子丑寅卯等年某年應修整某營某哨之船某年應更換某

營某哨之船輪流興工江境兩廠由兩江總督暨長江提督委員監修楚境一廠由湖廣總督暨長江提督委員監修所有船廠經費亦由江甯鹽道武昌鹽道兩庫撥給其風篷一件三年卽須更換一次桿索纜繹等物每屆修整之年亦須酌量添換均准在於船廠請領

第十九條雨篷旂幟等費

長江戰船並無竹篷木榜惟以布棚遮避雨露霜雪名曰雨棚最易朽腐又如錨本腦索礮繩旂幟紅油白油等項均須時常修換不能待三年之期亦不能赴船廠請領此五者名曰雜費酌定長龍戰船每年發銀六十兩舢板戰船每年發銀四十兩交該哨官採辦修飾以壯軍容江境之船由江甯鹽道發給楚境之船由武昌鹽道發給

第二十條廉俸兵米

長江水師提督現擬文武兼用其養廉應卽加重每年支銀八千兩其餘俸薪蔬菜燭炭心紅紙張等項均照陸營提督之例支給自總兵以下直至千把凡養廉俸薪蔬菜燭炭心紅紙張等項均照陸營之例發給外委准食杞糧雙分仍每年支養廉銀十八兩惟陸營之例馬改爲水師之座船其水師官兵應領之米照各省綠營陸兵定例每人日支八合亦由江甯鹽道武昌鹽道兩衙門于釐卡項下購

米按季支發以上子藥局船廠雜費廉俸兵米四條均彙入正餉案內題銷

第二十一條禁約三事

長江水師舊日營規甚嚴近來日就鬆懈今立爲經制水師應申明定規三條決不可犯者一曰不許登岸居住二曰不許吸食洋烟三曰不許賭博如有登岸居住吸食洋烟者官則革職兵則革糧有犯賭者由該管將領察核情節稟明嚴辦

第二十二條疎防處分

現在髮逆肅清長江水師各分汛地專以驅逐游匪嚴防刦盜爲重倘有水盜划船刦搶巨案逾限不獲由長江提督專案叅劾不得以陸營尙未開叅文員尙未開叅稍涉推諉遲延以重江防而絕盜風

第二十三條已保官階大者借補小缺

長江水師設立營汛待部議覆准後卽須補放實缺查軍興十餘載水師員弁所保官階提鎮居多副叅游亦不少所設營缺有限應以保舉較大之階借補較小之缺由臣等會同長江提督開單奏補其現在勇丁營制俟部議覆准後應卽陸續遣撤一俟勇營撤畢卽照新定兵丁餉章發給

第二十四條不准私借戰船

長江水師各有汛地不得私離且長龍舢板均係官物非同私物可以借用凡各省文武出差人員雖有緊急公務非奉有長江提督及五省督撫專札派坐戰船者不得私借戰船乘坐以圖便易違者照不應馳驛妄行馳驛例議處各營哨官非奉有專札而以戰船私借客官及朋友乘坐者照私離汛地例議處

第二十五條船式砲數

長江水師修造戰船式樣長龍底長四丈一尺底中寬五尺四寸舢板底長二丈九尺底中寬三尺二寸督陣舢板略加長大長龍設大砲前後左右六位舢板設大砲前後兩位左右設車轉小砲兩位小鎗短刀長矛噴筒隨宜配用

第二十六條海口添造大船

狼山鎮總兵現改歸長江提督管轄該處江寬百餘里洪濤浩瀚海風不測長龍舢板船身太小有風卽不能出港狼鎮所轄均係洋面近來甯釣沙船帶有砲位槍械每以捕盜爲名趁風行劫擬每營造大舢板二十號並造大船數號如紅單拖罟式樣多安砲位巡緝內洋以壯聲威又擬造輪船數號分布狼山崇明等處於江海防務更資得力

第二十七條不准私設礮船亦不許水師干預鹽務

礮船爲江中利器然可以禦暴亦可以爲暴如准商民私造礮船則強盜亦可造礮船以行劫鹽梟亦可造礮船以護私假名僞旗萬難稽查此後旣立長江經制水師應將民間私造礮船一概禁革雖文武官員亦不准私設礮船以杜奸民影射難於查察如有私立礮船不立時稟報者惟該汛之水師是問至巡緝私鹽本以礮船爲最便然亦只准於瓜洲漢陽兩鎮標下奏派戰船若干號巡緝某處其未經奏派之戰船概不准干預鹽務尤不准包庇私鹽如有包庇者由兩江總督湖廣總督嚴行叅辦

第二十八條建衙經費

長江水師提鎮暨副叅游駐紮之處均須設立衙署軍裝局其經費卽取諸酌留釐卡一俟部議覆准卽由臣等會同江楚總督長江提督派員勘估次第建造事竣核實報銷

第二十九條沿江舊日水師改隸長江提督

江南之京口狼山等營江西之湖口營湖北之漢陽營湖南之岳州等營凡向有水師之名而無礮船之實者令各該處均立標營改從新章應悉歸長江水師提督節制以昭畫一其向無水師名目者不必更改

第三十條考糧考缺操演章程

水師以使船爲第一義善放礮次之凡考漿糧須令一人駕一小划渡江一兩次凡考礮糧須令連放五礮無走火遲鈍等弊凡考應升應補之缺須令數船於無風之日盪漿逆行三十里驗其遲速其哨官仍考試技藝以定等差至校各鎮之優劣每年春季長江提督會同兩湖總督調集岳州漢陽二標在於武昌江面或武漢各湖簡閱一次秋季會同兩江總督調集湖口太平瓜洲狼山四標在於黃天蕩等處簡閱一次閱畢會摺具奏優者酌量保獎劣者分別叅辦

長江水師營制二十四條

一岳州設立總兵設中軍中營游擊用船三十三號仿叅將營之例分防自陳陵磯起至鹿角壘石瀘陵潭湘陰一帶

一沅江設立叅將屬岳州鎮左營分防君山西湖及常德龍陽華容等河出湖之處但不進防內河其沅湘等水應由湖南另行設防

一荊州設立副將屬岳州鎮後營分防自荊州以下江面石首監利一帶至荊河口止

一陸溪口設立遊擊屬岳州鎮前營分防自荊河口以下江面螺山新堤及倒口以內之黃蓋湖

一簪洲設立叅將屬漢陽鎮後營分防自倒口以下江面至沌口止兼防金口以內之斧頭湖

一漢陽設立總兵設中軍中營遊擊用船三十三號倣叅將營之例分防自沌口以下江面至團風止並防省城兩岸後湖青林等湖其漢水上通樊城一千餘里及各支河汊湖應由湖北另行設防

一巴河設立遊擊屬漢陽鎮右營分防自團風以下江面黃州蘭溪至道士汛止並防樊口以內之樑子湖

一田家鎮設立副將屬漢陽鎮前營分防自道士汛以下江面淖源口蘄州武穴至陸家嘴止並防淖源口及隆坪以內之湖

一湖口設立總兵設中軍中營遊擊分防自陸家嘴以下江面九江十八號至老洲頭止

一吳城設立叅將屬湖口鎮左營分防自湖口以內姑塘南康渚磯一帶

一饒州設立叅將屬湖口鎮後營分防都昌鄱陽康山一帶其彭蠡湖東通廣信樂平浮梁各河南通省城贛江均由江西另行設防

一華陽鎮設立遊擊屬湖口鎮右營分防自老洲頭以下彭澤香口至東流止並防吉水溝以內各湖
一安慶府設立副將屬湖口鎮前營分防自東流以下江面黃石磯李陽河一帶至樅陽止並防北岸

鹽河及樅陽以內之湖南岸通殷家匯之河

一大通設立叅將屬提標後營分防自樅陽以下江面池州土橋一帶至荻港止

一蕪湖設立遊擊屬提標右營分防自荻港以下江面至裕溪口止並防灣沚清弋江等內河

一裕溪口設立叅將屬提標左營分防江面東西梁山至金桂關止並防運漕巢縣無爲州各內河及

巢湖百餘里

一太平府設立提督衙署設中軍中營副將分防金桂關以下江面至烏江止

一金陵草鞋夾設立叅將屬提標前營分防自烏江以下江面至通江集止並防江浦六合之內河

一瓜洲設立總兵設中軍中營遊擊分防自通江集以下江面至焦山止並防內河至揚州止自揚州

以上高郵寶應諸湖應由淮揚鎮總兵另行設防

一孟河口設立遊擊屬瓜洲鎮右營分防南岸各夾江自焦山起至江陰口止其南岸各內河應由松

江提標另行設防

一三江營設立遊擊屬瓜洲鎮左營分防北岸各夾江自焦山起至靖江口止其北岸各內河應由淮

揚鎮標另行設防

一江陰設立副將屬瓜洲鎮前營分防自江陰口以下江面至鹿苑港止及常陰壽興等沙其鹿苑港以下由福山鎮標接防

一狼山鎮總兵卽舊日所設者應添設兩營水師兼隸長江水師提督管轄查狼山鎮原統中左右三營鹽捕揚州三江泰州泰興掘港六營共九營今擬一切悉仍其舊惟於通州設一游擊名曰綏通營分防自靖江八圍港以下江面至通州止其船用長龍二號督陣舢板一號二十人之大舢板十號十四人之舢板十號仍酌添紅單拖罟等船

一海門廳設立副將名曰綏海營分防由狼山至海門一帶北岸江口海汊其船隻用長龍二號督陣舢板二號大舢板二十號仍酌添火輪船並紅單拖罟等船至崇明一帶南岸海汊則歸江南提督分防

以上新設岳州鎮標四營漢陽鎮標四營湖口鎮標五營提標五營瓜洲鎮標四營添設狼山鎮標二營共二十四營內副將六營叅將七營游擊十一營

續陳長江水師未盡事宜疏

附擬大銜借補小缺片并未盡事宜十條

曾國藩

竊長江水師營制事宜臣等會同定議於同治四年十二月二十八日具奏欽奉 諭旨敕下軍機大臣

會同該衙門妥議具奏嗣於五年八月初七日准兵部咨開逐條會議具奏奉 旨允准又於六年十一月初十日接准兵部咨催長江所設各缺均未奏補有人飭令迅速揀員請補以專責成而符定制等因先後行文到臣查各路水師以臣玉麟所部內江水師及前陝甘督臣楊岳斌所部外江水師閱時最久人數最多楊岳斌赴陝甘之任將水軍調改陸路者居其大半留江人員爲數已減此外又有黃翼升所部淮揚水師李朝斌所部太湖水師而江西湖南湖北三省水師中亦各有資格較深功績較著之員臣等公同商酌以各軍立營之先後分此次得缺之多寡遵照奏定章程以大銜借補小缺各加遴選開單咨送臣國藩臣玉麟復加稽核其岳州漢陽湖口瓜洲四鎮總兵擇其勞績最著足膺閫寄者擬定四員請 旨簡放其副叅遊三項營官二十四缺都守千把外委七百七十四缺擬定員名分析開單恭呈御覽伏查定例武職自守備以上選補各缺均須引 見補授此次設立長江水師百事創始分防汛地嚴定營規雖以久募之勇改爲經制之兵似若易於就緒而裁撤各軍以此營而歸併彼營配補各缺以江境而互調楚境實覺頭緒繁多非數月半年所能定局相應奏明請 旨暫緩引 見敕部先行頒給劄付以昭信守仍俟立營停妥各歸本汛後由部中分年分起調取引 見乃可從容料理原奏所議事宜三十條經部臣核復允行立法已屬周密惟創立水師造端宏大不厭詳求茲將未盡事宜續議十條

另開清單恭求 訓誨溯查咸豐三年衡州試辦水師之始初非有舊例之可循亦非能一辦而卽妥大抵屢試屢變漸推漸廣前月所立之法後月覺其不備而又增之今歲所行之事明歲覺其不便而又改之卽如因船中無主而始設哨官因棲止不便而始加雨篷因巨艇不甚靈活而全用舢板因弁勇不可陸居而另給座船若此之類皆履之而後知試之而後改逮規模之粗定遂習慣而成常新舊所擬事宜四十條皆就習慣者而著爲令典在目下已不敢爲立法之善將來時移事異更恐有窒礙難行之處且法待人而後舉苟非其人則雖前賢良法猶或易啟弊端況臣等才智短淺創議新章深慮弊竇之叢生致煩後人之譏議夙夜兢兢不勝祇懼所願數十年後濱江之督撫提鎮隨時損益以補今日之闕疎遇事講求以冀將材之輩出庶幾有舉不廢歷久常新則臣等所禱祀以求者也其請鑄關防清單請裁各缺清單一併開例恭呈 御覽請 旨敕下各衙門議復施行所有擬補長江水師各缺並續陳未盡事宜緣由謹會同湖廣總督臣李鴻章漕運總督臣張之萬江蘇巡撫臣丁日昌署安徽巡撫臣吳坤修江西巡撫臣劉坤一護理湖北巡撫臣何璟湖南巡撫臣劉崐長江提督臣黃翼升恭摺具奏

再武職各官大銜借補小缺臣於六年五月十五日具奏欽奉 諭旨允准在案嗣准部咨以同一軍營出力官職大者補缺之途太廣官職小者補缺反致無期不足以服軍心而作士氣仍應照章議駁等因

咨會前來臣等此次奏補長江水師各缺甚至以提鎮之銜而借補千把之缺未免駭人聽聞然勇丁出身入營之資格極久列保之次數較多而家中貧寒如故情願補一小缺爲終身衣食之資此亦人之常情臣等既不忍拂其意而又取其入伍多年可收駕輕就熟之效伏乞 皇上敕下該部議准以從衆願仍遵照兵部原議將來此項人員用竣不准再行借補以示限制至陸營人員臣近來奏咨大銜借補小缺者均經兵部議駁在兵部之意一則恐銜缺懸殊名實不符或有礙於體制一則恐千把微員永無升階或屈抑乎人才此等苦心臣亦能曲體而深亮之惟查軍興十餘年凡綠營弁兵略有才力膽識無不奮跡行間但有僥倖優保者斷無屈抑未保者是人才本無沉淪之患若慮未弁永無升階則請暫於此二十年内准以大銜借補小缺截至同治二十七年爲止以後仍照舊例按班序補亦卽兵部所云此項人員用竣不再借補之意也至於名實不符有礙體制之說查崇階而退居小缺在補缺者已覺得不償失在獎功者尙恐賞不酬勞上下雖不滿意究無損於政體若崇階而永無補期則功績最淺者轉得各占實缺勞苦最久者反致長抱虛榮是缺望更深所損更大矣統計各省軍營保至武職三品以上者不下數萬人將來軍事大定各路撤兵此項有階無缺之員難保不滋生事端同治三年沈葆楨奏請安置此項人員自提鎮至都守均照實缺之例給予俸銀米石 諭旨頗以爲然飭令臣等核議臣以糜費太

鉅未經議准若大衙借補小缺則毫無糜費雖不能安置多員而要可略安望缺者之心相應奏明請旨將陸營借補小缺一案一併飭部核議如蒙議准臣等仍隨時察看或每年將借補者酌補六七成序補者酌補三四成總期衆志交孚不虞偏廢

謹將長江水師前奏未盡事宜續行定擬開單恭呈 御覽

第一條頒發關防條記

一請鑄關防於官銜上均冠長江水師字樣如四鎮總兵岳州鎮曰長江水師岳州鎮總官兵關防漢陽鎮曰長江水師漢陽鎮總兵官關防湖口鎮曰長江水師湖口鎮總兵官關防瓜洲鎮曰長江水師瓜洲鎮總兵官關防狼山鎮仍循其舊副叅游都守等官請鑄關防條記字樣另開詳細清單進呈 御覽各營均用本汛地之名如荊州則曰荊州營陸溪口則曰陸溪營皆就府縣口岸之名以爲營名其草鞋夾地名太俗改名曰金陵營惟提標中營不刻汛地之名至原奏所擬之綏通營綏海營茲亦改名曰通州營海門營使人易曉其千把外委等官卽由外刊刻鈐記以昭信守

第二條酌留釐卡充餉

一原奏第十六條內戶部議酌留沿江釐卡供給水師製造軍火器械船礮以各處商貨暢滯時地不

同經收數目難以懸定多則中飽少則貽誤餉需不可不豫杜其弊應如何酌盈劑虛俾垂久遠妥籌章程奏明辦理等因臣等查長江水師兼轄五省所需餉項合之則見多分之則見少應於五省各留釐卡一處湖南卽留岳州一卡湖北卽留漢口一卡江西卽留湖口一卡安徽卽留大通一卡江蘇卽留瓜洲一卡岳州漢口兩卡所收之釐每年每卡各提十餘萬兩解交湖北鹽道衙門供支水師之用其餘入款仍歸兩湖藩司收用湖口大通瓜洲三卡所收之釐每年每卡各提十餘萬兩解交江甯鹽道衙門供支水師之用其餘入款仍歸三江藩司收用歸水師用者由江楚總督報銷歸藩司用者由該省巡撫報銷俟水勇裁撤完畢經制水師立定之後此五處卡員卽由江鄂兩鹽道會同該省藩司委員經收自此五卡之外各省釐卡俟軍務大定本應全行裁撤倘有願留一二卡添補永遠經費者由各督撫體察專案奏辦

第三條裁撤水勇日期

一原奏第二十三條內戶部議江南軍務大定所有各營勇丁自當陸續遣撤酌留水勇改爲經制水師應令將遣撤勇丁數目何時撤盡糧額何時起支一併奏報等因臣等查長江水勇向分內江外江兩軍除留補缺額外所有內江一軍水勇已經臣彭玉麟陸續遣撤其數目業經咨報兵部在案

其外江水勇此次奏定補缺一案卽將勇目次第裁撤俟撤盡再行咨報此外尙有淮揚水勇一軍太湖水勇一軍原議第五條內另設淮揚經制水師太湖經制水師現已將大概規模議定臣國藩擬於一兩月內會奏定案俟經制水兵之案奏定後卽將淮揚水勇太湖水勇遣撤陸續具報

第四條派船巡查私鹽

一原奏第二十七條內戶部議礮船爲長江利器以之巡緝私鹽固最便利而包庇私鹽實難稽查若不嚴定章程將來弊竇叢生離政因此而壞營制卽因此而弛關繫實大應令提督會同江楚總督公同遴選師船奏派若干隻另立旗幟字號仍令兩淮鹽運使及湖北鹽道會同各營嚴密查訪其未經奏派之哨船不准干預鹽務如有包庇私鹽官則參辦兵則比照尋常私梟加等治罪其如何明定官兵處分罪名應令悉心酌擬奏明定案等因查前奏由漢陽瓜洲兩鎮標派船巡緝私鹽茲定瓜洲鎮派巡鹽船三號一年一換歸運司暨瓜棧委員稽查其餉卽由瓜棧支發漢陽鎮派巡鹽船三號一年一換歸湖北鹽道暨督銷局稽查其餉卽由督銷局支發所巡不過上下四十里不准太遠以防流弊此外戰船一概不准干預鹽務至弁兵包庇私鹽或失察或知情或受賄或通同興販各有本例將來應按照情節問擬毋庸另立處分罪名轉啟遷避之漸

第五條酌定礮械旗幟

一原奏第七條內工部議戰船應配旗幟礮位等項應令查明各船應配何項礮位旗幟器械若干卽將名目件數造冊送部查核等因查長龍戰船頭礮二位係洋庄各重八百斤一千斤不等邊礮四位洋庄各重七百斤梢礮一位洋庄重七百斤舢板戰船頭礮一位洋庄重七百斤八百斤不等梢礮一位洋庄重六百斤七百斤不等兩邊轉珠小礮二位重四五十斤不等此外洋鎗鳥鎗刀矛之類隨宜分配至戰船旗幟悉以桅旗並梢旗爲主凡桅上用方旗長龍船桅旗長一丈二尺寬七尺舢板戰船桅旗長九尺寬六尺上半節俱用紅色下半節俱用白色或畫北斗或畫太極圖或畫如意之類提鎮各標各畫一樣以示區別船梢用尖角旗長龍梢旗長一丈一尺寬九尺舢板梢旗長九尺寬七尺均寫明某標某營某哨字樣此外各標各營哨或桅上添一小旗或船頭設一立旗或寫姓號爲記顏色制度各聽其便

第六條更換缺額官階

一岳州漢陽湖口瓜洲四鎮中軍游擊營制惟岳州漢陽兩鎮用船三十三號其湖口瓜洲兩鎮中軍僅用船二十三號該兩營地當衝要不敷分布瓜洲又有應派巡鹽之船尤嫌其少查原奏第七條

長江提鎮例給座船外各給督陣舢板二號以守備爲哨官本應設立守備十二缺茲將此十二缺裁去撥六缺歸湖口中軍營撥六缺歸瓜洲中軍營改爲守備各一缺千總各二缺把總各三缺共成十二缺之數與原奏七百七十四哨總數相符而四鎮中軍船數亦不致多寡懸殊所有提鎮督陣舢板之兵丁由中軍派員管轄

第七條議裁舊日額缺

一原奏第二十九條京口狼山湖口漢陽岳州等營凡向有水師之名而無礮船之實者今各該處均立標營應改從新章悉歸長江水師提督節制以昭畫一其向無水師名目者不必更改等語查原議之意濱江舊設之水師仍不裁革不過改歸長江提督節制而已近來細加請求舊營斷不能與新營相合舊制雖名水師而無船無礮官員各有衙署新章則水師專以船礮爲主自都司以下卽無衙署以船隻爲辦公之所舊制水兵口糧不過月支一兩至二兩爲止新章則水兵口糧月支二兩七錢而官員之俸薪養廉船價亦與舊制迥別舊營水兵不習使船放礮等事新章則專重使船放礮若將舊營與新營並存則規制懸殊必生缺望若令舊官補新營之缺則舟居不慣必難得力再四籌思迄無善策惟有將濱江舊日水師酌量裁去如湖北原設之荊州參將營漢陽副將營湖

南原設之洞庭水師營岳州水師營江西原設之鄱湖南湖九江水師營均應裁去所裁之缺副將參將游擊都司等均請兵部另行調補陸營實缺守備千把外委等均由該省督撫另行調補陸營實缺其未經調補以前仍在原省支食本缺廉俸其兵丁則竟行裁去無庸另募茲將應裁各缺開單進呈 御覽至長江水師西至荊州爲止其自荊州以上泝江至宜昌巴東原奏事宜第五條聲明另由湖北設防所有宜昌鎮標水師三營應仍其舊但歸湖北督撫提督統轄不歸長江提督節制又如江南舊有京口水師副將三營及狼山以東各水師舊營現議將江蘇水師認真整理或裁或改由臣國藩另案奏辦

第八條各省督撫節制

一長江水師雖以提督爲主而在五省境內應各歸五省督撫節制調遣副參游以下歸本境巡撫節制總兵並歸總督節制卽以湖南而論去太平府提督衙門甚遠若該省有土匪竊發須用戰船剿辦者卽由湖南巡撫檄調境內水師往剿岳州鎮總兵接到咨檄立卽發兵不可等候長江提督回文致誤軍機湖北江西蘇皖四省巡撫皆然至總督調度轄境水營尤屬通行之舊例平日無事之際督撫偶調水營操演一接檄文立卽前往應操不可藉口等候長江提督回文致誤操期蓋立法

雖密設或長江提督不得其人則法皆不行口糧既恐虛糜船礮亦恐廢壞若督撫中有一省認真者則一省之水軍不致廢弛有兩省勤操者則兩省不致廢弛自調兵調操兩事而外凡水營政務各督撫仍商之長江提督聽候主持

第九條核定疎防處分

一原奏第二十二條遇有劫盜案件卽由長江提督專案參辦而未將處分詳細聲明查武職疎防搶劫案件向例查明離汛里數分別參處有五里以內五里以外之分又有專汛協防兼轄統轄之別今長江水師分布江面白都司守備以下卽以座船爲衙署本應隨時上下梭巡不能指定汛地五里之起訖確在何處擬以哨官爲專汛之官營官爲本轄之官遇有搶劫案件專汛哨官係何職名應由該營官指出初參仍照定例四月限滿題參疎防專汛官住俸本轄官罰俸六個月二三四等參向例一年限期者酌量加重改爲各予限八個月二參限滿專汛官降一級留任本轄官罰俸一年三參限滿專汛官加重降二級留任四參限滿專汛官加重降二級調用不准抵銷如汛守內有一夜連劫數次情事仍照舊例俟三個月限滿犯無弋獲卽將專汛官降二級調用本轄官降二級留任無庸立協防外委名目亦毋庸議統轄官之處分倘能於限內獲犯過半兼獲盜首均准免其

參處遵照原奏由提督查明隨時專案參辦如提督遲不開參卽由督撫參奏以示江面劫案較陸路尤爲慎重又有應酌議者水師處分旣已加重則江中漁船應概歸水師稽查管轄向來江中水盜均以漁船爲窩藏出沒之所嗣後魚稅仍歸州縣經收漁船則歸水師編查以清盜源而一事權

第十條各營輪流更調

一水師所重者以船爲家不准登岸居住若永遠駐紮一處則經年累月戰船全不移動必至廢弛朽壞相率私造屋宇棄舟楫而住室廬不可不防其漸茲定江楚各營每逢半年更調一次副將與副將之營互調參將與參將之營互調游擊與游擊之營互調每營調居客汛二次駐紮一年又准調回本汛一次駐紮半年其互調之或遠或近聽提督隨時斟酌總不令其廢弛安逸依戀陸居而已惟哨官之有疎防處分者不准調動以杜規避

酌議江蘇水師事宜疏

同治七年

曾國藩

竊臣擬酌改江南外海水師營制業於本年四月初七日附片陳奏大概在案伏思釐定新章必須參稽舊制查中樞政考所載江南水師向分外海內河兩支外海兵六千七百七十六名官一百一十八員內河兵八千零二十一名官一百三十三員其船數則無可稽考道光二十四年前督臣璧昌奏稱江南舊

例營船二百七十五隻業已破廢不堪另造舢板船一百三十五號大船船十二號等語約而計之其船不過裝載二千數百人額定之兵尙有萬餘人無船可載有水師之名無舟楫之實不能不大爲變通講求實際竊謂水師之多少宜以船隻之多少爲斷無船則兵無用武之地官爲虛設之員欲定水兵之額數必先籌口糧之入欸兼籌修船之經費卽如外海船隻須用廣艇紅單拖罟之類每造一號動費數千金夾底者或萬餘金加以大小修整繩索損具子藥礮械所費更爲不貲上而火輪兵船用欸尤鉅下而舢板小艇需費亦繁竭江蘇之物力不過辦船百餘號裝兵三千餘人而止其不能不大裁舊制之兵酌減舊設之官者勢也至於養兵之餉舊制水師亦照綠營之例有馬糧戰糧守糧等名目平日或小貿營生或手藝餬口尙不足以自存今旣責令常住船上不得不稍從優厚故長江章程兵糧月支二兩七錢或三兩不等較戰糧已加一倍較守糧幾加二倍今議江蘇水師亦宜仿照長江之例外海則尙須略增自軍興以來綠營之兵無功各省之勇著績兵丁亦頗以平素餉薄爲辭今欲一兵收一兵之用不能不酌增口分者亦勢也惟旣增出欸卽須籌畫入欸長江之餉五省各留釐卡一處係出於常賦之外臣尙以太多爲慮江蘇水師則經費出自司庫斷不能於正額之外添出無着之餉尤不可徂抽釐之說留一永遠之卡溯查乾隆四十七年增兵六萬有奇其時大學士阿桂上疏陳論以爲國家經費驟加不覺其

多歲支則難爲繼臣國藩於咸豐元年在侍郎任內奏請裁兵卽引伸其言歎爲遠慮今日整理水師豈肯盡背前言江蘇水師嘉慶道光年間每歲用銀若干蘇省無案可稽此時約略計算總不欲使新章之銀浮於舊制之外如其不敷更須酌裁陸兵以補救之不獨江蘇爲然也卽沿海各省整頓水師均須核算餉項如使新餉果浮於原數卽應兼裁陸兵以酌濟水餉蓋水師久無戰船非修造兩三年不能集事陸路縱缺額兵苟募勇兩三月卽可成軍陸路則有事招勇無事裁撤水路則製器於多年取用於一旦權衡緩急海疆似以水營爲重其他省之但有陸兵並無水師者縱不遽議裁撤趁此中原大定之際亦可將出缺之弁兵緩至二十年後再議募補將來重募之日儘可做浙江之例大減額兵酌加口糧此又因節省經費而兼籌陸營之計也謹議江蘇水師事宜十四條營制十六條繕具清摺恭呈 御覽伏乞

敕下各衙門詳細會議歸於至當凡疆臣奏事每畏部臣駁詰亦古來之恒情獨至此等大政則不畏駁詰且惟恐其不駁惟恐其少駁目前多一詰難日後少一愆尤不特求部臣再三駁詰卽江蘇前後各任如協辦大學士湖廣督臣李鴻章在蘇省用兵最久洞悉水陸情形兩江督臣馬新貽在浙江辦理減兵事件講求已熟江蘇撫臣丁日昌素有捍禦外洋之志並請 勅下李鴻章馬新貽丁日昌各抒所見將江蘇水師船政妥爲核議務使外防與內盜並謀舊制與新章並顧臣雖離兩江儻有所見仍當續行

陳議期於利多弊少不特江蘇爲然卽長江水師亦乞 敕下沿江五省督撫隨時察看如有不妥之處三年以內儘可奏明斟酌損益臣斷不因係初議之人稍存迴護之見臣之微意不過欲使中國兵勇以舟楫爲室家以海洋爲坦道庶幾事以屢試而漸精人以狎水而漸壯至於船式如何而後善營制如何而後強自當博採羣言不敢略執成見也一俟江蘇水師定章後沿海閩粵各省均可參酌辦理大局幸甚所有酌議江蘇水師事宜緣由謹會同兩江督臣馬新貽江蘇撫臣丁日昌恭摺具奏

酌議長江水師事宜疏

彭玉麟

竊臣奉 命查閱長江水師所有參劾各員及應補各缺業經會同各督撫隨時具奏外臣竊直愚昧以一介書生隨同前大學士臣曾國藩從事戎行十有餘年自維才識迂疏生平未嘗學問於古人馭將治兵之道未能窺見一二徒恃一味樸誠激勵士卒以此稍得其力倖立戰功茲奉 簡命查閱長江仰維聖慮實屬整頓江防爲東南久遠之計而臣智慮短淺深恐無以上副 聖懷伏查長江上自荆湘下訖海滋以南北論之則天塹之險也以東西計之又建瓴之勢也而水師一軍據其要害可左顧右盼雄視四方惟是地面遼闊將卒賢否不齊爲統帥者非有深沈大略而又出以兢業小心忠誠爲 國則一時之利或爲異時之害是以曾國藩無恙時每與臣論及水師卽謂宜隨時變通以防流弊不可株守成

法實係確有所見臣此次簡閱所至竊見此軍改歸經制甫及五年而弊端已伏不可不急謀整頓俾無失設軍初義以仰副 聖上顧慮東南之至意管見所及約有四條用敢分晰臚舉爲 皇太后 皇上

陳之

一曰將才宜慎選也長江水師管轄五千餘里而提督一人爲之統帥必其精神智力無所不及而刑賞號令實有不出戶庭坐制遠近之勢乃爲勝任非徒一年一巡循行故事而已也故將材極難其人臣竊謂能當其任者約有三等智識洪遠天資忠亮其上也秉性剛方威克厥愛其次也操守清廉敬慎畏法又其次也前明武臣中如戚繼光文臣中如王守仁者不獨水師可用而實水師之奇才至技藝之精練情形之熟悉則微末而不足道矣此等人才若不預儲於無事之時而倉卒以求之則必至於僨事鹵莽以用之殆無異於棄師深可慮也今自軍興以來謀臣猛將以及中外文武大臣才守兼優爲 皇上所真知灼見者自不乏人發縱指使惟上所用而臣以爲尤宜責成統兵大臣及各省賢明督撫隨時保舉將才無論其現爲將帥現爲偏裨但視其志趣才略果與前三項略能相應卽行密疏保奏 皇上再博加詢問或遇事飭令來京召見果其所舉不誣隨時不次擢用而又假之以便宜之柄臨之以不測之威務使有才者得以自盡其用不才者不得承乏其間擇將御將道無過此至於各營弁勇如有心地樸實

智慮過人者卽責成各鎮將隨時甄錄上之提督及該管各督撫亦卽隨時察看視其可用者次第擢用以儲異時統帥之材庶幾人材日出而折衝禦侮可以惟我指揮矣

一曰積習宜力除也 國家設立水師各營所爲者殺伐之事所恃者勇敢之氣所服者勞苦之役使其無勇而畏勞則將何以行殺伐乎臣每見前史所載凡在開創之初用兵不多戰功獨偉至於承平旣久兵日益增而益不可用故粵逆之變至捨兵募勇者豈兵獨弱而勇獨強哉兵有習氣而勇無習氣故臣與曾國藩初起義旅湘軍所向有功其時自將弁以至士卒大抵非書生卽農夫也不知有衣服玩好之娛不知有功名勢位之樂不知有趨踰應對之文當時湘軍所以勝人不過兩端曰樸曰勤乃十數年來時事漸平鎮將則狃於富貴士卒則習爲恬嬉於是樸者以漸而澆勤者以漸而惰是今日之勇又將化爲昔日之兵矣豈不可慮然則居今而欲整頓水師亦在統帥之先去積習而已臣查閱所至所見鎮將以下樸實者尙不乏人而亦有修飾廚傳講究應酬者均經臣隨時戒飭甚者至於參劾頗聞每屆巡閱儀節繁縟沿途迎接開放大礮甚至合隊排礮如攻大敵是但知聲威之壯而不顧火藥之虛糜矣業已由臣通飭禁止所到馬頭支搭五色棚帳鼓亭鑼吹儀仗甚都是徒飾觀瞻之美而不知攤派之難支也且此習一開則儇巧者必因此而見長椎魯者必因此而見絀喜怒愛憎隨之而轉移卽是非賞罰隨之

而顛倒其與承平年間綠營習氣又何以異乎臣於攤派一節業已嚴札申禁其各營紅白慶弔及祭祀禱賽時有萬不得已之需商之湖廣兩江督臣略籌閒款俾資辦公此後再有攤派名目應卽照尅扣軍餉例從嚴參辦所有無名費用徒飾外觀而有損軍實者應請 嚴旨飭下懸爲厲禁務使上行下效無失樸誠之舊以養勇敢之風庶水師可以久遠無弊

一曰軍政宜實講也臣所擬慎選將材旣可以收賢者之用力除積習又可以儆不肖者之心而鎮將以下中材居多則利弊所在必恃有成法以制之此軍政之所以宜講也查水師定例用人甚嚴原以風水沙線舟楫器械非熟悉江海情形難期得力長江水師原奏第十五條兵部議定水師缺出不得攬用別項水師人員是長江用人之法必須長江水師人員方可補用自曾國藩創立水師以來十有八年除已充營哨官外其勇目以戰功保至參遊都守千把外委者人數甚衆現議改爲經制額缺則該參遊以下名雖爲兵其實皆候補人員也臣前與提臣再三定議卽以此等兵中之官作爲水師候補遇有缺出擇其人材可用者酌量拔補不得濫收外來人員乃此次查閱各營提標中軍所收外來候補人員至二百七十餘員之多各鎮標或三四十員或五六十員詢其來由在提標者皆曰自各處薦引在鎮標者皆云由提督飭送迨按冊點名則有向在水師各營因事撤革者有向在陸營僅於履歷中聲明曾在某水師

效力者並有僅於冊上註一銜名並無出身履歷而點閱之時並無其人者可謂冒濫已極而一經收標卽須津貼薪水糜費尤甚日復一日數年之後長江水師必盡雜出不倫而營制不可問矣惟此項人員收標既久一時難以盡遣臣擬限以定制提標只准留三四十員各鎮只准留一二十員其有不安本分或別有嗜好者隨時嚴加沙汰此次嚴定額數俟隨時用竣以後卽不准再收候補人員如有出缺專於長沙水兵中拔補以免外來別項人員紊亂務使水師人材總歸水師拔取以符定制其各營額兵以前類多遊勇查各省水師兵丁向由本地招募實以生長其土情形較熟今擬凡在水師地面漁戶水勇人等如有才力精壯心地樸實諳悉風水沙線者皆可酌量募補且使湘軍土軍主客並用以杜勾結妄爲之弊於軍政亦有裨益至原奏二十七條不准私設礮船所慮最爲深遠而近來民間礮位未能禁斷其行劫巨案往往有假冒礮船之事長江各營礮船但有旂號並未援照沙船漕船定例於船梢兩旁大書深刻標列字號盜船私船無可分別以致營船之攬私闖卡匪船之假冒行劫漫無稽查官民均被其害應飭令各營所有礮船均於船梢兩旁大書某營某哨第幾號礮船務使旂幟收卷之時猶可一目了然遇有攬私滋事卽可按號查究則營船不敢妄爲而盜船亦無從混跡矣

一曰體制宜復舊也查水陸各營設提督爲總轄卽設總兵爲分轄提督固有節制各鎮之權而總兵卽

有操縱一鎮之責是以定制提鎮相見用賓主禮文移往來一切平行蓋重總兵卽所以輔提督也茲查水師提督與所轄各鎮公牘初擬用札旣而改用照會經臣再三商論始用咨至各鎮之於提督則概用申文實非國家舊制至提督出巡所到各總兵必須迎送出境掛刀謁見尤爲禮所未見雖苟自卑屈類出於不肖之逢迎而妄爲貴倨亦何以存方面之體統況提督之體愈尊則總兵之權愈奪遇有大事能望其引義以諍乎用人失當能望其秉公弗阿乎又長江水師原奏十五條哨官出缺都守千把外委五項應全歸提督主政原以專一事權委署一層未及分別聲叙長沙分汛地段每哨所管汛地或二十里或三十里不等該汛官遇有事故出缺若必由提督委署則如湖南岳州鎮標出缺提督適在江南太平江南瓜州鎮標出缺提督適在湖南岳州上下數千里懸缺久待往返需時萬一本汛出案勢必無所責成鄰汛出案亦將巧爲諉卸關係軍機實非淺鮮提鎮皆係統兵大臣卽皆有用人才責任總兵用人失當提督秉公參劾可也豈宜總兵竟不預聞若補缺旣由提督主政而總兵不得委署一缺則輕重過甚流弊頗多且亦非提督一人精力所及於營務尤有窒碍應請飭下提鎮體制仍遵國家定例一切平行其各鎮將弁出缺卽由該總兵就近委署再行咨明提督請補其提督敘補非人各總兵卽行咨明更正則提鎮有相維之勢卽提鎮有相濟之功矣右臣所陳四條係就今日水師已見之弊而言而其弊

之未形者防微杜漸尤賴隨時整頓臣與曾國藩創立長江水師之意原以十數年苦戰賴此一軍奪據長江之險俾賊束手待斃而百戰之士棄之可惜且東南有此軍居腹心要害之地一旦有事可以無腹背受敵首尾損決之虞此微意之所在也

皇朝經世文續編卷六十四目錄

兵政三 兵制下

新設皖南鎮標營制疏

李宗義

請改臺地營制疏

沈葆楨

會籌甘省變通兵制疏

左宗棠

擬請挑練大同馬隊五旗疏

衛榮光

新疆局勢大定敬陳管見疏

張曜

奏所部諸軍改營爲旗疏

劉錦棠

擬添練兩鎮馬步營疏

奎斌

謹陳酌改營制藉節餉需管見疏

卞寶第

會辦吉林練軍事宜疏

穆圖善

晉省綠營就餉挑練事宜疏

剛毅

奏設瓊州練軍籌議餉項操練章程疏

張之洞

本邑兵防芻議

賈履上

皇朝經世文編續卷六十四

上海葛士濬子源輯

兵政三兵制下

新設皖南鎮標營制疏

兩江總督 李宗義

皖南鎮總兵一缺前於咸豐五年經前總督臣怡良奏准添設營制事宜當因軍務吃緊未遑議及迨同治四年前署督臣李鴻章奏請分成招補安徽各營兵額案內聲請皖南鎮標下除統轄徽甯池廣蕪采五營外應否添列幾營抑就中酌改增定旋准兵部議覆當此國帑支絀之時未便再添營制以糜餉需應准其就中酌改增定等因奏奉諭旨依議欽此當經轉行皖南鎮道會同藩臬司查議去後茲據安徽布政使裕祿等議詳前來臣等伏查皖南四府一州地廣山多最爲緊要從前設立徽州甯國池州廣德蕪采五營兵數無多頗形單薄今既添設重鎮自應倣照壽春鎮營制設立鎮標左右兩營查皖南地方以甯國爲適中之地帶浙襟江通衢四達總兵宜駐甯國府城居中控馭管轄改設之鎮標左營添設之鎮標右營及原有之徽州池州蕪采廣德四營聽兩江總督安徽巡撫節制其鎮標中軍擬以甯國營作爲鎮標中軍左營原設弁兵毋庸增減惟甯國營係屬叅將改爲鎮標中軍似與體制未符查蕪采

營遊擊與徽甯道同駐蕪湖該處爲七省水陸要衝商賈輻輳巡緝彈壓亦須體制稍崇之員方資控制擬將原設甯國營參將改爲蕪采營參將額缺其蕪采營遊擊調赴甯國改爲鎮標左營遊擊兼管中軍事又添設之鎮標右營體察情形擬設都司一員中軍守備一員千總一員把總三員馬步戰守兵三百名惟通省各營無可裁撥查有安慶營副將所屬之防江游兵二營本係專轄江南兼管南北兩岸陸路支河汊港現在長江已設水師專顧江防該二營係北岸屯防省城暨和含二州縣城守要隘外所餘不過口門支河及沿江集鎮汛境既少額兵尙可稍減擬於游兵營抽兵二百一十名防江營抽兵九十名共成三百名撥歸右營以符增設之數所設千總一員把總三員亦於游防二營內裁撥其都司一員守備一員徧查安省各營實無可以抽撥改移之缺擬請添設以重營伍再游兵防江二營原駐大江北岸前因統轄江面設有哨船是以兼管江南汛地今既無江汛之責又無巡哨船隻若仍兼管南岸汛地勢難聯絡擬將該二營原管南岸汛地撥歸皖南鎮標分隸池洲蕪采二營管轄卽於防江營內撥留和悅洲把總一員守兵四十名歸併池洲營游兵營內撥留守兵二十五名歸併蕪采營並於蕪采營原設馬兵內改設外委一員添派設防又防江游兵二營有原管之江心洲汛若歸長江水師兼管恐該官兵等藉巡查爲名棄舟登陸致啟陸居之漸自應仍歸陸兵分巡惟簡僻孤洲地處江心四面皆是水師時有

砲船梭巡形勢今昔不同擬將各該洲汛在皖南境內者統歸池洲蕪采兩營兼巡在江北境內者仍歸北岸之游兵防江二營照舊巡防遇有案件汛洲地居民失事者概歸陸營開參行泊船隻失事者卽歸水師開參如此就中增改各營兵額不甚懸殊足敷控制而增餉尙屬無多於差操巡防亦可藉資周密其徽州廣德二營悉仍照舊毋庸更張謹將添設裁併各營及增減餉項數目分繕清單恭呈 御覽仰懇 敕部議覆施行

請改臺地營制疏

沈葆楨

臺灣營伍廢弛曾經迭次奏陳上年府城挑練兩營毫無起色並將營官林英茂等參革在案府城如此外汛可知其積弊之深尤所罕見汛弁則干豫詞訟勒索陋規兵丁則巧避差操雇名頂替班兵皆由內地而來本係各分氣類偶有睚眦之怨立即聚衆鬪毆且營將利弁兵之規費弁兵恃營將爲護符兵民訟涉文員移提無不曲爲庇匿間有文員移營會辦案件又必多方刁難需索而匪徒早聞風遠颺矣種種積習相沿已久皆由遠隔海外文員事權較輕將弁不復顧忌非大加整頓不可臣等體察情形計無逾於裁汛併練者蓋分汛裁撤則驕詐擅擾不禁自除併營操練則汰弱補強漸歸有用臺地除澎湖兩營外尙有十五營擬仿淮楚軍營制歸併以五百人爲一營將臺南淡嘉義三營調至府城合府城三營

安平三營爲一支專顧臺鳳嘉三縣其北路協副將所轄中右兩營合鹿港一營爲一支專顧彰化一帶
鯤艸滬尾噶瑪蘭三營爲一支專顧淡蘭一帶均各認真訓練扼要駐紮遇地方有事接准劄調移撥立
時拔隊不准延宕其兵丁換班固多疲弱而就地招募亦利弊參半尙須詳加察看顧立法惟在得人而
事權尤宜歸一現旣巡撫來臺營伍似應歸統轄千總以下卽由巡撫考拔守備以上仍會同總督提督
揀選題補臺灣鎮總兵應請撤去掛印字樣並歸巡撫節制如蒙 俞允伏懇飭部另行頒換該總兵官
關防以昭信守值此整頓伊始將弁之營私黷法者固宜隨時參辦如有才具出衆人地相需亦應立予
拔擢署補各缺暫請勿拘成例俾收得人之效臺地延袤一千餘里處處濱海皆可登岸陸防之重尤甚
於水而臺城以安平爲屏蔽安平向設臺協水師副將一員所轄三營中右兩營都司駐安平左營遊擊
駐鹿港現擬均改爲陸路府城巡撫董率且有道員隨同辦事總兵擬請移紮安平卽將安平協副將裁
撤以鎮標中營遊擊隨總兵駐安平其臺協水師中右兩營都司改爲鎮標陸路左右兩營都司原設鎮
標左營遊擊改爲撫標左營遊擊隨巡撫駐臺其撫標原設兩營仍行駐省改左營爲中營卽以中軍參
將領之原設臺協水師左營遊擊改爲臺灣北路左營遊擊歸北路協副將管轄守備以下弁兵缺額均
仍照舊至巡洋艇船萬不及輪船之便利應將閩廠現造輪船分撥濟用臺澎各營現僅存拖舂船八號

俟下屆修時應請裁撤歸廠變價以節虛糜

會籌甘省變通兵制疏

光緒五年

陝甘總督

左宗棠

竊甘肅地處邊要軍政爲先時值肅清應裁防勇以復制兵減額兵而節餉項臣等前在閩浙辦理減兵加餉一案頗著微效兩省營伍漸有實濟去冬臣昌濬度隴時臣宗棠卽將甘省兵制應變通情形附片陳明請由臣昌濬咨商主辦奉 旨俯允在案竊維制兵之設所以備緩急而固疆圉強弱攸分所關甚鉅 國家養兵二百餘年歲糜 帑藏此次軍興未能稍收制兵之效者由於餉薄而額多夫兵在精不在多兵之能戰視夫練之精否兵之不能練視夫餉之足否若飢乏之卒內顧不遑不得不聽其別營生業心志因之而紛精力因之而懈技藝因之而生兵與將兩不相習無論不能驅以禦敵卽訓練亦難投時入操名爲制兵實與惰民無異徒爲地方之蠹而已各省戎政廢弛弊雖不一而其要皆由於額多餉薄不能勤督精練初以貴餉無成可得多兵之用不知兵不練與無兵同練不精與不練同雖名爲節餉實則並此薄費而亦覺虛糜臣宗棠於同治五年閩浙減兵摺內言之詳矣甘肅爲材武著名之邦其風氣剛勁習苦耐勞本非他省制兵可比乃此次猗亂列郡淪沒均賴客勇之力本地無一枝勁旅殺賊立功而譁噪之事且數見焉額兵之數非不多也原定餉章本薄加以層層剝削馬兵差堪自給步守各兵

未免過苦難得其力甘省賦少兵多軍食向資他省餉源稍絀動滋事端情兵驕騎由來已久非亟議更張望其轉弱爲強不得也久留勇則費不支全裁兵則悉無備仍循舊制則難期起色別議加餉則無款可籌臣等再四商酌亟宜援照閩浙成案量減可裁之兵以節餉糈卽以所裁之兵餉加之所留之兵庶兵力較紓可責其勤練將弁各予以津貼革除虛冒應差挂名辭伍諸弊庶帑項無增軍政可期其精實甘省在昔爲邊要重地雍正中定額較內地爲多後雖陸續裁減而合一提四鎮並督標暨陝西提督所轄駐甘各標計之尙存馬步守兵五萬七千四百餘名新疆換防兵九千餘名一併在內歲需兵餉馬乾銀七十八萬六千六百餘兩上色倉斗糧三十五萬五千四百餘石馬料一十一萬二千一百餘石草八百萬零三千五百餘束公費銀三萬一千三百餘兩其大較也原設兵額之多緣地居邊塞北連蒙部南雜番回西路新疆更番換戍防範宜周兵力不得不厚也若就現在情形而論新疆各城漸臻底定方議另立營制甘肅已屬內地調撥漸稀蒙古王公貝勒台吉列戍邊防涵濡教化歷久而馴順有加北路無須重兵鎮壓卽南山番族時有伺隙劫殺之事然非無要可扼如果布置周妥亦保無虞寧夏等處以河套爲慮今套患久銷沿邊一帶且資其接濟西寧河州轄境雖與撒喇野番錯處情形稍爲吃重然回務旣平小股匪番無須大隊時勢攸殊兵固有可裁者現擬將督提鎮標路各營酌量地方今昔情形分

別輕重仍按照馬步守三項名目分成核減甘省馬兵額數較多邊地雖宜用騎而應敵布陣必步兵多於馬兵乃可制勝是馬兵固有可裁者現查關內各營馬步守三項兵數參差不一多寡懸殊章程未能畫一當初隨時增損自非無因而據現在情形審之應變通以期其盡利至於糧餉擬將減存兵數量加折色以資飽騰臣等數月以來周諮博訪往復函商減兵增餉章程甘肅實宜仿照辦理除加增兵餉外尚可節省銀六七十萬兩以之撥充新疆設省經費於西事亦不無小補據藩司崇保詳請具奏臣宗棠詳加覆核無異除將未盡節目及疏漏之處隨時咨部辦理謹將擬議甘肅省變通兵制事宜列爲十條會同甘肅提督臣周達武陝西提督臣雷正綰合詞恭摺具奏

擬請挑練大同馬隊五旗疏

光緒七年

山西巡撫

衛榮光

竊照晉邊之歸綏包頭控扼艸地毗連大青山暨後山一帶形勢遼闊南抵殺虎口六百餘里西逾纏金八百餘里東接得勝口亦數百里均與朔疆蒙部犬牙相錯溯自軍興以來征調四出官則來去無時勇則招遣莫定其中游惰之徒資緣伏匿遂恃此爲逋逃淵藪又其地多屬蒙古游牧近年赴口開墾者往往謀構爭利仇殺相尋日久失業亦遂勾結匪類肆其擾害從前因卓勝軍扼紮皇甫川包頭一帶爲之屏蔽自三年卓軍西去卽經前撫臣曾國荃招募湘毅軍駐紮該處地方賴以安靜上秋湘軍東調雖將

樹軍裁剩右營擇要布置而馬步四旂砲隊一哨爲數僅止一千二百餘人責令分巡千餘里之防此往彼來疲於奔命以故上冬與本年四五月間邊口地方卽有囂然不靖之勢迭據大同鎮張樹屏以地廣兵單難於兼顧非添派防營不足以資震懾等情咨商前來臣查口外地方荒野非如內地有村鎮城池可以阻遏亦不如內地有墩汛兵役可以稽查而且居無四鄰人皆野處卽白晝劫奪何所忌畏况游惰各匪積年混跡其間此拿彼竄習爲故常弱食強吞已非一日若不有犯卽懲至此輩賊膽日肆馴至如奉天吉林馬賊大肆鴟張其滋擾蒙古生計固屬可虞而嘯聚日多當此邊塵未靖之秋尤恐養成巨患是添派防營一事實屬當務之急所難者屢飢之後司庫支絀萬分旣不敢率准增竈又未便置爲緩圖再四思維惟有就大同額設馬兵揀派七百八十名查照晉省練軍章程編作前後左右中五旗由張樹屏派員管帶俟成軍後擬飭左右中三旗分紮口外三舍必嚴察素齊大余太等處前後兩旗擬飭分紮口內之陽高岱岳等處劃定汛段聯絡巡防藉輔樹軍力所未逮至所以專練馬隊而不挑練步隊者蓋以平原曠野必以逐捕爲先如教練得法將來樹軍裁撤有此項馬隊馳驅奮擊旣可張邊鄙聲威亦足開綠營風氣似於邊防營務兩有裨益倘蒙 天恩俞允臣當嚴飭張樹屏揀派營官認真訓練務期捕除醜類保乂地方仰副 聖主綏輯邊陲之至意再此項馬隊五旗除應領底餉底乾外每大建月計增

練餉練乾銀四千四百四十八兩三錢小建月計增練餉練乾銀四千三百六十八兩七錢八分此外應領帳械軍火各件當飭查照章程撙節動支不准稍涉糜費將來統歸督省軍需項下核實造銷以示限制

新疆局勢大定敬陳管見疏

光緒八年

張曜

竊奴才接准伊犁將軍金順泰贊大臣升泰咨函本年二月初四日伊犁業已接收從此保境息民講信修睦蠟飛蠕動咸獲少安此堂陛之良圖邊庭之幸事也論者謂新疆局勢大定今日之先務在於裁汰勇丁以節餉項奴才則謂裁汰勇丁即可規復兵額變通營制方能永固邊防也營制之宜變通者有三曰增騎兵曰重火器曰設遊擊之師各省綠營定制步多騎少扼要防險戰於山谷步兵之利也出奇鵬剿平原蕩決騎兵之利也新疆各城廣川大原間以戈壁減步增騎宜亟變通者一也軍興以來多尙火器愈講愈精以他器敵火器則他器鈍而火器利以火器敵火器則舊者鈍而新者利少者鈍而多者利故外國水師非恃兵衆惟恃器精而又勤於習練減養兵之資爲購器之費宜亟變通者二也至各城營汛設立制兵爲數不能過多此城有警彼城設防各顧轄境力難分救故南北兩疆宜設遊擊之師居中駐紮統以知兵大員此項兵丁不供他役規模嚴整以期士氣常新設遇各城有事風馳電掣而赴之

無事之歲南北兩疆各於邊界定期會哨振武揚威隱戢奸宄宜亟變通者三也所謂變通營制方能永固邊防也至於各城兵額督辦新疆軍務劉錦棠陳明請就關外現裁營勇選其精壯耐勞者編成制兵改行餉爲坐糧實爲良策蓋關外營勇有籍隸陝甘去新疆較近風土相似者有雖籍隸東南各省幼被賊掠輾轉投營里居氏族不能自知者有原籍遭兵田廬已空親屬已盡不可復歸者有寇亂之日樹怨於鄉以異地爲樂土故里爲畏途者此屬若選爲制兵久經戰陣可期得力一利也參用屯田之法兵食兩足二利也關外多一精兵關內少一游勇隱弭無數事端三利也所謂裁汰勇丁即可規復兵額也邊域要地治兵爲先兵強則邊固邊固則民安民安則事理矣

奏所部諸軍改營爲旗疏

光緒十年

劉錦棠

竊臣部馬步諸軍暨烏魯木齊提標土勇截至九年十二月底止共存五十一營旗開砲隊三哨小馬隊五哨業經遵照部議奏明立案其自十年正月起經臣再三籌度先於行糧馬隊內飭將蜀軍呼敦左右二營楚軍定邊一營湘軍定遠小馬隊一哨裁併改爲定遠行糧馬隊一旗呼敦行糧馬隊二旗定邊坐糧馬隊二旗又於行糧步隊內裁撤湘軍定遠中營一營並將董字左右二營定遠左右二營蜀軍正副二營楚軍安遠左右二營建威一營裁併改爲董字左右二旗定遠左右二旗蜀軍正副二旗安遠左右

二旗改建威營爲安遠前旗以上馬步改營爲旗照章共留員弁勇夫五千九百一十五員名額馬六百三十五匹外共開除員弁勇夫二千九百六十三員名額馬一百二十一匹其各營遣勇口糧結算至二三月底不等由臣極力騰挪並將分收上年息借陝商之款湊放清楚又喀喇沙爾地方險要因就所轄蒙部內挑選蒙古馬隊一旗照依土勇馬隊章程開支以資防衛其阿克蘇道標土勇一旗經部議准現已挑募合之楚湘蜀軍並烏魯木齊提標土勇共五十四營旗開花砲隊三哨小馬隊四哨通共額設弁勇一萬九千一百六十三員名額外營哨官一百二員額外火夫長夫馬夫九千六百二名額馬三千七百八十八匹此臣部諸軍截至十年三月底止現存實數也茲據行營糧臺開單詳請奏咨前來臣覆核無異計馬隊改旗者共三營步隊改旗者共九營又併小馬隊一哨較之上年營旗之數雖多三旗而實在弁勇減併不少論邊地之遼闊防勇未敢議裁論欠餉之遞增必須及時清理似此設法酌改減一勇卽省一勇之糧兼之汰弱留強挑一勇真得一勇之用於防守嚴密之中力求裁省以期上副朝廷綏邊節用之至意

擬添練兩鎮馬步營疏

光緒十年

署山西巡撫
奎斌

竊維晉省綠營疲弱積弊已深非改絃更張難期整飭經升任撫臣張之洞遵奉八年十二月二十六日

上諭於本年四月間奏請酌改兵制減額加俸奉 旨該部議奏欽此並已先期分咨大同太原兩鎮於所屬各營兵額內裁汰老弱缺額旋據大同鎮咨報共裁馬步兵三百三十六名太原鎮咨報共裁馬步兵二千九百三十六名節省餉乾扣存司庫原擬俟接准部覆再行分別選練成軍惟晉省幅員遼闊兵額本不甚寬今舊額既已酌裁新兵未經添練冬令將屆備禦空虛亟宜先事圖維以期周密因查晉南各屬地畝荒蕪人烟寥落客民來晉傭趁良莠不齊編插稽查不容稍懈北路沙漠荒遠游匪散勇濫廁其間往往伺隙而動雖年來迭經捕治伏莽未能盡除緝匪綏邊極關緊要張樹屏所統樹軍暨大同練軍向紮包頭等處及邊牆內外前經奏明備調一經恭逢 諭旨卽當抽調啟行是預籌北境設防兵力尤宜稍厚臣現兩鎮裁節餉乾通盤籌畫擬挑練大同鎮步隊五百人爲一營馬隊二百五十人爲一營太原鎮步隊五百人爲一營扼要駐紮分段梭巡與原有樹練各軍聯絡聲勢以期得力通計兩鎮裁兵三千二百七十餘名飭司查核餉乾原估之數計每年可節省銀五萬九千四百四十餘兩此次添練馬步隊三營按升任撫臣張之洞奏明章程步隊每營每月大建需薪公餉銀二千八百兩零馬隊每營每月大建需薪公餉銀二千一百二十一兩零計每年共需銀七萬二千五百餘兩尙不敷銀二萬一千餘兩惟添練馬步兵丁係就兩鎮現存兵額內揀選每年尙可扣除底餉底乾二萬二千餘兩以裁節之餉爲添

練之需既屬有盈無絀亦與前次奏改兵制章程相符一俟裁改兵制之案接准部覆後再行照章分
舉辦據清源局司道詳請具奏前來除分咨大同太原兩鎮於各底營存兵內照數抽調選派得力將領
揀練成軍另將節存餉乾應需練餉截數咨部外理合恭摺具奏伏乞 皇太后 皇上聖鑒訓示並請
飭部將晉省裁改兵制原案速爲議覆施行

謹陳酌改營制藉節餉需管見疏

湖南巡撫 卞寶第

竊維 國家財用至今日而愈艱綜計歲出大宗莫如兵勇之兼設查直省旗綠各營兵額七十七萬餘
人每年薪糧計銀一千數百萬兩養兵不爲不多費餉亦不爲不鉅在 朝廷規模遠大原不惜散財以
備兵無如兵愈多則力愈弱餉愈鉅則國愈貧粵逆自金田起事初不過二千人廣西額兵二萬三千土
兵一萬四千乃以三萬七千之兵不能擊二千之賊廣西兵不可用他省可以類推其後髮捻回苗等匪
悉賴湘淮營勇剿除勘定綠營戰績無聞大亂甫平伏莽未盡兵不得力勇難盡裁撤於是歲支勇糧又
在一千餘萬兩賦入有常何堪如此耗費說者謂裁勇補兵足資節省不知勇糧較兵餉爲優孰肯肯井
離鄉就此數錢兩許之餉勇之不願爲兵有必然者今欲化弱爲強兵皆如勇勢非裁額併糧變通營制
不可變通營制非漸次辦理不可何者營制不可變通則今日所練之兵仍是舊染之習變通不漸次辦

理則驟聞裁汰之議未必不啟軍衆之疑所謂變通者綠營餉制每月馬兵一兩九錢戰兵一兩四錢守兵九錢零月餼無多必藉小貿手藝以謀事畜旣不能禁兼別業卽不能責令專操無論技藝之生疏也而其分歸鄉里各謀生計遇有調遣或製造鍋帳或整理器械或安頓家口或雇倩頂替非數日不能成行軍情瞬息萬變何可任此遷延從前削平大難各省用勇不用兵者正爲倉卒不堪以應變也臣擬請裁額併糧以兩餉挑養一兵厚其廩祿俾無室家之累仍仿勇營規制如額兵一萬分作二十營以一半駐守以一半巡防南營至北東營至西互相邏戍令習辛勤仍復按時更替以均勞逸無事則計日操防有警則隨時援應申明紀律不准再蹈綠營習氣所有營官於現職副叅遊中遴選曾經戰陣謀勇兼優者任之都守以下充當哨弁現時新疆設立提鎮各官奏請照楚湘營制者卽此意也所謂漸次辦理者兵現減額原設將弁亦應隨之核減綠營將弁歲領廉俸馬乾薪紅銀兩職分大者一官可抵百兵之餉小者亦可抵十餘數十兵之餉故大學士臣曾國藩籌議安徽綠營奏請將零星孱弱之兵一律裁撤營汛將弁暫緩序補誠以裁汰兵丁須先裁汰將弁乃不棘手蓋綠營積弊隱匿空糧攤扣月餉以及左右役使無非額兵裁汰之議洵與將弁不便故多設辭阻撓希圖仍舊積習之牢殆不可破也臣擬請先裁將弁以併營則所併之營兵已見多以後逐漸裁兵仍與所部原額不相上下斯酌留將弁自不致藉

詞梗阻各營兵丁遇有故革及老弱裁汰缺出暫停招募俟通省出有千缺即將現兵挑精壯五百人補之給與雙餉綠營精壯不足卽以營勇撥補作爲練軍一營均照勇營章程辦理庶幾兵歸實用勇可漸裁或亦節省餉項之一道也

會辦吉林練軍事宜疏

光緒十一年

欽差大臣穆圖善
吉林將軍希元

竊吉省已練之兵存城無幾餘皆分防各城要隘未便調歸校閱惟值防務稍鬆之時可於兵力稍厚地方查照海軍衙門會議抽撥馬步隊三二成歸於練營稍節餉需奴才希元自應量爲抽撥以符原奏茲將抽撥防軍右路步隊一營左路馬步各一營練軍馬步一起共一千五百名隨帶馬匹鎗械劃撥現食月餉以清界限奴才穆圖善查該省所撥馬步練兵餉數稍有多寡之殊應照新練章程支發俾昭畫一又於食餉未練之兵及八旗臺站西丹內挑選年力精壯者二千九百七十名加入撥吉教習二十五名正藍旗護軍統領倭恆額等奏准調營兵丁十名編入歸伍合已練馬步四營添練步隊六營共足原議四千五百人之數每日先發小口糧暫行租住棧房照議立爲吉字營分爲左右兩翼仍照奉省卽按八旗分定營制奴才穆圖善卽揀特派之正藍旗護軍統領倭恆額爲吉字營總統乾清門二等侍衛三品頂戴富林布爲幫統專任督操其餘統帶各官同奴才希元會商查有二品頂戴花翎協領霍隆武巴

圖魯穆隆阿久歷戎行堪充左翼統領記名副都統花翎協領富爾丹諳練營務堪充右翼統領復於吉
省八旗各官暨奴才穆圖善調營隨員內詳加遴選派定馬步各營管帶營官開列銜名清單恭呈 御
覽茲於八月初一日一律點驗開練成軍起支正餉各營旗幟號衣均已製辦齊備約計吉省挑練馬步
十營除由吉省抽撥已鍊之馬步兩起步隊兩營隨帶現食月餉銀九千八百九十七兩零不計外新挑
步隊六營餉乾將領員弁各費各局薪水每月實需正餉銀一萬九千五百七十三兩零其餘修蓋營房
製辦旗幟號衣及各營購備器具照章支銷各費尙在月餉之外至於紮營基地已擇定東西門外卽飭
該總統等督率馬步練軍趕緊修築營壘使兵早日歸營專心操練並飭將未盡事宜遵照立定規模妥
爲經理如遇緊要事件應由倭恆額等隨時咨請奴才希元酌辦奴才穆圖善於辦理就緒之後卽赴黑
龍江開辦俟該省成軍仍由吉回奉挨次校閱總期成爲勁旅一兵得一兵之用所有現辦吉林練軍練
員挑兵成軍支餉緣由謹合詞由驛馳陳

晉省綠營就餉挑練事宜疏

光緒十三年

山西巡撫

剛毅

竊查光緒十年四月間升任撫臣張之洞以綠兵積弊已久建議分立三軍四軍旋准部議以餉鉅難籌
令照例定俸廉餉乾等項免扣成平全數動用儘此例支銀米另議餉章再行會議復經前署撫臣奎斌

遵議仿照直隸章程就餉練兵並臚陳沙汰老弱簡練精壯酌裁官員刪併塘汛規復額餉綜核盈虛六條奏奉 諭旨該部議奏欽此經兵部戶部會議覆奏十一年十一月接准咨覆行令照辦並以原議節省餉乾銀數稍有不符裁汰員弁底冊間有歧異各營公費數目亦有可減仍令詳細查覆等因咨行到晉臣到任准移當卽分咨太原大同兩鎮刻期舉辦並飭清源局司道確稽餉數分別核議去後查晉省兵氣素弱庫藏無餘旣議練兵復籌節餉二者併舉計乏兩全前署撫臣就原有餉需設法撙節爲抽練之計固已煞費經營然究爲餉數所拘兵力所限欲求處處周備實亦勢有所難惟臣竊以此舉有關晉省兵制全局雖非盡變舊章然就額餉以練主兵原欲策自強而規久遠若留罅漏於此日必費補苴於將來故擬量爲變通務使益臻精密論全晉形勢原屬北重於南歷前撫臣固詳言之矣臣以此爲不刊之論是原定北鎮應設各營旗實已無可議省標居中權之地旣不臨邊又無分汛之責原定設親軍馬步合隊一營步隊兩營馬隊一營萃於一城略嫌偏重是以臣於抵晉之初卽將省標原有親軍馬步練交一百五十人 奏明全數裁遣原營抵額概不募補通年計可節省底餉底乾二千七百六十七兩零並將原定此數練兵案內應設之親軍馬步合隊一營二百人全行刪除通年復可節省薪公練餉練乾銀一萬二百餘兩東路潞澤一帶控制大行界連豫直邊隘林立山徑分歧原議僅於潞安府設步隊一

旗沿邊千有餘里不免有地廣兵單之虞臣擬於澤州府添設步隊一旗計通年應增乾餉銀八千六百八十九兩零仍於蒲州府原設步隊一營五百人裁去二百人改爲一旗計通年可省練餉銀五千七百一十六兩又原議於運城設馬隊一旗平陽府設馬隊一旗汾州府設步隊一旗此三處皆爲省南扼要之區然運城居平陽之南汾州居平陽之北運城旣設馬隊則平陽宜設步隊汾州宜設馬隊應請將原設平陽府馬隊改設汾州卽以汾州府原設步隊改設平陽庶幾馬步相間聲氣相聯而於原定兵數餉數仍無出入統計此次就餉練兵撫標挑練馬隊一旗步隊兩營太原鎮挑練馬隊二旗步隊四旗大同鎮挑練馬隊七旗步隊一營較之原設刪除撫標親軍馬步合隊一營二百人刪除蒲州府步隊二百人添設澤州府步隊一旗三百人餘均與原設相同其營制餉章駐紮處所亦悉如奎斌前奏由各該鎮照數編立均於十二年正月初一日一律成軍原有各練營應支餉乾亦均於是日截止至應裁馬步各兵自光緒十年正月日起至十一年二月止共裁省標兩鎮馬步額兵四千三百六十名臣接辦後續裁省標馬步兵一百五十名太原鎮各營塘汛兵一千名大同鎮塘汛兵四百名前後共裁馬步兵五千九百一十名官馬三百一十三匹通年節省裁兵餉乾米豆等銀七萬九千三百兩零裁改官弁六十八員除改設守備以下十八員實裁都司六員守備一員千總七員把總二十三員外委十三員共五十員例馬

八十八匹官馬一十三匹均於十一年十二月底與新裁塘汛各兵一律停支俸餉通年節省裁官俸養廉餉乾五千八百三十一兩零酌減綠營公費銀八百八十八兩零合之議准規復成平銀一十萬六千八百二十五兩零通計每年節省規復可備練兵之需者實共銀一十九萬二千八百四十六兩有奇今就所練各營旗應支薪公練餉練乾核算通年實需銀一十六萬八千四百七十兩有奇並兩鎮分統公費銀二千五百兩每年尙餘銀二萬一千九百七十兩有奇其餘雜支應以軍火爲大宗歲修營房次之冬防煤炭又次之卽照正項一成計算每年尙可餘銀數千兩以備修造軍裝卹賞等用亦屬有盈無絀應請隨時核實支銷如有盈餘報部候撥由清源局司道確核各項細數詳請具奏前來臣查綠營錮弊頹弱成風至此時而已極今創此加餉整軍之議冀收安邊固圉之功若一任惰廢因循必致踵弊蹈欺虛耗度支於武備仍無實際臣自當慎選將領嚴督操防務使兵氣日強懦氣漸振庶緩急足恃而成效可期如查有廢弛營伍任令兵丁技藝生疎以及濫給名糧虛曠攤扣等弊卽由臣將營哨各官從嚴叅辦並將分統之員一併奏叅所有北軍馬隊五百人樹軍馬步一千二百人皆係客勇部議原限一年後遣撤當此經費支絀之時但有可裁之兵可省之餉自宜力求撙節現已另片陳明將北軍馬隊五百人先行裁遣其樹軍各營分紮北路緝匪巡防深資得力現在各營甫經集練未能一律精強統俟一年

後再由臣酌量情形奏明辦理

奏設瓊州練軍籌議餉項操練章程疏


光緒十四年

兩廣總督張之洞
廣東巡撫吳大澂

瓊州一島爲海疆第一衝要孤峙大洋逼近越境內綏黎客外籌海防在在胥資兵力而勇營需餉浩繁殊非經久之計迭經與督辦欽廉防務提督馮子材水師提督方耀署陸路提督鄭紹忠暨瓊州鎮道往復詢商臣等督飭司道參考羣言覆加酌核惟就瓊州原有之制兵酌設練軍加足練餉一洗綠營積弊庶可化虛糜而爲實用查瓊州鎮標裁存額兵四千零九十九名擬就瓊州鎮標左右兩營崖州協萬州營儋州營海口營海安營共七營每營抽練陸軍一底營計二百五十名書識號令親兵紅藍旗俱在其內七底營共一千七百五十名牛將馬兵戰兵儘數歸練不敷之數以守兵補足又瓊州水陸額設崖州儋州海口海安等營拖船十號現擬先行整頓七號分撥崖州二號儋州二號海口二號海安一號共配撥練軍二百五十名連前陸軍共二千名陸軍不論馬步戰守每名均給月餉實銀三兩每練軍十名設副長一名月餉三兩三錢拖船正兵月餉三兩每號設正副舵工各一各正舵工每名月餉六兩副舵工每名四兩五錢陸軍每營五哨中哨營官自帶拖船每一號爲一哨陸軍哨官二十八員拖船哨官七員水陸哨官均於本營千把外委內選充不拘實缺候補每員月給薪水銀九兩所有薪糧均不扣建營官

七員卽以本營現任副叅遊等官兼充無論官階大小每員月支辦公費銀一百兩如遇有剿捕擇要屯防爲日甚久管帶之將官未便終年在外應每營各設幫帶一員以便更番而資兼顧卽於本營現任都守酌派兼充幫帶官七員每員月給夫馬費十五兩以瓊州鎮總兵爲號統領自支辦公費銀二百兩統計練餉薪水公費每年共需銀八千八百四十八兩各營除抽練之外尙應存守兵二千零九十九名以充看管城門局庫護解人犯各項例差及勻撥各處緊要塘汛以存舊制此抽撥練軍酌定練餉之章程也查此項抽練之馬步戰守各兵原有底餉銀三萬三千餘兩又原有本色糧米七千二百石每石按照部章六營均折銀七錢海安營折銀五錢共銀五千餘兩又馬兵原有馬料米折銀五百六十餘兩一律由藩庫道及高廉雷瓊各道分別扣出移交海防善後局湊撥練餉旣歸畫一旦免延欠共抵銀三萬八千五百餘兩尙不敷支銀五萬餘兩擬卽就瓊州現駐防勇十底營中酌裁五底營每年計裁銀八萬一千餘兩除撥補此項不敷之練餉外每年計可節省銀三萬零二百餘兩遇閏之年應加月餉薪費共七千三百七十八兩有奇除原有餉米外較之閏年勇餉所省仍多俟勇營報裁之日卽爲練軍起支之時其挑剩之守兵二千餘名應支餉米仍照舊章此酌撥勇營撥補練餉之辦法也至抽練之兵悉按勇營規制一律挑選精壯足額臨時派委大員點驗向來虛伍攤扣散渙驕惰等積習嚴行禁革其有革退事

策也其城內應分兵二百名隸守備城汛兩營守備有署在南門城汛無署可於九畝地義倉安置或易守備居此以便操防以資屯衛設有盜警立即發號閉城整軍成列外可援內內可攘外正無事團練壯丁招募鄉勇而一兵得一兵之用於國初立法之意似不相懸否若所請裁撤捕盜局改歸水師之說又有故焉夫本營水師管內洋外洋非其熟悉然考之軍政內洋即陸外洋所恐本地兵單不能兼任若欲添設又恐經費難籌今捕盜局本係各號商捐貲核計雇船募勇歲需開費不下一二十萬金揆之兵額所需養一兵幾及十兵之費若移歸水師統以將弁募勇可爲營勇雇船可備師船陸叙有階賞賚有格而謂兵之有用必不及廣艇漁船者不敢信也蓋近來海運護糧鎮江殺賊捕盜局勇誠屬多功但自來召募之徒皆能發不能收可聚不可散卽恪遵號令任受羈縻天下究無終日招兵連年捕盜而可云安享太平之理惟准以朝廷經制統以將帥威權紳商助餉仍可邀恩士卒服勤自堪報國芻蕘末議是否可行伏候采擇焉







皇朝經世文續編卷六十五目錄

兵政四 屯餉上


伊犁興屯原始

請於南路雇募民苗稟

松郡民團經久芻議

裁屯田議

奉旨籌撥甘省糧臺暨新疆餉項疏



胡林翼

賈履上

馮桂芬

駱秉章

糸廿三糸糸

糸廿三糸糸

糸廿三糸糸

糸廿三糸糸

糸廿三糸糸

糸廿三糸糸

糸廿三糸糸

糸廿三糸糸

糸廿三糸糸

糸廿三糸糸

糸廿三糸糸

糸廿三糸糸

糸廿三糸糸

糸廿三糸糸

皇朝經世文續編卷六十五

上海葛士濬子源輯

兵政四 屯餉上

伊犁興屯原始

松筠

新疆各城屯田有兵屯有回屯有戶屯而無旗屯惟伊犁皆有之兵屯者綠營兵丁之屯回屯者回民之屯皆創自乾隆二十五年時初設兵駐守 高宗純皇帝以武定功成農功宜舉 特命參贊大臣阿桂專理屯田由阿克蘇率滿洲索倫驍騎五百名綠營兵百名回子三百名越穆蘇爾達巴罕至伊犁鎮守辦事搜捕瑪哈沁招撫潰散之厄魯特卽以綠營兵築城回子乘時興屯開渠灌溉是爲伊犁屯田之始二十六年至三十四年陸續由內地增調屯田兵至二千五百名五年更替以五百名差操二千名屯種四十四年將軍伊勒圖奏准改爲攜眷定額三千名以五百名差操二千五百名屯種分爲二十五屯仍視倉儲之多寡隨時增減屯種此兵屯也回屯自阿克蘇原帶回子三百名於伊犁河南海努克之地分撥墾種次年調取伯克並由烏什葉爾羌和闐哈密吐魯番等處陸續增調回子至三十三年共有六千三百八十三戶內除彥齊回子 彥齊者隨伯克品級給於服役之回子 三百二十三戶種地所生之麥大小伯克及挖鐵回

子六十戶養贍口糧外奏定種地回子六千戶分爲九屯於固爾札建甯遠城居之設阿奇穆伯克管轄此回屯也戶屯者商民之屯創自乾隆三十七年將軍舒赫德奏明客民莊世福等四十八戶以無礙屯工之隙地請撥令開墾卽於本年陞科永爲土著此戶屯也以上兵回戶屯等項行之有年其來已久惟旗屯一項則前此所未有至嘉慶七年而始興先是乾隆二十九年奉 高宗純皇帝諭旨伊犁田土肥潤如數多人耕作莫若令滿洲官兵分種旣得勤於力農而於養贍家口喂養馬匹均屬有益著查明地畝俟滿兵到齊後酌量分給耕種欽此其時將軍明瑞覆奏以附近伊犁二百里以內可種之地甚多俟官兵到齊再爲妥議辦理嗣於回屯之東開築新渠因地勢較高未就緒而罷三十七年又設法引水爲土爾扈特屯田不一二年亦罷迨乾隆五十年五十五年疊奉 諭旨駐防官兵生齒日繁而國家經費有常伊犁地廣田肥著賞給官兵地畝佃人耕種用資生計欽此歷任將軍皆以灌漑乏水未及籌辦嘉慶七年將軍松筠相度地形親爲履勘始得導水要領奏明於惠遠城東伊犁河北岸濬大渠一道逶迤數十里引用河水灌田又於城西北草湖中覓得泉水設法疏濬築堤岸開支渠引漑旗屯地畝又於城東北就渠畔擇可種善地分授惠遠城官兵播種而以前此綠營裁撤之屯授惠甯城八旗官兵均令閒散餘丁代耕並僱人佃種永爲世業得 旨允行嗣又濬大渠一道與前所濬之渠通名通惠渠並於其

東阿齊烏蘇地方濬大渠引丕里沁山前之水灌田數萬畝此又旗屯之所由始也

附屯務成案

乾隆二十五年辦事大臣阿桂奏伊犁增添兵丁及種地回子並修築城垣等事一摺奉 旨着軍機大臣核議具奏欽此當經按款核覆一原奏內稱伊犁種地回子現有三百名宜於次年再添七百名以足千名之數適經舒赫德奏派回子五百名令其攜眷於來年時每名應備帶小麥大麥籽種各五斗穀黍籽種共五斗農具馬匹牲畜等項俱照本年移來回子之例辦理令其於正月初間卽由阿克蘇等處起程以便二月初間雪消之際卽抵伊犁種地除咨行舒赫德外尙應添回子二百名俟伊犁麥收後再行撥發前來等語查伊犁地方地廣而肥若將種地回子等多爲撥給實屬有益但移駐種地回子所需口糧籽種馬匹牲畜若令一時全行辦理各城回子等設措不免拮据自應陸續撥發應如阿桂所奏飭令舒赫德等妥爲辦理所請麥收後撥發二百戶回子若能同五百戶回子於正月內卽一併發往甚善儻不能一併發往麥收後種地之時已過與其抵彼徒糜口糧甯俟秋收後再行撥發不但由阿克蘇起程不至拮据而伊等至彼不久卽屆春季種地亦不致糜費口糧應請飭將此項二百名回子於來年秋季落雪以前卽令起程撥往一原奏內稱伊犁地方外界哈薩克布魯特本年

三百名回子始種三百石籽種除養贍伊等本身妻子應留籽種外回子五百名合此回子三百名每名若令種一石五斗籽種十五分收穫可得糧一萬八千石二十分收穫可得糧二萬四千石雖至少亦數一千戶回子二千五百名兵丁一年口食伊犁現有兵丁九百餘名請於來年再添撥一千五百餘名既有滿洲索倫察哈爾兵八百餘名外再添馬兵六百餘名除現有綠營兵一百名外再添綠營兵九百名此項增添之兵舒赫德處先添馬兵四五百名於來年春間應撥五百名回子起程之際一併發來照本年春間帶來官兵之例辦給米麪羊隻其餘兵丁俱俟麥收後起程祇辦給沿途口食等語查伊犁駐防兵丁宜量回子等所種地畝收穫數用再爲陸續增添駐防本年三百名回子所種地畝收穫之糧卽數千餘名兵丁口食來年若再添回子耕種可得二千五百名兵丁一年口食請如所奏由葉爾羌喀什噶爾阿克蘇等城調派滿洲索倫察哈爾兵六百名綠營兵四百名由烏魯木齊調派綠營兵五百名添駐伊犁不惟口糧易得而於防守地方有裨此項往駐兵丁於春間護送種地回子之時先令幾百名起程秋季幾百名起程所需口糧等項如何辦給之處應飭令舒赫德行文與阿桂商酌辦理一原奏內稱來年回子足數千名耕種所收之糧於壬午年卽數三千名兵丁口食來年秋季撥駐綠營兵千名抵伊犁後卽先令耕種秋麥壬午年春季再令耕種小麥大麥穀黍計一千名

綠營兵丁一千戶回子耕種所收之糧足敷六千名兵丁口食察看此地情形尙毋庸許多兵丁若有兵四五千名卽足敷用但伊犁地處極邊界連外夷若駐兵五千請駐滿兵三千名綠營兵二千名若駐兵四千除一千名種地綠營兵丁外請再撥綠營兵一千名前來令其蓋房築城俟換班之際再行擬定數目等語查現在固爾札海努克察罕烏蘇等處令回子居住耕種地畝於哈薩克布魯特連界之處安設卡倫防守地方需兵較多若駐兵五千部伍成而威勢盛但駐兵必裁度該處分例不使糜費內地帑項於事方有裨益今阿桂雖稱年來一千名回子一千名綠營兵丁所種之糧除留存籽種外可敷六千名兵丁口食然必須耕種一年得實在收穫數目方可裁度定擬駐兵之數莫若於來年秋收後裁度秋收後實收穀石數目如敷駐兵五千俟奏到之日將出派何處兵丁如何擬定年限換班之處再行定議一原奏內稱伊犁名勝之地河北無過固爾札河南無過海努克若論田地肥沃無過察罕烏蘇其海努克地方現有回子三百名卽令其居住不使移動海努克地方請建一小城駐兵數百名以遏哈薩克布魯特等所通之路至察罕烏蘇地土肥沃種地一千名綠營兵丁卽在察罕烏蘇居住建一小城池以遏哈薩克布魯特由伊犁河北所來之路請將來年春季起陸續前來之七百戶回子俱令駐劄固爾札建一大城所有大臣衙署及倉廩房間俱修於此著馬兵等於草青之時擇

水草善處牧養馬匹牲畜以便各路遠出巡防俟草黃落雪以前各令回城附近度冬但目今穀尙未積不便卽調築城兵丁俟壬午年夏季所撥一千名綠營兵到來專令責成築城蓋房等事其種地兵丁回子等亦令其暇時幫助使一年限內完竣等語查伊犁種地駐兵宜於形勢之地修建城池以遏外夷今固爾札海努克察罕烏蘇雖俱係形勢之地但固爾札野柴稀少若修建大城令多人居住不得柴薪兵丁不免拮据應於烏哈爾里克察罕烏蘇喀什崆吉期伯勒齊爾等處廣有樹木之地或近產煤之處多駐兵丁方屬有益請令阿桂另行詳視定議其海努克地方修一小城現有三百戶回子不使移動仍駐兵數百名以防西通哈薩克布魯特之路察罕烏蘇地方建小城池令種地一千名綠營兵丁居住以防哈薩克布魯特由河北所來之路馬兵於草青之時擇水草善處牧馬以便各路遠出巡防俟落雪旋回等款均如所奏辦理再修建城池雖據阿桂稱於壬午年夏季撥綠營兵一千名令其專修并令種地兵丁回子等暇時幫助一年限內完竣但現在伊犁駐兵俱係裁度該處收穫糧石數目方能定議若因築城復多派兵一千名該兵丁等到彼並不種地豈不糜費口糧計現在該處所有綠營兵丁種地回子及來年添撥綠營兵丁種地回子既有二千餘名應令於種地餘暇漸爲築城其二千人之力亦與一千人之力相等築城須定年限亦毋庸一時完竣應請令阿桂通融酌辦一

原奏內稱現議來年秋季增添一千名綠營兵丁種地而牲畜在所必需烏魯木齊所有換獲哈薩克馬六百餘匹雖經舒赫德奏備伊犁之用爲數尙有不敷嗣後再有換獲馬匹於來年草青之際令安泰等一併措辦千餘匹送來應用外哈密巴里坤上年撤回兵丁有無回交馬匹亦令行查鄂吉永甯處令備需用再由阿克蘇等處至伊犁有一千餘里兵丁撥移前來必須馱載牲畜雖據舒赫德具奏由烏魯木齊駝隻內調取三百隻但回子地方不宜駝隻秋季倒斃更甚現今烏魯木齊尙有駝七百隻請由安泰處擇五百隻於來年草青之時委員運送之便卽將一千名綠營兵丁所需農具一併措辦馱載前來將駝隻卽在伊犁牧放其阿克蘇等處應撥兵丁如需用駝隻卽將此項駝隻趕往應用等語查來年伊犁添駐兵丁必需馬匹駝隻應如阿桂所奏飭令安泰等現有馬匹委員送往來年伊犁添駐九百名綠營兵丁臣等議得應由阿克蘇派四百名由烏魯木齊派五百名旣經舒赫德將烏魯木齊駝隻調取三百則由阿克蘇派出四百之兵起程時卽着用此三百駝隻外烏魯木齊旣尙有駝七百餘隻亦如阿桂所奏擇五百隻令馱載一千人種地所需農具卽交此項五百兵帶往嗣後添撥伊犁種地兵丁卽就近由烏魯木齊等處現有兵丁內調撥可免由內地派出之煩等因奉 硃批帶領烏魯木齊兵丁前往時着派安泰餘依議欽此

乾隆三十一年七月將軍阿桂奏言新疆地方種地兵丁每名收穫十一石以上細糧將官兵議叙者原因初墾地畝之際示以優獎現在可耕之地雖肥瘠不一亦不甚懸殊全賴擇地引水勤力耕作果將力耕多收者加倍獎勵收穫懸殊而數年以來漸欠加增有收至細糧二十七石有餘者烏魯木齊等處每年每兵不過收至細糧十四五石雅爾即今塔爾巴哈台地方去歲每兵始收細糧十一石三處收穫

分數懸殊而官兵議叙纖毫無異今各處官兵俱經住定不比初種地畝之時宜將獎叙之例更定永遠遵行每名得細糧十一石除本處食用外計每名每日應得八合三勺尙不敷三人之需嗣後請停止議叙每名若收細糧十八石除本身食用尙可食養五人請照現在議叙之例給予議叙每兵若收至細糧二十八石除本身食用儘可食養八人請由現在議叙外再加獎勵給予議叙如此不惟奮勉種地官兵益相鼓勵而不甚奮勉種地官兵亦知奮勉實於官兵邊儲均屬有益等因奉 旨軍機大臣議奏欽此經軍機大臣議覆應如所奏嗣後種地兵丁每名收至細糧十一石者停止議叙每兵收至細糧十八石者仍照現在議叙之例給予議叙收至細糧二十八石者由現在議叙例外加倍議叙奉 旨依議欽此

乾隆四十七年四月將軍伊勒圖奏言從前因伊犁地方未有積貯糧石曾由屯田綠營兵丁三千內

除各項差使五百名每年令二千五百名種地納糧數年以來積貯之糧現在五十萬餘石足敷三年支放每年綠營兵丁并民人回子等所交之糧約可得十八萬石除一年支放外尙可餘二萬石每歲積貯糧石太多以至霉變似屬無益而兵丁等若不善爲操練亦屬無益請由屯田綠營二千五百名兵丁內撤出一千名令一千五百名種地一千五百名操練技勇如此每歲更換一半操練技勇新疆駐劄兵丁技藝嫻熟而一半兵丁每歲種地收穫若豐所得糧石卽敷支放倘遇稍歉之年積糧旣多儘可無虞奉 硃批知道了欽此

乾隆五十四年正月將軍保甯奏言查前任將軍伊犁倉貯之糧五十餘萬石積糧太多以至霉變似屬無益請由二千五百名種地兵丁內撤出一千名裁減十屯令一千五百名種地一千五百名操演技勇今數年所收穀石分數二十三四五分不等計每歲所收俱以二十四分爲準收穫四萬二千餘石再發交綠營種地爲民遣犯等交糧一千餘石回子等交糧九萬六千石及各倉斛面浮出之糧三千石一年共可得糧十四萬三千餘石現今伊犁一年支放共需糧十六萬六千餘石尙欠不敷糧二萬三千石俱由倉貯五十餘萬糧石內陸續填補現已剩糧三十餘萬石雖尙敷添放數十餘年但伊犁地處極邊若不稍備存貯餘糧倘偶有歉收或有需糧之事倉貯糧石不能接濟屬有關係理宜預

籌辦理由現在各差行走一千五百兵丁內留八百名照舊操練技勇充當各差外以七百名增設七屯令自來年種地計一年二十四分收穫可得糧一萬九千餘石此項糧石併現在回子等請添交糧四千餘石卽數每年支放所餘倉貯之糧三十餘萬石每年出陳易新並不至於霉變而倉中可得永遠備貯之糧如此酌籌辦理一年收穫足敷一年口糧其餘操演八百名兵丁亦敷充當各項差使奉硃批好事知道了欽此

嘉慶四年三月將軍保甯奏言綠營三千種地兵丁內令八百名操練當差二千二百名種地納糧如許來年仰賴 聖主洪福俱各豐收每歲除由綠營兵丁民人回子等所交穀石內支放官兵外尙餘糧一萬石有餘計現在各倉所存貯穀三十六萬石有餘足敷二年支放雖極邊之地積蓄官兵口糧益多益善但按年積累過多以致霉變亦似可惜理宜稍爲變通籌辦伏思極邊之地兵丁技勇所關緊要伊等雖更換種地乘暇操演究竟不能熟練今各倉既有永貯支放二年餘糧請由現在種地二千二百名兵丁內撤出四百名令一千八百名種地更換操練技勇再添兵四百名不惟每歲所收之糧支放仍復有餘而兵丁技藝亦可嫻熟奉 旨甚是着照所請辦理欽此

嘉慶九年二月將軍松筠奏言據署總兵納爾松阿呈報該十八屯所種地畝尙照原任將軍伊勒圖

所辦停歇章程仍令種十五屯地畝之處請示前來查此處地畝不似內地用糞各屯地畝俱係耕種一年停歇二三年耕種始得肥沃豐收起初綠營曾共耕種二十五屯後因替換停歇不敷於乾隆四十七年經前任將軍伊勒圖奏明倉中貯穀既多必至腐朽而邊疆地方操練兵丁亦屬緊要減去十屯撤出兵丁操演止種十五屯地畝一則爲操演兵丁再則因地畝久種不能肥沃欲使輾轉更換停歇是以如是酌籌辦理嗣於乾隆五十四年經前任將軍保甯以多貯穀石亦屬緊要奏准增添七屯共二十七屯耕種地畝嘉慶四年又經保甯以貯穀既多酌量裁撤兵丁令其操練奏准復裁減四屯此仍係因時籌辦今該署鎮納爾松阿以現在所種十八屯地畝請仍照從前替換停歇等情合而計之倉存穀石四十萬有餘其所請裁減者雖亦與從前伊勒圖定擬耕種十五屯地畝之數相符但停歇地畝亦不可不定年限從前經伊勒圖定擬耕種十五屯地畝後隔七年既經保甯奏明添種應如納爾松阿所請令暫裁三屯照舊耕種十五屯地畝嗣後不許停歇七年應令五年停歇限滿仍前添種現撤三屯兵丁照舊操演暇時令其修補各該城牆垣務使完整奉 硃批着照所請辦理欽此嘉慶十三年將軍松筠奏言前於嘉慶九年爲按照舊辦章程歇種地畝奏裁三屯摺內當經聲明歇屯五年限滿自十四年爲始卽應再加三屯耕種相應奏明劄行屯鎮總兵國興阿自十四年爲始照

例加種三屯奉 旨知道了欽此

嘉慶十年將軍松筠奏言伊犁塔爾奇地方向設水磨一座係綠營各屯攤撥弁兵輪流應役該弁兵等由倉領麥每年磨麵十餘萬斤以爲出差官兵及各項當差遣犯口食應用每年磨麵運麵不獨常川占用弁兵車輛而所磨之麵新陳相接夏熱之際不無發變每遇官兵等支領多致不堪食用竟屬兩無裨益查此項糧石本係伊犁回戶每年交糧十萬石每石加納三升斛面餘糧從前每年出差官兵及各項差役應支口糧原屬有盈無絀自乾隆五十年前任將軍保甯奏添惠遠城滿營烏鎗步甲四百名每年應需口糧支放以來皆係歷年積貯斛面餘糧至嘉慶八年舊存餘糧俱已儘數支放所有步甲月支口糧自嘉慶九年不得不於正項糧內支給如此年復一年必致存倉正項虧短實非慎重倉儲之道因思裁撤綠營磨麵運麵弁兵儘可分撥各屯加給籽種耕種自明年秋收爲始每年共可增交小麥六百石所有回戶交糧每石既有斛面三升而綠營屯工不交斛面殊覺偏袒應令屯工一體每石加交斛面三升每年又可增交小麥九百餘石合之每年回戶斛面餘糧三千石三共餘糧四千五百餘石通計每年通敷支放烏鎗步甲及出差官兵各項差役應領口食之需仍着糧餉處按年查明報部備案再查回戶交糧不獨每石加交斛面三升其每斛足數七十觔外尙有鼠耗至綠營

各屯交糧從前止交鼠耗並無斛面而其每斛觔秤竟至不如回糧觔秤足數支放實於官兵月支有礙今雖增交斛面其所有不敷觔秤仍應補交以足民食而歸實貯奉 旨據松筠奏酌裁水磨加增屯糧一摺其所稱裁撤水磨將綠營磨麵運麵兵丁分撥各屯種地納糧於官兵等較有裨益所奏似尙可行惟令綠營屯工於納糧時一體加交斛面並補足鼠耗觔秤之處雖係比照回戶一律辦理但亦須體察綠營各屯是否力能加納並恐開藉端勒索浮收之弊保甯在伊犁有年於該處情形素爲熟習著將松筠事宜悉心詳核妥議具奏欽此當經保甯議奏奉 上諭前據松筠奏酌裁水磨加增屯糧一摺因保甯前在伊犁年久熟悉該處情形發交核議茲據保甯詳議覆奏伊犁塔爾奇地方向設水磨派撥弁兵輪流磨運麥麵以給各項應差兵役口食今因麥麵陳積霉變該官兵等情願領麥易麵自係實在情形且撤出此項兵丁仍可分屯耕種增交麥石於倉儲亦有裨益著卽照松筠所奏行其請令綠營屯工交納糧石時與回戶一例加交斛面三升並補足觔秤之處綠營兵丁派撥屯田仍須兼習操防原與回戶專事種藝者有別所交糧石但應令其照原定斛額交足觔數若責令加交斛面三升恐丁力不免拮据且倉員等或藉詞勒索浮收尤易滋弊松筠所奏不可行至惠遠城滿營添設鳥鎗步甲每年支放口糧現於存貯正項倉糧內動用恐致日久短絀據保甯奏稱伊前任將軍

時因倉貯過多曾經奏准於屯田兵丁二千五百名內撤出四百名輪流操演原擬於數年後察看糧石盈絀再行酌辦今舊存餘糧既虞全數支放莫若於原撤屯兵內再量爲派撥分屯耕種每年所收糧石逐漸加增不惟官兵口食足敷支給倉貯亦可日臻饒裕等語保甯所議較爲妥協着卽照議行欽此

嘉慶九年將軍松筠奏言伊犁種地回子六千戶從前每年每戶交糧十六石通共每年交糧九萬六千石迨後生齒日繁添墾地畝於乾隆五十四年奏明又共續增交糧四千石是六千回戶四十餘年生齒倍加阿奇木伯克鄂羅木雜布懇借厄魯特游牧閒地暫給回子墾種以資生計現在仍自徧覓餘水設法開渠冀墾戈壁曠土殊屬急公因查遣屯地畝極多與其屯種有名無實莫若撥給回子耕作俾應納官糧盈餘卽可養贍家口庶於回子公私均得實惠詢之厄魯特總官等願將本年回子借種之地一併撥給又春稽地方有田二千餘畝亦准回子耕種鄂羅木雜布及伊什罕伯克等咸稱情願每年交納小麥二千石以供銅鉛廠夫口食奉 旨著照所請將喀什河南遣屯地畝改撥伊犁種地之六千回戶耕種仍將本年回子借種厄魯特之地一併撥給其春稽地方有田二千餘畝亦準回子耕種每年交納小麥二千石以供銅鉛廠夫口食欽此

請於南路雇募民苗稟

王子

胡林翼

受篆以來夙夜恐懼思維防堵外匪宜先清除內盜奉行保甲團練之法建設卡房四百三十五處派民夫四名十名至二十名不等分班輪守逐月委員及老成紳士分帶練勇百五十餘名徧歷各鄉勸諭巡查周而復始迄今半載有餘所費不過四千六百金業已自行捐辦盜首楊浪子等次第翦除分別懲處居民稍爲安堵行旅稍爲無虞聞近日懷遠融縣羅城土匪或百餘或二三百不等水陸梗塞大年河以下行李戒嚴詢之遣發回營兵丁往來探卒劫奪之案不一而足如不及早設備賊一得勢禍在門戶固不待洪逆一股竄入黎平始爲可慮也現今洪逆竄入昭平而梧州之波山匪黨又復停泊戎墟一帶勢頗猖獗蟻聚蜂屯已成流寇伎倆其西則潯武一帶所在村莊上年劫掠一空糧食已盡必不致復投舊巢其南則順流而下與粵東逼近兩廣徐制憲已握重兵於高廉截其竄路其東北與楚接壤兩湖程制憲已調兵紮守衡州新舊兩提督分駐永全交界扼要處所辰沅永靖道早已移駐靖州分兵扼守開泰通道交界之大信屯以壯聲援惟西北一隅守禦尙虛不獨我黎平無備卽粵之義甯懷遠羅融等州縣皆無備也粵匪零星股數甚多總不出流剽故智目前之小股卽異日之大股目前之小盜卽異日之大寇爲今之計籌兵籌餉其急務矣顧兵不能戰又不能守怯於公戰勇於私鬪粵西軍餉豐北大工內帑

屢發勢將不繼而黎平與粵西各要隘交界橫亘二百餘里滇黔兩省調往兵丁及往來文報均由此經過實爲往來通衢視他處尤爲緊要卽調兵一千尙恐不能分布防守每兵一名例支行裝銀二兩日給口糧米八合三勺鹽菜銀三分隨行帳房鑼鍋鋤鑿斧鋤衣服鞋襪軍器等物歷次新章令自雇長夫每兵每日給銀五分而仍不自雇夫役一槩取索於地方查三十年黎平防堵調兵三千名爲期三月有餘每兵每日給長夫一名折銀五分外尙用夫役至六萬餘名其時民苗疲苦怨嘆有兵來不如賊來之語加以帶兵運糧文武員弁隨丁官役月支鹽菜折馬等費銀兩尙屬不支此外稿房備弁方且眈眈然日取軍需舊例百方求索滋擾不堪地方官因辦兵差軍需請領帑項復任意列款流攤又不下數千萬兩計調兵一千名每月口糧米價銀二百四十九兩鹽菜銀九百兩兵丁長夫銀一千五百兩加以暫支之行裝二千兩文武員弁跟丁月支銀兩兵丁例外犒賞各費初次一月總須六千兩有奇二月以後除去行裝亦須四千兩有奇而需索夫役每名仍須用至一名二名不等巡徼於十里二十里之外非官爲覓夫應役卽一步不行尙且不過虛張聲勢徒守空營不能浚濠築塹屹立天險眞有所恃而無恐也韓子云徵兵滿萬不如招募數千計惟有於南路與粵接壤之鄉寨中雇募精壯民苗一千名擇諳練紳士統之與以鋤鋤耨掘擇緊要隘口如八樂廣梅坳水口雲洞等處築立土堡守之每日抽一二時仍編成行

伍課其技藝使知且戰且守之法民無裹脇之虞賊無闖入之勢堡成之後聲威既定民心益固彼時每堡只須三五十人守之練丁尙可酌量裁減不必定須取盈一千也大率鄉兵一名每日須給米一升工價錢四十文合銀三分五釐用鄉兵一千每日連米價合計須銀三十五兩每月需銀一千零五十兩如倉穀可以撥動或於古州下江水脚利便處碾運則除去口糧米價銀四百五十兩每月只須工價銀六百兩又造製器械旗幟購備竹木繩索及委員紳士薪水並盤查奸細犒賞等費至多不過二三百兩每月所用總不過一千兩較之調兵一千實省四分之三而功效倍之而又無徵調遣發之煩土著之民保護鄉里其情既切其勇自倍節浮費而收實效計無有善於此者

松郡民團經久芻議

咸豐十年七月

賈履上

夫軍伍隳而招鄉勇鄉勇壞而練民團此皆權宜苟且倉猝不得已之謀未可以爲經久也欲圖經久計惟舉國家兵制脩而復之無如增兵難籌餉尤難十餘年來頭會箕斂江蘇一省歲幣八百萬緡曾不敷南北大營之用今蘇松失陷州縣殘破殆盡矣糧且不能給何論乎餉餉既不能支何望乎兵於是擇費之暫者而爲招募又取其費之無者而爲團練且以團練較招募則可散可聚能發能收井里相依非招集流亡之輩身家各保非騷城市之徒聖人有金城自宜永固雖然未可以爲經久也夫民生去三

代遠寓兵於農之法誰復知之今急而相求爲上者勸諭之不遑爲下者支持之不力卽有一二紳商捐資首創亦豈徒爲保守計哉特爲將來減免錢漕地耳欲團練而不減免無以號召人心因團練而竟減免無以輸將官賦求其萬全而無害莫如屯田或曰屯田者開墾之官田也今田在民而不在官屯於何所竊謂四封之外不少閒田正供之外不少私斂請就松郡廳縣而論之松郡東南濱海西北沿江濱海沿江皆有沙洲漲出舊例止憑業戶報稅陞科前年始奉 旨召買田有肥瘠值有多寡吏胥上下爲奸於 國課未益毫末而買戶已擾累不堪何若以此沙洲悉數入官召屯耕種卽爲民兵屯不取賦兵不給糧有事調用而不用命治以軍法并奪之田使之趨利而不避害自然足恃此沙洲之可屯者也外若鹽場沙磧內地之漲灘不能召屯而利轉厚則計所入以養游兵兵額亦可增益再若漕運軍屯舊以給運丁者今旣無需曷弗計畝籍兵與屯田一律照辦如此則閒田私斂之在官在民悉無虛耗而增兵籌餉兩得其宜矣或曰古之屯田以兵爲民也今欲以民爲兵而團不成團練不成練安見其可竊謂屯田法立以時訓練自有常經第就目前豈無可使卽如奉賢境之私梟南匯境之棚民上海境之草泥固率皆千百爲羣勇於私鬪苟能出力打仗許之世守其業彼亦何懼而不從乎或又曰屯田始於漢之趙充國爲邊防久遠計也今之流寇所在焚掠一空飄忽盡散非邊防比何必舉田賦軍額而更張之設更法

立弊生咎將安在竊謂 盛朝承平二百餘年文恬武嬉習爲疲軟以致盜賊蠭起所過爲墟其到蘇松拒守者獨上海一縣耳猶且賴外援爲助則團練經久烏可不亟講求哉且賊卽退矣而逃兵潰勇其從賊去賊反覆百端者又不知凡幾此後殲除醜類搜捕土匪非團練屯田兵之是恃而奚恃況有屯田以抵兵餉則正額之兵餉亦可酌裁以抵屯租 國家經費有常要在因時制宜期於實濟而已見聞所及輒擬芻言以備當事者之采擇云

裁屯田議

馮桂芬

夫子論道國曰節用孟子曰無政事則財用不足所謂政事者用所當用節所不當用而已比者軍興十餘歲常賦不供雖 上方服御所需亦多停罷不可謂不節矣而各路徵兵召勇饋餉之數日增月益在事者相與旁皇憂念不知爲計當此艱難支絀之秋豈有以 國家自有之財轉棄之冗散無事之地黃金虛擲數累鉅萬而不少加愛惜哉竊於漕運弁丁支款以及屯田租息而不能無疑也衛所之制創自前明今之運丁卽前明之軍始以有罪遣戍著籍防守月給軍糧非爲漕運設也厥後各軍撥墾荒田令輸籽粒於月糧內扣抵遂編爲屯軍與營軍爲二無事則資挽運有事則資調遣亦非專辦漕運 國朝屯軍次第裁汰屯田歸併州縣承佃辦賦惟有漕運之地隸衛所如故謂之贍運屯田於是乎衛弁運丁

屯田始專爲漕運而設當時國用充盈體大物博但資其飛挽之力卽亦不苛細微迨後日久弊生習焉不覺至今日而害斯衆著約而言之可疑者迨非一端運丁於田租養贍之外每屆兌運行月耗贈銀米列入正款者每船幾及米二百石銀二百兩之多而猶以爲未足輒向州縣勒索幫費遠過於商賈陸運貨物之值州縣藉口浮收勒折以給之司倉人等復利其厚獲還相魚肉悖入悖出皆運丁爲之關鍵坐令漕務敗壞決裂此可疑者一也守備千總亦武職不令之操演不令之管帶漕標各兵乃令守備徵糧理訟參錯州縣之間以分其權又令千總押運而運事轉以丁爲主王氏芭孫有云其強者與丁爲狼狽其弱者受丁之指揮屬之漕督而漕督相懸數千里屬之糧道而糧道相懸數百里屬之所在知府而知府又以武職外之旣無考核又無鼓勵此可疑者二也運丁之始卽水手也康熙三十五年定募軍之法特以爲水手之長耳何以旣有運丁又別雇築黠無賴習教之徒充當頭舵水手擾害民間嘉慶道光中疊釀巨案猶幸江浙停運在先金陵失守在後不與賊合然資遣未盡者猶以千計吳民苦之數年始息此可疑者三也糧艘所容不過數百石與中號江船等而船身之重滯行走之艱澀無出其右此可疑者四也因思舊制以衛領軍以屯養軍而以軍挽運法非不善今則漕事專責之運丁安用衛爲費用盡取之州縣安用屯爲挽運別付之水手安用丁爲名實全乖舉非其舊以不文不武之官領不農不賈之

民別樹一幟天下冗員游手莫甚於是蓋不待今日而論者莫不謂欲清漕務首革衛弁運丁矣蘇省自道光二十七年停運以來不特衛弁薪俸按年支領卽苦蓋月糧初亦照例減半發給屯租更如常徵收在有司例與之而不以爲嫌在若輩例取之而不以爲感馴至粵匪難作而後已竊計數年中弁丁安坐無事糜費國帑殆不止千萬之數卽以上下兩江屯田租息一項言之江淮衛等凡二十三衛額定六十餘幫船三千八百餘隻惟江淮興武二幫坐資津貼並無屯田著名瘠苦此外江蘇之蘇州衛等安徽之新宣衛等共二十一衛計屯田二百三十餘萬畝此項田畝康熙八年湖廣有清釐之案二十三年江西有清釐之案皆輾轉典賣或贖回或助費分別辦理似已有彌縫補苴之意迄今年代更遠弊必益甚嘉慶間松江府志稱裁併典田頭緒繁多而坐落鄉圖具在足爲運丁身家之一助卽現在蘇省各屬多有屯田散布境內各衛時因催租之案與州縣交涉是屯田非盡無着之據湖廣江西情形想亦無異但將已無者槩免究追現有者盡數交納或召變或徵租十得三四尙不失爲巨款於度支不無小補現在海運行之十餘年尙爲利濟自難亟議更張卽使肅清之後謂海運非久長之策重議河運或招商或採辦或轉駁或改造駁船或雇用民船以所省漕項銀兩給丁各米益以屯租何事不可辦斷不議重造前此笨滯船隻重招前此獷頑水手重任前此不諳轉輸專爲姦利之弁丁此可以理決者旣已不可復用

似宜早爲之所蘇省被難以來弁丁輾轉流離無復生計一經克復勢且環求調劑安得閒款給此閒人若不及今裁汰直國家一大累矣夫使經費足支存之無損於毫末不裁可也而經費如此其絀又使爲數無幾去之無關於重輕不裁可也而爲數如此其鉅又使弁丁於漕運雖不能無弊尙有不可無之一說不裁可也而弁丁於漕運非但可無直不可有然則爲今日計惟有請將江南湖廣江西各衛裁撤其守備千總各官調營序補銷除屯丁冊籍查明現有之屯田儘數歸官俾帑藏不致虛糜綜核名實之道實在於是至漕督亦在可省之數惟考漕營始於明隆慶間漕撫方廉爲備倭患而設今情事正同淮安一帶距省會率一二千里自須督撫大員坐鎮俟南北肅清再議歸併督撫爲便

奉 旨籌撥甘省糧臺暨新疆餉項疏

駱秉章

竊臣於同治四年八月初七日承准軍機大臣字寄同治四年七月二十日奉 上諭前諭駱秉章將原撥新疆餉銀二十一萬兩解交陝甘總督就近轉變成祿聯捷等應用此項餉銀係該提督等出關勦賊急需之項駱秉章素顧大局諒必尅日飭司批解以濟要需等因欽此八月十一日又奉七月二十一日寄 諭楊能格請飭四川於地丁項下或津貼項下每月指定徑解慶陽糧台餉銀五萬兩卽著駱秉章督飭藩司竭力籌畫酌定數目按月專解慶陽糧台以供支放不得以協甘餉銀牽混統解等因欽此竊

惟西陲疊次告警甘肅回逆未平但使川省力能接濟臣曷敢不殫精籌畫伏查川省地丁歲征六十餘萬兩合之課稅等項每歲所入本不敷每年例支之數向須外省協濟軍興以來自咸豐四年始於今丁之外加收津貼每歲所入亦僅五十餘萬兩迨至本省用兵餉項更形支絀復辦釐金仍不敷用不得已而連年勸諭民間捐輸至再至三民力已竭現在腹地雖漸肅清邊防仍形吃緊勇不能撤餉卽無可裁減以致各營積欠甚鉅兼以撥軍越勦黔匪此後籌辦滇事兵餉仍恃川省接濟前派鶴齡帶川兵一千五百餘員名赴甘每月餉需七千餘兩亦由川省按月撥解羅掘既空庫藏已毫無儲蓄徵求無已皆取資於民深有竭澤而漁之慮此川省欸項竭蹶之情形也以甘省軍事而論統帥既多人人可以專摺奏事事權不一各自成軍自行請餉此營指撥者未解彼營告急者復來或請提釐金或請定專欸或請每月按數撥解不惟應接不暇亦幾無所適從究之甘省既無總統大員諸軍漫無節制進止機宜無所稟承偶有勝負功過亦未能核實賞罰難期必當彼此既不相轄祇能自顧一隅未遑統籌全局此師久所以無功也歷觀往事凡兵柄不歸主帥諸將各自爲謀未有能集事者卽如唐時九節度之師不能制勝於相州似此者史不絕書可爲鑒戒況各營勇數太多旋集旋潰隨散隨招如陶茂林雷正綰之潰勇竄擾陝境至煩兵力兜勦其闖入川界者亦紛至沓來勦賊既難期得力散蔓且貽累地方以前之餉概歸

虛糜新集之衆又待支給現在用兵暨辦防各省自籌項餉已屬力盡筋疲即使勉強湊解協甘之餉各營勢難週贍竊慮終歸譁潰爲今之計亟宜先裁無用之游勇以節冒濫之餉需然後簡練精銳併歸統帥調度以專責成所有餉項胥由糧台總司支發酌其緩急以資飽騰自能所向成功回氛以次埽蕩甘省可冀底定至回疆警報疊至朝廷固不能置之度外然揆時度勢實有鞭長莫及者溯查道光六年新疆南路四城之役其時不但內地無事各省庫儲充裕卽關外哈密烏魯木齊等處皆係完善之區自蘭州以至阿克蘇沿途節節設立糧台由甘省各州縣動碾倉麥並採買民間糧糈購備駝隻轉運出關源源接濟用餉至二千餘萬兩之多目今安能籌此巨款無論川省指撥之款萬難一時湊齊兼以自川赴甘沿途散勇搶掠不免時有梗阻即使尅期如數解到成祿聯捷等由甘涼肅轉戰而前竊計尙未出關而軍餉又已告匱矣卽或河西無阻得以長驅出塞再加以山西畫撥之餉亦祇此餉銀數十萬兩斷不數數千里行軍之費縱有續解之款杯水車薪於事無濟兼之甘省遍地糜爛民間搜括已空臣前接陝甘督臣楊岳斌亟稱所部勇丁甫入甘境預派委員攜銀各處辦糧竟不得食以數千之衆在甘省內地且難謀宿飽況關外情形沙漠阻絕有銀無處購糧雖有勁旅亦難枵腹遠征是以征調之師如鮑超蔣凝學等所部一聞調赴新疆中途輒卽潰散卽現在甘省各營亦難保不憚於出塞潛懷觀望未肯速

將甘省腹地肅清藉此以爲遷延地步更慮關外請餉甚急屢奉 諭旨飭催各省悉索無遺內地有事轉致束手則貽誤更非淺鮮是回疆不靖雖敵愾同仇必待各省肅清始能籌出關鉅餉必待甘省肅清然後可以辦運軍糧此又事勢所必然者也此時各省凡經賊擾之區防堵未鬆似宜先顧內地不可分其既竭之力以致本省不能自支即使稍爲挹注師未成行餉已糜費剝肉並不能醫瘡於西陲兵事實屬無益固不獨四川力有未逮也並伏讀寄 諭有借俄兵助剿一節臣雖未悉其詳竊爲俄國爲外夷之雄長現今坐視各國強弱其用心正不可測若向其借助兵餉不但於 國體有關更不可不熟慮其後 聖明白能遠燭固不待臣下喋喋瀆陳臣知識椎魯老病浸尋何敢侈談兵事惟念深荷 殊恩涓埃未報芻蕘之獻冀効一得之愚用敢冒昧縷陳於 聖主之前川省現已籌解甘餉二萬兩因沿途游勇搶掠尙須設法匯兌遵照 諭旨解交陝西藩庫又籌銀二萬兩設法解交陝甘督臣收存以爲西路用兵之費此後惟有竭力勉籌實難預擬定數所有奉 旨籌撥新疆暨慶陽糧台餉項緣由恭摺由驛覆奏



皇朝經世文續編卷六十六目錄

兵政五 屯餉下

礦政

薛福成

條陳時事六則

錄請開中鹽一則

葛士達

請撥給滿營弁兵隨缺地畝疏

恭鏜

請試開煤窰照章抽釐片

銘安
玉亮

奏推屯於練並籌樹藝情形疏

林肇元

籌議晉省口外屯墾情形疏

剛毅

奏爲餉欸艱難新疆南北急需屯田以裕邊儲疏

附新疆屯田事宜清單
戶部

新世文新編卷六十六

新世文新編卷六十六

新世文新編卷六十六

新世文新編卷六十六

新世文新編卷六十六

新世文新編卷六十六

新世文新編卷六十六

新世文新編卷六十六

新世文新編卷六十六

新世文新編卷六十六

新世文新編卷六十六

新世文新編卷六十六

新世文新編卷六十六

新世文新編卷六十六

新世文新編卷六十六

新世文新編卷六十六

皇朝經世文續編卷六十六

上海葛士濬子源輯

兵政五

屯餉下

礦政

薛福成

今天下日趨於貧之故大端有二一則商務不盛利輸於外猶水之漸洩而人不知也一則礦政未修貨棄於地猶水之漸涸而人不知也蓋天地生人養人之具火化之用莫大乎煤轉移之用器械之用莫大乎五金此中外不易之勢也中國於取煤之法雖研之未精而民間猶或務之其取五金之法則廢而不講久矣周禮卅人一官掌金玉錫石之地若以時取之則物其地圖而授之知古聖人經緯天下所以爲斯民利用厚生者籌之蓋詳漢書地理志州郡有銅官鐵官者凡數十處迄於唐宋未嘗不採取五金其事時見於史傳自明之晚季以礦稅爲厚斂之端官豎四出徵求無藝有司因之苛派百姓海內騷然當時旣受其弊後世遂相戒不敢復議此礦政所以不修也近數百年來天地菁英之氣鬱而不發鄉曲土豪與無業遊民遂敢糾黨開礦作奸犯科抗拒官吏幸而逐之當事者慮其易聚難散不得不封閉礦硯垂爲厲禁而礦政益以不修矣由前之說弊在所任非人藉其名以漁利而並無其實固不當因噎而廢

食也由後之說弊在委棄寶藏故玩法者欲起而攘之將防玩法之民先收自然之利苟上有治之之法而民自難遁於法之外也然而猶有狃於故見而或疑爲多事者亦可謂不審於時與勢之宜者矣夫民於五金之用一日不可缺一人不可無今以天下之大而所用銅鐵皆仰給外洋至於金銀如英美所屬之新舊金山每歲出於礦者數千萬奚啻取之如泥沙中國無生之道僅以古昔所有互相轉輸又已用之盡鎔銖通商以來僅三十年而外國日富中國日貧復數十年則益不可支矣是可籌所以振之哉且中國礦產之饒甲於地球諸國苟善取而善用之固大可爲之資也而論採取之道則官商分辨之外惟礦屯一法爲最善何以言之今天下額設綠營之外每省各有防營無事坐食旣糜巨餉去之又不足以建威銷萌益示弱於鄰敵是以新疆之豫軍畿輔之淮軍莫不經理屯田以裨軍食其他如河防水利礮臺城垣諸工亦往往借助於各營此誠撙節財用酌劑盈虛之要道也竊聞西南滇黔楚粵隴蜀諸省五金並產寶氣充積誠擇礦苗最旺之山每省先撥一二營試行採鍊於以創開風氣逐漸推廣有大利焉向聞傭工開礦一人所獲每數一人之食如得佳礦卽有贏餘營勇開礦計每丁終歲所獲卽不能抵所支之餉如或僅抵十之五六亦可省營餉之半也若礦屯漸多卽所節甚鉅其利一勇丁游閒無事浸至習成驕惰騷動閭閻今於操練之餘課以礦務使之勤動於山谷之間猶得葆其樸勇之氣其利二

礦產皆在窮巖絕嶠遼廓之區於此分屯各營則苗蠻有懾服之心客匪絕佔踞之望其利三官商開礦籌本最艱本之難籌尤以工費爲大宗營勇有額支之餉經始之初祇須購求機器延訂礦師成本既輕事乃易集其利四礦務既興則運送必有舟車淘鍊必有工匠未始非小民謀食之資其利五無論金銀銅鐵中國之所出漸多則外洋之來者漸少一年計之而不足數十年計之而有餘其利六有此六利則礦屯之舉尤勝於官商之經營也審矣若夫選將領擇官吏聯民情定規制則恃乎各省大吏之體察情勢訪求人材視其意之輕重而效之大小判焉昔宋蘇軾治徐州以利國監爲鐵官商賈所聚凡三十六冶冶各百餘人採礦伐炭多強力驚忍之民欲使冶戶各出十人籍其名於官授以刀槩教之擊刺每月庭集而閱試之以待大盜此寓強於富之術也而礦屯之說則足以寓富於強推而行之富一方可富天下亦可譬猶導水者之引其泉將滾滾而不竭也而豈有涓涸之患也哉

條陳時事六則

錄請開中鹽一則

葛士達

一開中鹽通軍市以裕西餉也新疆甫復逆回尙多俄邦伺釁構難用兵正無已時萬里懸軍冰天絕徼非飽騰無以養戰士之氣非重賞無以羅奇異之材當此度支不裕防務吃緊擲東補西殊非持久之計竊議將山西河東鹽池及甘肅花馬池蒙古阿拉善王鹽池近於西邊者概令倣宋開中鹽法令商納粟

邊關計穀給引任其販賣由陝西西安甘肅肅州置倉收穀西安入穀一石五斗給引一紙肅州八穀一石給引一紙或能捐助軍械及雇丁於塞下墾荒亦視其所捐之數及納租穀數酌給鹽引既省輸挽之勞藉實邊軍之食再考戰國時李牧守邊軍市租皆以犒士不稽出入故士皆用命 國初前大將軍年經略西邊往往遣其所親販賣各貨至彼銷售以其贏餘爲軍前犒賞之資故其帳下能羅致奇材異能之士得其死力卒以成功邊徼用兵非寬宏博大無由展布今古皆然擬請飭令 欽差大臣左招募安實富商連環互保酌給資本令其販運茶葉大黃布帛及民間軍前以至口外各徇所需貨物至彼銷售一路關卡由大營給予切實路票免其釐稅既售之後酌提其餘息以充餉餽犒賞之資以上二者果能實力施行俾萬里孤軍不至顧前慮後帥臣得畢志以經營軍士皆忘身以殺賊必於防務大有裨益

請撥給滿營弁兵隨缺地畝疏

光緒七年

恭 鏜

竊查烏魯木齊各屬向係綠營屯田完繳租糧以供滿營食用詳推立法初意原使滿營弁兵專練藝以成精銳無如日久弊生該弁兵等不惟鄙棄農工漸亦不嫻武事是予以寬閑之日正長其懶惰之心轉不如兼辦屯田尙能練習勞苦也坐食粗糧每年止有此數設遇餉項缺乏不免凍餒之虞若自行屯田但能實心經理不憚勤勞收穫尙可倍蓰實有裨於生計烏城滿營舊存弁兵及奴才由南路招集弁兵

向均不諳稼穡屢飭該協佐防校等督率兵丁認真屯田以除坐食積習當可漸收實效惟思此項地畝非制爲定數不足爲久遠之謨非分給本人恐易啟推諉之漸近來餉項支絀滿營拮据似應酌量授田以爲務本之計查奉天及吉林之雙城堡滿營弁兵均有隨缺地畝近日三姓地方亦經吉林將軍銘安等奏請照辦實爲根本至計烏城滿營事同一律自可仿照辦理除都統領隊業經另摺請加公費毋庸再撥地畝外奴才擬請撥給協領輕車都尉隨缺地畝每員二百四十畝佐領騎都尉每員二百畝主事每員一百八十畝防禦雲騎尉每員一百六十畝驍騎校恩騎尉部缺筆帖式每員一百四十畝前鋒校委筆帖式每員一百二十畝前鋒催總領催每名一百二十畝馬兵每名八十畝砲手匠役匠步軍養育兵每名六十畝均於舊滿城內外暨新滿城附近地畝照數撥給現在弁兵無多所撥地畝固屬綽有餘裕將來遷移巴里坤等處弁兵聚族而居如兩城附近地畝不敷卽於奴才五年秋間奏明新開南山富順渠地內量爲添撥仍不至侵佔民田將來籌辦之時畫定界址設立封堆永爲定制並嚴禁與民爭水爭地免滋事端合無仰懇 天恩俯念該員弁兵丁等駐防遠塞困苦異常 允令撥給隨缺地畝俾得於騎射之餘兼勤稼穡藉以津貼辦公似於旗務有裨

請試開煤窯照章抽釐疏

光緒九年

銘安
玉亮

前因吉省經費支絀擬請試開煤窰抽釐裕餉當經酌擬釐章 奏明招商先後試開石碑嶺大石頂子等十處煤窰暨酌改舊有煤窰三處從前課章與新添煤窰一律派員稽查抽收釐稅等因在案茲據商人劉振東尙宗錡具呈續領荒山子長嶺子二處煤窰均見有煤線堪以開採等情當卽派令縣丞繆誦芬佐領花哩雅遜勘驗荒山子候補巡檢高曾蔭騎都尉德凌阿勘驗長嶺子等處去後旋據稟稱該二處煤線顯露堪以開採與禁山風水實無關礙取具山主四隣情願招商甘結繪圖貼說加結具報前來奴才等卽飭總理煤窰事務副都統銜花翎協領富爾丹掌工司關防二品頂戴花翎協領全福等酌核招商茲據稟稱續招商民劉振東承領荒山子尙宗錡承領長嶺子等處煤窰均係土著殷實陳民取有切保等情稟覆前來奴才等詳查吉省舊有煤窰三座先後續煤窰十座內有陶家屯商人張福永呈報無煤另行照例具 題外連今新添煤窰二座共十四座所有舊有續添試採煤窰稽查抽釐等事仍照前擬成章一律辦理

奏推屯於練設法開墾並籌樹藝情形疏

光緒九年

林肇元

黔省前辦善後當將逆絕各產一律清查招墾迄今十有餘年生聚尙未盡臻煩庶土地仍不免有荒棄固緣僻在邊徼資用維艱亦因地實苦寒招徠不易查大學士直隸督臣李鴻章前辦津沽防務並令該

弁兵等操練餘閒在於駐札沿海一帶開墾田畝播種稻禾成熟至數萬頃大學士前陝甘督臣左宗棠則於廓清關隴而後自涇州以至玉門沿途屯戍之兵悉令就地耕耨兵食以足臣思黔屬遙瘠利之所在田土而外尤在山林不得不於開墾之中並籌樹藝現同善後局司道再四籌商擬請推屯之法於練凡練軍駐札之處操防巡緝是其專責暇則責成管帶官弁督令將附近荒地設法試行開墾其有不能開墾成田之地卽令分別土宜樹以桐漆桑棉麻葛烟茶等類酌定年限效驗藉以課統率之勤否所有一切章程俱參酌津沽關隴成法審時度地權宜試辦至墾荒規則陝西前辦營田刊有條目不難斟酌仿行一俟辦有端倪再行詳細奏咨以備考核所有推屯於練設法開墾並籌樹藝試辦情形謹附片陳明

籌議晉省口外屯墾情形疏

光緒十二年

剛毅

竊臣承准軍機大臣字寄光緒十二年三月二十一日奉 上諭巴燕岱領隊大臣長庚奏稱西北河勤泰山宜早防守躔金等處宜開屯田等語該大臣於邊隘地勢向稱熟悉所稱各節不無可採着劉錦棠譚鍾麟鹿傳霖剛毅按照該大臣所奏體察地勢情形詳細規畫妥議具奏等因欽此寄 諭到臣伏查躔金係屬晉邊所有議興屯田事宜自應由臣察度籌辦當經藩臬兩司暨歸綏道遵照一面委令薩拉

齊同知徐秋馳往履勘茲據稟稱鹽金卽臺吉地屬河北外套係伊克照盟所屬之達拉特杭錦兩旗牧界西至烏拉河東二百五十餘里東至烏拉特地界二百八十九里北至黃河舊道南至現行黃河自二百餘里至一百四五十里不等坐落西北斜向東南袤長五百餘里平川廣漠一望無垠正北狼山迤西紅山卽黃河舊道由南北行折而迤南迤東之處則東大余太什拉干烏拉前山後山峯巒湊接氣勢迴合續而不斷由西而東漸就收縮此鹽金一帶山勢地向之大略也套外地勢西南高而東北低溯查康熙以前河行北道並無水利自改行南道蒙古始令素與交易之商租種分佃卽就黃水冲刷低窪處所因利乘便修成渠道西則鹽金計共五渠東則土人名爲後套計共三渠紆迴約二百里中間支渠曲折蜿蜒不可枚數而餘水仍可退至河之舊道由東北折向西南繞過烏拉前山之西山嘴歸入南河土本膏腴渠又順利麥谷黍稷種無不宜以故山陝直隸無業之民從前承佃到此均能自立生業此套外一帶水利土宜之大略也達拉旗牧界內臺吉波羅塔拉地方道光八年曾奉諭旨准其租給商種五年抵還債項等因欽此欽遵在案嗣後續接相沿奉部文而承種者有之由臺吉而私放者有之由各廟喇嘛而公放者有之開墾甚多至同治初年甘回逼擾寧夏鹽金附近各商分立仁義禮智信五社辦理團練以資安輯迨後防剿各軍駐紮防堵或設臺轉輸各商分辨運糧致荒本業渠道旋壞不復疏濬輾轉

陵夷止存一二老名巨商不忍拋棄基業力耕自給而土人所稱後套地方商人其時尙復不少迨光緒二年遭馬賊蹂躪不特鹽金之僻東西陲者牛壩商號不過數家卽後套左右亦不過二百餘家頽垣廢堵觸處皆然該處土本紅爐利於澆灌現在失所旣久土質堅硬紅柳及織機草枸杞樹等茂然成林幾無蹊徑聞咸豐年間達旗歲收租銀不下十萬近歲所收租錢不及三千串文其空乏已可槩見此拉特旗套外地界今昔衰旺懸殊之大略也今若於該處議設屯政則險要藉以扼地利藉以復蒙旗藉以贍誠如原奏所云於時局不無裨益等情稟請察核前來臣伏念鹽金一帶地近塞城遠拱京畿形勢所關不獨爲晉省緊要邊防實亦中外吃重關鍵誠能及時籌議屯政無事則固吾邊圉免爲逋逃淵藪有事則防敵伺隙便於控制事機策誠至善第該旗牧地歷經奉旨准其租種抵債以及養育閑散備辦公費等項與他處蒙古無著閑田不同臣閱伍至薩拉齊之包頭伊克昭正盟長固山貝子札那吉爾迪來見面與籌商據稱該盟達拉特等旗聞有是議率皆懽忻鼓舞無非私冀開屯後上可以急公者報答朝廷之深恩下可以沾利者稍裕身家之生計惟是辦理之初仍當明示各旗俾曉然於此舉固爲彈壓地方亦爲體恤蒙古無論如何辦理必因其俗不易其宜斷不使該旗牧界日久歸於民人蒙無可疑且有所利庶一切不致窒礙至目前議屯先務其要約有三端一曰分段套外西則鹽金和永牛壩上下

東則後套沙忽廟左右均屬適中之地於此分爲三段撥兵一千躋金正紮三百二道壩渠以西分紮二沙湖爾廟正紮三百西山嘴南哈本爾合少北分紮二百且耕且練西可以聯絡甘涼隴秦之聲氣東可以聯絡余太現紮之馬營每兵一名給田五十畝計需田五百頃並給牛種先就易開之渠督兵挑修通暢以後兵農兩便兵則耕種自食由營官經理其餘地畝悉由蒙古商人按照向規辦理以仍其舊惟兵屯地段如西山嘴哈木爾台少北等須就近借撥烏拉特地其餘各就近借撥杭錦達拉特地以資分撥一曰修渠套外渠道達拉特杭錦二旗爲最多此外則烏拉特中旗界內大余太昭有山水一道向來賣水澆地寬窄不過二十里兩旗界內西山嘴南有珊瑚灣河道無庸另開大渠止須於灣之東北建築一壩多開支渠則烏拉前山之前全可澆灌西口界內有烏拉河渠一道係藉黃河北流舊道之口引水澆地曩係商人自開各旗領租若開商屯應將躋金後套各渠官爲修濬通利其各處舊商界內支渠仍責成各商修理務臻一律順暢以利引澆如此則商既易於招徠蒙又多獲租價將來或再於尋常租價外酌加商人二成交官名曰地糧以資公費其租價多寡仍由蒙商自行定價不准抑勒一曰設官套外地方連烏拉特三旗牧界合算東西袤延七八百里南北斜寬二百里至三百六七十里不等蒙地界址商民不能深悉向年租種者往往此招彼逐致啟爭端今既議開屯墾則事務日煩該處距薩廳甚遠勢難

兼顧俟辦有端倪擬另設文武官各一員駐紮鹽金專理兵屯商屯事務其設官經費卽取給於地糧二成免耗公帑遇有屯兵滋事卽會同營員辦理如商欠租暨蒙人逐佃官爲分別訊理免致構釁以上三端不過將見聞所及撮其大綱至屯墾詳細事宜必俟奉准開辦時再行條議具奏但其間尙有爲難情形亦不能不先時預計者是舉也事屬創始需用浩煩庫乏積儲經費無出則籌款難開辦必自兵屯始口外地方遼闊現有之練軍均駐要隘無可抽調則撥兵難該處係達拉杭錦烏拉特等旗牧地必須籌商畫一方可通融屯墾則借地難臣愚以爲欲於此數難中勉籌辦法計惟有裁撤樹軍另行挑練屯軍以所節之餉爲開屯之資庶期兩得查樹軍歲需餉銀八萬四千餘兩臣現咨照大同鎮總兵張樹屏查照遣撤湖軍章程厚給資糧分起護送回籍計歲省銀八萬四千餘兩擬仿練章於大同鎮屬額兵內挑兵千名作爲屯軍歲需薪糧及加練軍餉乾銀二萬八千餘兩尙餘銀五萬六千餘兩卽作屯費尙可無庸別籌如將來屯務得手屯餉等項均有所出卽將節省樹軍全餉報部備撥若夫應借蒙部地段及招商納租辦法應請 旨飭下伊克昭正盟長並烏蘭察布盟長轉行達拉特杭錦二旗暨烏拉特等三旗遵照遵議果無窒礙或先試辦三年如有明效可証卽行相地審宜斟酌損益著爲定章無失寓兵於農之意然事體重大所議是否有當謹將鹽金一帶形勢繪圖帖說恭呈 御覽仰懇 勅下戶部理藩院

核議施行

奏爲餉款艱難新疆南北兩路急須大興屯田以裕邊儲疏

附新疆屯田事宜清單
戶部

竊維天下之患常苦於兵多而餉不足兵愈多則國愈弱餉愈多則國愈貧史冊具在可考而知也自軍務平定以來俸祿未復官已困矣釐金未裁商已困矣京協各餉定有考成追呼急則農亦困各處欠餉累千百萬積欠多則兵亦無不困夫盡搜括裁省之術而猶不足以養兵此臣等所爲夙夜憂惶靡知所措也以現在兵餉論之惟新疆一隅較各省養勇爲多餉需亦較各省爲急每年軍餉不下七百餘萬各省關頻年協濟竭蹶不遑偶有不敷動請部墊部庫關係根本且全倚外省解款支用繁多時虞不給萬難將鉅款屢行墊出致誤要需以現存營勇論之新疆尙有四萬餘人不裁則終年並無戰事遽裁則又恐疏虞長此不已坐耗資糧其患何所底止況目下各省水患頻仍海防吃緊假令協餉提解不前軍心搖動在臣部既無可指撥之區各路統兵大臣又將何以爲善後之計乎當此時事艱難臣等彌深焦灼勉圖補救實乏良謀惟有於新疆南北兩路急爲大興屯田爲當今緊要切務藉人以盡地利卽藉地利以養人是有五利焉新疆軍糧向由內地運至哈密分運各城或於各城設採運軍餉局分運各處山谷阻深道路遼遠核計運脚所費不資若興屯政就地收耕穫之利內地無轉餉之勞其利一各路請餉太

多墊款難按期撥解若興屯政口糧無憂缺乏且該處所收糧食即可劃抵該處餉需每年當可節省銀數十萬兩足以紓餉力固軍心其利二新疆現收民糧每年約有三十餘萬石皆以供支各營扣抵兵餉若興屯政寓農於兵所收民糧即可改徵折色用備度支其利三兵燹之後戶鮮蓋藏若興屯政數年之內必有餘資糧價因之而平邊儲亦因之而實其利四凡兵以勞而強以逸而弱各軍無事坐食筋骨懈弛竊恐師老財殫緩急俱不足恃若興屯政勞其筋骨將來驅赴戰場必更勇健其利五臣等反覆思維雖富強之效不能期諸旦夕而屯墾之事殊難緩於須臾且修屯政以實邊陲非自今始也古人嘗行之矣新疆開辦屯田亦非自今始也乾隆嘉慶年間已行之矣歷代屯政難以縷述我朝自開闢新疆以來舊有旗屯兵屯戶屯回屯成效昭然遺規具在可仿而行豈空言哉查臣部於上年十月會議新疆善後事宜摺內曾請將屯田事宜由該大臣等明定章程奏奉諭旨行知遵照在案迄今一年有餘仍未據該大臣等聲覆臣等懸揣其故必有三難一則慮邊地苦寒西成難必一則慮軍卒驕惰不習鋤犁一則慮心力不齊難歸一致臣等以爲無足慮也新疆地廣間有戈壁然北路自本壘河起西抵伊犁地皆肥潤種一石可穫數十石南路八城素稱饒沃各營駐札處所卽不能一律大抵可耕之地居多不難擇地開墾前聞俄國山諾爾地方產糧甚多曾代楚軍採運夫以山諾爾偏隅之地尙有餘糧售賣新疆地

大物博果能勤事耕作儲積自必豐盈是邊地苦寒不足慮昔唐臣郭子儀封汾陽王自耕百畝以勵軍士於是穀麥充贍軍有餘糧該大臣等若嚴加督課以身先之該管弁勇何敢告勞是軍卒驕惰亦無足慮所可慮者心力不齊耳心力不齊坐食者任意優游力耕者轉扣抵餉人情既有所不甘各營或因而觀望相應請 旨飭下新疆各路統兵大臣速議章程刻期一律興辦屯政並須明定賞罰以示勸懲嗣後該管營官以本營收穫之多寡爲殿最各統兵大臣卽以各營收穫之多寡爲殿最庶幾士皆用命餉不虛糜一俟開辦稍有端倪臣部卽爲籌撥款項續行奏明辦理所有屯田事宜臣等謹繕清單恭呈御覽

附新疆屯田事宜清單

一各處屯田地方宜豫行籌畫也查新疆於三年冬收復前督臣左宗棠卽有就地取資之論遴派委員分投清丈地畝迄今當已丈竣此次開辦屯田或因昔時舊屯或回人叛產以及零星荒地皆可耕種該大臣等應將某境內可墾田地若干畝迅速查明報部備核

一各營承種田畝宜分任責成也查新疆從前開辦屯田之時每兵一名種地二十畝至二十餘畝不等現在各營承種必須分任責成該大臣等應將某營認種某境內某處地畝若干每勇一名承種地畝

若干分晰報部查核

一興修水利以資灌溉也查南北兩路河流甚多百餘年來水利迭興尤以故督臣林則徐所修伊拉里克水利爲最著前伊犁將軍曾奏請加新賦二十萬兩今查其地在吐魯番托克遜之間水田甚廣故屯田尤以得人爲要應由該大臣等揀派熟諳水利之員徧勘地勢或引河水或濬山泉若著有成效准其擇尤保獎並令久於其任以資熟手而竟全功

一農具等項應分別購買修補也查開辦屯田所有農具以及籽種牛隻皆需經費或招工匠製造或由他處購買或就倉存籽糧撥給由該大臣等查明某營種地若干應用各項若干報部查核嗣後添購修補或動餘存經費或將收穫餘糧變價津貼屆時酌度情形辦理

一收穫糧石應分別扣抵存儲也查光緒八年烏魯木齊都統咨稱巴里坤屯地初年耕種除口糧及籽種外尙餘各色糧數十石二三年卽餘二百餘石巴里坤係著名寒苦之區必須歇年耕種收穫尙能如此況各處腴區甚多若每營以一半應差操一半事耕作約計每人種地儘可供數人口糧一俟收穫之時該大臣等將某營某處實收某色糧若干除籽種外扣抵各營兵餉若干餘存若干按年造報查核其餘贍糧石擇揀高燥之地建倉存儲以免霉爛

一分別賞罰以示勸懲也查光緒四五等年伊犁將軍派官兵在塔爾巴哈台等處屯田將出力官兵奏請獎勵其實所種之地無多且有賞無罰何以示懲屯田各營耕作不無勤惰之分勸懲宜有賞罰之別嗣後各營中如有收穫最多者准將該營官保獎升階以示優異收穫較少查係耕作不力者卽將該營官嚴行叅辦以警效尤該大臣等均視各營收穫多寡分別議敘議處若總辦督辦大臣果能盡心盡力每年實能以糧放兵抵省餉銀數十萬兩者仰懇 天恩特予格外優賞其爲數實多者特恩錫以世職以爲廣籌兵食者勸非臣下所敢妄請均俟該處開辦定章再由臣部奏明會同吏兵二部遵照辦理

皇朝經世文續編卷六十七目錄

兵政五 馬政

變通有驛州縣夫馬報銷疏

胡林翼

通籌全局仍請添練馬隊疏

曾國藩

致郭筠仙太史論買馬

胡林翼

議吉林添買官馬援照驛馬定例疏

黃雲鵠

呈張中丞論晉省北方馬隊書

葛士達

代民捐辦新安澠池兩縣車馬應差并捐銀存當生息以充經費擬議章程請示稟

金福曾

裁撤夫馬局請 旨立案以垂久遠疏

丁寶楨

請酌添寶坻縣驛站夫馬片

張樹聲

酌辦甘肅驛站事宜疏

譚鍾麟

新疆南路改設驛站章程片

劉錦棠

皇朝經世文續編卷六十七

上海葛士濬子源輯

兵政六 馬政

變通有驛州縣夫馬報銷疏

胡林翼

竊據藩司馬秀儒臬司羅遵殿會詳咸豐二年以來湖北有驛州縣多被賊擾致將驛馬刦失號舍焚燬剿退後均仍照舊安設修理接遞文報差使查馬匹一項例應詳司照戶部換票出口購買始准填補上站維時軍報絡繹若遵定例買馬遞送緩不濟急必致貽誤經該州縣在附近地方各按例價額數買馬補站或按額數雇馬應差卽完善各驛自咸豐三年起至六年止每失馬倒馬或因道路梗塞難以專丁赴口或因臬司遠在軍營未能照例請票卽在附近地方按年按額買馬填站其失驛州縣未設以前俱係雇夫代馬均經通稟有案辦理係屬權宜所有未經 奏銷之歷年支用驛站銀兩自應變通報銷擬請將咸豐二三四五六等年各驛在於附近買馬者無論填補失馬倒馬准照出口買補倒馬之例分年支銷馬價扣解皮張銀兩仍不得過年額存七倒三之數如係雇馬應差不准支銷馬價應以咸豐七年爲始按照倒馬例數遞年請票補買俟口馬買到若干卽裁去雇馬若干並俟雇馬裁竣始准接報倒馬

不許兩項併支其被擾州縣未失驛站以前及失後補設並完善各驛無論買馬雇馬查係實在夫馬足額者歷年額支夫馬工食工料加閤支應號房鞍雇夫價健夫工食等項銀兩准其一體照額開銷不足額者按數核減其失驛州縣未設以前雇夫代馬此項健夫工食銀兩應請比照襄陽穀城均州鄖縣四州縣添設王政橋等一十七站之例按日按名支食如雇夫較多卽不得不過原額馬夫之數等情請奏前來臣等查楚省州縣近年驛站夫馬事宜實因限於時勢未能循例辦理該藩臬兩司酌擬變通報銷章程係爲核實撙節力杜浮冒起見惟是事關動支驛站錢糧且與成例多有不符未便擅專相應請旨勅部議覆遵行

通籌全局仍請添練馬隊疏

咸豐九年

曾國藩

竊臣才識短淺何足以規畫全局就近處數省而論安徽軍務最爲喫重江西次之福建又次之皖南中界一山皖北中界一湖兩路賊勢臣前疏已詳晰具奏近聞福建之賊尙踞連城江西之賊竄入南安贛州戒嚴定南崇義相繼失守以臣愚見連城之賊閩省兵力足以了之南贛之賊人數尙多悍者較少非一枝客軍所能猝辦必須本省兵力輔以團練方可徐起有功惟安徽賊衆其氛甚惡其患方長大凡官軍與賊此消則彼長彼消則此長斷無中立之理我能進而剿賊則賊將竭力禦我不能進而剿賊則賊

將乘隙犯我旁出四溢皖南無進剿之師則賊必南犯浙江皖北無進剿之師則賊必北犯齊豫故就一隅觀之則江西之南贛福建之連城均是賊黨均須兵力不可舍近而圖遠將全局觀之則兩利相形當取其重兩害相形當取其輕又不得不舍小而圖大舍其枝葉而圖其根本誠使大江兩岸各置重兵水陸三路鼓行東下剿皖南則可分金陵之賊勢即可紓浙江之隱憂剿皖北則可分廬州之賊勢即可紓山東河南之隱憂方今湖北全省肅清然與皖省處處緊接防不勝防者莫如湖北據賊上游之勢能制皖賊之死命者亦莫如湖北臣與官文胡林翼等熟商就現在之光景稍加恢廓北岸須添足馬步三萬人都興阿李續宜鮑超等任之中流現有水師萬餘人楊載福彭玉麟等任之南岸須添足馬步二萬人臣率蕭啟江張運蘭等任之三道並進夾江而下幸而得手進占十里則賊感十里之勢進占百里則賊少百里之糧卽不甚得手而上游之勢旣重下游之賊不得不以全力禦我其于金陵廬州兩大營均足以抽釜底之薪而增車外之輔此遵 旨通籌全局宜併力大江兩岸之微意也至臣處近日軍情蕭啟江一軍自石城拔營南赴雩都據稟南贛各屬賊踪蔓延勢難兼顧臣批令專救贛州以保要郡不必旁顧他處張運蘭一軍自臘月十七日馳赴景德鎮十九日吳國佐小挫一次二十七日張運蘭大勝一次開仗情形由臣另摺具奏贛州居江西之極南景德鎮居江西之極北相距千有餘里臣駐建昌距兩軍

各五六十里調度不靈轉運不便且兩處皆孤軍深入賊衆兵單日夜焦思無兵可濟臣前次摺尾聲明蕭啟江之軍或留防南路或隨臣北行容俟續行具奏近日詳加體察顧此則失彼顧彼則失此與其懸心兩地不如專力一方已咨商江西撫臣耆齡請其調勁旅以剿南贛兼辦團練以散脅從臣卽專辦北路調回蕭啟江一軍歸併饒州彭湖等處在江西則臣管北路耆齡管南路在皖省則臣攻南岸都興阿攻北岸地有分防斯職無旁貸師有定向斯軍無二心免致到處牽掣一無所成此臣處近日軍情擬調蕭啟江并赴北路之微意也臣往日在軍未聞賊匪能用馬隊近聞賊匪常以馬隊衝鋒捻匪則馬隊尤多李續賓三河之敗卽係馬賊數千爲湘軍向來所未見昨吳國佐景德鎮之挫亦爲賊馬所眩今欲整頓陸軍不得不添設馬隊東三省馬隊勁旅根本所在不敢多爲奏調臣與湖廣督臣撫臣緘商擬由官文等奏調察哈爾馬三千匹請 旨飭上駟院押解來南潁毫一帶有善騎之勇可募名曰馬勇應卽添練馬隊二千餘騎與都興阿之舊隊相輔而行于九江湘口等處擇平地曠野馳騁而操習之惟以南人而騎北馬以勇丁而學弓箭非倉猝所能奏效臣願竭數月之力朝夕講求從容訓練期于成熟而止練成之後以二千匹交江北隸都興阿麾下以五百匹交江南隸臣麾下以壯步軍之氣而寒賊衆之心餘贖馬匹游牧于黃州鞍轡等具設局于九江以備隨時更換之用仰仗 皇上威福前事若行皖豫等省

軍務可期起色此添設馬隊臣願自任訓練之微意也溯自咸豐六年洪楊內亂湖北肅清武漢再克臣方慶幸以爲大難計日可平不謂遷延歲月粵逆未盡捻逆復興餉項有不支之勢將士有久疲之心若非奮發精神變換局面將有類乎古人所謂惰氣歸氣者不得不改絃更張亟思所以振之區區愚忱謹就近三省軍事遵 旨統籌全局恭摺覆奏

致郭筠仙太史論買馬

胡林翼

得復書議事有制學識冠絕時輩回環誦讀不忍釋夫禦外侮莫如自修譬之治疽者先固正氣乃可漸逼邪毒不使上犯而內侵也西洋之夷不過謀利外強中乾人固不察耳哦夷則窺伺黑龍江已成根本之患近年財力與人才均非急切可謀因夷人之恐喝而遽爾上瀆 聰聽又豈能以口舌爭回耶欲用兵力非側身修行搏精揖志訪舉人才不可期以十年或有成功今尙非其時也鄂中馬隊極爲賊所憚然頗嫌單與其日久而不能成功虛糜軍餉不如及早多謀馬隊與其添募無足重輕之南勇不如乞請黑龍江甲兵千名則費省而力可厚賊已習騎非此勁旅不足以制其死命也月初揆帥已奏乞黑龍江西丹千名滌帥復奏請自練馬勇三千以二千歸皖北隸都直夫以五百名歸黃州以五百名循皖江南岸隸於滌帥林翼之愚南人之舟北人之馬各擅所長天定之也卽河北淮北之騎射亦不如東三省東

三盟之精勁而黑龍江之騎射又較吉林尤精其服習較東三盟爲便欲乞僧邸於天津撤防之日飭令以黑龍江甲兵千人撥入鄂省分隸各營則皖南皖北可計時成功楚軍瘡痍之餘猶較各省兵力爲精實林翼竭力籌措馬隊之在皖北鄂邊者近三年資給之無稍缺愛之切故不忍使之饑也求便中婉陳撤防之日必乞俯准實較召募勇丁奏請西丹事半功倍惟是兵之強弱因將轉移尙乞以忠勇善戰知兵略之大員二三人分統來鄂則異日成功必速行當由官揆帥奏咨辦理耳

議吉林添買官馬援照驛馬定例疏

黃雲鵠

同治四年十月三十日據署吉林將軍皂保以添設官馬擬請援照驛馬倒斃定例酌減報銷等因附片具奏本日奉 旨該部議奏欽此欽遵抄出到部臣等查例載吉林烏喇金珠鄂佛囉等站額設驛馬每年十分准倒三分等語今該署將軍原奏內稱近年盜風日熾騎馬持械百十成羣派兵剿洗必須給與馬匹方足以資追捕而期得力前任將軍景綸曾於同治元年間 奏明添設官馬一千匹分撥各城旗營餵養以備緝捕巡防之用歷時既久倒斃漸多向由兵丁著賠買補足額臣署任以後據各署陸續呈報疲斃前來伏思捕盜固以馬隊爲利養兵尤以足食爲先吉林原設額兵一萬餘名差操之餘往往散處田間務農食力軍興以後徵調絡繹存營數不及半領餉既較前支絀差使又視舊較多幾至餬口難

支枋腹從事如再因其乘騎馬匹積久疲斃責令賠償則苦累更深殊非體恤之道又不便在聽缺額日久空虛輾轉思維溯查驛馬定例每年倒斃准其報銷十分之三所設前項馬匹擬請援照驛馬定例酌量從減每歲倒斃准其報銷十分之一仍行隨時買補所需經費先由庫儲籌款墊給統俟盛京戶部積年欠款項下領到歸補如此變易庶兵力既可稍紓而馬匹亦不致缺額等語臣等查該署將軍所奏自係實在情形若比照舊例不准報倒於邊防兵力緝捕徵調皆有妨礙應如所請援照驛馬每年報倒定例酌量從減每歲准其報倒十分之一仍責令隨時買補足額以重邊防而紓兵力至買補馬匹價銀應援照該省前次添馬一千匹每匹價銀八兩其倒斃之馬皮臟變價每匹銀五錢應比照該省驛馬辦理至所需經費先由庫儲籌款墊給等語戶部查驛站買補倒斃馬匹價銀每兩係減三成其餘七成按實銀票銀各半放給此次添設官馬每年所需倒斃馬價銀兩應按照驛站買補倒斃馬價覈減章程開放每兩減扣三成其餘七成除一半實銀照舊發給外一半官票遵照新章每票銀一兩折實銀二錢五分除皮臟變價外所需錢兩准其在於庫存項下先行動支按年造入官兵俸餉奏銷冊內題報查覈如蒙俞允臣等卽行文該將軍自奉旨之日爲始照議辦理再此摺係兵部主稿合併聲明

呈張中丞論晉省招募北方馬隊書

葛士達

自去年以來蛟騰水溢災告東南蚩尤彗星變見西北恆山之麓地震而鳴十月初九日等日枉天復穿月西流俯察人事仰觀乾象禍患之萌屈計不遠雖朝廷宵旰憂勞勵精圖治感格朕兆斷無意外之虞而安不忘危備禦之具正自一日不可少懈晉省西控朔漠東蔽神畿邊陲設有動靜正當其衝前見吾憲大奏兢兢以兵備單薄民氣異懦爲慮請募北方馬隊以開風氣之先誠未雨之綢繆先幾之卓識而蒙猶有芻蕘之說敢爲左右陳之竊維天下之事無鉅細精粗皆可以勉強致之習學成之獨用兵則不然不特將帥之智勇才略臨機決勝出於性生非可學焉而得卽士卒之勇怯強弱亦由地脈風氣凝結鬱勃而成不能以人力變化移易當天下大亂羣雄競逐如戰國蜀漢六朝五代之際日相尋於兵戈民習見於戰鬪雖方隅所限強弱不同苟訓練有方猶可隨地成軍毆之以戰若值承平日久之後民生驕惰膽力疲驚苟非地氣勁悍之處其人萬不可用故當咸同之間胡曾諸帥專募湘淮之士卒以成功而同一楚也將士皆出楚南楚北竟無一人可用者其地使然項籍之江東子弟八千人橫行天下漢明二祖從龍之士皆起淮北下至羅紹威之牙將八千屹爲重鎮戚元敬之創募台勇立功一時蓋皆審其地因其機而用之非徼幸也今已息兵十數年湘淮之舊伍已老其地氣亦已發洩無遺且南人不利於北吾憲之欲募北兵別開風氣自是不易之論惟直東豫三省地勢廣衍其人雖似撲魯骨力壯健而其

氣不銳其膽不堅其性夸而多詐故古之論者謂燕齊之人勇於私鬪而怯於公戰敢於剽劫而懦於行陣達昔年辱在戎行轉戰於直東皖豫之交者前後五六年時當髮捻猖獗中州徧地塗炭居民流離死亡其遭禍之酷烈日習於兵革不爲不深鄙議屢欲激勵以用之佐南兵之不逮同治五年曾說帥府選募開長鄆濮間拳勇五百人爲先鋒訓練數月比一接仗臨陣類皆目駭手戰幾至敗沒故髮捻之亂將二十年直東數省絕少豪傑之士崛起殺賊建功且賊至圩寨往往獻糧納款兵至反閉關絕糴仇殺爲難愚見以爲此三省之人未必可用必欲募北軍直隸惟天津爲最勁悍其地濱海性直而慙志奮而齊爲北省之冠昔謝忠愍公用以殺賊庚午焚燬教堂一呼百集至死不悔而自咸同以來未出人物地氣之鬱結尙未發越募練成軍駕馭有法必能得其死力特起異軍其次河南南汝光一帶亦尙健銳可用惟該處素多猾賊巨盜雜而不純能用則爲勁兵不能用易於肇亂現在所募止數百人與其雜募數省而心力不齊不如專募天津一處爲愈此選募之說也至論軍制馬兵爲遊弈奇兵步兵爲根本正兵馬兵利衝突馳驟步兵爲中權後拒馬步不能片刻相離並須一氣聯絡有步無馬陣腳立穩尙能取勝有馬無步一有挫衄敗無餘地晉省口外雖屬遼曠四境大半山險益宜步以輔馬乃能制勝旣募北方馬隊兼宜募北方步兵庶能情義相聯急難相顧如身之指臂互相保護現在省垣練軍步隊左右兩營雖

成軍日久將卒皆狃於夙習粉飾觀瞻徒糜餉項且其卒伍多係外省遊手好閒不主不客設有緩急烏駭獸散萬不足恃宜漸加刪汰另募北人充補一并訓練以期軍政一新馬步一氣此軍制之議也若夫練兵之先務擇將吾憲自有權衡毋庸贅及達旦擊時艱忝佐幕府忘其狂悖略陳一得惟訓誨裁擇焉

代民捐辦新安澠池兩縣車馬應差并捐銀存當生息以充經費擬議章程請示稟 金福曾

竊紳等在新安澠池兩縣查賑見其地當孔道差務殷繁現值災荒之後民困不堪騾馬更屬稀少力難支應河南朱守每與紳等談及深切躊躇澠池周令亦屢以爲言紳等因議捐置車騾代民支應商之本
地紳董衆情俱洽現已專派局友赴周家口買到騾五十四頭馬六匹於前月下旬行抵新澠又另發車
價錢文在本地購齊車輛計新澠每縣應各派得騾馬三十匹車十輛又上年江浙胡培基等捐給新安
車馬局銀款內買成騾馬十五匹車五輛專歸新邑貼差之用又續添澠邑騾馬六匹車二輛合計新安
共得騾馬四十五匹車十五輛澠池共得騾馬三十六匹車十二輛業經交由本地紳董轉發附近城關
之殷實農民具領并取具保領各狀議定承領之戶自行喂養有差則領價應差無差則聽留耕作至逐
年車輛器具必得歲修騾馬倒斃尤須添補現由局捐銀二千兩交存洛陽縣當舖生息專爲前項修理
添補之用并經會商朱守籌議章程另開清摺呈送憲覈所有代民捐辦車騾分交農戶喂養應差并捐

銀存典擬章辦理緣由合肅稟陳

捐置新澗兩縣車馬章程

一紳局代新澗兩縣民戶各捐驛馬三十匹車十輛上年新安有江浙民捐銀五百兩已買成驛馬十五匹車五輛又續添澗池驛馬六匹車二輛計新安共得驛馬四十五匹車十五輛澗池共得驛馬三十六匹車十二輛

一驛馬現已購齊發交新澗兩縣車馬局紳士覓到近城殷實農民承領喂養取具領狀併切實保人保狀一俟車輛購齊即將保領各狀移送河南府朱守發縣存查

一領車之戶自備喂養遇有差事新安縣東去發給錢二千文西去給錢二千五百文澗池縣東去給錢二千五百文西去給錢五千文如無差事聽留牲口在家耕種

一開車之日如遇大雨泥濘視日之多寡酌量加價尋常微雨不在此例

一驛馬皆須烙印車輛亦應編號輪流調用周而復始不准任意越調每車由縣發給對牌縣署車戶各執半面以昭信守如逢差事須見對牌方准支應以杜架冒雇用之弊

一車輛驛馬恐有損壞倒斃必須預籌添補經費茲定每縣再捐銀一千兩發郡城兩當按月一分生息

遇閏加增典中立有合同手摺發交紳董收存如支取利銀紳董到府稟明批當照發一面行縣知照若不奉府批但憑手摺該當無須付給領回之後發給車戶包費亦須官紳同場照發此項本銀稟明各憲立案存當無論何項公事不准挪用將此載入摺內以便查閱

一驛馬既有倒斃車輛亦須修整車上器具尤應隨時添置茲議每車每年各結包費銀十兩在生息項下動支按半年給發比照驛站倒馬之法無論添置器具若干驛馬有無倒斃既經給領包費過用則賠貼節省則有餘皆聽本人自爲官不過問惟承領驛馬年久齒老難任奔走自應按時作價茲於給領之日傳牙戶估價驛馬某匹現值若干卽於領狀內逐一填明日後如不願承領繳還驛馬仍由牙戶按時估價所短若干卽著領戶照數繳還由局紳隨時代爲貼換齒輕牲口另覓領戶承領

一新澗兩縣支應差車向有兵差流差之別今旣捐置車馬自應不分兵流一體承支向時所設兵流兩局亦應歸併一局以節糜費

一車馬按月由局董驗視一次每半年送本官驗視一次如有喂養失宜趕緊回去另派妥人承領每驗一次驛頭卽爲打鬃馬匹則打半鬃庶易辨認而杜朦混頂驗之弊驗視車馬不必先定的期如逢差事少而存車多卽行送驗有一二車不齊俟回日補驗

一局發驛馬皆有烙印如有遇病倒斃該領戶雖願賠償亦須由保人報明車馬局董請官按冊驗視不准隱匿以杜抽換

一凡遇大差過境或各差彙集局車全發尙不敷用應由車馬局董照章在各里均勻添雇惟車價宜量爲加給

一局董每月將用車若干輛用錢若干千榜示局門一面造冊報縣存案惟此項紙張雜用及每年局董赴郡領取息銀川資尙無所出准以逐年遇閏典息動支雖爲數無多概須撙節此係爲因公息民起見本地紳董各關桑梓誼無可辭

裁撤夫馬局請 旨立案疏

光緒九年

四川總督 丁寶楨

川省自同治初年本省鄰省軍務緊急各處征兵防剿地方供給兵差始創設夫馬局由地方官委紳設局按糧派錢預備支應其初專爲防剿緊要辦理兵差而設原爲萬不得已之舉迨後軍務肅清兵勇大半遣撤而各廳州縣積習相沿仍借支應兵差名色任意苛派夫馬盈千累萬有較正供浮多加至數倍地方官以此爲應酬入私之具局紳以此爲迎合漁利之階小民脂膏半入官紳私橐二十餘年視爲固有民力幾何豈堪長此剝削雖前督臣吳棠查明分別裁撤酌減而各屬仍多藉口差使大都陽奉陰違

臣於光緒三年到川民間具控夫馬之案層見迭出民情嗟怨困苦堪憐當經通飭一律裁撤惟查南路之雅安邛州上至省城由省至北路廣元出境十八州縣爲藏差喇嘛學差試差往來要道例有支應不能不稍爲酌留以資津貼仍飭由臣親爲核定於向派錢數大加刪減以杜侵蝕而紓民力其餘各屬均自光緒三年六月起一律全撤不准再派民間分文如違嚴叅懲辦嗣據各廳州縣陸續稟報裁撤復經遴委賢員分赴各屬明查暗訪亦尙無巧立名目影射私收情事至今數年以來民力稍紓應供之差亦無貽誤現在各廳州縣均尙恪遵辦理第恐歷久弊生不肖官紳復萌故智仍藉詞添設夫馬局亦不可不預防合無仰懇 天恩俯准 勅部立案以垂久遠以後如有不肖州縣擅自開端私行攤派一經發覺除將該牧令嚴行叅辦外並請將遽行批准及失察之總督藩司一併降級示懲俾川中士民長獲休息上副 聖主軫念民艱之至意除將酌留夫馬之十八州縣另繕清單恭呈 御覽並咨部外理合恭摺陳奏

請酌添寶坻縣驛站夫馬片

光緒九年

署直隸總督 張樹聲

據寶坻縣知縣劉枝彥稟稱該縣向無驛站僅止遞馬八匹遞送本處尋常公文本可將就敷用自同治九年督臣駐札天津兼辦洋務公文逐漸加增近因海防邊防同時舉辦如奉天吉林等省各將軍府尹

山海關道新設甯古塔等處督辦奉天驛巡道東邊吉林道駐札營口一帶之毅軍駐札甯河蘆臺之淮軍練軍駐札山海關之練軍以及奉吉等處防練各營皆與北洋大臣衙門並津海關道海防營務處支應局機器局製造局軍械所暨各統營官時有往來文牘較從前多至十數倍且悉關防務重要往往排單飛遞限日行四五百里實爲向來所無東三省及山海關等處至津雖有薊州三河通判武清驛路但須繞遠數站是以均由玉田武清徑送寶坻玉田在寶坻之東由東三省及山海關等處至津公文則由玉田送寶坻而達武清武清在寶坻之南由天津至東三省山海關等處公文則由武清送寶坻而達玉田計寶坻至玉田陽樊遞武清楊村驛各九十里加以地勢低窪夏秋大雨時行積載途次繞行三四十里是寶坻一站之路足抵正驛兩站之遠玉田武清均有驛馬尙無出入寶坻既無驛馬而地面適當其冲海防邊防係久遠之計爲期甚長實屬力難賠累應請添設馬匹並准府尹臣以該縣所稟係屬實情自應會奏添設以重郵政函商到臣飭據藩臬兩司查得吳橋至天津前因文報絡繹於途有遞馬不敷周轉已奏准各添馬三十匹至六十匹夫十五名至三十名不等並因吳橋等縣額支夫馬工料銀數太少諸務昂貴不能敷用均照天津縣銀數支給在案現在寶坻差務煩重勢非添馬不可應請酌照吳橋等處成案准添馬三十匹夫十五名自本年夏季爲始照天津縣工料銀數由司庫地糧項下支給作正

開銷其馬匹亦照例價由司撥款採買等情詳奏前來臣查該縣既成冲途若不酌添馬匹該縣固艱於賠墊亦慮派累民間應請照議添設以資馳遞而免誤差滋弊

酌辦甘肅驛站事宜疏

光緒九年

陝甘總督
譚鍾麟

查甘肅驛站軍塘原額續增合計關內外共設馬六千三百五十餘匹夫三千六百餘名又所牛五百餘隻有牛夫拉車馬一百五十匹有馬夫每歲需工料站價銀二十五萬七千餘兩糧料草束在外軍興以來塘驛廢弛前督臣左宗棠飭各屬陸續安設夫馬不及三分之一各州縣咸謂不敷供差時請增添而所需工料銀兩有由軍需項下發者有由善後局釐局領者自留支者有從司庫領者大約所領現銀有限而未領之項各屬仍照舊額作為墊支列入交代以抵解款紛紜輻輳不但款目混淆抑且苦樂不均臣去年飭令各屬均由藩庫請領以歸畫一並飭兩司體察現時情形酌留夫馬祇期驛遞不至貽誤餉項不至虛糜茲據藩臬兩司詳稱目前庫款空竭固難遽復舊制且軍務既平驛遞較簡無須照額多設夫馬現在酌量地方驛路遠近差務繁簡合計東西大道寧夏西寧兩府酌留驛馬二千六百八十五匹夫一千三百四十二名此外如安西玉門軍塘暨鞏秦階慶陽所屬偏僻驛站並新設之甯陵平遠硝河城打拉池等處所設夫馬無多姑仍其舊所有東西兩路所夫所牛拉車夫馬久已無存徒資糜費竟可

從刪除哈密巴里坤各路軍塘仍由軍需項下支發外統計關內驛站及安西玉門軍塘夫馬站價歲需銀十萬六千餘兩糧料二百四十餘石草一萬九千餘束此後各屬向由地丁項下留支者照現定之數留支有餘則解司庫向由司庫領者照現在酌留之數核發如此酌中定議事體劃一不致偏枯等情詳請奏咨立案前來臣查該司等所議酌留夫馬之數較原額固屬減半照各驛現存馬數尙有加增於驛遞決無貽誤而每歲節省銀十餘萬兩於庫款不無裨益請自光緒九年正月起照現定之數支發以便司庫造報他日庫藏充裕不難復照舊額或當有事之秋必須添設夫馬仍可隨時酌量請增此舉係爲目前庫款支絀核實撙節起見並非變更舊章似屬可行除將酌留夫馬細數另開清摺咨部外謹繕摺具陳

新疆南路改設驛站章程片

光緒十一年

劉錦棠

再臣奏新疆南路改設驛站並請酌量變通支給各驛經費銀兩等因業奉 諭旨允准欽遵在案茲查葉城縣治前於擬設南路佐雜摺內奏明移建哈哈里克該處原設驛站應請改爲葉城底驛其原在葉爾羌固城准設之葉城底驛應卽毋庸安設于闐縣治奏明移建克里雅該處距和闐州四百五十餘里應請在於多羅白石頭渠勒早蘭及于闐本城各設一驛以資轉遞所有該五驛現設書夫馬匹經費銀

經世文編

兩應飭悉照奏定變通章程支給以歸畫一

皇朝經世文續編卷六十八目錄

兵政七 保甲

請實行保甲疏

宗稷辰

上裕撫軍論防禦事宜書

楊士達

粵西團練略序

龍啟瑞

卮言一則

李祖陶

答某友書

熊少牧

覆文任吾書

曾國藩

上督撫憲緊要事宜歸入善後籌議五條

魁聯

團練說

朱孫詒

黃特軒傳

吳敏樹

現飭通行保甲守助之法並請飭部詳定就地正法章程疏

張之洞

通飭順天畿東各州縣編查保甲示

周金章

新世文經新

卷六十八目錄

民團論

葛士清

保甲論

葛士清

漁團條例示

邵友濂

救時芻言一則

張煥綸

上海商務印書館代印

印文書局

印文書局

舊某文書

舊某文書

新書一冊

新書一冊

新書一冊

新書一冊

上海商務印書館代印

上海商務印書館代印

新書一冊

新書一冊

新書一冊

上海商務印書館代印

皇朝經世文續編卷六十八

上海葛士濬子源輯

兵政七

保甲

請實行保甲疏

咸豐元年七月

監察御史 宗稷辰

竊臣伏見 皇上命中外奉行保甲要政各直省奏覆者惟閩浙雲南敬讀 申諭諄諄所以端治本於伍版者至明且切使上官選良有司無地不得其人無人不盡其心力則此事可以必要其成不致如向來年終一奏沿爲具文從此億兆之動靜不欺而守令之彰瘡易措信爲致太平之基也臣自嘉慶年間蒙稚之日隨任讀書時臣父原任湖南知縣臣宗需正於華容零陵等縣力行保甲見按戶親查按牌標對按簿考稽種種煩重而隨地隨時旁參互證之處極用周詳華容牌冊經兩年餘而始成撫臣廣厚且通飭各屬仿照行之迨調任零陵行之垂成而以勞瘁沒於任所迄今四十年此中肯綮臣知之甚悉念之未敢忘也茲幸逢 皇上勤施良法策勵庶官之際羣言並進不棄芻蕘伏念諸臣所陳保甲章程法已備矣而行法之曲折變通或未盡晰臣初膺臺職何敢語襲雷同惟舉趨庭所聞於此時徧行保甲有可補裨毫髮者竊不自量妄爲疏列十條恭呈 御覽可否 敕下各疆吏稍備採擇出自 聖裁

一保甲宜久任州縣爲之以收實效也四境之內大者數十萬戶小者數萬戶必令家至戶說非數年之功不能徧邊省地廣之區尤難徧歷設該牧令辦有規模忽令調任他缺抑或因差公出數月輟功署員無暇爲此卽本員回任已覺接續多疏所以行保甲必先得賢牧令旣得賢牧令便須使之久任不可輕換辦成之處又須擇一好官接替庶幾牌冊皆實民隱畢呈而董戒漸摩次第可以施布然所貴乎良有司者必須耐煩耐勞有威有愛其心體貼周至惟恐費民錢粟荒民功夫使民不忍不從不敢不從於是行之有效近日州縣其劣者多事觀望其賢者亦懼處分錢糧命盜不悞已爲循分而欲其一心力於保甲探善政之源非上司知人任人盡去庸劣請寬處分省乃遷調則所謂保甲者仍恐徒飾其名而莫課其實也故重牧令之久任實保甲之要端也

一保甲未能限定時日宜寬其期以致實力也他政可以勒爲定限督令一律完竣獨保甲有所不可曾見大吏剋期辦義穀義學不一年申報已齊迨去任而所辦皆廢可見責之太急勢必人盡爲欺欺飾者之整齊迅速較實行者有百倍之易上司喜其能事受欺者多轉病實力緩成爲無用此在通都劇邑尤坐此弊儻有覆奏言催令早完或保速成之員以爲式者必爲草率從事未嘗究心於此中甘苦者也故期限之從容乃保甲之實濟也

一保甲於填寫時宜加意覈對以杜虛捏也州縣於編保之初先令鄉保草開各戶丁口生理然後填寫門牌及編聯底冊與循環二簿此時最須詳細覈對蓋初填一失其實則此後全屬子虛不可不慎也至循環更換之時須看其一保一甲中往來增減有無捏造全在遇便抽查非持之有恒鮮克有濟若該保該甲內有非常之事原許隨簿密呈善於辦保甲者往往有匪必禽不疾而速如左輔之治巢縣姚瑩之治龍溪皆近人所傳誦若初填任誣復查罔據雖欲稽察將不知爲誰何故期保甲之有實功必飭查填之無譌謬也

一保甲宜不拘時地隨在稽覈以致精詳也州縣與民相親在城則校士講書收詞審案日接保甲中人往鄉則勸農催糧勘山相驗日履保甲中地逢人詢其家口與其鄰右則牌冊之悞者可以悉更隨地辨其族類與其里居則循環之僞者可以立見始而一隅爲所洞察漸而四境靡弗真知由此而悍民游民非爲之民時加密訪不難爬梳而剔決之革澆俗以此銷亂萌亦以此故求保甲之實效尤在牧令之真心也

一保甲宜先籌經費以杜擾累也州縣辦理編查鄉保多不知書寫又未諳條款必須紳士協導之書吏分任之然紳士書吏往鄉同一不能枵腹其飯食與刷印紙張筆墨所費不少牧令當先籌捐此

款不使董事及胥役官人到門分文累及百姓則必人人信從鼓舞謂此事真衛民而不以累民可經久而不敝故責保甲之所由成必首問經費之所從出也

一保甲宜酌用委員以資襄助也北省民少而壤地狹則編保較易南省民衆而政務煩則編保殊難若山陬僻境一牧令之耳目可周至於衝途大缺日給不遑則勢不得不借資寮屬以分稽察丞簿本少應辦公事該道府慎選廉勤之員以助州縣或擇教職中通達事理年力尙强者贊之皆由牧令籌給薪水如能辦有成效酌予獎勵儻稍有需索不難參撤如此則不至地大者保甲轉虛民衆者編查失實矣故查保甲之始有時非獨力所能爲而考保甲之成要必得賢員而共理也

一保甲宜先查巨族再編小姓以爲聯屬也各省巨室每以門牌爲編氓小民所懸多不從實書寫有司忽於巨室而專查散處小姓何能使之勤守望睦井里乎臣聞江右閩粵民多聚族而居其族長鄉正誠得端人爲之一族中匪類有所不容地方官勾攝人犯常賴其協捕是以祠譜修明之處其人民皎然難欺不特一方之民族無可假冒而一鄉之良莠無可掩藏惟先勸導大戶樂於遵從而後推及單門咸德稽覈故欲於保甲皆真確必當視紳民無偏私也

一保甲可與坊里並稽以杜欺隱也凡民在城分坊巷在鄉分都圖各州縣舊設魚鱗冊實與保甲法

相爲表裏里黨確知其定在則蒙混已絕於平時人民習見其定名則浮僞可杜於他日遇有偏災
歉歲小蠲大恤臨時無事周張衙狐衿蠹無所施其伎倆果使保甲魚鱗二冊皆秩然可考州縣乃
易治矣故保甲之利一興而坊里之弊亦盡去也

一保甲能實行而讀法之典可徧舉也從前各鄉鎮皆設申明亭教誡鄉民近日亭多傾圯惟有地方
官選擇鄉約正副宣講 聖諭廣訓一事間有奉行者臣憶嘉慶十六七年間臣父臣宗需知華容
縣時於力行保甲之中卽寓申明化導之意遴一鄉中端正紳耆有人望者爲約正副加以禮聘率
之分教歲時設宴如鄉飲禮量其勤而獎之三年不怠請上官給扁獎勵會詳經撫臣廣厚通飭各
屬一體照行迨十八年以後續有條陳定制更爲詳備然至今或行或不行良以查保甲者不清則
貞邪未辨而教化亦無由而興也故臣以爲懸讀法之書必先覈保甲之實也

一保甲能實行而兵食之足可兼寓也昔明臣王守仁巡南贛時創行保甲而民盡知兵遂得痛除盜
藪又明臣劉宗周奏議謂備禦自保甲法始內分修練備儲爲四事且寓社倉法於其間皆得周官
遺意今楚粵皖豫川黔之交徐兗蘇湖之界在在有匪徒出沒而患先見於廣西及今於無事地方
清編保甲司牧得人一面選其丁壯峙其糗糧守望旣嫻加以訓練農隙調入城中合操庶使良民

隱然成爲勁旅不但可以備禦本境兼並爲方州豫養緩急可恃之材推行盡利莫善於此臣以爲得保甲之通更可收團練社倉之益也

上裕撫軍論防禦事宜書

楊士達

昨承詢地方利弊輒以團練事宜上陳意有未畢請暢論之江西東連閩浙西接荆湘北控淮右南通交廣固川陸一大都會也然而僻在南服川谷環築藏淵萃藪芽蘖易萌防禦之道當豫庶消患於無形且夫思患預防之道城可恃者則以守城爲安城不可恃者則以四鄉爲守江西當吳楚閩粵之交萬一有事腹背受敵郡邑城池不皆可恃是莫如守四鄉保甲者鄉人所恃以無恐也今雖通省奉行保甲具文近者海氛不靖幾於遠近騷然急宜整頓以收保甲之實效整頓不必拘十戶爲牌十牌爲甲十甲爲保之舊但隨其村落所在設立村長村長之多寡視村莊大小爲準立村長由公舉不由官務使各相董率又發給印單按戶書其姓名習業申禁令嚴稽察是雖未足以弭盜實足以懾土寇之氣遏大盜之萌何則盜賊入境必恃內應猶物必先朽而後蟲生果能嚴行保甲按戶編籍出必稽其所自往入必詰其所自來則內應無由生奸細蔑由匿綫索旣除雖大盜亦不敢輕入此保甲足以守四境之大驗也若夫江南沿海團練之法宜就其地勢所便合數村團爲一總而於各村中設立練長練長卽以村長承充其人

必公舉有威望且公正服衆者以專責成至隣境接壤之處又必細察情形某地爲要害處所某鄉某水某山爲出入往來必經之道則於某處設一大總而使附近各村應之一邨有警首尾策應鄉自爲守人自爲防無徵發之勞有敵愾之用旣省軍糧尤資捍衛雖未足以破賊固可以作官軍之鄉導壯官軍之聲勢矣行團練不許蓄大礮以杜奸萌但戶出一丁授之器械使習於家以時日集而教之視藝之高下爲賞罰寇至則閉寨登陴而官出精兵以牽制賊勢寇攻則救寇退則追俾奔竄而不得反襲俾枵腹而無所得食然後因敵之勞而以逸勝之伺賊之匱而以飽勝之此團練之益也雖然未可恃也左氏傳曰鄭人軍其郊必不戒兵法自戰其地爲散地蓋自戰其地則室家妻子之戀足長其怯而餒其氣餒且怯未有不憤事者今試行團練之法於四鄉而鄉村之中近者相距一二里遠者十數里地隔力分非若兵弁之萃於一營充村長者皆鄉曲交游非若弁員之臨其屬有嚴法重罰之可鼓其氣且寇盜之來飄忽無定或夜深刦殺或分道剽掠鄉村不習金鼓膽氣未堅各顧其家易至潰散散則力弱如獵狐兔昔嘉慶間川陝團勇死於教匪者以千百計職是故也故欲行團練莫如奏請築寨查寨保之築當嘉慶初教匪雲擾秦蜀楚行之頗著成效今試言其利州縣城垣廣隘不同其必不足以容一縣之人則同且距城遠者雖欲入保寇至有莫及之勢惟四鄉寨堡一立則室家皆聚鄉勇無內顧之憂人心自固不憂潰散

其利一寇盜往往因糧於我故以掠地爲能惟聚鄉邨之老弱婦女貨財米穀收入寨堡則敵野掠無所獲其勢易饑不能久淹其利二勸一邑之民捐輸修城則鄉居造爲城郭無與於鄉之說觀望勿前惟隨所在都鄙興築寨堡又不假胥吏之手則事必易集其利三有此三利何憚不爲且夫練兵貴練其膽數者練膽之方也膽堅則志奮志奮則事濟矣然築寨非團練已成則始事之防禦不備團練非寨堡已固則臨事之呼應不靈寨堡非董率有方則末事之渙散不一相其宜酌其通率此以往庶其有功抑又聞之世俗狃於習故難以慮始非以威制之則令不行而臨事制變先在乎賞罰嚴明重賞之下必有勇夫儲賞之費不可不豫顧富人多吝未肯輸貲破其慳貪損其有餘勿事姑息以成大防是在良有司迂謬之見惟閣下採之

粵西團練略序

龍啟瑞

今天子初元廣西羣盜之起蓋數年矣其芟夷擄滅大小以數十計比其訖事恒得力於民間之團練於是朝廷命順天府尹無錫鄒公鳴鶴巡撫吾粵鄒公因奏留今升布政使前廣西按察使調任甘肅按察使吳公鼎昌偕今升河南布政使前廣西右江道嚴公正基總理團練而以前籍紳士福建道監察御史朱琦翰林院侍講龍啟瑞聯屬其鄉之人使歸於率先是琦啟瑞嘗受命於前中丞鄭公祖琛董辦本

邑團練至是始設局省垣遴擇紳士隨同委員周歷各郡提點勸諭凡數閱月而通省之團練普成於是章程冊籍薈萃省局啟瑞擇其規條之尤善者與其公牘文字之有裨時務及團名丁壯義烈事實可備他日掌故者分以四門彙爲一編名爲團練輯略爰執筆而爲之序曰自井田守望相助之法廢而衛民者專恃兵自兵力之不足始藉助於民間之團練團練者卽古寓兵於農之意而變通其法以適時用者也然考諸古自晉惠帝大安二年鎮南將軍劉宏討張昌始有義軍之名同時周圯賀循輩皆以薦紳先生起兵於家以討昌之黨石冰卒滅之南朝以來如裴駿魯悉達周迪之屬類以鄉兵捍賊取勝開元後府兵法廢諸州始團練民兵安史之亂諸州皆置團練使然當時之士兵多爲武夫悍卒所訕笑聞嘗推尋其故蓋有人倡率則治無人倡率則敗威令之迫於上者鮮效義憤之激於民者有功其大較然也今粵西團練徧於外郡無所強之而事成有以導之而民從其故何哉被盜賊之患深保室家之情切而習於攻戰之事熟也蓋自道光二十一年後夷務起粵東粵西鄰省毘連地方大吏於梧州辦理防堵事平後壯丁失業猾黠之徒相聚爲盜煙販鹽梟之屬從而附和又外郡地多山場曠土嚮招粵東客民佃種數世後其徒益繁客主強弱互易其桀者或倡爲西洋天主教以蠱惑愚民用是黨滋益多州縣官欲繩以法則恐生他變欲據實上陳則規避處分而畏干時忌遠釀成大患則破敗決裂不可復治而斯時之

民甚者或經十餘戰次亦遷徙數四弱者或流離轉死山谷强者則率其父老子弟與賊抗拒以保聚於鋒鏑之間蓋粵僻處荒裔王師調發難以時至本省兵馬各有守地顧此失彼輒不相及卽及之而兵力不足或用爲借助爲其嚮導比比而是然至是而富家巨室捐貲以助饟者丁壯冒白刃膏塗原野者紳士之督率奔走者或轉戰破賊經歲不家食者用民之力亦幾於盡又得文武大吏督兵壯剿除然後地方寇盜幾於蕩平 聖天子軫念邊隅嘉與粵西人士能自相捍衛紳民有殺賊立功者立予甄敘賞過其勞殆爲吾輩初意所不及究其所以得此者固非一朝夕之故也後之覽者知其所由然則所以爲難之故蓋可識矣凡團練之精壯者大抵見賊多處也不然則民力之富厚者也不然則得賢有司倡率之者也三者不可得兼而就今日已成之事論之尤以賢有司爲急蓋有司賢則總團之紳士治則分理之紳士治而一方之團練可得而治也有司不賢則視紳民如外物紳民亦從而外之甚則用不正之人參預其間雖已成之團練可以復壞夫民經流離散亡之後幸而恃有團練又賴賢大吏之力始可勸底於成至不幸有司不賢則可以壞之復歸於弊夫家有芒刃人知戰鬪用以殺賊則可愛反其道以行則甚可慮也事之弊則爲吏者有以藉口而斯民適受不韙之名又豈今日始事之所及哉然則是編之成固有待乎其人而非徒以成法待將來也旣以復於諸公遂質之侍御而弁諸卷首

卮言一則

李祖陶

咸豐二年予家居無事遊行至省聞人譚湖湘間兵事賊氛甚熾言人人殊時楚督爲新建程晴峯先生有問當如何自處及江西省宜預備與否予謂晴峯釋褐以後自部員而至總督當督漕時剔除陋規聲名噪甚使得久於其任可繼清江楊勤恪公到今年踰七旬精力亦已衰矣當道光末年由雲貴移督兩湖似當自陳衰老力請退閒如浙閩總督劉公當無不允卽適有震鄰之警萬萬不宜規避則當長慮卻顧大展方略聘請老儒博古通今者以叅謀議收召壯士翹關扛鼎者以爲爪牙申令提鎮叅遊各選麾下士卒之勇健者用戚繼光束伍之法以訓練之節制分明器械犀利金鼓有節旗幟有章去歲適當粵警卽可鼓行而前與 欽差大臣兩面夾擊不徒坐營自守以老我師則此烏合之衆自可一朝剿滅何至粵西糜爛轉而波及湖湘旣入湖湘則士民商賈望風逃潰永州衡州自難堅守師或左次理亦宜之猶張巡由雍邱而退守睢陽也但長沙之守必須牢固外有救援當必無患倘或不支則與城存亡知必有道以處此矣至於江西地方論者以爲賊必不來將由洞庭東下長江或由湖北漢水以向宛洛則僕竊不以爲然夫江西爲魚米之鄉不惟自給兼足資人倘如司馬錯伐蜀之策先取江西爲資則強而且富有何不可況兵法乘虛有聲東而擊西者韓信明修棧道暗渡陳倉鄧艾走陰平七百里無人之地皆

其遺策此時武昌岳州必有重兵堵禦倘賊探知江西無備命一旅由袁吉而來則臨瑞震驚南贛隔在上游南昌必至坐困况穿江西之境由鄱湖以出大江其道尤逕倘直犯安慶池和以下並皆風靡賊踞金陵以爲巢穴稍稍截阻淮揚運道禍卽不可勝言故審度地勢懸揣賊情江西誠當先爲之備然爲備而但謀築省城而浚其濠尙爲下策夫江西之地環列十有二郡贛州踞其上游九江爲之門戶吉袁二郡貼近湖南今贛州九江皆設重鎮袁吉邊界亦皆調兵以守卡矣然承平之兵實不足以當賊而其騷擾反過於賊萬載盧翰坡太守之子近自桂林回來言粵西之兵全無技藝臨陣惟恃砲火遠見賊影卽將砲火放盡賊近則棄砲而逃周制軍雖手斬之而不能止且中鴉片之毒者多能披堅執銳者絕無其人粵兵如此湖兵可知而吾江西之兵更可知無已則團練鄉人實爲古法然攷之於宋韓魏公之義勇王介甫之保甲皆有其名而無其實近人之說亦徒紛紛吾意省會之地當先選將以練兵爲五人十人之長必才力過於五人十人者爲百人千人之長必才過於百人千人又有智謀者練兵則悉照紀效新書之法以精神力貌選人而分別授之以器由隊長以上節節制之令士卒目皆識旌旗之色耳皆知金鼓之音分合進退一惟上之所令而不敢少梗於省會練兵三千盡成勁旅復擇其尤者分布各要郡要地令其以一教十以十教百以百教千如此則不惟省會有兵各郡亦皆有兵兵皆如父子兄弟之相依

耳目手足之相習賊必聞風不敢入境而亦有以待之矣但欲練兵必先供餉欲供餉必先糾費欲糾費必先設局宜於省會立一總局稟知大憲公請鄉大夫賢而有才者爲之主人賢而有文者爲之輔佐而又旁羅俊乂或善謀畫或工書寫或負勇力或精技藝或善走集或工闖探並皆收而養之以爲吾用省局既定卽頒其式于各府府又頒其式于各邑郡邑有警省出銳師以援之賊或由蘄黃下至九江則省兵出鄱湖以截之于以紓 聖天子一隅之憂而並可爲東南數千里應援之助豈不美哉詩云迨天之未陰雨徹彼桑土綢繆牖戶若待臨旱而後掘井晚矣世有知道之君子必不以予言爲早計也東伍選兵之法其說綦長予別有述茲不具贅

涇縣包慎伯集中有鄉兵對一篇謂練鄉兵有七病一恐藉民爲兵糧難繼給二恐揀閱鈍弱罰不可勝三恐強梁之徒欺凌爭鬥四恐率長恃衆挾制官長五恐奸民煽之或至不測六恐鹵莽撥調遇敵則潰七恐事靖當罷人無所歸欲去七病而收其功須用已說其說謂州縣親民之官須減從下鄉喚集各鄉知事矜耆賜坐與食面諭以盜賊之害團結之利使鄉民曉然共信官長籌備保全而無調遣陣鬥之患其法于巡鄉時一面給門牌查戶口以二十五丁爲一甲立其素爲民所服者爲甲長甲冊成乃議派兵古法三丁抽一今州縣十六以上五十以下之丁壯常過十萬五而派之邑可得二萬人

五人爲伍五伍爲兩兩置長揀甲首點充兼督教閱不附兵額憂患相卹善惡相保坊郭工商一律編派兵法四兩爲卒鄉兵恐人多難制故相卹相保至兩而止二兩立一師擇兵之能者或武生及邑之有材技充當優給餼食教以技仗部伍貧富必均其役不入伍而願學者聽古富者出錢貧者出力之說斷不可用其有好義願輸兵需者從優獎勵不願者勿強各兩彙冊呈令令據總冊割爲幾鄉鄉各千餘人各度曠地爲演武場每季就閱其輪派應閱之人兩長呈單備點師名填于兩冊之端閱時不精技仗坐師不遵約束坐長優等多者師與長有賞閱法比營賞法加厚罰差薄行之必信其兇橫滋事者兩長白于閱時按律重懲間有出衆之能數閱後卽申請褒異拔于營標收用以明收材技之益陰除驚悍之害閱畢照文課例標示優等千鄉蓋兵有常數而無常人則無逃籍與無事而食之患而有人皆習兵兵皆可用之效令閱兩載之後守于仲冬就縣一閱賞罰如縣縣閱于鄉甲日發乙鄉牌乙日發丙鄉牌府閱于縣間一日離城遠者往來不過三日公堂發飯食錢二百四十文每里所需歲不過三十千文捐公自辦不經吏手勸諭應不甚難也夫家結爲伍伍結爲兩比戶相爲保卹雖無賴羣橫所向而皆遇其敵流匪聞之勢必遠竄來則人自爲戰據險拒之易易耳包說如此與戚說不同蓋戚之法精練官兵以破滅寇盜者也故用束伍之法以嚴其節制包之說團結鄉勇以保全地方者

也故用保卹之情以密爲聯絡節制者將軍督撫之事保卹者郡守州縣之事合兩法而用之天下幸無事矣予故節錄之以備用

答某友書

熊少牧

書至承詢保甲事宜知邑侯舉行保甲聞足下賢能具禮屬爲保長此周官黨正閭胥鄙師縣正之職與州縣相助爲理者也保甲法自成周迄兩漢後魏盛唐明初皆循之勸善良諸奸慝課作息謹守望以鄉人治鄉人耳目近而情誼親洵政之至善於民有利而無害者然行之或恐其擾而弊且滋甚則董事不得其人耳廉明公慎如足下旣嘗取于清端陸清獻張清恪王伯咨諸儒先之論研究其理隨時制宜矣迂疏如不佞亦勤勤焉就而商之抑何虛衷斂氣乃爾邪因辱下問敢舉所目擊而愆然私憂者與參末議焉吾鄉距行臺省百里川原明秀田壤沃饒居氓業耕讀頗知自愛無奢靡些窳佻儇之習乃歲久齒繁俗替濡染洊深其不軌有三端及今挽之或不至江河日下乎一洋煙之流毒也鴉片製自外夷購以重值燐爲煙膏偃臥卽燈燭力吸之熱蓄五內成癮按時必吸斷之則疾垂死面鰲形槁萎茶不任操作始爲豪有力者能致浸假中下戶皆耽之老少男女貪嗜無忌津亭邨肆設館爲囚士落殖農輟耒婦休蠶織迫卓錫無地錮癖轉增黠而穿窬賤而倚市罹罪罟戮戮倫勢不至轉棄溝壑不止嗟乎狡夷造此

以厲中國其深謀誦算豈僅在囊括內地之財貨而已哉乃閩者不悟甘以身殉此輩原無足惜其隱禍豈有極耶一神祀之諂瀆也里有社蜡大儺報司嗇宣時氣禮也至若民所瞻仰民所取財用暨以死勤事以勞定國禦大菑扞大患在祀典諸神則天子諸侯建國置都設廟祧壇墀而祭之以爲民祈福非閩閩所敢擅祀沿至近代祠宇所在多有謂忠孝節義秉彝攸好瞻禮足以興發其志意猶之可也卽蘋藻以昭忠信君子亦嘉予焉顧今之奉神不然廣廈文棖瑋閎輪奐雕塑土木魁然鬚眉瓊弁褰衣金輿纈幔又或磔髯努目或靚飾仙姝咸幻變有生氣儀仗之盛僭踰無等歲正月初吉天貺日中秋節必出行香靈旂辟塗葆蓋簇列鼓吹風曳鑪煙霧噴遠近結綵龍攢護有長至十餘丈者鳥鎗雖厲禁亦盈千累百響震山谷觀者舉國若狂抵迎祀之家牲牢犒勞壺殮之費衆視其豐嗇爲喜怒每行香一次綜計所耗不下三百餘萬錢歲歲有贏無絀神聰明正直其能罔怨悁乎他如爭道忿鬪斂貲乾沒以致鬻訟牽連在所不免尤可咤者村人寒暑邁疾輒禱神夜醮縛一豕覆以病者褰服鉦聲角聲剗豕聲巫師唱喝聲交作比鄰亞旅秉炬火謹囂馳幽谿叢薄呼魂歸魂歸病者呻吟牀褥如痴如夢幸而遇醫霍起推功神佑往往有禱未畢而奄逝者余一燈兀坐幾於無夕不聞嘻神耶魅耶人爲之耶又烏從而知之蓋鄉愚惑於石言莘降史冊可徵而僧道復侈言因果報應以投其好而堅其信列子謂楚人鬼班固謂湘沅

之間重淫祠繇此觀之信矣右二端皆足下聽觀所及盍達之令長令長因達之大吏嚴加法禁庶弊可去其太甚歟顧嘗究推其故要緣於不明理不明理緣於不讀書不讀書緣於不擇師故吾終舉一端則塾師之濫忝也古者家塾黨庠術序務延鄉大夫之賢而老者主之凡入大學遞升俊選士者胥自小學植其基觀漢之專師宋之大儒初必循循焉小學是講所謂登高自卑陟遐自邇也卽今制以科目取士求工帖括其師類能則古稱先訓門下士精探六經四子書之旨發而爲言因文見道故常成就偉才明體達用爲國家楨幹詎意教術流失以來小學悉廢村夫子冬烘頭腦授受庸猥甚至屠酤小販方外飢寒無賴之徒茫不解少儀內則弟子職爲何語亦抗顏號召童蒙以資餬口所課別有俗本訛言破句鄙倍不倫彼田翁園叟利其值廉而禮簡使子若孫從之游卒之帖嘿二三年仍一丁不識或稍長知自振勵時過無及且童時先入者爲之主心薈日豐夫何怪其瞽於所處不審其義之當爲不當爲哉然則塾師之關繫良非淺鮮天下事有似輕而實重似緩而實急者此類是也足下周旋梓里所接晤諸父老可將擇師之道懇切申明將教修經正經正民興前二端亦不待懲誠而媿悔自生他日采風便當頌吾鄉爲小鄒魯矣以外若武斷鄉曲開場縱博訟師土猾私習天主等教保甲條約已詳不贅

覆文任吾書

曾國藩

團練之事極不易言鄉里編戶民窮財盡重以去年枯旱十室九饑與之言歛費以舉團事則情不能感說不能動威勢不能劫彼誠朝不謀夕無錢可捐而又見夫經手者之不免染指則益含怨而不肯從事故國藩此次辦法重在團不重在練團者卽保甲之法也清查戶口不許容留匪人一言盡之矣練則必製器械造旗幟請教師揀丁壯或數日一會或一月一會又或厚築碉堡聚立山寨皆大有興舉非多歛錢文不可方今百姓窮困無生可謀治之者當如養久病之嬰兒攻補溫涼皆難驟進風寒飲食動輒爲咎故鄙意重在團不重在練抑且不遽重在團而先重在辦土匪我不能有利於民但去其害民者而已而害民之中又擇其尤甚者如尊書中所謂會匪頭目搶案首犯斬刈無赦其餘可有原者皆行保釋最爲得體舍粵匪而求脅從舍豺狼而問狐狸此近來大不平之事也勸捐之說苦無簡明條例不足取信於鄉人條例必頒自戶部乃可據爲典要此間亦無刊定要例不若就鄉人所願爲之官願得之封典告知省城主持此事之人然後較量多寡以定從違其可捐之戶亦須擇其尤富者至少亦須大錢一千串乃可起捐庶小戶無勒派之弊而國帑有尺寸之補李筱泉年兄醅厚明白僕所深盼若得諸君子相助爲理必有可觀足下所代作告示都爲妥善惟第七條按戶出丁到處練藝尙與鄙見不合鄙意各鄉但行保甲之法團而不練惟城廂則操練一二百人以資剿辦土匪之用待歲月稍久民心信從然後層

層引入庶費不多而事易集耳

上督撫憲緊要事宜歸入善後籌議五條

魁聯

謹將寶郡目前緊要事宜就卑府管見所及有當歸入善後章程一併籌議者酌擬五條恭呈鑒核

一善後章程應通盤籌畫以期一勞永逸也寶郡轄一州四縣幅員遼闊民猺雜處毘連粵西自藍正樽曾如炷等迭次滋事之後刁悍之風日甚一日比年滋事雖俱在新甯而寶屬所慮實不止新甯一縣訪聞武岡一帶痞棍藉保地方民食爲名私立關卡沿河阻搶與淑浦黔陽交界之區尤匪徒叢集若不乘此通盤籌畫徹底查辦不特患等養癰並恐變在眉睫

一地方痞匪請大張告示俯准就地懲創也痞匪愍不畏法由來已久若拘泥成例一一辦案不特訟獄滋繁囹圄充塞而且情重法輕稽延時日惟有拏獲審實登時處死一法方足以快良民之心而懾羣民之膽擬請憲恩俯賜大張告示俾地方官有所遵循而匪徒稍知敬畏此亦先聲奪人辟以止辟之意

一慎重緝捕擬酌籌經費俾資召募訓練也痞匪之多由於地方官捕拏不力其捕拏之不力者半由無人半由無費訪聞此等痞棍多有軍械呼嘯成羣動盈千百斷非差役所能捕拏若輕易會營不特犒

賞維難而且事多牽制且營兵衙役之中卽大半與痞棍通氣擬仿照苗疆練勇量爲變通酌於鄉勇中選募五百人配給衣糧器械府州縣分領隨時訓練專司捕拏痞棍匪徒不准承辦差票各縣所領春秋二季送府考驗寶慶府所領由長寶道考驗若地方官督率有方認真訓練其收效可與鎮筸練勇相等以之捕拏痞棍較之兵役亦易得力惟寶慶雖屬瘠疆究與苗防有間若歸部議必格不行而整頓地方似非此不可且此項經費雖爲數不貲然一二年間果能匪棍絕跡卽可徐議裁汰較之頻年竊發重煩徵調所省較多惟目前如何籌措應否歸於善後案內核議辦理之處伏候鈞裁

一各縣城垣宜修葺完固以壯保障觀瞻也新甯城樓上年兵勇圍攻時放火燒燬固應趕緊修築卽寶慶郡城週圍查勘亦坍塌過甚不特保障所資抑且觀瞻所係或籌款興工或設法勸捐均屬目前要務再新甯衙署及千總營房考棚多被匪徒折毀均係棲止公廨且亟須開考似應請飭其迅速興修歸於善後案內辦理

一各縣保甲應認真編查以備荒政棘手也保甲之法本爲弭盜安良之善政惟地方官奉行不善假手丁胥差保則無益於民而徒滋騷擾寶慶地方最慮旱災當此豐稔之時民情尙易浮動若稍值偏歉大勢洶洶匪徒從中播弄尤易釀成事端擬乘此大兵甫竣將各境匪徒盡法懲辦之後卽督飭各牧

令教雜編查保甲先訪每鄉公正紳耆交給牌冊告以清理地面保護身家之意其十家之中互相查填出結一鄉造完卽將簿呈繳地方官便道抽查量加懲勸倘一家之中有不安本分之人其劣跡昭著者准紳耆送案懲治若劣跡未著紳耆但不敢保結卽令其九家互結此一家另自出結隨時察看辦理寬其期限不許在官人役干預愚民雖難與慮始易與圖終但得一二鄉辦理妥善則各鄉自踴躍從事一半年之間果能次第辦竣則丁口之多寡戶族之強弱孰貧孰富孰莠孰良可以按冊而稽瞭如指掌匪徒固無所容身而荒政亦有可藉手者矣再戚令籌議善後章程內開擬請改食粵鹽一條查食鹽口岸奏案恐難遽改惟是灘高路遠淮鹽從無運到新邑而小民苦於食淡不能不藉買粵私痞棍藉緝私爲名私立關卡糾衆阻搶利之所聚衆爭趨之此弊一日不除新甯之患一日不了至應如何辦理之處并乞鴻裁

團練說

朱孫詒

咸豐八年戊午七月客有謂於余曰粵自莠民倡亂十有餘年其始未嘗略地攻城迨洪楊諸逆占踞永安後雖棄城北竄而相繼而起者踵相接也近今幾載失陷城池難以枚舉今水陸之師克復數郡中丞勞公奏調吾子總司善後將以何者爲先余曰團練客曰僕在此有年矣具悉民間疾苦困於賊者難堪

困於團練者亦甚借團練以科歛錢穀者無論已有名爲團總而實通賊者不惟鄉閭仰其鼻息以圖保身家卽地方官亦聽其指揮以苟全性命有藉充團總而大獲重利者其始將微物以餌地方官其後遂挾制地方官以魚肉鄉民甚至自相雄長生事忿爭又或率其黨羽公然爲盜種種流弊莫可名言吾子千餘里啣命而來而但言團練何也余曰此皆未嘗經官辦理亦辦理不得其人之故也客曰苟得其人當講求吏治何專言團練也余曰今日之廣西任團練固不能致治廢團練亦無以已亂吏治應以團練爲先也客曰何以言之余曰詒自五月抵粵居會垣者已旬餘駐柳郡者倏兩月所見所聞與吾子之言大約相同然各府州縣莫不有團賊來或順從或驚走毫無所用賊去或科派或欺凌擾害不堪此等情形豈能致治若竟廢之則械器山積手所便攜猜驚習成目所慣覩不逞盈郊逋逃遍野兵不可恃勇難長養此等情形豈能已亂惟有遴選人材實行團練竭力整頓仍不外因勢利導用心督率要必使若網在綱無團練者使之有團練以便稽查有團練者使之就範圍而歸約束但團練之患率有五等一患經費難以持久二患恃衆恐其橫行三患有事未必可靠四患官民難免紛擾五患伏莽未能悉除蓋團練固資經費今團練無薪水團丁無口糧則經費無難持久矣恃衆橫行容或有之今每縣團總不過數人團長十餘人團正數十人兼立百長什長使其遞相管束以人分路管領以地且悉聽地方官指使總

聽命於官是可操縱自如也無慮其橫行矣有事難靠匪惟團總恐難靠而遂不行是因噎廢食也今凡官總其權也

城市有店鋪之處暨殷實之家令湊資練勇賊來練勇當先團勇幫助一方有警悉調各城市之勇聚於

一處分途防剿久之不獨練勇可靠卽團勇皆成勁旅矣官民紛擾乃辦者不得其法今畎畝不曠其工

作室家不罄其蓋藏官惟勤於督責民自樂於聽從行所無事何紛擾之有伏莽不除最足爲患今三人

會團必令稽查匪類窩家是兼行保甲也外匪固不能來內匪亦奚由匿何伏莽之有無此五患間以暇

時校其技藝齊其隊伍逐層

團總團長團正伯長什長

訓誨使之輯然和睦有勇知方行見民與民

鄰近莊村

相聯絡而友

助可期也民與官

鄰封州縣

通呼吸而應援足恃也豈惟盜賊不生亦且禮讓可復而吏治民風駸駸乎日上

矣團練顧不重乎今所定團練條規皆力祛團練之弊而實收團練之效者子曷不詳閱之客乃再三紬

繹反復思量不覺勃然而興曰有是哉吾子之所言團練如是之詳且善也曩者吾子在楚所至之處共

知取效於團練長沙十二屬惟湘鄉至今完全九府四直隸惟寶慶未遭兵燹不意初來嶺嶠獨能洞悉

利弊而嚴密其法以簡易其行也由是觀之非團練斷無以已亂且非若吾子所言之團紳亦必不能以

戢干戈而奠安黎庶也客既知其然也爰書其說以告闔省各府州縣之舉行團練者

黃特軒傳

吳敏樹

黃森字特軒居湘陰東北鄉長樂里長樂爲岳州走長沙古驛道地寬平四面倚山羅江流其閒下入湘水咸豐四年湖南起勇軍將東下剿賊賊復自安慶上犯陷武昌岳州急趨長沙時賊由水路掠船至羅江新市長樂人驚走而其里人有先在賊中者至是以長髮歸脅里中率錢糧輸賊黃君爲里富室挈家去已而錢米大集脅者皆自取之衆怒曰此僞耳相與執而殺之已殺則又大恐乃請豪長者謀之皆尤衆人莫爲計黃君至曰殺此賊誠善今惟有團練耳爾等但能一心致死何患所須錢物無多少從我辦之衆大喜卽日戶閱壯丁具器械立幟於門別揀勇力數百人分營要隘是時巨賊已率衆南上而巴陵土賊大起皆先在賊者一人輒倡數百衆劫奪村聚無敢抗者而楊某陳某爲之渠以千餘人入平江北界之岑川聞長樂獨執殺其黨首倡團練欲乘其未定破之岑川西去長樂五十里一日以四百人天未明而往長樂人不意其猝至黃君方與諸團首會食賊已近里許矣卽呼召其營勇獨五十人先往禦之山下小村地有長溝楊柳蔽翳各不相望見突相遇小橋閒卽刺斃賊大旗一人連刺紅衣騎馬賊殺之卽其渠陳某也因大呼遠近皆應羣賊遽失魄癡立不能動勇益集直推刃仆之殺百數十人又追殺走者賊逃還岑川不能半卽皆走歸巴陵黃君旋又逐之巴陵新牆市土賊卽時皆散於是黃君名赫然聞數縣閒省府盛獎其功其年五月提督塔公已破賊湘潭將收岳州營於長樂黃君與其團人常爲軍導

軍進退皆依倚之明年六月賊帥何某自通城以數千衆出巴陵殺數百人將由長樂犯長沙黃君大集其勇他鄉團皆爭赴之幾二萬人賊至巴陵關王橋距二十里聞礮聲大起卽退去是時粵賊方與楚軍相持於湖北江西常以一股踞崇陽通城窺湖南爲衝我心腹計我軍屢入擊破之旋復合聚黃君嘗以團勇隨官軍剿賊通城賊先遁長樂人自是頗輕賊而團事旣久貲絀不給練營亦遂停罷但以探候約相警集而已又明年五月何賊自通城乘夜入巴陵將復犯長沙卽捲旗輕行走長樂緣山嶺以入殺牧牛兒山中始覺之遽出勇以鬪而四山皆有賊出遂驚潰挾妻子渡水入南山賊亦不敢逼其明日賊將渡水由古驛以上長樂水南地屬平江與長樂合團其人復相聚禦之水上賊竟日望之不敢渡抵暮遂縱火焚市屋下走三十里始渡水至新市夜殺千餘人而長沙已聞賊城備完賊乃掠東境由醴陵萍鄉去蓋長樂團爲省城北蔽者且數年至是始不振黃君鬱鬱以爲恨年餘遂病疽以卒余因避兵早識黃君備知其團事始末其人意氣灑落異於尋常富人倉卒立事有非偶然者然余有以見團練之不易爲而今官吏一聞賊警輒以此責望於民者未察其實也當賊初起常以誑言鼓動一世之貧民彼貧民忌恨富民而欲壞之久矣皆謂害不及我而甚有利則孰肯出其死力以爲富民衛雖出錢財莫之應也應者亦陰挾兩端賊至卽迎之耳故凡爲團兵者必其鄉之人適然與賊角有讐讎而後可用也而其地必

深阻易守人必簡練習部分戰鬪氣力精專而又財用饒給然以居賊所必經地以與賊連歲持久則未
有能也若黃君之爲團可謂能用其人其功效卓著非僅保全其鄉雖及其壞散之時賊終忌之不能逞
殘於其人而省城猶得其一二日阻遏之力至其所恨亦非人之所宜加過於君者也故余嘗謂鄉團禦
賊之事獨宜聽民之所爲而官無多預焉何則彼其身家誠知自急其形勢苟可合而有恃固宜有能因
便而用之若將以爲法令而驅之使集則民苟以其名相應而黠猾之徒妄爲侈張以取媚於官而漁獵
閭伍之利因爲武斷者皆是也此適足以餌賊而殃人奚團練之有乎余故紀黃君而備論之如此黃君
早歲讀書嘗以例貢生應舉場旣棄去以其才治家益興其產而甚能施故里人尤樂從之其爲團練也
官以軍功保奏加五品銜 賞戴藍翎卒時年五十一

現飭通行保甲守助之法並請 飭部詳定就地正法章程疏

山西巡撫
張之洞

竊惟晉省二十年前稀有盜案非無盜也本省民情謹弱不能爲盜曩年殷盛之時聚落稠密屋宇堅完
游民頗少村規甚嚴流亡亦不容棲止匪蹤更無敢窩留外來之盜旣無引線又無窩家自然無從託足
自同治年間設防河之軍客勇數十營紛紜累年而後罷以後屢駐大枝營勇遣者不盡還鄉於是晉有
遊勇邊外七廳土地荒闕亡命潛蹤自新疆用兵大軍出塞入塞皆以歸綏爲轉輸屯駐之場莠民萃焉

於是晉有馬賊自丁戊荐飢戶口大減墟落蕭條村規稍弛貧民誘於小利漸有勾賊窩匪之事此罅一開趨之若鶩於是晉有外來糾夥劫盜比年日益橫肆光緒五年通省劫案凡四十九起六年劫案凡二十九起七年劫案凡五十七起本年十一月以前劫案凡二十九起最甚者莫如去年三月蒲縣黑龍關有盜匪直入汛署劫奪獲犯戕殺把總王標一案今年十月泰義縣有盜匪多人白晝入城開放洋鎗劫奪錢鋪奪門逃逸一案解州有盜匪十三人踰城而入開放洋鎗劫奪錢鋪旋於五日內連劫陝豫境內拒傷弁兵一案各盜大率皆直東豫三省界上游匪平日冒充賣布賣帶小販分股入境混匿城市伺便而發蓋直豫兵力較壯未能大逞稔知晉省兵單而民懦輾轉招引踵接而來此據各盜供詞與諸路採訪一一相同加以今年大青山後荒旱流民南徙就食者麇集歸綏多方彈壓時虞滋事臣節次嚴檄通省文武防營將領講求緝捕協力擒拿調派馬步兵勇於南北路分段梭巡惟是兵役之力僅能及於城汛要衝非集勸民間自謀守衛不可因飭通省地方官力行保甲勸諭居民聯爲守助約查晉俗每一村爲一社若一村有二三公廟則一村爲二三社社各有長村民悉聽指揮因令卽以社長爲約長仿古人連村置鼓之法令其鳴鐘鳴鑼相聞平日則自清窩匪聞警則互相救援協助兵役攔截追捕優懸賞格詳定條規不令造冊點名以免吏胥滋擾如將來辦有成效戢匪安民其勸辦有效之地方官捕獲巨盜

尤爲出力之約長可否由臣查明奏懇 恩施酌予獎勵庶可以鼓民氣之積懦輔官力之不周惟查歷任撫臣奏定章程皆以南北路盜風未息迭請將就地正法章程懇免停止而查辦過成案於糾夥持械搶劫兇暴衆著者亦多有酌量情形卽比照土匪馬賊游勇辦理實所以力懲奸宄俯順輿情本年四月准刑部咨酌議就地正法章程原奏內稱各省實係土匪馬賊會匪游勇案情重大並形同叛逆之犯均暫准就地正法隨時具奏錄供咨部其餘尋常盜案統限一年一律規復舊制倘實係距省寫遠地方長途恐有疏虞人犯解赴該管巡道訊明詳由督撫分別題奏等因查核所指六項旣見執法之慎仍示戢暴之嚴極爲明允惟原議語意渾括不得不再請明晰定章以資遵守蓋劫盜中多有五方游匪猝然聚會糾夥多人執持刀械火槍出沒各省界上攔路搶掠迭劫多次逞兇傷人公然拒捕復有窩盜招匪作綫分贓謂之馬賊則仍係徒行謂之游勇則未著號褂謂之會匪則不肯供出會黨姓名謂之土匪則非籍隸本境而其爲害則較之馬賊游勇會匪土匪僅止二三人者而有甚焉其人數旣多器械旣利則擒獲不易其鄉貫旣雜則追捕無蹤卽如目前解州盜案幸而兵役促之河干始克陸續全獲若在平原必已大半竄逸而悍盜兼爲窩主之姜汰榮就縛以後依然遁去歸綏道溫圪齊等處盜案賴有大隊樹軍防營窮搜山後始獲數名然盜首張均等尙未弋獲若羈禁解勘旣恐難免疏虞且不在劫所行誅亦不

足以昭炯戒擬請嗣後晉省盜案如有執持刀械火槍者衆至三人以上者糾劫三次者糾劫致傷事主者拒捕傷人者入城行劫賊數較多者窩緝分贓至二次者有一於此卽由該州縣錄供通稟撫臣查核情形批飭該管道府前往提訊供証確實暫准就地正法如距該管道府較遠者由省派委道府大員前往提訊供証確實亦卽就地正法均卽隨時奏咨緣此七項實與部議馬賊游勇會匪土匪案情重大諸條情節相等則辦法亦應一律設過事拘牽不致因噎廢食俾盜風止息再復舊制如不在部議原定諸條及此七項之內者仍照例解勘其尋常盜案而距省窩遠者仍照此次部章辦理如此明列條目則奸暴旣可知儆而州縣亦不致含糊遷就上下其手與部章防濫殺重民命之意正相符合抑或遇有糾夥持械搶劫兇暴衆著者暫准酌量情形卽比照土匪馬賊游勇一律辦理無庸分別條目統俟部臣核議夫弭亂於旣兆不如防患於將然以晉省近 輔臨邊而盜風日熾若不極力懲遏則南路爲他省匪徒所垂涎皆將以晉爲壑北路挽引朔漠藩部雜居尤多隱患養癰伏莽臣實懼焉竊謂撫良民則以熙媪寬平爲治懲亂民則以剛斷疾速爲功地方官果能於訟獄賦歛存愷悌之心不以敲撲拖累使良懦困斃於無形則一省之中一年之內全活者已不下數百十人正不在稍緩此數十強暴匪徒之死而後爲慎重民命也

經世文編

通飭順天畿東各州縣編查保甲示

光緒十年

周金章

本道奉督尹憲札委督辦順天畿東團練業經通飭東路各州縣遵照在案查團練與保甲相爲表裏保甲既就卽團練亦成自來除暴安良之法莫善於此畿東各州縣逼近海濱現值敵氛未靖河凍將開雖各海口防守已嚴無慮敵舟攔入但當風鶴訛傳難保無遊勇奸民乘機竊發凡爾各邑紳民亟應編保甲以成團練內以保自己身家卽上以慰九重宵旰今與爾紳民約無論在城在鄉除家無長丁者不計外戶出一人人備一械每十戶爲一牌設牌首一人藍旗一鑼一燈一十牌爲一甲設甲長一人白旗一鑼一燈一十甲爲一團設團總副總各一人紅旗二鑼二燈二無事則晝夜邏察嚴絕窩藏匪類之家有警則遠近同心聯爲衆志成城之勢一處鳴鑼萬家接應有盜必獲有匪必除如是則保甲就而團練亦成可以助官軍之威可以懾敵人之胆而仍是爲爾紳民各保身家其城鄉殷實之戶只須酌量捐貲在本團內添製槍械銅鑼爲數無幾此外並不另有苛派強令爲難又何憚而不爲耶爲此示諭爾紳民人等一體知悉自示之後果能實心實力將保甲團練迅速辦成旗械一律整齊技藝各皆嫻熟歷久罔懈愈練愈精除由本道於巡閱時酌發犒賞外更當詳請大憲分別賞給匾額功牌其尤爲出力功績卓著者并請從優 奏獎決不沒其勤勞倘敢此推彼諉日久無成或陽奉陰違虛應故事甚或違抗官長

欺壓鄉鄰本道維有執法從事分別懲究決不姑寬須知此次團練係奉 旨舉辦如有違誤厥咎匪輕各宜凜遵毋違特示

附開規條

一團總副總甲長由地方官給諭須擇素行端正身家殷實者爲之牌首由團總等派定開單送官備案
一城鄉各團皆用千字文編列字號各從宇宙日月字編起

一團總副總用三角紅旗寬闊七尺前書某州縣某城鄉某字團中大書團總或副總姓氏甲長用白旗寬闊六尺牌首藍旗寬闊五尺書明某州縣某城鄉某字團第幾甲第幾牌某姓字樣

一黑夜有警各舉竹絲高燈用長竿懸掛團總副總之燈圍圓五尺甲長四尺牌首三尺兩面皆大書某姓字樣

一各牌有缺少銅鑼者由本團內較富之戶捐給旗燈須費無幾器械不拘何式應歸各牌自行公製如富戶能捐備火槍歸公者分別多少記獎

一各牌內互相查察不准窩留匪類徇隱者連坐誣陷者卽以所誣之罪罪之

一各牌內盤獲奸匪交由團總副總問確送官不准擅加刑戮

一僧道寺院及寄籍之戶一律編入保甲

一飯店客寓各立專簿按日將歇寓各客姓名籍貫年貌行業登註明白就近送團總或副總甲長處查核該團總等隨即親往點驗果與簿載相符在本客名下加戳准留如有身帶兇器形跡可疑並無護照保人者即時屏逐仍於簿內註明每屆月終將簿送官備查

一地方官將團總副總甲長諭定後即責成分查戶口造冊送署該地方官即日親詣復查一面刊刷十家牌填註蓋印發各牌首門口懸掛一切胥役人等不准向各戶索取分文如違立提嚴究

一團練操演每月由團總副總甲長各看一次牌首須朝夕訓練不限日期

一團副總甲長牌首人等由官諭定後限五日內將旗械鑼燈一律備齊呈請地方官稟請本道巡閱

以上各條一體遵照如違嚴究

民團論

葛士清

團練鄉勇四字每字各有實義辦此者能名副其實乃有利而無害團則聲勢氣誼皆宜固結練則進退擊刺皆宜講求鄉則取土著之人而客籍流氓不得與勇則取壯健之士而老弱疲病不得充否則練而不團臨事將各顧而不足恃團而不練臨事將亂次而不足恃鄉而無勇必至遁逃恐後而不足恃勇而

非鄉必至游勇客匪雜處而害更無窮夫臨事各顧臨事亂次臨事遁逃祇無益於捍禦無濟於時艱耳至游勇客匪雜處其間是直揖盜而登之堂室授之器械害將有不可勝言者幸外患之未至則若虎狼酣豢於臥側暫且馴伏一旦有警而肘腋變生噬臍悔無及矣故四字中鄉字尤亟竊謂團勇必團土著投充必得的保然猶有慮焉比年來人心好亂樂禍到處皆然卽土著之民亦尙未足深恃必擇結實可靠之營勇穿插其間如團勇三百人則參以營勇一百人平時訓練既有所取法而其中有桀驁者亦遂得所鈐束而不敢萌他志至統斯眾者有分有總亦宜就營員中簡任之俾申明紀律嚴定賞罰以兵法部勒蓋取其與營勇相習得以檢制營勇者檢制民團也若夫梭巡布置則地段不得不分呼吸仍須一氣是在知兵之營員按法教之而已

現就上海城內團練可略仿營制而變通之每十人爲一隊洋槍四人長矛二人大刀二人短刀二人每隊設隊長一人每五隊爲一團設團長一人書寫一人團長親兵四人書寫隨從一人巡更二人置馬二匹馬夫二人一以供團長乘坐一以備探報之用集成五團分前後中左右號衣上標明團前營團後營團中營團左營團右營並於左方標明槍隊矛隊大刀隊短刀隊右方標明本勇姓名旗分五色中黃前紅後黑左青右白屯聚之處就城內地段之前後中左右分之中營在縣署前左則近大東

門右則近西門前則近南門後則近北門中營設團總一人五團均歸節制設團總親兵四人添設團總坐馬一匹馬夫一人每日午後統至空曠之處演包抄分合之法夜間每鼓每團抽隊輪巡卽以此法行之其團勇名籍當注明年歲面貌居處及保人姓名團勇應募時試以刀石并傳齊各段地保證明居處籍貫確係土著然後入冊其參用營勇鈐束可請現在駐防湘軍統領暫撥每隊多則四人少則二人俟訓練有成可仍歸原伍

保甲論

葛士清

民團之設所以防內有奸宄也而奸宄之來必有窩藏之地不絕其窩藏而徒恃民團以巡之將我東而彼匿於西我西而彼匿於東巡者自巡其如奸宄自在何夫塞水必於其源拔木必於其本保甲者所以塞奸宄之源而拔奸宄之本也竊謂地方除著名紳富及世家大族外凡居民鋪戶皆當實力清查其茶坊酒肆及烟間則更當於夜間行抽查之法或早或晚勿拘其時俾不得窺測而趨避查時按照門牌如多一人卽行拿訊如此則奸宄無所容而內憂庶可絕乎其有不得按門牌以清查者則隙地之潛藏是也如上海城內西南隅固多隙地易生伏莽然果能實力稽查亦不難使之絕迹道在按段責成地保而密遣親信之人覘之如有伏莽立即擒治而坐地保以諱匿之罪度奸宄亦無所容矣

城內茶坊酒肆烟間不一而足宜預先出示限以每晚至幾點鐘一律關閉屆時可先查其已關與否再隔一二點鐘則抽查其人數多少較門牌若何以知其有無窩匿

漁團條例示

蘇松太兵備道

邵友濂

案奉兩江爵閣督部堂左札開照得江蘇沿海沿江州縣漁船甚多捕魚爲業於內洋外海風濤沙線無不熟諳而崇明十漊尤爲各海口漁戶爭趨之所其中技勇兼全熟悉洋務者所在不乏故洋船進海口駛入內江必價雇漁船水手引水乃免擱淺觸礁之虞從前將才如壯烈伯李公及王提督得祿近時如貝鎮錦泉輩皆出其中左爵閣部堂察看蘇松太通海各屬川沙太倉鎮洋寶山崇明嘉定華亭金山奉賢南匯常熟昭文上海江陰靖江通州海州海門東臺鹽城贛榆阜寧二十二廳州縣濱臨江海所有內江外海漁船不計其數漁戶水手除婦孺外不下萬數千人每百人中挑選健壯三十人計可練團勇四五千名餘則編成保甲各縣擇適中之地設一團防局惟崇明地廣人多應設兩團防局而以吳淞口設立總局每月各團操練二次每月入操不過二日每名每日應准酌給口糧團總及教習甲長等按月給予薪糧牌長團勇按操期給以薪糧以資日食並不苦以所難甲長牌長均先行賞給功牌頂戴俾資鈴束操練槍砲技藝嫺熟行水泅水超躍猿升果有材藝出衆者挑充水勇練成水軍益習水操及泅水伏

水等技則沙之飛走水之深淺風潮礁石無不熟悉於中豈獨於捕盜緝私裕課安商諸事有益已哉江海關道職重海防於所屬府廳州縣事宜責無旁諉應卽委令督辦沿海漁團蘇州城守營叅將熟習洋務深明方略兼耐勞苦堪以會辦並刊發關防一顆以昭信守至漁團之設全恃地方官力爲襄助裁汰陋規痛除積弊始期日起有功該地方文武倘敢仍前玩泄一任書差弊混不卽確查實數遇事諉卸卽會稟撤叅等因奉此道府擇於七月初六日於吳淞口設立總局開用關防並委幹員馳赴各處分設團局會同廳縣實力編查舉辦外合亟出示曉諭爲此示仰各處漁戶水手人等知悉沿海沿江一帶漁船爲數極多船旣行泊無定人亦良莠不齊若非實力清查勢必稗草不除則嘉禾難植遇有奸宄混跡其中則良善難於托足矣况保甲團防法良意美實取寓兵於農遺意原爲保護百姓身家宜體大憲愛民之心俾免爾等牽連之患一經委員到縣卽宜聽候編查趕赴縣局報明人船實數勿存畏葸勿得欺瞞尤不得聽人唆聳瞻顧不前若其中有技藝出衆善於泅水行水者由印委挑選給以優薪其技藝稍次者亦選充甲長牌長之任決不沒其微長再次撥充團丁按每月初二十六兩日赴局應操並酌給薪糧以供日食餘則編爲保甲分給門牌或聯五船十船爲一牌互相保結各安本分體恤民情實爲詳盡爾等應如何激發天良以圖自行拔擢無事仍以採捕爲生有事亦獲守望之助皆有知識宜所樂從自示


之後倘敢故違或停泊他處或違採不歸藉端推故及不聽編查者一經委員查出定卽嚴行懲辦決不寬貸各宜凜遵毋違特示


救時芻言一則

張煥綸

西人言兵者謂沿海之地須用漁人爲採哨引導之助近年江督奏設漁團其法甚善惜奉行者不能體會上意或致擾民其甚者又以塗飾了事遂爲繼任者撤去甚可惜也生愚以爲漁團是海防一好題目如文不工只宜改文不必改題也







DS
754
K8
v.18

皇朝經世文續編卷六十九目錄

兵政八 兵法上

控制鎮筵隻兵並察看各提鎮優劣片

與于司馬書

與吳中翰論時勢書

復戴孝廉書


再復戴孝廉書

條陳軍務疏

答曾侍郎師書

與駱籲門中丞

啟陳剿盜十三條 附韓州判勦盜匪說



魯一同

魯一同

魯一同

魯一同

江忠源

江忠源

曾國藩

胡林翼

經世文經

[illegible]

皇朝經世文續編卷六十九

上海葛士濬子源輯

兵政八 兵法上

控制鎮筵兵勇並察看各提鎮優劣片

林則徐

再臣此次親駐鎮筵體察情形酌籌控制有正摺內所未敢盡敘者謹再繕片爲我聖主陳之緣鎮筵地方在萬山之中其人膂力剛強而性情剽悍用之於制敵實能奮勇爭先聚之於平時難免恃強生事駕馭之法本較別處營伍爲難又自苗疆設立屯防以後民間田產丈出歸公專靠錢糧以資養贍所以鳳凰廳一隅之地而兵丁練勇合計有五千餘名之多視他營不啻數倍在當時原爲懾服羣苗起見今苗民久經安貼而營屯轉成積重之形明知兵勇太多而礙難裁減若輩聚集一處角勝爭雄偶有藉端則此倡彼和若不遂意卽逞忿忘生皆已習爲固然恬不知怪此次經臣抉其病根大加訓飭曉以利害禍福尙知感激涕零但易感者其心而難移者其性是以控馭之法不厭求詳臣檢查上年挾借案內欽奉 上諭有人奏苗疆善後事宜一摺著訥爾經額裕泰楊芳會同詳悉妥議具奏等因欽此查原奏內有將練勇分撥三廳安置以散其勢之語此論本極扼要惟因紛紛移駐轉恐啟其疑懼之心而攜帶家

口盤費尤多更無所出是以訥爾經額等仍請暫循其舊臣竊思分散之法與其勒令移駐強以所不甘何如隨時差遣予以所甚願蓋該處人情粗鄙以有利爲喜以有事爲榮其受病在此其得用亦在此卽如徵調出師在別營視爲畏途而該處趨之恐後若尋常差使於應得錢糧之外加給薪水盤費其踴躍更不待言又其一家父子弟兄同在行伍者甚多經臣逐一查明密記底冊凡一家有數人食糧者俱暗抽一人出外差遣使之各有瞻顧仍不明示章程如各卡堵緝私鹽各屬訪拏匪犯之類皆其所優爲者此往彼還絡繹調派似卽無形之移駐而自然之分散也現已試行派遣皆甚樂從臣仍隨地隨時嚴密查察如有未能安靜借端生事者立予重辦不稍姑息似亦控制之一道其在本處則專恃該管鎮道約束有方臣在彼詳細稽查鎮筴鎮總兵楊芳辰沅道王簡現辦營屯事務皆能秉公克己甚洽輿情就目下觀之實屬十分安靜臣仍諄囑該鎮道總須恩威兼濟嚴而不失之刻寬而不失之濫始可常服其心至該處山田磽瘠者多收成本薄而又路途險隘與別處米穀不通今年雨水調勻堪稱樂歲倘值年成荒歉各兵勇事畜無資卽難保其盡能安謐查從前該處儲備銀穀厯因屯田歲租缺額各項經費不敷遂致逐漸借支無多存貯經調任撫臣裕泰奏請清查緣欸目紛繁尙未結報現在飭催該道趕緊查明不許稍有含混其應如何籌補之處容再會同撫臣訥爾經額設法籌畫另行奏辦又查該處民人

近日傳播謠言謂嘉慶初年民田暨令歸公原許於三十年之後仍還民產此時年數已過應請歸還並有欲候臣到之時聯名呈懇者臣一得訪聞卽先飭查何人倡議嚴行拏究於是其風寢息臣復於放告之時將此事廣爲宣諭以從前苗匪四出焚殺伊等田產多爲苗佔卽未佔者亦不能耕種無非四散流亡任其荒廢若不團練丁勇何以戡定頑苗若不均出屯田又何以養贍丁勇豈可於安常處順之後頓忘同仇敵愾之心轉欲自撤藩籬甘尋覆轍該民人等皆無可置喙惟是此等謠言易動鄉愚之聽臣仍諄飭該鎮道嚴密查禁倘再有以此議煽惑平民者卽須嚴拏究辦總之鎮筳爲苗疆最要之區而距臣所駐之武昌省城將及二千里邊防關重實有鞭長莫及之虞惟當時刻留心並責成該鎮道務將一切情形隨時據實稟報以憑察奪至該鎮楊芳原籍貴州松桃廳距鎮筳僅百餘里於該處民情土俗洞悉無遺上年鎮筳兵勇戕害委員蘇清阿經楊芳在籍聞知卽赴交界防範所全頗爲不少此次臣至鎮筳接見該鎮據稱年老耳沉恐不足以副 聖慈委任臣見其精神步履均屬健旺並未衰頹惟聽言稍多之際閒有一二聽得不真不過再與述說一番似無妨礙其於湖南全省營伍皆曾統轄而苗疆尤資得力自在 聖明洞鑒之中此外兩省提鎮臣巡閱所至皆已屢經接見查湖南提督薛陞久歷戎行雖年越七旬而精力極健在出師自屬老手若論平時營務固不至廢弛亦未見振作似不及湖北提督羅思

舉之認真羅思舉出身雖非正路而在湖北提督任內歷十二年操守甚清能自刻苦地方文武異口同聲其所教演雜技皆有裨軍營實用而製造傷藥療治瘡疽尤爲著效士卒民人之疾皆手治之故感激者多該提督自去冬病後差瘦於前然見其上馬登山仍極輕便詢知常時在署兩腳尙繫鐵條其習勞不倦如此似營務不至廢弛至總兵中如湖南永州鎮崇福年力正強辦事頗有才幹可資整飭綏靖鎮明海外貌似屬鈍拙而營務却甚認真現雖六十六歲精神尙能貫注此次臣考校湖南營伍該鎮所轄之兵技藝最見出色是該鎮洵堪勝任惟此後精力何如仍須隨時察看又湖北鄖陽鎮滿德坤本年進京 陛見回任未久其人材本屬出衆雖年逾六十而勇銳之概未衰辦理營務大段不差尙須細爲考察又宜昌鎮珠爾杭阿在楚省三十餘年情形極熟惟宜昌爲川江入楚門戶該鎮於督緝川省私鹽前此似未能盡力近日經臣嚴飭務令於銅鉛船入境之際親往督查究竟能否改觀尙須於冬令覈計功過再行據實具 奏

與于司馬書

時江甯失守
信尙未至

魯一同

日昨奉詣執事適閱勇於安鎮局不獲一見翼日見存又相左也時勢孔棘非可坐論制敵故不敢數數煩溷然私心有所欲效愚歎冀或裨補智勇萬一謹徹於左右逆賊東擾省垣困迫清淮民庶無故驚擾

自相煽惑一夕數變非人情好亂患生於所不見而動於所猝也譬如羣居密室乍見鬼魅人各自孤便若赤髮星眸森列左右非徒民不見賊也乃至兵不見兵平日訓練輕如戲劇符檄之下面色灰死未望塵而肝膽迸散豈有所謂行列部伍坐作進退耶夫以如是之民情如是之師律賊行數千里皆出空虛之地其爲潰散非爲不幸旬日以來消息百端日益危逼然而鎮江之師不西瓜儀之勇不南皖帥變易擁符離之兵而不進坐視金陵之危勇懦一轍環而相顧欲僥倖於犯寇之未必至豈可得耶清河葛爾河垣寄重地小而衝民多而散前無可枕之險退不能據河以爲固聞聲聽息荷擔而立明府吳君以寬勇之資久獲士民之譽重撫此土下車之日驩聲雷動人情固少戢矣又得當事諸君子提挈而翼導之籌餉日益集練勇日益習以此坐鎮必無他變僕豎儒也逍遙其閒喜託身之得所然意少有所未愜者竊謂當事之籌畫善矣所可議者國容多而軍容少夫院道府縣相承貴賤有體容服有章請謁有度文禮繁重傳呼而後進拱揖而退此國容也將帥偏裨卒伍相統期時而集金鼓爲節坐止有方分合有部裁減小禮嚴靜耳目此軍容也國容主於詳雅軍容貴於簡質虛文足以費日盛禮足以隔情應請大帥自今以後皆至總局公見上下不隔耳目交通其三五八十之期悉免司總局者日一至府道閒日至大帥三日至以此爲率惟縣令至無時或疏或數惟其時而已此之謂省事以惜日夫容觀所以變視聽肅

心志應請自今以後大官乘馬出入不得緩步肩輿佐貳統領改用戎裝結束嚴勁與士爲伍章服旣改耳目易觀此之謂變容以作氣局委十數總統各勇十羊九牧部分不明應請以若干人爲一隊每隊領以佐貳官簡閱之日分隊領赴編諸冊籍無事相與講說恩義撫摩痛疾使隊各自親其主此之謂分部以明分簡閱之日大帥居止必有賞罰勇與兵異賞優以體貌罰止於聲色昔路文貞練勇二萬大閱三日手觴賞賚士皆感泣此清河往事也情義旣聯勒以兵法賞加財帛罰及鞭笞漸以增重十日五日犒賚羊酒勇士固多狗寵一殮之德報以七尺此之謂推心以收威練勇各於寺觀棲息非可當此卽安應請築立壕塹製備鍋帳分番駐守漸與之習營數百人官爲統領同止共作亦以番代使平居無事常有嚴敵之意此之謂變節以防猝本邑十八坊煙火三萬戶請家自爲守分爲三等各簡壯丁製備器械報名縣籍已與吳明府言之矣憲諭一出地方之人欣然願樂此非能用之戰也所以陰爲部勒呼吸靈便每當簡閱兵勇調取數坊晷刻畢集排立左右觀習陳勢閱畢閒錯編入率以周巡整齊行次少識旗隊攻戰之意久益親狎所以重固根本鈐制梟桀此之謂練民以歸兵總此數端皆以軍容改易常調逸者漸而趨勞脆者漸而趨堅紛者漸而趨一恩勢固結膽氣自信然其大要又有進焉聖人曰好謀而成董子曰設誠而致行之吾不知諸君子之練此勇也將以備非常而報國家邪將姑爲聲勢以鎮一時之

人心已邪將知其必至而全力以待之邪抑徼倖於不必然而聊與之試邪以浦垣之重諸君子之仁武苟堅意必行無所回惑則當思四郊多壘枕戈待旦滅徹服御與士卒同甘苦傾身養名不以名位自異破除意見以收雄桀之才召詢父老以聯上下之脈夫江介之士去妻子家室上霧下濕蓐食不飽部臣節將親冒矢石之地而數百里外寄孥人自擇便艤艤交於川瀆鞅轡絀於衢路豈惡忠義而不與軍壘之士共主哉一鳥飛百鳥鳴一獸走百獸驚一夫跋足則千人臂掉矣夫去者有與倡而守者無與徒雖斬刖之法弗能禁而虛文祇取侮矣仁者在上所以率之伏惟諸君子自堅而已

與吳中翰論時勢書

魯一同

流賊之禍其起於郡縣之世乎漢之張角唐之黃巢其勢數倍於今日而卒以掃除者漢州郡之勢強唐節鎮之兵悍故也至明之季州縣積輕而鎮侯之權不如一監軍道尊貴相壓非復初制寇之在楚豫秦晉如瀉水平地東西南北惟其所之雖以盧象昇孫傳庭之忠勇曹文詔父子之驍健隨撲隨熾無他大帥有攻剿之兵州縣無堵禦之力且官家之兵有朝廷之節制有文書之往來有供頓之繁費有驛站之稽遲有支給之浩穰賊則不然行如飄風止如蟻集一切取之於吾民民不勸而輸兵不調而集行不請命戰不尅期野掠所獲自肥其私上無吏議功罪無所營惟盜之是驚狂悖暴虐而其心乃齊一堅定故

不可制也以古況今亦略相同矣自正月以來粵賊北犯漢黃不守據長江之勢恣其蕩軼破皖桐下金陵踞鎮揚又分其羣醜涉汴入晉東擾畿輔 國家興師十萬南北攻圍曠日持久兇鋒未損十一二而力已不支矣夫賊無定勢衆多而散行疾無方此非尾擊之兵所能制也制之以吾民民各守其家室統於一令令各守其城垣統於一郡民不變賊殺一賊則少一賊四面而感之賊無所走則窮矣 國家休養二百年兵且畏賊奈何責之民曰不然夫賊卽吾民非有奇才異狀也民去而從賊則勇民居而捍鄉里衛家室則怯此其故可思也賊無紀律法度而能用其權今之守令無權非獨無權以東西南北之人強之爲父母焉爲祖公焉或三月而去或半歲一歲而去其視民與民之視之也萬不能如賊與賊之親則不能用其權亦明矣或小有建樹監司制之督撫制之臺省又制之萬不能如宿賊與新附之賊之能必用其權亦明矣苟能用權以狂虐無賴數千之醜徒橫行八九省而不可制苟不用權雖以 朝廷之威德賢士大夫之聲望不能使一城一鎮之人臨變而不去爲今之計獨使天下之守令各私其郡縣郡縣亦各私其守令則賊無所乘而入如之何而能私令不十年不遷終其職者卽削其故籍而居焉守不十年不遷終其職者卽削其故籍而居焉令之加官可至四品而仍令守之加官可至二品而仍守守令之上獨留一總督以主軍事而民事民兵全付之守與令城垣其牆宇也倉庫其困害也四境其田里也

民知守令之爲吾守令則忠義有所效守令知民之爲吾民雖欲虐用濡惜而不忍竭力欲苟且而後顧無所諉讓而權乃能行乎其間今天下州縣慮無不言團練比如團沙膠之而不固擲之而仍散非權不能團非久且親團亦不堅久且親矣民之糧鋤白梃賢於十萬師可也

久任而削其故籍略用顧氏郡縣論之說要爲近日救弊長策不必

說之自

己出也今夫天下之大患蓋莫如貧矣興師十萬日費萬金軍興四年所用不下二千萬籌餉之艱固非

意外事也誠重守令團鄉兵則可省客兵之半夫以西北之兵而救東南遠者數千里動經旬月兵未至而賊已去賊未見而帑已竭矣凡兵行糧人日三百錢若以守令督率鄉兵人得百錢便有飽騰之效又

無道理之費驛站支應之苦愛其家室知其道路家出一丁雖小縣可得二三萬人當賊未至小村並大

村小堡並大堡勸其長老私相董率官與旗幟

凡旗幟勿令私造既慮參差且權之所在不可假也

以時訓練而約束之賊至百里

之外然後支用官錢勒成部伍追賊不出境遷徙不出境出境有誅凡支官錢動用地丁正雜准與開銷

正雜不足私相捐輸皆登簿籍報部而獎之凡本縣民瘠許一府之內外有殷實相爲輸將仍不得抑勒

凡輸錢粟於鄰境獎有加凡錢之與粟相爲低昂錢出之官粟出之民今年以來粟價頗低凡富貴捐粟

加二三成入冊鄉兵得粟便可坐飽粟有所洩其價必平凡一縣之鄉兵與四鄰分日而會於境凡賊至

一縣則四縣交出兵而會於境凡賊至一府所屬之縣各分三之一交出兵而會於府

惟此不在凡出境出境之例

者糧有加凡用鄉兵皆報府凡督撫提鎮以下皆不得調用鄉兵如此則遠近相聯村與村團鎮與鎮團縣與縣團如手足之捍頭目不呼而集兵無遠涉之苦國無籌餉之艱賊之平也有日矣額兵不足於是有招勇勇須鄉也鄉須勇也今之招勇大概募兵昔人有言輕去其鄉安望其勇旨哉言乎招勇有二非飢餓無賴卽梟桀不逞苟錢粟豐裕賞賜優渥可激使一戰亦浪戰無法乘勝爭利易蹶主將脫或支用不給小不如意睚眦而疾視沙行而偶語一旦有急鋌而走險不能有益適足爲禍夫無故費數十萬之帑招羣無賴不逞而養之以待一旦之變失計無過於此前勇旣散後者復招拾人之餘轉蹈覆轍甚無謂也古者招勇不出其鄉用勇亦不出其鄉故曰鄉兵或有山陬海涯兼輿屯田自昔行之成效尤著議者多以東南之民柔脆招用西北之勇於是有川勇楚勇壽勇徐勇時或用之得力亦必強宗豪姓素昔蓄養自成一隊多則千人少則數百固非臨時烏合取濟又苦大帥統之無方馭之無術良者弭首而就法強者長嘯而遠引此不足喪豪傑之心開禍亂之門乎古之賢將多蓄牙兵握手親暱與共生死衛隊強盛雖有客兵降將力能鉗制今之法制臨敵命將素無爪牙猝與之以大隊之勁勇本輕末重上疑下貳彼皆各爲其主萬無相能之理亦非大帥之咎勢使然也故莫若各用其鄉自戰其地得賢守令撫而練之使耕戰相雜一歲之中便成勁旅何必遠徵輕滑自取駭散昔劉裕稱京口爲勁兵項籍用江東之

子弟豈有東南之人不可用之理乎夫穎毫素稱强悍漢黃古多獷桀然而賊衆一至大股裹脅乃反而爲之用近日揚州清勇濠泗居先至於六合一黑子之地丹徒爲文柔之鄉雖逼近賊巢而民氣自固鄉兵若此招募若彼明效彰彰矣

復戴孝廉

魯一同

桐城再陷牧庵以屢勝之兵一蹶不振方進兵之前三日有書見告心常耿耿道路阻絕傳疑百端足下身在人間所見既真又無所庸其憎愛當有確論書以示我足下初意就曾侍郎不果而就袁都憲今侍郎駐兵何所都憲被議入都足下一身將安之乎海內擁重兵持節鉞者不下六七公其才氣志量果足以當大難之衝固疆圉於磐石拯斯民於水火者不過二三人又皆更事未久獨恃其志氣以馳驅於倉猝受命之際根基未立籌略未定兵分而無統勇驕而難馭餉缺而不給而欲以乘機蹈會蕩掃羣氛蓋亦難矣此江帥之所以死而曾侍郎之所以逡迴而不得進也今賊欲掠漢黃躡武昌旁趨廣饒死守廬皖九江之師不能進尺寸以擣江左綜覽天下之大計決非歲月所能定比如一人之身癰疽流注先當壯其元氣使心膂支體之間血氣融固瘡痍不生然後可聚一身之力以攻其毒昔王逸少諫深源北伐謂須根立勢舉謀之未晚祇此四言深明大略所謂識時之俊傑活國之良方而英拔之士乃欲取成一

戰僕未之前聞也今天下不被賊之省尙有八九被賊而未劇者尙有二三竊謂深謀老算之士當先注意於此須近賊之邊各自有守重守令之權勤耕戰之務復一城則一城守得一險則一險固夫曾帥擁數萬之精卒乘新勝之全勢蔽江東下而豫章不能翼其南皖桐不能犄其北是謂孤軍單進勝則旬月可以成功敗則進退失據此智者之所共知而曾無一人籌萬全以善其後可爲長太息也來書謂江帥赴皖時侍郎以僕與足下薦諸幕府資商大計惜哉不見此公一拊掌也足下若決計北行者試以此言誦諸當路天下非孤注功業難幸成非智深勇沈之士不足與共事亦不可與共言古之報國復仇者不期早發期於有成惟願忍而固之以待事機之至若屢試不中則鋒銳消亡盛壯之氣慘痛之情不可復追惟足下忍之而已

再復戴孝廉書

魯一同

當今禍亂方始非有出羣之雄乘藉勢力扶倡名義財足以結州郡之豪義足以動遐邇之心苦身力戰以樹基植業勢不足以抗拒羣兇屏蔽方域至於隴上之夫太息俟風雲幕下之英指揮分楚漢要是腹背之毛須憑藉乎六翮故不能逆風而獨往已嘗試頓五指而計之今海內長者誰爲憑藉乎昔者張陳之交驩分身泝水曹呂之親密閨門並命令之達者無古人之傷快而蹊壑之間動相什伯故有武夫露

刃猝起兩柱之下銀章白簡密陳温室之上積愛生信積信生畏積畏生猜積猜成殺雖復流涕動三軍撫孤感行路又安能以不貲之身取償日暮之一悔乎足下國仇家恥並在一身疾首痛心思有所藉以恢大業惟願慎其所憑而已來書又以僕所陳根立勢舉得滅賊之本而未免迂緩請更得而申言之粵事初起僕在京師誦言當路以爲潢池小醜何勞大師但復土司數姓責以成功其人宗姓豪強山蹊磽峒徑途熟習跣足趨捷長技皆同復一州鎮便以相假得一蹊洞永許鎮壓昔時改土歸流今仍改流歸土不費京帑不勞征調期歲之間便可大定先時泗城黃姓土司之後宗黨頗盛賊犯泗城黃率子弟守城殲其黨羽殆盡此其成效昭然可觀假令此策遂行何至勞師五年流毒海內至今爲梗哉當時朝士不能遠慮謂爲迂談故計有似迂而實切事有似緩而實要此類是也賊在潯梧初無遠計及翻然度嶺便有長驅江漢窺伺河洛之心故長沙未下先擾鄂岳武昌一破順流東趨金陵襲踞遂窺東汴逾太行之嶺叩臨洛之關橫擾畿南廻翔齊右如狂風盲雨瞬息變滅賊之言曰不怕殺一千祇要走一天不怕死一萬祇要破一縣其用兵大略可以想見獨於金陵盤踞三載似有規爲根本之意而分兵沿江死守廬皖屢殘漢黃三破武昌窺賊之意初欲出奇竊發畿輔以震動天下北略之不行然後橫踞長江往來策應亘天下之腰膂斷南北之襟喉此其志不在小曾侍郎起湘南之衆下巴陵之船一戰而復漢陽再

戰而奪江夏乘勝長驅有破竹之勢然而兵阻於九江船阨於湖口賊效死扶傷死守不下羅大綱石達開之黨悉銳來援者攻其所必救也假令以此之時以一將綴金陵一將綴廬州按兵不動而獨命一上將將水陸之師捲甲疾走不攻一城不接一戰直造二賊之背西面以爭湖口之利則九江必下從此以東便無堅壁袁副憲久鎮臨淮留討諸塢而僅遣忠壯營之二千人行收城邑卽無桐城之挫亦理不得達何者兵少而將輕留戰不足孤進不能逆賊生心反用吾術以撓曾帥之後曾營所將皆三楚輕俠聞賊走其上游勇氣自然挫折凡用兵如布碁先後輕重之間不可不察也側聞 朝廷已命大將率北方新勝之兵專救武昌以壯東師之氣然而廬鎮金陵皆攻圍數載征輸浩竭誅求徧海內晉陝之富室吳越之商賈兩淮之鹽筴朘削搜括骨髓枯耗奉行之吏不能深固根本誅求箕歛以歛怨於下於是楮幣之法行重錢之局設抽釐之令下其近賊之邊縣各有募勇募勇百人歲耗千金官吏因緣爲奸利橫索抑勒爬搔疏櫛關津坊市百織千羅民怨深矣故今日之憂不在已被賊之省而在未被賊之省不在已殘破之州縣在未破而先自殘之州縣不在已從賊之民在未從賊而岌岌思爲賊之民故愚之計以爲今日經營天下之大勢當先注意於此

首重州縣之權自漢沔以下東至海門州縣百數賊一日不平州縣一日不得升遷調移貪酷者革之甚

者殺之賢者進秩平時勸農練勇支動正課要以積穀多而練勇勤戶口實關隘修者爲上考上考之令加秩進律凡賊涉縣境力戰却退或圍城日久堅守不下皆爲首功許蔭子弟其有臨變寄孥心懷去就藉辭越境巧避賊鋒者一繩以法夫戰勝則子弟邀其榮變至則骨肉不得保其於愛民勤職不期自奮民便久職自親其上寇至出戰用素練之民出必死之地有如手足捍頭目家人衛親長縱不百勝其與今之視若傳舍固相萬也其城池已爲賊踞民心去就未定者吏部且停其選縣有強宗豪姓能復一城卽權縣事復一鎮者與以權丞簿尉之職需待賊平編入流官人情劫於久威易致翻然須令常有所繫又其本土族姓恩威易治強者希覬富貴而榮居其鄉殺賊必力羈以名器則常爲我用予之分地則上下協力盡停入貲銓選之塗使近賊之郡仕途必出於武功如此則沿江數千里皆爲賊敵凡賊所守不過一城之地過師枕席之上駐軍藩籬之中何有長江之不能斷金陵之不能拔哉

次講耕戰輔順以行其於滅賊可期旦夕然其施之也有方而攻之也有序賊之初起數千輩愚妄人耳脅從旣多遂出梟桀又有縉紳科目之無恥者閒廁其閒指使引導於是其教則參以泰西其軍制略仿周官軍師卒旅其官雜取漢宋諸目色而其用兵之法令嚴而法簡行速而多詐旣得金陵志意稍滿僭立制度然而未有立國之勢也自古戰伐之朝有立國之勢者則先攻其本桓溫之直走成都王鎮惡之

汴舟渭水韓擒虎之順流三山李愬之夜入淮蔡是也無立國之勢者則宜先翦其枝張角死而飛燕黑山熾仙芝殛而黃巢尙讓橫迎祥滅而自成獻忠狂皆繇賊基未立東西游走合散無常殲厥渠魁則各自雄長益多樹敵翦除黨翼首惡自孤夫賊猶蔓草寸寸而斷之隨地滋長根株雖絕枝葉轉茂爲今之計莫若暫緩金陵之攻而耑收旁郡豫帥壁信陽收蘄黃皖帥仍壁廬收舒桐江帥壁廣饒收宣歙蘇帥壁江南北帥壁江北仍同收瓜鎮皆觀釁擇利而專責西帥以上游之任武昌若復深駐大軍營繕耕戰益具舟船練習水師以觀變待時而以曾侍郎九江之圍爲綴賊之勢西帥旣盛出其不意順流東下直踞安慶突出九江之前號召南北使羅石之黨外牽於曾塔之師急不得返顧沿江諸賊必當同時解散入穴金陵則成功可望若不論先後之序不權輕重之宜曠日持久而勞費不休軍民咨怨釁生難測萬一先破金陵使賊分而勢散卽首逆就擒蔓延之禍未知所底此僕前書所謂宜待根立勢舉籌全局以善其後也若夫將有能否時有利鈍兵勢百變難可遙度要之先翦枝葉再圖根本重州縣之權繫豪傑之心急屯種之務振荒殘之略去苛細之政收捐助之實他時決勝必由於此足下有濟世之大略而志存仇恥不怵於利害不震於功名抱策皇皇必有合也大著草茅一得及續得前後數萬言當有英謀秘計開時成務返王路於清平聚鯨鯢爲京觀僕意遠才疏老加庸散久欲充耳不聞世事因枉來指故縱

言及之以廣足下之所未備而不覺云云之多也

條陳軍務疏

江忠源

粵自逆賊滋事以來用兵數年糜餉至二千餘萬人無固志地罕堅城巨寇披猖久稽天討非賊衆而我寡賊強而我弱賊智而我愚也法之不肅謀之不臧貽誤至今宜思變計微臣效力軍前出入矢石鋒鏑之餘于今三載兵勇強怯之情形事功遲速之機會苟有所見何忍不畢獻其愚謹將兵事大略有關得失者撮舉八條爲我皇上敬陳之一曰嚴軍法法者將之所以馭衆使之出入生死而無敢違者也將不行法是謂無將兵不畏法是謂無兵軍興以來法玩極矣全州以失援陷而赴救不力者相仍道州以棄城陷而望風先逃者接踵馴至岳州預設防師不能爲旦夕之守九江厚積兵力不能遏水陸之衝文武以避賊爲固然士卒以逃亡爲長策皆由畏賊之念重畏法之念輕也夫人情孰不畏死而貪生而軍令必責其舍生而就死者誠以百人決死萬衆莫當一夫倡逃千軍自廢誠使將士知國典之不可幸逃自不得不併心一力以致死於賊將有致死於賊之心而謀自生士有致死於賊之心而勇自信是所誅戮者不過一二人而所保全者常千萬人也宋仁宗當承平之餘儂智高反官軍屢失利攻陷名城無數最後狄青至軍斬逃潰將校二十餘人而軍威始振嘉慶初年三省教匪之變經略額勒登保平之

其言賊遇官兵條條死路惟向前接仗是一生路官兵遇賊條條生路惟向前接仗是一死路故賊常致死於我而我兵轉畏迎其鋒利鈍之機已決於此卽如粵逆與官兵接戰每驅新附之賊在前而以死黨監督其後名曰排刀手遇有卻顧輒行擊殺以故匪黨不得不爲之盡力賊之脅衆也以嚴而我之馭衆也以寬賊之退也必死而進猶可生我之退也可生而進輒易死其誰不望風先靡而預辦一走也誠欲反怯而爲強則莫如易寬而以猛 皇上執法以馭將帥將帥奉法以令偏裨偏裨行法以督士卒遇賊潰走藉詞巧避者有誅臨陣不互相救援者有誅不奉令而遽先撤隊者有誅堵禦不力致賊竄逸者有誅軍令既嚴士氣自奮討賊之效庶可計日而待也 一曰撤提鎮提鎮而下爲副參遊副參遊而下爲都守都守而下爲千把以次遞相節制而提鎮之位爲最尊承平日久兵革不用宿將之以功名著者多就彫謝今之提鎮類多積資較俸洊至高位非盡論功閱勞績而得之者也 朝廷以虛名使之未遑擇其才略其中老於戎事深悉戰守機宜者雖尙有之而闕茸充位無足短長者正復不少權尊則意爲趨避而偏裨不敢與爭位重則法難驟加而大帥不敢擅決夫人情當齒壯官卑之日每思奮發有爲致身通顯及至身居高位則顧恤之念重而進取之念衰責其忘軀冒險踔厲迅發以赴事機難矣且軍營體制副參以下俱聽命於所轄之提鎮其臨陣也必提鎮先退而後副參隨之副參退而後都守隨之都守退

而後千把隨之千把退而後士卒隨之提鎮不得其人卽所屬之副參以下均難期得力是以姑容一二庸妄之提鎮致可用之將弁兵丁同歸無用也又軍興旣久籌餉滋艱提鎮薪水夫價之需及役使護衛之人均較參遊數倍計裁一提鎮之費養精兵二百而有餘亦奚取以有限餉精奉此無益之提鎮爲哉副參以下任重敢戰者未嘗無人其資位較輕則奉檄不敢遷延其擢拔方始則臨事易爲感奮誠擇提鎮之久歷戎行膽略尙優者以資統御其餘概行撤遣副參以下量才委用務盡其長斯軍政嚴而軍食亦裕此時幸有殄寇之資異日仍獲赴桓之用矣一曰汰弁兵選兵之道膽氣第一樸實耐苦次之技藝嫻熟次之巧猾懦怯爲下有武藝而無膽氣則臨陣忙亂竝其平常演習之技而亦忘之故常有力敵百夫藝高羣卒而臨陣一揮卽仆與未習技藝之人等者戰陣之事與搏鬪異兩軍相持旗幟賊目金鼓震耳膽怯則心易動心動則耳目手足舉失其常也質實耐苦之人軍令易於服習性情易於調馴令進則進令退則退陟山渡水不知其勞歷夏經冬不知其瘁故衆可得而用至於巧猾怯懦之流無事則應對趨蹌務爲觀美臨陣則趑趄退避專擇便宜論功則多方鑽營希圖美擢遇敗則巧爲推諉求便私圖將弁如此不足以整軍兵士如此不足以禦敵徒糜金粟無補絲毫此兵弁之應汰者一也軍興旣久徵調頻煩有從軍數年漸形委頓者有老羸充數不堪驅使者是謂疲乏之兵又如曾經戰敗部曲潰散或遇

急卸裝而得生或事後潛逃而就伍驚魂甫定轉戰何堪苟取充兵難期再振是謂殘敗之兵當茲餉運不繼之時豈容若輩更滋虛耗此兵弁之應汰者又一也誠飭各營於此數者嚴爲淘汰選其膽氣充壯者爲一等以備攻剿之用其次備守營圍堵之用藥品既備攻達乃神爪牙既強聲威自暢斯亦當今之急務矣一曰明賞罰勝有賞敗有罰夫人知之矣雖然勝有賞而所賞者非真勝也則不如無賞敗有罰而所罰者非真敗也則不如無罰無賞無罰人猶冀有賞罰之時賞非其功而罰非其罪則人知其賞爲主帥私暱之人其罰爲主帥傾陷之人勸之用乖怨譴之聲起而軍心不可問矣軍興以來得一勝仗有功者固當敘隨之而左右隨侍之人先叨獎錄逆匪蔓延四年糜爛六省未嘗行一失律之誅按一縱寇之罪勝敗本兵家之常主兵者每言勝而不言敗功過本不妨互見之事主兵者不錄過而專錄功有賞而無罰何以昭懲勸而令三軍乎夫軍中賞罰未可一概論也戰而勝固當賞矣然或雜然旅進割取他人之首級以冒功或當追擊至要之時不思乘勢掩殺祇顧奪取財物器械馬匹以致大勝變爲小勝者又當罰戰而敗固當罰矣然或奮勇前驅後援不繼或大眾卻走而一軍獨前者又當賞且同一賞而厚薄攸分同一罰而輕重迥別當視其功罪爲等差大帥惟據營主之稟報營主又付諸左右之品評功罪之實旣非採訪所能知又因毀譽而多誤求其權衡至當犁然合乎人心難矣自非親歷行陣開誠心

布公道何以慰士卒之懷而振積疲之習乎一曰戒浪戰用兵之道能守而後能戰能制人而後不制於人能避賊之長而後可用吾之短粵逆狡悍兇頑頗有盜賊之智臣隨諸軍自粵西至湖南與賊大小百數十戰亦嘗備觀其結營置陣之詳疾行徐止之狀矣賊之結營也因地築壘環以深濠牆厚數尺層開礮眼濠闊數丈密釘竹籤其置陣也或分三路或分兩路正兵應敵奇兵或分鈔陣後或直擣中堅其止也遍購匪黨四出窺探伺吾虛實以廣其謀其行也遙張虛聲颺忽倏至乘吾倉皇以逞其毒我兵併力攻其堅壘每至損傷精銳其新兵未曾與賊戰者不諳營壘濠牆之式將卒無所恃以爲固往往爲賊所乘陝西征兵之在湖南以及湖北江西安徽江南諸軍之失利皆由於賊知結營之利而我不知也賊分數路我每以一路當之卽或數道並發而臨陣彼此不相顧或左進而右退或後卻而前行賊得以施其奇正鈔伏之術廣西湖南諸戰之失利皆由於賊知布陣之訣而我不知也賊之止也宜扼要以斷其接濟嚴兵以堵其逃竄賊之行也宜預擇精兵宿將攔頭迎擊以遏其鋒沿途設伏以撓其勢乃我之圍賊也不務扼要嚴防專以撲營逐利爲事其追賊也不務攔頭迎擊專以跟蹤尾擊爲能小有挫失將卒之氣先餒又須養之經旬始堪一戰逆賊得以長其兇鋒我軍終莫操乎勝算此兵謀不可不豫而浪戰所以宜戒也一曰察地勢兵志曰不知地利不可行師地利云者非僅圖史所載山川一定之險也視賊出

入之蹤而先爲之防察賊分合之勢而遙爲之制雖漸車之澮數仞之岡苟形勢在所必爭卽機會不可偶失請以近事明之全州蓑衣渡之戰賊鋒已挫宜連營河東斷賊右臂道州之役賊勢本孤宜分屯七里橋扼賊東竄長沙之圍賊路俱窮宜駐龍回潭土牆頭堵賊西潰之路他如道州雙牌蓮漣灣六十里之奇險賊入死地而縱之使生湘陰之臨資口岳州之城陵磯皆水陸必爭之隘而放之使遁利害昭然猶堪覆轍事前未及虛心體訪預爲綢繆一潰難收悔之無及計自逆匪滋事以來要地之疏防機宜之坐失似此者實已指不勝屈禍基咫尺流毒千里人謀未臧釀成巨患此正宜引爲前車之鑒者也一曰嚴約束殺賊所以安民安民乃可以殺賊將出令而兵不敢譁兵奉令而民不知擾則有制之師也粵逆所過之處橫刀躍馬市肆一空人民遭其屠戮子女遭其擄脅財物遭其搜括室廬遭其焚毀慘酷之狀固已觸目心傷被害遺黎羣焉飲憾然市井愚民罔識大義亦容有謂盜賊之害猶愈於兵者何也粵逆志在擇肥而噬下戶窮簷搜求不暇且或以時詐示仁義愚弄吾民買飯求漿多給市直至於不法兵勇罔知號令方其攫取姦污則雖窮苦之家亦鮮得免於是民不怨賊而反怨官兵矣夫以盜賊而詭施小惠民於盜賊宜有恕詞以官軍而行同盜賊民於官兵能無隱憾若不隨時嚴按軍法以服民心恐草野怨咨鬱勃之言將有難於盡詰者軍中兵勇而外有長夫有餘丁有隨營貿易之人兵丁舊服營規管轄

甚密果令嚴爲約束無難一律肅然鄉勇多係四方無籍之民較兵丁殊爲難管然猶名隸籍伍有犯自可按籍而稽至於長夫及隨營買賣之人則均游蕩性成不安鄉里名雖貿易營生實則不堪問其所自倏來倏往蹤跡靡常甚或僞造兵勇腰牌假其裝束時赴近營各鄉村掠取各物轉賣營中肆行無忌鄉民誤爲兵勇不敢格殺且畏其勢橫人衆莫敢誰何此輩久處營中熟觀戰鬪之事輕生嗜利習爲固然將來事竣撤遣散處民間必多不靖從前三省教匪之役大局已經戡定而搜誅餘匪及不法夫勇之嘯聚者又至兩年其明證矣應飭各營於所管轄兵丁長夫及買賣人等嚴明約束遇有干犯除兵勇分別治罪外長夫及買賣人等尤宜從重懲處其有逃匿他方者所在地方官一體嚴密察緝隨時懲辦重卽處死斯亦結民心而絕後患之一端也一曰寬脅從粵逆起事死黨存者實不過數千其餘則新附之匪與裹脅之衆也會匪盜賊與兇惡痞棍粵楚州縣所在有之平時作奸犯科擾害鄉曲官司每苦文法之煩曲從寬貸一旦有警遂爾率其醜類從亂如歸又在配軍流及被賊劫放監禁各犯乘亂得脫爲賊馳驅此皆甘心從逆執死不回寬之而無可寬者也至若村市良民被賊驅脅本無從逆之情但因賊中禁制甚嚴未由自拔又或以全家被擄勢難兩全依違其間遂厯歲月比髮已加長便與老賊無殊欲留則違其歸順之心欲去則恐膺不測之戮低徊無計進退維艱此等苦衷殊堪軫念賊匪自武昌竄去時黨

衆薙髮潛逃者亦已無數卽其中長髮之賊爲居民瀝訴被裹之由往往悲感無端聲淚俱下可見小民具有天良終非左道所能煽惑也宜飭各營多寫簡明示諭射入賊中臨陣於旁近豎立投誠免死大旗令其乘官軍與賊接仗時棄械奔赴旗下竝設一薙髮公局發給免死執照資遣回家儻如官兵連獲大勝非獨不甘從逆者以免死而得生卽心持兩端者亦將去逆而效順旣可用謀以探賊之情復可用間以攜賊之黨黨羽旣已披離渠魁何難殄滅其於剿賊機宜或亦不爲無補也

大學問大經濟其第二條尤手辣識卓湘陰爵相撫浙時先正某提督典刑可謂英雄之見同矣公歿後二年 文宗猶下其疏軍中用集厥勛大星雖沈貽謀終效公其瞑目哉

尹熙棟識

答曾侍郎師書

江忠源

九月二十四日奉八月二十三日衡州一書並寄示與王樸山兄往來各函具言兵之不可用欲再招勇六千以爲滅賊之具初七日從吳甄甫先生處寄到一書又以南昌楚勇求賞一事慮勇亦不可用忠源竊謂兵勇皆未嘗不可用患將兵將勇者不得其人也夫兵之不可用者勇於擾民很於仇勇敢於犯上而獨怯於殺賊旣盡於吾師前書所云矣然使得一廉明之將統之視兵民爲一體則兵不敢擾民聯兵勇爲一氣則兵不敢仇勇將之愛兵如父兄之愛子弟則兵之衛將亦將如手足之衛頭目而無把持挾

制之患將有敢死之心則訓練必勤兵有可以殺賊之具則膽氣自壯而無畏避遷延之禍今之爲將者一切反是而謂兵不可用兵亦不任咎也若夫勇之難用則更有甚於兵者潮勇捷勇無論矣吾鄉嚴雲舫之辰勇樊川之勝勇勞氏子之彪勇在長沙皆能殺賊其後歸鄧紹良統帶駐鎮江府城外淫掠殺戮至激吾民控愬於賊甘心爲賊向導頃刻之間全軍潰散賴和鎮軍接統之整齊訓練稍稍成軍然聞其欲懲治一二人竟以不密逃去爲賊竊意兵之爲害尙不至此諸勇之中惟楚勇較馴無從前數者之弊然南昌求賞一事亦大不成事體吾師所聞不爲無因筠仙旣歸里間之可得其顛末雖由小人教之忠源未能先事預防然其頑梗亦可概見湘勇較楚勇尤馴然斗山所統八月二十六日爲索賞項幾於謹譁寶峯所統在德安一閱而散勇之難帶其略如此然而羅山之勇無是樸山之勇無是卽忠源前此之楚勇亦不聞有是不獨此也廣勇最稱跋扈大營散之張石卿制軍收之以援江西忠源甚非所願念旣如此不收恐去從賊姑令紮營城外而留心駕馭之卒乃大得其用楚勇相親已久置之不經意至有求賞之事可見患常發於所忽不可不同警也由此觀之勇之不可用其故仍不在勇而在帶勇之人夫兵之弊由國家承平日久市井游猾之徒無所得食攢入營伍求肥其身養其妻子不知打仗殺賊爲何事有游猾之尤者工於語言趨踰以媚其上爲之上者喜其媚已也而予之官彼以是術而得官則必操是

術以進退衆兵洊至高位則又操是術以黜陟衆官相沿已久積重難返營務安得不壞軍政安得不弛一旦有事惟相率而逃耳若勇則募於有事之時皆山野椎魯之夫其猛悍之性尙爲可用然從征日久得錢易則習於奢華殺人多則果於殘忍事平之後散處田間則貽異日無窮之禍故論目前搏擊之用則兵不如勇而論異日遣散之難則勇不如兵然忠源終不欲以兵易勇者兵之患在本源倉卒而難拔勇之患在流弊先事而可防且急則治標今日之時勢甯取其勇悍搏擊之用而後日遣散之難尙可求其人求其法以治之也故忠源甚韙吾師前書之論而顧不以後書所難自阻但多求羅山樸山其人者以爲上將則收勇之利並可弭勇之害而賊不難平矣方今賊據有長江之險非多造船筏廣製礮位訓練水勇先務肅清江面竊恐江南江西安徽湖南北各省無安枕之日然竊計海內人才能辦此者惟吾師一人能管駕船勇與狂賊相持於波濤險隘之中而不懼者惟不肖與蔭渠羅山樸山數人賊在武昌時接吾師前書欣幸慶幸次日適發報而附片陳明請吾師選派船勇從洞庭駛下並請楊熙管帶船勇從荊州西來以勦爲堵昨奉 諭旨區區愚計實已上協 天心而竊慮吾師或以後書所難自阻且鄂省已戒嚴若遂寢前議則天下巨禍其誰弭之敢請吾師卽日繕摺與忠源聯銜具奏並致書海內豪傑廣集經費號召吾鄉忠義之士迅建義旗蔽江而下忠源亦當收集淮南奇傑以爲應援若再曠日持久

天下大局非臣子所忍言矣忠源以八月二十九日自江西起程九月十二日抵田家鎮十三日到防二十一抵黃陂縣二十六筠仙告歸其遷延之致艱難辛苦之狀筠弟自能言之二十六日已刻則詳各奏牘中謹抄錄寄呈惟月之三日拜巡撫安徽之命自分識淺才拘不足以勝天下之重而安徽又當萬難措手之時深懼隕越貽知己羞其到彼措置之方具詳致周敬翁信中鈔稿寄覽求一一教之彼中紳士除呂鶴田吳竹如二公外尚有可求之人否官吏中除陳岱雲外尚有知其底蘊者否鄒叔績宏博淵懿人所共難而才識之遠大膽氣之充裕尤爲今世所希覩見與忠源同往獲益良多惟不知季高霞仙諸君子尙有肯來相助爲理者否求爲我問之叔績之兄子伯韓見在南省鑄礮忠源欲請赴淮南懇吾師代爲勸駕忠源忽忽未能致書並懇請其帶鐵匠數十人吾師爲籌畫盤川資送來廬至禱至禱樸山天下奇男子得吾師回信後卽當奏調忽忽不及致書吾師久駐衡州似非所宜末流之世凡事當委曲求濟昨得霞兄書深以此意相規忠源深感佩之只悔在江西時未能推誠相待竊願與吾師共勉之

與駱籲門中丞

曾國藩

吳甄甫先生來咨令張潤農太守王璞山縣丞帶勇前往鄂省救援其文云武漢之咽喉不通卽南北之血脈不貫北省如此南省勢成痞症不得不急思拯治自是至當不易之論想尊處亦必有咨兼有專函

矣侍日夜籌思援鄂一層一則以餉項無多一則以水路無備故屢思與老前輩商而終不敢輕發然細思武昌苟失則西制荆襄之命東固建業之根長江三千里遂使此賊封而有之 章奏無由上達 朝命莫能下逮不數月間吾輩遽恐隔置化外豈不痛哉以是反復籌維又不得不出於援鄂之策蓋鄂省存則賊雖分竄來南長沙猶有倖存之理鄂省亡則賊雖不分竄來南長沙亦無獨存之勢特少延數月耳唇齒利害之間此不待智者而知也侍前所謂要務三端者城內堅守止須四千人城外紮營亦止須四千人非謂四千遂足鏖戰也但使有一路可通不使賊兵合圍則戰守皆有可恃不必屯兵萬餘以待賊之至也其水路籌備一端則聽侍在此興辦老前輩不必分慮及之斷不可又派員別爲措置如省城外內僅留兵勇八千則此外兵勇似可分三四千援鄂望鴻裁與提軍及司道諸公熟商王璞山之勇止令其招三千尊見極是蓋多則難精卽招至三千已恐其不精矣

啟陳剿盜十三條

咸豐三年

胡林翼

道光二十九年十二月晦日率師討苗匪用兵千七百人營於險要令其毋擅動毋挑戰用革夷附近之團練萬七千人環而集之搗其巢穴復以計誘之賴同事文武士民之力得盜頗多卑府於二月十七日又往黎平堵楚匪矣三十年十月逸盜二十餘人殺寨頭阿賈以逞阿賈者卽是年春助官縛盜之革夷

寨苗也頗知大義識漢文於是鎮遠黃平台拱清江清平丹江凱里施秉各官吏再會於巖門跡成事以圖續剿自三十年十月至於元年三月乃歲事而盜固逃竄於荒山密箐中正犯無一獲也然則刻舟可求劍乎膠柱可鼓瑟乎必當知所變計矣近日台拱清江丹江施秉之盜又稍縱矣約而言之昔年之事利用圍攻今日之事利用追剿昔年之事賊可餌誘今日之事當以力擒昌黎韓子慷慨有大志陳說十四條至爲精當謹另錄以呈復思其節目之未備者附陳十三條惟密探而留意焉

一辦盜先須寬吏議也王夫之言自古盜賊之多無若東漢光武先後所降幾至二千萬其通鑑論宋論津津其言之考漢史建武十六年郡國羣盜處處並起郡縣追討到則解散去復屯聚乃詔遣使者下郡國聽羣盜自相糾擿五人共斬一人者除其罪吏雖逗遛迴避聽以擒討爲效但取獲賊多少爲殿最惟蔽匿者乃罪之夫上之用意嚴而用法密則下之避罪巧而貽害乃愈深倘能捐棄一切特參之條寬以時日責其擒討在下者感寬大之恩惠而不必用其欺在上者有切實之事功而不煩虞其詐如此而後事無窒礙督捕之員亦不致貽同官之罪戾否則上下相蒙終歸諱飾而已矣

一捕盜莫善於雕剿也黔盜裹巾扛礮情罪與逆匪無異以不選不練之兵練剿之則盜必拒兵必潰以精兵精練剿之則盜必竄矣然則當從竄處著議矣田山薑黔書歷陳平苗之往事以分而勝以合而

敗不惟深明兵法亦且洞悉苗情竊計用兵練五百飭委幹員將黎平之精練挑去百名於都勻鎮遠兩府標式招募二百名必於其地招募者卽慶鄭所謂生其水土服習其道也於營兵標式招募百名或二百名古州鎮遠貴陽各鎮協營中每處十人或三五人或竟無人可缺而不可濫其兼用營兵者營兵固怯然百人之怯豈無一人之勇虞允文收集潰卒致功於采石勝國逃潰之兵入本朝而爲龍興勁旅卽此意也且事後不煩安插卽不虞後患

一標式以選精銳不可專用火器也宜長短相間長兵者鎗礮弓箭是也短兵者刀矛鑊棍是也叔世人心怯懦偏重火器謂可殺賊於百步內外無跳盪搏擊之危非特賊刃難加我身并賊血亦不待汚我衣何便如之且隱計於百步內外開礮若見勢頭不好丟棄鎗礮逃去賊追不及又何便如之兵因火器強亦因火器弱誠然誠然明季偏重火器而兵益弱議者欲改其制而莊烈不允遂亡於流賊自嘆夷入犯中國見其以火器勝我亦遂因而偏重之每營刀矛手少火器手多刀矛手自大操三跳之外未有練習者所練習不過火器而已然十餘日或數月始一操一操只打三鎗命中者十不得一是有偏重之名究無偏重之實也以此毫無可恃之技臨陣未見賊氣已餒矣旣開仗心益惶手益戰矣於是或裝藥忘卻下子或先下子而後裝藥或裝藥下子而忘卻發藥或開放百步外一二鎗不中則相

與棄鎗反走又何怪每仗必敗乎昔冉子用矛入齊師孔子稱其義爲其奮勇直前舍生以合事宜也烏枝鳴用劍敗華氏謂用少莫如齊致死齊致死莫如去備此二事乃兵家之秘後世得其祕者岳忠武之背鬼軍五百人本朝岳威信之馬兵三十六人楊昭武長鎗手百人皆是也邇來軍威不振極矣總以火器不可當爲詞司兵柄者亟宜變計矣大約火器手宜四成三成刀矛手宜六成七成每日操練以備戰鬪火器當前刀矛繼之火器精可壯刀矛之先聲刀矛精則火器有恃無恐精火器之人尤須竝精刀矛則膽氣愈雄神氣愈定而打放不空勝已七八矣況又以精悍刀矛衝出如雨驟至賊焉得不奔潰哉故今日標式以火器四三成刀矛六七成爲要

一用兵貴審形勢也委員選兵募練於二府之地兼可留意地輿度其險要鄧侯以圖志而知扼塞之要亞夫因趙涉而搜殺鼯之盜自古將帥類然此行兵之至要也

一多用委員不如兼用士民也肉食者鄙未能遠謀曹劇鄉氓功成長勺此用士用民之說也用都游以上不如用千總以下智勇困於所溺仕宦怠於已成此都游以上之說也能與士卒比飲食可得士卒之死力能耐飢渴奔走然後能與盜相追逐此千總以下之說也鷹之在韝也飢則爲人用飽則不爲人用夫中人之性亦若是焉已矣惟士民武弁功勞不可淹沒不得以與例不合而舍是昔王文成之

征南贛征粵西所用皆門下學究書生功績甚偉然死必有卹功必有賞是可法也

一雕剿宜實行保甲團練也韓子可主征討之任然任於此不能分於彼保甲團練不精不嚴不切實認真如一身一家之事則征討之事亦窮投戈而混入寨中則如人入羊羣見羊而不見人畏我而匿於荒谷幽箐則如以驥捕鼠於井竈之際反不若跛貓矣濫殺之不可稍縱之卽逝故必精保甲團練然後可以收雕剿之功

一保甲團練須用士用民也近年保甲團練人人言之亦人人行之然文告徒煩實政無補牌籍空設良莠不分其交給上司差役分發各鄉者徒資訛索尤爲浮僞夫十室之邑必有忠信三人同行厥爲我師一邑之中豈無二三明白正派之紳士虛心訪之實心求之委令下鄉帶同冊籍每到一村先於此村訪彼村之正人才人有衣食有頂戴人到後村又訪前村之人廉得其實加以委任官爲給札註名於冊責以保固鄉里之義諭以分別良莠之機付以防捕救援之法隆之以禮尤必須董之以威雖欲不肩其任不可得矣彼鄉正團長到城繳簿一冊存官一冊存鄉預囑家人門丁隨時傳入不得稽延其冊中良莠密加訪察密爲記載不可卽爲施行視其言者何如其所請防捕救援事宜分別可否立卽施行不使羈候於城中其怯懦退諉者卽時斥責其迂闊不曉事者反復開導委曲求全其公正明白者待坐賜茶食卽椎髻

之苗草屬之民侍立於側切實講求苟有知大義者卽不必苛以尋常官禮其下鄉委員紳士所帶書差官爲給貲擾及分文者杖之不赦如此而後保甲團練之事十得三四然猶不敢謂其已成也而奈何易言之也

一保甲團練須官爲士民作主也賈子言治天下至纖至悉其保團之謂矣監司以上大憲可示其教而勢不能理其事理其事者其牧令乎然而才具各有所宜不必盡能其事亦不必實行其事無已其擇州縣樸實精明講求此道者由大憲札委或專司其事或隨知府督辦予以貲財寬以歲月務求訪察至精奉行至實或有濟乎然擇官專辦或係在省候補而久勞於外或本有實缺而奪其所有均非俗人所能堪亦恐室人之交謫凡委員之督戰與辦保團者月給私費百金便爲至厚酌半亦可計委員不過數人委任不過一年恤其內顧之憂而彼乃不能紓大憲之憂忍乎敢乎

一保團縛送之賊非速審速賞不可也賊到而不立審則鄉民如重負在身方以送盜爲厲己矣粗審而不細切則必不肯速賞賞遲而民氣怠矣不計功不謀利非可責之蚩蚩之民使其送賊而在城守候至於一日二日之久其愁怨當何如耶何以勸後故貴速審貴速賞

一審盜貴專精也委員捕獲之盜及鄉民緝送之盜到案卽詳訊其案情多寡行止聚散一飲一食至微

至陋之處竝其同夥行蹤年貌逐一筆之於書隔一日再審三五日又審其不留意處其細縷處一一

符合則盜真矣凡盜供之狡賴者無同夥之衆供以指其瑕且官亦無隙以發其私故善訊者不恃刑

求凡被誣而妄認者受人教誘許以錢物

彼竟不知錢之不可得

恍以亂刑加以恐喝

凡猾胥教供冒賞往往以此兵丁亦然

竟有

自認不諱隨口妄攀他人詳悉筆之於書異日再訊卽其直認處必有自相矛盾之隱可得聞矣此事

惟黔苗受害最多其愚過人也故審案貴精在外委員將犯供逐一稟之臬憲尤須委能幹樸實之員

於臬署設局

最爲要著

辰入酉出交供呈核譬如風簷局試白卷者少否則酬應徵逐日復一日抑且年復

一年案以久而不了犯以狡而愈疑故審案貴專

一提解斬殺可便宜也凡盜就獲除委員格傷格殺外令其逐一詳訊開列同夥年貌案犯日期無論遠

年近年已報未報多獲少獲槩不爲罪以申文露申而實供則密稟臬憲卽將正犯就近交地方官押

解從某處至省城止均係沿途文員親自派押遞交臬憲復訊後請令正法續獲再正法彙至事竣始

入奏則法網旣無窒礙限期亦屬從容可以實盡心力矣

一經費宜寬籌也精兵精練五百人約每人日食一錢月須一千五百兩加以委員紳士薪水與夫價差

盤礫藥鍋帳夫役又加偵探眼綫

此最要費不可惜大約用閒謀差探總須五十人或百人

月費總在三四千金一年肅清則四五

萬兩可以足用惟須由大憲簡派二人專司其事期於核實不欺而已

一委任宜專也委員如韓子者腹有詩書豈至以聲色加人私欲求人然以卑官辦他境之事非克伐怨欲不行之地方官不能同心協力越境攻盜之難曩固疑之今日驗矣然使大憲深信無猜則事必有濟近日人心怯餒中無所有即使謠啄播於都會蜚語傳於京師而明鏡在空流言自止毅然付余玠以蜀師委陶魯以峒賊權之所屬威望重焉不待斬莊賈戮揚干然後令行禁止也虎帥以聽誰能犯子而東里因得志於鄭國非明徵歟

以上各條數之無甚高論愚陋之識知無不言大抵常人之情當厝火未然則諱言兵及赤眉黃巾安史闖獻起則曰此乃天數非人力所能挽回然亦思樊崇張角等果天殛之乎抑人誅之乎究是幾箇有志之人將狂氛掃盡耳而謀國者又動以無財爲說竊念鄭畋守鳳隴韋臯鎮川蜀皆值國步艱難物力不足之時而勁敵當前悉索敝賦何不聞以匱乏撓大計又況明季國窮守都城兵至於米薪不繼乃本朝定鼎之初天下入版圖輸租稅者僅三分之二何以用兵數十年不致告匱不聞往遼東飛芻挽粟不聞議推廣秀才舉人之例此無他天下之財本無不足視其政事何如耳

附韓州判剿盜匪說

經書何儒不讀用以爲文好醜各殊者切題與不切題也古方何醫不記用以療疾生死不同者切症與不切症也兵法何將不知用以臨敵勝負各歧者切時勢與不切時勢也方今會匪鴟張土寇蜂起粵楚杞惶不安而黔地惡苗遂亦欲因風縱火非速加懲創禍固不可勝言非妥爲安排亂又烏知所底是在卽賊與我之時勢熟籌而審處焉耳苗匪飢渴勞苦寒暑無所畏避行止輕便無行李背負飯包大可供數日食上下峻坂捷若猿猱又習用火器從禽逐獸日以爲常曲左臂架鎗其發多中此其所長也性多疑忌貪利無陣法疑則易誤以多方忌則易誑以鬼神巫師貪則易釣以餌烏合而無陣法則易制以節制之師此其所短也至我員弁兵練膽薄技疏不諳戰陣遇敵則退後論功則爭先有短而無長方諸乾隆嘉慶間已遠不相及何論 國初然則當此之時處此之勢將剿苗匪其何道之從乎謹就管見臚陳十四條敬陳左右

一明賞罰有功而不賞有罪而不罰固非有功而使無功者受其賞有罪而使無罪者受其罰尤非甚至有功而反受罰有罪而反受賞是非顛倒更不足以服人心惟賞罰當乎功罪則賞一人而三軍勸罰一人而三軍畏乃知所趨避焉耳

一謹約信鼓之而弗前金之而弗退呼之而不至限之而故違雖韓白孫吳不能操勝算矣夫收信之

效在臨事而致信之效在平時平時不輕下令有令則不更不苟相期有期則必踐古人千金徙木三日去原約信不爽毫釐三軍所以用命也

一勤操練近今弁兵怯懦見賊卽逃雖有不逃亦未聞直前殺賊此固由志卑氣弱亦自顧無保身殺敵之能不得不苟且圖免耳則操練安可不勤乎然尤貴因地制宜也昔秦再雄鐵甲度水傅重庵提重登山皆度地練兵所向無敵今將剿匪於黔省多山之地我兵技藝行陣必向多山之地爲之方有實用整頓之徑難登故身宜輕也巒巘之間多礙故陣宜疏也如此則將勇兵強戰勝攻取矣

一簡趨捷苗陟山如履平地漢人弗若也一旦相角逐則彼急我遲彼暇我忙優絀分而雌雄判矣此宜用沙囊之法練習升高陟遠簡其趨捷者別爲一軍或用以邀擊或用以跟追或用以繞道別出此剿苗匪之必不可少者

一選員弁一將豈能獨理則協理之文員武弁在所必需雖然軟熟者不可用諂諛者不可用胥無實際大言欺人者更不可用選其反乎此者則庶乎其近焉已

一擇士民官來自遠於苗境之山川風土未克周知豈若士民之生於斯長於此哉此宜擇其有才能而心地可靠者不分漢夷使之效力軍前以供指臂之用

一嚴保團保甲團練最爲守禦之規近年大憲已三令五申特患奉行不力耳嚴以督之未行者咸能遵依已行者益加振作村村自守不獨難於裹脅從賊者稀抑且困於糗糧呼庚者衆況能各出鄉兵隨處截殺其有裨於剿匪更爲何如哉

一精閒諜善用兵者凡敵境之險夷敵衆之多寡敵意之趨避敵黨之離合敵將之性情嗜好莫不灼知故能批却導窾應手而解然而甚難其人也必其沈密勇敢又有妻孥之繫然後予以厚貲俾混入賊中以察悉其纖微若能不用漢而用苗不用民而用賊則言語相通氣類相投更爲得力耳

一務分攻苗性遲疑不決我分兵以亂其耳目則方寸益淆苗性專一不歧我分兵以致其紛紜則氣力必懈至於力不能支或且潰圍四處集散亡以再肆狂氛又當空闕一方層層密伏使之聚而殲旃也

一防伏劫自來苗匪跳梁其兵法有二埋伏與夤夜斫營而已我軍行走宜翼以搜伏之軍戰勝追逐宜用戚南塘防伏之法至每夜伏路與瞭望者尤宜加意

一勿妄殺爲賊者誅餘人不問若波及無辜甚或欲絕其種類則奸人得以煽動必至蔓延

一勿輕撫人心思亂已久加以邇來粵楚不靖更思效尤其真正爲賊者未至十分窮蹙而遽撫之以

博好生之名且或以爲易子之計則禍心未死轉瞬復張此宜痛勦靡遺方足杜萌芽而昭鑒戒
一急捕亡剿辦得手之餘其著名惡匪必有漏網逃匿者倘以黨與既散了然無復可虞竊恐不數月
閒又將招集其徒再圖舉事此宜迅速搜窮罪人斯得而後不慮其復然也

一緩散兵兵事費用浩繁早散一日則省儉一日所以一得勝仗便思抽撤賊勢將次平靖便思全撤
後來之熄而復熾軍需益不貲未之計也試思一釐未成乃不肯及時竣工致令全山頽圯再思平地
爲之果孰逸孰勞孰省孰費乎此其宜於緩撤也審矣

此十四條自嚴保團以上從己作事自精閒課以下從彼著想皆切時勢以籌之者也而操練閒課二
條尤爲緊要誠能不中沮於事機不旁撓於羣議精心果力徹始徹終於剿辦苗匪何有哉

皇朝經世文續編卷七十目錄

兵政九兵法中

兵計

何邦彥

致官使相言立小統領

胡林翼

復多都統書

胡林翼

致李方伯多都護書

胡林翼

與本省司道書

胡林翼

致衛靜瀾侍講書

胡林翼

與官中堂 都將軍論兵事機宜書
曾侍郎 楊軍門

胡林翼

與李幼泉書

曾國藩

與袁小午編修書

徐鼐

上各憲請武場添試火器刀矛箋

徐鼐

勸誠營官四條

曾國藩

經世文緯

書破地雷事

李元度

預籌三支水師疏

曾國藩

通籌全局疏

曾國藩

皇朝經世文續編卷七十

上海葛士濬子源輯

兵政九 兵法中

兵計

何邦彥

昔岳飛將有事必召諸統制與謀謀定後戰故有勝無敗旨哉武聖也故滅天下之大寇必計防守遏絕之所必知衝截攻圍之所必熟策應掩覆之所至於大寇利走利守利分利合皆瞭然心目之間故曰治軍之道爲計三十有二一曰和二曰息三曰量四曰忍五曰弱六曰彊七曰致八曰畏九曰防十曰需十一曰久十二曰激十三曰斷十四曰聽十五曰詭十六曰信十七曰課十八曰閒十九曰內二十曰釁二十一曰偪二十二曰與二十三曰善二十四曰脅二十五曰假二十六曰名二十七曰辭二十八曰備二十九曰法三十曰同三十一曰本三十二曰保

何謂和上下一心是也自古未有權奸在內而大將能成功於外者未有將相協和而敵不破衄者大將在外權貴在內斯時也稍與權貴忤彼將肆然掣肘敵不可摧故權其輕重則君父滅敵爲重賂事權貴爲輕吾甯貶小節以抒滅國之患也然承平無事則必名節爲重爵祿爲輕貶節權也守正經也昔者杜

預行之後儒譏之未嘗不爲之悲悼不已也

何謂息民而用之是也吳夫差視民如仇而用之日新是以滅於楚秦隋已得天下用兵不息底於敗亡故息民者善守國者也

何謂量知己知彼是也敵強而已足抗之則可以勝可以不勝敵強而已之謀臣不足敵之則可以不勝不可以勝敵實而備之者勝敵弱而攻之者勝敵勇而計困之者勝敵之所利吾則害之敵之所長吾則避之吾之所利吾慎行之吾之所短吾善濟之故決之曰君主孰明將帥孰賢地宇孰廣士卒孰精先於君將驗之次驗之地利驗之天時驗之軍令國政而廟堂勝負決矣此孫子始計也

何謂忍孔子曰小不忍則亂大謀是也書曰必有忍乃有濟故能大忍者可大有爲於天下觀忍之大小以決英雄大小而已臥龍之智無耦者也司馬懿以不戰屈之至受巾幘而不辭於虜蜀轉瞬爲晉滅矣夫非忍之爲功也歟至身抱奇略披髮陽狂行遯草野甘心不悔者知時也知時則保身保身則韜晦忍之爲功大矣哉

弱者強而示之弱以驕之文公退三舍以驕子玉是也鬬伯比請羸楚師以張隨匈奴匿壯士健馬而漢高被圍之三者示弱之道也

强者弱而示之强也行軍之道變幻不測有以我之散卒鬪敵之健卒者以我之健卒鬪敵之散卒者始雖一敗繼必二勝

何謂致敵所不戰致而戰之是也攻敵所必救掠敵所必趨裸體以辱罵辱書以激怒佯降以相誘佯札以相覆拘使以激忿伐鄰以來救之八者激敵之道也

何謂畏臨事而懼好謀而成是也恃彊者敗戒彊者勝恃勝者敗畏敗者勝恃險者敗保險者勝敗而畏者勝敗而忘者敗隨時隨地無不設防者勝隨時隨處不致畏謹者敗故觀將帥有三道焉一曰才大小二曰膽勇怯三曰心畏怠

非兵而如兵之謂防水軍防火陸軍防圍軍行防覆軍追防伏晝戰防敗宵戰防劫敵降防詐險阻防失退軍防追遠襲防截遠行防飢久攻防援戰防劫寨困防死鬪臥防刺客飲防下毒至於守城防敵則必每垛二軍一主外視敵軍敢有回顧者斬攻伐防敗則必有截有伏有誘有援有夾攻有奇兵有正戰敢有違軍者殺未已也大敗防乘大勝防襲軍衆防潰軍少防圍大風雪大雨露防掩入錫詔書飛羽檄防僞致一地不防爲敵所陷一刻不防爲敵所算之四語者軍志之鑰

遲而待之之謂需德不足則增修糧不足則積儲軍不足則修補此需之已者也羣雄各起必有傷者吾

俟其疲而攻之敵人遠來利在速戰吾深溝高壘以困之遇敵可滅不滅之兵可乘不乘之坐失事機貽國家害此需之失也何生曰需有利有害急而乘之之謂疾敵援未至吾急攻之險阻之地吾先據之有輕車捷馬一日馳二百里者有潛師利兵一軍而襲國都者有乘勝擊之使不得合謀者有席捲乘威而剋滅後患者有乘勝急進而敵不知備者有先需而後疾者需爲疾輔疾爲需輔宜需則需宜疾則疾久者何持久以要之是也敵無外援敵無降志必度我之力足以制敵可爲之不然鮮有不敗者

激者何自激以作怒是也速杞之役季梁請下之以怒楚師楚伐庸師叔曰彼驕我怒而後可克蓋激將必稱敵之勇焉激士必辱己之名焉

斷者何決也好謀無斷每戰必敗得策輒行每戰必勝蓋斷者必合彼之利害衡之必合己之長短衡之計之已決不爲小敗沮不爲君命止不爲羣言惑或誘或截或伏或援或追或遏是之謂軍司當斷不斷反受其殃不當斷而斷亦受厥咎奉詔班師中原不復君子曰惜哉岳飛之無斷也

何謂聽集思廣益是也聽於衆則受諫聽於賢則謀決聽於能則謀勝聽於貴則令行聽於私則大敗聽於讒則軍離蓋聽者必以萬勝萬敗計之半勝半敗計之不勝不敗計之計之已熟乃行之豈中心無主者可幾哉

詭也者行軍要道也故聲東則擊西聲西則擊東班師則僞進急戰則僞退敵畏吾強則示之強敵欺吾弱則示之弱者詭道也敵畏吾強則示之弱敵欺吾弱則示之強者亦詭道也知己之所以詭人而不知敵之所以詭我一勝一敗知己之所以詭人而知敵之所以破我詭者而我別行所詭每戰必勝知人之所以詭我而知敵之所以防我詭者而我別行所詭每戰必勝不知己之詭人人之詭我每戰必敗迂儒治軍而曰吾以詭道行之吾弗屑是欲滅君父天下也

何謂信治軍誓將賞罰必信信之在己也不誅降卒不掠婦女曩者有此言矣而反之天下將不信而叛我也帝王之軍有詭有信殘賊之軍有詭無信迂儒之軍有信無詭余曰治國者信爲重詭不可用治軍者詭爲質信爲輔

至於間諜何爲哉有仕於其國蹈躐以圖之者有餌其臣僕漏言於我者有離其君臣將相之交者有使人入其境諜其事以相告者是謂用間秦諜襲鄭而晉知之子元伐鄭諜告曰楚幕有烏是謂用諜諜者軍之耳目也間者軍之心腹也吾有謀矣敵不能間機密也故行軍之道心腹有所未知臨戰有所不漏其神哉

何謂內奸之在內者也欒盈之入晉也因魏獻子伯有之入鄭也因馬師頡萑嫠婦紡焉以度而破紀鄣

楚子建之母召吳人而敗之以入鄆今夫謀人之國而使心腹爲之內焉國必敗故金人之用秦檜以相宋而宋遂滅矣可不戒哉可不戒哉

何謂釁或以內亂或以外侵或以年飢或以遠襲

何謂偪孟獻子請城虎牢諸侯成焉以偪鄭晏弱城東城以偪萊環城堙之而傳於堞以入萊是知偪之爲道可不戰而屈人之兵者

何謂與與國是也漢武欲厄匈奴而攻西域取車師以斷匈奴之臂可謂能軍矣或遠交而近攻或左交而右攻或弱之使微弱或間之使孤黨或取所惡以取入

何謂善與國雖衆吾能操縱之也何謂不善借敵之兵強我有餘則爲噬矣

何謂脅晉伐鄭秦伐晉以救鄭宋圍曹鄭侵宋以救曹此攻其國者也晉伐齊楚伐鄭以救齊晉伐鄭楚侵陳侵宋以救鄭此攻其與者也魏質徐庶之母而徐庶降楚質太公而漢兵退若是者脅之道也

何謂假假於意假鬼神吉徵假物象瑞應以收天下之人心是一道也

何謂名繼統者利正位矣放伐者利聲罪矣草澤利安民矣名不正未有能成者也成之未有可久者也何謂辭作爲明示昭告天下敵苦稅斂則曰薄征敵苦君虐則曰除暴敵苦軍興則曰息民於是履之以

信天下感之此辭之大也至於說敵亦曰禍福譬之利害蔽之而已雖然恃辭者敗有辭者勝

何謂備未戰備戰將戰備敗已戰備敗軍行備戰軍止備敗散地備敗險地備敗何子曰無時不備敗無地不備敗有備無敗無備有敗太公復起不易吾言矣

何謂法法莫急於講習法莫大於賞罰法莫大於賞舉能而罰蔽能法莫大於任將

何謂同一曰與士卒同甘苦二曰與蒼生同憂患

何謂本修德息民是也知本者知天下靈蠢莫不貪生惡死故遇敵則攻之遇民則生之孟子曰如有不嗜殺人者則天下之人皆引領而望之矣故治亂世者以殺爲輔以不殺爲本

何謂保既以武略定天下矣而不修文德以柔之未易保也是故攻勝易保勝難取國易保國難知其難以圖其易厥聖哉

何邦彥曰不嗜殺人爲得天下之本鑒別智勇爲選將帥之本爵秩尊卑爲馭英雄之本賞罰必信爲軍政百司之本清心寡欲爲修身出治之本慈化廉讓爲天闔殺運之本先才後德爲平亂世之本文武並重賢能各任爲收人心之本內外相制官民遞授爲保天下之本懼失人心不得罪於天下爲萬年闢基之本能知此者可爲王佐於虔敬之哉

致官使相言立小統領

胡林翼

近日與希庵商議以二十餘營分立前後左右中五軍每軍派總管一員所轄或三四營或六七營每一總管另設總幫一員仿營務處之實而避其名其黜陟調遣大政仍歸統領如此則綱目張舉事理專一而大權亦不致旁掣其美利不可勝言分統有人則責成易專約束易明其利一平時相親相習性情既已融洽臨事則左攻于左右攻于右隊伍不致紛亂其利二營官如州縣設天下有州縣而廢道府則鉅細均歸於督撫殊失相維相制之義是猶治絲而棼之也今有總統又有分統則事以分責而自理不致一一請示統領致叢脞於前疎忽於後其利三松柏之下其草不殖父兄庇蔭之下其子弟安暇不知撐支門戶之苦軍事亦然派以總管四五營則用心必專可以練習兵政之大事如其才也以磨練而自精其不才也以試用而其伎之良否亦不能自匿未始非甄陶人才之一端其利四大寇入境非分枝抵禦不能得勢林翼嘗論兵事如手足之分枝足分枝短故僅能行能立而不能作事手分枝長故萬事萬物皆一手造成故兵事以善分枝爲妙用若并於一處則億萬人出隊只數人居前隊者其餘均在擁擠雜亂之列實兵事之所深忌預先分派乃免臨事張皇其利五小寇入境豈可一概坐視不理分統有人則防剿均便其利六希庵母病已久性既固執情更肫篤既當喜懼之年又處拂逆之境君子不違人之情

也如分統得人萬一有遠遊之召以大事歸之營總以小事歸之分統自理尙不致決裂於一時其利七也商量二三月之久希庵至今夜乃能定局足見用心之苦而軍政之難矣質之高明當以爲然

復多都統書

胡林翼

用兵之道全軍旅爲上策得土地次之殺賊爲上策破援賊爲大功得城池次之古人必四路無賊然後圍城又兵法十則爲之今則兵少於賊不止十倍下游數十郡皆賊也若我兵困於一隅賊必以弱者居守而以慣戰悍賊旁軼橫擾乘我於兵力不及之處又或四面來援腹背受敵我不能制賊之命彼卽將蹈我之瑕也此間去年臘月至本年正月合馬步四五萬人之力僅復二城而賊已於下游連陷數十郡縣鄙意目今之局不徒以得城爲喜而以破援賊爲功老兄智識過人敬祈隨時示復爲幸

致李方伯多都護書

胡林翼

賊匪破陷金陵城外營壘東南大局不支軍國之事愈辦愈壞實堪痛哭一月二月之後皖北楚北皖南江西亦將應接不暇愚見江南大營之弊其虛冒蕩佚乃其致敗之由其調度布置實亦不能盡善患在有圍兵而無備戰之兵有守兵而無備剿之兵以七萬人頓於城下賊從後路旁路紛擾聞江南大帥遲疑吝嗇而不肯速分兵又不肯多分兵繼因所分之兵敗挫不力後路旁路已陷餉道已阻始不得已而

再分兵則應戰之兵氣已挫而圍城之兵力又單乃得乘閒抵釁以陷其營壘此金陵軍營之覆轍也愚見皖北楚北之軍務只應以一處合圍以致賊其餘盡作戰兵援兵雕勦之兵假如圍安慶則不可再圍桐城若處處合圍則兵力皆爲堅城所牽綴援賊大股上犯勢必無勁兵可備援勦不破援賊則城賊不可得而滅不剿流賊則守賊不可得而走此一定之局也假如以萬人圍城或分布樅陽或樅陽不可卽得則於樅陽之下作遠勢以圍之仍必須留二萬餘人或三萬人作戰兵援兵及雕勦之兵則滿盤棋子均是活著彼江南之軍事七萬人均作笨兵騃兵誤矣以韓信之才而李左車尙戒其不可頓兵堅城之下情見勢絀似宜及早圖謀以備不虞思慮所及請密商定

與本省司道書

曾國藩

奉到二十五日公函囑弟帶勇晉省懇摯盛意敢不敬從惟弟將此事規畫大局已盡布於連日寄中丞各書矣茲復陳其區區求諸君子籌之焉省城餉項及煤米等具尙可支持數月城內守垛之兵及游擊之兵亦經早爲籌備賊匪若來似尙可堅守無虞弟所慮者不難於堅守一二月而難於驅之使去不難於城外與之相持而難於河下有以攻其船而奪其所恃賊此次來湘必於近河安紮營盤與河下之船聯爲一氣緩則乘便進攻急則退居水次以舟爲巢聞分數百號船游弈沿湘上下湘潭常德衡州等處

皆將分股擄掠城外之兵勇縱使援師日集求與之一戰而不可得不過三月城內乏餉卽成坐困之勢鄙意未曾被圍之前先謀解圍之法須籌所以攻毀其船者無使其揚帆鼓楫來往自如而後可冀其逐去也刻擬趕造木簾與之水戰其法編杉爲排寬約七尺長約丈有五尺剡其兩頭以便劈水疾行前後安放兩輪如翻水車旁施兩槳頭尾置舵順逆皆可駛行置大鐵釘於頭以便衝擊逆船上置帳房一架如京師所謂西洋房子者頂及四圍皆用夾布每日三次澆水以禦鎗礮彼船高仰我簾貼水鎗礮仰攻則遠而勁俯放則子易落其利一也簾身喫水旣透帳房亦極漬溼賊之火彈火毬燒我不能燃烈我之火箭火毬近船卽可焚放其利二也我勇在簾退則落水賊若登簾不得不盡力死戰可救奔潰之積習其利三也每簾之費不過二十兩造簾百架工不滿一月費不過二千工價俱省其利四也每簾僅雇一舵師二槳手餘皆用尋常兵勇蓋簾身穩實不慮蕩搖不必習慣之舟師而可驅之於水戰其利五也弟日來籌思專在此事誠使咄嗟辦此可用火箭火毬燒其船可用擡鎗大礮擊其人可以轟翻小船可以衝穿大船但能擊破賊船數百號彼失其所恃或可少免近水州縣四出擄船之患省城亦有解圍之日愚見若此伏求各位大公祖深思熟計如其利一而害十則不必興辦卽候詳示倘或害少而利多則求迅速示復俾得星夜趕辦一月以內弟可統領此師順流而下必且與此會鏖戰一場也

致衛靜瀾侍講書

胡林翼

貴省近年以來百姓之身家性命其爲捻逆所傷殘兵勇所荼毒者不堪設想雲浦中丞奉旨督辦防
勦事宜蓋帝念中原長城倚重誠能改絃易轍一反從前大帥所爲或可稍蘇民困自古未有不戰而
能守不勦而能防者也弟前此賢才之舉曾列旭初大名二人同升必不難宏濟艱難及時補救惟團練
可以濟兵力之不及而不可與言摧陷廓清之事以額兵所無能爲力者而責之不教之鄉愚以糜費數
十百萬之餉所不能有成者而責之不名一錢之民捐民辦此則私心所未安者也近探賊衆分布和州
蕪湖兩岸勢已西趨前請閣下代募虎士百五十人如力不能及則馬隊百人亦可自成小隊購馬一百
匹並備鞍韉等件秋高來鄂以資征勦茲奉上銀三千兩惟閣下便宜行之不勝感企南人使船北人使
馬取其所長而用其所習弟惟日盼鐵騎前來如何選法如何操法諸候尊裁非弟所能遙度亦不責兄
以程限也

與官中堂
曾侍郎

都將軍
楊軍門
論兵事機宜書

胡林翼

兵事以攻城爲下策得一堅城破數十巨壘殺賊不多賊氛仍熾而士卒傷殘元氣不復非用兵之至計
也又當逼城攻壘之時如雀之伺蟬志在於蟬而不知弋人之又伺其後攻堅不克志懈力疲他賊旁援

往往誤事此尤近年之通弊鄂軍謀皖已歷二年而未能得勢以兵祇一路也七年賊畏黃梅之馬步而閒道從蘄州張家塆內犯已繞黃梅之後八年我軍力扼宿松張家塆復設重兵賊又閒道由霍山繞麻城黃安乘虛以犯漢陽德安之邊境無他備一路而虛一路賊之乘閒抵隙固宜然也又八年麻黃之賊以迪庵昆季之精兵并調省營二三千人又調宿松二郎河靈營三千人幸而獲勝勢尙洶洶今度吾軍之力能如往時否統兵大將之調度能如往時否三河之敗迪庵固非不知兵者一分於彭湖再分於蘄黃三分於桐城四分於舒城所帶之勇亦攻堅之餘創殘之遺耳其忠心義氣可感其分防分守之苦心亦可憐然則謀皖之事若再枝枝節節爲之可逆料其必無所濟無論現在之兵力不能如八年秋後之精卽令力攻而得太湖得石牌得潛山得桐城事事如前而分防分守仍不能不如前是終不免前車之覆況其必不可得也說者曰急攻安慶得安慶而鄂可保竊慮安慶未必卽克而賊之踞石牌者方且修城濬壕爲久拒計必不急與官軍交戰攻城無良策自昔已然是說也心疑其曠日持久而又虞他賊之從霍英以襲我後非完計也說者又曰以全力攻太湖攻石牌然後以一枝循安慶作圍兵期以二年之久如潯陽之四面合圍斷其饗道一枝循潛山作戰兵伺賊來戰隨機策應是說也較爲得力惟英霍一路尙嫌其虛六安一路無人守禦從英霍可侵兩蘄從六安可達光固而侵麻黃徑襲蘄黃賊不得逞於

此必轉計於彼以期官軍之卻顧而回勦仍是七八年故智耳唐余二將可守於蘄州而不能分守於麻城羅田蘄水心尙危之且石牌太湖又豈易得耶似無實在把握或謂以唐以余以阿以蔣分守蘄羅英霍作守局而以希庵一軍速進石牌林翼隨之以多與鮑進太湖都公統之作戰局其說然與或謂以蔣道扼荊橋異日可進石牌以多鮑唐進太湖異日可搗潛山不必改調賊卽閉匿不出而攻不足者守有餘是黃梅一路已無他慮若以黃州之勇七千人從羅田英山出潛霍之天堂專主於戰不主於攻深入虎穴則各路之賊必屬集來援如其布置得宜接應有法大戰數次十數次賊氣自餒而各城守賊將無固志是說也其計頗奇蓋以兵出潛霍之境是已據羅田蘄水蘄州之外藩則內地之防不勝防者禦於戶庭之外可以無虞其侵軼其得力一也不走太湖石牌之正路而以拊其背者搃其吭前面太湖石牌安慶之賊已屬自驚而且必糾聚而求戰較之逼近城壘與礮石爲仇者不同其得勢二也惟兵出於潛霍之交山徑崎嶇地勢較險米糧軍火轉運最難非親自督辦則呼應不靈非多設委員招引紳士則轉運必誤且賊所必爭必有大仗非強兵能力戰者不能奏功此則必須籌酌盡善者也總之非三路分進終是頭痛醫頭脚痛醫脚枝枝節節爲之三四年未必成功而水陸將領精力盡疲英華衰歇是欲速而反遲也若蓄勢審機駐兵於賊所必爭之地使賊欲不戰而不可得則一半年之後城邑可盡復是似遲

而實速也更有奇者昔東吳晉宋之際公瑾士行均以舟載陸師登岸殺賊洗脚下船此東南地勢如此自昔已然若以另枝由江流登岸築壘伺便進剿兵來之先賊必無備賊備之後兵又他徙兵退之日賊必弛備弛備之後兵可倏來不過一年賊已備多力分疲於奔命此申公巫臣教吳之至計也又宋世龍驤將軍張興世以軍入橫浦所謂奇兵數千潛出其上因險而壁見利而動使其首尾周遑進退疑阻中流旣梗糧運自艱此亦制賊之奇也似可於一萬水師之中挑選將領兼習三四千步兵如舳板十六人以八人兼習步兵口糧須於水師本分應領外酌議加增以水師之半習步則登岸之後乃有患難相依之情若以陸師改水或借船以渡陸師則情意不孚難期共事此計果行賊無不滅之理此又兵事之至奇而至當必乞速籌者蓋行此則又不僅三路竟可變化不測頭頭是道作爲無數勝著也以上各條乞公議而酌行之軍事重大安危所係不敢以一人之見貿焉從事也

與李幼泉書

曾國藩

僕本力誠閣下不可分兵分將貴軍現作守局卽稍分亦尙無妨師行所至之處總須多問多思思之於己問之於人皆好謀之實迹也昔王璞山帶兵有名將風每與賊遇將接仗之前一夕傳各營官齊集與之暢論賊情地勢袖中出地圖十餘張每人分給一張令諸將各抒所見如何進兵如何分支某營埋伏

某營並不接仗待事畢後專派追勦諸將一一說畢璞山乃將自己主意說出每人發一傳單卽議定之主意也次日戰罷有與初議不符者雖有功亦必加罰其平居無事每三日必傳各營官熟論戰守之法張凱章是王之幫辦劉壽卿是王之部將故二人守王之章程將戰之先夕必傳衆營官會議至今不改閣下於軍事閱歷尙淺如鮑之兩層大一字陳打進步連環李之不肯輕進待賊先撲王之將戰會諸將各獻計謀皆宜深思而善學之令兄與程學啟等必有獨得之秘不可及之處亦宜博訪而師法之堅其志苦其心勤其力事無大小必有所成也

與袁小午編修書

乙卯十月

徐 鼐

閣下爲國爲民允文允武昔希文之在陝州堯夫徧識諸將魏公之設幕府南軒冠絕賓僚以今方古蔑以加茲敝邑兩載以來大小數十戰仰荷 國家威靈士民用命彈丸之地得以瓦全然六邑貧瘠之區耳養勇幾數千人費銀日數百兩羅掘已盡供億維艱裁撤之則瀕於危仍舊貫則難爲繼此巧婦窮於炊粥之勢也竊思今日之務非實行保甲團練不可以裁募勇非裁募勇不可以甦民困取前賢已定章程實心奉行之而勢有不可強同者請爲閣下陳之戚少保之法曰選丁劉觀察之法曰派丁選丁則鄉愚不樂入選或貌爲無知或當場拋棄器械無從稽察也派丁則老弱充數無從釐剔也今擬選派並行

戶兩丁者選其一五丁者選其二七丁者選其三勤爲教習嚴定勸懲庶無偷濫之弊矣盧忠宣以下諸人皆言築堡必擇三面陡絕之地築柵亦須臨險六合東南濱大江西北多平衍阡陌相連茅檐錯處無險之可扼也今擬擇衝要來路挑挖深濠設吊橋以通出入築牛馬牆以備衝擊較築堡似爲便矣築樓火器之費前人慮擾民曰官爲給費今官之費無所出也取之捐輸則又累民今擬猓樹以當望樓鳴鑼以當鼓角備石子灰糞以補火藥之不及製竹槍狼筈以助鐵械之所需庶費不鉅而易辦矣其餘因革損益令不出乎舊章效必期諸見在芻蕘之愚十不及一伏惟閣下趨庭講習必有新定章程可以補前賢之罅漏而牖下士之愚蒙者剖析而詳示焉則閣下所以光家學而報君恩者豈惟敝邑之福云云也

上各憲請武場添試火器刀矛箋

己未守福甯

徐 鼐

竊以國家鄉試武生院府縣試武童首場用馬步射次場用弓刀石不更試以火鎗雜技者挽強命中之材束之志正體直之事原於講武之中示不黷武之意法良意美何可更張顧揆之近日情形似宜變通以濟急務也夫弓矢利屬金行而鎗礮用兼火力爲害烈而奏功亦殊前史述戰功言神臂弩克敵弓連珠箭近日軍營奏報凡我將士之殺賊及不幸死於賊者則鎗礮十居其七刀矛二三至弓矢幾無

聞焉黑龍江三姓吉林之兵皆關東勁旅黑龍江習弓矢吉林三姓習火鎗今關東兵之在江南北者吉林三姓屢有功黑龍江則無聞焉蓋鐵騎勁弩馳騁注射利於曠野不利於險阻其勢然也我閩省無處無山無山不峻數里之地向背已殊數步之中高下不及賊之乘我者每伏處巖谷突出相搏而我之拒賊者亦利於居高臨下勢同壓卵此則騎馬不能行彎弓不相及也愚以爲利用火器較他省爲更切也顧當此經費支絀之時添製火器增募鎗手月費數萬金勢必不能竊謂因利乘便有益無損莫若就武場試士之法少變通焉其便有三敢爲大人陳之福甯五屬除鄉試武生不計外武童幾及千人漳泉各屬倍之計通省不下萬餘人宜可以備爪牙一遇有事轉欲募別項之人者彼之所能非今之所重也生童之分優於兵勇而兵勇之技切於生童故無事與考試之典臨事反成冗費之才今若於馬步射外試以火鎗旁及刀矛中用者與選不中用者不與選則彼急功近名之心父以督之子師以傳之弟一二年後可得數萬精鍊火器之人彼武事本素業非強以不願也衣食本自給非待於家養也籍貫本可稽非外來奸細可冒充也有增置鎗手之益而無其弊便一也且增置鎗手必增製火鎗無論需費不貲自來官置器械必不如私置之精火鎗或藥不過門或一二次卽炸裂今彼恃爲考試之具則製造必極其堅好試畢必謹於收藏是增數萬管火鎗而官無監製之勞無庫存之擾便二也前年粵匪來犯各屬以聯

甲保衛而間有望風潰散者有易聚之人而無拒敵之技也今此與試生童無縣不有亦無甲不有第令地方官善爲倡率擇其技精而行良者授爲隊長團長定期日以相演習稽勤惰以爲賞罰則人自相師家自爲戰并聯甲之人亦相競勸以次裁撤兵勇節省糧餉便三也凡此三者皆因利乘便有益無損雖於科場條例有未符而當有事之時似可通融辦理

勸誠營官四條

上而統領下而哨弁以此類推

曾國藩

一曰禁騷擾以安民

所惡乎賊匪者以其淫擄焚殺擾民害民也所貴乎官兵者以其救民安民也若官兵擾害百姓則與賊匪無殊矣故帶兵之道以禁止騷擾爲第一義百姓最怕者惟強擄民夫強佔民房二事擄夫則行者辛苦居者愁思佔房則器物毀壞家口流離爲營官者先禁此二事更於淫搶壓買等事一一禁止則造福無窮矣

二曰戒煙賭以儆惰

戰守乃極勞苦之事全仗身體強壯精神完足方能敬慎不敗洋煙賭博二者既費銀錢又耗精神不能早起不能守夜斷無不誤軍事之理軍事最喜朝氣最忌暮氣惰則皆暮氣也洋煙癮發之人涕淚交流

遍身癱軟賭博勞夜之人神魂顛倒竟日癡迷全是一種暮氣久驕而不敗者容或有之久惰則立見敗亡矣故欲保軍士常新之氣必自戒煙賭始

三曰勤訓練以禦寇

訓有二端一曰訓營規二曰訓家規練有二端一曰練技藝二曰練軍法點名演操巡更放哨此將領教兵勇之營規也禁嫖賭戒游惰慎語言敬尊長此父兄教子弟之家規也爲營官者待兵勇如子弟使人學好個個成名則衆勇感之矣練技藝者刀矛能保身能刺人鎗礮能命中能及遠練陣法者進則同進站則同站登山不亂越水不雜總不外一熟字技藝極熟則一人可敵數十人陣法極熟則千萬人可使如一人

四曰尙廉儉以服衆

兵勇心目之中專從銀錢上著意如營官於銀錢不苟則兵勇畏而且服若銀錢苟且則兵勇心中不服口中譏議不特扣減口糧缺額截曠而後議之也卽營官好多用親戚本家好應酬上司朋友用營中之公錢謀一身之私事也算是虛糜餉銀也難免兵勇譏議欲服軍心必先尙廉介欲求廉介必先崇儉樸不妄花一錢則一身廉不私用一人則一營廉不獨兵勇畏服亦且鬼神欽伏矣

書破地雷事

李元度

粵寇之陷全州也穴城寘火藥潛熟之聲若迅雷破地出城場十數丈守陴者雜磚石擲空中賊隨以入號地雷及踰嶺涉湘道郴桂掠業煤礦者數千人益叱嗟立辦墮名城不可選紀發而未破者惟長沙南昌二城耳若武昌廬州吉安杭州及義甯諸城主者明知賊用此技不能禦坐汙於亡死數十萬人烏虜豈劫數不可回歟咸豐八年七月余以平江軍三千分守玉山廣豐常山三縣賊自建寧出二杜關猝犯廣豐守者裁五百人聞警濟師千人往援賊圍之三而我軍嬰守不能下賊訶知援豐者率自玉山來玉城虛可襲也十五日賊二萬掩至守卒僅七百城外民塵櫛比曰七里市三里街百貨所輳余親逆戰十里外斷賊浮梁賊以步隊綴我軍騎賊趨上游趾水渡將薄城余急入拒守賊踞西門外市塵爲窟穴急火之燔三十餘戶賊撲火熄聚殘甓爲壘穴壁施火礮平擊城上人我軍堅守兩晝夜賊忽罷攻鉦鐃聲雜作有老卒驚曰賊今穴地用鉦鐃掩鋤鏗聲耳昔破吉安義寧皆此術也乃懸賞令壯士縋城破賊壘余立埤堦間督戰飛礮中左頰仆流血升餘幸斜擊得不死時十八日日昃候也越日軍士來告地道已逼城計安出余裹創巡城知縣袁君翼相顧失色余忽悟拒之之法急下令起小西門汜北門計城百丈最受敵每二丈挖洞一廣二三尺深五尺許橫出城根下勿傷其址土皆內輦城以外勿透風每隊穴洞

一計洞五十限半日成違者斬衆未喻其法也逾時工竟問且何爲余曰每洞選壯士持短兵晝夜蹲伏其中飲食溲溺皆更代賊穿隧至勿驚縱以短兵可立斃衆如法行袁君猶疑畏余諭於介衆曰賊之爲地雷也必緊貼城根忌偏斜偏則不相值忌旁洩旁洩則力殺計鑿隧必橫長十餘丈我先伏隧以待賊是賊隧十丈而與吾遇者五其尙能逞乎衆皆譟曰善十九日日晡賊穿隧道將及城親卒來告戒勿聲磨刃以待俄斜穿及洞衆躍起立殪二賊隧陋爲賊屍所壅不能出追乃灌以水隧道破越日賊渠登南門外塔山隔江望城中新土纍纍如蟻蛭知術敗又三日竄德興玉山圍解余上其法於鄂撫胡文忠公飛書報曰子法信善矣然我軍亦用此制賊若武昌若吉安九江皆著成效今方壽安慶法爲賊得則吾術亦敗矣其秘之余遂絕口不復道其後安慶及江甯卒用此法下巨憖殲焉益服公之遠識也嘗徧閱兵家言古法鑿地道止用以撼城基或出奇兵掩敵無潛納火藥轟城者故備禦之法於古未聞嘉慶中王師平滑縣地雷法始大著粵寇竊其緒餘所過多殘滅然卒以是自斃天道誠好還哉是役余情急智生千慮中偶一得以所守至約故立談破賊而不勞今粵賊已盡殄反覆思之無以易此法也筆之以告當事者

竊臣自聞蘇州失守之信卽以京倉無漕爲慮及奉 命署兩江總督海漕係職分中事日夜焦灼卒無良策曾于本月初三日附片具 奏在案迄今又逾旬日不知江蘇巡撫 簡放何人駐紮何地其力能設法辦漕以濟京倉否無從函商查淮揚之裏下河產米最多而鹽場爲大利所在若改爲就場征課經理得宜較之近年所入可多得銀百萬以外如果蘇松久陷不能辦漕或于裏下河辦米解京或于鹽課中籌巨款實銀解京專供京倉買米之用亦足以濟權變而固根本然欲保下河之米場竈之鹽非于淮安多造戰船急辦水師實有岌岌不可保之勢昨准淮安撫臣咨到奏稿亦以保裏下河爲言湖北撫臣胡林翼七次寄函皆勸臣奉辦水師以保鹽場淮揚二郡自古稱爲澤國北有長淮南有大江中有洪澤邵伯高郵寶應諸湖運鹽串場人字芒稻諸河巨浸支流互相灌注一片汪洋若能造戰船二三百號多購洋礮精選將弁則不特可保下河之米場竈之鹽亦且可以輔揚州之陸軍使逆賊不敢北犯助臨淮之陸軍使川路不致梗塞此淮揚水師急宜籌辦之情形也賊之守金陵也以安慶廬州爲犄角以太平蕪湖爲護衛蕪湖之南有固城石臼南漪丹陽諸湖上則通于甯國之水陽江青弋江下則止于東壩掘東壩而放之則可經太湖歷蘇州以達于婁江古之所謂中江者也蕪湖孤懸水中賊匪守之則易官軍制之則難是以五年血戰不能得手而黃池灣沚屢次失利皆以全無水師之咎臣愚以爲欲克金陵必

先取蕪湖必于甯國另立一支水師徧布固城南漪等湖之中甯國水師攻其內大江水師攻其外如七年攻破湖口之例庶幾蕪湖可克而東西梁山可期以次恢復此甯國水師急宜籌辦之情形也逆匪堅忍善守各路無兵不能斷其接濟從前武昌九江臨安等處之拔實亦舟師之功居其少半側聞紅單師船體質笨重非大江狂風不能起柁又不能接應陸戰不能巡哨汊河金陵所以久而無功亦由水師一面始終不得絲毫之助今蘇州既失面面皆水賊若阻河爲守陸軍幾無進師之路城外幾無紮營之所臣以爲欲攻蘇州須于太湖另立一支水師浙江無事宜于杭州造船浙江有警亦宜于孝豐等處造船必使太湖盡爲我有而後西可通甯國之氣東可拊蘇州之背而陸師亦可得所依附此太湖水師急宜籌辦之情形也此三者皆目前之急務如力不能兼則先辦淮揚及甯國二支如力仍不逮則專辦淮揚一支蓋蘇省財賦之區淪陷殆徧僅留下河之米場竈之鹽若不設法保全則東南之利盡棄矣臣自咸豐三年奉 旨辦理水師閱歷頗久而三處皆臣所管轄之地鹽漕皆臣應辦之事義無可辭責無可貸頃已專丁至 欽差大臣袁甲三軍營函詢淮安等處尙有木料可以造船者否其甯國安吉亦當派人前往察看木料之多寡船工之難易至礮位一宗擬卽派員資銀至廣東購買洋礮五百尊由大庾嶺過山達江西而出湖口又由英霍等縣過山以達固始而出長淮計往返須五月有奇程途雖遠而限期必

覆搬運雖艱而志在必行是否有當伏乞 聖慈詳明指示屢據探報逆首陳玉成欲由徽州竄據江西臣進駐徽境與張芾一軍聯絡防剿俟鮑超張運蘭及左宗棠新募之勇次第到齊將皖南布置稍定立脚粗穩臣或徑赴淮安監辦水師或奏派大員赴淮辦理屆時再行 奏明請 旨遵行

通籌全局疏

同治元年二月

曾國藩

竊臣于正月初十二十二兩次奏報亦已粗陳梗概惟以 聖主信任之專 兩宮皇太后望治之切而臣等章奏寥寥幾于月僅一至疏遲之罪夫復何辭臣忝列戎行歷年以來奏報甚稀其所以碌碌自守者蓋亦有故一則不輕奏謠傳之言如近日賈臻奏廬州克復袁甲三奏巢縣克復皆因無稽之探報以爲入告之實據又或賊蹤未近豫相震驚輒以十萬二十萬具奏尤足以惑軍心而誤大計臣處向不憑探報入奏不欲以謠傳之言淆 朝廷之耳目也一則不輕奏未定之事凡大股悍賊之來其始常危險萬狀能堅忍支持而後漸臻安穩如去歲黃文金之內犯攻陷七縣堅持三月臣僅彙作四次入奏去冬徽州之被圍苦戰九次堅守彌月臣僅彙作兩次入奏不欲以未定之狀增 朝廷之憂慮也一則不輕奏預計之說兵事成敗難以逆料咸豐八九年間江南屢奏金陵指日可克十年夏間浙江屢奏嘉興指日可克厥後皆不能踐言臣初督兩江之時奏稱由甯國進兵可達蘇境厥後甯國失守至今不能踐言

臣深以爲恥至近日內臣章奏蒙抄示臣處者或稱援浙之師可由嘉興直搗蘇州或稱揚州之師可由常熟進攻蘇州皆不量兵餉兩窮之苦而預擬萬不可成之計臣不欲以預計之說入奏非特慮大言之難踐亦恐紛亂 朝廷之規畫也因此三者每存敬慎之心轉蹈遲延之咎前此 文宗顯皇帝御宇分任其責于封疆將帥臣猶得以碌碌隨諸帥之後循愚拙之常茲值 聖皇踐阼之初微臣尤忝非常之遇倚任彌重 延訪更殷欽奉 諄諭自當變更前轍隨時飛章入告嗣後擬十日奏事一次有急則加緊具奏所有此次 諭旨垂詢之件及正月歷奉 寄諭垂詢諸事謹分條一一詳

一去年攻克無爲運漕東關等處本可乘勝直搗巢縣梁山進圖金陵近日袁甲三一軍攻克天長六合江浦口尤有直薄金陵之機方今東南糜爛臣等孰不思直搗老巢擒渠掃穴惟用兵之道可進而不可退算成必兼算敗與其急進金陵師老無功而復退何如先清後路腳根已穩而後進所有進兵金陵之次第以臣愚計之多隆阿一軍應俟攻克廬州而後進曾國荃一軍應俟攻克巢縣含山和州西梁山而後進袁甲三李世忠一軍應俟會克廬州守定六合而後進都興阿一軍應俟守定揚州浦口而後進彭玉慶楊載福之水軍應俟攻克裕溪口西梁山而後進欲拔本根先除枝葉仍須計算各路游擊之師數倍于金陵圍城之師庶幾無撤回之虞擬卽以臣議商之袁甲三都興阿等是否有當恭候 訓示遵行

一潁州圍城之賊聞係捻匪與苗黨勾結志在必得潁郡與壽州霍邱爲犄角之勢李續宜業經奏派成大吉蕭慶衍兩軍赴潁救援據報于正月二十六日自霍山起程惟繞道固始計程四百七十里途次無米可買恐到潁不能迅速但求潁城堅守月餘勝保救之于北成大吉等援之于南必可立解重圍李續宜所部之兵留三支駐守湖北分防襄陽德安麻城等處以兩支赴援潁州以一支防守六安此外親兵帶來安慶者亦無幾矣

一謀浙之道保廣信之糧路以守衢州保徽州之後路以攻嚴州舍此二者別無良策臣已兩次具奏在案目下左宗棠駐紮開化境內正月十七日在篁岸獲一勝仗二十日在馬金嶺等處獲大捷一次卽日進攻遂安等縣係從嚴衢之間下手惟徽州歙績二縣羣賊又復麕聚我方圖入浙境賊乃圖犯江皖春夏間必戰爭不休湖州海甯久無信息鮑超圍攻青陽未下不能遽及甯國之境又豈能遙通湖州之信昨奉 寄諭垂念趙景賢飭赴福建糧道之任 朝廷愛才之心薄海臣民聞之生感無如音問難通徒深憂灼

一江蘇軍務自奉賢南匯川沙失守後上海已岌岌可危至今月餘歸然幸存蓋髮逆畏忌西洋不敢驟樹大敵而目下情勢舍借助洋兵亦別無良策臣于二十二日曾經附片具奏上海僻處東隅論籌餉爲

要區論用兵則爲絕路使無洋人相助髮匪以長圍裹我官兵若少而弱則轉瞬又成坐困之勢若多而強則不宜置此無用之地再四思維不得所以保全之法擬仍借洋人之力開誠布公與敦和好共保人財將來果派何軍協同防守之處應俟李鴻章到鎮陳士杰到皖再行察看奏明辦理

以上各條均係近日 諭旨下問之件有業經具奏者有未及詳陳者理合一并臚舉仰慰 慈厪

皇朝經世文續編卷七十一目錄

兵政十 兵法下

公啟曾協揆

馮桂芬

書袁端愍公年譜後

孫衣言

專責成 劉捻十議之二

葛士達

聯民圩 劉捻十議之三

葛士達

攜賊黨 劉捻十議之四

葛士達

重閒謀 劉捻十議之五

葛士達

習長矛 劉捻十議之八

葛士達

拒馬繩 劉捻十議之九

葛士達

靈營兵不宜分疏

沈葆楨

統籌新疆暨各省用兵緩急情形疏

駱秉章

覆陳川省兵力不能會剿黔匪疏

駱秉章

籌議練軍事宜疏

曾國藩

再議練軍事宜疏

曾國藩

官軍出關分起次第行走疏

左宗棠

上沈相國書

節錄

李有棻

具陳臺北情形以明是非疏

劉銘傳

皇朝經世文續編卷七十一

上海葛士濬子源輯

兵政十 兵法下

公啟曾協揆

馮桂芬

天禍吳民陸沈一旦焚燒夷戮之慘遠接宋建炎四年金阿朮之禍爲吾吳七百有三十年未有之大劫然阿朮自南而北五晝夜卽去如疾風暴雨之一至非若今日之賊之窟宅踳踞兩年之久而未有已也幸先帝聖明睠然於江南天下之重舉而畀之執事是天未絕我吳民之命而使執事更生之也惟是措置必規大局攻取務求萬全移兵則形勢不宜分兵則調遣不足執事遠猶碩畫所見者大某等具有一知半解不勝欽佩故一年以來未敢輒以浮詞輕瀆清聽近諗鋒車收復安慶沿江州縣次第肅清前驅已達蕪湖聞者無不額手稱慶翹首跂足於旌旗之至不獨某等私幸已也夫三郡財賦之衍沃兩年倒懸之困苦萬戶壺簞之惴忱凡茲皮傅膚受之說執事心知而飫聞之概不敢以進惟是江蘇今日之情事有可乘之機而不能持久者三有僅完之地而不能持久者三敬爲執事陳之一曰鄉團去年各城被陷鄉團抵死拒賊有相持至數月之久者以蘇府言之永昌徐佩瑗黃土橋馬安瀾其尤也所居在蘇

州常熟之間縱橫三十里內水陸勇數千附近鄉團一呼四應不下數萬嗣受中丞密檄與送款之賊首熊國荃約盟而壁壘如故大軍一至必可爲邪許之助遲之又久萬一事洩則糜爛及於鄉黨故屢請此間進兵不應則流涕以去此不能持久者一也一曰槍船江浙間向有之船小而行捷槍準而心齊其始弋鳬鶩爲業繼爲開賭演花鼓戲之淵藪官不能捕軍興轉受雇防堵吳江陷其渠沙鍋阿四者死難次渠費玉孫四喜亦受中丞密檄覘賊各船來往飄忽屢爲賊患賊畏而招之許不蓄髮出入賊中陽陽如平常此輩顯持兩端而一狎於寬大之政一戀於毛土之恩實委心於我大軍一至必可爲嚮導之助惟賊明知彼之不爲用而羈縻之彼亦明知賊之不相容而暫受其羈縻日復一日必且中變此不能持久者又一也一曰內間聞賊中送款中丞者不少蘇州李兆熙至以母子爲質春間李大舉來犯先期而漏師交綏而旋遁當非無因大軍一至或可爲倒戈之助遲之又久亦必中變更易賊將益復牢固不可收拾此不能持久者又一也然此猶其小者也請言其大者此猶其虛者也請言其實者其數亦有三焉一曰有兵無餉之鎮江馮鎮軍子材所統多張忠武舊部艇船等水師亦號稱勇銳賊兩攻之輒大敗今揚通一帶安堵固由賊志在南不在北亦未始非鎮江障蔽之力及今而大軍一至可保全之以爲北路一面之師然餉欠鉅萬孤城無依兵心已搖潰可立待此不能持久者一也一曰兵單餉乏之杭湖兩郡爲

賊所注意之地兩年來以全力制之乃靈光歸然百撼不折可謂難矣及今而大軍一至可保全之以爲西南一面之師然精銳無多師久而老仰給過鉅餉久而匱比聞蕭山紹興相繼不守四面受敵文報不通湖州更逼賊氛四鄉瓦礫幾無人煙若無援師終於潰散決裂而後已此不能持久者又一也一曰有餉無兵之上海上海爲餉源重地江浙餘燼所萃商民輻輳兵籍數萬可恃者不過數千及今而大軍一至可保全之以爲東路一面之師且可籌備水陸糧餉然勢居下游無險可扼蕞爾之區孤懸浮寄數十里外皆賊兵勇雖多或爲近地游民選懦而不能前驅或爲大營潰勇獷悍而不知循律雖孫吳復生亦不能爲功幸賊不大至視息偷安日復一日總非長策此不能持久者又一也由前三者言之果使大軍破金陵而來卽鄉團盡散槍船歸賊內閣無聞不礙其爲破竹之勢由後三者言之則金陵旣下賊且徜徉南徙自兩浙而皖南而西江繞出上游甚且蔓延江北以躡大軍之後而執事自西北控東南之議不復可行恐繼風沐雨正無已時而吳中之果能出水火而登衽席尙在可知不可知之間也某等借箸籌之及今三兩月之內可乘者未盡潰散僅完者未盡決裂但請奇兵萬人以一勇將領之間道而來旬日之間蘇常唾手可得大軍一至則朽株枯木亦助聲威大軍不至則鐵郭金城將淪灰燼及今不圖後悔必矣聞大軍以一軍圍蕪湖以一軍趣甯國上游布置已密所謂奇兵萬人者宜由江北渡福山襲常熟

或由長江直薄江陰以執事之威挾疾雷迅霆從天而降之勢各路兵勇民團人人奮發內外應合卽一萬可抵十萬之用一面檄鎮江兵南攻丹陽西次高資檄揚州兵截江要擊檄艇師沿江助戰爲北路之軍一面檄寶山兵攻嘉定松江兵攻青浦爲東路之軍一面檄杭州兵攻嘉興湖州兵由太湖復宜興以會甯國之師爲西南路之軍同時大舉下游各賊必將自亂自潰執事堂堂之陣正正之旗由蕪湖太平以薄金陵雖有智者不能爲賊謀矣肅清江南在此一舉昔梁王僧辯敗侯景景奔吳郡僧辯遣侯瑱追之景南趨嘉興勢復熾幸趙伯超力拒之乃退奔松江而死明祖平吳廖永安先以偏師入福山港徐達常遇春自宜興入太湖趨湖州守將李伯昇降嘉興松江繼降然後進圍平江二者皆上游進兵殪賊吳地之證然皆先以下游一軍牽制之如出一轍傳所謂譬如捕鹿晉人角之戎人掎之與晉掎之是也敬陳芻說願執事采擇焉至師行以糧食爲先執事拔營有日卽飛札吳方伯預爲籌備方伯善籌餉一以委之必不貽誤昨已臚陳大略願之聖主其有奏牘所不能盡者覲縷如右特遣錢戶部鼎銘齎呈屬以包胥秦庭之事願聽執事無衣之賦如不得命江南億萬姓從此死無日矣惟執事進退之

書袁端敏公年譜後

孫衣言

嗚呼自宣宗皇帝之季至於咸豐庚申辛酉二十年間軍旅之禍可謂亟矣洪秀全發難廣西以祇神

夷鬼之教驅脅死黨軼出桂管順流而下不半載破荆鄂據金陵南極閩嶠北驚帝畿而苗沛霖張隆張樂行以淮北七八無賴挾鄉里羣不逞之徒抗官剽劫禍亦擬於秦晉齊魯兩犯畿輔當粵賊之熾踰據江表建立名號盡有財賦之地幾成割據之勢疑非淮賊之所敢望然金陵窟穴用兵十年遂無噍類而苗張遺孽後七年乃滅何成功之遲速殊耶則所以治之者有不同也昔者聖王之於民盡心焉爾矣爲之田里以贍之爲之庠序以教之爲之禮樂以養之其於吾民若惟恐拂其性而傷其生也而其不率我教則刑亦隨之故有五禮以章德則曰天秩有禮有五刑以討罪則亦曰天討有罪皆所以奉天行事而非吾之有所私也兵者刑之大也刑以禁奸邪兵以禦強暴所謂天之事也後世教民之法一切盡廢固不知所以爲禮又其甚者至於刑不足以示警兵不足以示威夫至兵不足威則天之予我以權者幾無所施而天子奉天之事廢矣嗚呼其將何以振哉當粵賊之變合吳楚數省之兵竭天下之財力以攻一城其於三代之用兵不知何如而志在戡亂則猶先王用刑之意也至於淮賊之亂始有撫之一說而刑罰之權弛矣夫撫之爲說古人有用之者用之外國漢文帝之於冒頓宣帝之於呼韓邪是也用之中國張喬祝良等之在交趾是也文帝之時漢之始興宣帝之時武帝兵威極盛之餘也張喬祝良之定交趾非頑民之好亂迫於州縣之虐而欲自救其生者也方興極盛之時彼固知我之兵力足以滅之而有餘

而民之逼迫於州縣則如嬰兒之見苦於婢僕號呼以求慈母此固可以一撫定也使其爲天下之亂民方謂我法之不足畏而夷狄方有輕視中國之心乃欲苟且以出於撫之一說則其禍必不可救靖康建炎之際李綱宗澤趙鼎韓岳諸將相皆可以有爲而宋之徽欽高宗爲女真所脅遂出於和明之流賊蓋亦屢撫而屢叛此其效亦可觀矣無他漢之不肯用兵者仁愛惻隱之心也宋徽欽高宗之議和曹文詔等之用撫畏葸苟且之計也出於仁愛惻隱其用心可以屈夷狄感異類而出於畏葸苟且則五尺之童笑之夫豈徒如此而已哉忠義之氣君父之仇雖衰亂之極而其蘊結於中者不能泯也吾不能用其所不能泯而以畏葸苟且之說倡之於上則於懷忠義以報君父者必百計以挫之民知其氣之無可伸也斯亦已矣一旦有事而有求於久受挫折之民則勢必無及夏少康以一成旅而中興宋徽欽席累世之業撫萬里之地而社稷移於一朝此何故哉嗚呼豈不可危也哉夫粵賊之亂今日已無事矣使其當長驅乘勝王師屢挫之時按兵不動僞爲求撫當時必有墮其計中者則粵禍至今未已可也苗沛霖之初起卽盛兵以折之其滅於咸豐三四年間亦決也治粵賊知其必出於戰而於沛霖冀其或可以撫故其成功之不同遂至於此皖北之亂吾所目擊也張隆張樂行之徒當時將帥皆謂苟且可撫而賊不能隱忍以誤我旋撫旋叛幸而速滅沛霖以陰狡之性介於官與賊之間者將十年當時之議且有以不能

急誅沛霖議公者及見公之章奏則知當時皖中兵食盡操於某帥之手公孤軍疲乏力固有不得爲而其苦口以言於上及密謀於楚帥以誅之者固策沛霖之必叛也其後沛霖果叛果卽誅死蓋惟知賊之必出於叛則吾亦不能不真出於戰真出於戰而後天下亦遂無不滅之賊嗚呼兵者刑之大也天下事固有必出於戰者而謂可以畏蒞苟且之見行之也哉

專責成

勦擒十議之二

葛士達

擒逆之起十有餘稔矣所蹂躪五六省矣議所以勦且撫之者非一日矣斬獲散遣積十數萬矣而賊數不加少且浸而盛焉將師不武臣不力耶責成不專也夫不能勦而撫縱受羈縻還復叛去撫之無成效已可概見卽所謂剿者不過賊東亦東賊豫亦豫賊秦楚亦秦楚往來逐北旣難得當卽得一當力疲氣怠僅僅自保已爲幸事假使獲捷斬馘數百於數十萬之賊曾不損其毫髮而我已疲於奔命其在賊則勢皆致我在我則勢皆致於賊安在其所謂剿也故曰今之辦賊非專責成不可然議者必曰賊蹤飄忽靡定忽東忽豫忽秦忽楚將誰責成而可不知賊雖飄忽靡定其目前所竄之處卽爲定處如竄東卽爲東境之賊當責之東撫竄豫竄秦楚卽爲豫與秦楚各境之賊當責之豫撫秦楚撫其入也縱不能扼而盡殲之旣追之出當防之使不得入再入焉卽不得辭其責東豫秦楚各守其疆使不得入而賊將何所

容身議者又必曰中州地勢平曠無險可扼卽欲各防其界非增數十萬之兵不可增兵不能增餉奈何
不知所謂專責成者一省則責之督撫督撫責之邊界各府州邑若東之南境曹單等邑豫之東北境蘭
考虞永等縣西南境南汝二屬西境靈關等處楚之德黃秦之華陰華州蘇之鹽浦蕭礪徐邳皖之宿毫
英六等屬皆爲賊出沒之路責之各屬地方官使各守其境以無兵無餉爲慮則倣唐李抱真守澤潞之
法籍戶抽丁給以器械蠲其租賦加以訓練一邑之租賦不足則蠲近邑之租賦以助之每邊邑約兵三
千擇有膽略才識者爲之守令俾統其衆加以本省夙練之軍賊來則互相聯絡勿得浪戰但擊退勿使
入境卽爲首功如有疎虞律以軍法 朝廷責成督撫督撫責成邊邑使賊無所容身而湘淮軍踵而遊
擊或可尅期掃殄剿定而撫可徐議矣

必絕其四竄之路而後可以感滅牧令堅守將帥力擊各專責成賊如釜魚阱獸矣

聯民圩

劉捻十議之三

葛士達

南北用兵地勢互異南方地窄得勁旅數千足以控扼一路北方地曠難於扼截計須聯絡民圩協力剿
守步步爲營旣以收犄角之效復以靖不逞之心東豫兩省圩寨錯立始則結寨以禦寇繼且據寨以抗
官寨長旣非端人寨中莠良不一往往賊至則獻糧納款兵至反閉關絕糴若任其漫無鈴束久必生變

明季李際遇沈萬金之輩不可不慮意謂當於邊境賊所往來要路各寨預爲布置每大寨擇一將統兩營兵駐之小寨以一營兵駐之約束不得擾累毫髮寨中嚴爲清釐一寨男女總立一冊籍其強壯另造一冊五家爲伍伍長主之二伍爲什什長主之十什爲隊隊長主之連環互保驅其無賴誅其黨惡擇有才望勇略者爲之長嚴定科條酌立賞罰配給火器軍械無事則統兵者教之操演有事則留一半爲守按伍登埤以一半隨兩營兵爲戰視賊舉動相機出剿明舉烽燧鄰寨援應邑中兵亦出而繼之或擊其中或邀其前後或衝突其左右如常山蛇首尾相應如諸葛八陣星羅碁布觸處爲首賊決不敢深入退亦無所掠於野又絕獻糧納款之弊乃以大軍踵而扼之其勢自困矣

兵擾民則民與兵讐兵衛民則民更樂爲將用其要在駕馭有道耳

攜賊黨

劉擒十議之四

葛士達

賊數雖多烏合蟻聚不相統屬急則相合緩則相圖豈能同心協力莫若廣爲招徠以攜之秦觀云盜賊不足深慮所慮者其中有豪傑耳當倣戰國七科虞詡三科之法卽召募東皖豫之人不論殺人劫盜苟有藝能皆得應募能十人者卽爲十人之長能百人者卽爲百人之長壓之以不測之威予之以非常之賞激以忠義結以至誠彼盜中自負其能或與賊有嫌隙不自安者自必聞風而來得其一二傑黠肯効

死力或令歸間其黨與或命爲內應或令爲鄉道勦辦乃有把握矣昔岳忠武討楊太所部皆西北人不習水戰衆以爲難後得賊黨黃佐令攜間其心腹遂八日克之用是道也今賊之長技在馬而我之所長在步使必捨所長習所短不特南北性殊不能嫻習而彌年累月賊勢駸駸乎將不可復制況能有待耶自來禦夷之策莫妙於以夷攻夷而勦賊亦莫善於以賊攻賊捕雀以鷹鸕搏兔以狡犬雖指使者人而不盡恃夫人力者物各以其類相制也假令雀能飛兔善走必強人以習雀之飛習兔之走而后捕搏之吾見雀兔不能得人且先斃矣

以賊攻賊如以毒藥攻毒瘡取效最速

重間諜

劉掄十議之五

葛士達

兵法云凡兵者以正合以奇勝又曰兵出於正勝敗參半兵出於奇十有七勝兵出於詭戰無不勝又曰無邀填填之旗無擊堂堂之陣蓋兵者詭道戰者危事是必計出萬全豈容輕於嘗試夫弈小道也其攻取劫奪猶必避實擊虛聲東擊西乃能勝偶獵小技也其驅騁馳逐猶必暗設坑阱埋伏罟羅乃能有獲自來用兵者不下數十百家未有不出奇制勝卽遇小敵亦必以計取之非不敢出於正也出之以正卽使能勝亦必互有損失故知者不樂爲此漢高祖曰吾甯鬥知不願鬥力其意深矣況處四達之地欲與

數十萬善走之賊搏而非用奇安能取勝哉夫出奇非必在山水之險也平原曠野麥秣蒙翳到處皆可埋伏賊夜中住宿必據村舍自可乘便掩襲火器爲我軍所長然亦必出之以奇益見猛烈用兵無定法總以出其不意攻其無備爲主而今莫敢出此者豈盡怯懦無能惟不用間諜之故古者軍中召募有能日趨數百里矯健絕倫出入城郭無迹者暨言語伶俐機巧者皆重賞羅致誠有以用之也今誠能招致若輩散布賊中俾追隨賊之動靜凡賊之多寡分合出入路逕及夜中賊首住宿之所時時偵報雖未見賊而賊之形勢洞悉胸中自能隨時用計臨事不致倉皇昔廣武君見韓信欲下井陘請以奇兵襲其輜重成安君不聽信使人間視知其不用乃敢遂下夫廣武君之謀必甚密非成安君左右不得知韓信兵未入境已有人伺敵之左右宜其用兵天下莫敵也宋劉錡守順昌夜遣百人口吹竹笛直入金營視電所燭見辮髮者殲之金兵大亂是亦必探明其營中門戶及出入路逕故敢以百人掩擊數萬譬之入山驟見岩石險惡磴道崎嶇雖勇者亦必色駭心悸有山中人爲之引道口講指畫懦夫坦然行之無疑矣知與不知也至用之之法則孫子用間一篇盡之矣要在陷之以破格之賞動之以至誠之心而已

用間爲用兵之要古人多成奇功

習長矛

劉揔十議之八

葛士達

兵法云長以衛短短以衛長曲道相伏險阨相薄則利刀楯敵衆蜂擁直逼陣前倉卒難支則利巨斧平曠相距遠在百步數十步則利鎗砲至若十步之內刀楯不能及而鎗砲將又不及施我進則逼賊賊進則逼我勝負之分全在此刻則莫利長矛長矛之用比他器爲難非精習不可意謂練之之法當如習射立一木表高與人等分爲四部上部爲面次爲胸次爲臍次爲足令足上裹鉛持鎗去表二十步而立命之刺某部則飛步刺之不得略滯刺無不中矣則稍遠其表至五十步爲度如是則一練其眼光二練其手法三練其脚步嚴立賞罰五日一考數月之後技可略就臨陣自能擊刺如飛比他器尤爲得力近之練矛專習刺擊空勢此立表分部之法較有實際

拒馬繩

劉揔十議之九

葛士達

地曠無險賊騎衝突不設藩籬陣腳易動用偏廂車恐其轉掉不靈用拒馬木又恐取攜重笨斟酌變通以繩結網橫長一丈寬則半之四寸之目中貫緯線其線稍贏鬆盪其中網之兩邊暨乎中央用椿九根釘著於地椿頭著刺鐵三其棱椿梢削尖俾易入土兩邊椿長五尺爲度中椿略短三分之二使網下凹如撈魚然每網一具刀斧四人伏於網邊以斫馬足每一隊兵攜帶兩具卒遇賊來分層布地相機進退隨地方圖麥秫蒙翳亦可埋伏厥器何名曰拒馬繩

與鐵蒺藜可相輔而行

霆營兵不宜分疏

同治三年十二月初五日

沈葆楨

竊臣准提督鮑超咨奉

上諭准假兩月假滿後出關剿賊以所籌分勇增兵協餉各事宜請臣切實代

奏等因伏惟行兵莫先乎審敵用人必盡其所長臣查回部自唐迄今千有餘年雄視西域種類流入中土與華民雜居雖數百年不改其俗其天性之悍鷙生聚之蕃衍心志之齊一迥非他部之比關外平沙廣漠敵騎雨驟風馳以十數營步卒當之勇者無所施其銳謀者無所售其巧雖勁必折其惟堂堂之陣正正之旗馬隊車營相輔而行始克有濟此用衆之地也汪海洋李世賢鬼蜮伎倆變態萬端其羽翼尙十餘萬皆百戰之餘懷必死之志閩粵土匪從而附之閩地山重水複千蹊萬徑此擊彼竄防不勝防稍涉大意便墮術中其必將識士意士識將心呼吸相通首尾相顧始克有濟此用奇之地也鮑超之治軍也算定後戰度不中不發雖倉猝遇敵必深溝固壘偵探四出務得賊情躬率諸將親觀戰地凡敵營之前後左右山川向背徑途紆折瞭然於心歸詢諸將之願戰者飭取軍令狀乃於廳事畫地爲賊壘令諸將各以所派進兵路徑次第按行使人人如虜在目次日乃決戰號令一出悄然無聲勇者不得獨進怯者不得獨退奇正分合使萬衆如一身稍有卻者雖鎮將立按軍法身臨前敵將士能否一一周知故

措置營哨各官必稱其職以爲室家近則有所戀欲人人有致死之心故不甚用土人親故多則有所恃欲人人有畏罪之心故不甚用鄉人其戰必克楚軍見而信之其罰必行楚軍習而安之故樂用楚人此鮑超一軍之實在情形也前者鮑超到省臣與往返熟商竊以西陲如此其急宜統全部西行再於川省添調額兵甘省多購良馬方可獨當一面謀出萬全誠以此軍繫天下之望必不容使少有蹉跌者也迨接閩中軍報林文察陣歿漳州劉典先勝後挫退守連城閩事大棘江防亦警東南之禍仍未有艾竊以霆軍遠征何如近剿但將康侍諸逆殲盡先紓朝廷南顧之憂乃以天下全力肅清西陲剿撫兼施自然就範然欲近剿康侍亦須霆營全部兵力方能摧陷廓清非酌抽十數營所能竣事且恐新舊交接之際將領兩不相下彼此去就之際士卒互有違心人數驟分軍容頓改也詢鮑超來咨之意第以勢須兼顧姑作調停實則出關必得二萬人方能確有把握臣愚以爲與其兼顧而兩無足恃何如專顧而必有所成現鮑超以窀穸未安幸蒙 賞假無論出關入閩均必先行回籍合無仰懇 天恩俯念閩疆緊要敕鮑超假滿後仍卽兼程由江入閩其全部先由宋國永龔雲慶會統赴汀以慰民望鄂省軍情稍緩僧格林沁忠勇謀略卓越羣倫關外情形尤所諳悉如可出關督辦必奏膚功由豫赴甘取途較捷閩省肅清後儻楚豫捻匪尙熾鮑超亦可就近移師如以回疆所繫匪輕非鮑超迅卽出關不可應請 敕鮑

超全統所部前往俾得盡其所長並懇 俯如所請 敕下各省寬籌餉項源源接濟專委任以責成功臣前以江省軍餉萬分難支裁撤精捷繼果仁右鼓湘等營兵力立形單薄霆營拔後必須另募勁旅以固邊防其霆營入江以來欠餉約三十萬尙須分月清理俾資行費總之早奏一路蕩平之績卽早釋一分宵旰之勞

統籌新疆暨各省用兵緩急情形疏

駱秉章

竊臣於同治四年正月十九日承准議政王軍機大臣字寄同治三年十二月十五日奉 上諭前據曾國藩奏鮑超請假回籍葬親當經降 旨賞假兩個月 諭令假滿後卽行由川起程出關剿辦回匪其舊部兵勇及得力將弁准其酌量帶往並著挑募川勇帶赴關外茲據沈葆楨奏接准鮑超咨稱擬帶所部八千三百名另調川兵四千募川省步勇數千酌添馬隊統計新舊各營月需餉十餘萬兩請飭各省酌撥協餉等語新疆各城變亂勢甚猖獗非有內地大支勁兵出關難資剿辦鮑超勇略過人聲威素著必能立功邊域迅掃逆氛該提督以塞外用兵必須厚集擬帶萬餘人前往方能制勝自係實在情形惟籌兵必先籌餉庶幾士飽馬騰所向克捷新疆地處沙漠餉無所出從前用兵皆由各省轉運接濟此次鮑超所帶兵勇月餉計需十餘萬須合各省之力協濟俾免缺乏著官文曾國藩都興阿駱秉章毛鴻賓

李鴻章吳昌壽惲世臨劉蓉閻敬銘沈桂芬郭嵩燾恩麟體察情形每月可以協撥若干均各酌定數目奏明辦理卽按月如數撥解不得宕延此係緊要兵精衆擎易舉該督等總須顧全大局寬爲籌備毋許稍分畛域借口推諉也將此由五百里諭知官文曾國藩都興阿駱秉章毛鴻賓李鴻章吳昌壽惲世臨劉蓉閻敬銘沈桂芬郭嵩燾並傳諭鮑超恩麟欽此同日又奉上諭沈葆楨奏甘肅福建軍情均極喫緊靈營兵不宜分並將鮑超原咨抄錄呈覽一摺所稱關外平沙廣漠利在用衆閩地山重水複利在用奇西陲軍務緊急鮑超宜統全部西行方可獨當一面第閩事大棘江防亦警若欲肅清康侍各逆亦須靈營全部兵力方能摧陷廓清等語尙屬實在情形惟新疆自庫爾喀喇烏蘇失陷伊犁被圍情形萬分岌岌都興阿穆圖善雷正綰等分剿甯夏固原之賊正在得手未能遽爾分兵非另撥大支勁旅迅速西行則出關剿賊之說幾成虛語況閩省餘氛已由左宗棠三路援剿鮑超又分兵萬餘人交婁雲慶等統帶會剿閩賊兵力不爲不厚自可無須再留鮑超全部致增朝廷西顧之憂著曾國藩沈葆楨傳知該提督於假期一滿卽日率領所部宋國永等各軍由川起程入甘節節掃盪早日出關相機進剿婁雲慶等軍俟閩賊殄滅後仍著前赴鮑超軍營聽候調遣鮑超請撥川省制兵四千名並由川中招募步勇數千名之處著駱秉章卽日妥籌辦理毋稍遲悞致滯師行沙漠地方平原曠野非馬隊車營相輔而行不克

有濟應如何添設馬隊及入甘購馬之處著鮑超咨商曾國藩斟酌情形實力籌辦鮑超一軍每月需餉十餘萬兩本日已寄諭官文等各就該省情形酌定協濟數目源源撥解等因欽此伏維新疆逆回倡亂自庫爾喀喇烏蘇失陷伊犁被圍勢甚岌岌自宜擇將出師大張撻伐惟查關外用兵與內地迥異平沙廣漠利在馳驅道光年間克復新疆四城擒獲首逆張格爾之役著績以吉林索倫馬隊爲最次則招集伊犁等處遣犯用作頭敵立功贖罪此輩强悍之徒久戍邊庭風土習慣且有生還之望是以臨敵思奮奏捷尤速其各省所調征兵疲於遠道不過藉壯聲威良以南方地煖旣不能耐西域嚴寒且騎射馳驅非其所長奔走絕漠動輒千里雖有健者尙未臨敵而已疲憊況川楚產米之區人非穀食不飽關外偶有雜糧人衆尙且難繼經過沙磧之中往往以牛湏馬肉藉充饑渴風土異宜飲食異俗用違其地不能盡其所長此川楚兵勇遠征西域甚非所宜也內地用兵祇須籌給餉項兵勇有資隨處可以買食卽或偶有乏糧之區裹帶轉輸尙易籌辦關外則人稀土曠戈壁水草不生尋常行旅往來尙須預備餱糧道光年間新疆南路之役於蘭州肅州暨口外節節設立糧臺派員轉運並由內地多購駝隻以備沿途馱運麥麩源源供送大營尙聞偶因途中稍有耽延軍中卽不免枵腹以待維時甘省無事麥麩旣易采辦關外哈密烏魯木齊亦皆安靜尙可轉輸今則新疆各城屢報失陷搶掠已空而甘肅賊氛徧地半遭蹂

躡蓋藏既罄播種失時雖河西甘涼肅三郡尙稱完善而欲日供數萬軍之糗糧轉輸不絕誠恐難繼且關外自哈密而前中途不能梗阻一旦糧運不繼非同內地尙可擇近就食師懸絕漠進退維艱雖有勁旅不戰自困此用兵西域運糧更難於籌餉也且鮑超所部萬餘人每月各省籌解餉銀十餘萬兩若在內地固敷支用既出關外所費不貲無論各省現值籌防籌剿款項皆非充裕即使勉力湊解道途通塞無定難期隨時接濟而鮑超行營每月縱有十餘萬兩所有糗糧行裝皆須於關內預爲購備沿途轉運所費甚鉅出關後卽無處可以采辦師無宿飽何以言戰欲再增餉力更不及此關外用兵非餉項充足不可也至於酌調川兵四千名隨鮑超前赴新疆現在川北上自龍安下至城太皆難鬆防川東則酉秀彭涪綦南江合皆與黔境毘連羣寇如毛竄擾幾無虛日建昌則西防會理鹽源東剿越嶲夷匪時勞征繕松潘則各營新復番務未平峨馬夷匪時萌蠢動省標尤以根本爲重前抽調制兵一千五百名交鶴齡統帶赴甘已屬勉爲湊集此川兵所以再難抽調也竊更通籌大局以用兵緩急次第而論僞侍逆康逆等以殘敗之餘遁入閩疆兇焰復熾若不大合兵力及早撲滅則浙江江西廣東皆虞竄越籌兵籌餉東南民困仍未能蘇鮑超之霆字營剿辦此股前在江西旣已屢挫逆鋒賊中聞風喪膽似不宜遽行抽調正可藉此以靖餘逆且髮捻大股竄擾鄂豫之間往來飄忽附近各省均須戒嚴亟宜添調勁旅面面

兜圍除此腹地之患至若滇南叛服靡常貴州全省糜爛川省介居其間沿邊在在設防日久師疲百密
倘有一疎黔境羣盜數十萬迫於飢驅日謀來川掠食設被闖入邊界蜀中卽不堪設想是川中先將甘
境階州踞寇剪除少紓北顧之力卽宜抽調各營由東南分道越剿先將黔界肅清並將西南會理一帶
布置周密方可進規滇南而無回顧之憂至於新疆各城淪陷固宜早爲收復竊維廣漠之外非內地之
寇可比卽或稍稽天討所肆擾者僅止回疆不至裹脅愈衆蔓延愈廣日久寇心自懈且分踞各城勢
已渙散此時西路祇須嚴扼嘉峪關斷其勾結之路回部絕不敢輕窺內地至於北路本有蒙古爲之屏
藩朝廷加意撫綏沿邊藉資保障逆回曷敢侵犯一俟甘肅各路回匪盪平之後卽於現在所調各省
兵勇內選其精悍加以重餉預備糗糧統師出關節節掃盪其兵勇在甘從征日久於西陲風土漸加習
慣自能得力兼之爾時內地餘逆概就剷除聲威遠播外域震讐而各省元氣漸復籌餉較易轉輸不竭
士馬飽騰鼓行而前以擊其懈蠡茲回衆曷能抗拒天戈所指不異拉朽摧枯新疆立見底定矣此內
患旣平然後從事西域方可操其勝算也

覆陳川省兵力不能會剿黔匪疏

駱秉章

竊臣等於同治五年八月二十三日承准軍機大臣字寄同治五年八月初八日奉 上諭李瀚章奏彙

報援黔勝仗並添勇籌防情形請飭川省會剿一摺江外教匪上抵遵義綏陽桐梓正安下抵湄潭龍泉思南安化婺川賊巢甚多與荆竹園股匪處處皆可援應該處與川省毘連必須川東合力會剿方可斷絕內江援應著崇實駱秉章卽飭令防邊之師由秀山西陽一帶建瓴而下將外江各匪實力掃蕩與李元度聲勢聯絡以期迅殄逆氛毋稍延誤等因欽此伏查雲南撫臣劉嶽昭自上年由川督兵入黔攻克正安綏陽剿撫遵義四鄉各寨聲威旣振烏江南岸何逆巨股賊膽已落適值劉嶽昭簡任雲南巡撫臣等體察雲南情形自督臣勞崇光入省之後駕馭得宜飭令岑毓英剿辦雄鎮一帶股匪屢獲勝仗迤東道路現已疏通並籌撥餉項責成馬如龍專剿迤西杜逆且勞崇光入省數月以來並未咨催劉嶽昭赴滇臣等揣度滇省局勢劉嶽昭督率楚勇遽赴滇省不惟馬如龍等復生疑懼且滇練楚勇口糧懸殊不免觀望推諉勞崇光轉形掣肘而劉嶽昭在遵義一帶正可與湖南援黔之師上下夾擊使賊首尾莫顧黔境可望肅清是以貴州撫臣張亮基奏留劉嶽昭與剿辦黔匪臣等亦具摺陳請暫留劉嶽昭與湖南援黔之師會剿先定黔疆然後整旅入滇誠以貴州機不可失乘此掃蕩羣寇則兵威遠播劉嶽昭雖未入滇而滇省懾於先聲不敢遽萌叵測勞崇光亦可因勢利導使之就其驅策是暫留劉嶽昭在黔於滇事無礙而黔省大有起色嗣劉嶽昭奉旨由黔西大定畢節一帶節節掃蕩迅速赴滇臣等因慮劉

嶽昭所部果後各營拔發之後遵郡人心未定頓形空虛何逆大股及附近各匪復萌窺伺則新撫各寨又將淪陷於賊是以札飭道員蹇閭抽調安吉忠字三營前往遵義扼紮兵力已形單薄實苦於無兵可增不能分投肆應現在川省惟湘果九營暨武字十二營爲大枝勁旅湘果一軍分防叙南現值岑毓英攻剿滇邊各匪川省邊隘正形喫緊旣難抽動而武字各營又因隴東回氛肆竄警報頻聞其中間雜潰勇籍隸川省者居多川北時虞狙竄復因叙永時有滇黔苗教各匪分番迭擾武字各營分扼川北之廣元川南之大壩暨瀘三處以備往來馳剿此外防兵無多東南一帶已覺不敷分布現在劉嶽昭旣由仁懷黔西轉戰而前則川省之叙永合江江津等處萬難疏防而湖南之師復由下游進攻則川省之秀山酉陽南川綦江等處又形喫重上下二千餘里處處皆與黔界毗連節節皆可伺隙奔竄且黔省糜爛殆徧羣寇無不垂涎川疆兼以劉嶽昭之軍拔赴雲南湖南援黔之師步步進逼賊勢全注於川省現在仁懷縣城復失黔西仁懷各股賊匪石逆及張僞元帥鄭僞元帥等各糾衆數干涉淺渡河屢撲叙永邊隘雖經兵團屢次悉力擊退旋去旋來防不勝防並據蹇閭稟報何逆勢又猖獗圖窺遵郡並有股匪竄近正安漸逼川界桐梓油籬口之賊又復勾結肆擾而江津南川酉陽尙乏兵力防堵時慮賊鋒突犯策應不及不免蹂躪腹地若再遽移防兵越境深入兵少旣不能制敵倘有挫失轉致引盜入境若調集各營

專謀荆竹園一路則川省邊隘處處空虛我由此進賊由彼入未及直搗賊巢先以自棄險要竊以川省連年以來時有鄰氛肆擾面面撐住籌餉徵兵實已筋疲力盡貴州尤屬密邇川疆黔寇一日未殄川省一日不能安枕但使力有可圖機有可乘臣等何憚而不爲無如遵義旣恃川軍鎮壓若再由西秀出疆會剿實無兵力可分臣等固不敢稍分畛域亦不敢自撤藩籬況查湖南援黔之師已有二萬餘名現旣屢獲勝仗並添勇籌防軍聲不爲不壯川省防兵實屬無可抽撥臣等用敢據實縷陳抑臣等更有請者黔省賊氛徧地民不聊生較之雲南附省及迤東一帶民尙安業商賈流通者情形迥不相同卽迤西杜逆株守一隅伏而未動督臣勞崇光已派馬如龍剿辦不至如黔省之四面皆形危急劉嶽昭由仁懷黔西大定畢節赴滇必須節節疏通方能前進尙未出黔境可否請 旨飭令劉嶽昭先約會湖南之師上下夾擊殄平黔寇再行赴滇實於三省大局皆有裨益臣等愚昧之見是否有當仰懇 聖明俯察施行臣等現飭川東沿邊防軍扼要截擊以遏黔匪竄川之路使賊無隙奔軼湖南援黔之軍得以專力攻剿庶可次第掃蕩所有奉 旨派兵會剿黔匪現在川省兵力實難分撥緣由謹合詞恭摺由驛具奏

籌議練軍事宜疏

曾國藩

竊臣去年十月初六日在江南接奉 寄諭直隸營務久經廢弛前經總理各國事務衙門會同戶部兵

部議定選練六軍誠以根本重地當爲自強之謀迨捻匪北竄直隸官兵打仗仍不得力雖云訓練未精然國家歲糜鉅萬帑金養此無用之兵實堪痛恨此時賊匪旣平亟應將前定練軍章程從新整頓曾國藩久諳戎事應如何因時通變之處著於到任後詳慎妥籌悉心經理務期化弱爲強一洗從前積弊以衛畿疆儻因直境甫就敕平毗連東豫一帶應督撥勇隊以資彈壓一併由該督斟酌奏明辦理曾國藩未到以前官文務飭各員弁照常訓練不得稍有懈怠神機營原摺均著抄給閱看等因欽此迨臣臘正兩月展覲天顏仰蒙聖訓周詳亦以直隸練軍爲要務臣於二月抵任檢閱六軍案卷見內外臣工章奏於直隸不宜屯留客勇一節言之詳矣當此全境敕平若留大枝勇隊駐於近畿窮年累月剿無可剿防無可防不特於居民難期和洽卽於事勢亦同贅疣是以諸臣之議多主練兵而不主養勇惟養勇雖非長策而東南募勇多年其中亦儘有良法美意爲此閒練軍所當參用者臣請略言數端一曰文法宜簡勇丁帕首短衣樸誠耐苦但講實際不事虛文營規只有數條此外別無文告管轄只論差事不甚計較官階而挖濠築壘刻日而告成運米搬柴崇朝而集事兵則編籍入伍伺應差使講求儀節卽有一種在官人役氣象及其出征則行路須用官車紮營須用民夫油滑偷惰積習使然而前此所定練軍規條至一百五十餘條之多雖士大夫不能驟通而全記文法太繁官氣太重此當參用勇營之意者也一

曰事權宜專一營之權全付營官統領不爲遙制統領或欲招軍買馬儲糧制械黜陟將弁防勦進止大帥有求必應從不掣肘近年江楚大將爲統領時卽能大展其才縱橫如意皆由事權歸一之故今直隸六軍統領迭次更換所部營哨文武各官皆總督派撥前往下有翼長分其任上有總督攬其全統領並無進退人才綜管領項之權一旦驅之赴敵羣下豈肯用命加以總理衙門戶部兵部層層鈐制雖良將亦瞻前顧後莫敢放膽任事又焉能盡其所長此亦當參用勇營之意者也一曰情意宜洽勇營之制營官由統領挑選譬之木焉統領如根由根而生幹生枝生葉皆一氣所貫通是以勇糧雖出自公款而勇丁感營官挑選之意皆若受其私惠平日既有恩誼相孚臨陣自能患難相顧今練軍之兵離其本營本汛調入新哨新隊其挑取多由本營主政新練之營官不能操去取之權而又別無優待親兵獎拔健卒之柄上下隔閡情意全不相聯緩急豈可深恃此雖欲參用勇營之意而勢有所不能者也又聞各營練兵皆有冒名頂替之弊防不及防蓋兵丁之常態口分不足以自給每兼以小貿營生手藝營生藉裨事畜之資此各省所同也直隸六軍以此處之兵調至他處訓練其練餉二兩四錢在練營支領其底餉一兩五錢仍在本營支領兵丁不願離鄉往往正身仍留本處特於練營左近僱人頂替應點應操少分練軍所加之餉給與受僱冒名之人一遇有事調取遠征受僱者又不肯行則又轉僱乞丐窮民代往兵止

一名人已三變練兵十人替者過半尙安望其得力耶臣兩月以來博采衆論參以愚見就目前練軍之規模卽使力加整頓亦難遽化弱爲強將欲倚爲干城備禦強寇殊無把握今當講求變通之方自須先杜頂替之弊擬令嗣後一兵挑入練軍卽將本營額缺裁去練軍增一兵底營卽減一兵無論底餉練餉均歸一處支放或因事斥革卽由練營募補底營不得干預冀所練者皆爲正身或可少變積習此外尙有須酌改者如馬隊不應增至二十五人應仍爲什人一隊使士卒易知易從若此之類臣本擬定一簡明章程重整練軍練足萬人以副 朝廷殷勤訓飭之意乃近者節逾夏至亢旱如故二麥業已歉收秋禾多未播種深恐歲饑民困藩庫入款太減不能不長慮卻顧暫緩興辦查直隸司庫本屬入不敷出同治六七兩年收數尤少而欠發各款除京協各餉及文職應領之款共欠一百五十餘萬外專就本省武營言之欠發綠營及駐防俸薪養廉三十二萬餘兩欠發兵餉二百七十餘萬兩欠發米折及公費銀十三萬餘兩近來武營俸餉本僅支五折七折八折不等旣折之後又欠發三百餘萬是以各將士紛紛訴苦衣食無資辦公無費卽令六軍選練極精而各底營存餘之兵已廢弛不可救藥矣通盤籌算本省可指之銀斷不能撥濟練軍之餉若於現存四千人之外增練六千或八千仍須由部另撥的餉二萬兩按月解直乃可應手久辦徐圖功效其未挑入練者各底營存餘之兵亦須略爲料理未可聽其困窮墮壞

臣擬略仿浙江減兵增餉之法不必大減兵額但將老弱者汰而不補病故者闕而不補卽以所節之餉項量發歷年之欠欸俾各營微有公費添製器械旗幟之屬庶足壯觀瞻而作士氣數年之後或將五折七折八折者全數賞發兵丁之入練軍者所得固優卽留底營者亦足自贍營務或可漸有起色而畿輔練兵之議亦不至屢作屢輟事同兒戲至騰出裁兵所省之餉彌補軍練所增之餉多寡尙難預定要亦少有裨益耳

再議練軍事宜疏

曾國藩

竊臣接准部咨會奏直隸練軍事宜一摺令臣迅卽籌定簡明章程奏報定議等因咨行到臣臣竊維用兵之道隨地形賊勢而變焉者也初無一定之規可泥之法或古人著績之事後人效之而無功或今日致勝之方異日狃之而反敗惟知陳迹之不可狃獨見之不可恃隨處擇善而從庶可常行無弊卽就紮營一事言之湘勇初出亦屢爲粵匪所破旣而高其壘深其濠先圖自固之道旋即用此以制敵厥後淮勇諸軍繼起亦皆以高壘深溝爲自立之本善紮營者卽稱勁旅直至移師北來改剿捻匪每日計行路之遠近分各營之優劣曾無築壘挖濠之暇而營壘之或堅或否於勝敗全不相涉卽詢及陝甘剿回貴州平苗亦不以築壘挖濠爲先務至天津捍禦外洋雖堅壁亦不足恃卽此一端已知陳迹之不可狃兵

勢之變化無常矣然安營支帳埋鍋造飯一則不擾閭閻一則自固壁壘斯乃古來之常法并非勇營之新章終未可棄而不講也臣愚以爲直隸練軍宜添學紮營之法每月拔營一次行二三百里爲率令兵丁修壘浚濠躬親畚築以習勞勩不坐差車以慣行走至運米搬柴則勇丁不過偶爾爲之如今年近事老湘營之勇由綏德州運米至花馬池銘軍之勇由濟甯州運米至張秋是也論平日之常例則採薪等事每勇百人照章有長夫三十六名兵丁百人舊例亦有夫役三十名并有報鎮四十名者臣意練軍旣拔營行動卽須添募長夫百兵給三十名雖所費較鉅似亦不可省之項有長夫任樵汲負重之事則兵丁可不任搬運之勞旣以稍示體恤又以見築壘挖濠等事必須躬親寬於此者正欲其嚴於彼至部臣所議兵丁宣講衣冠禮節臣意老營操演儘可整冠束帶以習儀文拔營行走仍宜帕首短衣以歸簡便凡此皆一張一弛擇善而從者也臣前摺所謂重統領之權者蓋因平日之事權不一則臨陣之指麾不靈臣在南中嘗見有藩臬衙門募勇多營平日之領餉拔缺請獎等事皆由衙門主政至臨陣之際則另派武員統領率之打仗致指麾不克如意卽巡撫及大帥所部多營平日無一定之統領臨時酌撥數營派一將統之赴敵終不能得士卒之死力而江楚諸省倖獲成功者大抵皆有得力統領其權素重臨陣往來指揮號令進退之人卽係平日發餉挑缺主持賞罰之人士卒之耳目有專屬心志無疑貳是以所

向有功臣所謂事權宜專本意如此然亦會逢其適幸遇塔齊布羅澤南李續賓楊岳斌多隆阿鮑超劉銘傳劉松山諸人或隸臣部或隸他部皆假重權而樹偉績苟非其人權亦未可概施部臣所議得良將則日起有功遇不肖則流弊不可勝言洵爲允當之論良將者可倖遇而不可強求者也嗣後直隸練軍統領臣當悉心察看遇上選則破格優待盡其所長遇中材則隨處防維無使越分庶幾兩全之道耳部臣復議及兵將相習可收一氣貫通之效又言轉弱爲強不必借才於異地等語臣竊意就兵言之以土著爲主以保狀爲憑斷無令外省客勇充補之理而客勇亦無願補遠省額兵之志就官言之則武職自一命以上直至提鎮皆准服官各省况畿輔萬方輻輳尤志士願效馳驅之地是各路將弁有出色者皆可酌調來直不得以借才論直隸練軍詢諸衆論不外二法一曰就本營之鎮將練本營之弁兵一曰調南人之戰將練北人之新兵而已訪聞前此六軍用本營鎮將爲統領者其情易通而苦於闔營無振作之氣用南人戰將爲統領者其氣稍盛而苦於上下無聯絡之情將欲救二者之弊氣之不振本營官或不勝統率之任當察其懈弛擇人而換之情之不聯南將或不知士卒之艱當令其久處積誠以感之臣今擬於前留四千人外先添三千人稍復舊觀一於古北口暫添千人該提督傅振邦老於戎行安詳勤慎一於正定鎮暫練千人該總兵譚勝達勇敢素著志氣方新一處皆以本管官統之者也一於保定暫

添千人令前瓊州鎮彭楚漢以南將統之與中軍冷慶所轄千人姑分兩起俟察驗實在得力而後合併一軍此因論兵將相孚而擬目前添練之拙計也部臣又令籌定簡明章程再行按月給餉并查明直隸未經遣撤之勇飭令回籍妥爲安插臣查直隸勇丁上年經著督臣官文奏留十二營臣今年撤去余承恩三營其後夏麥秋禾疊遭亢旱常有匪徒竊發因恐散勇窮無所歸聚而滋事是以遷延未及續撤俟秋末安靖再當遣撤數營卽以裁勇之銀添作練軍之費至淮勇銘軍乃臣所奏爲拱衛京畿之師其大隊紮於張秋分數營駐紮保定數營駐紮臨清目下不擬裁撤另行附片覆奏練軍規模臣擬仍以四軍爲斷二軍駐京以北二軍駐京以南每軍三千人統將功效尤著者或添至四千五千人其餘常行章程已詳具於部臣及前督臣劉長佑所議條款中臣昨議練餉底餉一併支領馬隊不潤步隊之中一棚只以十人爲率亦經部議允准此外如頂名冒替是前此之積弊未知將來能否革除參用南將是前此所已行未知此後能否融洽此次所議添募長夫每月拔營亦未知有無窒礙斯三者一有未妥則全局皆須變更臣不敢遽定章程恐不久仍須更換也可否請 旨一面交各衙門覈議臣一面先行試辦其餉需暫用江南協欵俟定議後再由戶部撥發俟試行果有頭緒然後刊刻簡明章程俾各軍一律遵守

官軍出關分起次第行走疏

同治十二年十二月

左宗棠

竊肅州克復大軍應卽乘勝出關速圖掃蕩人皆知之而能言之微臣始念亦謂巧遲不如拙速及體察軍情詳審局勢竊有不敢輕議者請爲我皇上敬陳之一在籌出關之兵宜審也通計攻肅各軍金順宋慶徐占彪及臣節次調派馬步各起共六十餘營可謂多矣然攻堅旣久損折實多受傷成廢者亦不下數千之衆皆所稱精銳之選也徐占彪所部蜀軍馬步十三營前後陣亡將士五百餘員名帶傷者二千四百有奇宋慶一軍亡傷之數近千名而染病物故者亦數百計金順所部軍卽胡世英之英禮十營本非佳選又由甯夏拔赴涼州時逃亡不少雖幸金順隨時補輯得以成軍每戰身先作其勇氣然陣亡者數百名受傷殘廢者亦數百計此臣在肅時所深悉者肅城克復後臣與諸軍熟商非從新整理難收實效金順宋慶徐占彪均以爲然比飭隨帶之總兵戴洪勝余起立提督金慶元副將歐陽吉星等歸頭品頂戴記名提督譚上連統領併成五營益以馬隊三營駐守肅城修葺城濠俾成雄鎮飭肅州鎮總兵章洪勝接統楊世俊舊部馬步四營及親兵小隊駐嘉峪重修邊城以嚴鎖鑰並撥馬步小隊分駐關外以通玉門之氣其玉門靖逆營游擊缺委隨營總兵銜副將陳南波署理安西協副將缺委隨營提督吳次漢署理燉煌沙州營參將缺委隨營副將聶福田署理各令挑汰存營孱弱兵丁而募山內獵戶補之各足一營五百名實數照內地防勇章程以月餉責其防守本境兼護運道緝游勇臣巡視嘉峪關畢回

肅卽撤徐占彪馬步七營分別回籍挑留精壯併成馬步六營於肅城外擇水草便利處紮營按日操練亦便其養傷待愈耳時因出關期近諸軍整理需時奏調張曜嵩武軍由鎮番涼州赴肅而嵩武軍到肅後軍食日增甘涼訂買運肅之糧不敷接濟各軍之用不得已商請宋慶回涼州整理兼以就食宋慶又以舊部在豫者多募補易於集事而金順出關在卽擬以所部現存精壯聽金順挑補額數俾期捷便臣服其力顧大局深知緩急並愜私懷旋並撥副將馮桂增馬隊一營布洛斯螺絲後膛開花大礮一尊飭總兵鄧增帶領礮手隨金順出關以從其欲計此時整理就緒壁壘一新矣張曜一軍馬步十四營隊伍整肅士飽馬騰堪稱勁旅臣並益以新製連架劈山礮十尊布洛斯二號螺絲後膛礮一尊七響後膛礮十桿其涼州副都統額爾慶額馬隊除自挑涼州滿營百騎外穆圖善撥交吉林二百騎黑龍江一百騎臣慮其單飭總兵桂錫楨帶所部馬隊一營一起約四百騎歸其統帶計金張額三軍出關馬步共一萬數千幸皆精實可用數月而後仍可調撥勁軍陸續繼進如此士氣常新而不竭糧運常裕而不飢以之制關外客土逆回自操十全之算一在籌出關之糧運宜審也肅州安西共隸一道而產糧贏絀各屬攸殊肅州及高臺腴地也安西玉門頗多砂瘠而燉煌爲上腴軍興以來民困於逆回之擾掠復苦於軍營之捐攤久矣民人存者不過十之三四地畝荒廢居其大半官軍藉興屯之名先給領籽種牛價抵算採

買糧銀搜括抑勒戶口流亡自白逆竄出關外官軍復沒固莊被陷安敦玉彫剋之狀較甚從前臣在肅見難民絡繹入關恐轉徙日多荒地無人耕墾籌銀二萬兩分給三州縣並撥寒衣萬套賑之冀留此災黎盡力屯墾庶異時餘糧出糶關外各軍可就近採買稍節勞費也然目前軍食不能取給安西則固不待言甘涼肅所稱腴地頻年戎馬被害最酷自徐占彪偏師徑搗肅州肅回縮退諸軍戡定河湟甘涼道路漸次肅清農民得安耕穫倖獲中稔兩年以來尙供官軍採買然死亡既多川原耕種不過十之三四其旱地更無過問者臣由蘭到肅途間疊據士民紛紛遞呈求免採買比經再三開導除留民食及籽種外諭其悉數出糶勿任居奇幸三郡民情樸愿又知官軍誓滅此賊且能不擾遂得集有成數通計涼甘肅三郡訂買市斗軍糧十六萬三千餘石按照額徵倉斗則三千餘萬石幾敵通省常年額賦雖優議價值每市斗一石重三百餘斤給銀四兩而民間繳納不前市價驟長每石竟至六七兩之多據甘州府縣稟報棍徒喬良廷卽喬鐸李太和造謠煽惑阻納官糧以致市肆擡價居奇貧民糶食無出軍民均困臣察訪得實立飭將喬良廷李太和杖斃並以署甘涼道肅宗幹辦理顛預撤任查辦訪聞局員候選知縣杜輔仁甘標後營都司林長興有侵欺情事交調署甘涼道黃慶章訊實詳參自此民間交糧乃漸踴躍然以訂買糧料總數供金順張曜額爾慶額三軍食用及運糧車馱駝隻防營所需食用算至明歲六月

新熟尙短糧料市斗二萬餘石現擬盡括額徵本色及各標營季糧陸續填補尙未知能否足數且甘肅地氣高寒麥秋雖在六月而民間割麥完畢必應堆積成垛俟其藁糜秸脫始便碾打上市臣此次七月十九日由蘭州啟行八月十二日始抵肅州沿途村舍麥垛雖多而繳官上市者少明歲節候雖早計民間繳納新糧必俟八月陳糧尙應寬籌兩月底新熟之交得資接濟此籌糧甘苦實在情形也就轉運言之自涼州至肅州共九百里又自肅州至嘉峪關至玉門縣三百六十里玉門至安西又二百里共一千四百餘里路多沙石用駝爲宜惟駝隻非農所蓄向來民間所蓄惟騾馬牛驢以供農事藉應差徭所有木輪大車不耐負重行遠頻年賊回擾掠牲畜極少差車無供上年成祿出關強拉差車數百輛甫至玉門車夫棄車逃回并騾馬亦拋置不顧自是更無從措手臣於夏初派弁三路出口採駝三千又偏值蒙古駝少價昂採獲尙不及一千二百隻報到者僅祇六百餘隻臣過甘郡時道府請重價雇用民車每運糧百斤行百里許給銀四錢其應出差車許給銀二錢計四十餘日之久民車差車運糧料到局尙不滿三千石幸臣前調集各營官騾一千六百餘隻先後到齊起運勉資周轉而前用民價在蘭州平涼所雇商民車馱駝隻及袁保恆在河雇辦車輛亦陸續搭運軍裝軍火抵甘於是轉運稍旺肅州乃有存糧以後可不須重價雇民車然通計由涼州甘州採糧運肅由肅駝運至安西州合計民運車馱駝隻腳價

及官車官驛官駝員弁人夫薪糧牲畜草料口袋什物局費一切攤算每糧百斤需銀十一兩七錢內外其勞如此其費如此夫豈此時財力所堪若非預籌撙節而動言用衆恐官軍之餉餽不繼精臺之儲峙早空不但後時不能保此不竭之源卽目前出關之師亦且時憂飢潰此轉運艱難之實在情形也竊維自古關塞用兵在精不在多方全盛時需用兵卽先籌芻粟如漢趙充國古稱名將其駐軍酒泉卽今之肅州治敦煌卽今之安西州治所籌兵事重屯田而罷騎兵留步兵萬人藉省大費三秦力諍行之卒效至今言西北兵事者莫能外也乾隆間先臣兆惠苦守伊犁數月維時北路兵阻不前其深入者僅精兵數百卒能力解重圍宣威絕域約計當時北路士馬多亦不過數千然則道遠運艱不能用衆卽古今承平無事官私充足時亦無以異可知也今擬出關之金順張曜額爾慶額所部馬步已一萬數千合之員弁丁役人夫將近兩萬值哈密解嚴賊蹤向吐魯番一帶竄走師行二千里尙未知能否及賊若遞擬以大軍接踵前進雖承平無事官私充裕時猶或難之矧當禍亂十年人物彫殘財用匱絕之日乎臣在肅時商之各軍汰疲乏冗雜弁丁以求精資遣傷殘成廢弁兵以省累察張曜一軍銳氣方新作爲頭起金順一軍次之額爾慶額又次之宋慶一軍整理需時軍裝駝隻均須增添購辦請留俟明年秋後繼發臣并擬於所部整銳足恃諸軍內再精選數千屆時慎擇統將率之同行如天之福甘涼安肅明歲豐稔西

師飽騰再分起層遞而前如行衽席庶邊塞肅清可操全算計期不過稍遲數月而局勢穩矣否則師行
荒徼既不能因糧於敵復不能隨地徵糧士馬苦於長征求一飽而不得正恐未及遇賊軍情先搖於局
勢無益而又害之且戰陣之事最忌於前突後竭行軍布陣壯士利器厚集於後則前隊得勢鋒銳有加
戰勝而兵力愈增必勝之著也若全力悉注前行一洩無餘設有蹉跌無復後繼是乃危道詩言緜緜翼
翼傳稱彼竭我盈蓋皆注意後路之說況出關之師所應加意者不僅哈密以西客土客回似成效不在
欲速取威不僅一戰也區區之愚所爲不能自釋者以此至關外軍事除景廉每年尙有緘牘往來餘則
并未接過隻字卽鎮迪一道名雖隸陝甘總督管轄而實則由烏魯木齊都統及各大臣就近督率公事
一切由其主持數十年前卽是如此臣無從過問所有哈密以西糧運事宜應由出關各軍到地自行籌
畫臣固未能懸揣亦勢所不逮非預爲諉謝也

上沈相國書 節錄

李有棻

蓋師夷人之長技以制夷魏君源之說也魏君撰海國圖志禦夷之法甚備然亦未必一一皆是也我師
其長技卽以制夷安知夷不故留餘步以爲他日制我之地是自敝也制夷之法惟漢鼂錯言之最善其
說曰匈奴之長技三中國之長技五帝王之道必出萬全則避其所長攻其所短無不如意如今之洋人

利在航海我則拒之於陸利在攻城我則擊之於野彼善火攻我則廣爲禦火之計彼難久候我則力爲持久之謀避其所長彼卽難護其所短攻其所短我適獨呈其所長從古名將戰無不勝攻無不取此道得耳若徒取夷人之長技而效之邯鄲學步識者所譏固未知其所利何在也

具陳臺北情形以明是非疏

光緒十一年

臺灣巡撫
劉銘傳

竊臣於正月初二日接准大學士左宗棠來咨具奏抵閩詳察臺灣現在情形一摺恭錄十年十一月十八日 奉上諭左宗棠奏詳查臺灣情形妥籌赴援一摺據稱八月十三日基隆之戰官軍已獲勝仗因劉銘傳營務處知府李彤恩駐兵滬尾以孫開華諸軍爲不能戰三次飛書告急堅稱滬尾兵單將弱萬不可靠劉銘傳爲其所動遽拔大隊往援基隆遂不可復問李彤恩不審敵情虛詞搖惑擬請卽行革職遞解回籍不准逗遛臺灣等語前敵軍情關係極重必須確切查辦不得含糊了事李彤恩所稟劉銘傳各情人言藉藉果係因此貽誤厥咎甚重非遞籍所能蔽辜前諭楊岳斌迅速赴閩援臺卽著該前督於到臺後詳確查明據實參奏李彤恩著卽行革職聽候查辦等因欽此知照前來伏查基隆退守情形已於上年八月十四日奏明在案無庸瀆陳謹將左宗棠所參各節爲我 皇太后 皇上陳之臣渡臺時隨帶親兵一百二十名其次孫開華三營曹志忠六營每營精壯只三百餘人當由臺南調來章高元淮

勇兩營其時臺南疫癘盛行兵丁多病僅來五百人嗣又添調巡緝營一營合之劉朝祐百餘人張李成土勇一營統計基隆滬尾兩處共只四千餘人左宗棠疏稱基隆各營數且盈萬不知何所見聞自七月杪基隆疫作將士十病六七不能成軍八月十三日之戰九營僅挑選一千二百人內中尙有抱病勉強應敵者當孤拔未來之先初九初十兩日臣接香港上海電報知其全股犯臺其時滬尾祇孫開華三營劉朝祐一百餘人並張李成新募土勇一營甫經到防砲臺尙未完工又無營壘地勢平坦無險可扼危迫情形不待旁言臣早已憂慮及之曾函致孫開華李彤恩如果敵犯滬尾臣卽撤基隆之守來援囑令堅守以待一面派員赴下游趕雇船隻將軍火舉動之物先運下船十二日孤拔率大幫兵船進口臣料敵兵必由仙洞登岸當同曹志忠等密商如敵兵明日戰後卽紮仙洞則不致遽攻滬尾如戰後全隊下船卽須預備回援滬尾以保後路十三日酉刻敵軍收隊全行下船當接孫開華李彤恩劉朝祐先後來信俱稱據法船五隻直犯口門升旗開砲臣同孫開華李彤恩已有成約無用李彤恩虛詞搖惑左宗棠疏稱李彤恩三次飛書告急卽係孫開華李彤恩劉朝祐三人三次之書非李彤恩一人之書也臣當卽傳令拔隊惟四十磅大砲二尊不能運動埋於山下其餘軍裝鍋帳以及病傷勇丁毫無遺棄若果因李彤恩三次飛書告急倉猝拔隊退回軍裝焉能毫無遺失基隆退後敵兵上岸住營兵勢已分往攻滬尾

不足千人若不撤基隆之守敵必全隊攻犯滬尾無兵往援雖提臣孫開華驍勇敢戰器械不敵衆寡懸殊何能保其不失二十日之捷左宗棠前據劉璈稟報奏稱孫開華所部並淮軍土勇三路迎戰獲勝此次又奏係孫開華數營戰勝不獨於臺事未加訪察卽奏報中亦自相矛盾不加斟酌所陳臺北距滬尾三十里如果危急地方官當慎重過於他人等語查基隆至滬尾水程只八十餘里頃刻可至臣五里安設一站來往通信尙恐聞警援應不及若俟地方官稟報必至滬尾失後敵至臺北城下方能回援臺北府知府陳星聚屢次稟稱進攻基隆並有土著之人願告奮勇往攻基隆者皆有其事自滬尾捷後俱以李彤恩所募張李成土勇得力提臣孫開華曹志忠蘇得勝柳泰和各請添募千人臺北知府陳星聚等聯名稟請基隆通判梁純夫招募土勇二千候補知縣周有基稟請招募一千俱告奮勇進攻基隆其時記名道朱守謨請假尙未銷差倡言多招土勇迅攻基隆至於餉項軍械之有無不計也忽有臺北府書識陳華聲稱願招土勇一千五百名自備槍械包取基隆每月每勇需洋銀十二元託親兵哨官奚松林來說當經臣申飭不許多事朱守謨聞有包取基隆之說卽私許陳華招募及臣知之業已成軍臣以淮楚營制每勇只有餉銀四兩二錢陳華大言輕敵不知能否得力卽給如此重餉何以服老勇之心堅執不許添增口糧該勇俱知臺北府無兵祇臣親兵數十名卽聚衆吶喊鼓譟臣派弁往看陳華所募皆城

外艚市井之徒器械毫無當傳陳華來見諭以軍餉不能加增如果能克基隆立給賞號銀二萬兩先發十日口糧令其帶赴水轉脚聽候曹志忠調遣朱守謨經臣嚴加申飭含憤而去陳華至水轉脚後曹志忠見其勇多滋事器械毫無不能見敵不肯節制臣令蘇得勝親至曹營與之密商將陳華土勇先行挾以兵威截去五百名復調三百名至觀音山歸柳泰和裁併其餘隨卽一併裁撤費餉一萬餘兩周有基募勇尙未成軍卽開餉鼓譟經臣將已募四百餘人派歸柳泰和節制梁純夫見土勇不遵約束屢次滋事不敢招募此卽左宗棠疏中所稱各將領以及土著之人願告奮勇往攻基隆者係九月初旬事也紳士陳霞林等屢言內山禦番土勇常行見仗可以挑募臣告知各軍前往內山選募一面令工匠連夜修理各營所繳舊槍分撥應用搜查餉項僅數月餘各軍招募有尙未成軍者亦有成軍尙無器械者時值疫氣染至臺北滬尾一帶軍民俱病提臣孫開華署臺灣鎮章高元總兵柳泰和等俱抱重病曹志忠六營營官無不病者臣隨從文武員弁日歿數人自封口後內地音信不通兵單援絕土匪四起臣日夜憂急無所措手臺北府知府陳星聚每見必催進攻基隆臣因其年近七旬不諳軍務詳細告以不能進攻之故柰該府隨言隨忘紳士陳霞林並淡水縣知縣劉勳皆明白曉暢見將士多病土勇尙未募齊器械缺乏俱知不能前進陳星聚除面催進攻外復稟請進攻臣手批百餘言告以不能遽進之道該府復

懲憑曹志忠進攻並以危言激之曹志忠一時憤急遂有九月十四日之挫幸傷人不多未損軍銳敵於十五日卽渡河耀兵七堵陳星聚妄聽謠言謂基隆法兵病死將盡又謂業已退走上船故日催進攻自十五以後該府始自言不諳軍事不再妄言此卽左宗棠疏稱陳星聚屢次稟請進攻基隆之原由也左宗棠參臣坐守臺北不圖進取機宜坐失臣曾將兵單器缺不能進攻情形疊奏在案基隆近靠海岸敵船入口則不能爲我有故於六月十六日之捷並未奏報克復曹志忠所守營壘逼近海邊如法人添兵添船卽須退守山後亦經臣附片密陳我之所恃者山險敵之所恃者器利彼來攻我我得其長我往攻彼彼得其長且敵營據山傍海兵船聚泊其下若不能逐其兵輪出口縱竭陸師之力攻亦徒攻克猶不克如果易攻現在兩軍俱在疲乏之際王詩正統帶勁旅三千不日當可奏功以免臣抱懦怯株守之咎臣治軍十餘年於戰守機宜稍有閱歷惟事事求實不慣鋪張粉飾若空言大話縱可欺罔於一時能不遺笑於中外臣實恥之臣渡臺時軍務廢弛已極軍裝器械全不能用砲臺營壘毫無布置接戰於倉猝之間所部多疲病之卒歷盡艱難支持半載臨敵應變大小十餘戰幸無挫失若聽局外大言輕敵浪進上月初十日孤拔添兵大舉戰無策應之師守無可據之險必至一敗不能立脚軍事瞬息千變其中動止機宜固非旁觀所能盡知亦非隔海所能臆度也至浙江候補知府李彤恩本係滬尾通商委員臣到

臺北提臣孫開華稱其辦事勤能熟悉洋務現因身弱多病決意乞退臣商之提臣現在用人之際不可任其乞退託其致書慰留六月十二日同臣提臣並臺灣道劉璈至滬尾察看砲臺地基李彤恩扶病出見瘦弱不堪臣令其趕緊調養不必請假當委兼辦滬尾營務六月十五日基隆開仗以後李彤恩稟請買船填石塞口時值秋茶上市英商阻撓李彤恩同英領事往復辯論始將口門填塞隔日法船卽至英兵船告以口門封塞隨卽駛回七月二十日臣至滬尾查看砲臺孤拔親坐三號兵輪亦至滬尾查探水道並託英船代覓引港之人若非李彤恩先期塞口法船混入一隻臺北已不堪問紳士陳霞林等每晤談時輒稱其功臣到臺北有招募土勇者臣因其所用土槍不能禦敵不肯操練未曾招募李彤恩力保張李成打仗奮勇請募五百名發給後門槍二百桿令其操練助防八月二十日之戰張李成包抄得力官紳共見共聞十月初臣因餉項支絀札令李彤恩來城同福建候補知縣鄭建中會同官紳辦理捐借餉事該守到後卽同陳霞林等議向城鄉殷戶借用銀票二十餘萬元毫無勉強現已辦成如果李彤恩有貽誤大局之處紳民當共切齒曷有聽其分派捐借者該守不領薪水未邀保獎究其所辦數事有裨於大局皆非淺鮮左宗棠甫到閩一日不加訪察遂以劉璈之稟並朱守謨挾嫌傾陷顛倒是非之言率行奏參臣若緘默不言使出力有功之人忽遭不白之冤當此孤島險危之地軍務萬緊之時臣何以用

人辦事應懇 天恩將已革浙江候補知府李彤恩開復原官並請暫免查辦一俟軍事稍定請 旨飭令楊岳斌或 專派大員渡臺逐細訪查如果左宗棠所參情事屬實臣妄用匪人辦理不善貽誤事機應請將臣一併從嚴治罪以昭公允誠如 聖諭關繫極重非李彤恩革職遞籍所能蔽辜事愈久則是非愈明臣無任惶恐待 命之至

臺北遠隔重洋兵機之遲速利鈍或非局外所能懸揣而公論所存當亦有不待辯而自明者姑存此以志當日臺地防守之槩

遵 旨督辦新疆軍務敬陳籌畫情形疏

光緒元年六月補錄

欽差大臣 左宗棠

竊臣於四月初八日承准軍機大臣字寄光緒元年三月二十八日奉 上諭本日已有旨令左宗棠以欽差大臣督辦新疆軍務金順調補烏魯木齊都統仍幫辦軍務景廉調補正白旗漢軍都統回京供職景廉著俟金順行抵古城後將各營兵勇糧餉移交金順接管再行起程回京新疆軍務孔殷必須速籌進兵節節掃蕩金順本有自帶各營益以景廉所部兵力已不單薄著卽督率各營親臨前敵相機進剿爲收復烏魯木齊之計所有進兵機宜隨時會商左宗棠酌辦袁保恒已令回京供職西征糧臺已諭左宗棠責成陝西藩司經理應行奏催及咨行事件呈陝西巡撫覈辦關外轉運事宜卽在哈密巴里坤各

處設立糧餉分局由左宗棠派員經營袁保恒將經手事件逐一交代清楚後起程回京見在關外兵事餉事并轉運事宜均歸左宗棠督辦蘭州相距寫遠鞭長莫及該大臣當統籌全局酌核辦理關外軍食務當源源運濟以期士飽馬騰毋令停軍待哺宋慶一軍該大臣已咨令回紮潼關本日亦諭知錢鼎銘商令該提督擇要駐紮矣等因欽此跪聆之下悚惕實深竊維新疆之事從前兵力因餉事未能兼顧遂至叛回構變強敵窺邊土宇人民不可覆按於此而欲力圖恢復挈二萬里戎索之舊還之職方戢萬千族殊俗之民漸以聲教正值實區甫靖財力久殫內患雖平民勞未艾其難誠有倍於拓疆之始者微臣庸朽菲才又值衰疾侵尋志慮鈍竭何敢不自忖量謬以自承顧念臣子之義厥重匪躬疆場攸司責無他諉自從戎伊始卽矢盡瘁馳驅豈頭白臨邊忽易初志謹將所籌情形爲我 皇上敬陳之一曰廣籌軍糧也師行北路宜用北路之糧不但節費亦免耗糧臣前疏已詳之南路肅局既有見糧又車馱駝隻購雇稍多可以灌運自宜嚴切督催以廣儲峙北局設於歸化分局設於包頭飭升用知府前署綏德直隸州知州陳瑞芝提督銜總兵蕭兆元司之雇民駝轉運計自三月至五月據報陸續運過四十餘萬斤至巴里坤每百斤牽合銀八兩內外袁保恒前奏甯夏採運臣飭署甯夏鎮總兵記名提督譚拔萃甯夏府知府李宗賓接辦見據報已雇駝數百先由察罕廟試行如果此路通利再爲加辦察看漠北素產健


駝又便水草惜久未開運倉卒應募者少又駝戶每以拉差爲苦疑阻不前臣見飭巴里坤鎮鎮迪道嚴行示禁冀聞風踵至運道暢行庶餉饋可通亦收節省之益正辦理間適俄國游歷官索思諾福斯齊等到蘭與之談論近事索思諾福斯齊自稱俄國在山諾爾地方糧產甚多駝隻亦健距中國古城地方不遠如中國需用糧食伊可代辦送至古城交收由俄起運須護運兵弁均由在山諾爾派撥其兵費一併攤入糧腳價內每百斤需銀七兩五錢如年豐糧多駝腳不貴則價尙可減也比卽與定議書立合約計年內可運古城糧二百萬斤明年夏可運足三百萬斤索思諾福斯齊已專兵入瓦勞伏前往告知其地巡撫據稱斷不致誤臣見委知府銜甘肅候補同知丁鶚等赴巴里坤又委布政司銜甘肅卽補道陶兆熊等赴古城辦理採糧開墾及收支事宜此北路籌糧情形也南路肅局存見糧三萬餘石安西局存見糧一百數十萬斤哈密局除張曜各營外存見糧一百三十餘萬斤見正趕緊灌運張曜在哈密辦屯墾水利事必躬親不惜勞瘁據報墾荒地一萬九千餘畝可獲糧數千石見據甘涼肅各廳州縣稟報今歲夏雨優渥冀獲豐稔將來新糧市價有減無增車駝之受雇者亦日多一日轉運較從前稍易此南路籌糧情形也臣因歸化包頭採運巴里坤較涼甘肅採運巴里坤價腳大減而糧則實裝實卸別無虛耗故決計於北路開一運道陸續撥兌實銀已四十餘萬兩甯夏已發銀三萬兩計秋高駝集運數可增南路

由甘運肅由肅運安西均用車馱由安西運哈密運巴里坤均用駝隻節設廠局濬水泉刈草薪以利運道一切經費統於現辦採運項下開支計輓轡轉般運數可倍此合南北兩運籌巴里坤之糧也俄國在山諾爾地方緊接我布倫托海邊界距古數百里俄人代爲採運二百萬斤送古城視巴里坤運古城路程較近實屬獲之意外計需銀十五萬兩此於北路之北籌古城之糧也就目前局勢籌應前敵急需事之所得爲者祇此歷代之論邊防莫不以開屯爲首務或辦之用兵之時以省轉饋或辦之事定之後以規久遠要之得人則有益軍儲不得其人則虛糜經費且西北治地開荒尤資水利就窪潴水障之令深引渠溉田灑之令普旣需人工尤資器具而哈密土質善滲土工石工外別有毛氈包裹之工爲他處所罕旣須多籌器具又需廣備氈條開墾之先所費卽巨臣於張曜由安進屯哈密時已津貼過運腳等銀五萬餘兩購辦氈條價腳銀約九萬一千餘兩張曜躬率所部殫力經營而後得著成效計以後踵而行之因此奧區保綏戎藩而成數十百年無窮之利見復經畫巴里坤收召飢兵一千三百餘名每月給餉銀三千兩配以矛桿鎗礮子藥俾其復成勁旅復委甘肅同知丁鶚等勦辦屯墾事務兼收包歸甯夏所解軍糧惟巴里坤地當天山頂畔氣候凝寒舊設天時地利人和等廠久已荒廢屯務雖興尙難供客軍坐食也由巴城而西北七站地勢沃衍天氣漸和由此而古城迤西一帶更稱膏腴上壤景廉所辦公屯

私屯外餘荒甚多若兵民盡力耕墾不虞乏食臣見委布政使銜甘肅補用道陶兆熊揀帶員弁前赴古城驗收俄人代辦軍糧支發價脚一面察看古城一帶情形經畫屯墾事宜隨時馳稟核奪此籌哈密巴里坤古城糧運屯墾情形也一曰兵事宜早爲整理也西事稽延至今未睹成效由於冗食多而戰士少耳綠旗諸營久不足額就近各省無勁兵應調於是取土著兵民及各處就食兵民授地耕墾一備軍食一備戰守無事則驅其盡力隴畝有事則調其效命鋒鏑謂之且耕且戰事非不勞謂之卽兵卽農名非不美然調赴期會則彼此觀望數日不能取齊麾令前驅則勇怯雜糅氣勢不能完整其何以戰且旣挂名武籍又令其從事耕耘譬猶左手畫圓右手畫方兩者相兼必致一無所就且戰之兵不能戰且耕之兵不暇耕也茲宜畫兵農爲二擇其精壯有膽之兵宜馬者馬宜步者步束以營制一如內地軍營其曾著戰績如徐學功輩用之爲管帶爲督帶其才能辦事如孔才輩用之爲幫辦凡督帶管帶以及所部哨官什長酌給薪水辦公銀兩散人給餉與糧按照客軍營制減給其愿弱不任戰者散之爲農按照戶口指餘荒地畝令其承墾由官酌給籽種農器耕牛收穫後繳歸本倉外不取息所穫糧石由官照時價收買庶簡其精壯營伍可得而實散其愿弱屯墾可得而增兩利之道也關外各城所駐大臣有辦事領隊幫辦之分所駐之兵有錫伯索倫達呼爾察哈爾蒙古厄魯特沙畢納爾及綠營攜眷兵換防番戍兵之

分亂後舊制不可復接而辦事幫辦領隊大臣於本營存兵外兼帶馬步各營各請專餉所稱馬隊步隊既罕能戰之兵而辦事幫辦領隊各員又非盡知兵之選徒糜餉糧無濟實用都統及各大臣因慮產餉未極其豐增竈更形其絀力主畫地自封閉關謝客之議以護官私屯糧不顧兵事利鈍金順進駐古城張曜進屯哈密遲回不前而後隊尙逋遘原防者以此見在巴里坤古城已辦採運哈密已開營屯金順張曜兩軍留後之隊應卽陸續開拔兵力旣增則屯丁可減竊維此時必分別兵農責兵以戰課農以耕而後餉事可節兵事可精也哈密巴里坤古城所駐各大臣就見在旗營核定糧餉如缺額過多准照舊額馬步就地挑募丁壯補數但責其保守城隘不必責以戰事脫屯丁伍籍散之歸農則盡力隴畝民樂耕其野而官屯私屯地畝收穫餘糧准照時價發糶民益得其饒不但分駐各軍可資接濟卽調發續進馬步沿途就地採購毋期裹糧以趨於兵事更覺順利較之見在辦法兵農兩荒不猶愈乎如蒙 聖明鑒允應請 飭下金順文麟遵照辦理庶於時局有裨此籌整理哈密巴里坤古城兵事實情情形也諭旨關外兵事餉事並轉運事宜均責臣督辦而蘭州距前敵數千里糧餉轉運雖可總其成至忝預戎機則調度指揮不能發當其可自當簡率大軍親駐肅州相機辦理惟師行糧隨事豫則立當此新穀未升駝隻歇廠轉運難期暢旺之時不先將前敵各軍食糧灌運充裕催其留後各營陸續開行而遽大軍


進發致占前敵軍食以後彼此兼顧更費周章督臣兼司關隴轄境遼闊移節肅州距關內腹地太遠又苦鞭長莫及調集各軍所遺營壘均是扼要地方非權其緩急移撥填紮於建威消萌之計亦形疏略見在一面督飭西路各局於駝隻起廠之前趕催車馱層遞灌運一至八月卽調新駝分駐安西哈密各處分段層遞轉輸而調回車馱搬運新糧一灌運安西糧局一運供臣部軍食庶期會從容畜力舒展於事均便一面調集各路將領商議出關隨征留後防守各事宜及移營分紮一切務臻周妥臣之進駐肅州未能求速者此也至景廉所奏關內運糧至古城應以十萬石爲度以斤計則三千餘萬斤非竭四五年之力不能辦到金順緘開所有會銜緘牘全未與聞所需軍糧合留後十餘營并計每年以市斗二萬石爲度尙只六百萬斤然此皆金順未調補烏魯木齊都統以前就彼時局勢言之也合併聲明



巡邏兵占前數軍食以被彼此兼顧更費周章督臣兼司開闢新境邊疆移鎮中區關內腹地太遠又
營糧糈莫及調集各軍所積營場均是扼要地方非儲其糧是移糧填紮於遠版圖之計亦形絀蹙
在一面督飭西陽各屬於驛變起處之前趕儲軍款層層遞進一五八月即調新曉等處安西哈密等
分設層遞轉輸而調回軍款搬運亦屬一兩是安西糧局一區供區都軍食庶期會從輕省力計展於事
均便一面調集各路將領商議出關隨征留後防守各事宜及移營分紮一因新曉關安區之巡駐肅州
未能求進者此也至軍糧所存關內運糧至百城應以十萬石調度以斤計則三千餘萬斤非錫四五年
之力不能辦到全賴關所有倉廩總額全未與關所需軍糧合指後十餘營并計每年以市斗二萬石
調度而只六百萬斤以此皆全賴未調補焉得未齊都統以前就彼時局籌畫之也合俾點明







皇朝經世文續編卷七十二目錄

兵政十一 地利上

南北兩路卡倫總敘

與曾節相論東南形勢書

長江津要十三則

郴州論

永州論

答客難

浙江輿地扼要說


復張制軍書

致駱籲門宮保書

大清一統輿圖跋

附凡例

察看福州海口船塢大槩情形疏



羅澤南

馬徵麟

黃仲騏

黃仲騏

黃仲騏

鍾文烝

劉蓉

劉蓉

嚴樹森

沈葆楨

設險守國論

吳曾英

皇朝經世文續編卷七十二

上海葛士濬子源輯

兵政十一 地利上

南北兩路卡倫總敘

松筠

新疆北路之塔爾巴哈台與科布多毗連以額爾齊斯河爲界河東卡倫地名和尼邁拉虎隸科布多河西卡倫地名輝邁拉虎隸塔爾巴哈台自輝邁拉虎至塔爾巴哈台夏季設大小卡倫十三處冬季設卡倫八處外此俱哈薩克游牧塔爾巴哈台西南一帶卡倫八處界連伊犁卡倫以外亦哈薩克游牧伊犁東北七百餘里與塔爾巴哈台接界之處由哈布塔海沁達蘭一帶而南設大小卡倫二十三處係察哈爾領隊大臣專轄卡倫以外俱哈薩克游牧又西而南尾至伊犁河北岸設大小卡倫八處係索倫領隊大臣專轄卡倫以外俱哈薩克游牧自伊犁河南而西設大小卡倫十六處係錫伯領隊大臣專轄卡倫以外隔河與哈薩克接壤其錫伯屯牧西南因有回子屯所每年夏秋設卡倫於達爾達木圖以資巡察由錫伯卡倫接連迤西轉南而東大小卡倫十七處係厄魯特領隊大臣專轄卡倫以外西北係哈薩克游牧西南係布魯特游牧又厄魯特游牧東南設卡倫八處界連喀喇沙爾之土爾扈特和碩特游牧亦

係厄魯特領隊大臣專轄至伊犁城北塔爾奇一帶及伊犁河渡口設有卡倫七處專爲貿易哈薩克並稽查逃人而設係惠甯城領隊大臣專轄此伊犁及塔爾巴哈台所屬大小卡倫方向皆將軍統轄也自伊犁南越穆蘇爾達巴罕至回疆烏什城西北一帶設卡倫六處外通布魯特係烏什辦事大臣專轄自烏什而西經草地布魯特游牧地名樹窩子七百餘里直達喀什噶爾城由城東北而西轉南設卡倫十七處外通布魯特西達霍罕安集延係喀什噶爾參贊大臣專轄自喀什噶爾東南行二百餘里至英吉沙爾城由城西北而南設卡倫十二處外通布魯特西南千數百里以外至巴達克山係英吉沙爾領隊大臣專轄自英吉沙爾東行三百餘里至葉爾羌城由城西南轉而東北設卡倫七處西南一帶外通布魯特東北卡倫向爲稽察逃人係葉爾羌辦事大臣專轄自葉爾羌東南行七百餘里至和闐城和闐東西河設卡倫十二處向爲稽察採玉又札瑪爾卡倫一處通阿克蘇爲稽察逃人而設係和闐領隊大臣專轄自葉爾羌東北行一千四百餘里至阿克蘇城其東北通著勒土斯設卡倫二處稽察喀喇沙爾所屬之土爾扈特游牧係阿克蘇辦事大臣專轄自阿克蘇東北行七百餘里至庫車城由城西北而南設卡倫五處專爲稽察逃人係庫車辦事大臣專轄自庫車東北行八百餘里至喀喇沙爾城由城東北設卡倫二處稽察逃人係喀喇沙爾領隊大臣專轄自喀喇沙爾東北行九百餘里至土魯番城由城西南

而東設卡倫六處稽察逃人係土魯番領隊大臣專轄自土魯番東北行一千七百餘里至哈密城由城東北設卡倫四處稽察逃人係哈密辦事大臣專轄此回疆各城所屬卡倫方向也

與曾節帥論東南戰守形勢書

羅澤南

竊嘗統籌天下之大局黃河北條之水也秦晉燕趙之險憑之大江南條之水也巴蜀荆襄徐揚之險憑之河水渾濁操舟維艱長江數千里一帆可以上下故東南爭戰必恃水陸之兼濟大江之要害有四一曰荊州蜀江初出峽之水也荊州不守則西可以窺蜀南可以襲常澧一曰岳州沅湘洞庭之水由之以匯大江者也岳州不守可因之以犯長沙窺衡嶷而通嶺外之寇一曰武昌江漢之所由合者也荆岳諸州倚之爲鎖鑰而溯漢水而上卽能犯湖北之襄鄖陝西之漢中度南棧可以爭劍閣踰北棧可以據陳倉秦蜀奧區悉爲震動一曰九江大江東流彭蠡入之南昌之門戶也西踰湘南東犯閩浙在在可通此皆自古用武之國智謀之士所必爭焉者也至於皖城江表重鎮爲都金陵所必重而非長江險要之地建業龍盤虎踞古稱天險而地居下流勢尤不足以控西北荆岳鄂潯非其所有遂有岌岌不可終日之勢六朝偏安江左其安危恆係於荆襄有宋南渡諸臣日以爭江夏爭荆襄爲事故得偷安於臨安元伯顏一入襄陽下武昌南宋不能復支以成建瓴之勢故也粵匪倡亂之始不過桂林一隅耳無與於長江

之險也程制軍防堵衡永不能以兩湖之全力守嶺表之險要致賊踰嶺而北陷道州陷郴桂逼圍長沙我師力守得保省城賊遂迂道而破岳州破武昌破九江破皖城僭號金陵當其時賊勢初成羽毛未豐利金陵之富侈饜一己之貪求自岳而鄂而潯皆得之而不守使收武漢之餘燼據上游以自固居高臨下亦無難制賊之命當時封疆大臣亦無有計及此者賊得金陵之後遂日以上犯潯鄂爲事咸豐三年夏奪九江而薄江省江中丞進援江西賊不得志章門因而上窺武漢浸假而據漢濱之德安矣浸假而上據岳州矣浸假而逼長沙迂道以據湘潭矣由是而湖南之常德澧州相繼胥溺湖北之荊州亦爲賊所擾長江之險盡爲賊有東南大局幾有不可支者賴麾下提師湘南操水軍以肅清江面爲要著湘潭一戰賊鋒始折因而復常德復澧州進攻岳州賊勢大挫武昌之久爲賊踞者亦得以一鼓下之嗣是而大治而興國而蘄黃而廣濟而黃梅轉戰千里所向無敵長江之險幾復盡爲我有賊之所保者僅九江一孤注耳勝負無常變生不測水師攻破九江賊船下泊湖口以阻江西內湖之戰艦曾爲賊虜者使之不得出大江湖口賊卡旣破小舟駛入彭蠡舉賊舟而盡焚之我軍巨艦之在江西者反兩爲賊所火陸師由蘄黃而南者亦頓於潯城與之相持不下楊制軍不乘我師克復武漢力圖善後以備不虞不自揣量率請以攻勦北路是任致賊復襲廣濟陷黃梅武昌漢陽又爲賊所淪陷東南大局於是爲之一變今

官軍所能力持者獨有潯江一險耳九江雖爲賊踞陸師之圍之者賊不敢攖其鋒湖口雖爲賊守水師之在南康者賊屢爲其所敗潯城通近金陵兼能牽制武昌故賊深以爲憂必欲從而爭之犯弋陽擾廣信且欲從信水以下彭蠡而抄我師之右矣據義甯守梅嶺且欲從修水以下彭蠡而抄我師之左矣幸賴麾下指示方略澤南因以獲捷於其間江右東西兩路俱爲安輯九江門戶益固賊不得恣意於武昌兼以湖南之水師堵於金口官制軍之陸師已及德安武昌雖爲賊據當有不難撲滅者特以湖北之崇陽興國通城通山羣盜如毛荐食之心無有饜足崇通之賊不除江西之義甯武甯湖南之平江臨湘巴陵終無安枕之日是以欲制九江之命未有不從武漢而下解武昌之圍未有不從崇通而入者爲今之計惟有率南康之水師與圍潯城之陸師合力以攻湖口橫踞大江以截戰船之上下更選勁旅埽通城通山崇陽興國之賊悉其種類而殲除之則江西湖南兩省之邊患可以漸紓然後乘勝以下咸甯出江夏與湖南駐泊金口之水師相爲聯絡以攻鄂渚復漢口是不惟荆岳可固卽九江殘孽亦將不攻而自下蓋賊欲保金陵必得鄂潯而後無西顧之憂我師欲復金陵亦必先收鄂潯而後成建瓴之勢南條旣清北條自固國手下棋必爭先著形勢所在固有不容龜著而後決者澤南奉委從戎力小任重夙夜祇懼常自恐其有失然苟有可以效力之處雖備極艱險而不辭倘不遺葑菲欲畀以剿崇通援武漢之重

任則願益以千人以厚其勢予以數月之餉以儲其糧雖自知其不才亦願枕戈嘗膽以從事其間以殲此一隅之羣醜成敗利鈍古人亦難逆睹澤南惟盡其事之所當爲與夫力之所能爲者以不負委任之至意而已

長江津要十三則

長江圖說

馬徵麟

兵家重地利得其阨塞則門戶完固堂奧自安江防門戶舊稱廖角觜

廖荆川宛溪作蓼利營前沙屬崇病書作料海門廳境

南北相對爲第一重狼山福山相對爲第二重然皆江面遼闊壅塞爲難今已另立內洋五營主之至長江汛防起自江陰之蝦蟆山則鵝鼻觜一帶在通局爲內戶而於長江營制實爲第一關鍵南岸大小石灣與北岸劉聞沙相距不過三里許礮堤

礮臺縣互如堤每堤可施礮數十位

兩兩相屬此易所稱地險大塊資我守禦者也

泝洄而上則圖山爲鎮江門戶屹立南岸江中順江洲亘數十百里與北岸三江營互相犄角舟行其間東折而南層峰峭壁重重險隘此所謂表裏山河者也京口刊溝互通南北東南漕運之所經鹽課之所出咫尺之地半壁咽喉顧不重與

又上則划子口其南岸對出者爲石埠橋前扼長江後控滁口烏龍山與沙洲圩礮堤對出爲金陵之門

戶古稱宣化鎮

在六合縣南

南岸對建康之靖安鎮最爲衝要當卽此矣

礮堤之設居陸地以制江面與水師有唇齒之依勝於濡須夾水置塢矣究非陸居不守且無以專責成水師以船爲家新章水兵住岸疊有厲禁勢不得越俎以代則肝膽楚越矣牖戶綢繆宜迨未雨

又上則牛渚采石中權之津要東西梁山安徽之屏翰小孤澎浪湖口九江豫章之喉吭田家鎮西塞山一帶全楚之鎖鑰陽邏堡沙武口荆揚豫三州之關塞岳州爲楚南閘閤而全楚之腰膂螺山鴨闌楊林臨湘白螺道人諸磯兩兩相對又荊州岳州之肩鐺也

又上則筲箕窪爲沮漳之口春秋時與江漢二瀆同爲楚望虎渡河別而爲沱當在周秦以後求之禹蹟實爲長江之幹水荆河虎渡二江雙流互爲本支據鄢郢之勝握全楚之樞上游有故則操之有要矣岳州一鎮勢如高屋建瓴水瓜州一鎮形若丸泥封函關其間湖漢各營絡繹不絕呼吸相通姑孰山川阻險扼要江津居中馭馭勢若率然觸處爲首尾是故無事散之五標而不見多有事聚之一隅而不見少

瓜州固裕溪守則淮南有蔽九江固則利盡南海漢陽固則鄖襄高枕岳州固則滇蜀安堵長江天塹限南北而扼東西長江之防專防長江云乎哉

章氏山堂考索曰江出岷山經夔峽而抵荆楚則江陵爲一都會沅湘衆水合洞庭而輸之江則武昌爲一都會豫章江與鄱陽之浸匯於湓口則九江爲一都會今按皖南皖北衆水合於牛渚則姑孰爲一都會南連吳越北接淮揚則鎮江爲一都會疆域雖遠而險要必爭之地不過數四猶人八尺之軀筋脈之會亦數處爾宋吳表臣云大江之南上自荆鄂下至常潤其要不過七渡上流最緊者三荆南之公安石首岳之北津卽今荊河腦一曰三江口中流最緊者二鄂之武昌太平之采石下流最緊者二建康之宣化鎮江之瓜洲兵家因敵制變猶水因地制形未可刻舟膠柱以求錄此以當舉燭

自昔江流壯闊在在緣以爲險近代漸就淤填一葉可矜飛越江固非復昔日天險也然分南北者利於寬扼東西者利於狹則今日之用長江與昔日之用長江移宮換羽矣

地扼東西忽則鐵紐皆斷風利不泊天限南北忽則浮梁不差甚且擣虛飛渡此亦一長江彼亦一長江豈伊地利抑亦人謀也是故得其道則洪流障於一葦違其道則江河潰於蟻穴

或謂長江之師不爲寡矣將以彌巨寇在示形便以握其樞若夫江湖數千里分地設守散之若無會哨巡防祇禦小偷不知會哨捕偷所以肄勤勞便舟楫擾風濤也調防以馭之會操以聚之所以操縱自如也木石之轉羣羊之驅風帆之利非若陸營之居重鎮阨其都會寓合於分不亦可乎又況楚有七澤吳

浸五湖沮洳空曠號爲萑苻萌芽不翦滋蔓難圖戢小偷亦以弭內患又可忽諸

狼山五阜舊隔江水不相連屬讀史方輿紀要云軍山與刀刃山隔江數里塔山有兩石門相對卽元張瑄朱清海運故道今五山斷續相連皆在陸地江陰浮山一名巫山舊在江中所謂巫門之隘也今則壽興沙壅爲海壩浮山附屬南岸靖江東北之孤山舊在北岸屬泰興縣其後岸圯山入江中去岸五六里與江陰浮山相對成化八年潮沙壅積化爲膏腴而山復居平陸靖江縣舊爲江陰之東西馬駝沙在大江中天啟後沙壅連屬北岸因開界河與泰興緣河爲境揚子江舊闊四十里瓜洲本江中一洲後乃北與揚子橋在揚州府城南十五里相連而江面僅寬七八里瓜洲狀如瓜字唐開元以後漸爲南北襟喉宋乾道四年始築城置守近年以來江濤震撼五門已淪其四今和州治爲秦歷陽歷陽典錄云歷陽未縣以前江水泛濫舊圖謂漁邱渡爲伍員入吳濟渡處是昔時江流由今城中而後乃徙而東也安慶屬縣之小孤山舊峙江北岸與南岸羣山對立爲控扼處成化二十年江水忽分流於山北而小孤遂有砥柱中流之勢黃州赤壁舊側江濱今其下爲湖湖外爲洲去江數里江夏鸚鵡洲舊在江中洪武時連屬北岸又云崇禎間蕩決無存今之稱名非復故址枝江百里洲嘉靖時衝決爲二高岸爲谷深谷爲陵可勝道哉

郴州論

黃仲騏

嗚呼以予觀於天下之變而知兩粵之門戶郴當其衝湖湘之藩籬郴據其險云黃巢之陷廣州也高駢奏請遣兵馬使張璘將兵五千於郴州守險僖宗不許後巢踰嶺泛湘陷潭州渡江淮而長安遂陷國朝之制吳三桂也將軍穆占以陝西荊州之兵拔茶陵攸縣安仁郴桂所屬十二城遂屯郴州遣前鋒統領碩岱等守永興賊悉銳不能攻而衡州以平且定鼎後宜章桂陽各設參府一名綠營額兵五百廟謨深矣哉昔以無事之日而策及有事之日而置若無事此天下之所以多事也咸豐二年夏四月州守孫公甫蒞郴而西匪踞道州維時承平日久人不知兵凡所爲戰守具皆未備逾月賊陷桂郴統領提督軍門向榮和春尾其後所過諸要隘皆棄之弗設守賊遣其前銳出永興安仁徑攻長沙不克沿江而下此所以有金陵之師也五年春土匪楊老四竊發會守備譚瓊林督水勇五百至敗之於荷葉坪鄉人繼之殲其餘時大憲以粵寇未靖檄同知趙啟玉督勇一千防郴啟玉年少氣銳不識方略營於九峰賊突至環攻之皆崇山箐嶺不能出死之而軍遂覆當是時統領王同知周金城副將李輔朝率南勇二千楚勇一千相繼至倉皇不知所爲據城爲營賊本烏合鮮火器藥我軍屢勝五月二十九日遇賊於大路之十字嶺敗之追奔十餘里賊分股抄小路出烟竹坪由七里洞龍都司無以禦而城陷周李諸軍皆潰無一返者賊收其散亡蟻至蜂聚乳源樂昌連州嘉禾藍山諸賊悉附之而勢遂振前股出永興

茶陵所至披靡市井一空此所以有江右之師也已未春二月江右賊由南安崇義犯桂陽參府彭定泰副將劉培元率勇二千不能軍城遂陷賊分股一由黃草坪陷興甯出東江一由九峯出良田司會於郴桂先後驅嘉禾道州甯遠永州祁陽東安嗚呼此所以有今日之師也夫郴之爲州在五嶺以南山高水駛關隘林立崇巒可控險間道可出奇設伏守可爲攻逸可待勞主可制客此其大勢也而其最要者南路則莫如摺嶺五里衝楓樹坳東路則莫如黃草坪水阻灘東江西北則與桂郡相接壤之黑山口昭里渡藍王橋及賊之由郴永而下也東路則莫如桃花廟黑石嶺西路則莫如牛角井石壁塘矣知地利者其於邊境隘塞孰爲通行孰爲蹊徑孰宜屯堠然後擇突鬪敢死之士扼要而守之萬夫不能前也爲先事之謀者莫若以郴爲重鎮高駢請以五千守郴予仍謂非五千不可計郴州見在關稅年終可得三十餘萬以郴州之利數五千之勇幾何其不足也而況其利之不可以計數者不僅在郴州也孫子曰不知山林險阻沮澤之形者不能行軍不用鄉導者不能得地利予郴人也知郴而已矣作郴州論條列其事於左

一防維宜先也有險而不守與無險同守險而不善其始與不守同郴城小如斗無可守者也五年之役師不出來鶴樓一步其已事矣郴地崇巒深澗盤回糾互而與屬縣毗連之處尙多是故必周知五屬之

形勢而後知一州之形勢尤必周知全省之形勢而後知郴之爲州其屏蔽於上游者至重大也愚謂宜於無事之日凡地之可以守與其所以守之具預爲安定成竹在胸而後猝然臨之而不亂若待事至而始設備則必無把握措手不及矣夫自古無不險之國而亦無不可守之險及其敗也究亦無不可失之險嗚呼自撤藩籬千古一律未有禦賊於門庭之內而得免於操入室之戈者方今之勢不及早圖之一誤再誤前車其未遠乎

一查勘宜詳也郴之屬縣宜章兩桂與粵境相接壤興甯永興與下游爲通衢其間崇關峻嶺扼塞險要固有輿圖所不及載傳聞所不盡悉者而我之所以用多用少用分用合用實用虛用奇用正之處必先了然於心目之間神明而變化之而後可與從事使不不一致其精詳將有前陷沮澤而不知深入窮谷而不悟者烏在其能行軍也是故善言地利者謀之於平日用之於臨時而馬跡所至雨雪不能阻其程酷暑不能緩其行窮巖絕險不能疲其力身親歷焉如在山陰道上也不然智如阿瞞尙悔恨於陽平明如武侯猶遲疑於子午而況其他乎唐賈耽云地利之學百聞不如一見旨哉言乎其斯爲戰守之準則歟

一延訪宜殷也當休明之時崇文者望重值倉卒之際濟變者功多郴僻近嶺南魁奇忠信材德之士固

未易易見也而自飲和食德以來豈無一才一能足資捍衛者乎雖見閭閻較隘衣冠近古與之談裨海之廣九州之大聲名文物之盛茫如也而試問風土審利害稽里道於山川驗民情之向背路窮則逶迤可通質魯則信義易感如指掌如響應焉且其智者能者樸實而英明者從而引導之則可得其實力矣是當於未事之先集衆思廣衆益或招要以資其叅謀或親臨以廣其顧問在我補耳目之窮而於人收指臂之效事不勞而功易成也古者開幕府置上舍招致天下豪傑往往結交而下逮夷門好士而心傾稷下卒能濟艱難而建奇勳歷觀往史不可勝數夫亂世多才英俊疊出是在專閫者留心而已矣

一簡選官精也守險之師與鏖戰異當關之士與對壘異夫柳之所以可恃者要隘也利用守而卽以守爲攻其地率斗峭而難進其勢恆偪仄而易傾此非堂堂正正之陣十圍五攻六花八門所能奏功也愚謂宜以五千人中擇其短小便捷驍勇有力尤必膽氣過人者編成一軍口糧亦較他營倍優百長隊長更於精中取精除隨時練習外令赴各營以試其能否其未及神熟者汰之庶扼守有虎據之師而我軍無可動之勢 國朝陸世儀曰若遇此等地勢奪隘爭險必於軍中另選突鬪敢死之士聚爲一軍以應卒然之用知兵哉

一修築宜備也守禦之資固恃天險而修補之助亦藉人爲夫山林川澤天地自然之形勝而據高扼要

智者審焉因天地之所不足而益以人事之有餘易曰王公設險以守其國誠以險成於人而不徒恃在地也愚以爲郴屬各隘口宜先相其地勢察其夷險權其重輕或塹山築城斷道起障或礮石櫓木或廣置戍邏或挑挖濠溝用工損而費不資舉事勤而功易集且士卒習熟道途賊以遠來深入欲進不可欲退不能將有收功於意外之數者晉城虎牢蜀築魏樂古人當兵力強盛之時不聞廢險於此而況紛紜有事之日乎

一民兵宜募也天下多故綠營額兵不足以禦敵而召募繁矣召募之兵湘兵其最著者也隊伍有法進退有節旗鼓兵伐軍令森嚴而試當崎嶇之路處險要之衝恐人地生疎所習非所用所用非所習將有變生不測者矣愚謂不如添募民兵之可用者兩桂與興甯南路之民較爲樸實今試就五千人之中汰其老者弱者技藝不熟者卽以其糧募民兵之驍者捷者耐勞而習險者并一體訓練使之知法以爲可用庶臨事有熟習之兵而於我軍有先路之導古名將往往就近調用民兵義兵以成大事至明王守仁之勦泃頭桶岡及擒宸濠皆專用民兵此非其成效乎今之專閫者尙其倣之

一訓練宜勤也將無事則逸兵無事則靡故久戍之師不可與力戰古之人或聚米以爲山川或硃筆以塗道路雖在閒暇不忘憂勞也今建帥府於郴郡以防粵賊之衝宜於常操外令營官按記日月分撥各

營兵數若干隨帶赴宜章興甯兩桂暨桂郡之臨武藍山嘉禾所有扼塞要害之處爬山捫蘿以驗其足力之健捷技能之工拙又必分番輪戍挨次不紊此勞則彼逸此逸則彼勞勞逸既均號令亦平此亦整飭軍務之一法也

一碉卡宜設也宜章之三堡舊矣楚粵交界之區類多崇山峻嶺紆盤百數十里塘汛之所不及兩面斗峭人馬難越不獨桂東之八面山也而宜章桂陽實爲粵賊出入之路其捍衛尤急愚謂宜仿行苗疆碉卡之法凡有往來要路嶽奇陡狹則扼設二三碉樓或如品字或如連珠鎗礮火藥米糧薪水盡貯其中查碉製高三四丈每面寬一丈許洞門一層向外三面凸出內空一面凡三層上兩層作樓層礮礮眼下層以衛堡根每碉相隔五六十丈令鎗礮接續相及若地勢寬者或作五六碉窄者或作一二碉地方官勸諭獎勵富者出資貧者出力令就近紳士董其事以次繕完每碉設礮長一名礮卒十名聞警則各堡有備可以堵截并挖濠栽棘可以防限誠爲禦賊之至計今楚粵之邊患將未有已也萬山叢雜易於伏莽且賊蹤出沒亦無定所雖一時戰伐之功掃除烽煙兵撤而事變旋生故不如建立碉樓爲禦賊久遠之計也

一約束宜嚴也王者之師如時雨仁人之兵若春風不聞其騷擾也大丈夫提三尺劍殺賊立功莫安桑

梓亦已壯矣而顧此無辜小民糜爛之餘生未幾迫脅之殘喘何堪馬牛牲畜樹植蔬菓之屬何一非燼餘也且用兵之道安民爲先喪亂之餘撫恤宜急主兵營弁雖無司牧之職而既已捍蔽一方屹然重鎮則亦民父母也兵勇恃衆驕橫小民慙冤莫伸地方官以其爲客勇而置之主兵者以其能戰陣而怒之撻怒積忿爲害滋深愚謂約兵宜嚴待民宜寬深兵民一體之意而凡有便於民者三令五申以禁之違者懲之昔高帝入關告諭而關中感泣卽以魏武之奸而侵犯稻田幾至毀體雖爲狡猾之故智而要其號令嚴明有犯必懲此亦主兵者所當爲法也夫

永州論

黃仲騏

黃子曰以今日之形勢足以捍湖湘而制粵西者非永州乎永州東距常甯西距廣西全州南距廣西富川北距邵陽倚山爲城前有長江之險地多峻嶺巖關以爲阻隘柳子厚所謂環以羣山延以林麓者也唐鎮海節度使高駢請分兵守四州之險永其一也崔沅豆盧瑑阻之厥後編筏泛湘而潭州遂陷周保權遣兵代永州戍道出衡陽湖南將張文表懼遂驅之以襲潭州夫古之潭州卽今之長沙也是永州之與長沙實有相爲唇齒之勢矣咸豐二年春西匪陷全州由東安趨永州會大水河溢賊不能飛渡遂踞道州當是時使建重鎮於永州南路出銳師屯東安以阨其險祈山黃華山龍虎關皆其重地也西南則

遣兵巡江華永明以遏灌陽之衝賊必不敢輕進而吾得以阻塞險要因利乘便以制其死命賊將捲旗息鼓逃遁之不暇矣金陵之變何緣而至此乎夫事每成於有所警而禍恆中於有所倖方西賊之攻長沙也當事者悉心調度幾經辛苦而固守之以無虞亦已幸矣事已過而不加察禍已至而不思懲西賊既長驅於前東賊復猖獗於後門戶一開腹心滋害人咸知其爲病而不知其受病之由可慨也已今年春二月賊習其故智由崇義陷郴桂不直達永興安仁以窺衡湘而趨甯遠出永州之祁陽東安以攻寶慶所賴諸戎軒急援而數窘之賊固多所失我亦未爲得也然而賊之志尙未一日忘湖湘也然而賊之勢將不知其所終也亂天下者自粵西始今之君子支持於東南之際今日失一城明日復一城而防之不勝防克之不勝克賊日愈衆而勢日益危曾亦思賊之源何以清賊之流何以止也譬諸水焉知下游之爲害而不疏濬其上流導其性分其勢使之就故道而匯爲江瀦爲湖無怪乎汗漫橫決汪洋恣肆而不可爲也夫釁之啟也愈遲則其發也愈熾賊若以大股據永州而分銳以窺衡湘則可以扼我之首而藩籬之撤危矣將長沙亦不能以自固兵法曰地有所必爭此之謂也今夫地利之設至無定矣有千古不易之形勢有一時制敵之形勢謀國者所當急講也今置永州於閒散之郡一任其出入而不豫爲之備及至有警方傳檄遠調賊之遷徙無常而我之征調屢易豈不謬哉愚以爲永州當粵西之衝其勢與

郴並重且相距僅三百餘里兩鎮既立屹然如太華並峙強兵悍將聲勢聯絡互相爲援於此收指臂之效勝於十萬師矣尙何粵賊之足云或曰衡州亦上游之勢也當亦策時者所必爭方今不守衡而守永可乎余曰永州環山據水崇巒間道出奇可設伏利用守亦利用攻也若衡者莽蕩平衍雖近岡阜而旁無隘塞故吳逆僭號不旋踵而敗若無永是無衡也吾願今之置重鎮者不曰衡而曰永

答客難

黃仲騏

客有難予者曰子之以郴永爲重鎮也先事之圖而後事之論也子何不言之於十年以前庶或有知之而行之者今時已過而喋喋焉毋乃非智歟予曰否否不然夫古今治亂得失之機當事者行之識事者言之行之者不得其人而言之者無罪史冊所載往往類然可慨也夫雖然莫謂言之者無其人也記與友人談此事時有自京師來者語及給事中陳壇奏稱郴永爲黃巢入中原之路急須先爲設守而朝議不省事遂寢夫陳壇一輜軒使耳郴永蓋兩次下車焉衡文之餘猶能細審其形勢自抒所見入告於天子雖其言之不見用而要其言之可用者自在也且子不見夫醫家乎醫者之於病也求其生而已得其方而生失其方而死醫者之事也乃得其方而生亦得其方而死則非醫者之事也而況於失其方乎此醫案之所以作也客曰審如子言子之論郴永誠善矣然則東南之大疆域之廣豈無可守者乎予曰

奚爲不可守也難易不同也而況不得其人乎今夫疆域一定者也形勢無定者也得其人則溝涂可以限戎馬之足林樹可以隱奇兵之用雖平岡壠坂神明而變化之可也是故有子房之謀而後垓下可以困項籍有武穆之策而後洞庭可以擒楊么不得其人而曰舍山川險阻之固將欲收功於都會之區長江之界夫豈然哉嗚呼賈誼李綱不世出吾不知今之所謂賈誼李綱者將何以處焉悲夫

浙江輿地扼要說

鍾文烝

今之浙江省領府十有一本吳越王之舊境而又加小焉初漢因秦制設會稽郡共周圍萬一千里至東漢順帝永建四年始分浙水以東爲會稽郡地而西則爲吳郡唐乾元初置浙江西節度使領昇潤宣歙饒江蘇常杭湖十州浙江東節度使領越睦衢婺台明處溫八州後又以浙西爲鎮海軍領潤州及蘇常杭湖睦共六州浙東爲鎮東軍領越州及台明溫處婺衢共七州吳越王錢鏐兼領鎮海鎮東兩軍不能
有常潤而移鎮海於杭州此爲今之建置所本然吳越時之蘇州實兼今蘇州松江嘉興之地以江爲境
今之浙江省則不能及江矣夫長江天塹也由江可以達淮由江淮而之焉則可以雄視天下今長江旣
在境外浙西之壤無以自固浙東之險又不足恃錢塘江之水波濤浩渺似可以扼其要矣然祇爲境內
自守之地不足爲邊陲之禦侮也衢州之常山水陸交衝温州之泰順平陽處州之龍泉慶元山谿深阻

似亦可以扼其要矣然亦不過控馭江西福建之資無與於中原之形勢也夫途徑不嚴則門庭不固筋脈失理則血肉無權善弈者先籌全局善屠者必中竅會將欲爲浙江衛其塗徑治其筋脈計其全局察其竅會其必北守太湖東防大海而後可歟竊意湖州之太湖毗連蘇州常州以訖於宜興春秋以來勝負所繫者也錢塘之大海直指海門淮口以達於登萊元明以來帆檣不絕者也昔之浙東西其地及於江則守江以通於淮可也今之浙東西其地不及江則專致力於湖海宜也湖海之險得斯江淮之路通江淮既通則浙江之大要可得而言矣明初分十三布政使司嘉湖二郡皆屬南直隸旋即改屬浙江當時蓋亦以太湖之險兩省所共脣齒相倚莫此爲重歟至於錢塘之大海由鼇子門而北者專就其關繫江淮者言之耳嘉甯溫台諸郡皆濱海夷戎出沒寇盜往來日日而詰慝焉處處而設防焉事勞功少殊非要圖此則必合天下之濱海郡縣而統籌之不專繫浙江一省之得失矣

復張制軍書

劉蓉

旌麾至敘正值髮逆犯川仰賴德威於楚軍未到之先指揮扼擊是旌節尙未入滇而已大有造於蜀也比來滇東道阻自宜暫駐蜀疆徐籌前進竊查滇南大勢杜逆貢嶠迤西乘國家多事之秋據洱海蒼山之險觀其復楊振鵬一書欲循南詔故轍料事詭譎多中竅要聞頗招徠窮民給與籽種馬牛墾闢土地

細人感其私惠欣相擁戴遠近服從跡其悖逆之狀不容稽誅而察其根植之深殊難驟拔彼有人焉殆未可以輕視也至若馬某盤踞昆明外託受撫之名陰蓄不臣之志徐既黨附醜奴潘復輕入虎穴勢將俯首帖耳受其指揮一動一言爲所脅制甯復能宣示威信稍立異同以承 朝廷姑予羈縻之微意哉不能制人而徒爲人所制蓋自其冒昧赴滇之初而已知其無戡定之遠略矣前讀 詔書有不可深入之旨是 廟謨神算早已洞見萬里之外然不履滇境終無以繫屬人心驟以兵壓滇境而兵力不强餉運不繼則匪惟不足以戡亂而適足以速變均非計之得也欲爲一時權宜之計莫如擇滇屬之近蜀稍可憑藉者權時布置練兵聚糧徐規進取之略庶措施有方而號召亦易迤西南所謂崇山巨川足資保據者旣爲花門所占僅迤東昭通一路介滇黔之間分川貴之險地勢尙可憑依其間銅鉛之產亦可略資接濟近漁帆觀察有就昭通整置行省一議誠爲識時務之大者誠據昭通東川數昭義問漸推漸廣因以號召全滇其勢尙足自振目今滇中州縣之聽命於花門者非必人人帖服也特以省城根本之地旣爲花門所據州縣力難抗衡且一有參差不以爲伸大義而以爲壞撫局誰復敢起而異議者一經改置則人人耳目一新轉環自易不獨臨安之拒回者可以招徠馴服使爲我用卽各州縣慕忠效義之傳亦必有起而響應者然後耀我兵威徐規進取得寸則寸得尺則尺寬之以日月要之以誠信全滇疆

宇可望次第肅清蓋處四方多難民力凋耗之餘不能不隱忍以圖功從容以靖亂此尤大臣謀國之苦心窺時制宜獨握機要有非邀功躁進取快一時者所能測其崖略伏惟元老壯猷自已卓有先見滇路現方梗阻敘郡省城相距殊遙伏乞星輶暫臨與大府面商措置進取機宜謀定後動

致駱籲門宮保書

劉蓉

此間所籌調兵設防之事往往與尊意不謀而合足徵碩畫周詳遠猷宏達實所欽佩某自九月十四五日以來卽患左偏頭痛之症迄今兩旬服藥罔效醫者言係肝氣鬱拂風火上炎所致須得安心靜養旬餘乃可全瘳然事勢方艱仔肩特重其何能稍自暇逸頃所以奏調黃牧亦冀可爲綜理營務稍節勞逸而迄今兩旬未及肅函郵陳鈞座皆因患此證後不能伏案握筆之故也蒙催調果後九營現聞到閬中者已有三營餘亦不過日內可集某亦擬卽拔營前進惟進剿之法從前原有三路之議一由西鄉一由南通一由甯沔乃鄂援不至我軍獨出青石關地利既失挫敗旋聞現在軍聲未振賊勢鴟張議剿必先籌防固川乃能圖陝月餘以來延訪紳耆徧遣偵探僉謂青石關地勢偪促可資控扼難駐大營關內天池子至回軍壩地頗高廣西河口人戶稍稠然地近鐵廠林木砍伐已空不獨山徑窄狹米運維艱卽柴薪等項亦難覓取前議師出青石不過取道經過今旣謀頓重兵卽須通籌全局此地論形勢則祇可扼

守論饋運則必至困窮於是有謂宜取道沙河子出營黃瓜嶺者有謂宜取道通太滾龍坡出營西鄉者有謂宜取道廣元出營甯羌者查黃瓜嶺卽黃官嶺地不甚險而東通紅廟塘牟家壩南通塘子口西通廣元北通新集村寨較青石稍大曩辦三省教匪嘗有重兵駐防但其地距青石關僅五十里而越山阻水幾於無路可通孤軍駐此時防鈔襲兼聞附近村寨存米無多而山徑崎嶇運道尤屬不易至於進駐西鄉卽須先圖洋縣藍逆之強不及髮逆先攻其瑕則堅者亦圖自固雖堰口旣失西鄉被踞而我軍出滾龍坡地利可憑又與李京堂分道犄角足以制勝但川省轉運道路視南通更覺迂遠且賊匪上下分布而我師從下游進擊勢必旁竄四溢不入陝西腹地定窺川北邊疆爲兩省計均不宜出此途惟有暫駐甯羌或出鐵鎖關趨黃官嶺或出五丁關趨大安驛形勢在我運道較寬由是節節埽蕩雖見功稍遲而逼賊東下旣取建瓚之勢亦可以立於不敗之地圖陝固川策無逾此通覽賊勢西自褒沔東至西鄉踞三四城延數百里川疆密邇隘口紛歧若祇在在設防卽使更增萬人亦難免百密一疏之慮今由甯羌進兵而城太南通節節布置賊旣謀併力以拒上游而又慮南通城太之兵橫截而出則彼方備我自不能爲閒道旁竄之謀查城太一守舊有振武軍駐防今執事復檄唐澤坡總鎮增募一千合三千人足資控禦南通一帶除桂字嚮導兩軍現擬酌量裁減外湘果兩軍擬仍留住青石關某只抽調劉參將之

六百人合果後九營駐紮甯羌徐規進勦川疆足可無虞惟通江所屬涪池壩地方爲西鄉之百雄關定遠之瓦石坪兩道會竄之路雖崎嶇險阻又業經札飭姜令督團嚴防而是否真能扼守究未可知如能撥許蔭棠之千人前往自可無虞回逆雖有由秦州犯徽縣之報度亦未必遂蓄窺川之志似無庸過於防範某拔營時擬先撥嚮導營張道一軍前往防守計朱鎮所紮之梅子壩一路極爲險隘單騎獨馬尙難前進豈有將二千人不能駐守之理如張道可往卽亦無庸許參將改道而前矣賊之踞漢郡洋縣城固西鄉者方日拆民房磚石增修城垣又逼農民犁田種麥自係意圖久踞分擾蜀秦現所以尙未狂逞者亦圖多攜米糧廣爲儲蓄之計若不趁早進兵則根基日增牢固漢郡各城殆無克復之望興安梁觀察一軍已經調回鄖陽防堵苗逆李雨蒼一軍探聞已抵白沙並聞張逆第才已由鎮安回竄甯陝廳之四畝田地界現已咨請雨蒼移緩就急駐紮興安並分軍進扼茶鎮將來某由甯沔掃盪而前湘果諸軍由青石關橫截而出李軍由興安石泉逆擊而進仍符三路進勦之規賊匪之勢一分我軍之氣百倍卽不能盡殲醜類亦可逼入南山痛加剿洗使該逆無可托足之處考之輿圖參之衆論反覆千慮決策如斯未知執事以爲然否

益陽胡文忠公兼資文武深嗜輿地之學嘗病李申耆輿圖僅志郡邑無它地名且紙狹不復容增注乃取本朝康熙乾隆中內府所頒圖延新化鄒子翼世詒上舍晏圭齋啟鎮處士鉤稽考覈以成一篇拏摩厯歲甫成定本而文忠已薨余奉恩命自豫撫移節是邦追維疇昔知己之雅大懼隕越以失規隨之誼商之相國官公以亟成公志又延黃安李小軒廷簫農部江甯汪梅邨士鐸孝廉俾檢志乘之精核者凡府縣之改易大河之移徙驛站之遠邇修明審定上準禹貢昆崙析支渠搜之言增載屬國以昭我國家疆域之廣列聖聲教之訖而文忠經緯天地嘉與後學之惠亦於是遂矣圖既成故復紀其體例之指曰凡爲圖北上而南下尊京師也京師爲辰極萬國所會歸也準之皇極而莫爲中由是而分偏東西由是而判南北上揆經度紀以虛線經度者聯兩極而勻分三百六十者也中南北者爲赤道則經度之近極者斂而近赤道者侈是赤道而南北各勻分百八十爲緯度其距緯之圈皆平等測以地平二百里一度則緯度確而經度有贏縮之殊不能計道里故復計里畫方方皆百里以求其密雖屬虛空鳥道而人跡經行之數亦不甚徑庭矣其南北里差以測北極出地高度而得中國在赤北道也其東西以測月食加時而得交道之移先後也凡域中自外興安嶺北極出地六十一度廣東崖州北極出地十八度南北相距四十四度東至費雅喀所居大洲偏東三十一度西至喀什噶爾所屬什克南部偏

西四十六度東西相距七十八度則南北八千八百里東西萬有七百里斜曲則難算計矣域外華離昧任傳聞踳駁槩從簡略亦區畫中外之理也今定南北四百里爲一卷卷容二緯度自北而南上下相屬共三十一卷東南北皆際海西際地中海大一統也其稱名斷自同治二年爲省十八省作回朝鮮謂之道爲府百八十三府作□朝鮮謂之府中外各和屯亦如之爲直隸廳十八作◇散廳八十一作◇直隸州六十七作回散州百四十六作□縣千二百八十六作○朝鮮之州縣同焉土州二十三作■土縣三作●將軍都統參贊領隊辦事大臣所駐之城作□朝鮮之郡同焉驛作△城守尉以下所駐堡鎮作●卡倫作×鄂博營屯作□西藏大寺猶之城也作舍自行省外曰盛京吉林黑龍江爲東三省自外蒙古四衛拉特哈薩克土司喇嘛雖納貢賦屬主客而紀載從略又外若日本諸國疆里不能翔實者亦圖其梗槩其四裔自漢語外雜用國語蒙古語托忒語唐古特語俄羅斯語春秋公羊家所謂名從主人也而其大略則必拉河也色禽河源也鄂謨大湖泊亦湖也阿林山也達巴漢嶺也噶珊拜商堡也和屯城也昭廟也哈刺省城也珠克特亨廟也城也多罕橋也戈壁大漠也林木窩集也曰柏興曰斯科若中國之言郡邑也

一聖賢之學首在致知輿地之益不外考古欽惟 經筵侍讀如尙書之禹貢春秋之三傳以及通鑑史傳之倫但有注以今地之書如方輿紀要之類卽可按圖考索 講帷啟沃或有土壤細流之裨

一儒者立朝必期實用如會通一河實漕輓之至要異時三楚吳越饋餉之所必由自江沂淮自淮入河以抵通州設閘疏泉節節啟閉其詳見於陸燿山東運河備考今記梗略以貽後賢

一自咸豐五年銅瓦廂之決河復北流由大清河入海四方多故未遑修築隄防然濁流遷變無常曹考豐沛以東爲明昌以來故道今仍存之以備考覈

一史起鄭國往牒留芳歐公唐志備載浚鑿然西北土厚水深岸易傾圯故水利徒託空談至冀豫二州則沙土疏惡隨濬隨湮水反有害而無利然乾隆中方觀承督直隸鄂容安胡寶琮撫豫疏洩橫潦以除水害皆先講求各河支幹原委以爲施工次第今凡小港細流縷析繪入以爲盡力溝洫之助

一口外軍臺驛站郵政之所先也今自西北兩路延袤萬里以及腹內行省驛遞鱗次遠近畢書肅置驛者必有取焉

一王源有言名將必知地利而後可以行師故戰守之規必明形勢顧險要之設隨事有宜非今古之殊形乃前後之異勢昔李絳李德裕規畫河北西川有如指掌非胸羅宙合烏能控制得宜哉

一內外蒙古皆元後裔開國之初首先歸附錫土疏爵位冠通侯共球之會恭順惟謹此周秦漢唐所未有也誌其游牧各旗以見懷柔之遠而四衛拉特之在西域青海者亦悉載焉

一新疆衛藏爲純皇帝耆定綏輯之邦土沃泉甘比於內地戴德百年風俗龐厚今列其城郭條其山川撫御得人必能改鎮爲州可富可教永沐昇平之化也

一土司始於元明叛服不常著在前史雍正乾隆以來蹈德詠仁改土歸流者悉爲郡邑其餘苗獠獯狁罔弗讐慄今取嚴如煜三省邊防苗防諸書誌其方域比於微盧彭濮

一自列聖休養覆育戶口繁滋物產所生塵敷民食前哲屢言興中開平可以屯田本朝如富俊之於雙城堡林則徐之於新疆皆開荒興屯著有成效可知北地雖苦沙霾而川流所鍾皆滋灌溉按圖推類富庶可臻

一圖爲鳥道徑直之數行旅馳驅紆曲盤旋道里迴別然準以方斜之算則所較不多試取堅木以寸五分爲矩矩作十分則一分卽爲十里皇華星使任指津塗縱橫量之足得大略

一輿地之學先重準望唐宋之圖傳世絕少明人朱思本圖號爲致密然世亦罕覩地圖綜要總圖世云藍本於彼顧聲方旣狹位置卽易乖方今依布帛尺以一寸五分爲一方方爲百里庶幾準望不誤

一自康熙乾隆兩朝 內府輿圖外推近人李兆洛之圖爲最確然僅記府廳州縣之名而關塞要害諸小名皆在所略閱者不免茫然今自山川城邑以及險阨堡鎮巨細畢登以便討論

一李氏圖厯北至外喀爾喀東至朝鮮西至新疆後藏阿里而止今此圖北抵俄羅斯北海東至日本琉球西至泰西人所云地中海南至越南琛賚所萃盡日出入戎索方名靡不具列所以見 聲教之覃漸被之廣也

一地球渾圖仰同天體亦分三百六十度中國自赤道北十八里始每二百里爲一緯度今以北極出地度數旁記於圖之右方而赤道經度北狹南寬卽以虛線記於圖之上方以便稽考蓋敬遵 內府輿圖定式也

一顧祖禹自論其書曰按之圖書索之典籍亦舉一而廢百爾又言了了於胸中而身至其地反憤憤焉則見聞與傳聞異詞者之不可勝數也夫顧氏之書考鏡精密而其自言顧乃若是則是圖之漏略與疎舛其不免更可知矣惟是希賢有方終磨始琢經世之業先知後行要以斯爲權輿而非以斯爲究竟而已

察看福州海口船塢大概情形疏

同治六年八月

福建船政大臣 沈葆楨

竊臣於六月十七日馳赴馬尾蒞事業經奏明在案隨接見在事員紳咨詢一切並駕輪船周覽上下形勢知馬尾一區上抵省垣南臺水程四十里下抵五虎門海口水程八十里有奇自五虎門而上黃埔壺江雙龜金牌館頭亭頭閩安皆形勢之區而金牌爲最要自閩安而上洋嶼羅星塔烏龍江林浦皆形勢之區而羅星塔爲最要馬尾地隸閩縣踞羅星塔之上流三江交匯中間港汊旁通長樂福清連江等縣重山環抱層層鎖鑰當候潮盛漲海門以上島嶼皆浮潮歸而後州渚礁沙縈迴畢露所以數十年來外國輪船夾板船常泊海口非土人及久住口岸之洋人引港不能自達省城道光末年地方大吏籌備海防但載石鑿舟以塞林浦上流竟割重重天險而棄之巨詢之海濱土人至今猶共以爲非策也船塢在馬尾山麓地曰中岐但就其一方地勢而言大江在前迤南而下羣峯西拱狀若匡牀中間坦處舊本村田去年購買歸官始圖爲船塢計地周圍四百五十丈有奇客冬以來招集民夫窪者平之低者壘之慮田土之積弱難勝也沿塢密釘木椿以固之慮海潮溪汎之不時驟至也沿塢各增五尺以防之塢外三面環以深濠旣藉通運載之船亦可瀉積淤之水塢內濱江者爲船槽若鐵廠輪廠機器之廠斷木之廠架木之棧房皆參列其後餘尙有從前未經商定之件宜俟洋將到閩續行分別籌商措置塢外之東迤北爲臣及辦事各員紳公所外列外國匠房三十間周以甎垣如鱗之次外國匠房之左爲法國學堂後

綴生徒下處三十間其制略如匠房之式又左爲英國學堂其生徒下處同之下近江濟則煤廠在焉上倚山麓則中國匠房在焉循麓再上山之左肋可以眺遠臣飭前駐楚軍五百人因地築壘不特可攬船廠全局沿江上下數十里風帆沙鳥如在几前稍下則監督日意格所居也在臣公所之右者有外國醫生寓樓匠首寓樓其與日意格山樓對峙者則副監督德克碑之屋下爲官道將抵江岸劃爲官街以便民間貿易一切土木或已經完工或已有三四分至八九分不等辰下畚鍤雨集斤斧雲從計日課功屈指可數此船塢內外之大概情形也臣又惟船政根本在於學堂因於六月十九日就馬尾甄別法學藝童隨及英學藝童旣因其勤惰分別升降復定章程每日常課外令讀 聖諭廣訓孝經兼習論策以明義理其續招入局者先局門考校擇其文理明通尤擇其資質純厚者以待敘補蓋欲習技藝不能不藉聰明之士而天下往往愚魯者尙循規矩聰明之士非範以中正必易入奇袤今日之事以中國之心思通外國之技巧可也以外國之習氣變中國之性情不可也且浮澆險薄之子必無持久之功他日於天文算法等事安能精益求精益求密謹始慎微之方所以不能不講也採辦一節似易實難不患美材之難求而患人心之苟且向來官場氣習以浮冒搪塞爲能船政之興尤視爲利藪去年以來承辦銅鐵木料煤炭者非無其人然用商賈有時擾累之弊甚於官司用官司有時侵漁之端甚於商賈馴至劣幕

奸胥交通市儈鬼蜮叢生是以民間置貨尙有精良一屬公家便多廢鼎明知國帑之當重竟敢於糜國帑明知要工之不可誤竟敢於誤要工言之實堪痛恨臣邇又聞向來外國船材煤炭多運自緬甸暹羅現雖遣員先於近處採幹搜覈他日恐仍不免取材荒裔重洋遼迴更防不勝防任非其人糜費雖多仍歸無用擬乘此發令之初明罰勅法以警其餘人心畏法而後弊竇可除良材畢至也至船廠之興固須收羅工匠輪船下水則舵工水勇缺一不行非徒習慣風濤尤須熟精槍礮蓋國家之創造輪船譬諸千金買駿倘衝鋒陷陣不持寸鐵雖有千里之馬安足成功現在洋匠尙未至閩船成尙需時日擬先調閩中舊撤礮船十隻添練水勇二三百名未成船以前藉以巡緝近洋成船以後即可環甲登舟駕輕就熟此臣近日考校學堂分飭採辦及招募水勇之情形也至製造工程俟日意格等分載工匠輪機到廠後再行具奏除繪圖咨呈軍機處總理衙門外理合先將大概情形謹會同一等恪靖伯陝甘總督臣左宗棠福州將軍臣英桂閩浙總督臣吳棠福建巡撫臣李福泰恭摺由驛具奏以聞

設險守國論

吳曾英

嘗謂恃險失險二者均過昔者繇竹不守西蜀云亡成臯大峴不守前趙與南燕覆滅此有國者所深戒也九邊險要無過長城大道曰關小道曰口若偏關若甯武若鴈門爲外三關若居庸若紫荆若倒馬爲

內三關此外喜峯古北獨石以迄張家口殺虎口尤稱形勝王公設險於斯爲大況今南北一家內蒙古五十一旗外蒙古八十六旗悉隸典屬於烏里雅蘇臺有將軍於科布多有參贊於庫倫有辦事大臣均守在俄夷之交界或設鄂博或設卡倫或設柳條邊與西之葱嶺崑岡東之白山黑水遙遙鼎峙嚴密周防非前代以燕趙秦晉爲邊塞者可比然今天下大勢又在水不在陸自嶺南至遼左一片汪洋無復藩籬之限西國又用輪船電線呼吸相通幾似無險可扼而陰沙暗礁布滿大洋其落滌爛泥尾萬里長沙千里石塘等舟船向不敢近所可橫行直駛者止長沙門沙馬崎頭門及天堂門五島門而已此亦海國形勢天設之險以限中外者也竊謂海疆防守大局當分三路粵閩爲一路吳越爲一路燕齊爲一路粵閩最居險要西國之船由地中海駛蘇爾士而浮紅海印度海便是自亞丁錫蘭新嘉坡以抵香港廈門粵閩首當其衝三山五羊之間時虞侵軼所幸虎門廈門南澳海壇等島嶼環拱將弁星羅互相策應於南洋或可無慮耳燕齊外障朝鮮最要莫如登郡北與旅順對峙天然門戶北洋重鎮無過於是倘得大巨統轄三路復於廟島皮島之罘島等處添設礮臺層層控扼天津牛莊猶處堂奧也吳越財賦要區上海一隅尤四大洲總匯在通商十四口中最爲繁劇非但西國從香港來者趨之若鶩近且由大東洋取道日本從橫濱神戶長崎以徑入吳淞已別開生面防禦之謀云何得已伏思大江入海之口斜向東南

而東南島嶼以陳錢爲要害由陳錢而洋山殿前馬蹟大衢恍如驛傳昔人有言之者矣前明胡宗憲議設總鎮於陳錢分哨洋山馬蹟大衢據險而守以重江浙門戶洵碩畫也今誠參用其策創設東洋水師統轄江浙洋面兼募漁勇以聯舟會哨令聲勢上接遼陽下連嶺嶠未始非中權扼要思患預防之長策也至南北海疆之島嶼地廣而險如南澳大奚山各三四百里海壇玉環山周圍各七百餘里其他卽不甚相類而一二百里數十里者更不可勝數揆其形勢正天造地設之郡邑也乃沿海之沙洲島嶼極多而懸海之府廳州縣極少長此聽其荒廢棄而不守或永爲逋逃淵藪或如澳門香港被外夷垂涎占據可慮亦可惜如就幅員廣狹悉設郡邑大者分治數縣小者合治一縣俾小民開墾升科立子孫長久之業繭絲保障亦足兵足食良圖也古人云治險以狹又云一寸山河一寸金誠不可忽況今大海諸山皆饒魚鹽財用足以供賦稅裕度支卽使建置之初不無耗費錢糧斷不至如西域新疆歲需協濟且彼懸海人多强悍撫而用之悉洋防勁卒也沿海地皆回抱環以扼之卽海國長城也此其爲利於國家豈淺鮮哉

皇朝經世文續編卷七十三目錄

兵政十二 地利下

十三道嘎牙河紀略

胡傳

西行日記一則

馮煥光

富良江源流攷

范本禮

金沙江源流攷

黃楸材

鴉龍江源流攷

黃楸材

瀾滄江源流攷

黃楸材

檳榔江攷

黃楸材

潞江源流攷

黃楸材

禹貢黑水攷

黃楸材

恆河攷上

黃楸材

恆河攷下

黃楸材

經世文編

印度河

黃楸材

西域圖說

黃楸材

巨文島形勢

闕名

皇朝經世文續編卷七十三

上海葛士濬子源輯

兵政十二

地利下

十三道嘎牙河紀略

胡傳

甯古塔之南二百里有嶺曰老松嶺長白山北出之東幹也其嶺西接嵩嶺東分二支一支東北行山西之水曰斗溝曰馬連河曰馬楞河皆北流入瑚爾哈河山東之水曰穆楞河東北流入興凱湖一支東南行斜曲蟠繞以達琿春山東之水北流者入綏芬河東南流者入琿春河山西諸水會而爲嘎牙河南流入圖門江則俗所謂十三道嘎牙河水也甯古塔與琿春以嘎牙河爲界過老松嶺而南五十里曰駱駝磊子水又三十里曰哈密達水二水皆東流其相會入嘎牙河處相去不遠俗謂之三岔口順河而南三十里曰小荒溝口四十里曰大荒溝口又四十里曰汪清口皆在東岸爲山西諸水出山之口山中皆深箐老林以其在嘎牙河之東故俗又謂之東大山延袤四百五里種蔕打貂者百數十戶散處其間地廣林密而人稀盜賊因之爲穴窟光緒八年三月予奉欽差督辦大臣吳檄入山查察戶口地勢俗所謂十三道嘎牙河者遍歷其境得知其道里之大略焉一由三岔口過河而東十五里曰魚梁子又十五里曰

青溝又南過嶺十里曰二家子溝其東北過嶺曰二十里曰百層溝又東二十里曰樺皮甸一由小荒溝口而東二十里曰小荒溝營又東北三十里曰託盤溝又北二十里卽魚梁子由小荒溝營而西南二十里卽大荒溝一由大荒溝口而東五十里曰影壁磊子其東北二十里曰碭石河其西北二十里曰西大坡由坡而北五里曰柞木台又五里曰駝子道溝其東曰小東溝其北五里曰煮大米溝再北過嶺四十里卽二家子溝由影壁磊子而東四十里曰大荒溝上嶂其北過嶺十里曰小青溝折而西南過嶺二十里曰夾皮溝小青溝之南過嶺二十里卽小汪清溝一由汪清口而南十二里曰五人班折而東八里卽大小二汪清溝合流處由小汪清溝口入山三十五里溪尾溝水入焉又二十里曰城牆磊子又十里曰高家窩棚其北有道通大荒溝其東十五里分兩源東源約深三十里西源約深五十里由大汪清溝口入山四十里曰六人班又東四十里曰大歲子又東二十里亦曰託盤溝其南有間道達琿春之密站計七十里其北有間道至小荒溝之北源五十里由此至小汪清溝北入大荒溝過影壁磊子經柞木台北至二家子溝其北復有間道達甯古塔不過一百八十里各溝發源之處俗謂之七十二箇頂子其東卽綏芬河源皆窩集密集者 國語密林也再東二百里俗謂之老嶺水之北流者爲瑚布圖河水之南流者爲琿春河卽中國與俄羅斯分界處也各口入山二三十里間有一二耕者再入則皆種蔴打牲者之

所居山中蹊徑叢雜路路可通十數里之間忽緣山忽渡水忽踰嶺忽穿林變幻無定恆終日不見人跡其山水迫狹山石巉巖之處往往僅曲磴一縷其林之密者蒼翠陰翳罕睹天日幽僻隱奧爲自古人跡罕到之區故盜賊出沒其間而難於掩捕然細察窩集中凡隱隱有蹊徑可辨處其兩旁林木必有斧斤所斫之痕或一或二或三四以爲標記數十里連接不斷是以山中有道在樹上之說循此深入窮追必可得其巢穴之所在故并記之以爲後之捕盜者嚮導之一助云

西行日記二則

馮煥光

按汝水古本一瀆今截爲二南北異源不復通注今北汝河自會沙河東逕鄆城縣西東會渚潁諸水下入淮其鄆城以上古汝水也鄆城以下乃古大澗水經流東入潁者也今南汝水發源泌陽東北山厯遂平西平上蔡汝陽新蔡縣東南入淮其上蔡以下南汝水故瀆上蔡以上實古瀨水也漢志定陵高陵山汝水出東南至新蔡入淮水經注汝水出魯陽縣大孟山東南逕定陵城北右則潢水左入焉東南逕奇額城西北瀆水出焉世亦謂之方澗水又東南逕鄆縣北鄧城西懸瓠城北至原鹿縣故城西而南入淮以今地攷之則鄆城南境西平東上蔡西皆故汝水所經矣自故道中湮於是以鄆城以上會沙河者爲北汝至下流則遂蒙沙河之名以上蔡以下會瀨水者爲南汝其上源則并諱瀨水之目使考古者糾紛

不可理而究之郾城以上之北汝爲古汝水上源上蔡以下之南汝爲古汝水下流固曉然可見也向曾考索其說因途次所經故附及之

潼關古桃林塞杜氏曰桃林在宏農華陰縣東潼關是矣王氏曰自靈寶以西潼關以東皆有桃林自崤山以西潼津以南通稱函谷是桃林函谷又不以一地當之矣考秦漢二關及今潼關相距各數百里秦關在宏農班志宏農有秦函谷關今靈寶縣南函谷故關是也漢武帝元鼎二年從楊僕言移置新安今新安縣東二里函谷新關是也至後漢建安十六年始移函谷關於華陰故名潼關今關城是也蓋自洛而陝而華山谷阻深隔絕行路歷代置關地望不同而據險控扼則一矣

富良江源流考

甲申閏五月作

范本禮

自來言富良江者皆以瀾滄江爲上源而不知非也瀾滄之下流入越南者乃東埔寨河卽海國圖志所謂默南君河而今西人名之爲西貢河者也若富良江則今西人所謂紅河其上源乃禮社江而非瀾滄江也謹按 皇清通考四裔門由廣西雲南入交州之道皆必渡富良江蓋富良江亘交州之北爲越南東京之湯池故宋郭達次富良江而李乾德懼明張輔循富良江南下遂擣東都而 國朝乾隆時征安南許世亨夜渡富良江黎明遂入其都前事歷歷可證考近江西黃氏西徼水道言瀾滄江經車里孟龍

孟崙諸土司南流出滇徼入南掌國自發源至此歷五千餘里急溜奔瀧如銀河倒瀉舟楫罔通下游經
歷南掌暹羅五千餘里亦復如是夫急溜奔瀧舟楫罔通則瀾滄不可渡明矣黃氏西轡日記又言西貢
古日南郡卽安南嘉定省瀾滄江分晰多派從此入海是瀾滄江卽西貢河可知與海國圖志東南洋沿
海各國圖之默南君河正相吻合則瀾滄不在越南東京之北又明矣而以富良江爲瀾滄江可乎至魏
氏源以眉公河卽富良江則又不然考日本引田利章安南史言眉公河安南東埔寨呼之爲大河發源
於圖伯特之奧區高山激流過雲南老撾入東埔寨至南旺府分爲二皆入佛領交趾境佛領交趾卽南
境東埔寨地屬
於法合而爲一又分數流爲七大流入海則所謂眉公河者仍卽西貢河也蓋眉卽默南之合音君公亦
一聲之轉今粵人讀君若袁平聲海國圖志之默南君河眉公河實一河而二名乃瀾滄江非富良江也
考澎湖蔡氏海南雜著言河內省城卽古東京而前者法人流丕探道乃由紅河直抵河內近者法越構
兵法入亦道紅河以攻河內後又言欲與中國以紅河爲界割紅河以北屬中國以南屬法則紅河當東
京之北可知而安南史言紅河在東京雖一巨流其上游發源於中國又云在東京北部皆紅河下流之
砂洲也又云連山發於雲南亘紅河與眉公河之中間至海而止證諸海國圖志東南洋圖富良江在東
默南君河在西中界大山地望正合則富良江非紅河而何滇境大川之入越南境者瀾滄江之東爲禮

社江禮社江之下流至開化府界曰魯部河法人流不於同治四年由滇入越循紅河以探道正由魯部

河順流而下紅河至河內見光緒九年五月日報則富良江之上源非禮社江而何蓋禮社江即水經之葉榆河也

說本陳氏汪氏禮社江有二源東源曰白崖險江出雲南縣北梁王山西南流至縣北分爲二支一支東經城北

又東南流爲一泡江入金沙江即水經所謂屈從縣東北流者也水經於此下一支南流經縣西至蒙化

廳東而西源陽江出蒙化廳西北者東南流來會曰禮社江東南流經磬嘉廢縣北爲大廠河南經新平

縣斗門鄉南左納麻哈江東南至元江州北曰元江又東南經元江州東爲漢西隨縣地即水經所謂東

南出益州界入牂柯郡西隨縣北爲西隨水者也又東南經元江州東南爲漢進桑縣地即水經所謂又

東出進桑關者也又東南納龜溪河爲阿底江又東南至蒙自縣東南爲梨花江又東南入開化府界爲

魯部河又東南入越南界經河內省北東南分數支與普梅者賴等河會按漢地理志西隨縣水東至麋

麋伶入尚龍谿西隨在今元江州東都夢在今寶寧縣南麋水當即普梅河壺水當即者賴河尚龍谿疑即富良江也與正支皆東南流入海即水經所謂過交趾

蒼泠縣北分爲五水絡交趾郡中至南界復合爲三水東入海者也自酈氏不知經有脫文注乃多誤而

後人乃不知禮社江之即葉榆水矣安南列爲藩服中國人之至其境者未嘗詳究其水道乃不知富良

江之即禮社江下流惟魏氏源始言富良江之上源爲梨花江而又以眉公河爲富良江則亦誤耳噫越

南雖慕爾國誼則 天朝之藩屬也勢則南徼之屏藩也乃於其川流水脈導源於我中國者尙茫然不知由是各以臆度言人人殊靡所折衷不知窺伺者固已採地繪圖瞭如指掌也

金沙江源流考 西徼水道

黃琳材

金沙爲長江之遠源濫觴青海經流西南徼外南至滇中折而東北至四川敘州與岷江合凡五千餘里余別著江源考茲不復贅云惟是漢番譯語節節異名圖經志乘今古參差不得不參考互證衷於一是又支流別派匯納良多原委分合不可不辨明一統志金沙江卽古麗水源出吐番巴薩過拉木山譯言乳牛石也謂之犁牛河訛犁爲麗一名神川唐書南蠻傳貞元五年南詔異牟尋大破吐番於神川遂斷鐵橋溺死以萬計又西域傳多彌木西羌屬吐番號難磨瀆犁牛河土多黃金又地理志渡西月河二百一十里至多彌國西界又經犁牛河渡藤橋百里至列驛舊志指此爲古若水不知若水卽今鴉龍江也或謂此卽繩水按水經注若水經越嶲大笮縣入繩繩水出徼外山海經曰巴遂之山繩水出焉東南流亦爲二水其一水枝流東出經廣柔縣東流注於江其一水南流經旄牛道至大笮與若水合自下亦通謂之繩水矣明僧宗泐望河源詩自記云河源出自抹必力赤巴山番人呼黃河爲抹處犁牛河爲必力處赤巴者分界也其山西南所出之水則流入犁牛河東北所出之水是爲河源今自黃河源至金沙江

源僅三百六十餘里中隔巴顏喀喇山宗泐之言與今頗合必力處卽布壘楚聲相近也蒙古呼水爲烏

蘇吐番呼水爲楚或譯作楮故此江上流在青海境則稱木魯烏蘇至吐番境則稱布壘楚至巴塘則稱

巴賴楚入雲南麗江府境則稱麗水夫犁也魯也壘也賴也實皆麗之轉音非有異也沿江產金之區亦

在維西中甸境內此又金沙江之所由得名也舊說皆言源出吐番蓋唐宋以上青海氏羌諸部落悉併

於吐番耳據今之疆域則此江首尾未嘗涉唐古特界其上流凡五源俱在青海正源木魯烏蘇出巴薩

通拉木山卽犁牛石也東南流折而東北百餘里與西北源喀齊烏蘭木倫河合

源出勒科爾烏蘭達布遜山東流二百里折南

流百里又東南二百里入木魯烏斯

又東北三十里與西南源拜都河合

源出蠻箐中北流二百里入木魯烏斯

又東北百里左受一小水又

東六十里與南源阿克達木河合

源出阿克達木山從小海子東北流出折而西北屈曲三百餘里入木魯烏斯

又北流二十里與北源托克托

乃烏蘭木倫河合

源出錫津烏蘭托羅海山東南流五百里入木魯烏斯

又北流轉東百里有匝伯輝河自南來會

源出上格爾吉土司北流三百

里入木魯烏斯

又北流轉東二百里右受玉樹土司二支流又東南三十里有那木齊圖烏蘭木倫河西北來會

源出那木齊圖山谷東流七百里南入木魯烏斯

又南流百里左受庫庫烏斯及圖哈爾圖二支流又南流折東三百里右受齊

齊爾納河

有二源一出阿拉克碩土司東北流一出阿移尼喀察木山西北流合而北流入木魯烏斯

又南流轉東南四百里右受隆布土司一小水

此以上皆青海境也又南流經札武士司折東南至納奪土司入四川邊徼乃名布壘楚又東南經德爾

格忒宣撫司有支流發源春科土司南流二百里來會又東南至上瞻對左受一小水折而西南流至峪

納土司有多克楚河發源桑昂巴野番山寨西北來會又南流經瓦述國隴麻里諸土司又南流至上臨

卡石入巴塘境名巴賴楚河自納奪至此約七百餘里又西南經上下蘇阿三百里至牛古巴塘河東北

來入之巴河二源一出小巴冲西流三十里經巴塘民堡之旁一出上臨卡石之北南又南流六十里至

竹巴籠汎有渡船爲入藏之大道沿江兩岸皆懸岩峭壁水勢洶湧桑昂巴野番往往乘皮船順流而下

劫掠商旅又南流少西九十里至過隆又西南百餘里右受宗俄之水又南流四十里左受六玉宗雜之

水源出邦父木南流經東拉多不日又南流轉東南二百里經茶利大山入雲南維西廳界乃名金沙江

又東南二百里至奔子湍汎巴隆達河西北來會有渡船爲滇人入藏之大道或指爲古之蘭津非也又

東流五十里有交界河東北來會源出裏塘南流至耿中橋爲巴塘中甸之分界設有橋頭汎此河深廣

志有交界河折南百餘里經塔城關之東沿江兩岸土人多穴地取沙以淘金又東南百餘里至巨甸自

奔子湍以下水勢平緩兩岸多有村落田畝膏腴人煙稠密土人號曰摩梭爲六詔之一也又東南流經

石鼓營阿喜汎二百里至木筆灣折而東北環遶大雪山之三面南詔蒙氏僭封大雪山爲北嶽金沙江

爲四瀆之一中甸境內碩多岡河西北來入之源出中甸東北海子西南流至小又南流經永北廳西境

麗江縣東境左會無量河右受漾弓江

源出麗江縣東北大雪山南流經府治又南經鶴慶州折東入於金沙江

又南流至賓川州西境右受

枯木河

源出小浪穹土司

折而東下程海之水自北來答旦河自南來入之

答旦河發源賓川州南境北流至州治經雞足山又北少東入於金沙江

又東流至白鹽井右受泡江

源出雲南縣北界東南流轉北至白鹽井入金沙江

又東流少北左受泚那大羅二河合流之水又東

流與打冲河

即鴉龍江之下流

相會折南經紅卜苴土司左納二小水右受大姚河

源出姚州東北流至大姚縣又東北入金沙江又東

南流左納黎溪州土司一小水右受龍川江

源出鎮南州西境東南流經楚雄府治折而北會定遠河又轉東流歷廣通縣又東北至元謀縣又東北入金沙江

東流至白馬口車安河自北來

源出會理州東北境南流至州治又南受四小水又東南入金沙江

大環水從南來

源出勒品甸土司北流經環州土司入金沙江

並會又東經通安州土司轉東北至法戛會普渡河

源出昆陽縣西南境北流經安寧縣治東曰安寧河滇池之水自東來會又北流轉東北經富民縣治南

又東北與掌鳩河合

又東流會玉虹河

源出苦竹土司東南流受三小水入金沙江

折東北左受一小水又北流納會通河二

源俱出者保土司合而東南流經會理村折東入金沙江

又北流右納璧谷河

源出尋甸州西南北流轉西北入金沙江

又北流經會澤縣西境受以禮河

源出會澤縣南西北流入金沙江

又北流左納一枝河

源出阿都土司南流歷天久披沙諸土司轉東南至窪鳥入金沙江

又北流經木期古二十一寨至

巧家營與車洪江相會

源出嵩明州南嘉利澤名牛欄江北流合馬龍州之西河折東北歷霑益州西境名車洪江又北流歷宣威州西境又北流闌入貴州威寧州西界至索橋折西北

流入金沙江

又北流左右各受一小水又北流歷永善縣西境至黑米壳土司納一枝河

源出竹黑土司又北流經沙

罵土司折東北至千萬貫土司受一小水又東流經雷波廳治南又東經黃鄉蠻夷二土司至平夷受馬

湖之水

源出馬湖東流名石角河折南入金沙江

又東流至泥溪土司左右各納一小水又東經屏山縣治南又東流左右各

受二小水至安邊受大小紋溪之水

大紋溪源出魯甸廳合恩安之水東北流經大關縣治折東流入四川筠連縣界與小紋溪合又會定川溪東北流入金沙江一名橫江

又東北至敘州府城東與岷江相會此後不復稱爲金沙江矣自麗江至敘州里數未敢遽定其曲抱建昌之三面等諸河套李穆堂先生所云南北二幹如黻文亞字者是也約計二千五六百里自發源至此則已六千里而遙然山峽緊束急溜奔瀧怪石危灘不通舟楫至敘府以下然後帆檣絡繹水驛遠近枝派分合固昭昭在人耳目無俟重述焉

鴉龍江源流考

黃琳材

鴉龍江卽古若水水經注若水經越嶲大徭縣入繩而不言其源所從出一名西月河唐書地理志云渡黃河四百七十里至衆龍驛又渡西月河二百一十里至多彌國西界又經犁牛河按黃河犁牛河二水中間別無他水然則西月河當卽今之鴉龍江是矣其里數亦相合源出巴顏喀喇山東南名瑪楚河木魯烏斯經流山之陽星宿海正當山之陰其地爲青海部落固察土司瑪楚河東南流百餘里經稱多土司折南流四十里經拉布土司受一小水又東南流二百里左受二枝流右納三泊水三泊者南曰拉木錯泊中曰囊必泊北曰噶拉木泊相連如貫珠西北流入瑪楚河又南流百里經春科土司入四川邊徼

乃名鴉龍江又東南流左右各受一小水經蒙葛結土司又東南二百里右納雜楚河又東南百里有一

枝河發源青海卓克阡通拉山東北來會折南流百五十里謝楚河東來源出東鄂衣楚河西來源出林總

土司南流百里轉東南經霍爾百利甘並會又南流少西百二十里至納林冲左受一枝流有二源一出東暑一出綽

布斯甲西南流經瓦述更平霍又南流五十里右受楚穆河源出土占對東流四又南至上渡為喀木番

商運茶之道轉東南經喇滾土司而西南而南流三百里至中渡汎為進藏驛道設外委一員管理渡船

江之東為明正宣慰司所轄江之西為裏塘宣撫司所轄左納八角樓之水右納麻蓋宗之水又南流百

二十里至下渡入甯遠府界屈曲二百里至趕到底與打冲河會源出瀘沽湖東南流經左所合浪蕩鹽

來會東流入自此以下遂名打冲河又東經懷遠營折南流五百里至迷易土司與安甯河會源出冕甯

里南流經縣治東又南流二百里經府城西又南西南入於金沙江麗江府志指鴉龍江為古瀘水引元

史云水源廣而多瘴鮮有行者春夏常熱可燐雞豚諸葛武侯五月渡瀘即此水也元李景山云益州記

水經俱以瀘水在永昌不韋縣寰宇記以為在雋州會川縣景因出使越雋考瀘水源蓋建昌瀘川驛有

孟獲城又有瀘古州孔明渡瀘繇雋州入益州此名渡瀘為有驗余按鴉龍江上中下三渡在唐宋之世

為吐番入寇之道至於武侯南征由雋入益先逾大度河後渡金沙江不必經由鴉龍漢時雋州即今甯

遠永昌卽今會理雖置郡日久尙取道於馬湖其北路隔絕於旄牛國不能通也

瀾滄江源流考

黃琳材

後漢顯宗時通博南山道渡蘭津行者苦之歌曰漢廣德開不賓度博南越蘭津渡蘭滄爲他人蘭滄之名始於此水經注華陽國志皆不能考其源滇志瀾滄江源出吐蕃嵯和歌甸之鹿石山一名鹿滄江一曰浪滄江南入大理府雲龍州界接嵯和歌甸卽今察木多之轉音也明人李元陽著黑水辨史秉信著岡春黑水辨俱以此爲禹貢之黑水元陽云瀾滄潞江皆由吐蕃北來蓋與雍州相連水勢並洶湧皆入南海然潞江西南趨緬中內外皆夷其於梁州之境若不相屬惟瀾滄由西北向東南徘徊雲南郡縣之間至交趾入海今水內皆爲漢人水外皆爲緬夷則禹之所導於分別梁州界者惟瀾滄足以當之元史至元二年大理勸農官張立道使交趾並黑水跨雲南以至其國觀此則瀾滄江之爲黑水益彰彰明矣後人駁之謂瀾滄源近難界雍州又絕無黑水之名不如潞江源遠而本有喀喇烏蘇之名爲可據也夫瀾滄潞江二水並發源於藏地東南流入雲南維西廳界相距甚近中隔一山南流至永昌以下乃復分開潞江折向西南由緬甸以注南海瀾滄折向東南經順甯潯洱由南寧暹羅以注南海論其首則潞較遠於瀾滄論其尾則瀾滄又倍於潞其遠近大小無所區別彼此各執一辭迄無定論二者皆可指爲黑

水其實二者皆非禹貢之黑水也禹貢之黑水惟雅魯藏布江足以當之余別著論今不復述姑就瀾滄

之原委與所納之支派詳考之按衛藏圖志瀾滄江二源一源發於匝坐里岡城西北一千餘里格爾吉

匝噶那山名匝楚河

匝楚河源出青海格爾吉土司東南流二百餘里折南受二小水又東南三百餘里經隆慶土司又東南三百餘里至洞巴士司左右各納二小水折南流少西入喀木

界又西南流二百里至察木多寺左

名曰昌河有四川橋爲通蜀之大道一源發於匝坐里岡城西北八百餘里巴喇克拉丹蘇克山名鄂穆

楚河

鄂穆楚河有兩源一出拉爾古東查山一出索克布索克謨山東南流二百餘里二水相合名鄂穆楚又東南三百里至俄洛橋爲入藏之大道又東流四十里至察木多寺右名曰都河有雲南橋爲

通滇之

俱東南流折而南至匝坐里岡城東北三百餘里察木多廟前二水合流名拉克楚河唐書地理

志經犁牛河度藤橋百里至列驛又經截支川四百四十里至婆驛乃渡大月河羅橋準以今之地望及

西甯進藏驛站所謂截支川大月河者卽昌都二水之上流也拉克楚河南流百四十里至包敦入乍了

界又南流二百里至兄衣折而西南二百餘里至撒金拉復折而東南二百餘里至察瓦寺有甲倉河東

北來會

甲倉河源出官角西南流經草里工又西南至洛加宗合洛楚河又西南至乍了寺前與猛楚河合猛楚源出打仔西南流經哈甲峽口又西南至噶噶折南流經昂地雨撒與甲倉河合而西南

至察瓦岡入

又東南百餘里左受色爾恭河

色爾恭河源出桑昂巴西南流至阿足合上春朋之水又西南入於拉克楚河

克楚

折南流入江卡境百餘里至角占有左貢河西北來會

左貢河源出喀木雜楚庫工山之南麓二海子名雜楚河東南流至梭羅橋又東南經左

貢境轉東流

番商運茶之道由此過皮船渡或有緊急之事則用溜筒渡之故土人皆呼曰溜筒江云又入於拉克楚河

東南流三百餘里至鹽井土人取水傾注碓樓之上少頃風乾成鹽河東之鹽色白河西之鹽色紅或謂蠻鹽性熱食之多喉病是以番民男婦往往項負贅疣者十居六七蓋未經熬煉之生鹽且攪雜不淨也拉楚河又東南流三百里經茶利大雪山入雲南界始名瀾滄江又東南經阿敦子爲滇人進藏之大道設有稅卡又東南流三百餘里經塔城關折南流二百餘里經維西廳西境又南至蘭州土司東別爲沱曰漾濞江東南流至上江觜土司左受劍川河又南流經浪穹縣西境至漾濞巡檢司左右各納一水有鐵索橋廣八丈又東南至合江鋪受大理洱海之水轉西南流經蒙化廳境受永平勝備河之水南合於瀾滄江瀾滄正幹由蘭州西南流五百餘里至雲龍州治西納泚江之水又南流少東二百餘里至霽虹橋兩山壁立聳拔千仞因石基以建橋鐵經十六上覆平板廣十有五尋摩崖多壁窠大字皆明以後款識有殘碑云 國初平西親王進剿金齒李定國拆斷此橋我軍編筏以濟事定之後親王乃捐貲重建後又改名永濟橋端設有稅局釐卡按永昌爲漢博南道疑此卽古之蘭津也控馭諸蠻最扼形勝又東南流二百餘里受永平銀龍江之水經順甯府北境合漾濞江折南流經營州東境順甯之水自西來會又南流轉西南經孟戛孟班諸土司境右納耿馬河左受威遠江又東南流左右收二小水至孟養土司名曰九龍江又東流折南經車里孟龍孟崙諸土司羅梭江自東北來會從此南流出滇徼外入南掌國

自發源至此歷五千餘里兩岸皆崇岡疊嶽無一隙之坦途急溜奔瀧如銀河倒瀉舟楫罔通下游經歷南掌邏羅又五千餘里亦復如是

潞江源流考

黃琳材

舊說西番之西大流沙之南湧出一澤名曰嘉湖南流爲潞江明一統志潞江一名怒江源出雍望經潞江安撫司之北蒙氏僭封爲四瀆之一衛藏圖志云潞江發源於衛地之布喀大澤淵澄黝黑又多伏流蒙古呼黑爲喀喇水爲烏斯故名喀喇烏斯以此爲禹貢之黑水則名稱猶舊較之指瀾滄葉榆爲黑水者猶略有依據也今考圖經前藏拉薩北二百八十里有池名曰布喀橢圓形廣六十里袤一百五十里從此池西北流出百餘里入額爾吉根池轉東北流八十里入集達池又折東南流八十里入喀喇池三池俱縱廣五六十里中有二山四池環抱其外不合如玦復從喀喇池東南流出四十里納布倫河

一統志布倫河在喀喇池南一百五十餘里東有工噶巴噶馬山之哈拉河魚克山之魚克

又東流五十里受北來河俱西北流百餘里與西南來之說木池水合又東北流五十餘里入喀喇烏斯

之二小水折南轉東流二百里至喀喇烏斯爲西甯進藏大道皮船爲渡轉東北流經蒙古三十九族地

境三百餘里至伊庫山有沙克河西北來會

一統志布克沙克河源出拉薩北七百餘里喀爾占古察嶺南流三百餘里西合都回山之水名沙克河又東南流二百

四十里西受庫蘭河北受布喀河又東南流百餘里入喀喇烏斯按圖經布喀河與索克河合流未知孰是又東北流二百里經蘇魯克土司有索克河自北

來會一統志索克占且滾河源出伊克諾莫渾烏巴什山數水合而東南流二百餘里西南有巴漢諾莫渾烏巴什嶺布喀山樺漢峯流出之四水與此相會歷兩山間入喀木地又流二百餘里入喀喇烏斯

斯折南流二百里左右各受一小水轉西南百餘里會衛楚河源出伊庫山三溪合而南流二百餘里東納一溪西納二溪折東南入於喀喇烏斯

折而東流左受二溪右受一溪八十里受雄楚河源出達爾宗城南三海子相聯如貫珠東北流出百餘里經拉子山左右各納一溪轉東流二百里入喀喇烏斯

斯又東流二十里左受一小水右納碩布楚河源出中義溝北流經碩般多城西合三溪而東北流二百餘里入喀喇烏斯又東流六十里納

沙隆錫河源出洛隆宗西南海子北流轉東南流三十里有類伍齊河自北來會又東南經必蚌山至嘉合一溪六十里入喀喇烏斯

玉橋爲滇蜀入藏之大道又東南流七百餘里江之陽爲巴克碩游牧江之陰爲波密野番又東南會鄂

宜楚河一統志源出匝坐里岡城北三百里納蘭嶺南流四百餘里至家拉穆地入潞江又東南流經桑昂曲宗入江卡境江之外悉爲怒夷故

名怒江又東南三百餘里入雲南維西廳界折而南下經雲龍州西徼右納猓江源出猓夷山寨故名江之外皆猓

怒諸夷及貉獠野番人迹不到歷六百餘里入保山縣界乃名潞江南流經潞江安撫司兩岸稻田平衍

二十餘里俱獠夷耕種河寬二十數丈建鐵索橋往往怪風陡起鐵絙齊斷橋端墟場五日一集薪棚

子大半漢人四月以後頗有瘴癘漢人皆散去凡過此者必策馬前進不敢停留也獠夷多居於山頂男

婦勤力耕作遠勝藏番矣潞江又南流少東百二十里左納沙河源出保山縣東北清華海南流經彎甸土司鎮康河自南來合而西流入潞江

轉西南百餘里至遮放土司從此出滇境流入緬甸國名曰撒路音江南流百餘里與南江會源出順甯所屬猛緬

土司南北二溪合向西南流三百餘里經耿馬孟定諸土司出緬甸國又西南入於潞江又南流八百里闌入南掌暹羅二國邊隅轉西南三百餘里

入麻場班昔屬緬甸今爲英人佔踞又南流四百餘里至摸兒緬注於南海其地舟車輻湊爲通商馬頭潞江自入緬境以來左右所受支流大小凡十有數水其名不可得而悉考也

檳榔江考

黃琳材

檳榔江之源自來無考或云出後藏阿里岡底斯山蓋誤以雅魯藏布江爲檳榔江也中西地圖皆從騰越邊徼繪起而略其上源蓋隔絕於野番山寨人迹罕到無從揣度然准以地望考其道里尋其山川之脈絡知雅魯藏布江之爲大金沙江則界限分明徼外諸水自有條而不紊矣今考雅魯藏布江之東其間源遠而流大者惟薄藏布河一統志誤以薄藏布河爲龍川江之上源於是不得不以雅魯藏布爲檳榔江西人地圖則誤以雅魯藏布江連於亞山之蒲蘭蒲達江故以薄藏布河爲大金沙江之上源或一水而誤分爲二或二水而混合爲一原委錯亂彼此歧異迄無定論皆以意爲之不能考其實也一統志薄藏布河在薄宗城南二里有二源一源發於薄宗城東北三百餘里春多嶺名鴨龍河合六水西南流一源發於薄宗城西北五百餘里東拉嶺名厄楚河合十餘水東南流至薄宗城前二水合流名薄藏布河西南流經噶克卜部落及羅克卜札所屬之門布部落入雲南騰越廳界衛藏圖志前藏拉里之桑楚

河左右二源合而南流百餘里有阿咱山灣常多甯多四水合而自西來會又南流轉東南百餘里衛楚

河東北來會

源出郎吉宗西流經阿南多甲貢受二小水轉西南流入桑楚河

又東南流二百餘里左右各受二小水至薄宗城前與鴉

隆布河會

即鴉龍河源出春多嶺南流經波密野番合四小水西南至薄宗城入桑楚河

乃名薄藏布河南流經刷宗城折東南經貉翁野番及

茶山麻里至古永隘入騰越廳界沿江設有七十二練卡折西南經展西猛豹隘至干崖宣撫司與騰越

之大盈江會

源出騰越廳北境之清海北海西流折南至廳治西轉西流至小河底左右各受一小水南經曩宋關折西流經南甸宣撫司又西流至干崖合檳榔江

至此地勢開曠

水流平緩寬至數十百丈不等土人呼爲海珀江沿江兩岸皆平疇沃衍頗有富庶之象西流六十里至

蓋達宣撫司蓋達河自北來會又西流經弄璋街六十里至蠻允又二十餘里戶宋河自北來戶撒臘撒

諸水自東來入之又西流經鐵壁關兩岸皆野人山寨出沒無常劫掠商旅有紅奔河自東北來入之自

此以西爲緬甸國境地勢平洋豁然開朗另是一番景象矣至蠻慕有漢人街臨於河干三十餘家爲寄

頓貨物之所天氣炎熱暮春之初無異內地盛夏兼之蠅蚋叢集煩擾可厭緬人刳木爲舟聯二舟爲一

覆以草蓬駁運棉花西行百數十里至新街合於大金沙江騰人商於此地者三百餘家建有關神廟緬

地皆板屋獨此爲甎瓦頗爲軒廠緬國設有蘊凡一員英吉利設有亞葉板一員火船至此而止每月往

來兩次檳榔之北有曰札賴江一名麻里江自東而西經流巨石萬仞銅壁諸關之外首尾六七百里亦

至新街合於大金沙江

禹貢黑水考

黃琳材

禹貢華陽黑水惟梁州黑水西河惟雍州周文安辨疑錄云甘州志甘州之西十里有黑水流入居延海肅州之西北有黑水東流遐遠莫窮所之是其源出雍州之西流入梁州之西南也唐樊綽以麗水爲禹貢之黑水云與瀾諾江合經缺國東入南海程大昌疑其源流狹小不足以合雍梁二州疆境然今麗水自與岷江合經流中國注於東瀛不入南海也明人李元陽著黑水辨史秉信著岡春黑水辨俱以瀾滄江爲禹貢之黑水元陽云瀾滄潞江皆由吐番北來蓋與雍州相連水勢並洶湧皆入南海然潞江西南趨緬中內外皆夷其於梁州之境若不相屬惟瀾滄由西北向東南徘徊雲南郡縣之間至交趾入海今水內皆爲漢人水外皆爲夷緬則禹之所導於分別梁州界者惟瀾滄足以當之元史至元二年大理勸農官張立道使交趾並黑水跨雲南以至其國觀此則瀾滄江之爲黑水益彰彰明矣至若以潞江爲黑水者則因上流有喀喇烏斯之名蒙古語稱黑爲喀喇水爲烏斯近人多宗之一統志衛藏圖志皆主是說惟張機黃貞元獨指大金沙江爲禹貢之黑水張機曰大金沙江發源崑崙山西北吐蕃地卽禹所導黑水也雖與雲南小金沙江及瀾滄潞江皆發源吐蕃然大金沙江之源較三江最荒遠其下流亦十倍

於三江之水雲南志載大金沙江出西番流至緬甸其廣五里得非黑水源出張掖流入南海者乎黃貞元曰大金沙江瀾滄三水雖皆入南海大小遠近迥不同瀾僅滄四分之一大金沙江十倍於瀾滄瀾滄所出地名在鹿石山在雍望俱可窮源上源亦狹大金沙江上源相傳近大宛國自里麻茶山至孟養極北不聞有所往號赤髮野人境峭壁不可梯繩弱水不任舟筏土人惟遠見川外隱隱有人馬形殆似西羌之域也或駁之云此水雖大但遠在西南荒徼外與雍梁二州之境杳不相屬余按徼外諸水瀾滄二者其源流遠近大小彼此均同無所軒輊俱發源於前藏東南流經江卡二水相距甚近南流至永昌以下乃分開一向西南趨緬甸一向東南入暹羅論其源則滄遠於瀾論其委則滄瀾又大於滄安得舉其一而遺其一乎禹貢三言黑水至于三危入于南海爲正文夫禹治徼外之水必擇其最大者而施功康熙五十八年上諭禹貢導黑水至于三危舊注以三危爲山名而不知其所在朕今始考其實三危者猶中國之三省也打箭爐之西南拉里城之東南爲喀木地達賴喇嘛所屬爲衛地班禪額爾德尼所屬爲藏地合三地爲三危耳夫瀾滄二江僅涉喀木之境惟雅魯藏布江發源阿里遍歷後中前三藏之地五千餘里折而南下經緬甸國又五六千里注於南海首尾萬餘里大小枝流匯納數百水勢浩瀚無與爲匹實西南徼外第一鉅流然則禹貢黑水舍此更無足以當之者後儒拘於疆域以去

雍梁二州太遠爲疑不知西北諸胡迄於流沙皆統於雍州西南諸夷盡於南海皆統於梁州是以天文

井鬼爲梁州分野而西羌吐蕃吐谷渾及西南徼外諸國皆占焉卽如今時西藏統於四川駐藏文武關

防悉冠以四川二字豈得謂川省疆域無此荒遠哉唐書吐蕃贊普居跋布川或邏迤川地理志跋布川

在邏迤川西南渡藏河乃至其地卽今之雅魯藏布江是也源出藏之西界卓書特部落西北三百四十

餘里打木朱克喀巴珀山東流百餘里左納嘉克嘉河有四源合而南流入雅魯藏布江又東流受一小水又東流四十

里烏克藏布河東北來會一統志在卓書特西南三十里源出東北桑里池西流二百五十餘里北受尙里噶巴嶺木克龍山流出之二水南受拉主客山祖倫山羊巴木山流出之三

水由羊巴木嶺西轉南流八十餘里又受西北牙拉嶺達克龍山流出之二水又南流六十餘里入雅魯藏布江轉東南流五十里郭永河西南來會一統志在卓書特部

落東南源有四一出昂則嶺北名龍列河一出蓋楚岡前山名蓋楚河一出塞丹山名朱克河一又東流

出拉魯岡前山名拉出河俱東北流二三百里合爲一水又東北流六十餘里入雅魯藏布江

十餘里右納蘇穆朱池流出之水又東流八十里右受作噶爾河左受薩楚藏布河一統志在薩噶西南一百餘里源出岳圖

岡阡諸山流出六水俱南流百餘里會爲加巴闌河又南流五十里其西北有拉祖克祖楞羊巴木山流

出之三河西南有昂色昂勒宗山流出之二河俱流入加巴闌河東南流又折西南與東北查薩公噶爾

他拉山流出之二水西南捏木出六色立羊古山流出之二轉東南二十里會翁楚河一統志在薩噶西

水會爲薩楚藏布河又西南流七十餘里入雅魯藏布江

四一出西南查木東他拉泉一出岡克馬爾他拉泉一出正南那木噶山之北一又東流十餘里滿楚藏

出東南他克拉泉俱北流百餘里合爲甕楚河又北流二十餘里入雅魯藏布江

布河自北來一統志在薩噶西南北有斜爾充山放龍山流出二水南流二百餘里東有岡充查達克山

流出三水西有拉克藏卓立山流出一水六水合流爲滿楚藏布河又東南流四十餘里入

雅魯藏布江 式爾的河自南來一統志在薩噶西南一百餘里源有二一出西南沙盤嶺一出正南舒拉嶺一

並會又東流四十里右受薩布楚河一統志在日喀則城西百八十里源出城南楚拉米洪羅綽爾莫三

自西南來名桀河一自東南來名當出河合爲又東流經宗喀折而北流三十里左受薩爾格河一統志在薩噶

薩布楚河北流一百二十餘里入雅魯藏布江東南其水出於拉布池西南流四百餘里東有拉布岡允山流出一水西有拉沖溫必普達克拉克諸山

所出八水分流與拉布水會名薩爾格河又南流三十餘里東有薩出河西有魯河俱匯於此西南流三十餘里轉東南流百二十

里入雅魯藏布江又北流折而東二百四十里至列克隆受一小水源出舒爾轉東南二百五十里

至札布桑堆左右各受一水折而東北八十里至章拉孜爲四達之孔道又北流轉東經科頗拉日東巴

受二小水二百里至嘉湯有達克楚河西北來會一統志源出章阿布林城西北一百八十里札木楚克

克楚河又東流一百八十餘里至穆克布查克薩木馬橋北折而東北經彭錯嶺八十里至花寨子左受

受北來之鄂宜楚河又東南流六十餘里入雅魯藏布江

結特楚河又東北流轉東六十里經得爾敦廟前北受鄒索克布山之水南受當楚河有二源出於九山

至塔克相合又北流經人進孜百二十里至那爾湯東西又東流經後藏札什倫布之北八十里至拉古

各受一水又北流經岡堅寺東八十餘里入雅魯藏布江

會年楚河一統志源出朱母拉母山及順拉嶺北流二百餘里合而爲一名章魯河又北流八十餘里至

娘娘廟東有八小水從東北來合流入此河又經江孜城南折西北流六十里過人進岡又西北七十里至巴浪城之西有二水從西南來亦入此河始折東北而東南流百五十里至年木哈達商河

噶木巴拉嶺北入衛地左納宗木湯之水又東流八十里至甲馬卡左右各受一水又東流八十里經烏

裕克林哈城南受一小水又東流七十里至曲水喀爾招木倫江自北來會水道提綱雅魯藏布江經楚舒爾城南又東南至日喀爾

公喀爾城北有喀爾招木倫江自東北合諸水西南流經衛地拉薩來會疑即古吐蕃之藏河也喀爾招木倫江源有二一曰米底克藏布河出墨竹工卡城之東北三百里米底克池西南經蓬多城東北而西

南一源來會曰達穆河出蓬多城東北二百里之查里克圖嶺二源既合乃名喀爾招木倫江又東南流受西來二水之合東注者又東南折而東流受北一小水又東折而南而西南百里又折而東百數十里

經改那嶺北又東乃折而東南受東來噶拉嶺水乃西南流過鄂納鐵索橋又南經墨竹工卡城西又南折而西曲曲百餘里經噶爾頓廟北又西經第巴達克城南又南稍西有一河西北自溫主普宗城合

三水東南流來會又南數十里經得慶城北又折西流曲曲經拉薩之南即唐時吐蕃國都今爲達賴喇嘛所居也又西北流十餘里至董郭爾城東南受東北來一小水又西南流數十里經日噶牛城北有羊

巴尖河合楚普河自西北合四小水東南流三百餘里來會又南流八十里折西南流受西轉東南流左北來二小水又西南經楚蘇拉城東南又西南至日喀爾公喀爾城之北合於雅魯藏布江轉東南流左

右各受四小水二百五十里至奈布東城折南流百餘里經桑里城西南野爾占城東北左右各納一水

轉東南四十餘里有鄂噶達克薩之水東北來入之又東南流六百餘里至工布澤布拉岡城南與匝楚

藏布江會水道提綱作年楚必拉江源出沙羽克岡拉山即喀爾頓廟東南山也有水東流三百里曰馬木楚河與南來巴拉嶺之巴隆楚河會又東北百里與北來烏山之烏斯江會又東經鹿馬嶺

百八十里至順達有水曰佳囊河發源過拉松多東南流經江達城東折而南流合東二小水來會又東南曲曲流三百里至工布什噶城南有水東北自巴麻穆池南流合東一水而西南流來會又東南折而

西南有西來齊布山之牛楚河合而南流經工布珠穆宗城東流四十里底穆宗河北來入之又東流少

東底穆宗城西又東南至澤布拉岡城東合於雅魯藏布江

南五百餘里出唐古特界入貉貊野番境其間道里無可考大約東南流千有餘里然後折而南下至孟

拱之東北入緬甸國境蓋自金沙江之西雅魯藏布江之東江卡之南騰越之北中間縱廣千有餘里羣山週遭衆水蒼萃若瀾滄若潞江若龍川若檳榔皆發源藏地東南流至此緊束各隔以一山相距不過數十百里之遙其附近潞江者有怒夷俅夷二種時與外人相通稍具人性至於內山貉獠野人則以樹皮木葉蔽體蛇蟲鳥獸爲糧見人則攫而生啖之衛藏圖志所謂戮殛烏爾魯兔族是也曠古以來路徑不通人迹罕到是以諸水原委錯亂首尾混淆異說紛歧迄無定論西人地圖誤以雅魯藏布江連於亞山之蒲蘭蒲達江併誤以大金沙江爲潞江於是海國圖志遂謂大金沙江下游與恆河會而入海移緬甸之江於東印度混二水爲一水豈知大金沙江經流阿瓦都城再南流至跋散入海西北去孟加拉之恆河五六千里何緣相會乎且孟拱孟養西北一帶崇岡疊嶂聯綿千餘里山陰之水悉匯於蒲蘭蒲達江山陽之水悉匯於大金沙江界限分明絕不相蒙山勢經孟奈布爾部落至俺來刊卽古柯枝盤盤等國蜿蜒南下直達跋散海口今山外皆英吉利屬部山內皆緬地又大金沙江者乃滇人之所名對麗江之小金沙江而言也滇人經商皆在緬甸境內無一至印度者此乃西圖之誤中土從來無有言大金沙江會恆河者也顧西人地圖未敢遽指爲實但用點綫連之亦缺疑之義云爾去歲在大理府城有法國教士出示地圖則以雅魯藏布江連於大金沙江蓋其人久居滇中往來蠻方緬地多次確知非雅魯藏布不足當

大金沙江之上源也此江既定而後微外諸水有條不紊矣雅魯藏布江南流入緬甸東北界緬人稱爲

伊拉瓦底江轉西南流千餘里孟拱孟養二水合而西北來會又南流百餘里麻里河東北來會又南至

蠻幕新街合檳榔江自此以下地勢平曠水流漫衍寬七八里或十餘里不等按新街卽趙宏榜所敗績

處正統中蔣雄率兵追思機法爲緬人所壓殺於江中亦此江也郭登自貢章順流不十日至緬甸者亦

此江也轉西流而西北百數十里至磨太折而西南經老官屯百餘里至格沙龍川江自東來會又南流

而西南至滅未微切碕西岸見有岡阜綿亘數十里有一水自北來入之又南流左納二小水及磨打河又

南流至阿瓦城東北有抹能河自東來會源出木邦西南流合四小水至阿瓦城東阿瓦城之東五里曰

安拉普那城滇人居此者三千有餘多娶緬婦爲室東北十里曰孟得俐城乃緬王所居環以木柵自新

街至瓦城約計千有餘里伊拉瓦的江環遶三城折向西流少北百餘里有磨河北來入之轉西南流百

餘里有更的宛河西北來會源出孟拱北境西北流合十數小水而西而西南千餘里合東北之呵洛河

布爾河自北來抹打河自南來二水合而東北流來會又屈曲南流江中有大洲水分爲二南流六十餘

里復合爲一折而西南而南而東南左右受十數小水至捫納爲緬南界設有蘊几一員從此南流入英

國境至別牟一作別羅模爲大馬頭商賈雲集有火車鐵路一日可達漾貢輪船水程則須三日也自此以後

江愈寬流愈鉅輪舶往來絡繹兩岸多建洋樓曲曲南流分爲數派其正幹則折向西南由跋散以入海故又稱曰跋散江云東南分一枝至漾貢爲海濱一大都會英吉利有巨酋鎮此閩人商於其地者不下萬人粵人亦有數千滇人則僅十數家而已自瓦城至漾貢輪船水程凡八日約計二千四五百里按英人所佔緬地廣袤千數百里卽昔之祕古國也田土膏腴物產豐盛其民多文萊族唐人所謂巫來由是已道光初年英緬構兵兩載英軍水土不服往往挫衄本欲退師反聲言水陸並進直擣阿瓦緬王大懼乃割地請和併償兵費九百萬夫元明以來中國屢次用兵於緬俱不能得志而英人取之顧易如反掌何也中國由雲南出軍山路崎嶇轉餉甚勞兼之時值暑雨瘴疫多病蠻慕新街一帶今時猶然每至四月以後則商旅絕迹必待秋涼而後可行英人印度之地與之毘連輪船航海溯流而上勞逸迥殊緬人水師戰船非英之敵所居皆板屋環木柵以爲城尤不足以當西洋巨礮是以日侵月削沿海精華繁盛之區蠶食殆盡元代征緬亦以舟師制勝然必至新街臨時造舟亦非倉猝可辦也魏默深嘗言造舟藏地從雅魯藏布江順流而下可以直攻印度此因誤以蒲蘭蒲達江爲藏江之下流故也然藏地河道怪石森立奔濤倒瀉豈能通行舟楫故滇省全境如金沙瀾潞諸水雖經流數千里不聞一葦之可航非若三江兩湖地勢三百里水源卽可鼓枻而占利涉也坐一室而談九州不知天時地利之懸殊事勢情形

之各別遂有此臆度之論何異扣盤捫燭之貽誚乎或謂禹貢之言黑水實有三流非一江也出居延海者爲雍州之黑水瀘爲梁州之黑水此大金沙江則三危之黑水也必欲合三者而一之求其貫穿二州遍歷三危則徼外實無此水且雍州在中幹之外隔於南山故水皆北注無緣南流夫考古證今未可拘文章義分之則通合之則窒要惟實事求是而已

恆河考上

黃琳材

印度凡三大水西爲印度河東爲蒲蘭蒲達江而恆河橫貫其中自西北而東南地勢平行支派甚多番名安治士河一作安額或作婉伽印度人稱爲聖水浴之可以湔洗畢生罪過佛經凡言恆河者皆指安治士河也中土之人稱印度河爲西恆河安治士河爲東恆河實則恆者安之譯音也印度河或譯作新頭河一作信地河初無恆河之名也水經注及康泰扶南傳於二水之源流往往混亂不能區別蓋皆得之請經求法之僧傳聞異詞轉展繙譯莫道其詳海國圖志恆河考二篇誤以安治士河與印度河同出一源至中印度以下乃分爲二流不知印度河有五大源皆西南流匯而入海安治士河有三大源皆東南流匯而入海宗派各異趨向殊途中間隔於千餘里之砂磧尙有數小水自北而南至砂磧而伏流兩無所歸者且砂磧地高水易滲洩安治士河之水何緣飛越而過與印度河同源乎此上流之牽合兩源

爲一源其誤一也又謂安治士河之下流與大金沙江會而入海則竟以亞山之蒲蘭蒲達江爲緬甸之
大金沙江豈知大金沙江之上源卽西藏之雅魯藏布江東南流入緬境經阿瓦都城再南流數千里分
爲數派至漾貢跋散等處而入海距孟加拉五六千里中間隔於孟養阿拉干一帶之崇岡疊嶽大金沙
江之水何緣飛越而過與安治士河會流乎此沿西人地圖之譌指鹿爲馬不知大金沙江與蒲蘭蒲達
江原委各別形隔勢阻混合二水爲一水其誤二也又言懸渡在巴達克山西境愛烏罕東境恆河蓋貫
二部而南經克什彌爾之東按印度河經流克什彌爾西境非東也豈知懸渡乃由于闐往北印度之道在葱嶺之東南晉

法顯從于闐進向子合國在道二十五日又南行四日入葱嶺山到於磨國安居行二十五日到竭父國

國當葱嶺之中從此北

北疑西之訛

行向北天竺在道一月得度葱嶺冬夏有雪又有毒隴疑毒龍池之訛度嶺已到

北天竺始入其境順嶺西南行十五日崖岸險絕石壁千仞下有水名新頭河昔人鑿石通路及度七百

傍梯已躡懸絙過沙河兩岸相去八十步渡河便到烏菴國是正北天竺也北魏僧惠生從于闐歷朱駒

波國又南行入渴盤陀國界西行六日登葱嶺山復西行三日到鉢孟城三日到毒龍池自發葱嶺步步

漸高如此四日乃得至嶺依約中下實天半矣渴盤陀國正在山頂自葱嶺已西水皆西流入西海世人

云是天地之中九月中旬入鉢和國十月初旬入嚴達國十一月中旬入賒彌國漸出葱嶺磽确危峻人

馬僅通鐵索懸渡下不見底十二月初旬入烏場國北接葱嶺南連天竺云云按法顯惠生同出一途由于闐而南踰葱嶺以達於北印度是以道里遠近及所經國名大略相同竭父卽渴盤陀於摩卽朱駒波又烏菟烏場一也准以地望蓋在克什彌爾之東境古今譯音各別耳傍梯卽偏橋棧道懸渡卽溜筒鐵索三藏之地及滇蜀徼外所在多有至若唐元奘之使西域與元邱長春之詣雪山行在則皆由伊犁西行遶出葱嶺之外經鐵門過縛芻河折南踰大雪山以達於北印度故未經懸渡焉蓋程途有東西道之別津渡有上下游之分魏晉以前往屬賓者多由東道出于闐必經懸渡傍梯之險唐宋而後至天竺者多由西道出疏勒亦有鐵門石峽之奇邱長春西遊記云初從鐵門過阿母河至印度北雪山行在及歸從他道過石峽有石梁橫其上下流甚急賦詩有水北鐵門猶自可水南石峽更堪驚之句此水卽印度河在懸渡之下游者也

石峽乃巴達克山另一小水西北流入縛芻河非印度河也長春僅至雪山海國行宮尙未入北印度境無緣得渡印度河余初亦誤未及更正今補注於此

圖志東西易置上下乖舛移懸渡於巴達克山之西反以石梁爲其上流其誤三也又法顯記順恆水東下十八由延南岸有瞻波大國從此東行近五十由延到多摩梨鞞國卽是海口其說甚明白酈氏水經注別引大秦一名犁靬之文致令後人昧惑魏氏遂移犁靬於印度河口附會於條支瀕西海之地尤謬之遠矣且謂縛芻河與印度河同發源於葱嶺脊上之大龍池西行六七百里始分爲二縛芻河北流經

圖斯泊印度河西流經伊西洱泊直至包社始轉而南印度河豈有如此之迂遠哉其誤四也且夫五印度幅員遼闊東至亞山阿拉干西至阿富汗俾路芝南際大海北抵大雪山爲界其中列國數十大小不等元奘記敘述最詳疆域廣狹道里遠近井井有條其逾印度河至狼揭羅國則曰自此西北至波刺斯拂懽西女等國皆非印度之境也乃魏默深則併波斯天方安息條支諸國迄於地中海概目爲西印度其迤北一帶則巴達克山布哈爾機窪及哈薩克游牧諸部落概指爲北印度故爲夸大之詞鋪張揚厲是誠何心豈知西域諸部自古皆回教語言文字風俗種族與五印度各不相同雖屬賓月氏境壤毘連迭爲強弱互相兼併或彼或此原無一定之界限然不得因據其地遂併誣其名方今五印度爲英人所踞將英倫三島亦可目爲西印度有是理乎余觀西人地圖凡繪印度全境者西至阿富汗俾路芝北至大雪山而止卽梁書所云從月支高附以西南至西海東至盤越列國數十皆身毒也漢唐諸史及釋氏西域記凡言西海者多指印度洋非地中海故印度河歸西海恆河歸東海水經注所謂二水所注兩海所納自爲東西是已

月氏卽今之阿富汗高附與甲布譯音相近蓋順印度河而下西南至於科曼海灣爲西海也若以地中海爲西海則當云從月氏安息以西至西海不當云以西南然

則月氏安息之非印度明矣

恆河考下

黃琳材

恆河者安治士河也恆之與安華梵譯音之異也源流廣大支派紛繁經行中東二印度平衍膏腴物產

殷阜列國數十自古名城勝蹟琳宮梵刹號稱西天樂土諸佛菩薩亦多托生其間是以釋典說法動喻

恆河西北希模黎雅大山綿亘數千里重巒疊嶽大小溪澗數百道滂沱南下匯注於恆至痕都司丹以

下地勢寬平渠併愈多潞洄浩瀚廣至數里或十餘里不等迄於東印度孟加拉會合廓爾喀布丹亞山

諸國之水以入於海首尾五千餘里云顧恆河初無正幹來既眾派去復歧汊就其源之最大者而論之

凡有五水爲北源者三曰安治士曰延那曰殄伽爲南源者二曰幹普曰申河其餘旁支別派更僕難終

矣安治士亦有三源正中曰薩罕發源後藏阿里大雪山之陽西南流入北印度爲威聊一作古德列二

國之分界至好兒它折南流入中印度轉東南至勿鹿亞巴約千餘里與左右二源相合左源曰薩利出

於米鹿南流少東經孟波利又東南流來會右源曰冷庚伽出於德列國北境南流經慕那得巴又東南

與楞普爾巴勒里巴勒里城路通後藏嘉慶十九年爲廓爾喀所據後讓於英人被勒摩即東女國居大山中界連西諸城之水合而來

會三水既合乃名安治士河唐元奘則以殄伽爲恆河之通稱而於上流之安治士概冒以殄伽之名焉

恆水又東南流經康普爾古曲女城也元奘記云戒日王征服四鄰雄視一時將還曲女城設五歲無遮大會從數十萬衆在河南岸揚摩羅王從數萬衆在河北岸分河

中流水陸並進經新唐書作茶縛和羅城貞觀二十三年遣右衛率府王元策使天竺其王發兵拒之今九十年至曲女城

河左爲烏得國

烏得一作烏納廣袤二千餘里西北毘連後藏阿里與廓爾喀其都城曰盧恰路降附於英英遣巨酋司理財賦

河右爲厄納特國又東南流與

延那河相會兩河之交有亞拉哈巴城卽厄納特國都也居印度適中之地號稱聖城四方雲集拜佛焚

香其城乃蒙古所建甚爲堅固此外尙有亞加拉城抹得拉城及德希城所謂中印度四聖城是已延那

河一曰遙奴

西域記阿耨達山西南有水名遙奴

法顯記曰捕那

法顯記云又經捕那河到摩頭羅國卽抹得那城也

元獎記曰閼牟那皆一音之轉

也發源布士沙山谷中南流二百餘里有新拉河自西北來

新拉居萬山之中林谷深邃印

合而西南流

經德列國西境折南流入厄納特國界至德希城左右各受一水前明建文年間有騫馬爾罕王諦母爾

本元駙馬塞因帖木耳之後併兼西域回部遂南征五印度據之剏國號曰大蒙古建都於德希城歷二

百四十年莫之敢抗其後國勢浸衰四分五裂乾隆二十五年蒙古王納款於英今其後裔猶居此城食

租衣稅徒擁空名而已延那河又南經秣得拉

元獎記作秣羅

亞加拉

明正德四年蒙古王所建今有英國兵帥駐此

二城折而東下

右受兵達河又屈曲東南流與西南一源幹普河相會幹普河發源麻爾哇

一作馬盧縷

北流經新的亞賀兒

加等部至和塔城轉東北流右受牛耆河巴得河左受半刺士河又東北經吉勞里而東而東南與延那

河會延那河折南受新地河又東南至候末普爾有尼散河與北哇河合而西來入之又東南流有朗河

自西北來康河自西南來並入之又東南受六小水至亞拉哈巴城與恆河相會恆水又右納敦沙河曲

曲東流至馬思普爾折東北至丕那勒士古波羅奈城也城東北十里有鹿野苑精舍佛轉法輪處恆水

又東北流與幹得河相會

幹得河一名高翁河源出烏得國北境南流經盧恰路城又東南與色河合而入於恆水

而東南而北經迦尸普爾又東北

與菟伽河相會菟伽河一名固那河又名岡噶江發源後藏阿里郎噶池東南曰馬伯家喀巴珀譯言孔

雀口也為阿耨達四水之一南流經達克拉城土名麻楚河西南流與郎楚河相合始名岡噶江

一統志狼楚河

發源岡底斯山西流折北遶古格札什城仍轉南又西流至桑納蘇木多之地與拉楚河會又南流經畢底城之西折東流至達克拉斯木多北鄙與麻楚河會三水既合始名岡噶江又東南徑馬木巴柞木郎

部落至厄納特克國入南海今按拉楚一水乃西南流入南流入烏得國境又東南至烏得城古揚摩羅印度河不入岡噶江也狼楚河亦不經桑納畢底城等處

國舍衛城即波斯匿王所治也城內人民稀曠南門外有祇洹精舍池流清淨林木蔚然佛住此最久說

法度人經行坐處有塔表之西南五十里有非薩巴城

元獎記作室羅伐悉底

人民富庶岡噶江從舍衛城分為雙

流並趨而下有決列河及列低河自西北來入之

列低河發源廓爾喀西境東南流經哥鹿普爾古迦羅衛國即白淨王故宮也法顯記云從舍衛城東南行十

二由延到迦羅衛城釋迦太子出家修行還家見父處故跡具存有塔表之國內空荒人民稀少

又東南納小康托河而後同會於恆水又東至五河合

口五河者何中為恆水右為申河左則大康托河所分出之三支

大康托河發源廓爾喀國北境雪山大小溪澗十餘道會合為一流入沙冷境

又東南析為三支同注於恆

五水並匯於此焉余按法顯記所稱希連河當即今之康托河

法顯記云從迦羅衛城東行十七由延到揚夷那竭

城城北雙樹間希連河邊為世尊般涅槃盤處從此東行到五河合口世尊自般涅槃於河中央分身作二分各在一岸俾兩國王各得半身舍利起塔

元獎記所稱尼連禪河當即

今之申河元太祖征痕都司丹遣將追可弗父算端及於申河而止亦此水也申河發源索哈支南山西
北流經邊托格有留底河自西來入之折而東流千餘里會合古必河列限河孤伊河諸水皆南境支流
之大者轉東北經社哈巴的部內又東合於恆水自五河合口東行一由延至帕旦那城古巴連弗邑是
阿育王所治也印度人言爲地之中心從古著名之區水陸輻湊商賈所萃東南百餘里爲拜哈城所稱
王會新城是也阿闍世王從上謁宮遷都於此如來御世五十載居此國最久遺蹟甚夥如五指山雞足
峯耆闍窟皆在其南正覺山金剛座迦耶城皆在其西晉法顯居巴連弗邑三年學梵書梵語譯經寫律
十有八部自是以下爲東印度境法顯記云自此東行近五十唐宋以前東印度諸國未通中土故不見
於史至明初孟加臘乃由海道入貢其後亦爲蒙古所併乾隆年間英吉利之公班衙侵佔其地建立埠
頭於是卡呢格達一作甲遂爲南洋一大都會焉稱曰孟加拉省所轄十有八郡元奘記中所述東印度
諸國名今無可考蓋英人於此部多所變革語言文字風俗教化一變而爲泰西矣恆水自帕旦那東流
左右受十數枝河經罷救兒城折東北會廓爾喀之哥薩河哥薩河發源廓爾喀陽布城東至域丹支普爾與亞郎河忝巴河相合東南流經布利亞
城入於恆水又東流至夕力告里有麻哈拉得河東北來入之折南流而東南歷妙兒塔那咤斜利磨耳士利
等郡至沙達有火輪渡船爲通大吉嶺之鐵路又南流河中有大洲廣四十里又南經姑蘇替亦大市埠

卽明史古里瑣里國也又東南流蒲蘭蒲達江自東北來會昔人指此爲大金沙江非也又東南經達喀與未吉刺河會自此以下江海之水混而爲一從徹地缸以西沿海千餘里港口數十皆恆水所洩是謂孟加拉海灣其水渾濁淺深叵測必遍置浮泡以志水道而後操舟者不迷所向其卡呢格達之港口曰固支黎一曰賀給黎從磨耳士利郡分出一支西南流經法國所屬市埠曰商得耳那哥又南經丹國所屬市埠曰色林坡皆在河之西岸其東岸有麻利坡城爲英國屯軍之所又有吸水機器引至卡呢格達四十餘里足供滿城數十萬家用之不竭跨河建造鐵橋長六十丈以通火車往來河濱有霍威廉礮臺圍周三里形若蓮瓣四面皆人字壘重濠疊壘內有鑄礮之局河水折西南三百里至固支黎海口康泰扶南傳從迦那調洲西南入大灣可七八百里乃到枝扈黎大江口枝扈黎卽恆水也余按枝扈黎乃扈枝黎之訛與固支黎賀給黎譯音相近耳

印度河

黃琳材

安治士河經流東中二印度印度河經流西北二印度中土所稱東西兩恆河是也自酈氏水經注康泰扶南傳於二水源流多所混亂佛經凡言恆河者皆指安治士而不及印度河梁書云天竺國臨大江名新陶源出崑崙分爲五江總名曰恒水實則五水合一非一源分五又東恆河亦有五河合口尤易相混

衛藏志及各家輿地圖移阿里之拉楚河合於岡噶江皆傳聞之訛也中土請經求法之僧多沿恆河至中印度而西北地境親歷者少惟唐元奘自北而中而東而南而西再度此河上流則稱新頭河下流則稱信地河頗得其實與恆河絕不相蒙蓋新頭爲上流之一源五源既合之後從信地國以入海始名信地河統稱則曰印度土也所謂五大源者何一曰新頭河源出後藏阿里僧格喀巴珀譯言獅口也流泉二十餘道匯合爲一西北流至札錫岡納心克賀河又西北千餘里至辣達克古噉達國也西爲罽賓南爲烏菴北爲渴盤陀今皆併於克什米耳考懸渡在噉達東南烏菴西北漢書罽賓傳起皮山南更不屬漢之國四五厯三池盤石阪陜者尺六七寸長者徑三十里臨崢嶸不測之深行者騎步相持繩索相引二千餘里乃到縣渡晉法顯記云由于闐進向子合國南上葱嶺有毒龍池昔盤陀王以婆羅門咒咒之龍乃徙去毒龍池在阿里魯多克城西北表長五百餘里今名邊京池順嶺西南行十五日崖岸險絕石壁千仞下爲新頭河昔人鑿石通路及度七百傍梯已躡懸絙過沙河兩岸相去八十步渡河便到烏菴國北魏慧生所述亦同是爲和闐入印度之東道也至若唐僧元奘乃由大宛西道繞出葱嶺之外踰鐵門渡縛芻河過興都哥士大雪山至迦畢試國今曰喀非利司丹在甲布之東北又東至烏鐸迦漢茶城南渡新頭河入迦濕彌羅國卽克什米耳蓋程途有東西道之分津渡有上下游之別相距三千餘里他如元邱長春之詣雪山行宮僅至巴達克山尙未

入北印度境無緣得涉新頭更無緣得至懸渡乃魏默深移懸渡於巴達克山之西反以長春所經石梁

在其上流

長春記云歸從他道過石峽有石梁橫其上下流甚急賦詩有水北鐵門猶自可水南石峽更堪驚之句此當是巴達克山另一小水

東西易位上下乖舛尤謬

之遠矣新頭河自辣達克西北流有善旣兒林格底二河相合之水自南來會又西北至札來士有洒威

河自東來會

洒威河發源葱嶺毒龍池之北南流至辣達克山外折向西北至札來士入於新頭河

又西北至夕卡陀北納畢兒底司丹之水又西

北至本楚折而西南流有基節河自西北來會

基節河有二源右源出於亨沙左源出於葉心至基兒節合流東南入於新頭河

又西南流經邊

芻哥亞東境亞士多爾西境左右受數小水自此以上為克什米耳所屬之境兩岸皆崇山峻嶺急溜奔

瀧自此以下為英吉利所佔之本若部地勢沃衍居民繁盛又西南至亞叨克乃一大市埠英人建造火

車鐵路西抵俾石哇東達孟加拉有甲布河自西來會甲布者古高附國也屬於大月氏今為阿富汗國

都其水從西南山谷中流出達甲布城南東流至折刺那巴有庫那河自北來會

庫那河二源俱出喀非利境南流入甲布河

又東流至俾石哇為英國所轄有邊達河自東北來會

邊達河二源出於喀非利東境黑嶺西南又東至流入甲布河疑為西域記所稱達麗羅川

亞叨克入於新頭河自發源至此約千餘里兩岸多高山水流湍急舟楫難通新頭河至亞叨克以下則

水勢深廣可駛輪船又西南流右受生水

生河發源好斜那西南流入於新頭河

左受幹丕河

幹丕河發源固冷山中東南流經本路從葛篤妙機兩山

峽之間流出

索丕河

索丕河發源阿富汗南境東北流五百餘里入於新頭河與北來之哥末河相合東流入於新頭河

暨斯來曼山麓諸小溪兩傍汊港歧出

不一而足忽分忽合不出十里之外東境有勒亞沙磧廣袤三百餘里復西南流與四源相會流入信地國境是爲印度河最遠之一源也二曰薩拉楚河亦發源後藏阿里境內有山曰郎干喀巴珀譯言象口也山之上有二池一曰馬品木達賴淖爾一曰郎噶淖爾二池之水從西北流出左右山泉數十道同注之西北流千餘里至桑納出阿里境折西南入印度界歷幹那它布士沙賀社普爾等部落至好利加有不士河東北來會又西南至占普爾合於新頭河迤南有大沙磧廣圓數千里然沿河兩岸皆平衍膏腴人戶稠密三曰拉維河發源辣普爾北境山谷中西南流至勞爾城一曰那哈爾昔塞哥王林日昇建都於此後與英國戰爭不勝乃將本若一部割隸於英幅員二千里跨印度河五大源南以薩拉楚河爲界英人從勞爾城沿拉維河南岸新修一鐵路以達於信地四曰占勞河發源好那爾部中北流經克什米耳東南境折西南至慕兒丹合於拉維河五曰志林河發源克什米耳東南山麓北流經色冷那格城西合東北一水流入一泊復從泊西南流出南受凹里河北受吉善更格河至麻撒花那折南流轉西南合於占勞河五源旣合流入信地國境稱曰信地河西南流至路得分一支南流經惹易普爾至洛麻加入於叩齒澤中其正幹則西流折南經海地拉巴爲信地國都城又西南至塔塔復分爲數派入科曼海灣卽印度洋或稱小西洋梁書所云從月氏高附以西南至於西海蓋指此也

西域圖說

黃林材

泰西諸家地圖詳於歐羅巴洲及濱海諸國至於西域回部一帶商舶不通遊跡罕到其山川道里部落種族多所闕略昨歲在孟加拉博物院內見有中亞細亞一圖最爲精核因悉心臨摹譯出華文歸乃參校中土圖志歷代史傳及近世諸家著述闕者補之繁者刪之所有通都大邑名山巨川與夫疆域界限電綫鐵路之類加用顏色區別庶幾一目瞭然按圖東起金山一名阿爾泰山又名按台山西至黑海南起波斯灣北

至烏拉嶺經綫四十度緯綫三十度廣袤萬里居亞細亞洲之中央而葱嶺一山又居此圖之正中磅礴蜿蜒橫亘南北至高至大爲天下衆山水之祖葱嶺以東爲中國所屬之新疆三藏葱嶺以南爲英吉利所屬之五印度葱嶺以西以北皆爲俄羅斯之屬部是爲三大國之界限亦天下萬國之關鍵也兩漢之世開通西域屬於都護者本三十六國後稍增至五十餘張騫甘英奉輶車而遠邁貳師定遠振軍威於遐陬北聯烏孫西擊大宛斷匈奴之右臂空漠南之王庭可謂盛矣出玉門陽關玉門在敦煌之東爲出伊吾之道陽關在敦煌

之西爲出通西域有兩道從鄯善傍南山北波河西行至莎車今葉爾羌爲南道南道西踰葱嶺則出大月氏

自鐵門以南觀賀羅巴達克山今波斯安息今土爾其自車師今吐魯番前王庭隨北山波河西行至疏勒今喀什爲北

道北道西踰葱嶺則出大宛今浩罕康居康居最大兼有賽馬爾罕奄蔡今機哇又自于闐南行經皮山西夜

上葱嶺躡懸絙而至屬賓以達於天竺爲晉法顯北魏慧生所行之程此三道皆在天山南路也都護治

烏壘城卽今之烏魯木齊居西域適中之地四達之衝古城以東則爲匈奴境輪台以西則爲烏孫境蓋

南路爲城郭居國北路爲游牧行國自古然也唐置北庭都護又移安西都護於龜茲今庫車領羈縻十六

州於是建立四鎮始通山北之路由姑墨今阿克斯踰乏驢嶺今穆素嶺經熱池今特穆爾圖泊千泉今吹河昭武九姓諸國

然後逾鐵門而南渡縛芻河而入北印度爲元奘法師所行之程也遼亡耶律大石假道回鶻率衆西徙

創國號曰西契丹有二都城一曰尋思干尋思干與邪迷思干譯音相近中土之人往往混合爲一余始著西域形勝疑尋思干爲霍罕城後遍考諸書乃知西遼之都

實在今之一曰虎思窩魯朶在伊麗河西南太清池東北屬哈薩克右部傳國百年洎夫元太祖崛起朔漠混一寰區剪滅數

十國強汗開拓數萬里疆域南及申河中印西抵富浪地中海之島一北併厄羅斯欽察亞速三國皆在俄羅斯境

亞速卽亞薩塔坎也等國奄有亞細亞洲全境及歐羅巴洲之半幅員之廣亘古無倫於是封建懿親衆樹屏藩置

阿母河行中書省駐尋思干領葱嶺以西諸國別失八里元帥府駐烏魯木齊領天山南路阿力麻里元帥府駐伊犁

領天山北路火州曲先元帥府領吐魯蕃哈密至玉門陽關以東厥後鞭長尾大諸王跋扈各自擅命迄

今土爾基波斯及五印度各部酋長尙多元裔也我朝平定新疆武烈文謨遠超前古民繁物阜等於

腹中出嘉峪關至安西州折北至哈密分爲南北二路建築城堡設立臺站滿漢軍營星羅碁佈其天山

南路自吐魯蕃始所轄五回城

曰關展曰魯古沁曰色更木曰托克遜曰哈拉和卓

雍正時歸附最早伊敏和卓之子孫世襲土司

西南行曰哈喇沙爾曰庫車曰阿克蘇曰烏什謂之東四城曰喀什哈爾曰英吉沙爾曰葉爾羌曰和闐

謂之西四城所稱回疆南八城是也其天山北路本額魯特四衛拉之地及勦滅準噶爾之後數千里空

虛無人乃移駐滿漢官兵流徙罪犯以實之又土爾扈特十數萬衆投誠安置其間分給游牧之地焉自

巴里坤西行經古城奇臺一千四百餘里至烏魯木齊漢爲山北六國元稱回鶻五城水草肥饒足資耕

牧設迪化州阜康昌吉綏來三縣隸之居民富庶商賈輻湊建學興文彬彬乎化氈毳爲冠裳矣又西行

二千里爲伊犁準噶爾踞爲巢穴乾隆時歸入版圖築惠遠城駐劄將軍都統暨索倫錫伯察哈爾領隊

大臣屹然爲西陲重鎮外番數十國賈胡貿易悉萃於此繁華殷富爲口外第一都會也三垂陰山中貫

巨川西北流入夷播海

卽巴勒喀什泊一名騰吉思泊

南岸多沙磧北岸流泉映帶原濕沃衍分屯耕牧建築八城

熙春惠甯

綏定拱宸廣仁瞻德甯遠塔勒奇

西北界連哈薩克西南界連布魯特沿邊設卡倫三十餘處規制極爲周密東界庫爾

喀喇烏斯大小珠勒都斯山徑龐雜正北逾果子溝經賽里木泊通塔爾巴哈台之綏靖城正南經鉛廠

諸山踰穆素爾嶺

一名凌山

通阿克斯城西南沿特穆爾圖泊之南通喀什噶爾城皆山路崎嶇穿過布魯特

之境伊犁換防官兵往來取道於此此新疆南北兩路之大概情形也自咸豐以後俄羅斯併兼裏海鹹

海一帶游牧部落及葱嶺迤西機窪布哈爾塔什罕敖汗等國其東西布魯特左右哈薩克昔本中國藩屬今皆爲俄人所誘降又乘回疆之亂竊踞伊犁將附近城堡全行墮廢而取其磚石木料移於大城東南九十里之金頂寺構造洋樓幾二十里闐闐稠密賦稅煩苛得寸進尺狡焉思逞查西北各處與俄境交涉者自伊犁大城西行經霍爾果斯至塔勒根渡河折西南經虎思窩魯朶吹河千泉塔刺速河歐梨分路一西通陀爾奇司丹一南通賽馬爾罕其伊犁西北卡倫以外至巴勒喀什泊爲色密爾志遷司科地多砂鹵小徑甚多塔爾巴哈臺西南有阿拉圖勒泊向設卡倫八處每遇冬季雪大則准哈薩克暫入卡倫以內牧放牲畜自綏靖城西行經沙吉呵波來折北至色密巴那丁司科商賈往來之孔道塔爾巴哈臺之東北有額爾齊斯河與科布多交界其水發源阿爾泰山足資屯田西流匯於宰桑泊又從泊西北曲曲流出俄境加孟羅各司科左右納數小水至巴那丁司科水勢漸大可通舟楫西北流二千餘里經阿木司科托波兒司科下流會合阿比河而注於北海俄人於港口建築礮臺以控東方諸藩自科布多西北逾阿爾泰山與多木司科接壤古之堅昆丁零骨利幹等國元爲海都篤哇昔里吉諸王封地後置謙州益蘭州隸於嶺北行省海都之叛其入寇之路往往逾金山而窺和林蓋其地土沃兵強別開境界非他部之戈壁曠野可比俄羅斯鎮以巨酋戍以重兵東藩四大司科以此爲首按葱嶺北幹發爲陰

山綿絡伊犁塔爾巴哈臺與阿爾泰山相連屬其間天然險要足資戰守而阿爾泰山尤爲雄偉曲抱科布多之三面實外蒙古喀爾喀西北之屏障也

巨文島形勢

闕名

高麗口外之巨文島卽西人所謂哈密墩也查該島在濟州之東俗名三山島爲全羅道羣島之首距濟州海程三十英里東北距日對州八十英里風利半日可達是處分內外兩島形狹而長旁有小島一如鼎足之勢山高七十九丈山脈連絡如斷而續相離處約一百五十弓闊中間天然巨港從右邊南島進港港水縱橫約三英里深足容大船舟楫均灣泊於此外島二村合民百五十戶內島民村村各百五十戶中尙有零星小村莊數處島民皆以種麥捕魚爲業不產禾稻終歲以麥爲飯魚爲羹時有遭風難船漂至長州現雖被英國人佔據而土民捕魚則仍其舊計共漁舟十數艘所獲鮑魚鱸魚最夥鯉魚大者重有三四斤云

皇朝經世文續編卷七十四目錄

兵政十三 塞防上

黑龍江外紀 節錄

長清

康熙中俄定界始末攷 邊防偶述

中俄恰克圖界約第三條 通商約章類纂

中俄恰克圖界約第六條

中俄恰克圖界約第七條

俄羅斯事補輯

張穆

烏齋籤記 節錄

張穆

俄羅斯進呈書籍記 書目附

何秋濤

皇朝經世文續編卷七十四

上海葛士濬子源輯

兵政十三 塞防上

黑龍江外紀 節錄

長清

黑龍江與俄羅斯分界處歲以五六月間齊齊哈爾墨爾根黑龍江各協領一員佐領二員驍騎校二員共兵二百四十名分三路至格爾畢齊額爾古訥墨里勒克楚爾海圖等河巡視謂之察邊格爾畢齊河額爾古訥河齊齊哈爾卓帳處也墨里河墨爾根卓帳處也楚爾海圖河黑龍江卓帳處也每齊齊哈爾協領與墨爾根協領會墨爾根協領與黑龍江協領會各書銜名月日於木簡樺皮包而一掛之樹一瘞之山明年察邊者取歸以呈將軍副都統又各留木簡以備後來考驗而事竣例於七月內咨報理藩院仍於年終將邊界甯謐之處專摺奏聞至將軍於邊界惟新到任者一察餘不爾

黑龍江在京師東北三千二百餘里東南至吉林西至蒙古喀爾喀部北至俄羅斯廣輪數千里鎮以重臣屯以勁旅以齊齊哈爾爲省會而墨爾根黑龍江呼倫貝爾布特哈呼蘭五城隸焉

齊齊哈爾長名在今城西南十餘里城所在號卜奎相傳始築城議在齊齊哈爾旣以隔江不便改今地

故齊齊哈爾雖以名城而卜奎通稱之卜奎方言也其境南至混同江五百里餘並以內興安嶺爲界
墨爾根以河名城在齊齊哈爾東北四百三十餘里南至訥墨爾河一百六十里餘並以內興安嶺爲界
黑龍江國語曰薩哈連烏喇初爲都會因以名省今通稱其地爲愛呼以附近有愛琿古城轉琿爲呼也
城在齊齊哈爾東北八百里東至外興安嶺二千六百里西至內興安嶺二百五十里南至喀木尼峯七
百里北至俄羅斯二千里

呼倫貝爾一作呼倫布爾通稱海蘭兒蓋其地有池一曰呼倫一曰貝爾官兵屯駐二池因以名地而謂
之海蘭兒則指凱喇爾一河亦轉音也地在齊齊哈爾西北四百八十里東至吉爾起克山三百五十里
西南皆接蒙古喀爾喀部西四百七十里南四百九十里西北二百二十里爲額爾古訥河則與俄羅斯
接壤

布特哈譯言虞獵故有打牲處之稱起齊齊哈爾北境直至黑龍江一帶皆其地總管駐處在齊齊哈爾
北三百四十里地名伊倭齊

呼蘭以河得名又號霍倫在齊齊哈爾東南八百四十里毗連吉林萬山雄峻人蔑之所出初撥齊齊哈
爾墨爾根黑龍江兵踐更巡徼旣以宵小盜采禁或不嚴乃置專官駐守與諸城有犄角之勢而土沃屢

豐則諸城不及黑龍江省山爲外障山之最大者內外興安嶺內嶺環衛諸城外嶺限制俄羅斯岡巒起伏聯絡羣山諸水多出其下考分界碑文循興安嶺至海凡嶺陽流入黑龍江之溪河盡屬中國又侍郎圖麗琛異域錄言奉使土爾扈特出張家口六日度興安嶺則嶺之東西綿亙概可知矣

格爾畢齊河源出興安嶺南入黑龍江河口東岸有石勒清漢蒙古及俄羅斯喇第諾五體字康熙二十八年所立分界碑也余嘗從土人得分界盟約清文較世傳界碑漢文微有異同 昭代掌故所闕譯出以備參考其文云 中國大聖皇帝 欽差分界大臣議政大臣領侍衛內大臣索額圖內大臣都統一等公舅舅佟國綱都統郎談都統班達爾善鎮守黑龍江等處將軍薩布素護軍統領瑪喇理藩院侍郎溫達會同俄羅斯察罕汗使臣俄昆尼等在尼布楚地方公議得一將自北流入黑龍江之綽爾納卽烏魯木河附近之格爾畢齊河爲界沿此河口之大興安嶺至海凡嶺陽流入黑龍江之河道悉屬中國其嶺陰河道悉屬俄羅斯惟烏第河以南興安嶺以北中間地方河道暫行存放俟各還國察明或遣使或行文再行定議一將流入黑龍江之額爾古訥河爲界南岸屬中國北岸屬俄羅斯其南岸墨里勒克河口現存俄羅斯廬舍着徙北岸一雅克薩地方俄羅斯所築城垣盡行拆毀居民諸物搬回察罕汗處一分定疆界兩國獵戶不得越過如有一二宵小私行越境打牲偷竊者拏送該管官分別輕重治罪此外

十人或十五人合夥執仗殺人劫物者務必奏聞卽行正法其二人誤犯者兩國照常和好不得擅動征伐一除從前一切舊事不議外中國現有之俄羅斯人及俄羅斯現有中國之人免其互相索還着卽存留一兩國旣永遠和好嗣後往來行旅各有路票聽其交易一自會盟日起逋逃者不得收納拏獲者送還一兩國大臣相會議定永遠和好之處奉行不得違誤

三城中八旗按法勒哈稽察法勒哈國語地面也黃旗北白旗東紅旗西藍旗南制如京師取五行相剋意

黑龍江省至京師有二路由吉林奉天入山海關者俗稱大站此進本路由蒙古郭爾羅斯札賚特都爾伯特烏珠穆沁等部入喜峯口俗稱蒙古站亦曰草地此遞摺路又由蒙古境入法庫邊門至盛京有一路俗稱八虎路法庫轉音此商販往來之路也三路道里遠近入關出塞者多不能悉

由大站至京道里自茂興站起至都城凡三千三百餘里由齊齊哈爾城中卜奎站起至茂興凡站共三百四十七里

由蒙古站至京道里自卜奎站起至都城凡二千三百餘里由八虎道至盛京道里自茂興站起至盛京城凡一千餘里

社稷孔子徧天下皆得祀黑龍江一省獨無

黑龍江索倫地今所居不盡索倫滿洲漢軍徙自吉林巴爾呼鄂勒特歸自蒙古達呼爾俄倫春畢喇爾則其同鄉而別爲部旅者世於黑龍江人概稱索倫黑龍江人居之不疑亦雅喜以索倫自號說者謂索倫驍勇聞天下假其名足以自壯

嘉慶十三年編審戶口齊齊哈爾旗營屯站九千七百二戶四萬八千三百十一名口墨爾根八旗營屯一千八百五十五戶七千九百六十名口黑龍江八旗營屯四千一百九十九戶一萬九千三百八十八名口呼倫貝爾八旗四千七百六十九戶二萬九千七百十三名口布特哈八旗四千三十三戶一萬八千九百三十三名口呼蘭八旗營屯一千六百五十九戶一萬一千九百十四名口通計全省共二萬六千二百一十七戶十三萬六千二百二十八名口生齒可謂繁矣

黑龍江置將軍鎮守自康熙二十二年始

黑龍江八旗士卒品類有五曰前鋒曰領催曰馬甲曰匠役曰養育兵計全省額設前鋒七百五十二名馬甲八千四百一十三名養育兵八百名共一萬三百餘名平時自應其役軍興皆聽調撥往往以勇猛敢戰取翠翎珊頂及巴圖魯之號如寄此海口所以稱勁旅也

康熙中俄定界始末考

邊防偶述

中俄立約定界肇始康熙二十八年嗣是而雍正五年乾隆三十三年咸豐元年暨八年十年同治元年八年及光緒七年凡共九次或增訂條約或更立界牌懷遠招攜靡有弗盡而能使俄人知罪返地數十年蠕伏不動者惟康熙中之定盟則然蒙於是知 國朝之於俄慮之深而防之周也謹按 聖祖貽俄察罕汗書實當康熙十有五年以黑龍江北之雅克薩等地屢被俄東部之羅刹侵軼而令其約束不爲寇耳乃答書未至寇掠轉深致藪我逋逃阻我索倫貂貢而將蠶食黑省東北數千里地焉於是二十一年遣都統彭春偵形勢於墨爾根及齊齊哈爾各築城戍之而羅刹侵地則數年間旋復旋失迄死守弗賓 聖祖乃附書荷蘭轉達俄主海道往還半載得報遂謝邊人構釁之罪爲遣使定界之謀而於二十七年使出北方陸路至喀爾喀土謝圖汗境文移往復明年十二月始與我大臣索額圖等會議於尼布楚地方歸我雅克薩城旋於雍正五年我親王策凌等赴楚庫河與俄使薩瓦立石分界而定市於喀爾喀東部之庫倫也禁暴息爭迄數十年無改易謂非戰守兼資不苟議和之所致乎當時分界定約厥有七條摩崖勒碑文備五體而世傳界碑漢文與清文又有詳略異同據咸豐八年之約有所議條款俱照清文辦理云云則康熙中之與俄定界碑文亦必以清文爲主無疑已今考黑龍江外紀曰格爾畢齊河

源出興安嶺南入黑龍江河口東岸有石勒清漢蒙古及俄羅斯喇第諾

皇朝通志金石略作提提諾魏氏國朝俄羅斯盟聘記又

作拉五體字康熙二十八年所立分界碑也嘗從土人得分界盟約清文云中國大皇帝欽差分界大

臣議政大臣領侍衛內大臣索額圖內大臣都統一等公舅舅佟國綱都統郎談都統班達爾善鎮守黑

龍江等處將軍薩布素護軍統領瑪喇理藩院侍郎溫達會同俄羅斯察罕汗使臣俄昆尼等

徐元文記與俄國定

界之碑言俄使費岳多羅額里克謝等

在尼布楚地方公議得一將自北流入黑龍江之綽爾納即烏魯木河

漢文作烏倫穆河

近之格爾畢

漢文作必

齊河為界沿此河口之大興安嶺至海凡嶺陽流入黑龍江之河道悉屬中國其嶺陰

河道悉屬俄羅斯

漢文作凡嶺南一帶流入烏龍江之溪河盡屬我界其以嶺北一帶之溪河盡屬鄂羅斯界

惟烏第河以南興安嶺以北中間地方

河道暫行存放俟各還國察明或遣使或行文再行定議

惟烏第河以下徐記定界碑文無此條

一將流入黑龍江之額爾

古訥河為界南岸屬中國北岸屬俄羅斯其南岸墨里勒克河口

漢文作眉勒爾喀河口

現存俄羅斯廬舍著徙北

岸

漢文作遷移北岸

一雅克薩地方俄羅斯所築城垣盡行拆毀居民諸物搬回察罕汗處一分定疆界兩國獵

戶不得越過如有一二宵小私行越境打牲偷竊者拏送該管官分別輕重治罪此外十人或十五人合

夥執仗殺人劫物者務必奏聞即行正法其一二入誤犯者兩國照常和好不得擅動征伐一除從前舊

事不議外

按此語漢文不載

中國現有之俄羅斯人及俄羅斯現有中國之人免其互相索還著即存留一兩國

既永遠和好嗣後往來行旅如有路票聽其交易一自會盟日起逋逃者不得收納拏獲送還

按此條漢文即附上

第五條

一兩國大臣議定永遠和好之處奉行不得違誤

按此條世傳界碑漢文亦闕

按黑龍江外紀所譯出清文條

約凡八而世傳界碑漢文僅列六條蓋清文第七條云云漢文實附第五條爲一若末一條本清漢文所

同特世傳漢文闕此不載故僅得其六而不合魏記石勒會議七條也又烏第河興安嶺中間之存放河

道未知後議若何要非得清文以補漢之遺人且莫知當時界碑之有此文矣再考黑龍江與俄分界處

自康熙時安置界牌歲以五六月間齊齊哈爾墨爾根黑龍江各協領一員佐領二員驍騎校二員共兵

二百四十名分三路至格爾畢齊額爾古訥墨里勒克楚爾海圖等河巡視謂之察邊格爾畢齊河額爾

古訥河齊齊哈爾卓帳處也墨里河墨爾根卓帳處也楚爾海圖河黑龍江卓帳處也每齊齊哈爾協領

與墨爾根協領會墨爾根協領與黑龍江協領會各書銜名月日於木簡樺皮包而一掛之樹一瘞之山

明年察邊者取歸以呈將軍副都統又各留木簡以備後來考驗事竣例於七月內咨報理藩院仍於年

終將邊界甯謐之處專摺奏聞至將軍於邊界惟新到任者一察餘不爾嘗綜而觀之知當時之分界

察邊實有三善而皆非淺見所及焉夫使臣與俄會議必使於中俄所當畫界處議之庶可熟察兩國界

限險易遠近之形而憑此核斷不至貿然前往以受彼欺朦矣若地界山河南北相錯而一時未易分屬

者俟後察明再議則糾紛息而彼此亦難強爭也至歲分三路巡邊且憑木簡以資考驗而必以時呈報奏咨者則慮廣漠之區俄人隱相侵越或至私移界石而我罔聞知耳使後常率此三者行之而勿中欺罔情偷之習雖千載無俄患可也乃自咸豐末讓地與俄幾盡失黑省要地自黑龍江以東雅克薩尼布楚諸城亦均爲俄有而自此次會議以來凡歷次與議分界非議於京師卽往議俄之都城且界碑任其遷移通商亦惟俄所便此欲俄之不爲患東北難已觀康熙朝之帖耳受盟不敢逞其兵威挾我故地以肆恫喝要求者其綏馭有方不誠超越尋常萬萬哉

按雍正五年與俄定市恰克圖之約但準貿易往來不許租地立埠慮患亦至爲深遠故論者謂自西域全境底定後俄人倘求通市新疆宜仿照此約凡各市行埠由我國官商經理彼來貿易投行投埠爲客居之商以此力爭不憚往復要使必從而後開市不當照道光二十二年以來與各西國通商海口之約也至湘陰郭侍郎前上合肥伯書云俄旣乘亂竊據伊犁必不肯輕易退還按此時崇厚猶未往俄議約莫如明與定約收回黑龍江以西地與之互易處置亦最得宜蓋以名而論則伊犁地方饒沃形勢阨要不可不責俄人交還而以實而言則卽如曾星使勅續議條約凡伊犁膏腴要害之區亦已多歸俄國管轄而我所得僅一空虛無用之城而已是曷若以伊犁讓俄令俄交還黑省以東雅克薩尼布楚

諸城

按郭言黑龍江以西地西當作東

而爲國家維持根本地耶又筠仙侍郎言洋務應付之方不越理勢二者勢者人與我共之有彼所必爭之勢有所必爭之勢彼所必爭不能不應彼所必爭而亦我之所必爭又所萬不能應宜應者許之更無遲疑不宜應者拒之亦更無屈撓云云更深得時勢要領并識於此以爲今奉使諸臣往議中越邊界及吉林界者告焉

又按咸豐十年俄覲英法內犯乘閒請黑龍江地允以大礮相易與恭邸面定條約始遣大臣成齊等往勘分界遂議自烏蘇里口而南上至興凱湖以烏蘇里江及松阿察河作爲中俄交界其二河迤東之地屬俄羅斯迤西之地屬中國自松阿察河之原踰興凱湖直至白棱河自白棱河口順山嶺至瑚布圖河再由瑚布圖河口順琿春河及海中間之嶺至圖門江口其東皆屬俄羅斯其西皆屬中國蓋實讓與地二千七百里而俄界已漸逼吉林矣當日所立界牌處有八曰烏蘇里口曰松阿察河曰土爾必拉曰興凱湖曰瑚布圖河曰琿春曰圖門江口曰河源山嶺漫岡也白棱河則本無其地乃俄人混指一處欲由松阿察掘通墨棱河以通舟楫而窺甯古塔琿春三姓等處耳俄使稱九年立約時寫在約中有云土爾必拉亦須割與後經勘出所稱土爾必拉係在興凱湖東北岸奎屯必拉之右距墨棱河尙有四百餘里蓋經成齊等據此力辯俄始強指必拉之分支小河爲卽白棱之訛而不得借此白

梭河三字爲日後侵佔墨梭河地矣

中俄恰克圖界約第三條

一中國大臣會同俄國所遣使臣所定兩國邊界在恰克圖河溪之俄國卡倫房屋在鄂爾懷圖山頂之中國卡倫鄂博此卡倫房屋鄂博適中平分設立鄂博作爲兩國貿易疆界地方後兩邊疆界立定遣喀密薩爾等前往自此地起東順至布爾古特依山梁至奇蘭卡倫由奇蘭卡倫齊克太阿魯奇都喀阿魯哈當蘇此四卡倫鄂博以一段楚庫河爲界由阿魯哈當蘇至額波爾哈當蘇卡倫鄂博由額波爾哈當蘇至察罕鄂拉蒙古卡倫鄂博俄國所屬之人所占之地中國蒙古卡倫鄂博將在此兩邊中間空地照分恰克圖地方劃開平分俄羅斯所屬之人所占地方附近如有山臺幹河以山臺幹河爲界蒙古卡倫鄂博附近如有山臺幹河以山臺幹河爲界無山河空曠之地從中平分設立鄂博爲界察罕拉之卡倫鄂博至額爾古訥河岸蒙古卡倫鄂博以外就近前往兩國之人妥商設立鄂博爲界恰克圖鄂爾懷圖兩中間立爲疆界自鄂博向西鄂爾懷圖山特們庫朱渾畢齊克圖胡什古卑勒蘇圖山庫克齊老圖黃果爾鄂博永霍爾山博斯口貢贊山胡塔海圖山崩梁布爾胡圖嶺額古德恩昭梁多什圖嶺克色訥克圖嶺固爾畢嶺努克圖嶺額爾奇克塔爾噶克臺幹托羅斯嶺柯訥滿達霍尼音嶺柯木柯本查克博木

沙畢納依嶺以此梁從中平分爲界其間如橫有山河卽橫斷山河平分爲界由沙畢納依嶺至額爾古訥河岸陽面作爲中國陰面作爲俄國將所分地方寫明繪圖兩國所差之人互換文書各給大臣等此界已定兩國如有屬下不肖之人偷入游牧佔踞地方蓋房居住查明各自遷回本處兩國之人如有互相出入雜居者查明各自收回居住以靜疆界兩邊各取五貂之烏梁海各本主仍舊存留彼此越取一貂之烏梁海自定疆界之日起以後永禁各取一貂照此議定完結互換證據

中俄恰克圖界約第六條

一送文之人俱令由恰克圖一路行走如果實有緊要事件准其酌量抄道行走倘有意因恰克圖道路寫達特意抄道行走者邊界之汗王等俄國之頭人等彼此咨明各自治罪

中俄恰克圖界約第七條

一烏帶河等處前經內大臣松會議將此地暫置爲兩間之地嗣後或遣使或行文定議等語在案今定議你返回時務將你們人嚴禁倘越境前來被我們人拏獲必加懲處倘我們人有越境前去者你們亦加懲處此烏帶河等處地方旣不能議仍照前暫置爲兩間之地你們人亦不可佔據此等地方

黻俞君正燮著俄羅斯事輯顛末縷詳穆讀而嘉之既得文清公松筠綬服紀略圖詩注載西北兩邊情形頗悉其述俄羅斯事有足補俞君之闕者因條列而文綴之著于篇蓋文清駐劄庫倫經紀通市事閱八年聞見既真記錄自備矣題曰補輯凡俞君所已詳者不復徵也

俄羅斯地瀕北海千古無述蓋有內外旗蒙古限之無由與中國通內旗者科爾沁等四十九旗札薩克王公是也外旗者喀爾喀七旗札薩克王公是也外旗居內旗之外俄羅斯又居外旗之外其地東西北三面距海東西廣南北狹自東而西黑龍江庫倫烏里雅蘇台科布多四屬八十二卡倫又科布多屬極西卡倫曰和尼邁拉呼由此度爾額齊斯河至輝邁拉呼一帶卡倫均與俄羅斯連界其國法夫死傳妻母死傳子國主及部長皆然女曰哈屯汗男曰察罕汗哈屯華言夫人也察罕華言白也乾隆五十八年大西洋英咭喇國王遣使朝貢畢尙書松筠奉命送至海上其正貢使曰瑪噶爾呢駐牧俄羅斯久松筠訪之曰現在之哈屯汗本西洋女前哈屯汗之外孫女也其表兄襲位娶爲妻生一子汗死子幼遂代立所生子今已三十餘後將傳之如子又死卽傳子婦舊俗如此

俞君曰嘉慶十年今汗遣使來至邊議禮今汗者始以男汗治矣其國

都曰莫斯科瓦有理事公廨曰薩那忒如直哈屯汗在位遇事卽由薩那忒申文達理藩院轉奏其辦事大頭目曰包費窩特守邊大頭目曰固畢納托爾管兵頭目曰咭那喇爾其薩那忒公廨辦事大頭目曰

薩那托爾曰雅固畢咭那喇爾曰瑪約爾曰哩咭斯塔喇托爾頭目多西洋人其服食房舍亦與西洋不異其俗不甚事種植近國都地氣候頗和而水多田少惟魚是食魚有毒大黃能解之時派頭目專司收買散給屬下官賣濟衆舊與西洋及青海等處通市其與中國通市之所曰恰克圖距莫斯科瓦西北數千里爲土謝圖汗車臣汗札薩克圖汗三音諾顏四部卡倫適中之區

迤東二十八卡倫土謝車臣兩部設迤西十九卡倫札薩克三音部

設商民于此建立木城俄羅斯亦于對面建設市圈萬貨雲屯居然一都會矣

欽差大臣駐劄庫倫以控制之治土謝圖汗部庫倫者蒙古語城圈也地有喇嘛木棚如城故名距恰克圖八百里有奇庫倫南十餘里有山曰汗山縣亘高聳草樹如畫山北有河曰圖拉源出庫倫東北有特衣山曲折流二千餘里北入色楞格河由恰克圖西側入俄羅斯拜噶勒淖爾復東南流至黑龍江入東海恰克圖迤東車臣汗部屬十四卡倫沙甸平坦迤西多山林木蓊鬱往來以色楞格河爲津要連岡而東迤南至袞圖達壩罕其間俠溝叢樹險隘天成足資防禦其附屬回部四曰布哩雅特曰哈哩雅特曰哈木尼罕曰素瑪爾皆奉黃教俄羅斯恐其內附每卡設本國數人羈絆之其北鄰曰空喀爾

俞君曰乃其西南屬

國亦回種也相傳空喀爾國最大以銅爲城東西門距若干程非也空喀爾居海島中恃水爲險自以爲有銅城之固猶華言金城云爾其禮節以脫帽去裘爲至敬頭目人謁其汗則用之輸誠極服則以指扣

眉如中國之投拜矣其性樸弱知信睦初見中國人恐爲笑故示倨大應答模棱及我駐劄大臣開布誠意而夷情懽帖矣

康熙二十七年喀爾喀全部內附二十九年黑龍江忽稱有羅又犯界

索倫土語呼俄羅斯曰羅又非美名也義見俞集

聖祖

仁皇帝命副都統薩布素率兵進剿奪其雅克薩城羅又遁嗣乃屢肆蠢擾守邊大臣移檄詰之皆不報會有附近俄羅斯之西洋霍蘭國朝貢入京兵部欽奉諭旨以俄羅斯哈屯汗係婦人巢穴距邊地遠其如何構釁必不知情疊發檄諭必其守邊頭目畏罪阻隔繕敕書交霍蘭使臣帶回轉達俄羅斯得書回奏羅又犯界事哈屯汗絕不知奉到敕書嚴飭邊界永不滋事復申請遣人進京學習國書俟通曉文理換回遇事以清文兼俄羅斯及西洋字馳奏可免舛誤聖祖允其請爲特開俄羅斯教習館其後在京學習之人迭次更換在京在途照料官員理藩院均派家道殷碩者隨時酌需賞賚周其困乏此俄羅斯所以感恩知義永遠向化也

世宗憲皇帝登極因其地毗連喀爾喀應與定界以杜爭端而于在邊貿易者約束亦便雍正五年欽派大臣尙書察畢雅特古忒圖麗琛三人前往勘定所設卡倫五十九座極東十二卡倫就近屬黑龍江將軍統轄輪派索倫兵戍守迤西卡倫四十七所以喀爾喀四部屬下各蒙古按其游牧遠近每卡設章

京一員率兵攜眷戍守俄羅斯于對面一體安設兩界適中隙地蒙古語曰薩布薩布處所皆立鄂博鄂博者華言石堆也間遇叢林鄂博難立即削大樹刊識時庫倫尚未派駐防大臣凡此卡倫總令喀爾喀王丹津多爾濟統轄并議定條規互相偷盜者事主呈報躋緝審明罰賠治罪不獲卽令不能嚴緝之卡倫追賠彼此貿易兩無權稅自此沿邊人衆咸知約束矣先是民夷交易無定所疆界既正相度得恰克圖地設立市集派理藩院司員三年一換駐劄總理此開關通市之始也喀爾喀丹王薨其孫宰桑多爾濟嗣先職整頓卡倫益完善繼以夷務繁乾隆二十七年 欽派大臣同桑王協辦此庫倫駐劄之始也二十九年因附近卡倫互有遺失馬匹數逾千而俄羅斯又輒捏報奉 旨閉恰克圖俄羅斯懼三十三年懇請開關 欽差庫倫大臣慶桂同喀喇沁貝子瑚圖靈阿會議章程合詞以恭順緣由入奏 恩準通市如舊四十四年恰克圖有應會審夷犯延宕逾期庫倫大臣索林立命閉關奏請罷市得 嚴旨申飭改派尙書博濟清阿馳傳同土謝圖汗徹登多爾濟悉心察辦俄羅斯悔罪重懲夷犯四十五年奉 旨準其仍前市易四十九年有庫倫商民赴烏梁海游牧貿易路經布哩雅特被刦駐劄大臣勒保偵卸盜首檄行額爾口城固畢納托爾拉木巴捕盜○審拉木巴既緝獲首犯遣其咭那喇爾送赴恰克圖并例罰貨物加倍呈繳勒保等方擬明法示衆咭那喇爾妄意案已完結擅取犯鞭責鉗耳鼻發遣勒保檄

詢拉木巴仍以結案爲辭奉 旨行文薩那忒索之并治固畢納托爾等罪薩那忒覲事速了蒙飾如前
高宗純皇帝震怒切責之旋撤恰克圖市俄羅斯益懼將債事之拉木巴調回別派頭目駐防募緝遣
犯訖不獲申文籲卹遵 旨斥駁五十四年有衛勒干巡兵齊巴克等出卡緝賊遇哈哩雅特打牲數人
我兵盤詰哈哩雅特恐被捕遽發銃齊巴克傷斃駐劄大臣松筠飛檄索賊至五十五年春其新派固畢
納托爾色勒裴特搜獲正犯二從犯一先後縛送聲請前犯已無蹤跡懇收現獲之犯示衆辦理并結舊
案於時又有薩麻林喇嘛許書事詳見俞集薩那忒具實稟覆薩麻林伏法五十六年奉 旨訂期會議仍前
通市時閉關久夷民恟恍聞檄令會議色勒裴特由額爾口以馬駕飛車馳來聽命松筠等宣敷威德推
誠曉誠色勒裴特頻以指叩眉曰 大皇帝是天大皇帝是天議定開關通市如初俄羅斯永遵條教邊
境綏和是皆我 列聖深仁厚澤漸被無疆大臣仰奉 廟謨寬嚴並用故雖洪荒未賓之蠻夷莫不輸
誠愛戴也

月齋籤記 節錄

張穆

會典理藩院俄羅斯互市設庫倫辦事大臣二人一由在京滿洲蒙古大臣內 簡放一由喀爾喀札薩
克內特派所屬庫倫本院司官一人筆帖式二人恰克圖本院司官一人轄卡倫會哨之各札薩克以理

邊務凡行文俄羅斯薩那特衙門皆用庫倫辦事大臣印文其東黑龍江境內由黑龍江將軍呼倫貝爾副都統經理其西至近吉里克以西由定邊左副將軍科布多叅贊大臣經理皆與庫倫辦事大臣會同酌辦康熙二十八年議准俄羅斯邊境以流入黑龍江之綽羅那阿倫穆河相近格爾必齊河爲界自大興安嶺以至於海山之陽爲內地山之陰爲俄羅斯地雍正五年議准俄羅斯人所居近山河者以山河爲界無山河之空地設立鄂博爲界自東邊之額爾古納河岸至哈魯哈當蘇阿魯奇都勒齊克泰奇蘭等處以相對之楚庫河爲界自此以西沿布爾古特山以博木沙畢稟嶺爲界各定立界石

親王策凌傳雍正五年偕內大臣四格等赴楚庫河與俄羅斯使薩瓦立石定界徐氏松曰楚庫河在庫倫所屬之恰克圖北

龔之鑰後出塞錄自黑龍江西行三千五百餘里至圖拉必喇已在歸化城之正北再逾一嶺往北數十里卽苦另山山甚峻上有番僧奉大佛寺及諸商賈俱集於此皆與鄂羅斯國貿易者下苦另山千里卽鄂羅斯國望之皆坦途且有池塘溪港大小舟航絡繹其間芳草長堤桃柳掩映宛然中華風致非復黃

沙白草之地也穆案苦另卽庫倫也

按恰克圖互市處距庫倫八百餘里與此所云苦另山里到方位皆合

土謝圖汗中左翼末旗扎薩克一等台吉車梭札布游牧康熙二十七年避噶爾丹掠率所屬徙牧俄羅

斯境三十二年率屬六百來歸聞其從叔錫布推哈坦巴圖魯駐牧巴顏烏蘭乞附牧 允之三十四年
移牧俄僊界牧地當鄂爾坤河色楞格河合流處異域錄云又行十日至喀爾喀之北界車凌札布部長
之邊界博拉地界鄂爾坤河自東南向西流入色楞格河色楞格河來自西南環繞山北向東北流過俄
羅斯之楚庫柏興又向北流入柏海兒湖

自庫倫有驛經右翼右末旗右翼左末旗至是達於恰克圖爲通俄羅斯互市之道異域錄云博拉地方
皆艸埠甚泥濘潦水成澤其東南林木森密望之鬱然多蚊虻賴嚮導指引而行又行一日至兩國接壤
之蘇布克圖地方兩傍皆山林谷中有溪河北山之上其水甘而涼谷內之草暢茂蚊虻甚多揮之
不去又越二宿於二十三日至楚庫柏興相近色楞格河之南岸駐紮又曰楚庫柏興係俄羅國界相隔
我國喀爾喀部長台吉車凌札布之邊界博拉地方二百餘里其間皆山不甚大沿途皆林藪惟有杉松
樺樹而已色楞格河寬四五十丈不等水清溜急自西南向東北而流楚庫河水自東南流至柏興之南
十里外歸入色楞格河沿岸皆叢柳櫻榆

俄羅斯進

呈書籍記

書目附

何秋濤

大清受天命有九有薄海內外罔不臣服西北有俄羅斯國地荒遠負北冰海南鄰蒙古及諸回部慕我

朝德化歲時使其國秀穎子弟來 都城學滿漢文字誦習經史諸書 國家厚給廩糈精選文學之官以教習之歲滿則歸其本國復使其子弟來代謂之換班蓋我 聖朝聲教遠訖漸仁摩義舉凡遐荒遠徼莫不欲使之習道德而敦詩書斯誠亘古以來未有之盛舉也二百年來其國漸被風化文事益盛國人以本國文字纂集成書不下數十百種然限於疆域傳至中國者絕少其國民各分種族曰薩刺瓦族曰力丁族曰芬族曰日耳曼人曰猶太散民皆重希臘教門亦天主教別派也曰韃韃里族游牧於國南鄙奉回教卽西域回部種類曰甲才族亦游牧於國東南鄙奉佛教卽中國蒙古之別部也初蒙古土爾扈特部與準噶爾構釁北依俄羅斯俄羅斯以額濟勒河地處之乃明季時事也至乾隆三十六年土爾扈特汗渥巴錫率其河東戶口十餘萬人至伊犁歸附其河西戶口尙居俄羅斯皆習佛教道光二十五年俄羅斯國王表言丹珠爾經乃佛教所重而本國無之奏求頒賜 上命發雍和宮藏本八百餘冊賜之越數月其國王因肄業換班學生進京乃盡繕俄羅斯所有書籍來獻凡三百五十七號每號爲一秩裝飾甚華有書有圖惟通體皆俄羅斯字人不盡識當事者議發還之或曰斯乃所以爲報也卻之轉拂遠人之情則奏請收存於理藩院以俟暇日將繙譯焉於是軍機處存注檔冊例須先譯書名迺得其三百五十七號之書曰好事者爭相傳錄余亦得而逐焉考其中言彼國史事地理武備算法之書十

之五醫藥種樹之書十之二字學訓解之書十之二其天主教書與夫詩文等類僅十之一而已此其中足備掌故考核者多矣置之典屬掌之樞廷將來取次譯之於邊防軍政大有裨益其所繫豈淺渺哉昔大西洋利瑪竇等以明萬厯時入中國獻所著各書當時稱爲盛事不知西洋距中國絕遠利瑪竇等自進所爲書與其國王無與也至如艾儒略之職方外紀南懷仁之坤輿圖說皆入中國後所編纂類多張大彼教誇詫誕謾之詞不足爲據今俄羅斯漸被 文德淪浹已久其國王自獻書籍至三百餘種之多皆確實而有徵既遠勝艾南諸書之荒陋又其慕德恭順之懷迥逾尋常尤爲自古所未有夫豈明代利瑪竇等進書之事所可比擬於萬一哉余謂此千古希逢之盛會也不可以不記因次其書目於左以告來者

俄羅斯國進呈書籍總目

第一號俄羅斯國汗製總例十五本

第二號俄羅斯國汗製續纂新例三本

第三號俄羅斯國各省州邑資學治理畫一條例誌一本

第四號治國齊民誌一本

第五號俄羅斯國性理齊治誌一本

第六號俄羅斯國條例彙纂一本

第七號俄羅斯國防守叢林隘口推廣條例一本

第八號發明天地物理指南全書一本

第九號天地物理彙說一本

第十號釋明凡物性理指南誌五本

第十一號教習靈魄自知文一本

第十二號論性文一本

第十三號靈魄不泯釋文一本

第十四號魂化自持釋文一本

第十五號俄羅斯國行效外國事務論二本

第十六號各國彙史二本

第十七號資學古今寰海史三本

第十八號資學寰海世系史三本

第十九號寰海古今史彙纂十二本

第二十號資學寰海各國史一本

第二十一號外國史彙纂一本

第二十二號寰海史通纂三本

第二十三號發明西洋各國通例三本

第二十四號天下各國表文一本

第二十五號因時指訂各國歷代疆域地理圖一本

第二十六號俄羅斯國音丕喇托爾在位時發明西洋政事論二本

第二十七號竊佔俄羅斯汗位記六本

第二十八號開闢阿彌葉里喀新州地理誌一本

濤按當卽亞墨利加州也

第二十九號名媛彙史二本

第三十號名士圖像一本

經世文讀編

卷七十四 兵政十三

第三十一號名士表傳一本

第三十二號俄羅斯國史十三本

第三十三號又六本

第三十四號又五本

第三十五號初學必讀俄羅斯史一本

第三十六號初製資學國史一本

第三十七號俄羅斯史一本

第三十八號俄羅斯史彙一本

第三十九號又一本

第四十號南方居民史三本

第四十一號南方都汪河駐史三本

第四十二號俄羅斯國汗史一本

第四十三號又二本

第四十四號又二本

第四十五號俄羅斯國妃通鑑三本

第四十六號俄羅斯國妃史二本

第四十七號俄羅斯國妃自製誌六本

第四十八號俄羅斯國地理圖一本

第四十九號俄羅斯國武備誌三本

第五十號置兵出戰書五本

第五十一號行師各國書三本

第五十二號平定費陽梁地紀略一本

第五十三號武備誌四本

第五十四號又二本

第五十五號征法哪錫戰策一本

即佛郎西又稱法蘭西

第五十六號武備誌一本

第五十七號又一本

第五十八號紀年誌一本

第五十九號博羅抵腦戰策一本

第六十號那普哩勇犯界戰策誌二本

第六十一號平定空谷爾國方略二本

第六十二號又三本

第六十三號又二本

第六十四號又三本

第六十五號寄舟師信函二本

第六十六號舟師記四本

第六十七號名士集傳五本

第六十八號統兵元帥傳四本

第六十九號宰相元帥傳二本

第七十號征法哪錫名帥傳四本

第七十一號水師名帥傳四本

第七十二號俄羅斯國史十五本

第七十三號又三本

第七十四號又一本

第七十五號又一本

第七十六號又四本

第七十七號俄羅斯國妃史六本

第七十八號又一本

第七十九號俄羅斯國大元帥傳一本

第八十號又一本

第八十一號又二本

第八十二號又三本

第八十三號武臣傳三本

第八十四號俄羅斯國言行記三本

第八十五號俄羅斯國征法喇錫言行記一本

第八十六號言行記四本

第八十七號俄羅斯國大帥言行記一本

第八十八號俄羅斯國汗踐祚典禮一本

第八十九號各國地理誌一本

第九十號各國資學誘掖地理彙書二本

第九十一號地理總誌必讀一本

第九十二號地理總誌彙纂一本

第九十三號古地理總誌彙纂一本

第九十四號經行沿海記一本

第九十五號經行南洋記三本

第九十六號經行四方記四本

第九十七號週行沿海四方記二本

第九十八號又一本

第九十九號經行地理圖一本

第一百號入海經行記一本

第一百一號北海經行記三本

第一百二號四次至北海記一本

第一百三號阿彌葉喇喀州記一本

濤按當卽亞墨利加州

第一百四號阿細亞州記七本

卽亞細亞州

第一百五號發蒙週行天下四方記二本

第一百六號巡查南洋記三本

第一百七號經行沿海記一本

第一百八號天下奇物誌四本

第一百九號又二本

第一百十號天下地理人物圖像記二本

第一百十一號殊方景物圖覽一本

第一百十二號圖集三本

第一百十三號空谷爾國誌二本

第一百十四號奇物名人記傳彙書八本

第一百十五號奇物鑑五本

第一百十六號天下山水古蹟圖二本

第一百十七號格略齊雅國景物圖一本

第一百十八號什魏擦爾濟雅國景物圖一本

第一百十九號民生財產記一本

第一百二十號天下地理鑑三本

第一百二十一號俄羅斯國地理誌二本

第一百二十二號又一本

第一百二十三號童蒙必讀俄羅斯地理誌一本

第一百二十四號俄羅斯國誌二本

第一百二十五號俄羅斯國資治總記二本

第一百二十六號俄羅斯國各處方物誌一本

第一百二十七號俄羅斯國各處民生誌一本

第一百二十八號俄羅斯國辨明誌六本

第一百二十九號喀法喀斯所屬各處誌四本

第一百三十號俄羅斯都城誌三本

第一百三十一號又一本

第一百三十二號又三本

第一百三十三號莫斯科瓦南都誌一本

濤按卽莫斯科窪

第一百三十四號莫斯科瓦都城誌二本

第一百三十五號擦爾色庫葉都城記一本

第一百三十六號驛站指程二本

第一百三十七號俄羅斯國誌一本

第一百三十八號俄羅斯國時憲書一本

第一百三十九號古今錢法三本

第一百四十號各國錢法異同一本

第一百四十一號葉瓦魯巴州錢法一本

第一百四十二號俄羅斯國事功鑄錢集成一本

第一百四十三號地丁全書二本

第一百四十四號耕耘成法論二本

第一百四十五號地丁工作新編三本

第一百四十六號地丁工作成法一本

第一百四十七號地丁究源六本

第一百四十八號耕牧論一本

第一百四十九號鄉民耕種資學一本

第一百五十號又一本

第一百五十一號又一本

第一百五十二號耕種總論二本

第一百五十三號月令集要一本

第一百五十四號地丁書四本

第一百五十五號耕耘論一本

第一百五十六號種樹論一本

第一百五十七號種花草論一本

第一百五十八號種菜論一本

第一百五十九號防守植本論一本

第一百六十號山野養植樹木發明一本

第一百六十一號花木園亭圖一本

第一百六十二號建造樓臺書一本

第一百六十三號村居器具造法二本

第一百六十四號居家事務須知四本

第一百六十五號織染發明二本

第一百六十六號淘金新法發明一本

第一百六十七號各項工作發明二本

第一百六十八號俄羅斯國工作器具記四本

第一百六十九號本草綱目二本

第一百七十號初學必讀本草綱目一本

第一百七十一號又一本

第一百七十二號禽獸集圖一本

第一百七十三號又二本

第一百七十四號又一本

第一百七十五號本草損益二本

第一百七十六號俄羅斯國植木記一本

第一百七十七號草木記二本

第一百七十八號又六本

第一百七十九號金石記一本

第一百八十號發明土產金寶記二本

第一百八十一號金石總鑑三本

第一百八十二號土產辨明二本

第一百八十三號醫法論一本

第一百八十四號形體全錄一本

第一百八十五號形體全錄理解二本

第一百八十六號希嚙爾吉醫書二本

第一百八十七號醫法新編四本

第一百八十八號千金一方一本

第一百八十九號療病用藥記一本

第一百九十號又一本

第一百九十一號本草備要一本

第一百九十二號貼藥爾撒醫書十本

第一百九十三號內症記一本

第一百九十四號形體記二本

第一百九十五號對症用藥記五本

第一百九十六號又三本

第一百九十七號又一本

第一百九十八號慎脰病形書一本

第一百九十九號小兒疾病辨明論一本

第二百號發明涼水治病論一本

第二百一號醫獸用藥治明一本

第二百二號醫病發解一本

第二百三號發明痔瘡論一本

第二百四號種牛痘法一本

第二百五號眼科二本

第二百六號魂病論一本

第二百七號延壽法一本

以上醫書
三十九號

第二百八號算法全書二本

第二百九號次學算法全書一本

第二百十號算法本源一本

第二百十一號次學算法本源一本

第二百十二號算法數目一本

第二百十三號算法歸除共一本

第二百十四號

歸入前號

第二百十五號阿勒喀布拉數書一本

第二百十六號貼斐葉楞齊數書一本

第二百十七號貼斐葉楞齊數書發明一本

第二百十八號又二本

第二百十九號又一本

第二百二十號又一本

第二百二十一號又一本

第二百二十二號地勢高下圖一本

第二百二十三號隴畝分界書一本

第二百二十四號日月星辰論一本

第二百二十五號阿斯托羅密雅書一本

第二百二十六號初學天地日月星辰論一本

第二百二十七號宿繪三十篇一本

第二百二十八號氣遇靈機二本

第二百二十九號天地定理一本

第二百三十號五行晰解一本

第二百三十一號天地性理習解二本

第二百三十二號費依什喀書一本

第二百三十三號又一本

第二百三十四號風水工作器用晰解一本

第二百三十五號擇地列陣建營圖說一本

第二百三十六號定準日出日入書一本

第二百三十七號用兵技藝謀略論一本

第二百三十八號軍營修造晰解二本

第二百三十九號用兵技藝謀略論二本

第二百四十號兵枝論二本

第二百四十一號又一本

第二百四十二號戰策一本

第二百四十三號堅壘論二本

第二百四十四號礮兵法解二本

第二百四十五號阿爾塔列勒書一本

第二百四十六號行兵進退論一本

第二百四十七號行兵戰守論二本

第二百四十八號管船官員事宜論一本

第二百四十九號慎守造用軍器發明一本

第二百五十號戰陣總論一本

第二百五十一號俄羅斯國兵丁各項衣服器械記三本

第二百五十二號樂記一本

第二百五十三號樂理晰解一本

第二百五十四號傳真古法全書一本

第二百五十五號俄羅斯字書一本

第二百五十六號俄羅斯資學字書一本

第二百五十七號俄羅斯字式新書一本

第二百五十八號俄羅斯習字書一本

第二百五十九號初學俄羅斯字式一本

第二百六十號俄羅斯字式發明一本

第二百六十一號又一本

第二百六十二號俄羅斯各種字式發明一本

第二百六十三號俄羅斯字式理解一本

第二百六十四號俄羅斯各種字式發明一本

第二百六十五號戶學須用俄羅斯字式一本

第二百六十六號俄羅斯字式新書一本

第二百六十七號俄羅斯國方言易學發明一本

第二百六十八號俄羅斯國方言易學發明約編一本

第二百六十九號又一本

第二百七十號又一本

第二百七十一號又一本

第二百七十二號俄羅斯國方言資學一本

第二百七十三號俄羅斯文理解一本

第二百七十四號又一本

第二百七十五號又二本

第二百七十六號又三本

第二百七十七號又四本

第二百七十八號又一本

第二百七十九號詩一本

第二百八十號西洋各國文風記二本

第二百八十一號文理新解一本

第二百八十二號俄羅斯國文風記一本

第二百八十三號古文風記一本

第二百八十四號又一本

第二百八十五號斯拉費揚各部落風俗書一本

第二百八十六號俄羅斯方言晰解二本

第二百八十七號俄羅斯國文風記二本

第二百八十八號俄羅斯國方言叢書六本

第二百八十九號德爾日費英氏文人編五本

第二百九十號底米忒里氏詩集一本

第二百九十一號柯里嚕幅氏詩集一本

第二百九十二號喀拉馬星氏各家文人編九本

第二百九十三號又九本

第二百九十四號又二本

第二百九十五號又十二本

第二百九十六號又二本

第二百九十七號又十二本

第二百九十八號又四本

第二百九十九號又三本

第三百號又一本

第三百一號又一本

第三百二號又四本

第三百三號寄休致武弁傳一本

第三百四號俄羅斯名家叢文十六本

第三百五號俄羅斯論一本

第三百六號俄羅斯文人百家傳二本

第三百七號各種文編五本

第三百八號俄羅斯文編法選二本

第三百九號俄羅斯文編摘繹一本

第三百十號依里瓦達詩集二本

第三百十一號養幼編一本

第三百十二號養幼發解二本

第三百十三號幼學四本

第三百十四號又二本

第三百十五號幼學各種文風集六本

第三百十六號又二本

第三百十七號幼學十本

第三百十八號幼學故事四本

第三百十九號益幼全書七本

第三百二十號

歸入前號

第三百二十一號幼藝必讀一本

第三百二十二號幼學各國名士傳十二本

第三百二十三號初學次序七本

第三百二十四號

歸入前號

第三百二十五號發蒙各種圖籍一本

第三百二十六號幼學故事二本

第三百二十七號類鑑十七本

第三百二十八號又七本

第三百二十九號天下地理全圖一本

第三百三十號又一本

第三百三十一號古地理圖一本

第三百三十二號俄羅斯國地理圖一本

第三百三十三號天下東西地理圖二本

第三百三十四號五州地理圖一本

第三百三十五號額俄羅斯怕州地理圖一本濤按卽歐羅巴州

第三百三十六號鄰國地理全圖一本

第三百三十七號俄羅斯水陸地圖一本

第三百三十八號天下土產圖一本

第三百三十九號額俄羅斯怕州地理圖一本濤按卽歐羅巴州

第三百四十號丕葉忒爾布爾噶城等處圖說二幅濤按志略云彼得羅堡又作桑比斯德爾不爾扼當卽此丕葉忒爾布爾噶也

第三百四十一號又一幅

第三百四十二號又二幅

第三百四十三號又二幅

第三百四十四號又二幅

第三百四十五號又二幅

第三百四十六號又二幅

第三百四十七號丕葉忒爾布爾噶宮室圖一幅

第三百四十八號戰圖一幅

第三百四十九號又一幅

第三百五十號又一幅

第三百五十一號又一幅

第三百五十二號又一幅


第三百五十三號舟師海戰圖一幅

第三百五十四號法哪錫兵丁渡河圖一幅


第三百五十五號祝謝天主圖一幅

第三百五十六號天地儀器二具

第三百五十七號天地儀器釋文一本







DS
754
.K8
v.20

皇朝經世文續編卷七十五目錄

兵政十四 塞防下

從軍圖記

迤西移改協營添設汛兵疏

林則徐

臺地後山請開舊禁疏

沈葆楨

南北路開山並擬布置琅璫旗後各情形疏

沈葆楨

請移駐巡撫疏

沈葆楨

故相遺言

李雲麟

論伊犁

李雲麟

論邊防

李雲麟

論新疆改省


李雲麟

善後方略

李雲麟

奏爲酌撤旗兵疏

崇實



擬添設茂興地方分防路記疏

文緒

奏爲兩旗爭地查辦未公據實陳明疏

奎斌

遵旨籌議臺灣改設行省事宜疏

楊昌濬
劉銘傳

吉林防務

胡傳

答沈韻松大使

胡傳

上吳清卿星使書

胡傳

對張幼樵學士問東陲道里形勢

胡傳

重修甯古塔牙城記

代作

胡傳

皇朝經世文續編卷七十五

上海葛士濬子源輯

兵政十四 塞防下

從軍圖記

管同

四川之西番夷以百數其大而悍者曰果羅克其地踞黃河爲堡寨西接崑崙北通青海喜游牧而嫺弓馬綽斯甲諸番皆讐而畏之西藏之僧實名曰喇嘛其尊者號能知來世事自番夷諸大邦古所稱三十六國者其君長率稽首膜拜聽命惟謹雖中國亦禮之藉以羈縻異域云而果羅克獨不之畏嘉慶十三年堪布喇嘛者使其徒達賴入貢 上嘉之賜黃段珊瑚珠玉等物歸出關道果羅克中爲所奪於是天子赫然震怒特命四川提督豐紳率師致討而蕭山漁浦陳君實以鹽場官從參軍事於時十月霜虐風嚴大漠之間行千里無一人蹟衆皆謂異域苦寒深入非善計公不聽君謂兵法攻其無備出其不意苦寒彼無備時也力勸諸人從公令參將沈宗文以阻軍且就戮君謂宗文嘆喑宿將宜且貸以收後效軍旣行君說豐公曰綽斯甲三雜谷諸番世與果夷讐而能知其道重撫而收之彼將致死助我成功易矣豐公用其謀卒以土兵五千入果羅克城殲擒其衆番酋大怖頓首謝罪率獻所奪喇嘛諸物請罷兵

焉師還君乃自述從軍始末屬善繪者爲之圖是役也豐公排衆議成大功卓然爲今之名將矣君書生也年少始仕入戎馬之場乃能識事變諳戎情取助於所讐責功於有罪卒以殲服豪強揚天威於萬里之外世皆謂書生不足用不足用者則有矣毋亦非所以量如君輩者乎同竊幸觀君之圖而樂爲海內服官者道君事也於是乎書

迤西移改協營添設汛兵疏

林則徐

竊照滇省之永昌順甯大理三府暨蒙化一廳並楚雄府所轄之姚州皆處迤西邊界山深箐密道阻且長雜處漢回易藏奸宄本年自春至夏先在彌渡用兵繼由保山永平遞及蒙化之大小圍埂終而辦至姚州皆藉所調大兵分投緝匪除剿殺不計外先後獲犯一千餘名均已分別訊明寘之於法經此一番懲創閭閻始能安枕商旅乃得通行惟地段綿延各營汛相距既遙卽有鞭長莫及之勢迫聞焚搶劫殺兵至而賊已遠颺是以今夏軍務竣時雖將全師凱撤而猶酌留兵弁分段駐防入秋以來仍陸續報獲逸犯多名地方益臻靜謐惟各處情形不一有須互相鈐制者自宜以客兵換防有須永固藩籬者又宜以土兵駐守爲久遠計不得不相度要隘移汛添兵以期巡察周詳互相犄角臣林則徐前在迤西駐劄時卽與臣榮玉材率同迤西道王發越隨處查勘公同酌議迨回省後復與臣程喬采暨在省司道節次

籌商如永昌地方最稱扼要在 國初原設永順鎮總兵統轄中左右三營迨後改鎮爲協祇留左右二營左營兼中軍都司一員右營守備一員均駐永昌府城內自城外至大理府五百餘里路途險阻而實爲來往通衢乃僅有把總外委汛地並未駐有千總以上之武職殊屬非宜今擬將永昌存城之右營守備一員移駐緊要之永平縣城其自瀾滄江北岸之杉木和汛直至東北大路之漾濞汛皆應歸於右營管轄查永平原駐把總一弁帶兵三十四名未免單薄今擬添募兵八十六名連原駐之兵合共一百二十名駐劄永平以爲永昌門戶又永平轄之永定站亦係大路距城約及百里爲盜賊出沒之所向未駐兵今擬添募兵五十名撥一外委督巡作爲永定汛又龍街距城一百二十里回民多而且悍向來亦未駐兵今擬添募兵四十名撥一外委管帶作爲龍街汛又漾濞雖在蒙化廳界內而距廳城約二百里其汛地本係永昌右營所轄但向來僅以額外外委帶兵三十二名駐劄相近之柏木鋪而於漾濞上下兩街烟戶極多之處雖有巡檢分駐並無武弁專防殊不足以資巡緝今擬移撥永昌千總一弁添募兵八十名令其管帶駐守其柏木鋪原駐兵弁卽作爲漾濞汛協防統歸右營守備管轄又永昌左營之姚關汛壤接夷地距城一百六十八里原設把總一弁駐兵六十名今擬添募兵四十名共成一百名駐守要隘又舊乃汛距城四百五十里本係右營汛地今應改歸左營其原設代防外委一弁駐兵三十名在昔

足數防守今將保山回民安插於官乃山已有二百餘戶而尙有回民續求赴彼居住者該山係舊乃汛所轄防範稽查更關緊要擬改撥把總一弁添募兵五十名以資彈壓又永昌坡距城一百八十里地形險要向只駐兵十二名今擬添募兵六十二名移把總一弁赴彼管帶以資防守至永昌協左右營汛地前因都守均在本城故分汛頗有錯雜今既將守備移駐永平應按各汛地勢分別改隸兩營如姚關舊乃永昌坡蟒水枯柯河潞江猛峒戡子鋪猛賴栗柴堤觀音山十一汛應歸左營都司管轄杉木和竹魯凹燕子河北冲河灣永平城永定龍街柏木鋪漾濞十汛應歸右營守備管轄此永昌一帶添改備弁兵丁之情形也但永郡最爲險要者莫過於瀾滄江橋往年回匪之燒橋上冬哨匪之折板皆謂此橋一斷官兵卽不能渡江以致匪類恃爲負隅之固查向來該橋一帶只派兵丁八名輪巡固屬無益今卽添營移汛若僅守以本處兵丁仍恐其與哨匪勾通緩急究難盡恃臣林則徐前於永昌閱兵摺內業經先陳大概茲復公同商議似此咽喉之地宜以客兵換防擬由提標派出千總一弁帶兵一百名駐劄瀾滄南岸之平坡該處距險憑高四面皆堪瞭望以之守禦折衝自當倍形得力每屆半年調換一次俟換防者到彼准原駐者回營以均勞逸但客兵於地形未盡熟悉仍須主兵協同守望不任置若罔聞此後擬將江橋地方作爲永昌左右兩營公汛如該處失事將永昌都守與派防之提標千總一體懲處以期各顧

考成此又酌擬主客互防之原委也至順甯府地方南北相去七百餘里從前營伍原隸永順鎮標迨後改爲順雲營以參將一員管轄駐劄緬甯廳城內離順甯府城三百餘里而所轄之錫臘等處接連夷地回匪每與夷衆勾結爲奸且距營旣遙恐參將難於遠馭查龍陵協副將一缺雖處邊隅而地方現甚安靜且龍陵距騰越鎮不遠該鎮總兵堪以隨時策應今擬將順雲營參將與龍陵協副將兩缺互相調換作爲順雲協副將龍陵營參將並龍陵營中軍都司亦改爲順雲協中軍都司均移駐緬甯廳城將該協錢糧歸都司經管其順雲營左軍守備仍駐順甯府城右軍守備則須移駐錫臘查錫臘原只外委一弁帶兵十八名駐劄今情形大非昔比夷回均須防範兵力不可太單數年以來皆有留防弁兵三百名現擬以守備兵久駐其地所需兵額酌定二百四十名除原駐兵十八名外尙應添兵二百二十二名又右甸一城介在永順兩府之間是以永昌協與順雲營皆有右甸名目然該處距順甯府城祇一百四十里而距永昌府城二百一十里今旣於永順坡添兵駐守則永昌協不必再立右甸汛之名目自應歸於順雲專轄查右甸城毗連猛庭寨漢回雜處屢啟衅端原駐把總一弁帶兵四十三名爲數本少近年多事之際添駐防兵每及數百名今匪類多已就擒仍須時加防範擬酌添守兵三十七名連原駐之四十三名共成八十名並添撥額外外委一名隨同把總管帶又阿魯史塘亦係犬牙交錯處所原設塘兵五名

不數稽察今擬改塘爲汛添兵三十五名撥順雲營存城外委一弁管帶以上三汛共應添兵二百九十四名查順雲之兵分汛多而存城少龍陵之兵分汛少而存城多除右甸阿魯史二處所添兵數仍於順雲存城兵內改撥外所有錫臘應添兵數卽於龍陵存城兵內改撥作爲新設順雲協額兵不必另行招募千總以下各弁均不更動惟其中軍都司旣改歸順雲協應將龍陵右營守備改爲中軍守備並將左右兩營改爲左右哨由該備督率兩哨千總經理營務此順甯一帶酌改營制之情形也至大理府爲提督駐劄之所復有城守一營似兵力已屬充足但城守營汛地綿亘三縣四州而額兵僅七百餘名逐日解犯護餉等差絡繹不絕勢難再行裁撥其提標中左右三營之兵皆爲徵調而設若將標兵改汛殊與營制不符現查太和趙州交界之下關商旅輻輳向無員弁駐劄亦屬非宜今擬添募兵一百名撥大理城守營存城之右哨千總一弁移赴下關駐防作爲該千總汛地其原設巡防上下兩關汛之右哨外委千總前往上關駐劄以專責成又彌渡把總卽令專駐太和縣城毋庸兼管並另派左哨外委千總前往上關駐劄以專責成又彌渡地方甫經戡定原駐外委一弁帶兵四十名尙覺單薄今擬添募兵四十名又紅巖一處亦匪類聚集之區向無駐劄弁兵今擬添募兵四十名撥城守左哨二司外委在紅巖駐劄巡防與趙州彌渡上下聯絡統歸大理城守都司管轄其餘各汛悉仍其舊此大理一帶移汛添兵之情

形也又蒙化一廳最多回戶而其汎地係景蒙營遊擊管轄該遊擊向駐景東廳城距蒙化廳城已有四百七十里而自蒙化廳至扼要之三勝站又七十餘里中間未設塘汎實恐疏虞今擬將景蒙營存城之右哨二司把總移駐三勝站由該營撥兵八十名隨同駐劄並巡查大小圍埂及茅草哨等處以免空虛至楚雄原有楚姚鎮標自裁鎮改協之後其分駐姚州者惟千總一弁帶兵六十七名除分布二十二塘計兵四十五名外存城者僅兵二十二名如上年該處漢回焚殺之事在城兵丁卽不敷彈壓今擬添募兵五十三名連各塘共成一百二十名俾共防守城池巡緝附近匪類此又蒙化姚州二處改汎添兵之情形也以上所改協營汎城凡駐防各員弁均於存城內酌量移撥毋庸增添惟兵丁除撥抵外計應添募守兵六百四十一名無閏之年需餉銀七千六百九十二兩有閏加增銀六百四十一兩兵米每名每月例支三斗今擬概以折色散放每月折銀三錢無閏之年需米折銀二千三百七兩六錢有閏加增銀一百九十二兩三錢但思 國家經費有常曷敢以添餉增兵復由部中於正餉之外另籌撥款惟當於本省自行籌畫庶足以資久遠而節度支查滇省鹽務課款中因銷數暢旺於正溢課外尙有溢餘銀數萬兩道光八年前督臣阮元奏請按年據實造報以一半歸部報撥一半留存本省以備邊費各項例不准銷之款就此支銷奉 旨允准在案今因迤西漢回甫定邊地綿長移伍添兵實善後中必不可緩之

務合無仰懇 聖恩准於本省鹽課溢餘項下每年儘先動撥銀一萬兩遇閏加增八百三十二兩九錢作爲新添兵餉米折之用此款開除之外尙應存溢餘若干再照 奏定章程以一半歸部充公一半留存本省邊費每年估撥兵餉之時卽先將增添餉銀米折數目聲明扣除毋庸請撥以清款目至移駐都守應蓋衙署及千總外委兵弁均須建蓋汛房經費頗繁亦未便開銷款項現據大理府知府唐惇培捐銀二千兩準升蒙化同知汪之旭捐銀一萬兩騰越廳同知彭崧毓捐銀三千兩共銀一萬五千兩堪以分撥估建如尙不敷再由臣等另行籌給此項工程既係捐辦應 奏明請免造冊報銷至永昌江橋換防弁兵鹽菜口糧每年約需銀一千五百兩並往返軍裝擡費卽由本省邊費內支放毋庸另籌如此一摺注開於 帑項既可不糜而營伍堪資實用總期久安長治以仰副 聖主整飭營伍綏靖邊陲之至意所有添募兵丁現卽豫飭各營汛先行認真挑募務擇其年力強壯技藝可觀者方准應募由該管將備逐層考驗報查不許以老弱一名充數俟奉 俞允後卽於二十九年正月起一體到汛值防以免拖前搭後其餘未盡事宜另容隨時確核分別 奏咨辦理

臺地後山請開舊禁疏

沈葆楨

竊臣等於十二月初一日業將南北路開通及擬將琅璫旂後等處布置各情形奏明在案是日奉到本

年十月二十三日 上諭海防亟須認真講求以期有備無患淮軍應如何分紮要隘著沈葆楨等酌度
布置南北開路以及郡城修築礮壘並著該大臣等悉心經理毋得稍形鬆懈琅璫諸社亟須次第清查
北路生番撲犯礮樓傷斃兵丁亟應妥辦著沈葆楨文煜李鶴年王凱泰潘蔚派員設法招徠隨時撫恤
招墾事宜仍商同羅大春認真籌畫臺郡城工安平礮臺一切工程沈葆楨務當悉心經畫毋得畏難思
阻各等因欽此十二月初四日復奉到本年十一月十三日 上諭琅璫一帶善後機宜亟須悉心籌畫
妥善所有招撫生番及修城開路各事宜著沈葆楨文煜李鶴年王凱泰潘蔚等懷遵十月二十八日
諭旨妥爲布置毋稍因循沈葆楨等惟當於此時力圖自強之策以期未雨綢繆庶幾有備無患黎兆棠
現經簡放津海關道著沈葆楨傳知病痊後迅速赴任以重職守各等因欽此臣等伏讀之下仰見 聖
謨遠大欽感莫名因思全臺後山除番社外無非曠土邇者南北各路雖漸開通而深谷荒埔人蹤罕到
有可耕之地而無入耕之民草木叢雜瘴霧下垂兇番得以潛伏狙殺縱闢蹊徑終爲畏途久而不用茅
將塞之日來招集墾戶應者寥寥蓋臺灣地廣人稀山前一帶雖經蕃息百有餘年戶口尙未充牣內地
人民向來不准偷渡近雖文法稍弛而開禁未有明文地方官思設法招徠每恐與例不合今欲開山不
先招墾則路雖通而仍塞欲招墾不先開禁則民裹足而不前臣等查舊例稱臺灣不准內地民人偷渡

拏獲偷渡船隻將船戶等分別治罪文武官議處兵役治罪又稱如有充作客頭在沿海地方引誘偷渡之人爲首者充軍爲從者杖一百徒三年互保之船戶及歇寓知情容隱者杖一百枷一箇月偷渡之人杖八十遞回原籍文武失察者分別議處又內地商人置貨過臺由原籍給照如不及回籍則由廈防廳查明取保給照該廳濫給降三級調用又沿海村鎮有引誘客民過臺數至三十人以上者壯者新疆爲奴老者烟瘴充軍又內地民人往臺者地方官給照盤驗出口濫給者分別數次罰俸降調又無照民人過臺失察之口岸官照人數分別降調隱匿者革職以上六條皆嚴禁內地民人渡臺之舊例也又稱凡民人私入番境者杖一百如在近番處所抽藤釣鹿伐木採纓者杖一百徒三年又臺灣南勢北勢一帶山口勒石分爲番界如有偷越運貨者失察之專管官降調該管上司罰俸一年又臺地民人不得與番民結親違者離異治罪地方官參處從前已娶者毋許往來番社違者治罪以上三條皆嚴禁臺民私入番界之舊例也際此開山伊始招墾方興臣等揆度時勢合無仰懇 天恩將一切舊禁盡與開豁以廣招徠俾無瞻顧嗣又據臺灣道夏獻綸詳稱舊例臺灣鼓鑄鍋皿農具之人向須地方官舉充由藩司給照通臺祇二十七家名曰鑄戶其鐵由內地漳州采買私販者治罪邇來海口通商鐵舫載在進口稅則昔在內地所出今自西洋而來情形迥異而不肖兵役人等往往向民間藉端訛索該鑄戶亦恃官舉任

意把持民甚苦之又臺產竹竿向因洋面不靖恐大竹篷筏有關濟匪因禁出口以致民間竹竿經過口岸均須稽查不知海船蒲布皆可爲帆無須用竹立之厲禁徒爲兵役留一索詐之端民間多一受害之事應請毋庸查禁等因臣等思當茲開闢後山百凡以便民爲急不得不因時變通合無再懇 天恩飭地方官將鐵竹兩項悉弛舊禁以斷胥役勒索之路以濟閭閻日用之需

南北路開山並擬布置瓊旂後各情形疏

沈葆楨

竊臣等於十一月十五日將臺地善後事宜及請移駐巡撫緣由奏明在案而於南北兩路撫番開路情形未遑詳述茲疊據報稱南路一帶自九月間袁聞柝率綏靖一軍越崑崙坳而東張其光隨派副將李光領前隊繼之十月初一日李營至坳東袁聞柝乃得拔營前進初七日至諸也葛社自崑崙坳至諸也葛計程不過數十里而荒險異常上崖懸升下壑皆墜山皆北向日光不到古木慘碧陰風怒號勇丁相顧失色不能不中途暫駐以待後隊之來當袁聞柝駐營諸也葛之日正張其光在內埔辦理兇番之時內社地有老鴉石者崑崙坳之西境也初八日張其光左營有勇丁五人暮經該處草間突起數番截殺何禮一名鎗傷譚大一名旋經都司張欣守備周恩培等派隊追趕該番逃散無蹤隨傳內社頭人陳汝玉查係七家蛋社兇番正在勒限緝辦二十四日參將周善初出哨雙溪路見無首勇丁橫臥血地方深

疑駭旋見兇番多人執械向山坡狂竄揮勇追之適周恩培出哨橫截坡前鎗斃其一坵擒其三餘悉散走訊供被殺者曰拉立被擒者曰亞利目曰蘇拉曰白牛俱爲陳阿修社番卽割路旁勇丁之首者譚大何禮之死亦該番糾同七家蛋社所爲不諱張其光卽將三人就地正法以快人心二十日都司張朝光率兩哨營於大石巖都司張天德亦率隊至諸也葛袁聞柝乃得拔營前赴卑南諸也葛以下地略平坦但榛蕪未翦焚萊伐木頗費人功而該丞累夜露宿空山感受瘴癘染病甚重臣等聞信卽委候補通判鮑復康馳往暫領其軍俾歸郡醫治未至而該丞已輿疾率旅徑抵卑南張天德一軍亦已趨紮大貓狸與之犄角辰下卑南一路業已開通其崑崙左近雖有兇番出沒已分別懲儆諒無敢生心惟山道險遠糧運殊艱而卑南一帶海口當此東北風司令波濤拍岸倒捲如壁船隻不能擺泊現聞袁聞柝病體漸輕鮑復康亦已到軍自內埔至卑南均已派營分布聲勢尙能聯絡此南路近日開山之情形也臺北一帶疊准提臣羅大春函稱自九月十八日派都司陳光華爲首隊守備李英千總王得凱爲次隊遊擊李得升爲三隊前赴新城別派軍功陳輝煌率兩哨前赴大清水溪再派總兵戴德祥分三哨填紮大南澳分二哨前紮大濁水溪時正風雨連山諸軍阻不能進二十五日天晴陳輝煌先至大濁水溪旋有兇番抗拒經兵勇擊斃二人隨卽獸散李得升李英陳光華等踵至會勘形勢近溪荒壤周圍約寬數十里惟

地皆沙石不及大南澳之膏腴溪岸南北約距三十餘丈波流陡急副將周維先等連日趕造正河支河木橋各一條工程既竣各軍乃得越溪而前自大濁水溪以往前者曰小清水溪後者曰大清水溪十月初八日陳光華一營紮小清水陳輝煌等進紮大清水隨有新城通事李阿隆等帶大魯閣番目十二人來迎願爲嚮導陳輝煌李英王得凱等各軍遂於十三日抵新城十四日李得升所部亦至均營於新城河東時又有符吻豆嚨等社番目來迎均各分別賞犒我軍遂趨紮歧萊花連港之北此地蓋後山橫走秀姑巒之道也自蘇澳至新城計山路二萬七千餘丈自新城至花蓮港計平路九千餘丈統計二百里有奇而沿途碉堡除蘇澳至大南澳已設者不計外應添建十有二處均已興工惟大南澳至大濁水溪一帶兇番充斥狙殺行人因於大南澳山腰再闢一路旁通新城一以避海濱懸崖之險一以塞兇番歧出之途經派千總馮安國帶勇往辦涉溪五重方闢地十餘里十一月十一十三等日勇丁正在開路突有兇番千餘分段埋伏放槍我軍竭力抵敵經守備黃明厚等擊斃四人始退是日我兵陣亡者四人受傷者十八人十五日行至一崇山之麓我兵正在峽中開鑿忽聞槍聲四起抵禦兩時之久兇番愈多黃明厚馮安國料該番等傾社而至社中必空分隊繞擣果有草窠數百闌其無人惟見新舊髑髏每窠或數十顆百餘顆不等穢臭難聞旋乘暮風縱火焚藁十數間陣番始散是日計亡兵勇四名重傷者二十

名而哨長祝榮三胸受槍傷頗重其駐濁水溪之勇數十人由小南澳運糧而歸亦於十三日路過石壁突遇兇番蜂擁包鈔陣亡者二名被迫落海者四人重傷者一名經守備朱榮彪馳隊赴救始各駭散而十五日五里亭地面復報稱兇番殺斃民人二名羅大春以番族肆擾難疏隄防惟山場遼闊營勇不敷分布飛函商請添兵前來臣等卽紮駐彰化之宣義左右兩軍赴之想日內可到新城歧萊一帶應如何設立營汛建造墩臺俟羅大春親至相度再籌布置此北路近日開山之情形也至琅璦一帶臣等復派淮軍兩營紮統領埔王開俊一營紮風港據報十月三十日有日本輪船一隻泊龜山下隨有五人登岸周覽舊營時許始歸十一月十一日復有輪船一隻泊清港口隨有西洋人五名登岸經前臺灣鎮曾元福軍功汪兆榮阻詰據稱係簪文國人查西洋向無此國詢諸日意格云殆日耳曼轉音之訛也該洋人求至新營一觀淮軍管帶官李常孚胡國恆等整隊而出洋人旋即下船開洋而去臣等思急於琅璦建城置吏以爲永久之計本月初五日臺灣道夏獻綸候補道劉璈先赴琅璦臣保楨擬初四日同臺灣府周懋琦等親赴該處察勘形勢應如何舉辦之處再行請 旨定奪至臺南旂後海口峭壁洪流洶稱天險前經夏獻綸履勘會商淮軍統領唐定奎鑿山壘土建礮臺六座以固海防唐定奎委候補府田勤生等挑選勇於十一月初三日興工理合聲明

請移駐巡撫疏

同治十三年十一月

沈葆楨

竊臣等於十月二十七日將收回草房營地各情形奏明在案因思洋務稍鬆卽善後不容稍緩惟此次之善後與往時不同臺地之所謂善後卽臺地之所謂剏始也善後難以剏始爲善後則尤難臣等曩爲海防孔亟一面撫番一面開路以絕彼族覬覦之心以消目前肘腋之患固未遑爲經久之謀數月以來南北諸路縋幽鑿險斬棘披荆雖各著成效卑南歧萊各處雖分列軍屯祇有端倪尙無綱紀若不從此悉心籌畫詳定規模路非不已開也謂一開之不復塞則不敢知番非不已撫也謂一撫之不復疑則不敢必何則臺地延袤千有餘里官吏所治祇濱海平原三分之一餘皆番社耳國家並育番黎但令薄輸土貢永禁侵陵意至厚也而奸民積匪久已越界潛蹤驅番佔地而成窟穴則有官未開而民先開者入山旣深人迹罕到野番穴處涵育孳生則有番已開而民未開者壘巘外包平埔中擴鹿豕遊竄草木蒙茸地廣番稀棄而弗處則有民未開而番亦未開者是但言開山而山之不同已若此生番種類數十大概有三牡丹等社恃其悍暴劫殺爲生醫不畏死若是者曰兇番卑南埔裏一帶居近漢民略通人性若是者曰良番臺北斗史等社雕題鰐面不外通屯聚無常種落難悉獵人如獸雖社番亦懼之若是者曰王字兇番是但言撫番而番之不同又若此夫務開山而不先撫番則開山無從下手欲撫番而不

先開山則撫番仍屬空談今欲開山則欲屯兵衛曰刊林木曰焚草萊曰通水道曰定壤則曰招墾戶曰給牛種曰立村堡曰設隘礮曰致工商曰設官吏曰建城郭曰設郵驛曰置廨署此數者孰非開山之後必須遞辦者今欲撫番則曰選土曰曰查番戶曰定番業曰通語言曰禁仇殺曰教耕稼曰修道塗曰給茶鹽曰易冠服曰設番學曰變風俗此數者又孰非撫番之時必須並行者雖然此第言後山耳其繁重已若此山前之入版圖也百有餘年一切規制何嘗具備就目前之積弊而論班兵之情竄也蠹役之盤踞也土匪之橫恣也民俗之悖淫也海防陸守之俱虛也械鬪紮厝之迭見也學術之不明庠序以容豪猾禁令之不守烟賭以爲饕殮官斯土者非無振作有爲正己率屬之員始苦於事權之牽制繼苦於毀譽之混淆救過不遑計功何自使不力加整頓一洗浮澆但以目下山前之規模推而爲他日山後之風氣雖多一新闢之區適多一藏奸之藪臣等竊以爲未可也嘗綜前後山之幅員計之可建郡者三可建縣者有十數固非一府所能轄欲別建一省又苦器局之未成而閩省向需臺米接濟臺餉向由省城轉輸彼此相依不能離而爲二環海口岸處處宜防洋族教堂漸漸分布居民向有漳籍泉籍粵籍之分番族又有生番熟番屯番之異氣類既殊撫馭匪易況以剗始之事爲善後之謀徒靜鎮之非宜欲循例而無自使臣持節可暫而不可常欲責效於崇朝兵民有五日京兆之見倘逾時而久駐文武有兩姑爲婦

之難臣等再四思維宜仿江蘇巡撫分駐蘇州之例移福建巡撫駐臺而後一舉而數善備何以言之鎮道雖有專責事必稟承督撫而行重洋遠隔文報稽延率意徑行又嫌專擅駐巡撫則有事可以立斷其便一鎮治兵道治民本兩相輔也轉兩相妨職分不相統攝意見不免參差上各有所疑下各有所恃不賢者以爲推卸地步其賢者亦時時存形迹於其間駐巡撫則統屬文武權歸一尊鎮道不敢不各修所職其便二鎮道有節制文武之責而無遴選文武之權文官之貪廉武弁之勇怯督撫所聞與鎮道所見時或互異駐臺則不待采訪而耳目能周黜陟可以立定其便三城社之巨姦民間之冤抑覩聞親切法令易行公道速伸人心帖服其便四臺民烟癮本多臺兵爲甚海疆營制久壞臺兵爲尤良以弁兵由督撫提標抽取而來各有恃其本帥之見鎮將設法蠲磨只求其不生意外之事是以比戶窩賭如賈之於市農之於田有巡撫則考察無所瞻徇訓練乃有實際其便五福建地瘠民貧州縣率多虧累恆視臺地爲調劑之區不肖者覩法取盈往往不免有巡撫以臨之貪黷之風得以漸戢其便六向來臺員不得志於鎮道及其內渡每造蜚語中傷之鎮道或時爲所挾有巡撫則此技悉窮其便七臺民遊惰可惡而戇直實可憐所以常聞蠢動者始由官以吏役爲爪牙吏役以民爲魚肉繼則民以官爲仇讐詞訟不清而械鬪紮屠之端起奸宄得志而豎旗聚衆之勢成有巡撫則能預拔亂本而塞禍源其便八況開地伊始

地殊勢異成法難拘可以因心裁酌其便九新建郡邑驟立營堡無地不需人才丞倅將領可以隨時札調其便十設官分職有宜遠久者有屬權宜者隨時增革不至廩食之虛糜其便十有一開煤鍊鐵有第資民力者有宜參用洋機者就近察勘可以擇地而興利其便十有二夫以臺地向稱饒沃久爲他族所垂涎今雖外患暫平旁人仍眈眈相視未雨綢繆之計正在斯時而山前山後其當變革者其當新建者非十數年不能成功而化番爲民尤非漸漬優柔不能渾然無間與其苟且倉皇徒滋流弊不如先得一主持大局者事事得以綱舉目張爲我國家億萬年之計況年來洋務日密偏重在於東南臺灣海外孤懸七省以爲門戶其關係非輕欲固地險在得民心欲得民心先修吏治營政而整頓吏治營政之權操於督撫總督兼轄浙江移駐不如巡撫之便臣等明知地屬封疆事關更制非部民屬吏所應越陳而夙夜深思爲臺民計爲閩省計爲沿海籌防計有不得不出於此者敢不據實上聞以爲芻蕘之獻

故相遺言

西陲述略

李雲麟

當光緒紀元之始海防邊防並急冬十一月雲麟奉命仍赴西陲軍營進謁故相國文文忠公文忠曰方今建議諸臣多因海防喫重請暫停西陲用兵畫關而守廷論疑之余曾因會議時排衆議之不決者力主進剿幸蒙 俞允因有 命今左節相督師西陲之命前此所以力爭者我朝 疆域與明代不同明

代邊外皆敵國故可畫關而守今則內外蒙古皆臣僕倘西寇數年不剿養成強大無論壞關而入陝甘內地皆震卽駛入北路蒙古諸部落皆將叩關內徙則京師之肩背壞彼時海防益急兩面受敵何以禦之此次以陝甘百戰之師簡銳出關破未經大敵之寇烏魯木齊轄境不難指日肅清但海內帑藏空虛元氣未復陝甘地方凋敝降衆未安根本不固烏垣旣克之後宜趕緊收束乘得勝之威將南八城及北路之地酌量分封衆建而少其力以烏垣爲重鎮居中控制南鈐回部北撫蒙古借以備禦英俄實爲邊疆久遠之計汝其以此意代達左相慎勿因好大喜功鋪張過當致墮前功失此次用兵之本意也

論伊犁

李雲麟

近年來俄人日以交收伊犁爲要挾之具今之論者或慮其重索兵費或慮其要挾通商各款滯礙難行誠不爲無見然卒以不得伊犁爲憂收回伊犁爲喜此大不然其故何歟俄人賦性惟利是圖居心似信實詐然其遇事也善籌大局於地理尤精詳雲麟查其近日舉動復以往事證之竊有以知其心矣伊犁九城縱橫相連東西不逾二百里大城居其中今該國將大城巴彥岱霍爾果斯三城房屋俱平毀清水河塔爾奇綏定三城俱付漢回居住蘆草溝城盤子俱棄置而專於大城東南九十里之金頂寺及固爾札兩處拆各城材木營蓋市廛橫亘幾二十里用費以數百萬計不知者疑其不營西北轉營東南爲失

計殊不知俄人得此八年之久歲入數十萬豈肯輕棄日日籌畫豈無定見蓋欲外假交收之名以示惠而使我終不能居也伊塔兩城卡倫形勢前已叙明交收事無論一時難辦卽幸而得之彈丸之地四面受敵何以居守要而論之今日 朝廷若不憚敗約以兵力攻取伊犁在所不言若重開邊釁得伊犁於俄人之手則其患有五各城所遺精銳漢回三千餘人抵死不降日後須隨地分歸俄國爲之爪牙一也纏頭哈薩克等衆均經助逆未受懲創分處內外終多反覆二也膏腴之地僅存東北一隅各旗人衆無以自容三也城池平毀急難修復四也俄人旣環其西又亘其東五也有此五患重兵一撤傾覆立見而議通商償兵費分疆定界等事有無滯礙尙不與焉

論邊防

李雲麟

中國西北諸城與俄國相鄰歷有年所自咸同以來邊事日棘其故何也我 朝之治西陲務在寬大俄國務在苛覈何以見之駐防旗綠營兵以至各項蒙古屬中國者輕重俱有額餉而彼則徵丁稅纏頭哈薩克布魯特中國俱無所征彼亦征丁稅是矣乃中國近日邊事反不如彼豈果寬大不如苛覈歟雲麟嘗經歷彼我交界地方詳求原委我雖寬大其弊流於縱弛縱弛旣久綱維頽敗百廢不舉故諸亂生彼雖苛覈而法度謹嚴又其長在見可而進知難卽退故能乘我之間蹈我之虛卽如近來中國用兵楚軍

歲耗八九百萬而金軍嵩武軍伊塔巴哈四城協餉尙不在內約計歲需千一百餘萬用兵三年已耗餉三千數百萬關門以外現屯征兵六七萬人詳查彼國邊界防兵不過數千既無如此多兵亦未耗如此巨餉何其勢轉勝於我蓋中國現在舉辦西陲兵事弊在外強中乾爲今之計宜收斂不宜外馳何謂外馳如烏垣不能守而務取伊犁山北不能固而從事南疆是也何謂收斂則前所言撙節歸併之說是也蓋欲圖日後之自強當先圖目前之自立若再不培根柢而徒爲荒遠之謀不但無成患且立致譬如久病之人元氣未復宜調其飲食培其榮衛若令升高逾遠開弓躍馬倘致顛蹙將有不堪復救者矣

論新疆改省

李雲麟

新疆改省窒礙難行其說已略具於前請復條類其事而申言之郡縣之制以民爲本今關外山南一路由玉門安西燉煌直抵哈密縱橫二千里內共有商民二千六百餘戶從此而西經吐魯番直抵南八城皆纏頭無漢民其北路自巴里坤之鎮西起經奇古濟木薩阜康迪化昌吉至綏來止東西二千餘里實有商民不及三千戶迤西則皆蒙古各旗地界兩路合計五千餘戶漢回商戶在內欲設郡縣實無根本不可一也此五千餘戶流離失所並非完善不足抵內地一縣而舊設有兩州六縣三廳亂後已苦官多民少無可爲治況更添設乎不可二也欲徙民實邊則中隔安西至哈密哈密至闐展巴里坤至木壘三

大戈壁皆橫亘千餘里水草缺乏難以舉辦不可三也南路纏頭回非郡縣所能治不可四也北路旗蒙各部落亦非郡縣所能治不可五也曠日持久致北路善後事宜延擱不能舉辦不可六也南路八城留兵少則備多力分不足彈壓留兵多則耗餉難支不可七也回疆雖多饒沃皆戈壁圍繞零星細碎無堪建爲重鎮者兵行其地軍儲就近採買則可行至左相原奏內稱餉項就地取資之說則斷斷難行各城纏回種類紛歧我朝舊制每以寬厚綏懷未嘗有所科斂尙致日久生亂驟加租賦變亂更滋不可八也且卽橫征暴斂能得幾何舊制西北之地有兵無餉是爲禍根卽甘省論額征地丁歲入僅二十八萬有奇而滿綠兩營待給於他省之協餉歲額三百二十餘萬利弊顯然試問甘肅之與回疆孰重孰輕其利害得失孰大孰小整飭內地居民與辦理荒遐回衆孰難孰易若曰回疆膏腴甘肅寒瘠則甘境如秦州之富饒甯夏甘涼肅州渠水之利甲於西北饒沃雖不如回疆而廣衍則過之左相以封圻督軍務近復身兼將相者十有餘年矣不能興利除弊以甘省之地養境內制兵爲國家計久遠但見挾威倚勢搜剔各省儲胥供給楚軍饋餉坐致海內凋敝日甚一日而欲行其說於萬里遐荒之外將誰欺乎然則西陲建省之說亦可廢然思返不待再計而決矣

前述各條其種種情形已如彼然則將奈何曰今日西陲之事外強中乾貧弱在內欲圖日後之自強當先圖目前之自立自立之術何在速修烏魯木齊根柢是矣當烏魯木齊之克復也是西陲治亂安危之一大轉關其時伊犁情形難得難守南疆情形易得難守主其計者宜知伊犁雖得難守之實暫緩南疆不宜爲欲收伊犁之故肆力南疆也然則善後方略何如對曰以烏魯木齊爲腹地安插各項眷兵則有根改伊犁爲換防處所不置眷兵則可久等南路於要荒衆建少力不設防兵則無侵畔速撤各項征兵則餉項不致虛耗稍留餘地外以舉辦西陲善後內以整頓陝甘營伍則元氣漸固後患不生凡此四端惟在知之明行之決猶豫觀望其機坐失矣行之之法維何在去名務實今關外如迪化地並無漢兵而猶簡放提督古城烏魯木齊等處並無滿兵而仍設領隊哈密無事可辦而猶設正副員缺等而上之至於將軍都統額缺皆與現在事件不符照章簡派名實俱損爲當時計朝廷宜盡罷各項官特簡重臣經略西陲便宜行事改絃而更張之規模既定再設額缺則名實相符矣或曰改弦更張將無與建省之說同曰不然關外各部種類紛歧皆不可以郡縣治宜郡縣者惟內地遷居之民今大亂後關外數千里內所餘戶民不及五千戶合計不抵內地一縣郡縣根株已絕而猶侈言建省情格勢阻何能有成查烏垣舊制係郡縣與軍府參用今卽欲復舊規亦非數十年生聚不可茲所言歸併之法擬去郡縣而專立軍

府略仿前代衛所邊軍之制其事至易其效至捷不至期年規模可定請條類其事而申言之烏垣大亂之後城市爲墟蕭條無人欲移內地駐防實其地路遠費重卒難舉辦查伊犁及塔城寄居現存人口滿營綠營各八百名上下索倫不及萬人錫伯一萬八千餘名厄魯特上三旗人口在俄境未回下五旗在伊犁者萬餘人察哈爾兩翼共二萬餘人合計丁口六萬零去老弱婦女亦可得精壯二萬人若將此項人衆全數移入烏魯木齊境內則烏魯木齊既不致有地無人各項人衆亦不致流離失所受俄國鈐制至安插之法則宜以滿漢營及索倫錫伯各旗置於烏垣附近其外則爲察哈爾又其外則爲厄魯特再查土爾扈特各旗人丁最衆當年爲衆建少力之法分隸各城今該部衆世篤忠貞大亂後流亡散失合計丁口不過數萬宜將該部落各旗人衆調集一處安其游牧於伊犁迤東塔城迤南烏垣迤北一帶地方使之聯絡一氣外禦哈薩克布魯特等衆爲北路一大藩籬至烏垣迤東抵木壘一帶土田饒沃旗蒙人衆尙不能盡其地利卽內地徙民亦屬緩不濟急查關外現有客兵六七萬人兵多餉少勞費不支宜撤其四分之三酌留精銳一萬五千人分屯烏垣境內以備緩急餘者均遣撤使歸關內其中有眷口者約可萬餘皆編爲軍籍分隸衛所使爲屯丁台山北現有居民二三千戶如再不足酌移山南安敦玉三處居民補之再移關內甘涼肅之民補三處費省效速實計可得萬五千戶如是布置烏垣境內耕屯衛

所募存星羅三年之內軍食有資既無仰給內地勞費轉輸之苦又無朝夕匱乏借措俄人之憂實邊塞久遠之謀屈指計之其利有六烏垣重地不致久虛一也各旗人眾免受俄人鈐制二也眷兵移出後交收伊犁之事可遲可速進退裕如免生枝節三也土爾扈特部眾散而復聚四也客勇即時遣散免致坐耗糧餉五也南疆諸部落臨之以威結之以恩使彼傾心歸化堪垂久遠六也或疑如此收束未免示弱於俄國是大不然夫中國與俄國之強弱在修內政不在務外觀試問今日能將常住卡倫爲界一節翻案否若能翻案前說可廢否則重鎮必不可臨極邊況四面被圍乎康熙中黑龍江將軍設於愛琿乾隆中因其臨邊移住齊齊哈爾其時愛琿城距俄境約千里尙須量移往事可驗伊犁之不可復爲重鎮早決於庚申定約之時更何疑焉

奏爲酌撤旗兵疏

光緒二年

崇 實

竊查岫岩大孤山海口素爲繁盛之區屢有盜賊竄擾曾經前任將軍都興阿奏明派出岫岩熊岳二城步兵二百名委員管帶岫岩城守尉統領擬定春融前往駐防冬令撤回每年支領飯食車價東錢八萬千歷有年所奴才抵奉以來細心查察大孤山海口東連大東溝西與金州接壤並沿海之青堆子大莊河均爲險要處所巡緝彈壓關係綦重查旂兵年年換防春去冬回不特徒費車價且日久弊生輒以飯

食不敷至向各鋪斂取津貼錢文兼因城守尉有地方之責時須回城料理公事統領無人更形散漫名爲駐防虛應故事盜賊無所畏忌往往乘間竊發非改募練兵經年駐紮不足以資鎮攝當經札飭候補道陳本植履勘情形將岫熊二城兵丁遣撤歸伍改募精壯步隊二百名分紮要隘並由奴才揀派古北口練軍內久歷戎行熟悉戰陣副叅一員前往管帶訓練巡緝以靖地方去後茲據該道稟報大孤山青堆子等處極關緊要改募練兵二百名業已如數招齊因餉項支絀力求節省仿照直隸練軍章程略爲核減每月需餉銀八百餘兩酌擬營規造具花名清冊暨請派委員弁管帶前來奴才伏思此項募練兵丁既經年駐紮認真操防並免鋪戶津貼之需亦無往返車輛之費所需飯銀卽以岫熊防兵歷年支銷東錢八萬千抵放外核計稍有加增爲數無多實於海口巡緝大有裨益惟查岫熊二城駐防旂兵所需飯食車價向由捐輸項下支發錢文今既改放銀兩自應隨時照依市價提錢易銀發放以昭核實每年動支錢文若干仍遵向章一年奏報一次除酌派副將劉福全前往管帶認真操練巡防並前經奏明添設大孤山巡檢一員飭令專司彈壓外所有撤兵歸伍改募練兵仍支銷捐輸項下錢文緣由理合恭摺具奏

擬添設茂興地方分防路記疏

光緒八年

黑龍江將軍

文緒

竊查省南茂興站與吉林伯都訥中隔松花一江爲通省出入門戶近來人烟漸密係南路集一大集鎮該處僅有管站筆帖式專司驛務向無經管地方之員近年馬賊出沒無常爲害行旅曾經前任將軍定安在該處建修營盤一所傳令各站丁二百名又撥去西丹五十名由省委員管帶以練爲防自係慎重地方起見但練軍備邊必須認真督操乃克精強該處距省四百餘里之遙又無地方官親督嚴練未免有名無實今練軍業經奏奉 諭旨允准改爲常川演教該站練軍原在五千名數內擬卽酌撤統由省城挑選西丹就近督練以期精強惟該處既係津渡咽喉盤奸詰究在在均關緊要無兵鎮攝尤慮空虛奴才等審度今昔情形既有不同自應因時制宜以籌經久查由省至茂興共設七站由茂興至呼蘭共設五台統計各台站設有食二兩餉銀甲兵五十二名專爲幫解人犯今案犯向委長差該兵無所司事未便虛糜擬請照依盛京撫順鐵嶺章程添設掌路記防禦一員將此項甲兵五十二名外再添八名共六十名均調歸該路記管理足敷巡查地面之用按每兵十名添設領催一名月支餉銀各三兩再行添設委署驍騎校二員月支餉銀各四兩分隸鈐束其新添路記請由省城實在防禦內揀選按三年任滿一換毋庸另添額缺以現修營盤作爲公所毋庸另建衙署添支俸銀以節餉項嗣後如出兵缺按七站五台西丹內由該路記公挑領催之缺仍由將軍衙門挑放至新添委驍騎校先由各站領催內揀選報

部註冊再遇缺出由該營領催內挑補以重升轉之途惟茂興係商販牛馬過江必經之地每有偷漏稅課今既添設旗地方官應卽責成該路記實力稽查驗票放行不准格外勒索如有無照票者令其照例補稅三分以一分爲稽查官兵飯食以二分解省歸於正稅報部充餉自留耐至茂興站爲該路記轄境倘巡查不力照例議處一年無過咨部議叙用示勸懲所有該官兵應領餉銀請由呼蘭徵收地租項下照章折錢支發以歸簡便如此量爲變通則添餉銀無幾實於操防巡緝彈壓地方大有裨益如蒙 俞允奴才等卽行遵照辦理並請 飭下禮部篆鑄管理茂興等處路記鈐記一顆以昭信守

奏爲兩旗爭地查辦未公據實陳明疏

光緒十一年

奎斌

竊臣恭閱邸抄綏遠城將軍克蒙額等會奏遵勘牧界請將貝子台吉等處一摺雖未知原奏如何立論第兩旗界址及互爭原委臣確有所聞誠恐查辦不公蒙部失業致肇爭端邊政所關不得不據實陳奏查土默特達拉特兩旗向以黃河爲界河之東北岸爲土默特地界河之西南岸爲伊克昭盟鄂爾多斯七旗牧界達拉特卽七旗之一也兩旗各守界址日久相安近年以來黃河南徙致將河南達拉特牧地一段圈入河北土默特蒙員垂涎沃壤致起貪心遂以兩旗依河爲界現在圈入河北之地卽應歸隸該旗並舉乾隆年間土默特地畝塌入河內之案當時查辦曾聲明嗣後如果塌地涸復仍歸土默特爲業

等語以爲佐証不知乾隆年間土默特地畝塌入黃河經前綏遠城將軍奏明照數另籌地畝撥還該旗該土默特卽不得謂之失業且當日塌地僅六十餘頃此次黃河改道圈出之地東西廣百餘里南北袤數十里計地在數千頃數目懸絕蒙部以游牧爲生達拉特葛爾一旗境地本不甚廣以數千頃之膏腴無端被人侵奪養牛無計失牧堪憂不惟情有所不甘亦且勢有所難已同盟各部見此情形均有抱忿不平之意勢必羣起相爭難以禁遏況此事於未經勘辦之先兩旗相爭已釀命案土默特旗將達拉特蒙古毆斃抗不交兇至今案懸莫結此次副都統奎英會同將軍前往查辦卽以土默特參領等官爲隨員聽一面之詞不加詳察任令越界強占何能折服人心我朝恩被蒙古藩封至優極渥而內外札薩克輸忠效款各守邊疆牧養安居從無爭競今一旦奪其地面復請加之以罪雖在愚弱亦難甘心大非聖朝綏馭蒙古臣僕之深意溯查歷來關涉蒙部界址要案皆蒙欽派大臣前往查辦今兩旗爭界綏遠城將軍克蒙額到任未久未能深悉情形歸化城副都統奎英係專管土默特之員跡涉偏袒可否特簡大臣前往秉公查辦以清界限之處出自聖裁

遵旨籌議臺灣改設行省事宜疏

楊昌濬
劉銘傳

竊照光緒十一年九月初五日欽奉慈禧端佑康頤昭豫莊誠皇太后懿旨醇親王奕譞等遵籌海防

善後事宜摺內奏稱台灣要區宜有大員駐紮等語台灣爲南洋門戶關係緊要自應因時變通以資控制着福建巡撫改爲台灣巡撫常川駐紮福建巡撫事卽着閩浙總督兼管所有一切改設事宜該督撫詳細籌議奏明辦理欽此又於十一年十月十九日奉上諭臺灣南北地輿袤延甚遠以形勢而論臺北各海口尤爲緊要原設臺灣道一員遠駐臺南深慮難以兼顧且巡撫常川駐紮一切錢穀刑名事宜必須分員管理各專責成應否於臺灣道之外添設臺北道一員着楊昌濬劉銘傳悉心會商妥議具奏等因欽此欽遵經臣等各將籌度情形先後覆奏十一年十二月十二日奉上諭楊昌濬奏添設臺北道不如添設藩司係爲因地制宜起見自可准行臺灣雖設行省必須與福建連成一氣如甘肅新疆之制庶可內外相維著詳細會商奏明辦理復于十二年三月二十四日奉上諭劉銘傳奏澎湖爲閩臺門戶非特設重鎮不足以資控制楊昌濬與該撫意見相同擬將澎湖副將與壇鎮對調仍歸總督管轄等語卽着楊昌濬劉銘傳會同籌議具奏閩臺防務關係緊要該督等商辦一切務當和衷共濟不分畛域力顧大局上年諭令該督等會議臺灣改設各事宜並着一併妥議毋稍遲延等因欽此仰見皇太后皇上垂念海疆諄諄訓誡之至意臣等忝膺重寄日擊時艱何敢不竭力籌維和衷商榷以期事歸盡善仰紓宸廑除往返函牘不計外臣昌濬於二月間渡臺臣銘傳於四月間復內渡詳細面商查臺

灣爲南洋門戶七省藩籬奉 旨改設巡撫以資控制而實爲保固海疆遠大之謀惟沿海數縣之地其餘番地尙係化外氣局未成孤懸海外與新疆情形不同閩臺本係一省今分爲二尤須唇齒相依以收指臂之助誠應遵 旨內外相維不分畛域乃可於事有成茲就省局司道及署臺灣道陳鳴志總理糧臺前貴州藩司沈應奎籌議各條覆加酌核謹繕清單恭呈 御覽現在整頓海防百廢待舉加以改設行省經費浩繁如澎湖一島辦防需銀八十萬兩業經臣等先後 奏請 勅部指撥此外辦防製械設電添官分治招墾撫番在在均關緊要至建立省城衙署 壇 廟各項工程雖不妨稍緩旣已分省亦不能不次第舉辦臺地防營除裁撤外尙存三十五營分部沿海二千餘里勢難再減臣等悉心籌畫擬由閩海關本年照舊協銀二十萬兩經臣銘傳咨請署福州將軍古尼音布嗣後由廈關徑撥解臺其閩省各庫局無論如何爲難每年按限協銀二十四萬兩陸續籌解並請 旨飭下粵海江海浙海九江江漢五關每年協銀三十六萬兩共成八十萬兩以五年爲度統計閩省及閩海關所協四十四萬合之臺地歲入百萬兩專爲防軍月餉之需其五關每歲各協銀七萬餘兩尙屬輕而易舉而臺事稍得藉手庶不致盡託空言仍求 朝廷寬以時日容臣銘傳分別緩急輕重次第舉辦現已 奏明清理田賦並隨地隨事力求整飭變私爲公如三五年後能照部議以臺地自有之財供臺地之用卽當 奏請停止協

欵一切改設事宜清單內有未核裁者容臣等續行 奏咨辦理

吉林防務

胡傳

東三省爲 國家根本重地而吉林中處其間南障長白北帶混同東襟大海延袤數千里而長白以西兼以奉天爲重蔽混同以北又以黑龍江爲外藩雖地處極邊其實形同腹裏自咸豐十年俄羅斯竊據我黑龍江以北烏蘇里江以東各地於是吉林東邊在在與俄接界今我設防於三姓甯古塔琿春俄駐兵於伯力巖杵河海參崴彼處處通海便於轉輸我陸運道遠易致罷敝似彼常處其逸而我常處其勞然以天時地勢揆之冬春二時江海冰堅船不能駛彼若入寇接濟維艱夏秋二時彼運雖利而我惟琿春一處地與彼逼外無障蔽最宜留意甯古塔則東有無人之地五六百里山川糾紛溪澗泥淖爲之阨塞三姓至黑河口八百里江路多通陸路多淖天然險阻足以限彼長驅彼此相較勞逸正復相等所患者黑龍江之江防未設也奉天之海防未固也黑省疎防則吉有肩背之患奉省疎防則吉有咽喉之憂以兵言之吉省有駐防之兵無游擊之兵能禦其東不能兼顧西南北也以餉言之吉林練防各餉皆仰給於京師一旦遼水東西稍有梗塞轉運道絕三姓甯古塔琿春之兵不能枵腹以禦敵也且俄夷毒智專事蹈瑕前竊據我吉黑東北各地後強佔我伊犁各城皆乘我中原多故不能兼顧邊陲而狡然以逞

近日和議得成雖幸彼內有變亦恃我海宇昇平無有釁隙耳自是以往如我內地有事彼之故智必將復萌當此之時中邊交警軍需浩繁戶部之帑或殫發不時吉林之防正萬分危急縱奉黑二省江防海防均極嚴密而吉軍亦岌岌可虞吉軍如或疎防奉黑二省勢形中斷亦難自立從此東北之事不可爲矣故爲吉林計既須與奉黑二省通力合作又須於無事之日早求自給之方能就地籌餉以足軍食上策也不能就地籌餉而能多方預備廣積邊儲中策也今但設一面之兵而又無半年之蓄夫豈萬全之道哉傳曰不備不虞不可以師書曰有備無患深維邊防久遠之計以使國家根本重地固如金湯亦惟統籌全局熟察夷情先事而謹其備耳

答沈韻松大使

胡傳

罕奇一口論者皆謂地當屬我可據條約與俄夷力爭傳細繹條約詳察地圖及邊界地勢參訪昔年舊事父老傳聞竊以爲不然李秋亭太守以海中間之嶺爲綽達哈達爲庫龍島而謂罕奇摩闊歲一帶皆爲我地與條約所言及分界地圖所劃之紅線多不相符按條約言順琿春河及海中間之嶺至圖門江口其東皆屬俄羅斯國其西皆屬中國又言兩國交界與圖門江之會處及該江口相距不過二十里如李太守之說由琿春河上游向東南劃一界線斜達庫龍島或至綽達哈達則地已至海且在圖門江之

東數十里矣有及海中間之嶺六字地界已詳盡無遺既與圖門江毫無干涉何必復贅至圖門江口五字又何以復增相距不過二十里一言此與條約不符之顯而易知者也按兩國分界地圖所劃之紅線自北而南距海約二十里許折而向西以達於圖門江紅線并未劃至江口安得至海中間紅線之東既繪有罕奇海口之形又標有罕奇二字綽達哈達與庫龍島尙在其東地圖中俄各執一紙斷難輕改界線以達於嶺此與地圖不符之顯而易見者也李太守誤在未見分界原圖遽以己意立說聞者不察遂謂條約與地圖本不相符而不知亦非也某詢之依堯山都護與訥治靜協領及土人之年老者皆言分界時本以琿春河圖門江爲界我大臣成將軍景以河東皆旗人所居不能隸彼相持不決者二十餘日俄乃退二十里以長嶺爲界復取地圖查閱所劃之紅線自烏蘇里河口以至瑚布圖河源界牌所立之處俄人卡倫所設之處皆逼近紅線與條約無甚出入至琿春河乃稍劃而東向南直下琿春河圖門江東距紅線按之圖約二十里證以土人所指兩國分界之地亦約在琿春河之東二十里卽去年秋間李太守尋得海濱原立界牌之遺跡在圖江之東岸距江亦不甚遠乃悟條約順琿春河及其東其西云云訂約時初議之界也下文兩國交界與圖門江之會處及該江口相距不過二十里云云劃線時分定之界也會處二字指琿春河會圖門江處自此處以至江口故又用一及字蓋言自琿春河入圖門江

處以至江口其東二十里之地皆屬我也如此以解條約則與地圖所劃之紅線一一相符與土人所指分界之地亦一一相符而惟及海中間之嶺六字無着我執條約及海中間之嶺六字而不兼顧會處二字與一及字并以相距不過二十里七字僅屬之圖門江入海處以爭罕奇爭綽達哈達及庫龍島自以爲得間矣彼若不顧及海中間之嶺六字亦執條約其東其西云云以爭長嶺以西二十里之地將何以應之彼此相持不決則又必參考地圖與界牌琿春界上薩土烏三字界牌皆早無存惟地圖有兩國大臣之押印可以爲據以決疑獄則紅線西之黑頂子必歸我紅線東之罕奇必歸彼不待言矣現在我置罕奇索黑頂與條約一一相符仗義執言理直氣壯只恐彼不來會勘若僅以及海中間之嶺六字爲據以索罕奇則展開兩國有押有印之地圖早已自塞其口尙能與彼力爭耶某以臆見解條約雖未知與當日分界之情形是否符合而於現在邊界情形則確實無疑長嶺綽達哈達罕奇等處閣下去年曾身歷其境形勢了然於胸中試以某之臆說按之條約地圖而詳思之然耶不然耶彼現以長嶺爲界我現索黑頂子地而以相距不過二十里七字僅屬之圖門江入海處可耶不可耶閣下屢次垂詢邊情兼以李太守之說爲不謬未知除條約及海中間之嶺六字之外別有證據否如有證據以自伸其說能索回罕奇海口不特便於轉運并可造戰艦練水師與北洋夾輔朝鮮而禦俄海參摩潤二歲之兵形勢要害

之地在所必爭也萬望閣下詳悉教之

上吳清卿星使書

胡傳

竊查三岔口與俄羅斯接界之處以瑚布圖河爲界該河北流入綏芬河之口在芬河北岸山上那字界牌之東南里許是以俄夷年年六月來刈此里許地所生之野草言此一段當屬彼管轄我綏河北岸民人蕭榮貴所居之處所墾之地距南岸瑚布圖河口稍東李元輔所居之處所墾之地距南岸瑚布圖河口稍西皆在那字界牌之東南是以今春俄官來丈該民等所種之地逼令交租比經瑚布圖卡官德慶照會與辯俄廓米薩爾照覆有他們所種地處實在瑚布圖岸西者本國人不能侵佔亦不能收租之語雖仍以瑚布圖岸西爲言實已指出蕭李所種地處五月二十七八九等日俄民復來那字牌東南蕭李等種地處刈草當令通事驅逐更請瑚布圖卡官永成詣俄卡詰責嗣後遂不復來所刈之草亦未令持去六月初三日忽有俄官至瑚布圖卡倫與永卡官爭論那字界牌東南里許之地某詢彼以何爲據彼畫圖自那字牌直對南岸小團山上之倭字牌劃一界線言二牌以東當爲彼境某言自那字牌順山嶺而東至山嶺盡處循綏芬河而西至瑚布圖河口皆爲我境彼據兩國分界圖之直線某據和約順山嶺之明文再三爭論兼示以春間廓米薩爾之照覆于圖上畫蕭李二人所種地處彼乃言是上司新差來

查邊界之官實不知早已論明此事遂不復爭那字牌東南里許地而請容彼遍視各處疆界及上街市物婉言告退竊查和約與地圖均載有阿巴瓦噶達耶熱皆伊亦喀拉瑪那倭怕拉薩土烏二十字界牌現查詢此二十字界牌除那字倭字二牌外據邊民之年老者言十餘年前三岔口之南百餘里老嶺青林內有一牌今不知存否餘不知其處琿春界內只去年李秋亭太守于圖門江東岸尋得一土坑似是當年設立界牌之所亦不知何字其餘各牌所在現存與否遍詢邊人無有知者我之疆界久矣無人經理憲臺整飭邊防查出黑頂子地實爲我疆久被俄佔志在索還以杜侵越之漸俄夷稽延不來會勘早有將來必遍查各界之說今已有來查邊界之官可見該夷於疆界極其留意現在黑頂子地彼來會勘與否尙不可知各處界交之地遍勘與否亦不可知而邊境情形界牌存否似我亦宜預先查明又查界牌兩面一爲漢文一爲俄文當日設立界牌之人未嘗爲久遠計漢文以薄紙書之糊於木牌之上久已脫落同沒字碑俄文墨書於木尙有遺跡可認吉省現無能識俄文者似宜咨請總理衙門繙譯阿巴瓦噶等二十字俄文以便核對某處是否某字界牌某字界牌尙存與否如能將邊境情形界牌存否一一查明將來兩國會勘便可明白抗論照數補立某因俄官來查邊界偶見及此冒昧瀆陳

對張幼樵學士問東陸道里形勢

胡傳

俄羅斯經營烏拉嶺以東西伯利部冀出東海爲日已久自咸豐十年得我黑龍江以北吉林以東數千里之地而逼我之勢益張吉林以東地尤形勝東襟大海南襟大海西阻興凱湖及烏蘇里江北帶混同江其輪船可由黑河口入黑龍江而西南岸經艾輝北岸經雅克薩尼布楚以達宜爾古德斯科直接烏拉以東之火車鐵路混同出海之口有島曰庫頁今名唐太與日本北海道北見州之宗谷港隔海相對不過百里程同治間日本以庫頁易俄之千島至今猶悔其失計其南濱海之地本與朝鮮接界而分界後侵佔我黑頂子地尤爲陸通朝鮮之要津山川完固形勢便利陸足以包我吉黑兩省而海足以震撼日本與朝鮮現在俄夷駐兵於伯力雙城海參崴嚴杵河摩闊崴黑頂子等處我駐兵於三姓甯古塔琿春以防之伯力西距黑河口千三百里又西距三姓八百里海參崴西北距雙城三百八十里雙城西距三岔口百三十里又西距甯古塔六百里嚴杵河東距海參崴五百四十里西距琿春九十里摩闊崴西距琿春黑頂子西北距琿春各七十里由黑河口至三姓水路多通陸路多淖殊不易行由三姓而西南至吉林省城千二百里陸平而水亦險由甯古塔而西至吉省八百里由琿春而西北至吉省千二百里皆多險阻亦不易行由黑龍江之艾輝而西至墨爾根折而南至齊齊哈爾不滿千里中無險阻由齊齊哈爾而南至吉林省城平原廣野之路亦不過千里艾輝等處未設防俄若以輪船載兵由艾輝登岸蹈

瑕抵虛直搗齊齊哈爾冀出我三姓甯古塔琿春東防各軍之背則吉省震動東防各軍慮後路絕不得
不回顧則全局皆震動此北路之可憂者也俄兵若由黑頂子偷渡圖門江南可拊朝鮮之背北可抄琿
春之後琿春失則彼攻朝鮮無復顧忌朝鮮失則不特東三省皆爲所包而直隸山東江浙沿海諸省亦
不能高枕而臥此南路之可慮者也俄夷伯力等處之兵合計不過四千而民則已有萬餘戶俄兵各手
一後門鎗背負一囊盛十日餽糧外裹一羶掛一瓢日出操練亦負之以電音調發頃刻可就道民必三
年爲兵而後復爲民每戶各給一鎗每歲各給子藥二次是民皆兵也近年我琿春三岔口等處招民開
墾荒地華民之居俄界者咸思內徙俄恐其地遂空嚴行禁阻甚且要而殺諸途自光緒八年秋間俄官
巴爾巴西馬弗尼入我吉省窺見我民衆兵多知勢不敵又恐華民之居其地者或爲內應歸遂變計思
逐華人而自其國大徙其民以實之往年俄夷徙民而東歲不過數十戶百數十戶光緒九年五月以輪
船拖帶大船自黑龍江入混同江出海由海參崴登岸者千戶七月又徙到八百戶皆有眷屬皆安置於
與我琿春接界沿海一帶其經營水陸夾攻朝鮮奸謀已露馬弗尼者俄廓米薩爾也官不過五品而陰
鷲多智略不顧信義在東部已數年俄主以爲能今已令司陸路兵柄據形勢之地通商練兵墾荒開礦
十年以後生齒日蕃坐成强大部落縱橫東海尤天下之大患也

重修甯古塔牙城記

代容峻峰都護擬

胡傳

甯古塔爲 國家發祥之地猶姬周后稷始封之邠山川深阻形勢完固北達三姓可控赫哲鄂倫春諸部南達琿春直拊朝鮮之背東襟大海視日本諸島若在咫尺間東北各邊居中扼要重鎮也俄羅斯侵佔我沿海數千里之地奪我鄂倫春等部誘結日本謀吞朝鮮自咸豐十年始 朝廷慮留守各旗兵力單薄不足以禦俄增餉練兵遣大臣駐甯古塔督辦防務自光緒七年始於是東陲日益多故光緒八年秋容山奉 命來統甯古塔各旗懼無以稱職汲汲以修武備九年秋集各旗將領謀大修城垣以資守禦咸以經費無所出各旗生計窘不勝大役對其時吳清卿通政爲督辦大臣聞之恐其事中止遂遣防兵六百來助修牙城以爲之倡閱十日而牙城成工速而費省僅用白金一千六百有奇又閱二十日而通政奉 旨抽兵協防北洋以去通政嘗言滿洲俗尙武勇我 列祖肇興於此率一旅之衆拓地而南轉戰無敵遂一六合今各旗生齒十倍於昔苟簡其丁壯授以利器明賞罰勤訓練使戮力禦俄以自保其鄉里必遠勝於用客兵操防之暇卽令修城旣可習勞又可節費兩利之道也容山韙其言觀其在邊多購西洋後門靈巧各種鎗礮挑選各旗西丹入營躬自教以施放之法口講指畫諄諄不倦而知其用意深矣功未竟而遽去故容山記之於石以爲各旗勸且爲異日重修大城取法焉非僅爲牙城記也終

皇朝經世文續編卷七十六目錄

兵政十五

山防

增刻三省邊防備覽序

張鵬飛

保山縣城內回民移置官乃山相安情形疏

林則徐

致辰沅永靖道

胡林翼

招撫流亡示

瑞璋

擬設法保護屯民夾片

吳大澂

請移駐巡檢分防疏

衛榮光

查明角子山地方險阻酌擬練軍駐紮疏

邊寶泉

移設縣丞都司及建置事宜疏

衛榮光

皇朝經世文續編卷七十六

上海葛士濬子源輯

兵政十五

山防

增刻三省邊防備覽序

張鵬飛

嘗讀賈長沙策惜其卓議名論思患豫防竟阻於絳灌不之用至武帝時其策果行終漢世果無復藩國之患設使當文帝時早用之七國不至以從逆終後之人必且議書生過激之論徒託於虛矣豈知仁人君子之用心第求國計民生陰受其福詎忍幸事變而沽己名哉今讀嚴樂園方伯三省邊防備覽深嘆其飭武籌邊用心有合於長沙惜乎行之未遠齎志以歿不能不重鋟之以廣其傳也三省者何陝西四川湖北也其邊境毗連犬牙相錯實爲坤輿之奧區高山長林綿亘千數百里彌望蓊鬱竟日不見人煙附近省民利其地廣賦輕襁負而至佃山結屋墾土開荒土著目之曰新民其地鹽米食物較他省價減十之五失業游民與避饑棚民往往以此爲逋逃藪游民有資則私販趨利折本則羣聚爲非賭竊拐騙無所不至其爲棚民者扶老攜幼盈千累百擇肥勒食一餐石米伊自號曰吃大戶大戶目伊曰挨兵供之則慮力有不能拂之則恐禍且立至其地距縣治動輒一二百里民不堪二者之擾稟官捕治陝追則

逸之蜀蜀追則逸之楚路歧如麻人竄似梭咫尺隔省彼此守令均有鞭長莫及之嘆此緝捕之所以不能立獲也然此猶其小者也其尤黠者有紅錢黑錢大五帽頂諸名色其結黨數十人或數百人羽翼既多各習拳棍刀鎗以資捍護或夜劫富民或晝搶場鎮先約遇兵役追捕不許散黨如事急衆議散去始各逃竄如未議一二人先散者衆共戮之以此其藝既精其黨亦固小則拒捕抗官大則揭竿謀逆甚或基布要害公然爲犄角之勢官吏銳志撲誅多用兵則艱於轉餉少用兵則莫制鴟張致煩士馬戡定經年累歲然後以次削平之稽之五代唐宋不勝枚舉姑以起滅於勝國者約舉之以概其前可也明成化時劉通蠢動於房縣其黨李原王洪王彪擾及川陝藉非項嘉興忠討之原陽城傑撫之滋蔓直不知底止正德時保甯賊藍廷瑞自稱順天王鄆本恕自稱刮地王十萬餘衆延蔓川陝湖廣藉非洪錢塘鍾彭世麟設計誘擒其蹂躪更不堪言矣自時厥後在陝西則有何冕嘯聚西鄉星子山淡文省盤踞金州王莽山李三貢固紫陽高峯寨在四川則有劉烈爲盜於保甯曹甫焚掠於營蓬喻思順竄擾於通巴在湖廣則有茶毒鄭西之楊文政巢窟房縣之王斌盜聚巴東之黃中所在掠地劫民大肆屠戮哀我子遺旣無牛種自廢耕耘千里炊絕斗米十金無論被搶之地元氣盡耗卽附近州縣亦疲於奔命固圉弗遑矣其最勞撻伐者則崇禎時之李自成張獻忠當二賊乘亂竊據於三省也其時殺戮之慘從古未聞幸賴

大兵弔伐元惡伏誅而流毒餘氛處處劫掠陝有劉二虎小紅狼分踞興安甯羌一帶川有姚黃十三家盜弄於保順達變一帶湖廣有郝搖旗馬黨塔楊明啟竄屯於房竹大甯一帶千數百里之提封莫非鴟獍縱橫之所直至康熙二三十年漸取其類而殲旃凡此皆明之餘毒見於史志可考者也此外旋起旋撲爲害不烈者尙不能縷指述矣我 潮混一函夏以德綏民薄海內外來享來王間有一二梗化 天兵所指無不如摧枯拉朽獨此三省邊疆在嘉慶初則有白蓮教匪之變最稽 天討當時合滿漢軍數十萬勦撫五六年之久不克奏功卒恃龔太守景瀚堅壁清野議始能制奔豕之命未及一年非逃卽擒而大慙生縛於 闕下屈指底定以來迄今廿有餘年矣痛定思痛不能不爲懲羹吹壘之謀凡以談虎色變身受其害最深也間嘗求此三省邊境所以治少亂多之故說者謂狐兔易於跼伏攻之難而守之易其實揆厥所由總因防禦日弛撫字不勤之所致然則曲突徙薪烏可不早爲計耶今雖邊烽久熄民氣恬熙而山深箐密向爲匪人久踞之區保無有漏網遺孽冷灰復然乎保無有顛木由孽旁生側發乎是以 今上御極之年大吏奏請仿前明專設鄖撫例以總其成以資彈壓時三省督撫條奏改陝西甯坪縣丞爲撫民通判四川湖北各要隘均更定有差末雨綢繆誠有鑒前此黨聚竊發艱難百戰尙未能正本塞源也余時山居聞之喜甚卽欲輯教匪滋事始末彙成一書以爲殷鑒徒以冗務纏縛卒至未果

不意方伯時作行人竟先爲之晴窗披覽見其自輿圖以至藝文洪纖畢具直如家留侯之借箸而謀馬伏波之聚米爲山大旨總在因地設防用垂久遠所謂布置在乎審勢權變貴乎因時洵爲安邊大猷也第其中有一二三錯譌與搜采未備者不辭固陋竊就見聞所及爲之分訂分增於其後誠使莅乎此者果能酌古準今遵其防撫或如龔遂之治渤海或如張綱之治廣陵不過賢能數十員分布其間可以安坐而治矣昔人云亂之旣成數名將制之而不足亂之未成一循吏撫之而有餘安見古今人不相及耶

保山縣城內回民移置官乃山相安情形疏

林則徐

竊臣等於上年會奏永昌善後案內議請添移營汛弁兵聲明保山縣轄之官乃山因安插回民二百餘戶尙有陸續前來者擬添兵五十名連原駐之三十名派一把總帶領以資彈壓等情已蒙 勅部覈議覆准在案彼時回民移居未久尙須細察情形未敢以試辦之章程遽作常行之定準節經諄飭永昌府知府張亮基就近督縣加意撫綏認真彈壓計上年四月安置之後至今已越一年疊據稟報該回民二百餘戶在官乃山墾種爲生均極守分安業堪以永遠居住等情臣等查此案移置之由因道光二十五年九月間保山城內回民被該處七哨匪徒挾仇殘殺一次迨二十七年甫經招復又於十二月初一日因哨匪打奪解省人證復恃衆入城搜殺一次雖被殺由於報復死者亦非概屬無辜而受害情形實堪

憫惻除業經盡絕之戶無可挽回外其有他出始歸以及藏匿逃亡遺存丁口悉經由官訪明捐貲撫卹以軫餘生至二十八年春閒臣林則徐親往迤西督兵查辦於痛勦彌渡之後直擣七哨地方哨匪始懾軍威俯伏歸命當時拏獲辦罪至四百餘名之多七哨經此痛懲不敢復逞兇頑之習本擬招復逃亡回衆仍返故居惟查房屋被焚早成灰燼若令自行建蓋已屬力所未能且與漢民界址毘連清釐匪易一時旣虞其尋衅日久更難以相安故於軍務將竣之時卽另籌安置保回之地嗣據地方文武暨各委員覓得保山所轄距城二百餘里之官乃山一座周圍約十餘里外狹中寬前隔潞江後依雪山雪山之巔石崖陡險雖有獠獠夷人窩居其上向不與民人相通其自半山中腰下至臨江間有平曠地土堪以墾種因而外來無業客民單身赴彼或種包穀雜糧或植大小果樹先搭棚寮棲止漸蓋土屋草房究因中隔潞江往來未能甚便該客民等仍不樂久居隨訪得有楊育春白奉禮等均願將自墾成熟之地暨果樹寮房悉行折價遷讓或以城鄉產業與之掉換亦所樂從當查該處山場既有田畝樹株按年可收花息并已種將熟之雜糧果實均願折價賣給回民到彼卽無枵腹之虞若漸墾漸多更可長資養贍因詢保回頭人童俊劉耀宗等以保山之清真寺舊有零星公產其各鄉亦有故絕回戶遺產如願公同估價與官乃山產業房產互相掉換便可官爲經理伊等當卽允從其價值除互抵外尙有不敷由官湊捐給

付遂將宮乃山一座全作保回聚居之所除有他處親戚可依不愿前往者聽其自便外凡願移之回戶皆按大小人口官給盤費經署保山縣知縣韓捧日署永昌協副將桂林等將該回民二百餘戶分起押送前往到後仍酌給三箇月口糧俾得從容治產此上年安置保山回戶之情形也嗣又添撥把總一員先後帶兵八十名歸於原設之舊乃汛駐劄就近巡防該回民等益知官爲保護得以久安生業陸續去者復有數起自係知爲樂土彼此相招查該處去秋包穀雜糧均稱豐熟果樹亦皆獲利今年墾種之地比較去年更多將來戶口繁滋該山亦足資其力食與山巔之獐獐夷人及江外之土著漢民均無轆轤而保山城哨相距甚遙更無虞其生衅是回民安置在此似可決爲久遠之圖雖不愿者本不强其前來而已來者定可安於無事矣惟其祖先墳墓向來本在保山當二十五年互鬪之時回匪之燒漢屋者極多而漢匪之掘回墳者尤甚屍骸堆積令人不忍觀聞臣等面囑該府張亮基督屬妥爲修掩張亮基到任後卽與署保山縣陸葆捐發廉銀選擇公正紳耆分赴各山將被挖回墳逐一修砌悉還其舊不獨屍骨全無遺棄并棺柩每與更新統計自夏至冬共修回墳九千餘冢該處事定之後有回民赴保山祭掃者府縣派差照料卽以暗杜衅端該回民見其墳冢新修比前加勝亦皆同聲感激并可消釋前嫌矣又據張亮基稟稱保山回戶中未經故絕之人遺有田產上年軍務竣後曾經委員分路清查核與該回頭

人查報大數相符當卽由官派佃代種收取租銀尋覓外出各回民寄交該處地方官給領惟思回戶業經他徙若將零星田產留在保山內有狡黠之徒未忘舊衅卽難保不藉此爲由以清租爲尋衅之地不如查起原契官爲覓售其無原契者亦由官估價值分別變賣節經頭人傳諭業已允從者多惟聞有力之回本在他處經營貿易有不必急於變產而尙觀望遷延者若不催令一體辦理轉恐退有後言是以現仍傳覓本戶回民諄切曉諭令其出售零產以斷葛藤總期保邑漢回各遂其生永無可開之衅以仰副 聖王綏安邊圉一視同仁至意

致辰沅永靖道

胡林翼

楚粵匪徒寄居黔地勾煽頑苗聚積於烏沙雷公山老林深處經地方官密訪稟聞疊次圍剿陣斬外實已捕獲二百五十餘名刻下殘賊逋逃實不過數人查烏沙爲清江台拱八寨丹江都江古州交界之地萬山叢錯八面甌脫雷公山爲丹江台拱交界之地綿亘數百里林箐幽深係都鎮二府疆內均與楚地相隔甚遠未舉事之先林翼先將竄粵楚之路四面設防層層布置然後身領精練采入其阻復經地方官四面協勦所獲極多實係地方官吏及紳民之功并非林翼之力荷蒙垂詢故敢直陳

招撫流亡示

瑞璋

照得衢山一島爲海中棄地居民悉在化外光緒二年間蒙前撫憲楊俯念島民不忍化外棄之奏奉升糧編戶使爾等共爲熙朝赤子本年又蒙撫憲梅札催廳員史丞妥速辦竣亦係期望島民早日歸化由官保護大憲之恩可謂至高至厚該島共計十畧爾等九畧之人始終不爲金匪所惑各能仰體恩立將田地一律報丈殊堪欣許至培蔭畧金吧蘭一匪通盜有年魚肉鄉民亦非一日地方文武限於重洋僻遠不及周知又未據島民赴各衙門控訴昨據該匪逐一供明始悉平日惡跡不一而足已堪髮指查該匪有田二十餘畝按則升糧每年應完糧銀不過數錢爲數甚少定欲蠱衆抗丈其意何居七月初九日定標員兵會同差役前往該畧掩捕該匪父子等胆敢率黨抗拒定兵中伏被挫經提督軍門及本道委員赴定查驗被殺之營弁二員兵丁數名游擊守備千把受重傷者八員兵丁受傷至九十九名之多軍械洋鎗號衣概被奪去可謂窮凶極惡猶不知自斂以悔禍乘標兵廳員回定之後復勾結黃阿四等盜黨糾合夏大金等悍匪具備大砲洋鎗旗幟赴各畧搶掠勒詐愈無忌憚致爾等流離失所九畧逃徙一空尤堪切齒七月二十二日奉大憲調撥水陸諸軍爲爾等除害該匪竟先踞紫金山之險率黨來撲兵勇受鎗子傷多名幸將士極力擊散生擒六十餘名奪獲大砲兩尊洋鎗數十桿旗幟三十餘面二十三日始將該匪金吧蘭搜獲二十四日獲到匪子金阿迷二十五日始將悍黨夏大金縛到該首要各員

重傷經文武訊明將盜首黃阿四等四名及陣擒之劉大炮等七名正法金吧蘭一犯解由本道訊辦其餘五十餘名訊係被匪脅從取保開釋合島一律肅清惟查訪九畧居民當金匪猖獗之時荼毒不堪紛逃甯波鎮海及岱山東沙角等處實堪憫惻除飭印委各員悉心拊循外爲此示仰衢山流亡人等知悉現在該島巨禍已除地方安謐爾等各自携家回島收地利以長子孫至升科之事爾等雖已欣然報丈尙未辦理妥貼本道業已專委廉明之員會同廳員迅速妥辦完竣如書役兵丁及各色人等敢有向爾等需索分文卽赴印委各員并本道衙門指控立予重懲決不少貸爾等如前被金吧蘭勒詐出有洋票昨在該匪身邊搜獲數紙已經銷燬難保該匪不另有遺失或已用出嗣後如確係被詐之票不須再付分文敢有持票索討准爾等指控察辦

擬設法保護屯民夾片

光緒八年

吳大澂

再據統領綏字軍奏調直隸候補直隸州知州戴宗騫稟稱迭次出歷江北諸山周覽形勢博訪輿情知食力窮民奔走山中者不外捕貂砍木揀菜三宗未抵湯汪河北逾西北河數百里間山徑錯雜每歲不下千人所居有菜營木營碓房等名目多於正月間裹帶鹽糧雇馬馱負約數一年之食節逾小雪始將皮張收齊陸續出山各起伐木之人則於冬令結伴前往砍足木料柴薪趁春夏水長時始行下放揀菜

生計亦在夏秋三者皆流寓之民踐歷荒岩絕巘與鹿豕木石爲羣旣不便概絕其生路又無從究詰其由來雖非有窩匪而積年馬賊倚險滋蔓暗恃此三項人之爲接濟鹽糧買辦衣裝食物甚至子藥軍器亦能以重價爲餌轉輾致之賊中在各項流民生業在山力不能與之抵抗稍有拂意卽爲所戕所得各種獸皮搜索過半欲易他業又無所資其謀生窘感情狀亦可矜矣姓界旣面面皆山易於蔽賊官兵所駐勢不能於嶺阻林荒之地處處分布若不設法於入口要隘處所酌撥哨隊分段填紮以資巡防而便稽察則目下卽獲肅清難保異日兵撤不再萌芽茲擬於江北之永聚屯四塊石紅石礮大小胡同西北河石頭嘴等處江南之大小羅拉密花公鷄等處各駐勇隊十餘人不占民屯專擇山內距口數十里必由之路暫借窩棚棲止傳諭各山溝捕獸砍樹揀菜人等各按所住山溝分起編號寫明年歲籍貫及所置碓房木營菜營地段十人爲一連環保如有外來游匪卽挨號傳報不准窩留庶人跡罕到之深山窮谷亦各條分縷晰若網在綱如內地保甲之制俾異種不能攙入另繕名冊一分送三姓副都統衙門備案由營中遴派妥細員弁春秋兩季酌帶隊伍挨號清釐一次自携口糧鹽菜不需各戶供給分毫庶山中食力之民旣得所保護復互相糾察蓄盜藏奸之弊可不復滋等因稟請核辦前來臣查各山匪股甫經殄盡亟應籌辦善後事宜該統領所稟均係實情自應飭令派隊入山分布各口與三姓練軍駐紮之

地互相聯絡保護屯民於邊要地方不無裨益

請移駐巡檢分防疏

光緒八年

衛榮光

竊太湖所轄之東山下楊灣村爲江浙通衝地方散漫並無一官駐守前據署太湖廳同知傅懷祖稟請派員駐紮藉以控制經臣飭司確查核議詳辦去後茲據蘇州布政使譚鈞培會同江蘇按察使許應鑠蘇松太道邵友濂詳稱太湖廳洞庭東西兩山分設東山角頭兩巡檢專司緝捕而東山周圍五十餘里四面皆湖又有前山後山之分該廳與東山司巡檢及太湖協副將守備均駐紮前山其後山相離廳治近者十里遠者三十里中間類多高山複嶺居民散而不聚或數十家或數百家巢棲山谷寄泊湖濱內下楊灣一村又係江浙往來水道通衝近成村市匪徒最易潛蹤民情亦屬强悍該處既無巡檢分防又無武職彈壓而離廳較遠一切巡緝稽查實有鞭長莫及之勢誠須派員擇要駐紮查向在前山之東山司巡檢因衙門自遭兵燹被燬賃寓民房搬移較易擬請移駐該村以資巡防飭據蘇州府查明並無窒礙由司詳請具奏前來臣伏查太湖廳所轄之洞庭東山孤峙湖中地方本極散漫該處後山之下楊灣村爲江浙水道通衝匪徒最易潛蹤民情亦屬强悍自非駐紮一官不足以保衛閭閻今既據該司道等飭查明確所有東山司巡檢堪以移駐應請卽將該巡檢分紮下楊灣村俾資巡緝而重地方謹會同

大學士兩江總督臣左宗棠恭摺具 奏

查明角子山地方險阻擬酌撥練軍駐紮毋庸改設通判疏

光緒十三年

河南巡撫 邊寶泉

竊臣承准軍機大臣字寄光緒十一年十二月十八日奉 上諭有人奏豫省南汝之交積匪出沒請移營設官以資鎮撫一摺等因欽此當飭藩臬兩司轉行查議嗣據南陽汝寧兩府督同各州縣確查妥議稟司詳覆前來臣適赴南汝一帶查閱營伍復沿途親加密訪查角子山係泌陽轄境泌陽居其南舞陽居其北裕州居其西皆南陽府屬山之東北爲西平正東爲遂平東南爲確山皆汝甯府屬山界六邑之間爲衆山門戶蜿蜒二百餘里峯多徑雜民俗梗頑道光咸豐之際盜匪竄擾公然不逞乘間肆掠聚散無定迨同治年間集兵勦洗醜類蕩平嗣迭經前撫臣飭地方官編查保甲會定章程令附近州縣分班入山會哨從此官民相習閭閻安堵迄今雖民俗驟難丕變而匪徒斂戢耕鑿相安非復曩時之不靖矣惟該處地險山深藏奸最易自宜妥籌鎮撫防患未萌今議者以移營設官請自是正論第設官則須相度地勢造建衙署無論費繁工鉅籌款維艱且通判乃文職額設書役不過數十人置之羣山萬壑中坐鎮則無功緝捕則不足不若責成營汛認真巡緝較有實濟查角子山四圍向設沙河春水王店尹集平頭小史等汛第相距較遠兵勢亦單臣在南陽時已囑鎮臣楊芳桂就近酌派練軍數哨在該山左近擇

要駐紮無事則往來巡查有匪則協力兜拿營汛聯絡畛域不分務期萑苻淨盡以仰副 聖主綏靖地方之至意至新息通判原駐新蔡息縣交界之黃湖店地方前因署燬於匪間或借差僑寓省城現若重建衙署委實無款可籌惟此職爲捕盜廳員該處爲東南門戶巡防責重未便任聽曠官擬飭在黃湖店僦居民屋所需租值在釐稅外銷項下撙節開支以重職守而節糜費

移設縣丞都司及建置事宜疏

光緒十四年

浙江巡撫
衛榮光

竊准吏部咨會議浙江巡撫劉秉璋等奏請將永康縣縣丞改爲永仙分防縣丞金華協中軍都司改爲巡防都司移設八保山等因一摺於光緒十一年十一月十九日具奏奉 旨依議欽此黏抄原奏內開將原駐改駐地方情形詳細繪圖貼說並造具改駐分別管轄節制各員弁營制銜名清冊一併隨摺送部以憑查核覆奏到日再行核辦所有分防建置一切事宜應令該撫等另行籌議辦理等因行文到浙當經轉飭遵辦去後茲據布政使許應鑠按察使蕭韶會詳據金華府知府陳文騷稟稱親至八保山相度山川采風問俗其地爲永康縣管轄距縣治二百二十餘里民貧而瘠又與仙居縣壤地錯雜以致匪蹤據爲淵藪良民被害難以呼訴現在分定地面會同台州府知府成邦幹確查妥議應以永康四十六七都仙居二十三都地方歸縣丞專管遇有疏防盜案承緝不力處分卽將縣丞開叅其都司改駐營

制又與金華協副將蕭尹農會議請將金華協中軍都司改駐八保山爲巡防都司並將右營永康汎干總裏溪汎干總東陽縣城守汎把總夾溪白峯兩外委歸該都司管理該都司仍歸金華協節制毋庸更易營名並照撫標叅將之例金華協不再另設中軍左右兩營公牘悉由兩營守備徑達副將核辦至左營守備原爲都司中軍守備今相去較遠卽刪去中軍字樣其撥歸都司節制之五汎本係右營汎地遇有大股台匪由都司就近調遣平時操防巡緝公文上下等事仍歸右營管理承緝開叅之案亦仍照原制毋庸另議都司所駐八保山之桂川莊其山表延永康縣四十六七都應卽定爲都司專管地面其他仙居二十三四都仍以仙居潘灘汎外委爲專汎各營各地不必更張都司所帶兵丁四十名遇有開補均由都司自主仍申報副將查核錢糧兵米概由副將札發無須再由守備管理以歸簡易並聲明縣丞衙門額設門子一名皂隸四名馬夫一名今改駐八保山責重事煩不敷差遣擬就永康仙居兩縣各撥壯役二名共壯役四名每年給工食銀六兩各移各縣給領都司衙門應給稿書一名清書一名亦在該營額設數內撥給建造縣丞都司衙署經費由外籌辦不動正欵所建基地由縣查明畝分另請豁糧除額等情由司核明具詳前來臣查永康縣八保山地方界於金台兩郡之間山深林密最易藏奸建置事宜分定地面扼要撫馭爲第一關鍵既經金華府知府陳文騷親詣履勘並與台州府金華協一再會

議應請卽以永康縣四十六七都仙居縣二十三四都撥歸移設之縣丞管理並以永康縣四十六七都爲都司專管地面以專責成遇有疎防盜案分別照例開參金華協本無中軍同治八年始將左營都司改爲中軍都司現因該都司移設八保山離郡較遠議請裁去中軍名目左營守備亦刪去都司中軍字樣撥歸都司節制之永康等五汛操防開參各仍舊制事歸簡便免涉紛更均應照辦其添撥壯役書識旣不另請開銷建署所需經費亦不動支正項將來豁除糧額應由縣查明科則畝數另行專案詳辦以昭核實

經世文系



皇朝經世文續編卷七十七目錄

兵政十六 海防上

請改大鵬營制疏

林則徐

尖沙嘴官涌添建礮臺疏

林則徐

覆奏察看虎門排練礮臺疏

林則徐

會奏銷化煙土已將及半情形疏

附片

林則徐

附奏東西各洋越竄夷船嚴行懲辦片

林則徐

擬諭暎咭喇國王檄

林則徐

覆奏曾望顏條陳封關禁海事宜疏

林則徐

密陳定海夷情片

林則徐

密陳夷務不能歇手片

林則徐

會同驅諸夷船稟

胡興仁

征夷船進口硝磺稅銀議

胡興仁

新世文新編



新世文新編

一

新世文新編

新世文新編

新世文新編

新世文新編

新世文新編

新世文新編

新世文新編

新世文新編

新世文新編

新世文新編

新世文新編

新世文新編

新世文新編

新世文新編

新世文新編

新世文新編

新世文新編

新世文新編

新世文新編

新世文新編

新世文新編

新世文新編

新世文新編

新世文新編

皇朝經世文續編卷七十七

上海葛士濬子源輯

兵政十六 海防上

請改大鵬營制疏

林則徐

竊照廣東虎門海口爲中路扼要之區於嘉慶十五年設立水師提督駐劄其地西則香山東則大鵬形成兩翼查香山協向駐副將管轄兩營額設弁兵一千七百零九員名兵力較厚大鵬原止一營額設參將一員管轄洋面四百餘里其中有孤懸之大嶼山廣袤一百六十餘里是以道光十年已將大鵬分爲兩營而所設弁兵只九百九十八員名較之香山營制已有軒輊且所轄尖沙嘴洋面近年更爲夷船聚泊之區該處山高水深風浪恬靜夷船倚爲負隅之固上年調集官兵痛加勦擊始行全數退出恐兵撤之後仍復聯檣而來佔爲巢穴當又相度形勢在於尖沙嘴及官涌兩處添建礮臺二座現在工程將竣已於另摺縷析 奏報在案臣等復查尖沙嘴官涌兩處既經建設礮臺必須調兵防守但大鵬左營額設參將一員守備一員千總二員把總三員外委五員額額外委二員步守兵四百九十七名右營額設守備一員千總一員把總三員外委五員額額外委二員守兵四百七十五名除分班出洋外尙不足以

數巡守據該營縣會議請添經臣等與水師提督臣關天培再四籌商應將大鵬改營爲協撥駐副將大員統帶督率與香山協聲勢相埒控制方爲得力但官兵俸餉歲需支應國家經費有常未敢遽議增添惟有就通省各營設法抽撥并於水師名缺酌量改抵以歸簡易飭據司道核議會詳併咨准陸路提督臣郭 核覆前來臣等查外海水師副將共有四缺內除香山協應與大鵬分張兩翼毋庸更議外其龍門一協地處邊陲與越南夷地緊連崖州一協係烟瘴之區且外臨大海內控黎人均爲邊疆要地未便改抵惟澄海一協雖與閩省接壤而上接南澳下連潮州有水陸兩鎮爲鄰尙屬易資聲援應將澄海協副將改爲大鵬協副將移駐大鵬所轄扼要之九龍山地方居中調度其澄海協之都司改爲大鵬協副將中軍都司兼管左營事務駐劄大鵬所城並於大鵬左營添設把總二員外委二員額外二員步戰守兵連新添外委額外名糧共二百九十一名大鵬右營添設千總一員把總一員外委二員額外二員步戰守兵連新添外委額外名糧共二百零九名以把總一員兵七十五名專防右營官涌礮臺以把總一員駐防九龍礮臺將原駐九龍礮臺之千總一員移防左營尖沙嘴礮臺併帶新設額此外委一員兵丁一百三十名又以外委一員兵丁十五名防守前經裁撤今應設回與尖沙嘴對峙之左營紅香爐汛又大鵬額設大小米艇六隻撈繒船三隻分撥配巡不敷派遣應設大中米艇四隻左右營各半以千

總一員把總一員外委二員兵丁二百零四名配駕又添快船二隻以額外二員兵丁五十六名配駕其餘外委一員額外一員兵丁十二名隨防九龍聽候副將差遣所添員弁船隻先儘水師各營移撥應請在陽江鎮右營抽撥千總一員海門營抽撥把總一員外委一員龍門協左營抽撥外委一員龍門協右營抽撥外委一員陽江鎮右營抽撥大米艇一隻海安營抽撥大米艇一隻龍門協左營抽撥中米艇一隻海門營抽撥中米艇一隻又在龍門協右營抽撥撈繒船一隻歸入海安營配緝所需配船弁兵舵工口糧隨船移撥支給至議抽兵丁五百名水陸勻撥水師應抽兵丁二百五十名現在外海內河防堵巡緝在在需人若概於額設步守兵內抽撥未免顧此失彼應在水師提鎮協營酌量抽撥步兵三十七名守兵九十四名酌裁馬兵改補步兵一十名連撥外委本身步糧三名共得步兵五十名守兵九十四名尙需添補步兵二十五名守兵八十一名在水師各營馬糧較多營分將馬糧三十三名改爲守兵步糧較多營分將步糧一百六十四名改爲守兵均各歸還原營兵額同馬兵所改步兵一十名遞年節存馬步糧料等項銀兩撥補增添步守兵丁一百零六名歲需經費之用此外仍需把總二員外委一員步兵連外委本身名糧七十五名守兵一百七十五名應於督標五營及永靖營酌抽把總二員陸路提標五營酌抽外委一員其原食馬糧一分毋庸隨撥併於陸路各營勻撥步兵七十五名守兵一百七十五名

共兵二百五十名均歸大鵬入額其外委仍食本身步糧並在大鵬步兵數內添設額外外委四員仍支本身名糧以資差遣至澄海地方應將澄海協改爲澄海營卽將大鵬參將移駐作爲澄海營參將澄海原有守備二員分爲左右二營左營守備駐劄蓬州所城右營守備駐劄樟林所城均未便移改將大鵬左營守備改爲澄海左營中軍守備駐劄縣城經管兩營錢糧其澄海左營守備改爲左營左軍分防守備仍駐蓬州有營仍循其舊以資防守所以現改大鵬協副將都司乃澄海營參將左營中軍守備左營左軍分防守備俱照舊定爲外海水師題補之缺其水陸各營抽撥兵丁所需糧餉公費紅白等項以及一切軍裝器械俱由各營撥出隨帶毋須另添澄海協改駐參將守備有原設副將都司衙署可以棲息辦公大鵬所城改設都司亦有守備原署可住其防守礮臺弁兵卽住礮臺均毋須另建衙署惟大鵬添設大快船二隻各營無可抽撥應另行製造計每隻需用裝造工料銀四百三十二兩二船共銀八百六十四兩歲需弁兵口糧燂洗以及修費等項約需銀一千四百餘兩又九龍地方改駐副將紅香爐添設汛防應建衙署兵房以及大鵬新兵應製號衣器械等項所需經費均須預籌查有前山營生息一項從前係由洋商捐出本銀十萬兩發交當商生息以作添設前山營兵餉之用除每年支用外截至道光十九年五月底止實存銀五萬三千八百餘兩除另摺 奏請動支添建尖沙嘴官涌兩礮臺工料共銀三

萬一千九百餘兩外所有此次添造快船及建造衙署製給新兵號衣器械等項用費均請於此項息銀內動支毋庸請動 帑項如此改調添設因地制宜似於海疆控制大有裨益如蒙 俞允所有添造快船應建衙署兵房製給新添步守兵丁軍械等項臣等卽飭令地方文武會同確估辦理其改設副將等官應行鑄換關防並一切營制抽撥細數及未盡事宜統容另行咨部核辦再前山營生息本銀係由洋商捐出與正雜錢糧不同每年止將收支實存數目報部查核今請動支此項息銀以作添造快船衙署製給軍械經費應俟動用後將支用總數於冊內開除造報懇免備造工料細冊報銷合併聲明

尖沙嘴官涌添建礮臺疏

林則徐

竊照廣東水師大鵬營所轄洋面延袤四百餘里爲夷船經由寄泊之區其尖沙嘴一帶東北背負岡陵西則有急水門雞踏門東則有鯉魚門佛堂門而大嶼巨島又卽在其西南四面環山藏風聚氣波恬浪靜水勢寬深暎夷船隻久欲倚爲巢穴而就粵省海道而論則凡東赴惠潮北往閩浙之船均不能不由該處經過萬一中途梗阻則爲患匪輕上年因暎咭喇桀驁不馴抗違禁令經臣等與前督臣鄧廷楨調集官兵在尖沙嘴迤北之官涌等處山梁紮營安礮分爲五路痛加剿擊該夷兵船二隻貨船數十隻始皆連夜遁去但恐兵撤之後仍復聯檣聚泊勢若負嵎必須扼要設防方足以資控制隨飭候補知府余

保純署大鵬營參將賴恩爵新安縣知縣梁星源會同周歷履勘旋據該員等稟稱尖沙嘴山麓有石脚一段其形方長直對夷船向來聚泊之所又官涌偏南一山前有石排一段天生磐固正對夷船南洋來路若兩處各建礮臺一座聲勢既相聯絡而控制亦極得宜等語當經飭令將兩臺高寬丈尺及開築地平並建造牆垛礮洞弁署兵房神廟望樓藥局馬路一切工料價值覈實確估據該員等呈送圖說清摺臣等逐一核算並委員詳細稽查凡有可以撙節之處復經酌量核減計尖沙嘴礮臺估需工料銀一萬七千九百五十一兩零官涌礮臺估需工料銀一萬四千四十六兩零實係省之又省必不能少竊思此項工程係屬防夷要務斷不可緩第國家經費有常仍不敢請動帑項臣等當與藩臬運司公同籌畫查有前山營生息一項係由洋商捐銀發交當商生息前於嘉慶十四年奏明作為添設前山營兵餉之用按年覈實支銷已歷三十餘年之久因而存有積併盈餘截至道光十九年五月底報部冊開實存銀五萬三千八百餘兩除大鵬營現議更改營制所需添造快船建立衙署及製備新兵器械另摺請在此款動支外核其成數尙足以數動撥前項礮臺工料之需合無仰懇 聖恩俯念礮臺工費為防夷所需而捐款息銀與庫項有閒 准於商捐前山營生息一項銀兩動支兩座礮臺經費並請循照舊章將動用銀兩總數於冊內開除造報免造工料細冊報銷感荷 鴻慈倍無既極至此項工程因夷務喫緊

之際先已購料興工趕緊建築務於夏令南風盛發以前一律全完以資防制計兩臺應安大礮五門亦已於腹地各營酌其緩急情形先行運撥濟用一面籌資購補期於普律森嚴以仰副 聖主懷海疆之至意

覆奏查察虎門排練礮臺疏

林則徐

竊臣於三月初七日在虎門舟次承准軍機大臣字寄二月十六日奉 上諭據鄧廷楨等奏籌議虎門海口創造木排鐵練添置礮臺礮位一摺已降旨允准虎門海口爲粵海中路咽喉現當籌議海口章程自宜妥爲布置以密巡防該督等所請於海面安設木排鐵練以羈絆夷船並添設礮臺添置礮位之處是否有益著林則徐詳細查察情形據實具奏原摺著鈔給閱看將此諭令知之欽此伏查粵東中路海口以虎門爲咽喉臣此次親至該處督收夷人鴉片卽住在水師米艇寄碇海中四面形勢皆可瞭望當經留心相度竊見重重門戶實屬險要天成自伶仃大洋過龍穴而北兩山斜峙東曰沙角西曰大角由此以入內洋是第一重門戶也進口七里有一山屹立中央名曰橫檔其前有一巨石俗名飯籬排又其前小山一座曰下橫檔海道至此分爲二支其右一支多有暗沙左一支以武山爲岸武山亦謂之南山山前水深洋船出入皆由於此此第二重門戶也由橫檔再進五里則爲大虎山其西爲小虎山再西則

獅子洋卽由黃埔以進省之路是大小虎山乃第三重門戶也此外如蕉門蘆灣山三門口新湧口等處
港汊旁出島嶼周迴尙非夷船出入要津姑不具論以礮臺言之先有橫檔南山兩處均係康熙五十六
年所建形勢稍狹嘉慶五年於沙角添建礮臺一座二十年復就橫檔礮臺加築月臺一座又於南山礮
臺之西北添建鎮遠礮臺一座各安礮四十位二十三年又於大虎山建礮臺一座安礮三十二位道光
十年大角山又添礮臺一座安礮十六位迨十四年冬閒提臣關天培到粵適在驅逐夷人哮嘯啤出口
之後與前督臣盧坤商議以大角沙角兩礮臺中隔海面一千數百丈之遠兩邊礮火均恐不能得力只
宜作爲望臺遇有應行防堵之時放礮報信其南山鎮遠與橫檔三處礮臺形如品字中隔水面三百餘
丈礮火可期得力惟南山礮臺地勢過高礮子易於冒過船頂其餘原建牆垛亦俱單薄於道光十五年
會摺 奏准將南山礮臺前面環築月臺名爲威遠又將鎮遠橫檔大虎各礮臺加築堅厚添鑄七八千
斤大礮分別安配並於橫檔背面山麓及對岸蘆灣山脚續添永安鞏固礮臺二座安礮四十位二十位
不等此十五年前陸續添建礮臺之原委也維時提臣關天培卽欲於橫檔山前海面較狹之處創造
粗大鐵練安根兩岸鐵練之下承以木排木排兩端繫以錨纜有事則橫絕中流無事則分披海岸如門
開闔防堵益嚴以經費未充前督臣盧坤任內未及辦理鄧廷楨到後正與關天培商議籌辦旋於十八

年夏間有暎咭喇國夷目嗎咭噲巡船三隻窺探虎門見海口布置森嚴畏懼竄去復經鄧廷楨與關天培欽遵諭旨倍謹脩防以鐵練木排實爲阻攔夷船要具察看威遠鎮遠橫檔各礮臺之間海面較狹安設排練兩道足資堵截惟威遠鎮遠兩礮臺雖同在武山脚下而相距尙有里餘排練旣截中流礮臺尤宜聯絡故又於威遠鎮遠中間添建大礮臺一座安放大礮六十位以護排練而壯聲威此鄧廷楨等現在奏辦之情形也茲欽奉諭旨令臣詳細查察當又移舟至武山橫檔一帶流覽登眺此處本係第二重門戶最見緊嚴其海面自西北量至東南橫寬二百七十餘丈至三百三十餘丈不等所有排練兩道西北皆安根於武山脚下其東南則第一道安根於飯羅排之巨石第二道安根於橫檔山脚俱各鑿深石槽以八千斤廢礮橫安槽底外加鐵箍四道上扣鐵練四條由四而併爲二由二而併爲一中間紐合兩頭貫以大鐵練八條用大鐵鎖接扣兩邊以便開闔其木排則以大木截齊各長四丈五尺合四根爲一小排穿以橫木二道又以四小排聯成一大排量寬一丈六尺餘寸面底又各夾以橫木六道箱用大小鐵箍三十口第一道安大排三十六排大練三百九丈零第二道安大排四十四排大練三百七十二丈兩道排練相去約九十丈共配鐵錨棕纜二百四十副並設划船四隻水兵一百二十名管以把總二員無事則中間常開以通出入如須防堵則關閉甚速察看木排箱紮堅固鐵練煅淬精融開闔亦

俱得法其新建礮臺俯臨兩道排練正成扼吭之勢平寬六十三丈高一丈四尺五寸臺牆釘椿砌石垛牆礮洞則用三合土築成安礮六十位後圍石牆九十丈高出山巔除兵房望樓官廳軍裝火藥兩庫尙未竣工外其餘均屬完整演試銅鐵大礮礮子均能遠及對岸山根設有不應進口之夷船妄圖闖入雖遇順風潮湧駕駛如飛一到排練之前勢難繞越卽謂夷船堅厚竟能將鐵練衝開而越過一層尙有一層阻攔就令都能闖斷亦已羈絆多時各臺礮火連轟豈有不成灰燼之理似此重重布置均極森嚴聞黃埔及十三行出入夷人行舟過此皆懍然生嚴憚心於海防實屬有益惟排練日被鹹水泡浸加以潮汐蕩搖卽木大鐵堅亦自不能無損若有寸鐵脫扣一木離簾立刻卽須修復總使聯成整片百密不任一疎設或遷就怠延則寸節偶乖卽全局爲之鬆勁查提臣關天培於排練一事久已殫精竭慮寢食以之而礮臺工程亦時時躬親督造現在文武員弁皆極認真此後歲脩事宜均須由關天培立定章程使將備弁兵皆諳成法加以時常操演精熟則海防長臻鞏固邊釁永可潛消堪以仰慰 聖主廑念瀛壖之至意

會奏銷化煙土已將及半情形疏

附片

林則徐

竊臣等前奏收繳夷船煙土請將原箱解京先於四月十二日奉到 硃批已蒙 諭旨允准謹卽欽

辦理業經收拾裝載正在奏報起運間復於十八日承准軍機處咨開內閣奉 上諭前據林則徐等馳奏躉船鴉片盡數呈繳請解京驗明燒燬當降旨允行本日據御史鄧瀛奏稱廣東距京程途遼遠所繳煙土爲數較多恐委員稽察難周易啟偷漏抽換之弊等語林則徐等經朕委任此次查辦粵洋煙土甚屬認真朕斷不疑其稍有欺飾且長途轉運不無借資民力著無庸解送來京卽交林則徐鄧廷楨怡良於收繳完竣後卽在該處督率文武員弁公同查數目擊燒燬俾沿海居民及在粵夷人共見共聞咸知震讐該大臣等唯當仰體朕意覈實稽查斷不准在事員弁人等稍滋弊混欽此仰見我 皇上於覈實除害之中寓體恤民力之意臣等公同跪誦欽感難名伏思銷燬煙土弊竇最多必須在在嚴防庶可免於偷漏緣此物流行已久利之所在眾庶爭趨查道光十七年間臣鄧廷楨等曾經 奏明奸民向夷船購買鴉片從前每箇價值洋銀三十餘圓近來止須十六十八圓不等今卽以錢價覈算每箱亦須六百餘圓合計二萬餘箱不下一千數百萬圓之值在守正嫉邪之人不惟棄土棄之且以鳩毒視之而吸食者則竟望而垂涎興販者更欲居爲奇貨若防範稍不嚴密卽百弊爲之叢生臣等自收繳以來因虎門越在海濱須防奸民覬覦卽先相度堆貯之地計每箱長約三尺高寬半之大房一間纔能堆至四五百箱之數該處民房廟宇均無寬敞可容不得已合併數所圍築外牆添蓋高棚勻排封貯內派文職正佐

十二員分棚看守外派武職十員帶領弁兵一百名晝夜巡邏幸尙不至疎虞至銷燬之方亦復熟籌屢試向來用火銷化拌以桐油其法未嘗不善第訪聞焚過之後必有殘膏餘瀝滲入地中積憤熬煎之人竟能掘地取土十得二三其流毒仍難盡絕臣等廣諮博採知鴉片最忌者二物一曰鹽鹵一曰石灰凡以煙土煎膏者投以灰鹽卽成渣沫必不能收合成膏是其相剋之性正可資之以除其害也然使逐箱煙土皆用灰鹽煮化則鍋竈之設必須累百盈千誠恐照管不周轉滋偷漏如其少設又非數月不能銷完茲再四酌商莫若於海灘高處挑挖兩池輪流浸化其池平鋪石底縱橫各十五丈餘尺四旁欄樁釘板不令少有滲漏前面設一涵洞後面通一水溝池岸周圍廣樹柵欄中設棚廠數座爲文武員弁查視之所其浸化之法先由溝道車水入池撒鹽成鹵所有箱內煙土逐箇切成四瓣投入涵中泡浸半日再將整塊燒透石灰紛紛拋下頃刻便如湯沸不爨自燃復雇人夫多名各執鐵鋤木爬立於跳板之上往來翻截務使顆粒悉化俟至退潮時候啟放涵洞隨浪送出大洋並用清水刷滌池底不任涓滴留餘若甲日第一池尙未刷清乙日便用第二池其泡浸翻截悉如前法如此輪流替換每化一池必清一池之底始免套搭牽混滋生弊端至嚮晦停工卽將池岸四圍柵欄全行封鎖派令文武員弁周歷巡緝粵東天氣炎熱所用人夫僅穿短袴上身下脚向俱赤露又於停工放出時與執事工役一同搜檢不許稍有

夾帶試行之初每日纔化三四百箱迨數日後手法漸熟現在日可八九百箱至千箱不等當其銷鎔之際膿油上湧渣滓下沈臭穢熏騰不可嚮邇乃悟此物之能蠱人心志促人年壽槁人形骸者蓋製造時用物取精別有奇衰方術非僅如內地栽種鶯粟刮漿熬製已也臣林則徐駐劄虎門與提臣關天培率同委員候補知府南雄直隸州知州余保純等逐加佈置隨卽函商臣鄧廷楨臣怡良以欽奉 諭旨公同日擊銷燬是在省各員理宜輪流到虎查覈看視臣怡良因前次銷燬時商明留省此次輪應先到虎門臣鄧廷楨於臣怡良回省後亦卽乘舟來虎並令藩司熊常鐸臬司喬用遷運司陳嘉樹糧道王篤四員分班輪往接替查視又咨會廣州將軍臣德克金布左翼副都統臣奕湘右翼副都統臣英隆亦各輪流到虎稽查彈壓粵海關監督臣豫堃則以虎門本有稅口更應常川到彼照料稽查在事員弁人等均各派定執司互相查覈該處沿海居民觀者如堵只准在柵欄之外不許混入廠中以杜偷漏其上下省下澳夷人經過口門率皆遠觀而不敢褻翫察其情狀似有羞惡之良胥賴 聖主德威俾中外咸知震讐從此洗心革面庶幾咸與維新矣至煙土名色亦有不同其黑者曰公斑土聞係上等之煙白土次之金花土又次之此次劈箱銷化當將各色煙土分別編號登記大抵公土白土居多金花土不及百分之一業已逐箱過秤並口袋所裝者亦皆扣除箱袋覈實淨煙斤兩計自四月二十二日起截至五月初三日

已銷過八千三百二十箱又二千一百一十九袋其斤兩共合一百十二萬八千七百二十九斤以全數覈之所化已將及半現仍趕緊銷化不敢草率亦不敢遷延恐塵 聖懷謹將現辦情形合詞恭摺具奏

附奏東西各洋越竄夷船嚴行懲辦片

林則徐

再臣等察訪夷情因知外國商船來粵貿易者必先在该國請領牌照經過夷埠俱須驗明並於開船之時頒給禁約條款諄諭不許在於中華滋生事端酌限往返程期如未領牌照擅自行船查出卽治其罪船亦充公是外夷禁令森然並非縱其所如漫不加察而商船載來貨物動值數十萬金彼既愛惜重貲自必懷遵法度故貨船到粵必皆報關候驗納稅投行雖近年以來每有夷商夾帶鴉片情弊要亦先向躉船寄頓始敢駛進黃埔斷無駕駛重船東奔西竄之理惟因獲利太厚販運愈多各國雖間有之而以港脚一處爲尤甚港脚地名曰噠喇曰噠噴曰慢噠喇噠皆爲噠咭喇所屬之港口卽華言所謂馬頭也距噠咭喇本國尙有兩月路程而其來至內地則比噠夷爲近奸夷利慾薰心罔顧厲禁往往由外洋乘風竄駛越過廣東中路直趨東路之南澳以達閩浙各洋來去頻仍便成熟游之地在 天朝彌綸廣大無不徧示懷柔卽其所不應至之處違禁頻來亦惟自謹修防其究至於驅逐而止奸夷習知其故相率效尤沿海文武員弁不諳夷情震於噠咭喇之名而實不知其來歷遇有夷船駛至不過循例催行如

其任催罔應亦卽莫敢誰何甚有桀驁夷船膽敢以槍礮相恐嚇而官船因未奉有明文轉不便擅用火器如道光十四年閩浙總督臣程祖洛所奏情節曾奉 諭旨飭令督撫等務當隨時體察情形以靖洋面等因欽此欽遵在案以臣等近日訪聞乃知此等奸夷並未領照經商而敢偷渡越竄若被該國查出在夷法亦必處以重刑況 天朝禁令森嚴豈有轉以內地各洋爲其逋逃藪之理且如內地奸民出海潛赴夷洋滋事揆諸 國法正宜按例治罪倘在外已被夷人戕害適足蔽辜豈尙聽其鳴冤許爲報復乎以此對觀互證度勢揆情愈知越竄之夷船不必空言驅逐惟有嚴行懲辦乃可震懾其心總之有牌照而行中路者則爲經商之船無牌照而竄東西各路者卽爲偷渡之船經商之船尙須區分良莠偷渡之船明係有莠無良槍擊礮轟皆其自取似不爲過且此等越竄船隻小者爲三板夷划大者亦不過雙桅夾板迴非貨船躉船高大堅厚之比卽船內礮械亦極有限甚至安假礮於船旁畫礮眼於艙板祇以虛張聲勢粉飾觀瞻師船果能奮勇剿除何患不能相敵卽云夷人乃亡命之徒官兵不值與之對仗亦尙有便利之法可操勝算祇須雇募沿海之善泅者多駕拖船滿載車薪備帶火器分爲數隊占住上風漏夜乘流縱放卽或前隊未能得手後隊絡繹復來夷船中觸處皆引火之物未有不可以焦爛者此令一行不待實有其事而奸夷先已膽落似亦懾服之一法也

擬諭暎咭喇國王檄

林則徐

謹擬頒發檄諭暎咭喇國王底稿恭候 欽定洪惟我 大皇帝撫綏中外一視同仁利則與天下公之

害則爲天下去之蓋以天地之心爲心也貴國王累世相傳皆稱恭順觀歷次進貢表文云凡本國人到中國貿易均蒙 大皇帝一體公平恩待等語竊喜貴國王深明大義感激 天恩是以 天朝柔遠綏

懷倍加優禮貿易之利垂二百年該國所由以富庶稱者賴有此也唯是通商已久衆夷良莠不齊遂有夾帶鴉片誘惑華民以致毒流各省者似此但知利己不顧害人乃天理所不容人情所共憤 大皇帝

聞而震怒 特遣本大臣來至廣東與本 總督部堂巡撫部院 會同查辦凡內地民人販鴉片食鴉片者皆應處死

若追究夷人歷年販賣之罪則其貽害深而攫利重本爲法所當誅惟念衆夷尙知悔罪乞誠將躉船鴉片二萬二百八十三箱由領事官義律稟請繳收全行燬化疊經本大臣等據實具奏幸蒙 大皇帝格

外施恩以自首者情尙可原姑寬免罪再犯者法難屢貸立定新章諒貴國王嚮化傾心定能諭令衆夷

兢兢奉法但必曉以利害乃知 天朝法度斷不可以不懍遵也查該國距內地六七萬里而夷船爭來

貿易者爲獲利之厚故耳以中國之利利外夷是夷人所獲之厚利皆從華民分去豈有反以毒物害華民之理卽夷人未必有心爲害而貪利之極不顧害人試問天良安在聞該國禁食鴉片甚嚴是固明知

經世文讀編

此舉矣至夷商來至內地飲食居處無非 天朝之恩膏積聚豐盈無非 天朝之樂利其在該國之日猶少而在粵東之日轉多弼教明刑古今通義譬如別國人到暎國貿易尙須遵暎國法度況 天朝乎今定華民之例賣鴉片者死食者亦死試思夷人若無鴉片帶來則華民何由轉賣何由吸食是奸夷實陷華民於死豈能獨予以生被害人一命者尙須以命抵之況鴉片之害人豈止一命已乎故新例於帶鴉片來內地之夷人定以斬絞之罪所謂爲天下去害者此也復查本年二月間據該國領事義律以鴉片禁令森嚴稟求寬限凡印度港脚屬地請限五月暎國本地請限十月然後卽以新例遵行等語今本大臣等奏蒙 大皇帝格外天恩倍加體恤凡在一年六箇月之內誤帶鴉片但能自首全繳者免其治罪若過此限期仍有帶來則是明知故犯卽行正法斷不寬宥可謂仁之至義之盡矣我 天朝君臨萬國儘有不測神威然不忍不教而誅故特明宣定例該國夷商欲圖長久貿易必當懷遵憲典將鴉片永斷來源切勿以身試法王其詰奸除慝以保父爾有邦益昭恭順之忱共享太平之福幸甚幸甚接到此文之後卽將杜絕鴉片緣由速行移覆切勿諉延

覆奏曾望顏條陳封關禁海事宜疏

林則徐

竊臣等承准軍機大臣字寄道光十九年十二月十一日奉 上諭本日據曾望顏奏夷情反覆請封關

禁海設法勦辦以清弊源一摺又另片奏澳夷互市貨物亦請定以限制等語著林則徐怡良關天培郭
■并傳諭豫堃知之欽此臣林則徐臣怡良謹將鈔發原摺細加閱看並傳知臣豫堃一體領閱因關
各國夷人事務祇宜慎密商辦未便遽事宣揚復經函約臣關天培臣郭■於查閱營伍之便過省面
商茲已詢謀僉同謹將察看籌議情形爲我 皇上敬陳之查原奏以制夷要策首在封關無論何國夷
船概不准其互市而禁絕茶葉大黃有以制伏其命封關之後海禁宜嚴應飭舟師將海盜剿捕盡絕又
禁大小民船概不准其出海復募善泅之人使駕火船乘風縱放而以舟師繼之能擒夷船卽將貨物全
數給賞該夷未有不畏懼求我者察其果能誠心悔罪再行奏懇 天恩准其互市仍將大黃茶葉母許
逾額多運以爲箝制之法所論甚切所籌亦甚周臣等查粵東二百年來准令諸夷互市原係 推恩外
服普示懷柔並非內地賴其食用之資更非關權利其抽分之稅況自上冬斷絕暎夷貿易以來疊奉
諭旨區區稅銀何足計論大哉 謨訓中外同欽臣等有所秉承更可遵循辦理絕無所用其瞻顧卽將
各外國在粵貿易一律停止亦並不難惟是細察情形有尙須從長計議者竊以封關禁海之策一以絕
諸夷之生計一以杜鴉片之來源雖若確有把握然專斷一國貿易與概斷各國貿易揆理度勢迥不相
同蓋鴉片出產之地皆在暎咭喇國所轄地方從前例禁寬時原不止暎夷販烟來粵卽別國夷船亦多

以此爲利而自上年繳清躉船烟土以後業經奏奉 恩旨概免治罪卽未便追究前非此後別國貨船莫不遵具切結層層查驗並無夾帶鴉片乃准進口開艙惟暎咭喇貨船聚泊尖沙嘴不遵法度是以將其驅逐不准通商今若忽立新章將現未犯法之各國夷船與暎咭喇一同拒絕是抗違者擯之恭順者亦擯之未免不分良莠事出無名設諸夷稟問何辜臣等卽礙難批示且查暎咭喇在外國最稱强悍諸夷中惟咪喇啞及佛蘭西尙足與之抗衡然亦忌且憚之其他若荷蘭大小呂宋噠國暹國單鷹雙鷹堪叻等國到粵貿易者多仰暎夷鼻息自暎夷貿易斷後他國頗皆欣欣向榮蓋逐利者喜彼絀而此贏懷忿者謂此榮而彼辱此中控馭之法似可以夷治夷使其相間相睽以彼此之離心各輸忱而內向若概與之絕則缺望之後轉易聯成一氣勾結圖私左傳有云彼則懼而協以謀我故難閒也我 天朝之馭諸夷固非其比要亦罰不及衆仍宜示以大公且封關云者爲斷鴉片也若鴉片果因封關而斷亦何憚而不爲惟是大海茫茫四通八達鴉片斷與不斷轉不在乎關之封與不封卽如上冬以來已不准暎夷貿易而臣等今春查訪外洋信息知其將貨物載回夷埠轉將烟土換至粵洋並聞奸夷口出狂言謂關以內法度雖嚴關以外汪洋無際通商則受管束而不能違禁不通商則不受管束而正好賣烟此種貪狡之心實堪令人髮指是以臣等近日更不得不於各海口倍加嚴拏有一日而船烟並獲數起者可

見嘆夷貨去烟來之言轉非虛捏不然以外洋風浪之惡而嘆夷仍不肯盡行開去果何所圖若如原奏所云大小民船概不准其出海則又不能緣廣東民人以海面爲生者尤倍於陸地故有漁七耕三之說又有三山六海之謠若一概不准其出洋其勢卽不可以終日至捕漁者只許在附近海內此說雖亦近情然既許出洋則風信靡常遠近幾難自定又孰能於洋面而阻之卽使責令水師查禁而晝伏則夜動東擎則西逃亦莫可如何之事臣林則徐上年刊立章程責令口岸澳甲編列船號責以五船互保又令於風帆兩面及船身兩旁悉用大字書寫姓名以及里居牌保惟船數至於無算至今尙未編完繼又通行沿海縣營如有夷船竄至該轄無論內洋外洋均將附近各船暫禁出口必俟夷船遠遁始許口內開船其平時出入漁舟逐一驗查只許帶一日之糧不得多攜食物若銀兩洋錢尤不許隨帶出口庶可少除接濟購買之弊至大黃茶葉二物固屬外夷要需惟臣等歷查向來大黃出口多者不過一千擔緣每人所用無幾隨身皆可收存且尙非必不可無之物不值爲之厲禁惟茶葉歷年所銷自三十餘萬擔至五十餘萬擔不等現在議立公所酌中定制不許各夷逾額多運卽爲箝制之方然第一要義尤在沿海各口查拏偷漏若中路封關操之過嚴而東西各路得以偷販出洋則正稅徒虧而漏卮依然莫塞是以制馭之道惟貴平允不偏始不至轉生他弊若謂他國買回之後難保不轉賣嘆夷此卽內地行銷互售

尙難家至日見而況其在域外乎要知暎夷平日廣收厚積本有長袖善舞之名其分賣他夷以牟餘利乃該夷之慣技今斷絕貿易之後即使從他夷轉售一二亦已忍垢蒙恥多喫暗虧譬如大賈殷商一旦僅開子店寄人籬下已覺難堪惟操縱有方備防無懈則原奏所謂該夷當畏懼而求我者將於是乎在矣至於備火船練鄉勇募善泅之人等事則臣等自上年至今皆經籌商辦理惟待相機而動即各山淡水上年本已派弁守之始則夷船以布帆兜接雨水幾於不能救渴繼而覓諸山麓隨處汲取不窮則已守不勝守似毋庸議總之馭夷宜剛柔互用不必視之太重亦未便視之太輕與其涇渭不分轉致無所忌憚曷若薰蕕有別俾皆就我範圍而且用諸國以併拒諸夷則有如陪鹿若因暎夷而並絕諸國則不啻驅魚此際機宜不敢不慎況所杜絕者惟在鴉片即原奏亦云凡有夾帶鴉片夷船無論何國不准通商則不帶鴉片者仍皆准予通商亦已明甚彼各國夷人原難保其始終不帶若果查出夾帶應即治以新例不但絕其經商如其無之自不在峻拒之列也又另片請將澳門西洋貿易定以限制查上年臣林則徐先已會同前督臣鄧廷楨暨臣豫堃節次商議及之嗣經核定章程諭令澳門同知轉飭西洋夷目遵照即如茶葉一項每歲連箱准給五十萬斤仍以三年通融併計以示酌中之道其他分條列款該夷均已遵行本年正月澳內容留暎夷即暫停西洋貿易迨其將暎夷驅出仍即准令開關亦與原奏請議

章程不謀而合至所請責令澳夷代暎夷保結一節現既不准暎夷貿易自可毋庸置議

密陳定海夷情片

林則徐

再臣等因粵洋現有暎船自必常通浙信是以屢經設法密探定海情形偶有覓得夷信譯出漢文知此次領兵攻定海城者名曰喃嘛咻其統兵之夷目一名曰咖喱噠噠係東印度水師提督所坐夷船最大名曰麥爾威釐有礮七十四門該船進定海港口時碰於大礁之上底穿一孔入水甚深幾於沈沒又有帶兵夷官職分頗大之呵嚨叮被我師打死現在暎逆甚望定海居民回至該處與之同住而民人屢招不至所出章程亦無人肯信沿海漁船悉皆避去各夷船本係隨帶鴉片售作資糧今已火食無多轉瞬風色將轉均甚愁急等情是其伎倆之窮已可概見臣等竊思粵省民人患其與夷相習而此時浙省之民轉欲其習於夷而後便於行事若如夷信所言火食無多又恐風色將轉是正有可乘之機與其交鎗於海洋未必卽有把握莫若誘擒於陸地逆夷更無能爲或將兵勇扮作鄉民或將鄉民練爲壯勇陸續回至該處詐爲見招而返願與久居一經聚有多人約期動手殺之將如雞狗行見異種無遺惟機緘不可洩露現聞該逆中有咕吐啦一名僞爲定海縣官其人能爲華言更須防其詭計臣等已具密函飛致浙江撫臣烏■斟酌辦理第係遙揣情形未知當否謹再附片密陳

密陳夷務不能歇手片

林則徐

再臣渥受 厚恩天良難昧每念一身之獲咎猶小而 國體之攸關甚大不敢不以見聞所及敬爲 聖主陳之查此次暎逆所憾在粵省而滋擾乃在浙省雖變動若出於意外其窮感正在於意中蓋逆夷 所不肯灰心者以鴉片獲利之重每歲易換紋銀出洋多至數千萬兩若在粵得以復興舊業何必遠赴 浙洋現聞其於定海一帶大張招帖每鴉片一斤只賣洋錢一圓是卽在該國噠啊啦等處出產之區尙 且不敷成本其所以甘心虧折急於覓銷者或云以給雇資或云以充食用並聞其在夷洋各埠賃船雇 兵而來費用之繁日以數萬金計卽礮子火藥亦不能日久支持窮感之形已可概見又夷人向來過冬 以氈爲暖不著皮衣蓋其素性然也浙省地寒勢必不能忍受現有夷信到粵已言定海陰溼之氣病死 者甚多大抵朔風戒嚴自然舍去舟山揚帆南竄而各國夷商之在粵者自六月以來貿易爲暎夷所阻 亦各氣憤不公平欲由該國派來兵船與之講理是該逆現有進退維谷之勢能不內卻於心惟其虛憍 性成愈窮感時愈欲顯其桀驁試其恫喝甚且別生祕計冀得陰售其奸如一切皆不得行仍必帖然俛 伏臣前此屢經體驗頗悉其情卽此時不值與之海上交鋒而第固守藩籬亦足使之坐困也夫自古頑 苗逆命初無損於堯舜之朝我 皇上以堯舜之治治中外知鴉片之爲害甚於洪水猛獸卽堯舜在今

日亦不能不爲驅除 聖人執法懲奸實爲天下萬世計而天下萬世之人亦斷無以鴉片爲不必禁之理若謂夷兵之來係由禁烟而起則彼之以鴉片入內地者早已包存禍心發之於此時與發之於異日其輕重當必有辨矣臣愚以爲鴉片之流毒於內地猶癰疽之流毒於人心也癰疽生則以漸而成膿鴉片來則以漸而致寇原屬意計中事若在數十年前查辦其時吸者尙少禁令易行猶如未經成膿之癰內毒或可解散今則毒流已久譬諸癰疽作痛不得不亟爲拔膿而逆夷滋擾浙洋卽與潰膿無異然惟膿潰而後疾去果其如法醫治托裏扶元待至膿盡之時自然結痂收口若因腫痛而別籌消散萬一毒邪內伏誠恐患在養癰矣溯自查辦鴉片以來幸賴 乾斷嚴明 天威震疊躉船二萬餘箱之繳係嘆夷領事義律自行遞稟求收現有漢夷字原稟可查並有夷紙印封可驗繼而在虎門燬化烟土先期出示準令夷人觀看維時來觀之夷人有撰爲夷文數千言以紀其事者大意謂 天朝法令足服人心今夷書中具載其文諒外域盡能傳誦迨後各國來船遵具切結寫明如有夾帶鴉片人卽正法船貨沒官亦以漢夷字合爲一紙自結之後查驗他國夷船皆已絕無鴉片惟暎逆不遵法度且肆鴟張是以特奉諭旨斷其貿易然未有浙洋之事或尙可以仰懇 恩施今旣攻占城池戕害文武逆情顯著中外咸聞非惟難許通商自當以威服叛第恐議者以爲內地船礮非外夷之敵與其曠日持久何如設法羈縻

抑知夷性無厭得一步又進一步若使威不能克卽恐患無已時且他國效尤更不可不慮臣之愚昧務思上崇國體下懾夷情實不敢稍存游移之見也卽以船礮而言本爲防海必需之物雖一時難以猝辦而爲長久計亦不得不先事籌維且廣東利在通商自道光元年至今粵海關已徵銀三千餘萬兩收其利者必須預防其害若前此以關稅十分之一製礮造船則制夷已可裕如何至尙形棘手臣節次伏讀諭旨以稅銀何足計較仰見聖主內本外末不言有無誠足昭垂奕禩但粵東關稅旣比他省豐饒則以通夷之銀量爲防夷之用從此製礮必求極利造船必求極堅似經費可以酌籌卽裨益實非淺鮮矣臣於夷務辦理不善正在奏請治罪何敢更獻芻蕘然苟有裨國家雖頂踵捐糜亦不敢自惜倘蒙格外天恩寬其一線或令戴罪前赴浙省隨營效力以贖前愆臣必當殫竭血誠以圖克復自粵省各處口隘防堵加嚴察看現在情形逆夷似無可乘之隙藉堪仰慰宸懷

會同驅諸夷船稟

胡興仁

竊潮漳兩郡海口緊連必需畫一辦理庶可防奸杜弊某奉閩督飭赴詔安就近與某會商兩省如何一律防堵妥議章程星飛馳稟等因某卽於二十日行抵黃岡會同南澳鎮暨某悉心妥議本月初三四等日先後駛至布袋澳夷船八隻均於十三四等日駕出西南洋面而去現在並無停泊惟是夷船詭譎現

雖深知畏懼恐盤桓有所希冀不可不先事預防布置防堵某等熟思籌議竊以夷船之往來恃有奸民之勾結欲杜銷售接濟之源宜籌堅壁清野之法果令船海居民知禁物之賈禍則懷利之心必輕加以哨船之巡堵地方營縣之稽查有犯必懲無奸不摘該夷無所貪圖庶幾鴉片可絕某等同赴粵轄之柘林樟林南澳及閩轄之銅山懸鐘布袋澳等處周詳審視除柘林各海口向有巡船惟布袋澳等處因銅山營配緝兵少難以兼顧擬添設巡船卡房水陸兼堵商船一項現奉粵督鄧星使札於帆面寫明姓名牌甲加以海關之盤驗自易稽查而沿海漁船接濟是其慣技尤應行保甲之法使之互相牽制謹酌擬四條兩省一律辦理是否有當理合會銜稟請立案批示飭遵實爲公便

一潮郡漳郡各海口應隨時隨地雇覓漁船由地方官揀派丁役探查一聞巡船傳報有夷船駛來卽告知澳甲速報該管地方官丁役前往一面知會陸營在岸防守以杜接濟銷售等弊俟夷船駛去卽將丁役撤回以免虛糜且杜他弊

一商船出口入口雖由地方官給照向不派役稽查惟海關收稅向於各隘口派有委員家丁卽於稽查漏稅之人順查違禁之弊勢甚便而不擾如閩省漳浦之舊鎮雲霄之石蛇尾詔安之銅山懸鐘以及海澄潮陽均有海關委員守查應責成出具查過商船若干並無夾帶禁物甘結按月申報

一夷船駛出內港難保無通夷奸民借捕魚爲名銷售接濟應編查水保甲責令澳甲船行造冊送縣給牌張掛如有通夷私販等弊總甲知而不舉除將本船查封拏究外仍科總甲互甲之罪

一閩省銅山懸鐘緊接南澳直通澳門與粵省及饒平澄海水陸連界雖水急不能停泊而寄錠亦宜防維南澳有兵防守布袋澳係銅山兼轄銅山出洋兵一百六十名洋面太寬難以兼顧應請於布袋澳洋面添設小巡船四隻每隻撥兵十二名每兵月給口糧九錢每月應給銀四十三兩二錢查水師提標額設隨行出洋兵四百名內可否籌撥四十八名所需口糧或在各營標燁洗截曠項下支銷濱岸添造卡房二間俟有夷船停泊由陸營派撥兵二十名住卡稽查夷船去後卽令歸伍毋庸常川住卡卽不必另設口糧

征夷船進口硝磺稅銀議

胡興仁

道光二十三年閏七月初七日邸報 欽差兩江總督耆英等在廣東附片具奏征收夷船進口硝磺稅銀一摺據稱各國洋船壓舵之鹹沙可以煎瀘成硝因例無免稅明文各國夷商均在外洋私售無賴匪徒卽指爲違禁貨物查拏生事議嗣後每硝一擔征收三錢其出口硝磺仍應嚴禁等語查鹹沙難免回潮以之壓舵似非淡沙石塊之比難保不損壞船板卽可煎瀘成硝在夷船進口之時尙是鹹沙並非硝

礮亦未便以未成礮之沙責其納稅且鹹沙煎礮向在何處地面若係由該國煎成在外洋私售則直謂之礮礮不得謂之鹹沙若到內地始煎則何以又在外洋私售如鹹沙可以成礮則是濱海之地無處非礮又何需乎內地之礮礮不需內地之礮礮則向來礮礮出洋之禁何以立法綦嚴今既明立章程征進口之礮稅則礮在船中是出是入礙難分辨竊恐以進口二字朦混影射名爲征鹹沙進口之稅實以弛礮礮出洋之禁其弊不可勝言自來內地奸商私販礮礮非賣與洋盜卽賣與外夷從不聞外洋有礮載入內地是以例無完稅明文如果海岸之鹹沙皆可成礮則奸商雖爲漁利起見亦有身家既無重利可圖何必冒險私販此議一行是向負私販之名今遵公販之例以未成礮之沙科稅有礮之名無礮之實殊非體恤外夷之道洋船瞬息千里守口員弁果能一一稽查保無有出洋之船夾帶礮礮者乎既明收進口之稅則難禁出洋之礮所得不償所失流弊正自無窮若有意俯就外夷則是授人以柄釀禍無涯向止粵東一省今則福州廈門甯波上海一律照辦從此外夷之礮礮不可勝用矣彼有所贏則此有所絀 國家收稅無幾受患實深厝火積薪當防其漸

系世系系



卷之五

三

皇朝經世文續編卷七十八目錄

兵政十七 海防下

道光洋艘征撫記上

魏源

道光洋艘征撫記下

魏源

籌海篇上

魏源

籌海篇下

魏源

糸世三糸糸

糸子七糸糸

糸世三糸糸

糸子七糸糸

糸世三糸糸

糸子七糸糸

糸世三糸糸

糸子七糸糸

糸世三糸糸

糸子七糸糸

糸世三糸糸

糸子七糸糸

皇朝經世文續編卷七十八

上海葛士濬子源輯

兵政十七

海防下

道光洋艘征撫記上

聖武記

魏源

道光十八年四月鴻臚寺卿黃爵滋奏言敬籌國計宜防漏卮近年各省漕賦之疲累官吏之虧空商民之交困皆由銀價昂錢價賤向時紋銀每兩兌錢千今則每兩兌至千有六百其洋錢價亦因之遽長而銀少價昂之由由於粵東洋船鴉片烟盛行致紋銀透漏出洋日甚一日有去無返此烟來自英吉利洋人嚴禁其國人勿食有犯者以砲擊沈海中而專誘他國以耗其財弱其人既以此取葛留巴又欲以此誘安南安南嚴令誅絕始不入境今則蔓延中國橫被海內槁人形骸蠱人心志喪人身家實生民以來未有之大患其禍烈於洪水猛獸積重難返非雷厲風行不足振聾發聵請仿周官用重典治以死罪詔各省將軍督撫會議速奏時中外覆奏皆主嚴禁惟湖廣總督林則徐所奏尤剴切言烟不禁絕國日貧民日弱十餘年後豈惟無可籌之餉抑且無可用之兵上謂爲深慮遠識之言詔林則徐來京面受方略以兵部尙書佩欽差大臣關防馳赴廣東查辦海口節制水師初鴉片烟在康熙初以藥材納

稅乾隆三十年以前每年多不過二百箱及嘉慶元年因嗜者日衆始禁其入口嘉慶末每年私鬻至三四千箱始積澳門繼移黃浦道光初嚴禁復移于零丁洋之躉船零丁洋者在老萬山內水路四達爲中外商船出入所必由洋艘至皆先以鴉片寄躉船而後以貨入口凡閩浙江蘇商船卽從外洋販運其粵商則皆在口內議價而從口外運入始躉船尙不過五艘其烟至多不過四五千箱可籌火攻而總督阮元密奏請暫事羈縻徐圖驅逐於是因循日甚其突增至二十五艘烟二萬箱者則在道光六年兩廣總督李鴻賓設巡船之後巡船每月受規銀三萬六千兩放私入口前此定例互市以貨易貨不准紋銀出洋洋商歲補內地貨價銀四五百萬圓逮後則但有外補洋煙之價絕無內補貨價于是援例影射藩籬潰決及道光十二年總督盧坤始裁巡船而水師積習已不可挽道光十七年總督鄧廷楨復設船而水師副將韓肇慶專以護私漁利與洋船約每萬箱許送數百箱與水師報功甚或以師船代運進口於是韓肇慶反以獲烟功保擢總兵 賞戴孔雀翎水師兵人人充橐而鴉烟遂至四五萬箱矣京卿中有奏請將鴉片烟照藥材收稅者不報十九年正月二十五日林則徐馳驛抵粵傳洋商伍怡和索歷年販烟之洋商查頓顛地時查頓已聞風先竄惟顛地隨英吉利公司領事義律由澳門至省城洋館林則徐派兵役監守之並於省河之獵德砲臺筏斷來往諭令將零丁洋二十五艘之烟土勒限呈繳免其治罪否

卽斷薪水停貿易又以禁烟事宜策問書院士子皆以水師包庇販私對於是奏革水師總兵韓肇慶之職終以鄧廷楨所保不能盡正其罪公司領事者英吉利國王所派洋官司貿易者也他國皆洋商各自貿易惟英吉利別有公司皆通國富商合貲銀三千萬員而國王派領事一員總管之凡與中國官吏抗衡桀驁皆領事所爲故他國如中國離務之散商散輪而公司則猶離務之總商整輪也初議三十年爲一局繼展限六十年道光十三年公司局散粵中已無領事此洋務第一轉機而總督盧坤初至廣東未悉利害聽洋商言反行文英吉利國令仍派領事來粵初至者曰勞律卑卽以兵船闖入虎門構釁勒令歸國再至者卽義律在粵三載至是旣被圍省館不能回澳始于二月十二日具印稟遵繳并將駛往東洋之烟船盡駛回粵共繳鴉片煙二萬二百八十三箱計每船大者千箱次者數百箱每箱百有二十斤共二百三十七萬六千餘斤林則徐會兩廣總督鄧廷楨親駐虎門驗收以四月六日收畢每箱約賞茶葉三觔其煙土請解京師 詔卽在海口銷燬毋庸解京俾沿海民人共見共聞咸知震讐林則徐會同督撫於虎門監視銷燬就海灘高處周圍樹柵開池浸溷投以石灰頃刻湯沸不爨自然夕啟溷洞隨潮出海其鴉片共四種最上曰公斑土白土次之金花土又次之每箱四十枚又有小公斑土尤貴皆產於東印度之孟阿臘南印度之孟邁之曼達刺薩其印度洋埠發票有每月發至萬有二千餘箱者雖間售

南洋各國而中國居其大半歲不下五六萬箱其煙在印度本地每箱值價銀二百五十員至廣東則價銀五六百員爲利一倍共燒燬資本銀五六百萬員並利銀共千餘萬員時有各國洋商聞風來觀作文紀事頌中國之政林則徐下令盡逐外洋之躉船與澳門之奸商不許逗留內地其續至商船有鴉片者儻自揣不敢報驗卽日回國亦免窮追其進口之船均應具結有夾帶鴉片者船貨沒官人卽正法其令過嚴已非律載蒙古化外人犯殺罪准其罰牛抵償之例時西洋彌利堅諸國皆遵具結於是義律由省下澳稟言躉船販煙之弊極須設法早除如委員來澳會議章程可冀常遠除絕并稟請准本國貨船泊卸澳門此洋事第二轉機林則徐以澳門向例惟准設西洋額船二十有五艘若英人援此例不入黃浦則海關虛設而私煙夾帶何從稽察嚴駁不許義律言不准泊澳便無章程可議因不受所賞茶葉不肯具結言必俟奉國王命定章程方許貨船入口時義律已寄信附貨船回國往返不過半年原可少需毋迫也而五月內復有尖沙嘴洋船水手毆斃村民林維喜之事諭義律交出人犯抵罪義律拘訊黑夷五人未獲正犯懸賞購告犯之人亦非故意抗違也七月林則徐與鄧廷楨遵例禁絕薪蔬食物入澳並以澳門寓居洋人原爲經理貿易今既不進口貿易卽不應逗留澳門義律率其眷屬及在澳英人五十七家同遷出澳寄居尖沙嘴貨船於是義律始怨暗招洋埠兵船二艘來粵又擇三大貨船配以礮械赴九

龍山假索食爲名突開礮攻我水師船我參將賴恩爵揮兵發砲擊翻雙桅洋船一杉板船二及英人所雇呂宋躉船一八月義律遂託澳門西人代爲轉圜願將躉船奸商盡遣回國其貨船亦願具結如有夾私者船貨充公惟不肯具人卽正法四字此粵事第三轉機而林則徐以與各國結不畫一必令書人卽正法之語且責繳凶犯旋有英國二貨船遵式具結於九月晦入口而義律遣二兵船阻之且稟請毋攻燬尖沙嘴之船以俟國王之信水師提督關天培以凶犯未繳擲還其稟時我師船五艘在洋彈壓彼見前稟不收且我師船紅旗卽發砲來攻蓋西人號令紅旗進戰白旗止戰也關天培開砲應之擊斷洋船頭鼻西兵多落海死十月初又回攻我尖沙嘴迤北之官涌山砲臺不克洋船恐我乘夜火攻又水泉皆下毒無可汲飲遂宵遁外洋前此九龍山之戰奏奉 批諭有不患卿等孟浪但患過于畏葸之語十一月初八日 詔曰英吉利自禁煙之後反覆無常若仍准通商殊非事體至區區關稅何足討論我 朝綏撫外人恩澤極厚英人不知感戴反肆鴟張是彼曲我直中外咸知自外生成尙何足惜其卽將英吉利貿易停止且于原奏中洋船遵法者保護之桀驁者懲拒之語 批諭云同是一國之人辦理兩歧未免自相矛盾此因禁煙而並斷英人貿易之本末也 上又以大理寺卿曾望顏之奏欲封關禁海盡停各國貿易交兩廣大吏議奏林則徐力陳不可且言各國不犯禁之人無故被禁必且協力謀我始寢前

議自封港以後英商貨船先後至者二三十艘皆不得入口人人懟怨於是義律於十一月復遣人稟言在粵辦事多年實欲承平今諸事擾亂心多憂慮自後請遵照大清律辦理而無違國王之法乞仍許英人回居澳門俟國王諭至卽開貿易此粵事第四轉機而林則徐以新奉諭旨不便驟更復嚴斥堅絕其國貨船先後起碇揚帆駛出老萬山者十餘艘並續至之艘多觀望流連寄泊外洋不肯去而粵洋漁船蛋艇亡命之徒貪薪蔬之厚值並以鴉片與之交易趨者如鶩時林則徐已奉命總督兩廣與水師提督關天培密籌師船未可遽出大洋不如以毒攻毒遂招募漁艇蛋戶授以火船領以弁兵於二十年正月先赴各島竊潛伏約俟月晦夜乘退潮往乘長潮還游擊馬辰等四路分進出其不意突攻之於長沙灣燒燬運煙濟夷匪船共二十三岸上篷寮六生擒奸民十餘焚溺死者無數洋船帶火倉皇開避我兵勇乘潮急還無一傷者是時吸煙罪絞販煙罪斬之律已頒一年有六月之限期已半各省查辦日嚴紛紛戒食者已十之五六而英吉利國中聞廣東罷市之信各埠茶葉皆囤積不肯出售市價踴貴我閩粵販茶之商船赴南洋者皆倍利而返其倫敦國都銀肆無銀轉輸至借鄰埠之銀鉅萬以供支發義律已回國請兵時女王令國人會議其文武官皆主戰其貿易商民皆不欲戰連日議不決最後拈鬮於羅占士神廟三得戰鬮始決計國王命其外戚伯麥爲統帥率兵船十餘加以印度駐防兵艦二三十艘

二十年四月林則徐奏聞尙有以逸待勞以主待客彼何能爲之 諭五月初九夜林則徐又遣兵船於磨刀外洋以火船燒燬杉板洋船二斃白洋人四又有大洋船桅帆著火棄棹駕逃先後延燒大小匪艇十有一禽獲漢奸十有三五月英國大小兵船十二並車輪火船三先後至粵泊金星門其餘盡泊老萬山外林則徐又以火船十艘每二艘組以鐵索乘風潮攻之洋船皆急駛避僅焚其杉板小船二而英人自是不敢駛近海口林則徐自去歲至粵日日使人刺探西事翻譯西書又購其新聞紙具知西人極貌水師而畏沿海梟徒及漁船蛋戶於是招募丁壯五千每人給月費銀六員贍家銀六員其費洋商鹽商及潮州客商分捐又於虎門之橫檔嶼設鐵練木筏橫亘中流購西洋各國洋砲二百餘位增排兩岸又雇同安米艇紅單船拖風船共六十備戰船又備火舟二十小舟百餘以備攻剿并購舊洋船爲式使兵士演習攻首尾躍中艙之法使務乘晦潮據上風爲萬全必勝計林則徐親赴師子洋校閱水師號令嚴明聲勢壯甚至又下令每殺白洋人者賞銀二百圓黑洋人半之斬首逆義律者銀二萬圓其下領兵頭目以次遞降獲兵艘者除火藥砲械繳官外餘盡充賞於是洋船之漢奸皆爲英人所疑忌不敢留盡遣去其近珠江之內河在澳門西虎門東者盡以重兵嚴守其餘海口多礁淺非洋船所能入洋船至粵旬月無隙可乘遂乘風竄赴各省是月洋船三十一艘赴浙江先以五艘攻福建廈門時水師提督陳階

平先期告病總督鄧廷楨督金廈兵備道劉耀春砲中其大兵船火藥艙沈之又募水勇數百僞裝商舟出洋攻之於南澳港是夜無風洋艘不便駛避且舵尾無砲我舟低又外蔽皮幕銃彈不能中遂壞其舵尾擲火礮噴筒殲其夷兵數十會風起夷艇始竄遁六月全艘赴浙江攻定海陷之總兵張朝發中砲折股旋死其分出之船遊奕閩粵時時窺伺七月洋船突攻澳門後之關閘我守兵砲沈其數小舟傷其洋目洋兵數十八月林則徐偵洋帥士密之兵船五艘在磨刀洋遂遣副將陳連升游擊馬辰等率五兵艘出洋剿之每艘兵六百馬辰先遇洋帥之船即乘上風攻之砲破其頭鼻船欹兵溺圍攻良久洋船彈已盡僅放空砲於是他船以小舟十餘來圍馬辰之船而洋帥之船乘我兵與他舟相持即乘間竄遁撈獲死屍十餘及軍器帥旗入奏遂奉貪功啟釁殺人滅口之嚴旨蓋自定海失守後浙江巡撫烏爾恭阿提督祝廷彪束手無策朝廷以定海孤懸海中非海道舟師不能恢復而水戰又洋艘所長且承平日久沿海恐其衝突已有蜚語上聞言上年廣東繳烟先許價買而後貢約以致激變者又有言鄧廷楨廈門軍報不實者七月命兩江總督伊里布為欽差大臣赴浙江甯波視師且勅沿海督撫遇洋船投書即收受馳奏又命侍郎黃爵滋祁雋藻赴福建查勘適七月洋酋伯麥及義律以五艘駛赴天津投書書乃其國巴釐滿衙門寄大清國宰相之詞多所要索一索貨價其初次來書尚不敢顯言烟價但以貨價為名及見內地復書不及禁烟

之事後遂顯
索烟價矣
二索廣州廈門福州定海上海爲市埠三欲共敵體平行四索犒軍費五不得以外洋販烟

之船貽累岸商六欲盡裁洋商浮費直隸總督琦善收書奏聞是時洋兵艘並未北上志在求款通商尙未決裂使控馭得宜盟約立就天津巡道陸建瀛言洋人所求前三事大後三事小請以免稅代烟價以澳門爲市埠以海關監督與之平行但必嚴持禁烟爲名以鴉片烟之至不至決數事之許不許其通商裁費事宜則令仍回廣東與林則徐定議既可服外人心亦不失中國之體此西事第五轉機而任事者以爲在津速結則功小不如張之使大遂一切不決許且於復書中卽言上年廣東繳烟其中必有多少曲折將來欽派大臣前往查實不難重治林則徐之罪 詔以琦善爲欽差大臣赴粵查辦革林則徐鄧廷楨之職留粵聽勘並勅沿海各省不得開砲八月洋船自天津起旋以中國無決允之語不肯歸我定海惟撤兵船之半赴廣東先是林則徐奏言自六月以來各國洋船憤貿易爲英人所阻咸言英人若久不歸亦必回國各調兵船來與講理正可以敵攻敵中國造船鑄砲至多不過三百萬卽可師敵之長技以制敵此時但固守藩籬卽足使之自困若許臣戴罪赴浙効力必能殫竭血誠克復定海以慰 聖廬不報九月義律回浙入見伊里布於鎮海城索俘酋安突德及七月間餘姚知縣汪仲洋陷軟沙之洋舟及黑白夷數十人至是索之不果而去伊里布遣其奴張喜赴洋船餽牛酒首賀以林鄧革職之事洋

曾伯麥搖首曰林公自是中國好總督有血性有才氣但不悉外國情形耳斷鴉片可斷一切貿易不可貿易斷則我國無以爲生不得不全力以爭通商豈仇林總督而來耶是時直隸山東爭以敵情恭順入告山東巡撫託渾布遣人餽洋船歸至有各人向岸羅拜之奏而廣東裁撤水師之船已半途被擄矣署總督怡良奏聞而十月琦善至廣東查上年義律先後繳烟印文欲吹求林則徐罪不可得則首詣劫船之役何人先開砲欲斬副將以謝之而兵心解體矣撤散壯丁數千於是水勇失業變爲漢奸英人撫而用之翻爲戎首矣撤橫檔水中暗樁屢會議律于虎門左右洋船得以採水誌察徑路而情形虛實盡洩矣聽鹽運使王篤之言盡屏廣東文武專用漢奸鮑鵬往來傳信其人故奸人顛地之嬖僮義律所奴視益輕中國無人矣義律與琦善信云若多增兵勇來敵卽不准和於是已撤之兵不敢再調凡有報緝漢奸者則訶曰汝卽漢奸有探報洋情者則拒曰我不似林總督以天朝大吏終日刺探外洋情事一切力反前任所爲謂可得外洋懽心而敵人則日夜增造三板小船招集販烟之蜈蚣艇蟹艇數百此外火箭噴筒竹梯攻具增造不可數計水師提督關天培密請增兵琦善惟恐其妨和議固拒不許償洋商烟價銀七百萬圓而其心必欲索埠地琦善前以廈門及香港二地商之鄧廷楨廷楨言廈門全閩門戶不可許香港鼎峙爲粵海適中之地環以尖沙嘴裙帶路二嶼藏風少浪若令英人築臺設砲久必窺伺廣東

琦善既據以奏聞至是不能自背前奏又無以拒義律之求筆舌往反終無成議義律遂乘其無備於十二月五日突攻沙角大角砲臺乃虎門外之第一重門戶也副將陳連升守之連升久歷川楚戎行之老將兵止六百洋船砲攻其前而漢奸二千餘梯山後攻其背陳連升於後山埋地雷機發轟死百餘賊而不能再發賊後隊復擁上衆五倍于我我兵以扛砲前後殲二三百而火藥已竭賊火輪三板船又遠赴三門口焚我戰艘水師兵或潰或死其橫檔靖遠威遠各砲臺僅能自保且俱隔于洋船不能相救陳連升父子戰死賊遂據沙角大角兩砲臺時提督關天培總兵李廷鈺游擊馬辰等尙分守鎮遠威遠靖遠各砲臺兵各僅數百相向而泣天培遣廷鈺回至省城哭求增兵闔省文武亦皆力求琦善置不問惟連夜作書令鮑鵬持送義律再申和議於烟價外復以香港許之并歸浙江俘人以易定海城琦善與立契約遂於正月赴虎門宴義律於師子洋旣而正月杪批摺回不允於是事復中變初琦善之陞辭也奉面諭以英人但求通商則已如要挾無厭可一面羈縻一面防守一面奏請調兵原未令其撤防專款也及逆黨攻陷砲臺大肆猖獗上震怒於是有烟價一毫不許土地一寸不給之旨并調四川貴州湖南江西兵赴剿命林則徐鄧廷楨隨同辦理洋務然琦善不與林則徐商議一事且洋人和議已絕尙不許關天培增兵爲備而彼則號召日多器械日備凶燄百倍于前矣二十一年正月七日下午詔暴逆

人罪惡 特命宗室奕山爲靖逆將軍湖南提督楊芳戶部尙書隆文爲參贊大臣聲罪致討 命刑部

尙書祁墳赴江西總理兵餉楊芳方入覲行至安徽奉 命先往二月十三日馳至廣東而英人已於二

月五日乘風潮連破橫檔砲臺虎門砲臺提督關天培死之矣虎門各隘所列大砲三百餘門并林則徐

上年所購西洋砲二百餘門皆爲敵有湖南兵千餘新到琦善倉卒卽遣禦之烏浦甫交綏粵兵先走湖

兵且戰且走後阻四河溺死者半提督祥福又死之矣廣東省河廣闊惟東路二十里之獵得二沙尾西

南十五里之大黃滸河面稍狹可以扼守楊芳相度形勢使總兵段永福率千兵扼東南十餘里之東勝

寺爲陸路三面咽喉然其地距河五六里不能扼賊水路又使總兵長春以千兵扼大黃滸後五里之鳳

凰岡惟築濠壘橫木筏未沈石下木椿洋船可闖而過也其獵得及二沙尾雖沈船塞石而無兵礮守禦

敵船至可拔而除之也英初讐楊芳宿將威名又未悉內河虛實使白洋人持書至鳳凰岡議款從以漢

奸沿途探水總兵長春收書送城中待報任漢奸導白洋人徧歷營壘盡得虛實歸報無備於是分路深

入破鳳凰岡營進攻東西砲臺海珠砲臺盡扼獵得大黃滸兩咽喉矣時琦善已革去大學士拔去孔雀

翎而怡良復以英人香港僞示奏呈有爾等旣爲大英國子民自應順之於是 上益震怒籍琦善家產

鎖逮來京英人見 朝廷赫怒局勢大變恐和議永絕且洋船兵費浩大急欲通商以濟餉各國商船罷

市久亦皆咎之乃于二十六日託彌利堅國頭目與洋商伍怡和調停遞書言如欲承平不計別情但求照舊通商如有私夾鴉片者船貨入官蓋并琦善所許之烟價香港皆不敢求矣楊芳諭令退出虎門義律言俟奉通商之旨兵船卽退是月楊芳怡良奏聞是時門戶已失賊入堂與兵潰民散砲械俱乏倉暫款無一退敵緩兵之策而烟價卑地皆不索亦足申朝廷折衝樽俎之威與琦善未逮以前情形迥異是粵事第六轉機而楊芳正月初行至江西時聞粵中和議將定先爲給摺堆貨之奏以遙附琦善固已不取信於上及是再奏又不陳明粵中開門揖盜自潰藩籬非權宜不能退賊收險以屈爲伸之故與目前洋人震懾天威國體已振勢機大轉不可再失之故及與將來守備已固如再鴟張立可剿辦之故但影響吞吐其詞上以其毫無方略未戰先撫非命將出師本意不許是時定海之洋船亦至廣東共五十大艘半泊香港半入虎門舳艫相接徧樹出賣鴉片之幟將軍奕山行至江西以各省兵砲攻具未集暫駐韶州以俟三月二十三日奕山隆文及新任總督祁墳並抵廣州奕山問計於楊芳林則徐二人皆言寇勢已深而新城卑薄無險可守宜遣人計誘洋船退出獵得大黃滸之外連夜下椿沈船岸上迅壘沙城守以重兵大砲爲省城外障俾西人不能制我之命而後調集船砲兵勇以守爲戰俟風潮皆順葦筏齊備再議乘勢火攻庶出萬全是月林則徐復奉馳赴浙江軍營之命蓋去冬浙閩總督顏

伯燾浙江巡撫劉韻珂署兩江總督裕謙先後密疏陳林則徐琦善守粵功罪至是裕謙奉 命赴浙代伊里布爲欽差大臣故 上命林則徐以四品京堂馳往會辦以防英人敗竄赴浙而是時英人方據省河咽喉我兵實無勝算且攻具未齊所募福建水勇千人未至近募香山東莞水勇三千亦未集楊芳不欲浪戰奕山初至亦然之旣而惑于翼長隨員等之言以不戰則軍餉無可開銷功賞無由保奏急欲僥倖一試遂不謀於楊芳卽以四月朔夜半三路突攻洋船一屯西砲臺外出中路一由泥城出右路一屯東砲臺出左路日暮兵已出城奕山始詣楊芳卜休咎楊芳大怒拔劍忿詬而兵已不可挽時水勇木筏未集先用四川餘丁充水勇者四百廣州水勇三百乘小舟攜火箭火彈噴筒分路伏聞砲齊起以長鈎鈎其船底是夜又值逆風砲破其二桅大船二杉板小船五其被小舟圍焚遁免之大船一火輪船一溺洋人數百義律自洋館登舟竄免其洋館中貨爲四川湖南兵虜掠一空并誤傷彌利堅數人甫黎明而洋兵大集反乘順風我兵退走廣州城三面臨河街市鱗櫓繁麗甲南海至是火光燭天以及泥城港內所備攻敵之木筏材料數百油薪船三十餘艘皆爲敵人火輪船及漢奸所燼其筏材皆運至廣西費以數十萬計越三日義律投書約詰朝大戰至期敵船環攻城東西南三面佛山運至新鑄八千觔大砲本洋人所畏懼而位置不得地勢依山者高出水面依水者四面受敵砲架不能運轉取准奕山用文吏李

湘芳西拉本爲翼長將各省之兵互調分配各離營伍兵將皆不相習潰走則互相推諉所發鹽菜口糧厚薄不均祁墳又吝費令十五兵共一帳房擁擠無紀律各擇便利虜取貨物奕山又盡派重兵于東南二路而西北泥城後路無守備於是天字砲臺及泥城及四方砲臺一日皆失守天字砲臺者段永福守泥城者副將岱昌與參將劉大忠守四方砲臺者總兵長春天字砲臺上八千觔大砲未及一放卽爲洋兵錮以鐵釘四方砲臺者在城北後山之頂俯視全城國初王師攻圍廣州半載不能破及奪後山置砲俯擊始陷之乃攻城之利守城之害也早當拆毀而阻上山之徑乃官兵反設砲其上已爲失策且其地距水次十餘里層崖峭徑一夫扼險可拒敵自破泥城後繞東而北沿途官兵無一阻截至山下僅百餘人而守臺兵望風爭竄隕崖墜死無數洋兵唾手而得險要連夜於臺下築土城運火藥於是圍城軍民如坐穿中而聽穿上之下石矣將軍參贊不斬一逃將逃兵反開城納之連日城外之火箭砲彈與四方臺上之砲聲如電如雷晝夜不息幸大雨盆注其箭彈非墜池塘卽墮空地無一延燎內城貯火藥二萬觔漢奸以火箭火彈射之亦爲雨所滅惟內城尙高厚而外城低薄女牆卑於薨脊人無固志第七日洋兵遂并力專攻城東南隅若知將軍參贊皆居東南者箭彈入貢院櫺櫓皆破諸帥避入巡撫署面無人色議使廣州知府余保純出城講款義律立索軍餉銀六百萬圓烟價在外香港再議限五日內交銀

且約將軍及外省兵先出省城洋船始退出虎門將軍等一切允之城上改樹白旗先令洋商出二百萬圓餘於藩庫運庫海關庫發給會奏請罪而煙價及香港亦未入奏云十三日四方砲臺洋兵下山回船義律卽促將軍參贊離城十六日奕山隆文退兵屯金山離省河數十里先撤回湖南兵惟楊芳仍留廣州彈壓隆文於講和時卽憤恚成疾及抵金山不數日卽卒初將軍參贊之至粵也屢奏粵民皆漢奸粵兵皆賊黨故遠募水勇於福建而不用粵勇官兵擒捕漢奸有不問是非而殺之者粵民久不平而英人初不殺粵民所獲鄉勇皆釋還或間攻土匪禁劫掠以要結民心故雖有擒斬敵人之賞格無一應命當洋兵攻城居民多從壁上觀會南海義勇爲湖南誣殺義勇大譁數百人擁入貢院搜兵報復兵皆鼠竄將軍參贊摘段永福翎頂慰解之始散而洋兵亦日肆淫掠與粵民結怨及講和次日洋兵千餘自四方砲臺回至泥城淫掠於是三元里民憤起倡義報復四面設伏截其歸路洋兵終日突圍不出死者二百殮其渠帥曰伯麥霞畢首大如斗奪獲其調兵令符黃金寶勅及雙頭手砲而三山村亦擊殺百餘人奪其二砲及槍械千義律馳赴三元里救應復被重圍鄉民愈聚愈衆至數萬義律告急於知府余保純是時講和銀尙止送去四分之一又福建水勇是日亦至倘令圍殲洋兵生獲洋人挾以爲質令其退出虎門而後徐與講款可一切惟我所欲此粵事第七轉機而諸帥不計及此也反遣余保純馳往解勸竟日

始翼義律出圍回船十七日洋船漸次退出其大船有滯淺沙者各鄉民復思截而火之祁墳諭始解散而新安縣武舉人庾體羣亦於初四夜半以火舟三隊自穿鼻洋乘潮攻洋船于虎門轟其後艙雙桅飛起空中全船俱燬餘船皆棄旋竄遁又佛山義勇亦截擊于龜岡砲臺據上風縱毒煙以眯敵目殲殺數十又破其應援之杉板洋舟大帥先後奏聞 詔責諸將調集各省官兵反不如區區義勇其一切交部議處義律亦慚憤強出僞示言百姓此次刁抗蒙大英官憲寬容後毋再犯粵民憤甚復回檄詬之曰爾自謂船砲無敵何不於林制府任內攻犯廣東爾前日被圍時何不能力戰自拔而求救於首府此次由奸相受爾籠絡主款撤防故爾得乘虛深入倘再犯內河我百姓若不雲集十萬衆各出草筏沈沙石整槍砲截爾首尾火爾艘艦殲爾醜類者我等卽非 大清國之子民是時南海番禺二縣團勇三萬六千晝夜演練義律偵知內河已有備竟不敢報復然自是知粵市之不可復開翻然思變計不逾月遂復有廈門之事

道光洋艘征撫記下

聖武記

魏源

道光二十一年四月英人之受款於廣東也在我師則以救一時之危在敵亦急欲得銀以濟兵餉故通商章程彼此皆未暇議及洋兵大困於三元里自知已結粵民之怨又畏粵民之悍不敢復入內河貿易

欲洋商赴香港而香港隔海風浪洋商無肯往者遂欲以香港易尖沙嘴及九龍山將軍總督以香港尙未奏允何況二地約其仍來黃浦敵遂不許我修復虎門砲臺盡拆各砲臺之石移築香港且欲我拔去內河沙石樁筏彼此相持雖有通商之名無通商之實又余保純與義律議先送軍餉六百萬圓其烟價在外將軍止以軍餉改稱商欠奏聞其餘情未上達也及洋船退出後內河填塞要害增修砲臺守備日固不能如向日之闢突敵衆皆咎義律議款時不別索地埠遂揚言英吉利國王譴義律無能改命璞鼎查爲兵帥欲復往沿海各省必如上年在天津所索各款會六月香港有風颶之事祁墳怡良張皇入奏謂撞碎洋船無數漂沒洋兵漢奸無數所有帳房篷寮新修石路掃蕩無存浮尸蔽海 朝廷方發藏香謝海神布告中外允廣東保舉守城文武至數百員而洋船數十艘已全赴福建攻陷廈門矣初上年洋艘之攻廈門也水師提督陳階平先告病鄧廷楨督同兵備道劉耀春止守舊砲臺疊沙垣據形勢故賊攻不破及顏伯鸞嗣任首効陳階平之規避與琦善楊芳之主款意氣甚銳然故執褊虛憍自大且輕鄧廷楨之僅僅自守奏言用守而不用攻則賊逸我勞賊省我費大砲止可施諸岸上不能載之水中小舟止可行諸內港不能施之大洋遂請餉銀二百萬造戰艦五十餘艘募新兵數千水勇八千欲與出洋馳逐又於口外之崞嶼青嶼大小檔增建三砲臺備多力分新鑄千砲又多未就空船空臺徒等廢物適聞

廣東欵議成奉撤兵省費之 旨盡散水勇八千不籌安置水師提督寶振彪亦出巡外洋內備單弱七月初九日洋船數十艘突至投書令讓出廈門爲外埠俟上年天津所索各事皆遂再行繳還次早駛進先以數火輪往返忽東忽西哨探形勢並試我砲路砲路者官砲皆陷於石墻孔內惟能直轟一線不能左右轉運取準故夷先以舟試之知其所值則避之也旣而諸舟蠡擁齊進我守青嶼仔尾嶼鼓浪嶼之士死傷相繼洋船遂注攻大砲臺飛砲從空墮岸上散遣之水勇變爲漢奸從中呼譟應之顏伯燾劉耀春同時退避賊遂登岸反旋轉我臺上大砲回轟廈門一晝夜官署街市皆燬顏伯燾劉耀春退保同安廈門遂爲賊據然洋人得廈門亦不守不數日全隊駛赴浙江惟留數艘泊據鼓浪嶼八月初四日顏伯燾卽以收復廈門奏聞然同知潛處四鄉未敢回署視事 詔降顏伯燾三品頂帶留任遣侍郎端華赴福建勘實以聞時鼓浪嶼洋人日招工匠增造小舟爲駛窺內河計是月以大船五小船三十駛入廈門之木椿港口砲沈我兵船五副將林大椿游擊王定國中砲死提督普陀保總兵那丹珠督兵禦之砲沈大洋船一始退出外洋其福州省河外之五虎門潮至通舟潮退閣淺故洋船未敢駛入云初裕謙自正月赴浙江代伊里布爲欽差大臣時洋船已去定海總兵王錫朋鄭國鴻葛雲飛以兵五千駐定海輯流

移修城壘砲臺爲善後計裕謙任事剛銳而不嫻武備與顏伯燾同前此傾心於林則徐而林則徐又旋有遣戍新疆改赴河工之命蓋廣東鹽運使王篤入京於召見時力黨琦而排林林則徐去浙浙事益無所倚定海孤懸海中本不必守之地徒分兵力提督余步雲庸而猾素爲裕謙所鄙一時無人可代姑令駐招寶山不令渡海調度三鎮又皆武夫無遠略裕謙所任隨營知府黃冕署定海知縣舒恭壽皆吏才而非邊才及是築定海外城葛雲飛欲包瀕海市卑於城內左右抵山其三面則以山爲城裕謙未渡海親勘但據圖指揮從之有諍者曰守舟山已爲下策況所築者又必不可守之城乎天下無一面之城此乃海塘耳非外城也賊左右翻山入卽在城內矣備多則力分山峻則師勞請但環內城爲新郭勿包外埠勿倚外山庶城足衛兵兵足守城猶得下策旣而撓於羣咻議遂不行至若捐舟山專守海岸之策更無暇籌及也是夏廣東講款奉旨各省撤兵省費時精兵五千皆在定海其鎮海甯波僅兵四千分布各口八月初洋船先犯石浦以礁險不利而退東西游奕十二日進攻定海我軍砲破其火輪舟一卽竄遁十四日連檣進攻曉峯嶺開砲數百我兵皆隱側崖未傷其小舟登岸者爲鄭國鴻督兵扛砲擊退次兩日又營五奎島又繞攻東港浦又繞攻竹山門皆爲我砲卻十七日賊乘我守兵力疲遂分由五奎山東港浦曉峯嶺三路進攻以牽我師其攻曉峯嶺之賊登岸後卽撤舟以絕反顧前賊死傷後賊繼

進我守山兵逆風下擊銃不得力日午銃皆熱透賊遂冒死登山入城三總兵相繼戰死舒恭壽服毒死
邑民救蘇之定海復陷其鎮海防兵四千裕謙以千餘兵守城內外余步雲率千餘守招寶山總兵謝朝
恩率千餘守隔江之金雞嶺裕謙先期見招寶山建白旂知余步雲貳志乃盟神誓衆余步雲託足疾不
跪裕謙奏言洋船黑兵及漢奸不下萬人賊可并幫來犯我必扼要分守賊可數日不攻我必晝夜防備
彼衆我寡彼聚我散彼逸我勞又海艘乘風潮而至前艘稍退則後艘必自相撞碎故有進無退我兵未
歷戰陣各存一礮火難禦之見是賊五船一心且衆船一心而我兵則一人一心是以自粵至閩莫之敢
撓臣何敢輕視惟有殫血誠厲士卒斷不敢以兵單退守爲詞離鎮海半步不敢以保全民命爲詞受逆
人片紙余步雲心恨之二十六日洋船攻鎮海分犯金雞山及招寶山每路數千而余步雲不許士卒開
砲且兩次上城請退守甯波裕謙不許賊甫由招寶山麓攀援登岸余步雲卽率兵西走賊踞招寶山俯
攻鎮海其隔江之金雞山兵亦潰裕謙知事不可爲令副將豐伸賈欽差大臣關防送浙江巡撫自沈泮
池死之二十九日洋兵船四火輪舟二小舟數十進至甯波余步雲復棄城走上虞甯紹台道鹿澤長知
府鄧廷彩從之時甯波以西江漸淺狹敵小船駛至慈谿餘姚於是二城亦逃散一空土匪四起謠言傳
播浙西大震余步雲先後兩奏尙以裕謙先走爲詞及殉難事聞 朝廷賜諡賜祠賜襲無可再誣則又

流言此次洋兵至浙皆爲報復裕謙夏間梟斬白夷噍噀之仇親駐曹娥江以此語徧諭渡江難民浙江巡撫劉韻珂至據以入告而無如敵之在廣東先已敗盟索尖沙嘴索九龍山不許修虎門砲臺也且詭稱國王褫義律改命他帥未至定海先破廈門也又無如在浙先後投敵書懸敵示皆以欲索各省埠地爲詞無一言及裕謙也

明年伊里布在乍浦移書英酋詰其何故再犯彼復書至亦一字不及裕謙

裕謙有攘寇之志而無制寇之才同於張

浚議者不咎其喪師失地而翻以英之在粵在閩敗盟誣咎於浙帥不據英書英示爲詞而據余步雲逃罪之語爲詞則是責張浚之不如汪黃而汪黃遂堪退敵也九月賊以火輪小舟犯餘姚犯慈谿二城先潰遁英焚掠而去是月 命宗室大學士奕經爲揚威將軍侍郎文蔚副都統特依順爲參贊以河南巡

撫牛鑑總督兩江授怡良欽差大臣馳赴福建奕經用宿遷舉人臧紆青言浙江屢屛不可用除奏調川陝河南新兵六千外宜多用土勇水勇甯波鎮海漢奸通賊宜令浙江京官各保舉紳耆使分伏鄉勇爲內應而委員招集山東河南江淮之士勇萬人及沿海漁鹽梟販江湖盜賊二萬餘分伏三城水陸並攻以南勇爲北勇之目以北勇爲南勇之膽刊給賞格惟用散攻不動大隊不刻期日陸路伺敵出入水路各乘風潮逢敵卽殺遇船卽燒人自爲戰使彼出沒難防而後以大兵感之得 旨允行又 詔舉奇材異能之士且 諭奕經毋遽往杭先駐蘇城使敵無備俟各省兵勇齊集再赴浙江十月奕經至蘇幕下

侍衛容照司員楊熙聯芳阿彥達皆純袴少年所至索供應徵歌舞縱擄蒲攬威福蘇城流言四起遠播京師於是奕經移營嘉興十二月十五日奕經文蔚同夢洋人紛紛上船竄出大洋詰朝各述所夢不約而符又適接甯波來稟有洋人運械上船之信於是將軍參贊銳意進兵夜不能寐明年元旦赴杭留參贊特依順守杭州而奕經文蔚渡江十六日抵紹興先是去冬大雪平地五六尺入春又淫雨晝夜兼旬所備火舟薪葦皆淋濕不堪用且三城水陸縱橫數百里兵勇布置未周非二月中旬不能集事各路委員皆請緩師期半月而奕輕堅不肯待定計二十八日進兵恢復三城而原議分伏散戰之法一變爲排陣對戰之舉時敵聞大將軍至亦先自爲備甯波英目盡上船惟留數百人守城上大砲以待我西門之兵鎮海則英兵盡上招寶山俟我兵入城則開砲俯擊爲一舉殲我之計此夢兆所由也而諸將方嚴飭我軍不許携火器火箭恐延燒民舍但約城中漢奸內應禽縛英酋英兵以獻三城唾手可得得城後卽執所獲英酋與之議款謂萬全無失於是奕經以兵勇三千營紹興之東關使文蔚以兵勇四千半屯慈溪二十里之長溪嶺半屬副將朱桂屯西門外之大寶山以圖鎮海提督段永福以兵勇四千半伏甯波城外屯大隱山以圖甯波而副將謝天貴率兵千餘屯駱駝橋以扼鎮海甯波適中之路其領鄉勇者陸路則泗州知州張應雲主之令沈船梅墟以隔斷甯鎮英船而楊熙伏勇上虞策應水路則海州知州王

用賓主之專駐乍浦而故總兵鄭國鴻之子鄭鼎臣專司定海水勇以火攻洋船及期陸路官兵皆冒雨夜進至城則雨霽其從甯波西門入者城內伏勇先殲守門之賊釘城上之礮洞開城門以待我兵長驅至府署敵始驚覺巷戰相持俄北門洋兵又繞至攻其後前後受敵洋兵踞街樓屋甍之上火箭火砲兩面雨下巷狹牆高仰攻不利屯兵五百且戰且退死傷者半段永福督後隊至聞風反走既不登城扼門力戰又不退保大隱山而直走東關余步雲率兵二千駐甯波之奉化中途聞敗折竄終夜喘呼徧野此甯波之師也其慈谿大寶山之兵則副將朱桂參將劉天保分領之劉天保率河南勁勇五百先發鎮海城亦開門以待內應寥寥不能縛賊急使人出城取火器至則天已黎明城外招寶山敵銃齊發我軍踉蹌遁出而朱桂軍風雨迷路未至此鎮海之師也至是始知倉卒布置之誤然所死不過二三百兵於大局尙無害於是朱桂率陝甘兵千二百回屯大寶山之右劉天保收河南兵五百回軍大寶山之左張應雲兵勇亦回守慈谿城突經既不斬棄營逃將以肅軍令又不進營上虞以壯士氣文蔚復調張應雲赴突經營商軍事於是慈谿城中鄉勇無主亦潰散二月四日敵遂遣火輪舟焚我火舟數十於姚江而以兵二三千自慈谿登岸陸行十餘里進攻大寶山并自撤原舟以絕反顧朱桂以扛砲兵四百禦之自辰至未擊死洋兵四百餘殲其頭目巴麥尊我兵隱厓石樹木間無一傷者時洋兵離其船數十里深入死

地使得一隊伏兵截其後可獲全勝不然卽有兵數百防守後山我兵亦不致敗此夷事第八轉機而謝天貴軍不至張應雲城中伏勇已散劉天保火器已半喪於鎮海雖據左山不能下山截賊後其地卽在長溪嶺之麓距參贊營僅十餘里朱桂請援兵數百文蔚堅不許發薄暮始發兵三百而敵已分兵四百潛越旁港繞出我軍山後朱桂前後受敵父子死之劉天保左軍亦驚潰時長溪嶺阻險而陣洋兵斷難黑夜進攻而容照及聯芳等力請文蔚棄軍宵遁沿途賞輿夫賞舟子惟恐英兵追及參贊旣遁全軍遂潰棄輜重器械山積反妄奏營被漢奸燒燬其實次日薄暮英兵尙未至嶺也長溪嶺旣潰軍氣大阻喪卽有獻策請移營上虞別選新到之兵再誘敵深入與之再戰三戰一以牽其北擾江蘇之計一以阻其驕索無鑒之氣而後徐與講款者突經文蔚心已亂言不入耳惟容照之言是聽鎮海之役劉天保軍僅傷七人而奏言全軍覆沒僅脫回七人大寶山之戰我軍僅死百餘而奏言死者千餘慈谿英兵登岸僅二千餘而奏言萬有七千無非張賊勢而遁己罪初七日卽與文蔚棄紹興走西興突經旋渡江回杭州而陸路不可爲矣水路本議由乍浦雇漁舟潛渡岱山以圖復定海已渡水勇萬餘分伏各港至是亦用容照言散之并戰船火船盡撤回其水勇無歸者遂竄入英船爲漢奸而水路亦不可爲矣爲鄭鼎臣一路不奉命容照聯芳等憾之力請誅以軍法突經唯唯不決臧紆青憤盲左目力辭去突經固留之始復

思用原議伏勇散戰之法於二月十六日再渡江檄飭各路兵勇相機自效一月中伺殺黑白英人三百餘級生擒英官四人白黑夷五十餘人縛獻甯波漢奸主謀二人餘盡解散鄭鼎臣水路則三月朔聯火舟數十圍攻大洋艘於岑港又分攻三洋船於他港共焚沈洋兵船四及小洋船十餘焚溺死洋兵五六百鎮海知縣葉埜亦報大攻洋船於海口先後奏聞 詔賞奕經雙眼孔雀翎文蔚一品頂戴鄭鼎臣葉埜獎勵有差於是闔營沸然前此主殺鄭鼎臣者今又競思邀功而主和議之人則又譁然以爲虛報不實巡撫劉韻珂據以劾奏旣而鄭鼎臣送所獲賊首賊衣及燬破船板共載四大艘呈驗劉韻珂始語塞而韻珂前月已奏請伊里布來浙主款 上復命宗室尙書耆英爲欽差大臣署杭州將軍與參贊齊慎赴浙 降旨不許進兵并不許擒斬零夷有兵勇殺一黑白夷卽行正法并治官弁之罪皆劉韻珂所奏請也是月河南開封黃河決口堵合 詔林則徐由工次赴新疆大學士王鼎自河南工次入京復命赴五日發憤具遺疏暴薨英人是月遂棄浙北窺松江窺長江登范氏天一閣取去一統志又購長江圖及黃河圖盡得我軍所裁撤水勇爲鄉導兼造小蛋船數十爲入淺河之用勒索甯波紳士犒軍銀二十萬員許退出城池遂以三月二十七日棄城登舟奕經等以大軍偪退英兵收復甯波入告蓋賊自去秋破甯波後卽遣火輪舟歸報國王其舟自中國至西洋往返六月可達至是三月初國王諭至今復往天津

求埠地通商故是月退出甯波於官兵無預也四月朔鎮海洋船亦棄城而北惟留四舟及洋兵千餘守定海錢塘江口龔緒二山近年灘漲淤淺潮至通舟潮落斷流故洋船不窺杭而初九日犯乍浦先以兵船橫列成陣開砲與官兵相持而遣小舟分路登岸攻東門我陝甘兵以扛砲傷敵甚衆敵轉攻南門駐防旗兵平日凌辱漢人至是又動斥爲漢奸由是福建水勇積憤縱火內應賊遂踰南城入盡焚滿營都統長喜署乍浦同知韋逢甲死之兵備道宋國經退走嘉興杭州嘉興俱戒嚴原任大學士伊里布至乍浦洋船議款英邀挾甚侈不能成議劉韻珂又奏請釋還所擒黑白夷數十送乍浦則洋船已去又改送鎮海謂可解仇通好英置不問 詔將軍參贊分一人前赴嘉興防堵於是奕經自紹興渡江而北 欽差大臣耆英方馳至嘉興忽奉 命前赴廣東其杭州將軍關防 命特依順署理蓋據御史蘇廷魁之言風聞廓爾喀國已攻襲英人駐防印度之兵洋船將回兵救援因有退出甯波之事故 命耆英前赴廣東體察虛實乘機攻香港及江左告急復 命中道折回防堵時香港洋船十四杉板小船數十洋兵千餘漢奸海盜藪聚其間奕山等既招回漢奸三千餘其香港漢奸頭目內向耆亦十之六各願立功贖罪請包修虎門砲臺並請乘冬令晦潮出其不意與香港漢奸表裏應和火攻洋船一舉殲之而奕山聽祁墳言惟恐觸其怒不許六月 詔責奕山視師廣東半載毫無方略屢命收復虎門攻香港以牽制閩

浙賊勢皆以船造未就爲詞惟以填塞河道爲事革去御前大臣都察院左都御史而顏伯燾亦久未剿除廈門停泊之洋船革職以怡良代之十八日洋船棄乍浦而北五月初三日洋船至吳淞口初五日牛鑑接奕經檄令權宜羈縻牛鑑遲至初七日始遣弁齎札赴洋船則已無及寶山城在吳淞口外洋面寥闊本不如內東溝江灣二隘之易於設伏寶山知縣周恭壽請伏兵口內誘賊毋守海口砲臺牛鑑不從總兵王志元守小沙背之徐州兵五百卽在浙從余步雲棄招寶山之潰兵也牛鑑不懲創之反令守要害終日騷掠居民洶洶周恭壽力請撤換他兵亦不聽初八日黎明開砲提督陳化成砲沈其二艘又擊拆其二艘之桅洋兵溺死二百餘遂以小舟繞攻小沙背總兵王志元率徐州兵果望風西走提督陳化成亦中砲死賊遂由小沙背登岸僅八九人而塘上數千兵皆望風潰矣牛鑑走嘉定其東砲臺之兵皆同時潰賊遂陷寶山喪大砲軍仗無算上海大震參將繼倫率兵先棄城走松江上海兵備道巫宜禎上海知縣劉光斗從之所募福建水勇變爲土匪縱火焚掠十一日洋船七八艘駛入上海城中已空無人十三日洋人乘火輪船二杉板船四五駛入松江我兵先塞港口距城八里壽春鎮總兵尤渤以陝甘兵二千守之敵開砲數十我兵皆伏避之砲過而起我砲齊發相持半日始退次日復至亦如之故松江得無恙賊又將窺蘇州使火輪舟測水至泖湖漁舟引之入淺輪膠水草乃返於是二十日洋艘退出吳淞

口圖入長江矣初裕謙奏江海情形有長江無遮障潮來甚溜甚難防守之語牛鑑則駁斥常鎮道請守鵝鼻嘴之稟且徧諭居民以長江沙線曲折洋船斷不能入賊劫沙船導火輪船兩次駛探初報諸險要皆無備次報諸汊港荻洲皆無伏始連檣深入六月八日薄瓜洲瓜洲城已空遂窺鎮江鎮江依北固山爲城以運河爲濠形勢險固非寶山比駐防副都統海齡庸繆人也牛鑑旣失吳淞口自應馳守鎮江會參贊齊慎提督劉允孝之兵且節制副都統嬰城固守洋船必不越鎮江而徑犯江甯上之可以徐籌火攻次之卽與敵講款亦不致操我死命無求不遂乃牛鑑從丹陽句容直走江甯海齡又拒齊慎劉允孝使戰城外惟以駐防兵守城內鎮江繁富十萬戶海齡禁難民遷徙出城出者皆刃夾而搜括之日捕誅城中漢奸合城鼎沸凡木石油炭火器守城之具一切不備又不團練居民鄉勇助守城中僅駐防兵千餘與綠營兵六百寥落如晨星始則城外軍擊其西北登岸之賊相持二三日英佯攻北門而潛師梯西南入城土兵僅斫其一二入敵已蟻附上守兵皆潰英先焚滿營海齡爲亂兵所殺鎮江陷虜掠焚殺慘甚甯波寶山夷酋璞鼎查卽欲出江前赴天津而馬禮遜阻之謂此中國漕運咽喉扼以要挾必可如志遂不果是時洋船八十餘艘砲聲震江岸自瓜洲至儀徵之鹽艘佔舶焚燒一空火光百餘里揚州鹽商許銀五十萬免禍六月二十八日遂偪江甯東南大震 朝廷廑念漕運重地 勅耆英便宜從事是時

敵人已奉國王諭至但得他省通商不必更索兵餉烟價其鴉片烟亦不再至故洋師三月出甯波及在乍浦僞示皆有前往天津求和遵國王所諭辦理之言至是伊里布遣張喜等至洋船洋面言一索洋銀二千一百萬員三年交付一索香港爲市埠並往廣州福州廈門甯波上海貿易一洋官欲與中國官員敵體餘與上年同張喜言烟價兵餉廣東已給六百萬今索價更奢索埠太多若之何馬禮遜言通漢語者此我國所索之價豈卽中國所還之價且此次通商爲主志不在銀錢但得一二港口貿易其兵餉烟價中國酌裁可也而諸大吏不速覆遣張喜往返傳語越二日張喜還則敵聽漢奸言聞增調壽春兵

之信謂我借款緩敵如今日不定議者詰朝交戰其意蓋欲款局速成非望所求盡允而諸帥已膽裂卽夜覆書一切惟命其禁約鴉片章程一語不及英喜出望外諸帥會奏言敵設砲鍾山之頂全城命在呼吸蓋仿襲粵省失四方砲臺之說其實絕無其事且奏稱昔純皇帝征緬無功棄關外地五千里尤以

鑿空無稽之談誣

祖德駭聽聞

雲南銅壁關上有額曰天朝中原地盡于此試披康熙銅板地圖曾有銅壁關外五千里地失於乾隆者乎

敵人又言講款

文書中國需用御寶彼國亦遣火輪舟歸請國王用印兵船惟退出口其舟山及鼓浪嶼香港之洋兵必俟三年銀數交竣方可撤歸七月初九日款議成耆英伊里布牛鑑親赴敵人璞鼎查之舟越二日璞鼎查馬禮遜等亦入城會於正覺寺連日分提江甯蘇州安徽藩庫揚州運庫銀數百萬如數餽之八

月杪洋船將出江諸帥復餞於正覺寺九月初旬洋艘盡回定海 詔以不守江口逮總督牛鑑治罪以耆英代之而伊里布以 欽差大臣由浙至廣東議互市章程褫逮領兵之奕山奕經文蔚余步雲交刑部治罪惟余步雲於是冬伏法其沿海失守城池之道府縣及領兵將官失事者以次懲處分別豁免沿海被寇州縣錢糧而是冬又有索臺灣俘人之事上年及次年又有廓爾喀佛蘭西彌利堅各國違言之事又有廣東義兵焚洋館之事臺灣俘人者二十一年八月及次年二月洋船兩窺臺灣一在淡水港遭風觸礁一在大安港爲漁舟誘引擱淺皆爲沿海義勇圍攻擒獲三桅大舟一杉板舟二白夷二十四黑夷百有六十五砲二十門刀銃器械并甯波鎮海營中官物蓋攻浙之賊回窺閩洋者總兵達洪阿兵備道姚瑩先後 奏聞三月敵遂以十九艘赴臺報復結海盜艇數十導之入港我兵先破其盜舟敵人不敵入遙轟大砲而遁又屢遣奸細入臺煽亂皆被擒斬一方屹然洋船不敢再犯屢 詔優獎姚瑩加布政使銜達洪阿加提督銜各世襲輕車都尉是秋江甯議款約所獲兵民彼此交還而臺灣黑夷百有六十五人已於五月奉 旨斬決惟以白夷還之敵目璞鼎查遂訐臺灣鎮道妄殺其遭風難民時江蘇主款官吏方忌臺灣功而福建廈門失守文武亦相形見絀流言四起耆英遂據閩人故總督蘇廷玉及提督李廷鈺二人家信劾臺灣鎮道冒功 勅福建新督查奏新督至臺灣查案卷則所奏皆據廳營及紳

士稟報無功可冒因強鎮道引誣以謝洋人遂効逮至京臺灣兵洶洶鼓譟達洪阿姚瑩諭解之新督亦旋告病以劉鴻翱代之劉鴻翱盡以臺灣廳營紳士稟報原案咨送軍機處上徧閱之鑒二人枉不深罪達洪阿姚瑩旋即起用云廓爾喀者在西藏西南與英國所屬東印度孟阿臘接壤世仇二十年秋間英人入寇卽稟駐藏大臣言小國與底里所屬之披楞部相鄰每受其侮今聞底里與京屬構兵京屬屢勝小國願率所部往攻底里所屬以助天討使廷臣明地勢洋情許其犄角則英國印度之兵懷內顧憂不能全赴中華此洋事第一外助而廷臣未知其所謂底里者卽英吉利所謂披楞者卽孟阿臘所謂京屬者卽中國之廣東顧答以蠻觸相爭天朝從不過問於是廓夷罷攻印度而英人入寇之兵無復內顧及是秋款議成英人歸印度者以此大驕廓爾喀則反脅於駐藏大臣詞甚諄嫚駐藏大臣惟羈縻之而已佛蘭西彌利堅者皆大西洋強國與英人同市廣東且世仇英人而恭順中國上年英人入犯并阻遏諸國貨船不許貿易諸國皆憾之言英人若不早回國亦必各調兵船來粵與之講理林則徐兩次奏聞俄林則徐罷琦善一意主和前議遂中止及去年琦善褫逮甫數日彌利堅頭目卽出調停故有但許通商不索一切及私帶鴉片船貨充公之請乃廣東諸帥夜攻洋館反誤殺彌利堅數人於是彌利堅不復肯出力而佛蘭西洋官於英人再次敗盟之後屢在粵願助造兵船是冬來兵船二兵帥一

言有機密事願面見將軍請勿用通使從有能漢語之二僧可以傳言將軍奕山及總督祁墳與再會城外屏左右密言英人阻隔諸國貿易國王遣兵船前來保護并命從中解散請赴江浙代款必能折服英人不致無厭之求倘英人不從亦可藉口與之交兵此粵事第二外助乃奕山始則拒不肯奏佛蘭西請先赴香港晤璞鼎查議之數日覆稱英人以香港及烟價三百萬爲請奕山亦屏不奏良久始奏聞又言敵情叵測難保其非陰助英人代探我虛實佛蘭西自正月至五月待命半載及六月駛赴吳淞口則英人已深入長江佛蘭西請我舟導之入口上海官吏反難之往返申請稽時及佛蘭西易舟入江則款議已成數日盡飽谿壑視佛蘭西原議相去天淵佛蘭西頭目頓足而返是冬回至廣東議互市英人欲各國洋商就彼掛號始輸稅佛蘭西彌利堅皆憤言我非英國屬國且從未猾夏馮陵何厚彼而疏我於是彌利堅來兵船入不數月佛蘭西亦來兵船入皆上書求入貢面陳誠款并請留兵船于閩粵惟貢使數人由陸入京蓋欲密獻機宜效回紇助唐之誼此洋事第三外助而廷臣再三卻之時伊里布已卒於廣東二十三年耆英奉命馳往接辦先後許各國皆如英人之例不用洋商任往各海口與官吏平行英人反以此德色於諸人矣廣東義民者初英人自去夏困於三元里不敢入市廣州及講款後奉旨許廣州貿易是冬白夷橫行於市粵民怒起誅之聚衆萬餘焚洋館掠其貨又殺其洋官洋兵於澳門海

中時璞曾兵船正在廣東竟不敢報復督撫懲治焚館之民以謝而番禺紳士潘仕成捐貲延佛蘭西洋官雷壬士於家造洋船洋砲又造水雷能水中轟破船底所捐造二桅戰艦四艘材堅工巧悉如西洋式每水雷造價僅四十金每艘僅價二萬金 詔廣東新造戰艦一切交其承辦毋令官吏經手以杜侵蝕大吏尼之旋亦中止故敵寇之役中國非無外援也非無內助也無人調度之則毆屬夷以資敵國且化勅民爲奸民且誣義民爲頑民邇者沿海通商鴉片益甚於前并用廣東巡撫黃恩彤言開各省天主教之禁其據定海及鼓浪嶼之人皆脅官吏藪逋逃而福州烏石山之人直踞省會腹心俯瞰全城總督劉韻珂巡撫徐澤醇束手惟命而 奏疏諱之但言給與城外破廟閩省士民憤怨時林則徐家居尤爲閩大吏所忌道光二十四年 召還耆英降巡撫黃恩彤爲同知回籍二十五年英人欲踐耆英所許三年入城設洋館之約總督徐廣縉內聯義民外聯彌利堅以拒之敵受約束退 詔封徐廣縉子爵巡撫葉名琛男爵粵事始稍定咸豐元年又特 詔獎雪林則徐及姚瑩達洪阿之盡心竭力於邊而斥耆英畏葸驕敵之罪中外翕然欽頌

籌海篇上

海國圖志

魏源

自夷變以來帷幄所擘畫疆場所經營非戰卽款非款卽戰未有專主守者未有善言守者不能守何以

戰不能守何以款以守爲戰而後外夷服我調度是謂以夷攻夷以守爲款而後外夷範我馳驅是謂以夷款夷自守之策二一曰守外洋不如守海口守海口不如守內河二曰調客兵不如練土兵調水師不如練水勇攻夷之策二曰調夷之仇國以攻夷師夷之長技以制夷款夷之策二曰聽互市各國以款夷持鴉片初約以通市今請先言守

今議防堵者莫不曰禦諸內河不若禦諸海口禦諸海口不若禦諸外洋不知此適得其反也制敵者必使敵失其所長夷艘所長者外洋乎內河乎吾之所禦賊者不過二端一曰砲擊一曰火攻夷之兵船大者長十丈闊數丈聯以堅木澆以厚鉛旁列大砲二層我砲若僅中其舷旁則船在大洋乘水力活不過退卻搖蕩不破不沈必中其桅與頭鼻方不能行駛卽有火輪舟牽往別港連夜修治惟中其火藥艙始轟發翻沈絕無洄底鑿沈之說其難一若以火舟出洋焚之則底質堅厚焚不能燃必以火箭噴筒焚其帆索油薪火藥轟其舵尾頭鼻而夷船桅斗上常有夷兵鏡遠瞭望我火舟未至早已棄舵駛避其難二夷船起碇必須一時之久故遇急則斬纜棄碇而遁夷船三五爲幫分泊深洋四面棋布並非連檣排列我火船攻其一船則各船之砲皆可環擊并分遣杉船小舟救援縱使晦夜乘潮能突傷其一二艘終不能使之大創而我海岸縣長處處防其闖突賊逸我勞賊合我分其難三海戰在乘上風如使風潮皆順則卽雇閩廣之大梭船大

米艇外裹糖包亦可得勝鄭成功之破荷蘭明汪鉉之破佛郎機皆偶乘風潮出其不意若久與交戰則海洋極寒闊夷船善駕駛往往轉下風爲上風我舟卽不能敵卽水勇水雷亦止能泅攻內河淡水不能泅伏鹹洋其難四觀于安南兩次創夷片帆不返皆誘其深入內河而後大創之則知欲奏奇功斷無舍內河而禦大洋之理賊入內河則止能魚貫不能棋錯四布我止禦上游一面先擇淺狹要隘沈舟組筏以遏其前沙垣大砲以守其側再備下游椿筏以斷其後而後乘風潮選水勇或駕火舟首尾而攻之沈塞港之處必留或仿粵中所造西洋水雷黑夜泅送船底出其不意一舉而轟裂之夷船尙能如大洋之港路以出火舟隨意駛避互相救應乎倘夷分兵登陸繞我後路則預掘暗溝以截其前層伏地雷以奪其魄夷船尙能縱橫進退自如乎兩岸兵砲水陸夾攻夷砲不能透垣我砲可以及船風濤四起草木皆兵夷船自救不暇尙能回砲攻我乎卽使向下游沈筏之地豕突衝竄而稽留片時之間我火箭噴筒已燼其帆火罐火斗已傷其人水勇已登其艙岸上步兵又扛砲以攻其後乘上風縱毒烟播沙灰以眯其目有不聚而殲旃者乎是口門以內守急而戰緩守正而戰奇口門以外則戰守俱難爲力一要旣操四難俱釋矣或曰門戶失守則民心驚惶縱賊入庭則必干罪戾倘賊方入口卽分夷兵登岸夾攻我後或進攻我城則如之何曰所謂誘賊入內河者謂兵砲地雷水陸埋伏如設筭以待虎設罾以待魚必能制其死命而後縱

其入險非開門延盜之謂也奏明兵機以縱爲擒何失守之有賊雖入口尙未至我所扼守之地何驚惶之有然海口全無一兵尙恐賊疑未敢長驅深入必兼以廢砲羸師佯與相持而後棄走引入死地卽如粵之三元里非內地乎若非夷兵登岸肆擾安能成圍曾截敵之舉松江府城非內河乎尤提軍于上海失守之後整兵二千以待夷船駛入放砲相持二日而退使先備火攻塞去路安在不可奏安南殄滅之功傳曰不備不虞不可以師易曰王公設險以守其國夫險者非徒據口拒守敵不能入之謂謂其口內四路可以設伏口門要害可截其走寇能入而不能出也自用兵以來寇入粵東珠江者一入甯波甬江者一入黃埔松江者一皆惟全力拒口外而堂奧門庭蕩然無備及門庭一失而腹地皆潰使舍守口外之力以守內河守口外兵六七千者守口內兵不過三千得以其餘爲犄角奇伏之用猾賊知兵必不肯入如果深入送死一處受創處處戒心斷不敢東闖西突而長江高枕矣何至鯨駭石頭之磯靈震金焦之下哉故曰守遠不若守近守多不若守約守正不若守奇守闊不若守狹守深不若守淺

籌海篇下

魏源


或曰專守內河誠可制夷艘之橫突而不能制夷砲之猛烈則我兵猶懼虛聲奪銳氣其若之何曰大砲者水戰之用非陸戰之用也卽水戰亦我師擊沈敵舟之用非敵舟擊傷我兵之用也且沈舟亦攻海面

遠舟之用非內河近岸近舟之用也西北平原大磧陸戰用砲必先立戰車以制敵騎然後駕砲于車以破敵陣東南江濱海濫夷若以輪船推砲上岸則有灘塗沮洳之險有塘陡岸陡之險有港汊橫縱之險大船不能近岸小船不能載大砲故自用兵以來夷兵之傷我者皆以鳥鎗火箭從無攜砲岸戰之事惟我兵之扛砲扛銃則跋涉奔馳所至可用且較彼鳥鎗火箭更遠更烈其可無懼者一若夷從船上開砲則無論數千斤之砲數十斤之彈遇沙卽止而我兵得于沙垣中砲擊其舟故廈門定海寶山屢爲我砲擊破夷船而廈門定海之土城寶山之土塘皆未嘗爲砲破卽鎮海鎮江之城牆亦未嘗爲砲破松江夷船開砲兩日我兵列陣城外伏而避之砲過後起畢竟未傷一人其破城者皆小舟渡賊登岸攻我背後我兵望風輒潰及夷至則城中已無一人何嘗與砲事哉但使近塘近城之地兼伏地雷則我砲可傷夷夷砲不能傷我其可無懼者二夷船在大洋去岸數里鎗箭所不能及故非數千斤大砲不能遙擊闖入內河則舟岸相去不過半里數丈而我之扛砲必可及半里火箭噴筒可及十數丈但沿岸先築土垣則我之火箭可及夷夷砲不能及我其可無懼者三或謂內河上游要隘我可預沈舟筏築砲城備兵勇其下游縱敵入隘之處預設之則敵疑不前不備之則倉卒無及不知惟大砲笨重難運至樁木筏材可伏近村囊沙塗泥散亂堆野敵一望無可疑俟敵舟已過之後分遣兵勇一面運筏下樁一面壘沙成垣頃

刻可就而我扛砲之兵亦頃刻可集不持大砲而用扛砲出奇設伏其利無窮可無懼者四然有一宜防者則曰飛砲非謂懸桅上之號砲而謂仰空墮彈之炸砲也我之砲臺雖堅而彼以飛砲注攻炸裂四出迸射數丈我將士往往擾亂雖攻粵城時所放飛砲火箭非墮空地則飄池塘以隔城而不能有準見章奏

而廈門則以飛砲而衆潰寶山則又以飛砲而衆潰惟時內河水勢深淺不能一律即使夷船冒險駛入必須時時測量以防淺擱斷不能數十艘一齊擁進其飛砲能及垣內者不過逼近塘岸之數艘急用大砲扛砲注攻其火藥之艙拉篷索扶頭鼻之人是爲急策更有預備之策先於土垣內橫挖淺田鋪磚貯水我兵可以往來飛砲火箭墮水即熄或爲斜坡前高後低使飛砲轉落深坑此須預先歷試不可臨時僥倖由此觀之夷之長技曰飛砲我之長技曰扛砲扛砲又不如扛銃若能講求益精於輕砲中藏用炸彈則且兼有飛砲之長誠能出奇設伏則多造大砲不如多造扛砲輕砲鑄製易演練易運負易挾攻追剿易橫放直透可傷數十人可及百餘丈視笨重不靈之大砲得力十倍乃張夷者競曰夷砲之利禦夷者亦曰鑄大砲之利曾不問所施何地試問用兵以來定海總兵以扛砲連戰數日殲夷千計而大砲則擊破一舟之外無他效也大寶山以扛銃三十擊死夷兵四百而招寶山所列大砲不曾一用至去冬以來浙江鑄砲益工益巧光華靈動不下西洋而效安在也其後沙角大角之戰陳連升以地雷扛銃擊死


夷兵三四百而鹿門左右皆購列西洋夷砲二百餘未聞足以拒敵而適以資敵也不講求用砲之人施砲之地與攻砲守砲之別陸砲水砲之宜紛紛惟以畏砲爲詞鑄砲爲事不過祇藉兵而資寇故曰城非不高也池非不深也兵甲非不堅利也委而去之是器利不如人和也



皇朝經世文續編卷七十九目錄

兵政十八 蠻防

請招募獵戶防堵番賊疏



棠

勦辦騰越廳邊外野夷疏

林則徐

奏爲勦平瞻對善後事竣漢兵藏兵一律凱撤疏

駱秉章

奏爲田州改土歸流通籌全局疏

劉長佑

請移設綠營疏

岑毓英

報明南路勦番情形疏

沈葆楨

北路中路開山情形疏

沈葆楨

番社就撫布置情形疏

沈葆楨

奏爲岷州林口土民自請改土歸流疏

譚鍾麟

條陳粵西土田州土目事宜

謝光綺

上粵督平治黎匪條陳

闕名

防黎示

王之春

會奏黎匪勦撫事宜疏

張之洞
吳大澂

奏臺灣各路生番歸化并開山招撫情形疏

劉銘傳

奏請開辦市無務詳疏

劉銘傳

出巡中溫開山辦撫疏

劉銘傳

奏請開辦市無務詳疏

劉銘傳

奏請開辦市無務詳疏

劉銘傳

奏請開辦市無務詳疏

劉銘傳

奏請開辦市無務詳疏

劉銘傳

奏請開辦市無務詳疏

劉銘傳

奏請開辦市無務詳疏

劉銘傳

奏請開辦市無務詳疏

劉銘傳

奏請開辦市無務詳疏

劉銘傳

皇朝經世文續編卷七十九

上海葛士濬子源輯

兵政十八 蠻防

請招募獵戶防堵番賊疏

易棠

竊臣前因甘肅沿邊一帶連年番賊滋擾恃其鎗馬便捷善於伺伏官兵追捕往往失利惟獵戶一項較爲得力經臣移行提鎮諄飭各屬多雇獵戶教練兵丁勤習鳥鎗一有番賊窺伺卽探明要隘設伏攻擊曾將辦理情形於上年三月內附片奏明在案嗣準甘肅提督臣索文來函以提屬察漢俄博營所管之亦斯們沁爲番賊往來扼要之區擬招募獵戶一千名責成營員管轄令其遠探近防以固甘涼後路並令獵戶試采金砂以資口食臣當以招募獵戶堵禦番賊令其試采金砂自食山谷之利無須另籌經費尙屬可行惟事屬創始必須籌計萬全方免別滋流弊函覆提臣囑令責成營員認真辦理不準閒雜人等混行闖入並囑妥議章程移覆酌辦旋準提臣酌議咨覆並請由臣出示嚴禁商販運糧出卡經臣照議繕給告示咨覆試辦嗣復準提臣索文咨稱亦斯們沁安設獵戶一千名邊疆驛路悉臻安靜擬再於附近之野牛溝沙金城二處各招募獵戶一千名連前共三千名一半淘挖金砂一半防堵番賊以采獲

之金砂濟獵戶之口食俟試采一年後如果金苗旺盛再由文員議請升科等情臣查野牛溝一帶道光初年曾爲漢奸盤踞藉挖金砂爲名勾引野番乘隙搶掠經前督臣那彥成奏明封禁原不應輕議開采惟利之所在小民趨之若鶩節年雖經查禁而奸民之偷挖與兵役之包庇仍在所不免且十餘年來番匪猖獗日引月深皆由武備積弛自墮藩籬初非盡由私挖金砂之人勾結指引現值軍需浩繁度支竭蹶經戶部奏準令各省開礦以盡地利並欽奉 諭旨令各督撫力籌變通濟急之策自不應拘泥原案以天地自然之利置諸無用之地今議請招募獵戶堵禦番賊試采金砂以資口食係爲因時變通起見惟利弊每相倚伏全在權其輕重設爲制防庶操縱在我不致有末流難制之患所有亦斯們沁前募獵戶千名是否實止此數有無閒雜游民混迹現議野牛溝沙金城添設獵戶各千名是否尙可裁減如何設立頭目稽查鈐束游民混迹如何防範金苗衰歇如何散遣及現需口食如何購買稽查均宜先事預籌以免滋弊當卽遴委西甯鎮總兵雙銳升任兩廣鹽運使甘涼道李恩慶西甯道毓科會同提臣詳細履勘妥議具覆以便核辦去後茲據提臣索文會同該鎮道等覆稱於本年二月初五日會詣亦斯們沁等處逐一勘明緣察漢俄博營地處卡外南山與甘涼邊界中隔一山形如扇面山南自涼州屬之平番縣至甘肅嘉峪關止僅長六七百里較之山北大路由平番抵嘉峪關計程一千三百餘里頗爲便捷亦

斯們沁及迤西之野牛溝迤東之沙金城均係山南要隘相距三百餘里前於亦斯們沁安設獵戶僅可防堵甘涼二州之扁堵口等口隘二十七處其餘各口隘勢難兼顧今議沙金城安設獵戶堪以堵禦涼州屬之一顆樹等口隘三十處野牛溝安設獵戶堪以堵禦甘涼肅州所屬之大磁窰等口隘十八處與亦斯們沁聲勢聯絡須每處安設一千以一半專司堵禦一半淘挖金沙作爲口食所需獵戶山南卽招西甯大通河州三處戶民責成大通縣軍功藍翎從九品文生孔廷俎總管山北卽招張掖山丹東樂撫彝高臺五處戶民責成山丹縣文生李凌霄總管均擇其素習射獵兼務農業者分爲兩翼按名給予腰牌註明姓名年貌籍貫其外來游民及無家室者概不準濫收仍遴選家道殷實老成服眾之獵戶作爲練總每人管轄獵戶一百名每一練總名下分設小頭人十名各分管獵戶十名官爲製給旂號鎗礮刀矛器械由該總管及練總人等督率團練儻有弊竇惟該總管是問至亦斯們沁一帶地氣嚴寒不產五穀獵戶所需米麵計口授食止準由扁都口運出其餘各口概行封禁山北責成永固協副將山南責成永安營游擊互相稽查俾口糧不得私販入山游民無從得食自可禁絕儻金礦日久衰歇該獵戶俱有身家可以不遣自散並據聲明前在亦斯們沁安設獵戶一千名均經按予腰牌責成頭人管束由察漢俄博營都司按月結報提督衙門查覈委無閒人混跡之事等情復經臣檄飭藩臬兩司確覈妥議去後

茲據藩司段大章臬司常績覈明所議均與邊防有裨詳請具奏前來臣查防番之道全在該提鎮等督率沿邊將弁實力偵探先事提防一有番賊窺伺立即督兵掩捕自不致深入滋擾至獵戶生長山谷素以打牲爲業鳥鎗較準且路徑熟悉履險如平素爲番賊所憚實足輔兵力之不逮上年西甯一帶番賊雖屢有窺伺均經兵獵人等隨時擊退奪獲贓物割取首級未能得利而去較從前之動輒深入者頗覺有閒甘涼一帶亦俱靜謐提臣索文上年於亦斯們沁地方安設獵戶並無番賊滋擾似已麤有成效今議請於野牛溝沙金城二處各安設獵戶一千名連亦斯們沁獵戶共三千名以一半淘挖金沙以一半防禦番賊既可慎固邊防亦免另籌經費似屬一舉兩裨所議設立總管練管人以資約束分給腰牌以免混冒稽查口糧以杜閒雜亦俱妥協惟采獲金沙必須官爲稽覈應令該總管按日登記確數除散給獵戶人等口糧外餘俱按月繳官以杜隱混所有總管及練總人等儻有弊混及經理不善卽行隨時更換分別懲處至升科一節該提督原議試采一年升科嗣經該鎮道等會議以一年爲期太促請照開墾地畝之例以三年後升科臣查甘肅安西州敦煌縣開采金沙均係按定課每年解京備用現在試采伊始所有采獲金沙應由該提督按季冊報臣衙門於一年限滿造冊報部仍俟試采一二年後察看情形應如何酌定課額另行覈辦再據該提督聲稱所募獵戶均各有身家如礦苗衰歇可以不遣自散等語

臣查礦苗衰旺皆由積漸而然應令該提督隨時察看如日久礦微卽將所募獵戶陸續減撤毋致聚集滋事相應奏懇 聖恩俯念邊防緊要准其招募獵戶試行開采所有未盡事宜仍由提臣索文詳晰籌議由臣督同兩司悉心酌定責成該提督督率營員認真辦理毋致稍滋流弊

剿辦騰越廳邊外野夷情形疏

林則徐

竊照雲南騰越廳地方三面通夷爲迤西極邊之區界連緬甸所屬沿邊卡外別有各種野夷旣非外域齊民又不歸土司管轄雜居山谷分寨自立頭人其性貪暴兇頑每乘虛突至漢屯搶擄人畜財物因營汛不敷分布曾於道光初年請項建置碉堡雇練駐防要隘而山徑叢雜該匪輒於無練之處覓途潛出肆擾節經堵緝驅逐尙不致大爲邊患乃自上年秋冬以來有古勇蓋西邊外之老草坡熊家山等處野匪疊糾多人至古勇河西栗子園崩麻各漢寨先後擄去男女二十六丁口并牛馬牲畜財物報經古勇士弁協同屯練追捕無獲稟由鎮道府廳會議以該處距各營較遠山徑荒僻險易難知若調官兵剿捕旣恐多延時日且不諳習路途不如就近抽撥屯練札調能事備弁官管帶進剿可期事半功倍查有附近之明光隘土守備左大雄勇敢有爲疊次出師著績堪以率領各土弁管帶勁練出卡相機剿辦應需鹽糧由騰越廳籌捐供支先後具稟請示臣等核其所請實爲肅清邊境要務當卽批令督同妥速辦理

去後旋據該鎮道府廳等節欠稟報本年正月十九日調齊勁練五百名交左大雄管帶進剿二月初四日行抵老草坡野匪已有準備早經挖濠樹柵出而抗拒該土弁親帶各練奮勇攻擊槍礮齊施各匪敗竄入柵砍斃二十餘人帶傷甚多隨乘勢圍柵放火焚燬匪巢各匪分竄至大竹篷等八寨并西山九寨該土備又以次進攻各寨野夷始知畏懼邀請安分寨頭詣營投誠查該處夷風遇有齊心禁戒之事須抱大石發誓方見真誠其各寨中惟六頂之大野貫與習董之大頭目平日尙知信義當飭該野貫等如能擔保各寨不敢滋事誓石投誠方可允準該夷等俱願遵照隨卽獻還所擄男女八丁口牲畜六件查明原主給領其餘財物據稱係熊家山等野匪擄去旋即移營往攻於二月初八日進至熊家山探知該野匪所居懸巖陡壁已將出入要口深濠固塹且恃有怕洒等五寨爲羽翼負隅不出該土備帶練分攻各匪亦分股抵禦騰越鎮總兵拴住接據稟報恐左大雄深入險寨練力不敷又復商令該廳加調屯練五百名往助左大雄得添新練遂逼近要口分爲五路進攻二十二日該匪出巢拒敵各練丁迎頭奮擊殲斃頭裹紅巾首匪二名及匪衆數十名各匪退回口內迨夜潛出劫營練丁先已防備極力轟拒野匪撲營愈急經六品軍功頂帶練總董大文瞥見指揮放槍迎擊并自行抱石打中爲首一匪腦後倒地詎匪夥從旁放槍致董大文額角受傷被害衆練開柵齊出抄截環攻始將各匪打退平明查看山箐內有

匪屍二十餘具仍復連日進攻斃匪無數土練亦間有傷亡是月二十九日始將熊家山匪巢焚燬卽在該處紮營以堵怕洒等寨往來要路其中安分野夷恐被玉石俱焚紛紛詣營求請投誠歸化該土備慮其挾詐令通事逐名究詰據供熊家山滋事匪首一名茶山老五一名阿五其怕洒等寨匪首名爲總頭老五與各小頭目等均先後被殲身死餘皆逃散伊等恐被剿滅趕將寨匪所擄之男女十八丁口并牛十七件獻出求免盡剿又查出寨匪所留之漢奸馬六張小老二人網送請辦該土備允其所請當將人畜交收訊據漢奸馬六張小老供認均係沿邊民人向走夷方貿易因虧本負欠難歸潛入野山交結夷匪指引搶擄冀圖得贓分肥其送還被擄民人楊啟元楊官文余小老余小二蔡大劉九榮邵小三劉五斤劉鳳英劉小三張邵有張富尹益李國棟張聯榜張喬科金洪榮十七名并婦女何劉氏等九名逐一訊據供稱先後遭匪擄去扣留役使并欲勒贖該婦女等均未被匪姦污餘供大略相同其代老草坡等處擔保求誠之六頂野貫實董頭目十人亦爲熊家山等寨懇求免剿情願出具永不滋事刀標木刻誓石投誠如再爲匪惟伊十人是問察其情詞不至反覆隨飭傳齊各野山頭目與邊民同至漢夷交界之三官殿宣示恩威嚴加傳諭責成六頂習董各頭目分寨管束永不准其入邊搶擄滋事各野夷咸皆畏服叩頭盟誓所具刀標木刻均於邊隘立石示衆沿邊地方已極安靖遂於四月初六日撤練回至廳城

查明此次陣亡除練總董大文外尚有練丁六名又受傷練丁十八名分別卹賞所有一切經費據署騰越同知鄧墀稟請悉由該廳籌應等情臣等查此次該土備左大雄自正月中旬帶練出剿至四月初間竣事各寨野夷除焚斃殲斃外均已畏威悔罪立誓輸誠洵能遠振軍威又安邊地此後仍須益嚴約束倍緊巡防所有各卡隘練丁暨應責成騰越鎮將會廳逐一點驗凡從前疏縱夷匪及現在年力就衰者均從重責革究辦其撫夷備委中據查有孟學鄒吳正傳楊鎮邦及練頭孟效鄒洪德恩五名此次俱甚出力但從前夷匪擾害邊民何以不能有犯卽懲應令根究明白分別功罪以示勸懲漢奸馬六張小老句結外匪滋事已據自行供認自應歸於迤西匪犯案內飭道審明就地懲辦傷亡練丁咨部請卹其六品軍功頂帶練總董大文親手擊斃首匪旋因中槍陣亡可否仰懇 天恩照土千總例賜卹至明光隘土守備左大雄前在永昌等處軍營屢經出力疊蒙 賞戴花翎并加宣撫使銜該土備深知感奮茲又收服各寨夷匪可否再懇 恩施賞給巴圖魯名號以示激勸其騰越鎮總兵拴住迤西道王發越永昌府知府張亮基署騰越廳同知霑益州知州鄧墀籌商軍務督率均尙有方可否請 旨交部均予從優議敘之處出自 聖主恩慈

奏爲剿平瞻對善後事竣漢兵藏兵一律凱撤疏

駱秉章

竊臣等前將剿滅瞻酋大概情形附片陳明在案茲據委辦夷務鹽運使銜候補道史致康稟稱所派文武委員督同番官暨各土司會合藏兵攻克瞻對新舊兩寨將瞻酋工布朗結及其二子焚誅擒獲頭人六谷瑪羅布札喜立即正法並將生擒之東登工布及其親屬押解回藏分別辦理各處土司均已安插所有藏兵酌發犒賞現已陸續起程回藏等因查中瞻對自乾隆十年剿辦以後至嘉慶二十年又與土司構釁滋事該酋羅布七力與其子工布朗結先後繼惡數十年來屢啟邊衅自羅布七力既伏冥誅而工布朗結貪狼性成勢復鴟張侵佔各土司地界搶奪印信號紙強梁自逞道光二十八年前任督臣琦善督兵剿辦挾川省之全力未能得手不數年間工布朗結蠶食鯨吞竟將霍耳等五家土司與德格土司並西甯迭木齊二十五族地方全行侵奪上年並擾及藏界圍攻裏塘燒燬台站意在窺伺藏界經藏中派番官帶兵堵剿未挫兇鋒迨麻書土司四朗汪結親至打箭鑪城面請委辦夷務候補道史致康調兵助剿當經史致康密示機宜多方激勵該土司願効前驅約會被害各土司同時反正合謀協力並接引藏兵節節進攻屢獲大勝明正土司甲木叅齡慶亦派頭人帶領土官出境會剿經文武委員督率藏土官兵遂將瞻酋新舊兩寨圍困維時臣等已接史致康密稟知籌辦得手機會大有可乘因飛飭由裏塘夷務辦結後即馳赴瞻對並調派弁兵運送大礮分路環攻乃得搗穴殲渠除此巨惡實足大快人心

被害各土司及難夷等流離失所一旦得復舊地無不歡欣鼓舞各安住牧惟卓巴塞爾塔係土守備汪慶住牧地方自被瞻酋侵占後現查土守備汪慶既故已無正支可以承襲各土司中惟麻書土司四朗汪結尤爲出力應將卓巴塞爾塔地方責成該土司兼管番民亦皆悅服其瞻對上中下三處地方經達賴喇嘛派番官帶領藏兵會同漢土官兵剿滅瞻酋未便沒其微勞仰懇 天恩將瞻對三處地方 賞給達賴喇嘛派堪布管理建廟焚修應請 敕下駐藏大臣查明請 旨遵照辦理其裏塘案內在逃之崇喜土司拉旺任曾聞拿自行投出已交番官解赴藏中辦理藏兵現已起程回藏所調漢兵暨各土兵均於十月三十日凱撤臣等查此次剿平瞻對焚誅首逆收復侵占各土司地方縱橫三千餘里一百餘年邊患永絕根株並未勞師糜餉此皆仰賴 天威卽臣等亦不料收功如此之速前此藏路屢撤台站雖由瞻對擾害而各土司借詞要挾亦所不免經此次剿滅盡淨之後均皆震懾各土司恪遵斷牌遼陞自此可期靖謐史致康督飭文武委員及漢土藏兵在邊徼出力兩載有餘均屬著有微勞容臣等查明擇尤酌保仰懇 鴻施以資鼓勵至藏中番官喇嘛等應請 飭下駐藏大臣查明奏獎

奏爲田州改土歸流通籌全局疏

光緒元年

廣西巡撫

劉長佑

竊臣於光緒元年四月二十五日奏請將土田州知州革去世職其地改土歸流一案五月十一日奉

旨該部議奏欽此八月接准 部咨查思恩府屬之土田州一缺原係土人岑氏後裔承襲今據該撫等奏土知州岑乃青病故無子族眾支分爭襲分黨仇殺土民流離轉徙日不聊生來營泣訴苦狀均願歸流官管轄不願復爲岑氏土民應請將土田州知州革去世職其地改歸苗疆知縣一員其思恩府屬百色同知與鎮安府屬奉議州判二缺酌量升爲苗疆直隸廳簡缺知州以資治理等語自應准如該撫等所請添設苗疆知縣一員百色同知改爲苗疆直隸州奉議土州州判改爲簡缺知州並令該撫體察情形通籌全局及一切未盡事宜詳細奏明辦理等因具奏奉 旨依議欽此咨行到粵臣欽遵督同藩臬兩司諄飭妥員梧州府知府徐延旭暨該管道府等將一切事宜細心體察妥籌酌議去後旋據陸續稟呈前來臣與兩司等通籌全局查土田州地方內外共分十里每里分三都每都分四圖每圖之廣袤十里二十里不等多與百色廳奉議州緊相毗連今請改流應於燕崗緊要之地設立知縣一員作爲苗疆衝繁要缺管轄上隆下隆上恩下恩上田里及篆里之一二三都等處擬請名縣曰恩隆其餘各里附近百色者撥歸百色管理將百色同知升爲苗疆直隸州卽以恩隆新縣屬之附近奉議者撥歸奉議管轄卽將奉議州判升爲簡缺知州以資控制新設之隆恩縣清查田畝丈量升科每年應徵地糧銀二千九百九十三兩零應徵兵米一千四百三十二石零添設訓導一員文武學額各四名廩生增生二名四年

一貢並添設縣丞一員駐防上田里平馬墟又分防下隆里巡檢一員上恩里巡檢一員篆里巡檢一員典史一員其營制添設恩隆營守備千總各一員駐紮縣城把總一員分防隴田外委把總馬戰兵二名分防下隆篆里額設馬戰兵五名步戰兵三十七名守兵八十八名俾資守禦防緝又新升苗疆百色直隸同知經管龍篆武隆下田里篆里之四都應徵地糧銀一千五百二兩零本色米一千七十三石零督徵陽萬土州判解廳轉運地糧銀二百三十八兩添設學正一員文武學額各四名廩生增生各二名四年一貢並設照磨一員該廳既已升爲直隸州毋庸再屬思恩府以符體制又新升奉議簡缺知州該州原設有閩實徵地糧銀四百八十四兩零無閩實徵地糧銀四百六十三兩零新編中田里地糧銀一千三十二兩零本色兵糧米八百一石零並添設吏目一員該州原定學額三名廩增生各二名四年一貢擬請增設文武學額各一名其廩增生均循原設該州仍屬鎮安府以符舊制據藩司嚴樹森署臬司周星譽分晰造冊會詳請奏前來臣覆加體察無異相應請 旨勅部分別議覆如蒙 恩允臣當按照新設文武各缺分照例遴員請補募兵如額督同司道協營嚴飭各該文武員弁講求治理勤慎操防一洗從前土規陋習以奠民生仰副 聖朝軫念邊氓綏靖疆圉之至意其修建城垣衙署各事宜另行由司詳咨核辦應頒文武各員弁印信鈐記並歲需俸薪養廉兵餉銀米各數目現已分晰造冊隨案送部

以備核覆至岑氏一族構禍逃亡者迭飭嚴密偵緝獲日另行懲辦餘皆疏遠之族年來疊造禍亂蕩析離居情形均屬可憫核與附逆釀患者有間擬請准其各安耕鑿邀免遷徙出自 皇仁如有於改流之後另滋事端卽飭各該文武隨時拏辦合併陳明

請移設綠營疏

岑毓英

竊維政有常經兵無常勢守經貴于達變因勢在乎轉移 國家定鼎以來于八旂之外設立綠營碁布星羅法良意美乃承平日久營伍廢弛倉猝軍興不得已而募勇助剿事竣之後有請創立水師者有請添設營制者有請量移汎地者皆蒙 朝廷採擇施行蓋以時異勢殊不能不量爲變通也滇省寇亂多年仰賴 聖主如天之福以次削平凡在臣民同深慶幸惟治不忘亂斯能長治安不忘危始可久安所有善後事宜必須妥爲區畫謹將管見所及敬爲我 皇上陳之 一迤西麗江府城地處極邊界連西藏僅以鶴巖鎮左營右哨千總分防殊不足以資控制又麗江劍川交界之喇鷄鳴地係江邊要隘江外卽是野人距麗江府城五百一十里鶴慶州城四百二十里劍川州城三百二十里該處附近鹽井近頗豐旺從未設兵駐防商民每被搶刦查鶴麗鎮總兵及中營遊擊左右二營都司均駐紮鶴慶州城擬請以鶴麗鎮右營都司移駐麗江府城劍川營都司移駐喇鷄鳴以固邊圉該處旣設都司劍川已爲腹地

卽以麗江汎千總移駐劍川州城亦屬相宜又蒙化廳地方縱橫數百里只有景蒙營千總外委各一員帶兵一百數十名不敷分布該處距景蒙營三四百里有鞭長莫及之勢而景東廳幅幘遼闊營兵不能再分查提標中左右三營大理城守營同駐大理府城擬請將提標右營遊擊移駐蒙化該處距大理僅一百八十里遇有征調可以一呼而至其原駐蒙化之汎弁兵丁撤歸景東以備添撥分防又楚雄府屬八哨地方界連景東迤邐三四百里山深林密獠夷聚居不下百餘寨奸宄溷跡此拏彼竄擬飭楚雄協副將分派千把一員帶兵數十名設汎防守並飭景蒙營遊擊于交界之處再設一汎派把總外委一員帶兵數十名梭巡會哨以期道途安靖商賈暢行 一迤東澂江府城距省一百二十里爲省城籬籬所屬有新興路南二州河陽江川二縣向由臨元鎮以把總一人分駐澂江千總一人分駐江川新興路南各有把總一人每弁不過帶兵數十名分設各汎塘堆卡緝捕巡防有名無實且與臨安相距三百八十里該總兵亦兼顧不遑故咸豐年間城賊起而澂江先失屢次圍省朝發夕至大爲心腹之患查滇省舊設額兵四萬八千數百名嗣經裁減僅有三萬七千數百名曩時督撫兩標城守一營共設兵七千數百名裁減之後僅存三千數百名今大亂初平情形迥異亟應酌量添設擬請仿照雲南廣西營設遊擊一員中軍守備一員左右哨千把外委共十六弁馬步守兵共七百七十五名作爲澂江新興路南江川四

屬以捍衛省城將四屬原設各汛弁兵撤歸臨元鎮標擇要安置 一迤南臨安府屬之曲江距府城一百餘里地當衝要村寨稠密田土肥饒由館驛五山而至甯州婆兮綿亘二三百里山河險阻異常回夷雜處屢爲盜藪上年蕩平館婆賊巢暫留勇營駐防該處向歸臨元鎮中營分防只派外委把總一員兵數十名地廣兵單難期得力查臨元鎮總兵及中營遊擊左營都司同駐臨安府城擬請將臨元鎮左營都司移駐曲江汛弁移駐婆兮更以徽江汛弁移駐甯州屬之青龍街塘汛相聯隨時巡緝庶不致有疎防之虞以上各條均爲通省善後起見臣賦性庸愚知識淺陋曷敢以舊章妄有損益而節年用兵轉戰各屬旣身經以目覩爰思患而預防採諸輿論詢謀僉同不揣冒昧據實奏 聞可否仰懇 天恩飭部臣核議奏請 飭下遵行其員弁兵丁如何調補兵米俸餉如何劃撥容俟欽奉 諭旨當與督臣悉心妥籌分別辦理現在滇省軍務初竣安置兵丁最關緊要安置之法又莫善于易勇爲兵而俸餉虛懸殊難措置臣等前已請 旨飭催各省欠餉若寬爲籌撥迅速解滇亦不難乘時整頓以復 聖祖 列宗之成法此又臣有志未逮而不敢稍存推諉者也

報明南路勦番情形疏

沈葆楨

竊臣等於本年二月十七日業將商辦獅頭社番情形奏明在案茲迭據總統准軍提督唐定奎稟稱獅

頭等社兇番前雖經各軍連營進紮將海邊樹木斫清而近山仍可藏匿狙擊無已二月十二日前營之勇差往枋寮者九人途遇生番數十被殺者七受傷者二連日福靖左營之勇被殺者五南勢湖之勇被殺者一含沙射影防不勝防唐定奎招土勇千餘人爲鄉導督飭各軍將山腰汙萊概行翦薙自南勢湖起至刺桐脚止開路計寬三十餘丈直三千餘丈該番無莽可伏沿途一清隨獲獅頭社奸謀林進春一名訊明梟示當唐定奎之初至也先於十八社中訪出同惡之番社曰內龜紋曰外龜紋曰內獅頭曰外獅頭曰竹坑曰阿裁米息曰中心崙曰嗎梨吧曰草山曰千仔曰阿養益曰中汶凡十有二社地皆毗連因定進剿之路一出刺桐脚一出南勢湖十四日該番等竟敢先由刺桐脚迤北要刦出哨淮勇格鬪移時槍斃兇番二人奪獲器械數件方各獸散二十日中軍提督周志本副營提督章高元親自入山探路見山窪茅屋數間料有藏伏施火箭射之果有生番百餘突出喊抗我軍繞山而歸其地蓋外獅頭社之卡也二十二日周志本督隊由南勢湖探路魚貫而入約行數里左巖右溪鳥道一綫側足乃通正警備間生番約有五百餘人突起迎擊槍子雨墜周志本執螫先登士卒攀緣而上頂踵相摩兇黨死拒益力鏖戰兩時始駭而奔我軍乘勝急攻連破其五卡直擣草山社克之弱息輜重早已遷匿焚其草藪百區敗番等分兩路奔竄憑高下瞰數十武外猶虎視眈眈也擬卽築壘其地以山無汲道整隊而還是役計

陣斬悍番十餘名槍斃百餘名奪獲器械百餘件我軍亦陣亡銘中副營左哨官遊擊束維清一員正勇三名槍傷銘中前營左哨官副將楊春泰一員正勇二十餘名鄉導千總郭占鼇亦右手受傷唐定奎於山麓廓清之後旋親督部伍由刺桐脚循溪右偏而進三里許至竹坑山口察勘形勢可以安營惟荆榛滿目急須芟薙三月初三日派武毅右軍右營管帶朱先聘屯之調集親正左三等營幫築壁壘布置就緒唐定奎仍循溪右而進數日之中又清山三里有奇遂至竹坑山下地勢迴旋爲竹坑獅頭往來必由之道初八日復調集親正等營助築營壘派武毅左軍右營管帶何迪華駐之唐定奎仍督將士前行伐木繞至竹坑山之後其地曰竹坑埔該處距刺桐脚十里溪廣山高竹坑社在其東南阿栽米息中心崙在其正東內外獅頭社皆在溪北實爲形勝之區仍飭親正等營協築壁壘令左軍左營管帶陳有元扼之現入山雖深逐節廓清連環進紮俟攻克險砦卽分兵久占建瓚之勢旣成破竹之功可待南勢湖一路山溪更險亦已開通三里有奇該處係往獅頭社要隘可以安營惟其地石少土鬆囊土成之乃得結實已派管帶銘字中軍左營梁善明駐之餘仍步步剪除相機前進批亢擣虛以收全勝之效現在抗違者知技無可恃漸生其惕息之心附和者知法在必懲潛消其勾結之術雖披荆斬棘將士勞苦迥異尋常較諸冒險圖功糜血肉之軀以僥倖於一勝者又不當以彼易此攻心爲上多殺何爲此臣葆楨與唐

定奎往返熟商不敢以稍延時日爲憚也至恆春建治事宜俟勦務稍鬆卽行舉辦其衙署一切業經繪圖貼說由內地購材繩削俟工竣轉運至臺以節運費而免曠工茲先將淮軍近日開路入山進迫番社情形合詞恭摺由輪船到滬交上海縣發驛六百里馳奏

北路中路開山情形疏

沈葆楨

竊臣等於同治十三年十二月初一日業將北路開山情形奏明在案茲迭准提臣羅大春咨函稱北路大南澳生番自經黃朋厚馮安國等懲辦之後上年十二月初九十三等日斗史武達斗史蔴達簡斗史實紀律斗史麼哥老輝等五社番目各帶番丁百餘人叩營乞撫經馮安國等分別誠飭賞犒遣歸番情遂頗安謐本年正月初五日羅大春由蘇澳率隊起程初九日始抵新城初十二等日履勘三層城尤仔丹溪馬鄰溪鯉浪港旁繞加禮宛番南勢番直抵花蓮港之北而止據陳形勢自蘇澳起至花蓮港之北止計途二百里中界得其黎得其黎以北百四十里山道崎嶇沙洲間之大濁水大小清水一帶峭壁插雲陡趾浸海怒濤上擊眩目驚心軍行束馬捫壁蹢躅而過尤稱險絕得其黎以南六十里則皆平地背山面海如悉墾種無非良田奈地曠人稀新城漢民僅三十餘戶耳外盡番社也自大濁水起至三層城止依山之番統名曰大魯閣其口社曰九宛曰實仔眼曰龜叟曰叟沙曰符吻曰崙頂曰實空曰實仔

八眼凡八社憑高恃險野性靡常歧萊平埔之番居鯉浪港之北者曰加禮宛曰竹仔林曰武暖曰七結仔曰談仔秉曰瑤歌凡六社統名曰加禮宛社其性畏強欺弱居鯉浪港之南者曰根老爺曰飽干曰薄薄曰斗難曰七脚川曰理劉曰脂冠冠等七社統名曰南勢番男女共七千七百有四人雖悉具結就撫而薄薄理劉二社皆既順復貳者除薄薄一社知煮鹽加禮宛一社頗耕種餘悉茹毛飲血之倫叛服不常時當防範論他日建城之地宜在歧萊若新城三層馬鄰鯉浪不過營汛之區尤必截大清水以南隸歧萊截大清水以北隸大南澳方足資控制也自該提督躬率大隊入新城添設碉堡該番驟生疑慮來營要求子藥未經允給遂呼聚悍黨晝則伏莽夜則撲礮節經各營奮擊時有斬獲稍息窺伺丁勇等因之傷亡數十人最狡者正月二十四二十五二十六二月初五初六初七初八等日大魯閣番竟敢糾衆數百撲我新礮弁勇一面力拒一面興築該提督親督礮隊馳援番族傷亡頗多始行敗竄我勇陣亡者亦二十五人迭經懲創番情稍定擬自蘇澳五里亭起迄秀姑巒之鷓子埔止計地三百四五十里區分五段沿途建三十二礮各派營哨屯之俾一氣聯絡而以新到之宣義左營駐三層城策應鷓子埔以北宣義右營駐加禮宛策應鷓子埔以南此花蓮港以北籌辦之情形也花蓮港以南爲走秀姑巒之道固木瓜番遊獵之場也登高一望平沙無垠茅葦盈丈人跡不到蓋以該番兇惡不亞斗史諸社故沃壤曠

如南北港道闊及三十餘丈欲造正河木橋左近苦無巨材因先建支河木橋一道軍功陳輝煌業率所部結筏以濟直趨吳全城該處離秀姑巒祇數十里當時卽有成廣澳之番目秀姑巒之通事來營乞撫其中別有大吧籠社嗎噠庵社皆附近強番節經設法招撫番目等各率耆老丁壯由通事引至新城歸化各賞酒食而歸平埔之番聞已盡此平埔旣附以之專圖高山似事勢較易此花蓮港以南籌辦之情形也中路原派前南澳鎮總兵吳光亮帶兩營駐集集鋪一帶隨經臣等奏派臺灣道夏獻綸督理開山撫番諸事嗣以遣探山路未回未卽動手本年正月臺南勦務方殷劉璈丁憂回籍夏獻綸暫兼營務處遂緩前行茲迭據吳光亮稟稱自年底探路歸報後本年正月初九日起卽率勇由林圯埔社寮兩路分開至大坪頂合爲一路進而大水窟進而頂城計共開路七千八百三十五丈有奇二月初七日復由頂城開工直抵鳳凰山麓躋半山越平溪經大坵田跨扒不坑等處而入茅埔計又開路三千七百七十五丈有奇兩處統計一萬一千六百一十丈凡建塘坊八所沿途橋道溝壑木圍宿站俱漸興修分派兵勇自集集街起至社寮大水窟大坵田茅埔南仔腳臺東埔各要隘已逐節配紮又送到查撫水裏審鹿等三十九社名冊計歸化番丁番口凡七千二百九十二人辰下方循途漸入斬棘披荆以出秀姑巒之背倘能因勢開通將與北路諸軍聯爲一氣此又中路一帶開山之情形也至卑南等處自內埔以至大貓

釐張其光諸營分布其間袁聞析病痊後業再馳往經理番情尙稱安帖臺郡城工雖竣而安平礮壘以甌石巨材轉運維艱一時尙未蒞役旂後礮臺早已興工因准軍挑調入山暫行緩辦理合陳明

番社就撫布置情形疏

沈葆楨

竊臣等於本年四月二十三日將先後攻破竹坑本武並內外獅頭等社情形奏明在案茲迭准總統准軍提督唐定奎報稱各軍攻克獅頭等社後仍分哨扼險拔木通途徐圖進取附近各社知貢嵎不足恃天討不可逃五月初九日率芒社番目一名晉笏一名姑益翼一名沙貝一名處雷一名姑鯁董的社番目名烏力烈南片社番目名姑令草山社番目一名土結一名笕朗等率散番五十餘人到營乞降經該提督傳譯曉諭利害愈共震懾籲求收恤當日均給衣履諸物該番等各跪戴而歸十二日枋山民人有程古六者帶至內龜紋社番目野艾外龜紋社番目布阿里烟又有射不力社番目郎阿郎者帶至中紋社番目龜呖仔周武濫社番目文阿蛋及散番等百餘人款營乞降該提督示約七條曰遵薙髮曰編戶口曰交兇犯曰禁仇殺曰立總目曰墾番地曰設番塾以龜紋社首野艾向爲諸社頭人拔充總社目統之著照約遵行所統番社如有殺人卽著總目交兇如三年之內各社並無擅殺一人卽將總目從優給賞其獅頭社餘孽探悉竄伏何社卽由何社跟交不許藏匿野艾及各番等均願遵約隨將竹坑社更

名曰永平社本武社更名曰永福社草山社更名曰永安社內外獅頭社更名曰內外永化社舊從各社均許自新惟獅頭社罪大惡極漏網者不許復業所有內外永化社卽著總社目另招屯墾以昭炯戒於枋寮地方先建番塾一區令各社均送番童三數人學語言文字以達其情習拜跪禮讓以柔其氣各番聞之無不俯首帖服等因適臣凱泰本月十一日由省東渡十七日抵臺與臣葆楨公同參酌伏思曩奉撫番之命以獅頭社之變易撫爲勦實出於萬不得已幸天威所震頑族歸誠敢不仰體生成使之同託幟幟之下惟狂榛之性初就範圍不能不堅明約束俾先受我羈勒後乃可徐與漸摩擬卽如該提督所請按條實力奉行臣等愚昧之見是否有當祇候聖裁

岷州林口土民自請改土歸流疏

光緒十一年

譚鍾麟

據鞏昌府知府顏士璋詳稱岷州林口土民后哈哇等聯名具控土司后振興科派剝噬民不能堪情願改歸岷州爲民並黏呈后振興劣蹟多欸具詳請示前來臣當卽飭司委員前往確查旋據委員候補知縣賈汝謙稟稱遵卽改裝易服親赴林口堡嚴密訪查該處土民衆口一詞不願歸土司管轄情願改隸岷州以免苛虐並查后振興無端科派需索土民挾勢欺凌擅行查罰各情與土民原呈所控無異比卽傳集該土民等至鞏昌府知府顏士璋會訊據后哈哇等四十餘戶土民同供土司暴虐受害甚深情願

歸州爲民取具甘結存案臣復飭司將后振興提省發蘭州府覆訊據后振興供父后裔盛原襲林口土百戶同治十年病故應由振興承襲因兵亂未經請襲仍管土司戶事務林口民八十餘戶現祇存四十餘戶后哈哇等所控各節皆係相沿陋規按戶攤派並無拆毀房屋犁平墳地之事今衆土民旣不服管束土司亦願改土歸流等情由蘭州府訊明詳司核轉前來臣查林口土百戶后希魁於順治十二年授外委司戶其孫后榮昌於乾隆七年實授土百戶沿襲至后裔盛已閱十世其子后振興於后裔盛病故後未請承襲輒自稱土司橫徵暴斂致所屬土民不服情願改土歸流自應俯順輿情准該土民后哈哇等四十餘戶改歸岷州編入民籍由地方官約束再查例載凡改土歸流土司傾心向化率屬內附由督撫疏請改隸民籍授以守備千總把總之職准其世襲其年富才優者隨營効力等語今后振興以應襲之人未經請襲輒敢率意妄爲致衆情不服情願改土歸流旣非率屬內附者比應不准其承襲第其親支別無可襲之人而其世職又不便遽革可否俟后裔盛親支有人改授百戶相當之職令其承襲以廣聖朝寬大之仁並可懲土司獷悍之習是否可行相應請 旨飭部覆核示遵

條陳粵西土田州土目事宜

謝光綺

竊廣西各土州土縣土司所隸土目一遇不平往往勾集外匪伏匿深山伺隙尋讐出沒靡定大爲邊隅

患害宜求馭遠之方乃遂久安之計查廣西土田州知州自宋以來八百餘年惟在我朝奉職最謹雍正年間土知州岑應祺大計卓異累次從征苗匪有功其後土知州岑宜棟亦助剿出力臨陣捐軀乾隆五十四年十月奉 上諭據福康安奏查明土田州知州岑宜棟於本年正月初五日被賊圍繞實係受傷陣亡請 旨飭部議卹並將土田州世職以伊子岑煜係屬庶出與承襲之例不符請暫行協理俟伊孫岑裕愷已及歲再行請襲等語岑宜棟以邊土世職深明大義於官兵進討安南卽帶兵助剿又復策馬陷敵臨陣捐軀情殊可憫該土州前因出力經前任督臣李侍堯奏明賞給四品頂戴著交部卽照四品之例從優議卹至土田州世職既據福康安查明其第四子岑煜質性醇良不必復拘嫡庶之例著卽令岑煜承襲管理州務但知州係屬五品今岑宜棟奮勉出力又復陣亡岑煜亦着加恩賞給四品頂戴岑煜承襲後若果克繼家聲始終勤奮出力將來其子承襲時亦准其戴用如不過循分供職卽行照舊戴知州頂戴以示朕優卹勤勞一視同仁至意欽此旋經吏部議給雲騎尉俟襲次完時賞給恩騎尉世襲罔替等因具題奉 旨依議欽此此後子孫相繼代有賢能雖土族訟端或啟而大吏審理持平能治夷情不貽邊患至咸豐五年土知州岑乃青病故無子其妻魯氏連舉族人協理並嗣遠族爲後由是控爭更互劫奪紛紜任事者末由區處久之徑請用兵大加誅戮至同治十三年改流之議遂定而肇釁之

族人岑鋹率衆在逃各土目紛紛相隨入山迄今尙未緝獲各土官覆車共鑒同爲歎歔其岑氏本支哀
怨之聲猶復相聞道路光緒攷廣西通志土田州舊爲府治前明岑猛滋事被誅倡議改流土目盧蘇王
受因而爲亂明嘉靖七年提督尙書王守仁督師戡定疏曰岑氏世有田州其繫念之私恩久結於人岑
猛雖誅各夷無賢愚老少莫不悲愴懷思故盧蘇王受之變翕然蠡起不約而同自官府論之則皆以爲
苗頑逆命之徒在各夷言之則皆以爲嬰白存孤之義故今日土官之立必須岑氏之子孫而後可等語
守仁將四省兵勦撫兼施恩威並用拓土請設流官知府析地仍立土官知州運謀最深用心良苦曾不
欲遽恃所部之強兵不留他人之餘地且查土田州岑氏在明太祖時有五百年忠孝之稱逮事我朝
以來納土效忠超逾儕輩恪慎守法累受國恩高宗純皇帝褒以深明大義加以頂戴殊榮原視尋
常土官特示優異又查從前廣西泗城府改流之後仍予八品承祀官一人令其本支承襲罔替今土田
州自改流以來土民土目飲恨含悲不無將奮足跼將噬爪縮之慮擬懇奏請飭下廣西撫臣推懷
柔邊土之恩懷防患未然之戒查明改流善後未盡事宜其應如何量爲變通妥爲處置或采守仁之謀
酌授羈縻之地成援泗城之例子以承祀之官總期慮密思周心安理得俾知悖謬前官已獲己身之譴
忠良後裔仍邀世及之恩各土官觀感勸懲益加震悚必能嚴束土目安撫土民爲國家永捍邊郵

於行省藩籬實有裨助

上粵督平治黎匪條陳

闕名

竊平黎匪之法難以力爭必以智取必俟黎出而後戰彼若不出索戰無從即使深入而山徑奇險難以驟越水惡瘴重觸則生病萬一遇有埋伏更爲可慮愚竊以爲以兵勇攻黎不如以熟黎攻生黎而熟黎攻生黎尤不若以客匪攻黎匪查客匪之所從來本係外省良民因流離蕩析散之四方流寓既久生息遂繁欲去無家可歸如留又不見容於土著既不見容勢必見誣誣之太甚勢必爭鬪爭鬪太甚復誰助客民而屈土著無論理之是非總以土著爲良民概指客民而斥之曰匪既名之匪罪自難追於是興師動衆聲言勦辦該客民等遂不得不輾轉逃竄以入黎穴而苟延其性命非我族類其心必異原其本心誰肯舍名都大邑不居而甘伏處惡山劣水之中以與禽獸爲伍哉其所以至此者實以無家可歸不得已而爲此也論以後頑梗不法之行其事可誅念從前流離失所之苦其情可憫民何以爲客殆曾子所謂久散之民也似當在哀矜之列現在大兵壓境客民自計無可逃竄不得不恐駭黎人而使之悉力堅拒黎人自計無所短長又不得不羣奉客民而聽其驅策籌畫欲併客黎合辦則永無分之之時欲劃客黎分辨則愈堅其合之之志夫善用兵者必知敵情能知敵情然後批郤導窾以無厚入有間恢恢乎其

有餘現在黎匪之情聽客匪爲播弄客匪之情恃黎匪爲屏蔽爲今之計欲剿撫黎匪必先離間客匪欲離間客匪必須安插客匪查從前客匪之在各處不見容於土著以其爲客也若居此處卽入此處之籍貫則化客爲主早相安無事矣現聞客匪不下萬餘人其中必有頭目稍明大義者未必不爲子孫長久之計而知棄安就危棄順從逆之非計卽以前猖獗如髮逆其心未嘗一日不思歸降以圖富貴惟拒之太甚斯不能不拚命置之死地以冀萬一之生況今之客匪本非黎類徒以當日官民交攻逼而走險以至於是大抵此輩亡命之徒從逆則爲悍賊歸順可爲功臣可否懇恩密札馮軍使派心腹能幹者飭其確訪客匪稍明大義切實可靠之頭目前往剖陳利害約以反戈相向許功成日破格獎勵無論多少一概編入各州縣民籍任其置田產聯婚姻云云彼之竭力助黎者無非爲性命計旣准入籍而有家鄉之可歸又爲保獎而有富貴之可享其誰不踴躍立功而猶甘自穴居野處爲蠹黎操戈以徒喪其性命者無是理也且該客匪等與黎人狎處旣久情僞尤知手足久習輕捷凡黎人所能行而我兵所不能者客匪能之也腸胃旣服水土凡黎人所飲食而我兵所不能者客匪能之也長驅直入不須向導而路徑皆熟不憂藏匿而巢穴皆知只須一大將押後權作接應便可收斬將搃旗掃穴擒渠之功不惟可省餉糈並可保全兵勇且可使千萬流離之蒼生皆得其所開疆闢土之功敬悉大人素不屑居在大人民胞物

與不使一夫失所之量或可稍慰萬一乎說者謂招安本非易事難保必不終變然此只在主兵者之端馭運用未可概作刻舟論也某總見得該客匪鋌而走險並非本心今日之勢其助黎人者非客匪不行而其所以平黎人者亦非客匪不行某前與瓊州開礦之張主事閒論客匪情形據稱無論客匪不願生事該主事在彼處日久言之最詳加以客匪由來某亦知之甚悉管見所及不敢不陳

防黎示

王之春

照得黎匪擾民爲害已久兼有客奸煽誘嘯聚飄忽靡常雖經防軍協同團練隨時堵剿而兵出賊歸兵歸賊出爲患未有已時欲求保衛之方惟有築寨之法鄉之有寨堡猶邑之有城池查嘉道年間川省教匪縱橫四出咸同年間捻匪馬賊蔓延西北雖經大軍勦滅揆厥成功實因南北一律廣築寨堡行前人堅壁清野之法故能制禦流寇誠爲意美法良築寨之法就各州縣擇其最大村莊或險要處所仿照官軍營壘以挖濠之土築牆留東西兩門出入牆外以竹編籬或栽刺竹寨中煤水軍火均備牆垛堆放亂石門樓安置鎗砲一遇有警附近小村莊婦女牛馬糧物均運入寨中固守其壯丁伺隙而出兼可聯絡附近寨堡追擊賊匪該匪進無所掠退亦受創自然計沮勢渙瓊屬近黎州縣亟應仿辦築寨以資保衛札飭各州縣督率鄉團紳民實力勘築并由本道飭各防營如遇軍務有暇可以就近助工外合行出示

曉諭爲此示仰闔屬鄉團紳民人等知悉爾等須知禦寇方能保家一勞乃可永逸禽鳥爲巢尙防陰雨
蟄蟲坯戶亦禦風寒如念剝牀之災同爲墮戶之計衆擎易舉合力興工其首先報竣寨工堅固者分別
給獎倘有偷安阻撓或敷衍塞責作不如程者定行提懲責令改作本道擇可勞而勞如父兄之衛子弟
爾等因所利而利合鄉鄰共保身家庶無負懲前毖後之苦心

會 奏黎匪剿撫事宜疏

張之洞
吳大澂

竊查瓊州黎匪自攻克陳鍾明什密老巢平燬馬嶺廖二弓十八村匪寨後軍威已振西峒逆首陳汶中
馬嶺逆首黃清廖二弓逆首那肥卽胡那肥那閃陵水逆首丁鬚生藍紅衫胡明時樂會逆首賴文成等
負隅抗拒死黨尙多又有僞大將軍鄭顯昌係光緒七年閏七月奉 旨飭拿未獲之逆首瓊民多罹其
害均應亟爲勦辦以伸 國法而快人心當經提督馮子材派直隸州知州劉保林督率部勇剿辦那肥
一股道員楊玉書知府馮相榮率軍追剿陳汶中黃清各匪分飭紳團搜捕餘孽上年十一月二十七日
探知那肥踞廖二弓老巢濠深巖密上列礮石爲死守計劉保林派隊進攻先燬堅木柵十餘層該逆猶
抵死不退二十八日我軍直逼老巢以火箭飛射寨中知縣石佩瓊主簿楊士丞巡檢楊桂振等繞出山
後圍攻自辰至午賊勢不支棄巢向後山越竄石佩瓊督勇猛追那肥中槍倒地經楊桂振割取首級逆

黨回援楊士丞猝爲飛彈所中登時陣亡各軍四面兜擊殄斃悍賊百餘名奪獲槍械三百餘件陣亡勇丁九名受傷三十餘名生擒匪供那肥鎗斃屬實餘匪逸出無幾維時陳汶中竄入陵水首弓之打鐵村十二月初一日楊玉書馮相榮暨團紳譚喬紳分帶兵練馳往圍捕該逆奪門狂竄練長林明志奮勇持門鎗斃逆首陳汶中練長吳金章生擒僞先鋒胡那耀並斃匪夥多名初七日楊玉書馮相榮劉保林移營廖二嶺尾逆首那閃率黨出柵拒戰猛驚異常我軍合力圍攻砲傷該逆左脚始經就擒解交馮子材大營訊明梟示連日各軍剿捕搜山丁鬚生藍紅衫胡明時三逆以次就擒總兵林長福率萃右軍搜剿烏坡一帶餘匪初一至初五等日將橫山固賊黨一併攻燬生擒賴金昌王打狂等匪殲斃逆黨數十名我軍亦有傷亡知府馮相華率萃中軍分搜定安望天嶺天峒嶺一帶擒斬逆匪賴文才夥黨黃亞二等九十餘名萃右軍擒獲逆首賴文成暨匪黨胡鳳尾等八十餘名劉保林所部萃左軍擒獲黃昌明等一百餘名萃前軍擒獲林成珍等一百八十餘名均係積年黨匪供認迭次殺掠不諱經馮子材先後飭令正法東中兩路匪勢已經渙散惟鄭顯昌黃清未獲十二月二十一日偵知鄭顯昌率其死黨盤踞萬州黎峒馮子材飭署萬州營游擊方敬選派弁兵會合萃軍馳往圍捕千總張德星五品軍功朱廷光首先奮勇深入黎巢將該逆生擒解營正法本年正月十二日馮子材自赴寶停司督剿令馮相榮劉保林分

率勇團搜山是夜躡及黃清於廖二弓灣洲地方都司陳榮坤守備劉步高連槍擊斃之令降黎認明屬實並將平日濟匪致富被控多案之士棍李榮誥拏獲正法合縣稱快當萃軍漸移瓊南之時中路定樂毗連之嶺門烏坡一帶尙有餘匪當經臣之洞由省另派福軍四營益以土勇兩營前往搜剿撫定其西路客匪黃鄒保温河清伙黨前次雖經投誠渡海安插仍復潛回故地伺便糾眾劫掠怙惡不悛法難寬宥經道員方長華派軍擒斬匪首陳贊桂匪目張秀生鄧亞生賴官生等四十三名稍輕者分別發交州縣懲禁保釋仍飭該處紳團勒拏餘匪以期安輯又有儋州匪首陳鍾銘藉報復爲名糾眾滋擾感恩地方焚殺淫掠黎漢各村均被其害上年八月 奏明在案方長華派府經歷毓濂等設法擒獲交馮子材大營訊辦以上情形接據馮子材暨方長華楊玉書護雷瓊道謙貴等節次咨報稟報前來計定樂陵萬澄感各匪俱已漸次廓清惟崖州一屬處瓊郡之極南距府城將及千里山谷最深瘴毒最重從古人跡未到之處該處生岐最悍自道光九年至十一年戕官爲亂經前督臣李鴻賓督軍剿平卒以官兵未能深入草林嶺以北黎村自此叛爲生黎不納丁糧抱寨抱丑打蕩等村黎匪四出焚殺甚慘紳民屢經稟請剿辦又陵崖交界之下馬峒在五指七指之間地勢深險素爲匪窟此兩處尤應乘機勘定此時將士久勞餽餉不易然不就此兵威一律底定則瓊地病根未除聲教終梗以後難期再舉臣之洞熟加籌度

亟宜恪遵一勞永逸之

諭廓清崖境以竟全功當經與馮子材電函定議激勵諸軍多備醫藥移師南

路病者撤出善地調養壯者鼓勇深入令馮相榮馮相華劉保林等三軍由東路進方長華之軍由西路進會合紳團分別剿撫務令直抵生歧巢穴應俟辦有端倪再行 奏報此萬陵各匪肅清後現又移辦

崖匪之實在情形也現在亂黎漸稀則撫定良黎有可措手臣之洞酌擬撫黎章程十二條刊發傳布一官軍此舉專爲剿除亂黎招撫良黎開通十字大路以期黎漢永遠相安其良黎秋毫不擾毋庸畏懼一從前爲匪黎人投誠者免抗拒者誅擒斬來獻者重賞一投誠各黎無論生熟一律薙髮改裝一投誠黎首開送戶口冊網獻匪徒繳呈槍械一投誠黎衆隨大軍伐木開山前驅嚮導仍按計里數酌給賞犒一將來開通生黎大路後選擇要地設官撫治安營彈壓各村黎長助剿開路有功者授爲土目就中酌設局總土目數人散目給頂戴總目授土職自爲約束仍聽地方官選黜略仿黔滇各省土司之例不令吏胥索擾一開通後黎人仍安生理有主之田斷不能強奪惟抗拒者籍產入官充軍屯田之用一開通田業三年內不收賦稅三年之外務從輕則起徵斷不科斂一開通後黎境有礦各山由官商開採者給錢租賃絕不强行佔踞黎漢均享其利一開通後民人鹽布百貨與黎地牛木糧藥等物在各峒口設場互市來往暢通公平交易嚴禁漢民訛賴盤駁總令於黎人有益一設立土目之後應各具永遠不敢殺掠

抗官藏匿匪徒之切結存案所屬有犯責成該土目拏送到官按律懲辦一每數村仿內地設一義學延請塾師習學漢語漢文宣講 聖諭廣訓所需經費就地籌辦令在籍紳士總兵林宜華副將符鴻升等分遣通曉黎語團紳經歷各峒剴切宣諭其霞黎苗黎哮喘黎乾脚岐各種類多裸處酌給衣袴令其漸被冠裳之化訓其頑悍之俗現據各路稟報已經薙髮改裝就撫造冊者東路丁口三萬餘北路一萬餘西路四萬餘查撫黎以開路爲先開鑿險隘芟焚林莽令其四通八達陽光照臨人氣日甚則嵐瘴自消水毒自除前代雖有開通十字路之議迄未舉行康熙二十年瓊州鎮總兵吳啟爵剿南勞峒黎後亦曾議及中作而輟綜考黎峒形勢北以十萬峒之牛欄坪爲要東以太平峒之什密爲要東南以寶停司爲要南以羅活峒之安司爲要西南以古振州峒爲要西以江毛峒之凡陽爲要皆出入衝要可以屯兵足食之所茲擬開大路十二道一由樂會之嘉瀆市西行經石壁船埠加嶺中平河濫出五指山之北西抵牛欄坪此爲東北路一由萬州之興隆五甲西北行經長沙營什密禁會南峒七村出五指山之東亦抵牛欄坪一由定安之銅甲口西北行過毛祥口出五指山之南西抵五指山下水滿峒一由陵水之烏牙開至寶停司又由崖州之簾橋亦開至寶停司再由寶停司西行橫開一路越七指山抵崖州屬樂司此爲東三路均責成道員楊玉書辦理一由崖州東之三亞口西北行越華林大嶺出五指山之西抵凡陽此

爲東南路責成道員楊玉書暨知府馮相榮馮相華辦理一由儋州南豐市東行經大水番崙元門紅毛合棘諸峒東南抵五指山水滿峒一由紅毛峒南行經番嚮毛匱諸峒出五指山之西北經凡陽南抵榮安司一由儋州之調南市東南行經七坊刀釘諸峒南抵感恩古振州峒北爲西三路一由昌化東行經古振州峒東亦抵樂安司此爲西南路均責成道員方長華辦理一由崖州西之九所市北行經樂平汛東北抵樂安司此爲南路責成署崖州知州劉保林署崖州協副將方敬會合方長華辦理一由定安之嶺門南行經蚺蛇峒十萬峒牛欄坪南勞峒抵五指山過山南至水滿峒此爲北路一由嶺門西南行經三坎溪猪母灣加釵峒出黎母山之南抵紅毛峒此爲西北路責成督帶福軍同知孫鴻勳辦理統由馮子材考核督催並飭瓊州道府激勵各屬紳團同力協助大率參考前明海瑞俞大猷諸人之說加以變通推廣所開之路如井字形其餘各州縣團夫分開小路以合於大路縱橫貫通同時並舉分地定限會合聯接勇團土黎併力作工以一丈六尺爲度極險仄處以八尺爲度人力所不能施者以炸藥轟裂之所到之處伐木焚莽搭橋鑿井經過黎岐隨宜撫定分遣員生測繪地圖並令沿途察看各河道是否可行船筏以備運出老山林木百貨測看各山礦苗種類以備開採山內地形土性宜於種植何物以阜物產而贍瓊民路通地闢之後應於內山要隘廣饒處所建置城寨設官安營以資化導控制舉辦一切

俾此奧區永爲樂土竊惟瓊郡唐代建州置縣以來峒黎叛服不時屢煩兵力良由山深林密恃險爲患外匪附和荼毒益深勞費防守直無安歲與臺灣生番情形無異乃蒙 聖主明見萬里采兵部侍郎曾紀澤之 奏特頒 諭旨令籌經久之計臣等仰秉 宸謨策勵諸將稔惡亂黎誅擒殆盡開荒鑿險漸化獠獠目前路工已得十分之四統計五月間路工可一律告成羣黎亦可撫定一切善後事宜臣等當妥議 奏陳所有疊次攻克萬陵等處匪巢殲除首要以及深入老山撫黎開路各員弁艱險勞瘁迥異尋常應懇 恩施由臣等存記俟全瓊肅清後彙案 奏請獎叙出自 鴻慈逾格謹會同前廣西提督臣馮子材恭摺奏陳

奏臺灣各路生番歸化并開山招撫情形疏

光緒十二年

臺灣巡撫

劉銘傳

竊臣於光緒十二年四月並九月勦撫南北各路番社情形先後奏明在案上年十月據署臺灣道陳鳴志統帶鎮海後軍副將張兆連先後稟稱後山番社未撫尙多番在深山之內北抵蘇澳岐萊南至埤南恆春若由水尾適中之地與前山彰化遙遙相對開通道路聲氣聯絡先撫後山中路其餘聞風向化招撫較易否則一撫之後聲氣仍然隔絕徒糜經費難求實效等因臣當檄署臺灣鎮總兵章高元統帶砲隊並鎮海中軍前營定字左營及練兵七百人兼雇石工民夫由彰化境之集集街開山而東張兆連由

水尾開山而西兩面刻期會辦章高元率勇由拔埔社開至丹社嶺計修路一百二十二里張兆連自水尾開至丹社嶺計程六十里均係崇山峻嶺該鎮等鑿石伐木自冬至春一律修竣張兆連當乘開山軍勢卽派管帶黃定國畢寶印先將水尾南北川丁仔老等二十四社番丁四千餘人招撫歸化一律薙髮擇立社長頒給憲書條款使奉正朔次由薊蓮港至岐蘇沿山一帶招撫他良等十二社番丁二千餘人當有毗連岐蘇之大魯閣爪等社丁衆勢強意圖抗拒張兆連因大魯閣社爲北路最強之番若招撫歸化則岐蘇一帶卽可一同就撫親帶三營隊伍紮駐山口聲言開砲攻剿該社番目廉晝溢等畏威乞撫並願同大馬鞍大吧壘等五十三社一同歸化先後薙髮一萬五千餘丁此水尾至花蓮港後山北路番社一律歸化之情形也張兆連于北路生番歸化之後卽會同埤南同知歐陽駿移軍向埤南平埔一帶內山招撫南路生番平埔以南各社以呂家旺左右爲最強該社地大丁衆雄其儕偶不獨不遵薙髮之令且統衆強阻附近各社不准就撫各番因而觀望張兆連歐陽駿當傳通事米清吉到營告以該社素行恃衆藐法此次是降是抗立即回報一面滾營進紮耀兵山麓呂家旺番目卞海盈齊骨獅康大鰲等見官軍逼近勢在攻剿聚謀數日各隨通事到營乞撫並約同附近巴六凡等二十六社一律歸化並有八佬等十三社亦聞風歸化統共薙髮番丁一萬三千餘人其毗連恆春鳳山兩縣屬境層巒疊嶂內有

番社在鳳山轄境者以三條崙爲大枝在恆春轄境者以高山牡丹灣爲大枝張兆連督同鳳山營都司藍鳳春管帶林維楨分道進山招撫三條六儀等十五社高山牡丹灣阿眉等二十二社中心崙等四十二社又飭管帶黃定國畢寶印招撫大蘭大打臘打南等十二社地極幽深各番皆伏處山頂寒苦異常自呂家旺至大蘭等處共撫一百二十九社計番丁三萬五千餘人此埤南恆鳳所屬後山南路番社一律歸化之情形也鳳山所屬前山尙有未撫各番臣上年檄飭統帶鎮海前軍副將陶茂森率隊由牛欄棍內口半路店招撫沙摩溪等六社由山猪門招撫柏葉等十八社由萬全店招撫糞箕等四社統計二十八社番丁一萬二千餘人均皆薙髮歸化其毗連臺灣嘉義兩縣所屬內山未降番社經署臺灣道陳鳴志檄飭鎮標中軍易豫俊招撫大喃等二十四社番丁四千三百餘人又派遊擊劉智坤續撫大武龍內攸等四社番丁四百餘人章高元由彰化水底藁開路至埔裏社沿山招撫北港萬霧等五大社眉毛納叻等四十四小社番丁九千餘人又由拔埔社開路至丹社沿路撫卓大意東等六十一社番丁八千餘人中路嘉彰之交經斗六門縣丞陳世烈於雲林坪設局招撫沿山郡番十六社蠻番丹番等三十七社番丁四千餘人樟腳楠子腳等七社番丁四百餘人均在後薙髮歸化新竹前山番社上年已一律歸化惟內山石加碌京孩兒等百餘社素行凶悍降番墾民屢受其害仇殺不休迭據民番稟請調兵剿

辦臣於上年十二月檄飭道員林朝棟督同營官鄭有勤兩營隊伍前往相機剿撫林朝棟率帶正營由十八孩兒社進攻石加碌南路派令營官鄭有勤率領副營由西熬進剿石加碌北路各帶化番數十名爲之嚮導深入內山七十餘里節節開路築卡石加碌五社並哇西熬煤素雪中明都郝等十七社番衆見官兵分道深入畏威乞降並願勸導京孩兒南界密拿佬社一同歸化林朝棟當派鄭有勤率帶化番親往京孩兒邊界將密拿佬碧牙闌布南口等社土目哇素老哇油老瓦丹打勞邦朗等生番二十四社一律招撫歸化此前山各路自冬至春續行開山撫番之情形也查臺灣生番種類繁多處處與民仇殺自上年九月臣親督大隊剿撫中北兩路生番歸化後現在數月之間所有後山各路生番二百一十八社番丁五萬餘人一律歸化前山各路續撫生番至二百六十餘社番丁薙髮三萬八千餘人水尾花蓮港雲林東勢角等處可墾水旱田園數十萬畝不獨開疆闢地且可免民番仇殺之禍此皆 朝廷威福遠播遐荒使深山幽谷野居穴處之類咸知向化歸仁化獠狃而登衽席實非微臣意料所及惟招撫番社愈多經費愈大現在捐輸截止經費支絀異常臣已檄飭各軍仍回防所籌畫設官分治俟有經費再行續撫以期全臺生番一律歸化查前後山將士自開山撫番以來披荆斬棘奔走於深山窮谷之內從事於蠻烟瘴雨之中兩年以來備嘗艱苦不無微勞足錄所有尤爲出力之總兵銜閩浙儘先補用副將

張兆連留閩補用副將協勇巴圖魯陶茂森均擬請以總兵 記名簡放閩補守備鄭有勤擬請以都司
儘先補用並 賞加遊擊銜其餘在事出力官弁可否由臣彙案請獎以示鼓勵之處出自 逾格鴻慈
除將已撫番境籌商設官分治另行會奏外所有各路生番歸化並尤爲出力將領懇 恩給獎緣由謹
會同閩浙督臣楊昌濬恭摺具陳



皇朝經世文續編卷八十目錄

兵政十九

苗防

道光湖粵平徭記

魏源

八排兵事考

湯彝

平徭議

陳起詩

治徭

陳起書

斷龍

陳起書

覆陳漢苗土司各情形疏

賀長齡

覆陳湖南苗疆情形疏

賀熙齡

遵議江華縣撫徭新章疏

李明墀

奏陳苗疆善後事宜片

林肇元

招撫猺目請予土職各緣由疏

岑毓英

新世文新編

卷八十四

南陽府志 卷之八十四

卷八十四

南陽府志 卷之八十四

卷八十四

南陽府志 卷之八十四

卷八十四

南陽府志 卷之八十四

卷八十四

南陽府志 卷之八十四

卷八十四

南陽府志 卷之八十四

卷八十四

南陽府志 卷之八十四

卷八十四

南陽府志 卷之八十四

卷八十四

南陽府志 卷之八十四

卷八十四

南陽府志 卷之八十四

卷八十四

南陽府志 卷之八十四

南陽府志 卷之八十四

皇朝經世文續編卷八十

上海葛士濬子源輯

兵政十九

苗防

道光湖粵平獠記

魏源

湖南衡永郴桂四州郡界廣東連州廣西全州踞五嶺之脊民獠雜錯深谷重巖風氣戇鷙與華不通華民欺其愚斂攘侵侮官吏輒右奸民以賧獠積怨則變昔今一轍有趙金龍者湖南永州錦田獠與常甯獠趙福才以巫鬼神其衆時楚粵奸民結天地會屢強劫獠寨牛穀黨聯官役獠無所愬于是金龍妖煽其峒倡言復讐使趙福才糾廣東散獠三百餘合湖南九冲獠共六七百人道光十一年十二月焚掠兩河口殺會匪二十餘明年正月江華知縣林先樑永州鎮左營游擊王俊以兵役往捕賊已千餘據長塘夾冲永州鎮總兵鮑友智調兵七百及永州知府李銘紳桂陽知州王元鳳各募鄉勇數百進剿令游擊李方玉由沂村繞襲其後游擊王俊等由東路直擣夾冲遂燬其巢斃賊三百餘掘毀逆墓二十三日賊竄藍山之五水獠山所至虜脅衆二三千圖據九疑山巢穴乃令參將成喜以百兵扼要路衆寡不敵退賊遂旁掠甯遠上命兩廣總督李鴻賓廣西提督蘇兆熊各防邊界時鮑友智俟續調寶慶各兵至卽

分扼合攻而巡撫吳榮光提督海凌阿劾鮑友智輕進疎防會藍山告急榮光又檄寶慶兵盡赴藍山而檄提督由甯遠赴援二月十四日海凌阿率寶慶協副將馬韜以兵五百餘由甯遠之下灌進剿藍山路險且偏賊巢海凌阿不偵探地勢遽由小路冒雨深入又不爲備賊僞充夫役爲官兵舁槍械行至池塘墟山溝陡狹伏賊四起乘高下突槍械反爲賊用海凌阿等皆戰死 上已命總督盧坤湖北提督羅思舉赴剿至是又移貴州提督余步雲于湖南而飭吳榮光回長沙賊虜脅將萬趙金龍率八排散徭及江華錦田各寨徭爲一路趙福才率常甯桂陽徭爲一路又趙文鳳率新田甯遠藍山谷徭爲一路每路各二三千犄角出沒而官兵不設糧臺增調常德水師及荊州滿騎皆不習山戰盧坤至永州始奏罷之而改調鎮筸苗疆之兵又以衡州水陸咽喉而常甯屏蔽衡州當賊衝祁陽又入衡永捷徑且糧運後路皆派兵勇防禦桂陽新田嘉禾三州縣各團練鄉勇土徭自守以防虜脅是月桂陽知州王元鳳及鮑友智擊斬趙福才殲徭五百再戰殲徭六百其趙文鳳一聞官吏招撫解散過半惟新田以官兵繞道未至知縣王鼎銘戰沒賊入城肆掠去効不赴援之游擊李方玉守備王楷治罪 詔以徭皆山賊躋捷負險恐蔓延兩粵或盤踞山峒致稽搜捕勅諸將誘至山外平野之地聚而殲之三月十日羅思舉至永州以南路之藍山甯遠江華俱入粵門戶隘口不一乃議大兵由新田後路躡賊遏其南竄與桂陽北路兵夾攻

并扼其西通道州零陵祁陽小路于是三路猺四五千及婦女二三千爲官兵驅逼出山皆東竄常甯之洋泉鎮其地爲入山水口有溪通舟市長數里垣牆堅厚民去賊守羅思舉以賊逼歸一路且失其翻山長技乃密檄北路兵齊赴又漸移各守隘兵進偪合圍時運礮未至賊穴牆出大銃官兵反隔牆外先持盾擲火晝夜迭攻以耗其火藥鎮軍兵數十躍牆而上前者傷墜後隊繼登先後斃賊一千餘四月七日賊詐降以緩我攻欲乘間竄入山羅思舉以賊不繳器械縛首逆攻益力奪門巷戰賊大呼乞降仍鬥且逃內外夾勦連日殲猺六千惟散猺八九百拒守市內大宅恐趙金龍在內故仍不用大砲二十二日盡毀牆舍訊知趙金龍已于初九日突圍中鎗死禽賊子弟妻女及死黨數十奏聞 詔以盧坤羅思舉平迅速各予一等輕車都尉世職賞雙眼孔雀翎余步雲自貴州至僅十日亦加太子少保在事文武進秩有差時 欽差戶部尙書宗室禧恩 盛京將軍瑚松額已抵衡州未至軍先三日奏捷禧恩詣趙金龍死狀虛實羅思舉旋獲其尸及所佩印劍木偶乃止而五月四日復有金龍餘黨趙子青自連州八排竄江華藍山虜脅二千猺羅思舉余步雲馳堵之破賊于錦田之濠江冲禽斬首逆殲猺五百餘黨瓦解 詔切責廣東將校不如湖南出力而廣西賀縣復有逆猺盤均華之變煽聚二千餘六月爲廣西參將滿承緒擊敗于芳林渡逃至江華界爲湖南守卡兵所獲于是 詔禧恩瑚松額率余步雲赴廣東勦

連州八排猺初八排猺有黃瓜寨者正月中被奸民官役虜掠訟于官連州同知蔡天培訊之斷民役償猺千二百金民役不償猺出掠報復蔡天培遂以湖粵猺響應告變總督李鴻賓令提督劉榮慶署按察使慶林以兵二千堵禦榮慶以猺無逆狀且寨峒險難攻主撫慶林力主勦議不合會四月聞楚師告捷將士皆邀懋賞新任廣東按察使楊振麟亦主勦李鴻賓遂以五月十三日同提督率兵六千三路進八排猺首八人出山跪迎請縛黃瓜寨逆猺以獻李鴻賓收斬之奏稱殺賊七百於是猺皆負嵎死拒猺山周圍四百餘里峒險箐密軍無偵探猺剽要路伏隘狼突官兵驚潰自相擠墜三路皆敗游擊都司以下死者數十士卒死者千計以行營硝藥失火誤焚傷亡奏而劾提督劉榮慶老病 上褫鴻賓職因有禱恩瑚松額之命又以余步雲代劉榮慶率總兵曾勝等調湖南貴州兵進剿禧恩等至粵初銳意用兵及探知猺峒天險難深入乃于二十五日奏大木根大橋頭之捷二十七日復奏六對冲猺之捷所奏殺賊皆數百計然必需有首逆始能戡事于是振麟日遣人赴猺招撫猺懲八人前事不肯出官兵又懲李劉前敗不敢入旬日不得見一猺之面而盧坤又有移督廣東之信計程將至禧恩急責楊振麟刻期招降否卽嚴劾振麟乃復懸賞購募并令熟猺爲質始偶有出者果得洋銀鹽布以歸于是猺貪利踵至旬日得數百人及縛黃瓜寨附近猺三人諸將得以戡事乃馳赴受降酌留兩廣兵三千令曾勝防守連山檄

止湖南續調之兵時禧恩暫署兩廣總督俟盧坤至以善後事委之交印卽行 詔進禧恩不入八分輔國公賞戴三眼孔雀翎瑚松額余步雲均世襲一等輕車尉賞雙眼孔雀翎曾勝加提督銜襲雲騎尉李鴻賓劉榮慶均逮戍新疆初楚粵邊郡奸民爲天地會締黨歆約橫行鄉曲小剽掠大擅殺各有名號兵役皆其耳目羽翼一呼百諾更不敢問趙金龍起事卽戕殺會匪故會匪不附而郴桂兩粵奸民已所在蠢動州縣藉軍興團練隨時禽治渠魁又猺平迅速故幸未生變然黨與蔓三省逋逃藪聚論者謂邊防隱憂在苗猺之右

八排兵事考

湯 彝

猺之居八排自南宋紹興間始八排之用兵自明嘉靖間始初連有仕於粵西者挈猺僕十餘人歸使墾州南黃地源山中山高六十里縱橫百餘里峯巒複疊巉刻阻深羣猺環山麓每一聚落曰一排初分八排曰軍寮馬箭里八峒大掌嶺火燒坪爲內五排曰行祥油嶺橫坑爲外三排久益繁息延及今復有小排一百三十有一地險物衆出爲民患嘉靖二十五年因擾邊征之旋議撫獸心未革未幾復亂天啟二年連山知縣楊懋忠請剿之參將趙文督兵入有老猺數十人跪馬前垂涕乞撫文信之不設備夜半賊以虎皮蒙牛犢驅入營官兵大亂猺乘之一營盡覆監軍道某佯撫之以緩其暴密請總督檄都司蔡一

申率銳師銜枚夜入踞平猿嶺之險馬箭各排不能救一申用火箭射入軍寨焚其巢分兵屯白石嶺歇涼墩爲犄角示必剿軍寨賊潛奔油嶺一申率勅卒裹糧持鋤取閒道夜薄油嶺黎明成三大營於林時洞賊大駭乞命一申勒獻首賊斬之始予撫崇禎五年復劫民邨逼州城三里許吏目吳中選會守備梁棟輔追捕之及於邊井塘爲賊所殺總督熊文燦議剿之而未果自是益披猖猿頭李大面者稱雄各部自以爲槃瓠後遂號盤古檄民邨徵租稅曰猿糧某排轄某邨各畫封界索花紅酒米民大苦之十三年廣西賊犯連山排猿應之復潛結臨藍高猿柴猿諸賊由是楚粵之交郡邑騷然一月十三變遂攻州城州牧王立準率千總黎樹績禦之飛書告急總督沈猶龍令僉事道魏章監都司蔡坤守備馬文滔軍往援壁於金相塘賊大至圍坤營兩晝夜勺水不得入坤無策諭賊解圍卽退兵衣甲火藥盡予之僅以身免而以兵單賊衆聞上臺猶龍乃奏徵江楚閩粵六鎮兵分道并進號十萬西自大拱橋東迄大空嶺營壘星羅而六總兵以客故不盡秉猶龍節制各乘便利賊乘高望之盡悉其進退整懈軍寨馬箭賊遂併力攻閩鎮陳鵬營大戰於蕨岡頭日已暮矣俄里八大掌諸賊從山南橫擊鵬戰死各軍皆潰猶龍乃城茂古峒以塞其衝招義兵命監紀董梅鼎守之名咸甯堡前立墟市民賴以無恐值明季天下大亂猿益肆沿及國初未盡向化順治八年流賊馬寶入連州誘排猿出山相倚爲暴拆咸甯堡掠民邨無虛日

九年劫下水堡千總唐某率兵追捕伏發死之康熙元年連陽遊擊武君仕率三百人偵賊石圭陂賊數千乘夜出劫君仕令堅壁勿與戰且更番飽食天明大呼突出殺賊賊披靡退入山峒自此不敢出亂稍戢惟令兵役巡隘道察其動靜賊惡之欲得而甘心焉一日數獠牽牛負衣被作劫掠歸山狀誘兵役追捕既深入則起而殲之其兇狡多類此各排惟軍寨最強油嶺里八峒次之有黃邨民素苦軍寨侵暴集壯丁伏山外俟其出狙擊之擒十人獻於縣時縣令朱三才畏盜案盡釋之欲其德己而不爲暴也獠頭房一心易之率其黨益淫殺無忌控訴皆置不問獠難復起四十年士民奔行省請討賊提督殷化行入里八峒駐兵山麓遣副將林芳八排諭以縛獻首賊羣獠悉伏山谷芳縱火燒獠房光四照各排見焚其巢咸怒於是軍寨馬箭之獠從排之下路仰攻大掌火坪之獠從排之上路俯擊峒獠恃外援遂從中路突出把總陳溥及兵百人皆殲焉芳走入壺蘆田顧謂其僕曰此絕地必死汝盍去其僕泣不行賊來益衆僕以身蔽芳彎弓四射當者皆貫脇洞脅矢盡負芳而死殷化行率總兵劉虎入賊焚林據險以拒化行度兵寡未能勝留虎於軍而自回廣州與督撫會疏以聞命都統松柱等率湖廣兩粵兵討之四十年二月師次三江口連營數十里開山通道三路進剿圍之數月賊大懼乞降乃撫之城三江寨駐兵二千以副將領之環八排建三十六汛彈壓控制百餘年來三連之民慶安枕焉道光十一年錦田獠

蠢動潛結排猺應者數百人續去者爲守隘兵截回羣猺行時以山土賤售民戶旣歸無以資生又失其農具遂劫奪仇殺由西路延及東路而中路軍寮復袒惡助患五月李閣部鴻賓至定議剿之分三路進攻軍寮賊誘之深入夜火其營三路兵皆挫失遊擊史鵠謝國榮王珍并歿於陣 命禧將軍等至連徵黔楚粵西兵將集羣猺懼服縛獻兇逆乞命師臣承 詔撫之八排復定

排猺生深山邃谷僥捷如鳥獸恃險設伏是其所長故不利遠出而官軍亦不利深入然蔡一申之奪險神速武君仕之堅壁挫銳皆以偏師奏捷而五省六鎮十萬之兵或無統帥而潰或僅取輸款而歸求其出奇制勝以險絕爲功則不易觀兵法曰兩鼠鬪於穴中將勇者勝是知深谷行軍貴精練不貴兵多亦地形然耳且賊覘重兵至必絕隘道塞關險聚穴負隅雖有良將勁兵無所用其武從來皆以安撫了局者蓋不欲老師糜餉也夫亂之所起不起於起之日其所由來者漸也竊謂於平日宜撫之不必撫之於旣亂於旣亂宜防之不必防之於平日徒防之適足以擾之將召亂況撫之卽所以防之可弭亂也而其要則曰防猺如防猛獸撫猺如撫嬰兒飽之勿飢信之勿欺馴伏之勿使其奔逸安戢之勿使其仇離庶乎祛民暴寢邊患節餉而不勞師也

平猺議

陳起詩

平徭之法搜捕之功多戰陣之用少而搜捕之兵北兵不如南兵客兵不如主兵官兵不如鄉兵請詳論之五嶺綿亙數省自廣西廣東湖南以至江西福建嶺巔所在多徭人耕種去住荒忽名過山徭而廣西廣東湖南三省交界處有平坡千里萬山環抱南通連州北負永州西枕平樂東隔韶連爲徭人祖宗以來巢穴聚集之處名八排徭大道自連州三江口入爲咽喉永州九疑山爲背脊廣西桂嶺爲首湖南騎田江西大庾贛嶺爲尾永州徭匪係過山徭有生徭熟徭二種熟徭與近山漢人雜居風氣略同生徭言語不通嗜欲亦異熟徭彊富生徭瘠貧生徭常聽熟徭指使是二是一如鬼如蜮所以嘯聚動成千百猖獗遂連三省者地勢聯絡然也苗徭蠻獠性俱戀家易驚多疑不耐持久貪利苟得不能遠謀嘉慶初湖南苗反輾轉七八年始定而未出辰州一步可知苗徭無足慮以性俱戀家故耳然山深箐密聚散無常非有平原曠野可以布陣安營而決機於十里數十里也林翳谷伏詭譎易生非有高城深池可以十圍五攻而取勝於一戰再戰也東竄西突楚粵并起非有通衢要道可以整軍聚糧而搗堅於一路也無百人數十人可容之巢穴而鼠穴鳥巢剿之不勝其夥無數百人千人之攻伏而雉攻兔伏防之不勝其防其地彷彿金川亦尺寸皆山之地其事不異苗疆惟雕剿之法最宜故曰搜捕之功多戰陣之用少雖然言搜捕者必主調兵吾謂兵不必調而必練兵不貴聚而貴分兵不在官而在民則北兵不如南兵客兵

不如主兵官兵不如鄉兵之說也北兵長於弓馬馳逐平地性氣剛果臨陣齊一然不能耐飢寒難於持久不習潮溼炎熱鬱悶必多疾病不能輕捷跳躍攀援鑽窺易致竭蹶又不識蠻人言語蠻人性情則勦殺追逐進止遲速起伏探望呼吸之頃易失機宜不習山林高深途徑紆直之實則欲迎頭反成尾追欲兜殺反多透漏故北兵不如南兵四川貴州兵素稱勁旅旣耐勞苦又習險阻湖南兩廣遣調較易將來大營非此五省之兵不可然而楚粵之兵素欠訓練必多渙散小利爭進小失競奔又專恃大營則防此失彼勦一逃三欲戰則餌之來而不卽來欲守則多所防而不暇防曠日持久師老餉糜苗疆之役所以不收功於福貝子而得效於傅鼐故曰客兵不如主兵官兵不如鄉兵且夫團練鄉兵以勦蠻匪有十宜焉山谷高深徑途遠近形勢險易人人易知則彼之所乘與所必獲我知趨避我所可及與不易及又知緩急識地利一也久雨烈日寒熱溫溼春疫秋癘習而不苦飢飽勞逸不生諸病順天時二也彼之言語十知九彼之性情十知八爲攻爲守爲伏爲逃爲降爲詐十知六七臨陣之際人人有應變之機得賊情三也人自爲戰鬪家自爲捍禦號呼擊刺之聲同不誤於風雨父母室家之念重敢棄而散亾兵心固四也近徭十數州縣村莊累萬旣苦裹脇又震兵差守則固無可恃逃則必有所歸團練鄉勇則併小村爲大村移低堡就高堡寨長漸多糧薪漸聚民志定五也會匪居民十之五鹽販居民十之二礦丁廠徒居

民十之三盜賊逃人居民十之一約此數種不少梟雄此有所收不竄入彼削賊黨六也邊地民人畏官最甚文武皆可統領易於節制臨陣扞救官長必不致分彼此一操縱七也官兵飲食衣裝不比鄉民耐苦查官兵日給銀二錢五分貼補糜費似尙不止此數若匪逆起滅無常則大軍駐撤兩礙團練鄉勇則可以久駐易於供給卽騷事平靜亦可倚爲善後之圖簡供億八也此有鄉團則邊野無所掠而彼米鹽布絮銅鐵之來路窮漢奸無所通而我聲擊擒伏虛實之機密堅壁壘九也臨武藍山江華永明道州全州灌陽恭城富川連山連州陽山乳源十數州縣皆有鄉團則彼勢割而難聚防多而難備力散而難久心分而易疑變化由我勝算先人勢割而難聚則大兵所入賊不能併力以禦防多而難備則聲東擊西誘此伏彼賊必自救不遑力散而難久則各爲其巢穴各逃其生命而勦撫可兼施心分而易疑則賊黨必有互相推諉互相殘忌者首逆可不日擒獻制死命十也具此十善而談騷事者不出此其難亦有四謂曠日持久無速效也謂糾保練約必騷擾也謂鄉兵非盡善類易藏奸細不識步伍難約束也謂寨堡圍場旗幟器械所費不貲地方官吏借練勇之名以爲開銷或借以索民間幫補仍無實際憂經費也是四者誠然而天下事有見爲緩而急莫甚見爲擾而安莫甚見爲難而易莫甚見爲費而節莫甚請破其難而仍申吾說自兵興以至今日已二月矣調貴州兵湖北綠營兵駐防兵久需時日由今以後所謂

速效又可必邪使自今日始三省督撫通飭沿邊州縣近徭山者團練村堡約每縣五六處以爲守望招集鄉勇約每縣六七百人要縣至千人爲止以備勦殺奉行得人一時並舉不出三四月可以成事團練旣成分道並進不出一月必能勦滅命將出師可必之於四五月之內乎是所謂無速效者蓋見爲緩而速莫甚者也邊地州縣所轄之鄉民其騷擾有甚於客兵者乎州縣自練之兵其騷擾有甚於滿漢兵者乎外來之兵一則騷擾官府二則騷擾市集三則騷擾田產卽節制得人而風聲所到亦足騷擾人心賊來之民心已震兵來之民膽又寒當事類能知之未必能言之耳其實客兵騷擾之敝更足以搖動邊境之人心而使之勾通徭賊不可不防不可不畏也果得有膽智得民心之州縣勸諭鄉民使日爲團結招徠壯丁使聽吾指使所團者皆比閭族黨之家所練者皆交友認識之羣州縣旣可藉大兵駐紮之威以馴鄉勇大兵又可藉鄉勇搜捕之力以壯軍聲兩相爲用旣不擾官又不擾民又不擾兵若龔遂之治渤海張綱之定廣陵虞詡之平朝歌只在良有司十餘人耳是所謂恐騷擾者蓋見爲擾而安莫甚者也奸細之伏藏於鄉兵可畏已奸細之伏藏於大兵所臨之地尤可畏也然伏藏於大營之左右而客兵不能識認之伏藏於鄉兵之左右而鄉兵無不識認之見生面而必詰聞音異而起疑外來奸細固不患入吾團練第鄉民非盡善類朝集暮逃稍縱滋驕刻繩易變其可慮亦與兵同要在良有司慎簡而收之善撫

而教之耳教之善則莠民可轉其力爲奮不顧身之士教不善則官民可恃其衆而有咆哮挾制之時得失之數亦略相等況約束以官又須各鄉紳耆董之各鄉殷實明白者分理游民以有所事而日勤梟雄以有所希而亦奮賊匪奸細有爲我近邊鄉人所知識者併多方招之爲我用多方疑之使之不敢自用其奸細如李愬之平淮蔡是也所謂難約束者亦見爲難而易莫甚者也今日經費之艱難人人知之人能言之矣大營所在供應不少吾謂撤荊州駐防千兵卽省千兵之費半撤湖北督標湖南撫標廣西撫標兵約不下二千人以見在余提軍領貴州兵駐廣東廣西界羅提軍領湖北湖南兵駐湖南界進戰之事全以任之不使文官掣其肘湖督駐永州廣督駐連州廣西撫駐平樂督飭十餘州縣團練鄉兵不使武將梗其論三四月內各縣卽可分道併攻大軍亦於兩省分進吾知不待戰而降者降逃者逃擒者擒伏者伏矣以五六月而告功費之省也幾何卽以撤兵之費爲各州縣倡首賞勞之費亦已省經費多矣至於各州縣經費之出其說有四一則勸諭富民輸粟出財修堡建團二則勸諭貧民自出財穀相爲移併以保身家三則通粵鹽之禁於寶茶攸鄴郴衡一帶官收稅以濟軍需考照宋李忠定明王陽明辦湖南兵事舊法勿以安常處順之見泥之兵靖復舊四則熟徭叛產卽與近邊民田錯雜各縣皆有仍須鄉老勘報清理入官糧收堡寨以爲屯積又各州縣常平社倉義倉育嬰橋亭等項公田公費縣紳鄉

老自爲經理亦復不少兵興動用兵靖償還無傷於官無害於民乙丙征苗之役調兩廣兵衡永郴桂四府民間助給過兵口糧甚爲踴躍況地近切膚豈憂慳吝則此四條經費已足而於國家經費固省之又省也是所謂憂經費者又見爲費而省莫甚焉者也夫團練鄉勇之說古人言之詳矣卽平定教匪平定紅苗亦已著有成效而今日不能早決此策者事狃於所習而疑倡始爲甚難人憚於改更而慮勞怨之難任大抵然也溯查教匪紅苗兩舉初皆調兵征剿西滅東起此竄彼伏積年累歲然後歸於堅壁清野之策以致底平夫明者先見於未然勇者定計於必行前之策不效而後變計則所失已多是宜力求循良稍破資格官兵與紳士并資采訪與稽查互用以人薦人以邊治邊其究也并可以緝攻緝且夫今日南方之民卽緝匪平靜豈遂不思所以善後哉互廣西廣東湖南江西福建數省邊境叢山長林苗緝蠻所居外礦丁廠徒木客鹽販盜賊所匿罪人所逃硝磺銅鐵之產不乏鳥道羊腸攀藤沿壁百里咫尺呼嘯驚疑民無所恃則動易靜難官無所恃則賞窮罰竭催科提解捕捉之案棘夫手養育教誡判斷之事梗其行此何如之策哉故曰團練鄉勇卽緝事平靜亦可倚爲善後之圖烏乎又豈徒平緝之策已哉

治緝

陳起書

樵者曰子之言泛而難識也吾邨之緝治之若何曰勿擾制之若何曰去媒曰有事若何曰散黨夫緝甚

畏官故易虐其氣合故易聚有媒孽焉則必動搖之不與漢通也種類也其一呼眾應也亦種類也擾之生怨導之復仇則漢奸之爲矣夫儲大文原勢所謂郴隸湖南則粵之險失也知宜章之水歸粵而不知險之所在居中乃可制外今乃欲以外制中不特郴不可屬粵宜章亦不可屬粵宜章所以據嶺南上游此湖南控粵形勝也使宜屬粵不特上游之形勝失而湖南之門戶亦失且橫絕南北者嶺嶺屬之粵乎則楚之水何以爲粵之地屬之楚乎宜又何必屬粵中分之乎則形勢共必立二關於摺嶺之巔是一國三公也其他建制皆如此失而於制搖尤不便郴五嶺之騎田也騎田南北半搖摺嶺高踞其峽大路橫斷其巢而黃毛鑑塘大隈等處亦同摺嶺立兵以斷峽使其類不得相通則救援少而逃遁難近大路村莊復嚴守之使不得由平地過然後節節攻之一山不過二三百家易爲力矣若非斷龍則數百里之內山旣相通種類復一山間往來兵何從知有日添日多耳散者散之攻者攻之恩威並用矣吾聞之疆界之處奸所藏易避故也山林之中盜所伏難稽故也摺嶺東西皆大山又當疆界之處不特制搖宜治盜宜禦外侮亦無不宜

斷龍

陳起書

樵者謂步兵曰余樵五嶺之巔山徑余所知也踰嶺爲嶺南宜章其衝也禦嶺南先守宜救宜之路若何

步兵曰郴所以救宜險要在摺嶺余所司也然我之所守卽爲賊之所攻明由摺嶺救宜彼必盡力以禦陰由摺嶺之西黃毛摺嶺之東大隈以出其背焉蓋橫絕南北者嶺嶺自臨武入郴爲高堂山西有小徑黃毛是也東爲摺嶺起五蓋山其東之小徑則大隈焉過此則桂陽矣夫中原險要在水或在路所會歸之處邊鄙險要在山實在兩山斷而復連之處山龍也斷處峽也山防之法在斷龍征獠尤善獠善行山其伍散而不聚我聚而攻其一道則徑小難容眾散而攻其數道則彼盡力以圍我一道我仰攻則彼乘高以禦我登峰則彼圍其下擊東西奔擊西東奔擊首尾則上下四旁奔而我不能追斷其龍則彼無奔路龍之起也萬仞其伏也一線所伏之處其水分流是之謂峽山路會歸之處也大龍之下小龍生焉其脉亦一線龍斷則彼奔馳於此山而不能越山而遁入山先看水大水大峽之所出小水小峽之所出溯水則峽見斷而圍攻之節節斷節節攻如破竹然節破則竹自解夫獠可由貴州至常德洞庭可由貴州廣西至衡山寶慶至湘陰洞庭皆數百里不經州縣若五嶺則可由廣西永州郴桂大庾至閩浙數千里不經州縣橫絕南北者嶺嶺上泉分南北流故中無大水以界之州縣在平地斷龍如斬蛇斬其中則分爲兩險要大路大峽也間道小路小峽也摺嶺大峽也黃毛大隈小峽也不獨此也陰平峽也散關峽也武關峽也凡出奇之路無不出於峽者看水知峽則嚮導出奇可以意會焉曰子嘗從軍於獠當其由江

華而至常甯何不言其法而斷之何至出擾數百里八排廣千里何至聚萬人於中而不能戰步兵曰池塘墟亦峽也海軍門不知而中伏焉斷東西之水而南北皆山故不得出當今之世言者不行行者不言養犬所以守夜也而制之曰爾其嚙以禦賊無吠而驚予夢也賊在垣而嗾犬於門不得則罪犬子欲我爲驚夢之犬而孰知我將爲當門之犬乎

覆陳漢苗土司各情疏

道光十九年正月

賀長齡

竊道光十八年十二月初七日承準軍機大臣字寄奉 上諭有人奏滇黔兩省外來客民流民盤剝苗人土司田產請飭查禁等語川楚粵各省窮苦之民前赴滇黔租種苗人田地與之貿易誘以酒食衣飾俾入不敷出乃重利借與銀兩將田典質繼而加價作抵而苗人所與佃種之地悉歸客民流民至土司遇有互爭案件客民爲之包攬詞訟借貸銀兩皆以田土抵債種種情弊如果屬實不得不嚴行查禁著伊里布顏伯燾賀長齡卽將摺內所指各情節悉心體訪嚴飭各地方官隨時查察認真禁止除客民流民已經置買田產不計外儻有狡黠客民人等侵占苗人土地及擅買土司田產卽將田地斷還本人管業追價入官仍照例治罪至田主案件如有漢人霸占苗業及夷苗誣控平民務當公平聽斷治以應得之罪毋得任聽胥役詐索客民唆訟以杜侵越而靖邊陲原摺著鈔給閱看將此各諭令知之欽此遵

旨寄信前來臣等細繹原奏之意蓋以前撫臣嵩溥籌辦苗疆保甲將客民一體編查外來流民漸少又以苗俗本儉因佃種苗地之客民誘以紛華漸致入不敷出盤剝準折苗產半歸客民其尤甚者土司與漢民每有田土互爭之案輒被胥役勒索客民從而包攬教唆借貸銀兩動以田土抵償應示限制方可保全苗業預弭爭端臣等伏查前撫臣嵩溥查辦苗疆保甲之後所有續增流民續置苗產以及棚戶占墾盤剝準折等弊均經 奏明飭禁至今遵辦但須實力奉行不必更設科條徒繁案牘惟查原奏流民漸少之說自今觀之蓋未嘗少其勢亦難强行禁止卽所稱苗民習染紛華生計漸感亦不盡由客民之誘煽奚以明其然也人情莫不重去其鄉計無復之乃相率而轉徙方宜導以生路豈可轉行遏絕黔省固多客民興義府尤其淵藪自嘉慶年間平定苗匪之後地曠人稀每有黔省下游及四川湖廣客民攜眷而來租墾荒山俱係極貧之戶終歲竭蹶僅足餬口其力不能盤剝苗人且山土瘠薄墾種二三年後雨水冲刷倍形磽确仍復遷徙他往又他省客民往來滇粵兩省每由興義經過中途資釜匱乏留滯鄉場城市者亦復不少前撫臣嵩溥摺內已詳陳之自臣到黔以來興義各屬已無不墾之山而四川客民及本省遵義思南等處之人仍多搬住終歲絡繹不絕亦嘗出示飭屬嚴禁而不能止細求其故則以四川遵義人稠地貴而興義地賤也思南地利太薄興義雖瘠猶勝思南也然而地多烟瘴新徙之民不服

水土輒多死亡故雖地不加廣來者日多曾無人滿之患此種情形實堪憫惻而原奏乃謂客民獲利甚豐半皆廣田畝而峻牆宇毋乃偶見一二遂以概之千百若使目擊流民之苦必不忍爲是言也黔不產鹽布疋又貴類皆挹注於他省苗民錯居岩洞所饒者雜糧材木耳非得客民與之交易則鹽布無所資卽雜糧材木亦無由銷售分餘利以供日用是客民未嘗不有益於苗且苗民務耕作而不知貿易客民耐勞而儉用多就穀賤之地以爲家是亦未嘗不兩有益若謂紛華靡麗皆由客民導之以至窮乏則漢人中昔稱富戶今爲貧民者正復不少又將誰咎盈虛消息物理之常卽無客民固不能保苗民之常富也訪聞黎平之苗率多富貴固資山木之利亦由善自經營豈能無客民往來何以不能盤剝然則苗民貧富之無常猶之漢人耳臣等更卽原奏所未及細察漢民之情形尙有數條敢陳 聖鑒一則苗民實爲漢民害也黔本荒服皆獠獠狆狌之所居自元置宣慰使都元帥府始有貴州之名官職旣建乃有漢人經今五百餘年仍是苗多於漢查黔省上游猓苗爲多下游狆苗青苗爲多苗民固近淳樸而狆苗則兇悍難馴係五代時馬殷自邕管遷來其種有三一曰補籠一曰卡尤一曰青狆貴陽定番廣順皆青狆安順鎮甯則補籠卡尤也其俗以偷盜劫掠爲事不但客民不能盤剝卽土著漢民猶畏之他如台拱青江黃平等處之苗亦多沿路行劫滋擾客民控制彈壓均非易易一則苗民自爲害也漢苗固多爭控卽

苗與苗或因口角或因爭佃亦復互控不休甚至苗唆苗以控苗且勾串漢匪以控苗顛倒簸弄從中分肥刁詐殆難言狀一則土目土司之爲苗民害也黔省上游多土目下游多土司土司多係江西湖廣山陝江南等處之人土目則係從前土著及由滇蜀撥入之人苗民佃種土目土司之田歲上牛羊豬雞以爲年例年租其土目土司之強而暴輒虐使其苗又於年例年租之外多方科派之苦累殊甚一則苗民之爲土司土目害也緣苗民亦多奸狡或將佃種之田當與漢人土目土司所管地面甚寬無由察知久且轉相盜當輒至迷失又歷來苗民應上條銀皆由土司交地方官轉解藩庫近則以土司浮收紛紛控省求改歸地方官徵收及準理飭辦苗民又相率抗糧地方官傳案不到仍責成土司土司不得不爲之代墊若欲催科歸款則又以事歸地方該土司需索不遂藉端重徵具控其譸張爲幻不必盡由漢奸亦有苗民無異於漢人而不相害者 國家聲教四訖椎結侏僂漸移舊俗其中殷實之戶亦多勤事詩書況苗學屢經添設掇科出仕正不乏人衣冠之族聯門閭而重婚姻此等卽不當仍以苗民視之更有苗民絕異於漢人而不能相害者熟苗之外另有生苗多在深山窮谷之中性情嗜好飲食居處皆與人殊漢民旣不能入生苗亦復稀出雖有狡黠客民無所施其伎倆以上各情皆原奏所未及臣等惟恪遵諭旨通飭各屬悉心訪查懲盤剝之習警包攬之風杜侵占之漸加以懇勤告誡使之歸真返樸不務奢

華冀以鋤漢奸而蘇苗困而又將苗民之兇悍劫掠者嚴行究辦其誣控平民之案照例治罪則苗民之爲漢人害者亦去苗民互控句串唆使詭詐百端若能迅速聽斷不令胥役客民得售其奸則苗民之自爲害者亦去土司無違例科派之事苗民無借端挾制之心則土司與苗民互相爲害者亦去至於詩禮之家苗民亦同於漢生苗一種原不與漢人爲緣固無庸議及者也又原案內所稱胥設詐索刁徒唆訟各情形此二弊實生民之大蠹不獨有害苗民臣到黔之後查辦衙蠹一百一十四名業經具奏在案又查辦教唆詞訟匪徒二十八名兇惡棍徒一百六十二名鎖繫鐵桿五百五十九名均經達部有案誠以黔省在在苗疆若非隨時隨事嚴示懲創何以除暴安良年來察看情形宵小尙爲斂迹漢苗亦各相安復以各屬控案細加比對較之從前已減十之四五惟是黔省山多田少民苗耕作已形不足又有遞年尋常軍流人犯現已積至一千七百三十餘名新疆改發人犯又積至一千二百四十餘名此等人犯或挈眷偕來或遇赦願留生齒日繁皆與客民無異雖向例各犯止準居住城內不許私住各鄉而生計維艱亦未便概行禁約稽查防範耳目恆苦難周臣等仍按照前撫臣嵩溥奏定章程不敢稍涉鬆懈亦不敢過事拘泥惟有諄飭各屬實心實力設法查辦以仰副聖主綏靖苗疆預弭爭端之至意

續陳湖南苗疆情形疏

賀熙齡

竊查湖南苗疆自嘉慶初年戡定之後苗情極爲安貼良由撫綏得宜控制有力聞近年來該處情形漸就廢弛殊非慎重邊防之道臣謹就所聞縷陳於左一沿邊礮卡宜及時修葺以資捍禦也查湖南苗疆鳳凰乾州永綏古丈坪保靖等五廳縣沿邊一帶於嘉慶二年以後次第建修屯堡礮樓石卡哨臺礮臺共一千一百餘座牆一百餘里蓋牆以嚴界畫堡以資鞏衛哨臺以瞭望礮臺以堵截礮卡兩項則以守以戰所以捍禦邊疆至爲詳備原籌有歲修經費二千九百餘兩由辰沅永靖道經管支銷遇有坍塌隨時補築乃聞近來報銷不實各廳縣礮卡等項坍塌者多偶值督撫巡閱之時亦僅於所經過之處略加修補此外聽其頽壞似此年復一年將來必致傾廢無存殊非設險以守之道是宜亟加修葺以固藩籬其經費無需另籌惟令將歲修款項實用實銷務須一律整齊完固庶可長資保障而永衛民生矣一撥給丁田宜附近礮卡以便駐守也查苗疆各廳縣共設屯丁七千名內散丁每名給田四畝五分小旗每名給田五畝五分總旗每名給田六畝五分百總每名給田七畝五分皆以附近礮卡之田撥令耕種俾之且耕且守共備千城聞近來屯房書吏因田有肥瘠受屯丁等賄囑任意撥田往往有所守在此而所耕之田在數十里外者致礮卡空虛無人駐守而樓座因之亦易頽壞是宜於撥給丁田之時確實查核務令與礮卡切近如書吏受賄舞弊卽嚴行懲辦以收屯防實效且各礮卡修葺之後有丁駐守各自照

管亦可經久不敝是又兩全之道也一屯防田土宜隨修治以符定額也查鳳凰乾州永綏古丈坪等四廳保靖瀘溪麻陽等三縣共屯防田土十三萬一千餘畝除分撥屯丁領耕外餘俱召佃收租以充經費惟各廳縣田土附近山溪每多水衝沙壓之患原籌有修理田土工本穀三千餘石遇有衝壓隨即勘報動項修復乃近聞欸目雖存興修不實凡土田衝壓俱令佃戶自行修理該佃戶等無力興修卽聽其荒廢及額租逾限則追呼四出甚至以牛隻作抵致誤來歲春耕或則另換新佃責令頂繳租銀尤不勝逼勒之苦種種滋累皆緣侵蝕工本不肯給賞修治之故是宜將公項盡歸公用春夏之時山溪水漲田土遇有衝壓一經丁佃奉報立飭屯弁勘明分別給以工本趕緊挑修庶欸項有濟而額租常盈一備戰練勇宜照額訓練以復精銳也查苗疆各廳縣內鳳凰一廳尤關緊要原設練勇一千名分列鎗礮弓箭藤牌各隊併練習跳高跋坡等技名曰道標於每季大操每月常操之外又將各隊分日赴道署校閱在當時最稱精銳道光元年 奏准於練勇內撥出一百七十八名作爲各屯弁之字識跟丁現在惟存練勇八百餘名而此八百餘名中又多以廚役匠作雜項人等充數計能操演者不過五六百名其跳高跋坡等技均皆停止亦併不赴道署校閱遇督撫巡閱之時亦止虛作架式人數不足則調取屯丁冒稱練勇使之隨同支帳站門以掩飾上司之耳目坐使有用之勁旅徒屬虛名是不可不照舊認真訓練仍按期

操演分隊校閱併練習跳高跋坡等技以昭覈實而鎮邊疆一丁弁補缺宜嚴禁需索以示體恤也查苗疆屯丁內之百總總旗及辦屯管倉之總散屯長遇有缺出向由廳縣遴選詳道頂補念係貧寒免其跋涉故不送道署驗看近聞無論遠近皆須親赴道署未驗之先守候需時既驗之後書吏等勒令送繳規費然後給與委牌執照其名爲八百八實需繳制錢三四千至七八千文不等又屯丁受田遇有缺出向例卽以該丁之子弟親屬頂補近則書吏舞弊往往使應補者失業而不應補者得以賄求每一缺取數千至十餘千文不等其田之肥美者或取錢二三十千不等又苗疆內原設有苗守備苗千總苗把總苗外委等員例由辰沅永靖道於諸苗中擇其誠實者秉公拔補若拔補不得其人則肆其强悍凌虐平苗仇殺之風卽由此起近聞亦有書吏受賄情求拔補之弊是不可不嚴行剔除以恤丁弁以順苗情一差役人等宜禁入苗地以防滋擾也查苗人有詞訟案件向令苗弁傳送不准擅差兵役入寨漢民不准與苗人往來婚姻卽在集場交易亦令屯汛員弁親往彈壓不准市僧侵欺原所以區別民苗使之兩無嫌隙近聞此禁復弛漢民仍不時與苗人往來不無盤剝之弊遇有干涉苗人案件地方官輒差役傳提該差役等一入苗境肆行無忌往往乘坐轎馬逼令苗人沿途護送及到事主之家任意需索甚至擅行鞭責詈辱苗弁向來苗人滋事多因於此必應一律嚴行申禁以弭事端一苗人祭鬼宜申嚴禁以正風俗

也查苗人向有椎牛祭鬼之習每聚眾持刀將牛打斃視牛首所向以占吉凶不惟每歲殘殺耕牛無算而且集聚多人時虞滋事嘉慶初年業經禁止近聞此風復起宜責成苗弁分寨查禁如有不遵送官究治若苗弁徇隱不報一經查出從重責革一黔楚交界宜遇事商辦以息爭端也查鳳凰永綏二廳與黔省接壤苗地處處可通兼之苗人或爲舊時姻婭或因集場交易勢不能禁其不相往來其間偶有嫌隙因而互相訐控者有之又或因錢債細故彼此強牽牛隻或拏人勒贖抗不退還告官關提亦不到案應隨時會同黔省松桃廳妥爲查辦秉公斷結不許滋生事端一書院義館宜實心迪牖以廣教化也查苗疆各廳縣皆設有書院一所又設有屯館五十所苗館五十所其束脩膏火俱取給於官贖田租項下原欲使該廳縣生童及屯苗子弟一體讀書咸知義理乃近聞各處書院有以官親濫居師席者有坐支束脩終年不到館者其屯苗義館教讀之人向由辰沅永靖道考取充當近則或由屯長保送與之坐分束脩而義館亦爲虛設是宜選擇端人實心教讀剔除前項情弊以收化民成俗之效以上數條應請 旨勅下湖廣總督湖南撫臣督令辰沅靖道實力整頓無任廢弛以期保衛民生永綏邊圉

遵議撫猺新章並籲加學額疏

光緒七年

湖南巡撫

李明墀

竊照江華縣土猺滋事一案經臣奏奉

諭旨飭將原定章程詳加酌度妥議具奏務令民猺永弭衅端

以靖地方等因欽此仰見 皇太后 皇上綏靖邊圻一視同仁之至意欽悚曷勝臣維法以積久而生

弊制貴因時爲變通查乾隆二十四年撫摺章程所載糴產准照原價贖回後再擅買許糴人首告將產斷還不追原價等語揆度情事自係彼時客民不多而所買田山年分又淺故准其照價贖回之後復特爲此厲禁俾民不敢貪近利而貽後災然不能永遠恪遵彼此仍然冒禁竇緣糴藉客以通有無客藉糴以資蓄積兩相需卽兩相願故雖有出賣之嚴禁輒復私易名目改爲永當永批微論地方無從聞知卽知之而律設大法禮順人情亦有不能概令強從之勢故道光十三年續定條約卽多有變通今距乾隆定章之時業經一百餘年忽欲舍新章而復舊例向收田產盡逐客民無論酌理准情均覺不順就令刑驅勢迫亦屬難行然不趁此事定之初懲前毖後規畫久長又慮數十年後糴產悉成客產而糴人之貧苦益深客籍多於糴籍而客民之根蒂益固馴至愚糴含忍受欺黠糴積忿生事歷歲經時決裂更不可收拾臣於上年冬札飭署永州府知府周幹候補知府麻維緒長沙府同知李必昌將乾隆一十四年與道光十三年兩次撫摺章程斟酌今昔情形悉心妥議其有積久流弊而不便於民糴者去其太甚存其大妨並令傳集明理客總糴目積誠勸誠告以必應如何酌改方能日久相安卽所改或有未宜併許當時直陳復商更定務使家喻戶曉彼此信服樂從方能永杜爭端與民更始嗣據會擬撫摺新章六條稟

覆前來臣詳加察核尙屬平允惟事關永遠遵守不厭再四推求臣復批飭周幹會同留防猺山之統帶
毅新營提督蘇元春再將所議章程按戶傳諭就察民猺情形是否情願遵議再行稟臣核定並經附片
奏明在案茲據周幹等稟稱此次新議撫猺章程六條先與該客猺總目開誠布公反覆推論續經親歷
九冲沿途傳集散戶明白宣示均各翕然誠服情願具結遵議並以推廣學額一條幸得廁身士林同沐
聖朝文教羣情尤爲鼓舞深悔從前誤信痞猺搆煽自爲化外頑氓竟有言之泣下者惟查九冲皆山
間或新墾成田半皆磽瘠致未丈量升科僅有大半洞猺田畝照則納糧與按賦立額之例稍有未符等
情前來臣伏思田賦關係國家正供以多寡而定學額以獎食毛踐土之氓而自咸豐以來軍興籌餉
各直省督撫臣奏請加廣學額均荷 諭旨允准立沛 恩施並未以田賦爲準則因查江華縣九冲猺
山田賦不敷請立學額之例而現在籌辦撫猺冀以弦誦之風化其獷野之性且該猺涵濡文教二百餘
年實亦不乏讀書之選同殷上進之忱苦於地利有限致令向隅情殊可憫合無仰懇 天恩特降 諭
旨賞給江華縣九冲猺童新籍歲科試學額一名以廣 教化而示鼓舞出自 格外鴻施至此外所議
各條臣悉心詳加酌度衡情準理因時制宜並無絲毫偏重可冀永遠遵行既據稱民猺均已情願遵依
自應俯如所請謹繕摺進呈 御覽祇候 宸定飭下勒碑欽遵即將兩次撫猺章程舊碑一律刪除一

以此次新章爲定所有遵議江華縣撫猺新章並籲加九冲新籍學額各緣由謹會同湖廣總督臣李瀚章湖南學政臣陶方琦恭摺具陳

奏陳苗疆善後事宜片

光緒八年

貴州巡撫 林肇元

黔省下游苗疆應辦苗弁義學屯衛等項事宜業經前撫臣岑毓英奏明檄委道員儲裕立會同署貴東道吳自發查辦內有應行量爲變通者亦經臣飭令體察情形妥爲辦理在案茲據該道儲裕立吳自發會稟稱遵查銅仁府縣原設苗弁十五員松桃廳原設苗弁一百一十三員今照章將銅仁府縣苗弁撥出十缺應留五缺苗兵撥出七十名松桃廳苗弁撥出八十缺應留三十三缺苗兵撥出八十名現於古州台拱清江丹江八寨都江下江七廳酌量分設苗弁五十六員苗兵一百零四名克資約束當經責令薙髮改裝已有成效倘該苗弁等或有苛虐情事應由該地方官詳革另補所遺苗弁三十四缺苗兵四十六缺擬暫行截留由該地方官隨時察看如有應行添設之處再行稟請酌補以昭慎重至義學一項除台拱丹江都江八寨下江五廳原設六十九館銅仁府縣新設四館均由公款開銷無須另籌經費此外如古州松桃清江三廳新舊共設六十六館就地籌款足敷應用通計府廳縣十處共一百三十九館分別布置以資訓迪又查屯軍十衛原額九千三百三十九戶現已招復八千九百四十九戶督同委員

點驗尙屬精壯並無短少其未足額者或因田畝荒蕪尙須招墾或係水冲沙淹無憑布種業已勘明冊報呈請會辦所有各衛堡城共一百二十七處亦經該衛弁等分飭屯軍修築完固每年應徵屯糧就近由廳員派人監收以歸簡易並督飭各衛弁於農隙時認真操演由貴東道親臨巡閱察其勤惰分別勸懲等情稟核前來臣查貴州軍興多年苗疆粗定應辦善後各事如苗弁義學屯衛三項爲風俗學校防禦攸關均屬當時急務前撫臣岑毓英派令該道等會同查辦現已一律辦竣措置尙稱周妥實於地方有裨臣仍當飭令貴東道督同各府廳縣實力稽查盡心整頓以期風同弊絕克底綏和仰慰 朝廷軫念邊陲之至意

招撫猺目請 予土職各緣由疏

岑毓英

竊查雲僻處西南界連西藏緬甸越南南掌諸國近邊荒服歷代均以土司世守其地表華夷之限制爲中國之屏藩雖數百年來相沿不改而弱肉強食互相侵奪之禍幾於無時無之邊患多由於此前因猺黑山頭目張秉權侵佔猛猛土巡檢所屬圈控地方三十餘寨彼時正值臣帶兵出關經前撫臣張凱嵩會奏派員馳往查辦臣隨卽訪知猺黑山地方延袤一千數百里外連緬甸北境葫蘆山等處內與緬威甯遠思茅各廳屬犬牙相錯林深菁密煙瘴尤甚張秉權所踞猺黑山上段六山之地縱橫七百餘里

其猓黑山下猓之地現爲石朝鳳石朝龍李芝隆等分路互相雄長因擬用夷制彝之法將下段各段目先行招撫以免張秉權煽結爲患上年八月二十一日曾將派委府王德誥參將尉遲東曉前往猓山招撫下段各猓口情形奏明在案並聲明俟招撫就緒可否給予土職再行請 旨辦理茲據該委員等招撫就緒回省銷差並將猓黑山下段猓目李芝隆石朝鳳石朝龍之孫石光玉誠心歸順具結認糧各情稟由署雲南布政使史念祖會同善後局司道詳請具奏前來臣查猓黑山僻處遐荒向歸猛連猛猛管轄自軍興後該猓目等仇殺相尋概難繩以法律今李芝隆等首先向化一經委員招撫遂即相率歸誠與張秉權之始終怙惡者迥殊現查張秉權已於上年八月被雷擊死其次子張登發相繼爲惡仍屢次攻占猛猛土巡檢地方邊氓受害者不下數千家若不認真剿辦難免不日漸滋蔓延勾結緬越強敵爲患現值炎夏瘴癘正發難於用兵擬先行派兵防剿以守爲戰一俟秋高瘴退卽選派得力鎮將酌帶兵勇分路進剿並諭令李芝隆石朝鳳及石光玉等各率土兵隨營効力所有已經就撫之猓目李芝隆擬請 旨賞給土都司職銜石朝鳳石光玉均請 賞給土守備職銜李齊芳 賞給土千總職銜張文科石廷子 賞給土把總職銜李大昌蕭修感 賞給土外委職銜俱照貴州銅仁松桃之例是否有當伏候 聖裁

皇朝經世文續編卷八十一目錄

兵政二十 勦匪上

議覆葉紹本條陳捕盜事宜疏

林則徐

論粵西賊情兵事始末

嚴正基

弭盜策

周琛

致魏將侯

胡林翼

與大府論會匪書

胡林翼

請通飭修築礮堡啟

胡林翼

上呂方伯啟

胡林翼

致督修礮堡各員紳書

胡林翼

論全楚邊防

魁聯

諭團練示

魁聯

上中丞切要事宜

魁聯

終世文經

復周鹽道四條議

魁聯

代劉侍郎與貴東道書

郭崑燾

檄鳳潁淮徐滁泗宿海八府屬文

代作

魯一同

皇朝經世文續編卷八十一

上海葛士濬子源輯

兵政二十 勦匪上

議覆葉紹本條陳捕盜事宜疏

林則徐

竊准部咨欽奉 上諭鴻臚寺少卿葉紹本奏捕盜事宜一摺著各直省督撫妥議具奏欽此臣等查原奏臚列四條如移會鄰封協捕嚴懲牌保容留守望宜責同邨審案不累事主此皆申明定例自宜實力奉行況粵省盜賊視他省爲尤熾是以例上另立專條以廣東內河刦案夥聚四十人以上或行刦三次或逃脫二三年後就獲應斬決者均加梟示恭請 王命先行正法誠以海濱蠻野不得不加倍從嚴也臣等竊見廣東弭盜之難別有數端而尋常之弊不與焉一則良盜難分也他省之民良自良而盜自盜廣東不然平時耕種之民遇有黃夜糾刦者但以發財去三字隨路招呼鮮不欣然同往故一同爲盜之人彼此每不相識卽人數亦無可稽甚至田舍素封衣冠巨族亦皆樂於一試若惠潮地方則竟有以盜起家轉因黨與太多不能破案人不敢指官不得拏者並有通族皆盜通鄉皆盜一拏卽恐滋事不得不略審機宜設法誘獲者此盜風所以未易戢也一則互刦難防也他省之盜只圖得財廣東之盜並因仇

起此邨往劫彼邨此縣往劫彼縣爲盜者並非貧苦竟以挾譽行強被盜者不卽呈官輒先糾人報復追事過則彼此互控各匿直情並指局外爲主謀扳富家爲窩主案情變幻歧之又歧此盜情所以未易詰也一則原贓難起也盜案以贓爲憑贓真然後盜確故別省緝盜之法以查贓爲先廣東則盜賊移赴墟場無不立時賣盡及至輾轉售賣大都不識姓名是以歷辦盜案獲贓者少無獲者多部臣查核案情亦皆覆准此係歷久相沿辦法今若必令逐案起贓又恐差保藉端向當舖衣莊索詐而犯之狡展案之懸宕將因是而愈紛此辦法之未易輕改也一則夥黨難究也訪聞粵東巨盜每先密結親信匪黨發誓拜盟如遇破案到官彼此各自熬刑不相供指卽獲正賊嚴訊往往供出同夥非富卽仇雖傳到審虛立時省釋其人業已受累而真夥未經供出聞風轉已遠颺地方官卽設法訪查驟難得手至各縣紳衿中多有攻匪保良之公約不知起自何時其始所保所攻未嘗不當迨久之而漸成袒庇難免黑白混淆臣等惟當諭令禁止以祛流弊此查緝之未易得實也一則花紅難繼也廣東積習官欲獲盜必須先出花紅從前原爲急公追後竟成常例盜愈著名則花紅愈重若稍吝嗇卽無從購覓線人其有關於官員處分者家屬親隣愈以居爲奇貨卽臣等亦有欲禁而不能驟禁之勢況花紅而外解犯辦罪所費尙多地方官年遇數起盜案賠累多端恐開虧挪之漸此經費之未易措籌也以上各情形臣等惟有隨地隨時力

加整頓總必求臻實效不使徒託空言卽如保甲爲弭盜之源而奉行非循故事巡警爲諸奸之要而委用務在得人凡水路之巡船陸路之更練沿邨之望樓保寨均不許有名無實除本年春夏二季獲犯一千三百八十八名已於另摺核奏外仍諄飭水陸文武各員勤益加勤密更求密永冀萑苻斂戢閭井安康以仰副聖主綏靖海疆除莠安良之至意

論粵西賊情兵事始末

咸豐四年正月

嚴正基

粵西幅員遼闊縱橫三四千里巉巖叢嶺林菁幽邃所在最易藏姦通計土著十之三四柳慶桂平四郡楚南墾荒貿易者多粵東間有民人亦略相等閩省差少梧潯南鎮鬱等府州半與東境毗連墾荒貿易占籍者多係東人閩人閒亦有之土著則婦女耕作男子游手好閒因而各省流寓奸民遇事盤剝取利相率吃喝嫖賭引誘爲非劫掠伏莽之風匪伊朝夕東匪號稱廣馬土著則統名土馬土馬易於制服廣馬奸黠異常事敗則竄越東境難於躡緝楚閩二省游匪亦不能及土匪中雜有二三廣馬卽難擒拏撲滅此西省平日大凡自暎夷滋事以來粵東水陸撤勇逸盜或潛入梧潯江面行劫或迭出南太邊境擄掠勾結本省土匪及各省游匪水陸橫行勢漸鴟張至道光二十七八年間楚匪之雷再浩李元發兩次闖入粵境土匪陳亞潰等相繼滋事小之開角打單大之攻城劫獄寢成燎原之勢此一變也迨三十年

十月洪秀全以東人起事金田竄擾潯柳二府陷永安攻桂林長驅而北蹂躪半天下又林十八一股起事粵東信宜率賊衆圍攻西省鬱林被西省兵練擊退回東旋經東省殲滅此二股均崇奉耶穌遇廟概行焚燬淫掠尙其餘事黨堅交祕覬覦非常其衆聚而不散其用兵詭譎多端非土匪伎倆可比皆所謂會匪也土匪則僅拜臺結會旗幟各編堂名每堂少者數百人多者三四千人不等合數堂便已踰萬或分或合專以淫掠勒贖爲事通省無慮數十起飢則蠶起飽則遠颺起號起馬散號散馬有自行旋起旋散者有兵勇擊敗而散兵勇撤而復起者有此股甫經撲滅彼股又另起事者幾於無地無之無時無之此變之大者也又三十年九十月後粵西因通省羣盜如毛鄭夢翁始調楚南粵東兵協剿李石翁視師周敬翁相繼撫粵又續調滇黔兵丁並募潮勇來西時屆咸豐元年春仲適洪逆凶氛益熾向帥被挫遂專注洪逆一股旣而賽相視師添調外省兵勇雲集仍以全力專辦洪逆其南太最鉅之賊則派勞辛翁率壯勇攻擊柳潯梧鬱之賊則派本省弁兵協同有司督帶民練剿辦雖不及洪逆凶狡而賊衆實數倍洪逆加以波山艇匪又自粵東闖入梧潯江面及各府縣小股賊匪均責成地方守令督飭壯練自辦辛翁用計擒斬賊魁顏品瑤以盈萬方張之衆漸行解散分派壯練跟蹤追剿潰入東境者復咨會東省道將合攻大局甫定越二年二月洪逆自永安潰出賽相檄催赴省援剿致餘孽猶未盡除嗣洪逆全股竄

楚前後來西各省兵勇亦全數追剿出省境內未平之賊并逸盜伏匪生心依然肆行滋擾此又一變也
波山艇匪自元年十月竄西其初止賊船八隻以洪逆尙踞永安大軍環攻未撤乘間勾引土匪散勇附
從日繁衆至三四千人船至千餘隻之多橫行左右江面上下攻陷貴縣圍困潯郡延至二年七月本省
兵壯糾約東省兵壯合勢驅逐至梧州城外大江爲紳帥一舉殲滅復將著名之降盜張釗擒斬江面爲
之一清會紳帥視師赴楚沿江兵勇全撤張釗餘黨以復仇爲名又漸次勾結生事南太柳慶伏而未盡
之賊鬱潯境內未平之匪或於東省邀人助亂或於本省糾衆肆劫漸及桂平邊境州縣二年冬季派兵
練四出攻擊至三年三月旋滅旋起加以楚鄂九江撤回之勇腰閒金盡所至陸續入夥通省數千里上
下又無處不時有警報會城亦嘗戒嚴興安之變通縣舉貢生監拜臺結會爲逆於五月攻陷興安分衆
襲攻會城幸有畏罪悔禍者暗通被困未死之蔡令集衆反正擒斬首逆寢事不然桂林幾不能保此一
奇變也粵西被賊州縣均有團練若鬱林州及所屬博白并南郡之橫州潯郡之貴縣尤爲勁勇著聲次
則北流桂平平南賓州河池賀縣等十數州縣亦稱敢戰賊非大隊不敢入境而其風氣之最不足恃者
則莫若南甯之宣化一縣地大人繁內有守正急公者卽有豪賊營利及出境行劫者陽託團練之名陰
行鬼蜮之私爲本邑正經團練紳民所不齒有司利其在境無事兼以人衆且悍不敢輕動因卽以團練

虛相羈縻辛翁駐軍南郡此輩窺我壯練強盛稍爲歛迹聽命及帶壯赴援桂林逸匪復出刦掠又復爲之囊橐收納近知經費支絀有不能僱壯公然修怨鄰村與本境團練爲仇因而向不爲非村衆懼無官府之助其惡少逐漸拜臺結會殷室之被鄰匪搶掠者亦卽聽從出村報復自思太以及柳慶均已漸染此風又柳慶上年旱蝗過重一二不逞之徒倡亂飢民隨從搶奪比比而然此又一奇變也粵西額征錢糧通計四十萬有零本省綠營兵餉歲需四十二萬餘兩旣屬不敷其關料雜稅不及十萬餘兩支給文武員弁廉俸及祭祀書役工食等項亦多短缺常年徵收足額尙須外撥接濟近年盜賊充斥人民離散除蠲緩外完納不過十之五六愈形不足前此鄭夢翁撫粵因國帑日絀憚於奏撥兵事初興爲因循敷衍之計李石翁亦不敢多有調撥周敬翁入向提帥之言多調外省兵丁大請餉項思爲一舉蕩平之計賽相來西視師復添調外省兵丁廣募粵東壯勇專注洪逆一股源源請撥兵餉急圖殲除此起凱撤回京所用烏向二帥均屬可倚立功但惑於左右之言駕馭乖宜使烏向同事不協均不能盡其用以致洪逆潰圍而出難以收拾維時洪逆雖已離粵羣盜尙多嘯聚已撥未到之餉胥爲楚省截留備支入楚大營洪逆屯聚道州數月間道距桂林不三日程會城仍未解嚴省內外防勦兵壯鄉練均不敢撤需費浩繁司道庫貯爲之一空嗣後以楚吳賊盛用鉅又不敢昌言請撥閒有撥餉到省隨到隨罄馴至今日卽

本省兵餉并不能按季散放而通省賊繁備多挹注無術顧此失彼遂成不可救藥之勢此又一大變也
粵西地瘠缺累州縣不能贍給者十常三四而省會大吏向有關料盈餘津貼不至督責州縣供應是以
簞簞不飭之習在於上游尙少因是州縣亦敢明目張膽婪索較之楚省稍優而吏治之不飭則由於十
數年前院司以文酒徵逐爲豪舉於地方懲辦盜案之員日爲俗吏或加之擯斥有司諱匿不報遂至盜
勢益張涓涓不塞終成江河厥有由來近年左右江面不靖關稅短缺大吏亦不能自給州縣疲憊日甚
軍興時藉公濟公尙可支持今請領無款支發盜多民困徵糧則民多抗欠失事則官卽逮禡州縣不願
到任視事每下檄嚴催始行登程民不聊生官亦不聊生可爲太息安得耐苦耐勞視民如子若干清端
公治羅城者參布州縣賣刀買犢賣劍買牛庶其有芻此又一變也西省辦理團練各府廳州縣城內均
設總局其四鄉亦有分局省會則又另設總局均遴選紳士以司其事省局則又受通省總局之成而加
重焉大約得公正廉幹者專司局務於講求結團集貲之事必周於臚舉出力請獎之人必允議事而衆
樂從賞一人而衆知勸求之省內外局紳中殊不乏人而亦有私其親屬戚友不必盡以勞績得官旣爲
人所訾議且有持吏長短以愛憎爲是非尤爲公論不與者此又一變也

弭盜策

周琛

盜有愚民有奸民有習於兇獷之民有迫於飢寒之民善弭盜者未事而先爲之防已事而嚴爲之處分類而用法懲一以戒百其條有八可約舉之一飭防汛州縣能緝已形之盜不能緝方形之盜捕役能捕已發之盜不能捕未發之盜營兵防汛計里分置備器械勤巡邏修墩臺明斥堠盜發於疎略密則息盜乘於弛防禦則銷止劫之法莫先於此一開糾告以兵攻盜勢順而易漢張敞拜膠東相令羣盜相捕斬者除罪而盜遂息其明驗也一剔窩藏盜之來去無常窩之盤踞有定盜之蹤跡多祕窩之屯聚易明治盜必先清窩無窩豈復有盜明蔡忠襄備兵嘉湖搜剔窩主浙西數十年所以無患也一分誅散盡誅則不可勝窮解散又恐其復聚郭伋守漁陽戮其渠帥張詠治蜀郡散其脅從恩威並用勦撫兼施而後盜可弭一聯守望兵出則盜逸兵去則盜出兵能攻負隅之盜兵不能止行蹤無定之盜徵調以禦之勞師而無功召募以禦之靡餉而無濟官軍不如鄉團練勇不如練志一方之中合一方爲一團一鄉之中合衆團爲一團患難相顧生死相恤內盜不能容外盜不能入魏李崇爲兗州刺史村置一樓樓皆懸鼓盜發則擊以次相傳頃刻百里無不赴應盜無匿者後諸州皆效之自崇始也一實稽查欲治外盜先清內奸懸十家牌於門首名曰稽查實具文也屬其責於吏役挨戶稽查又擾民也官查不如民查專查不如互查合查不如分查得王文成保甲糾察之法行之則內奸可屏一廣儲積驅飽煖之民爲盜民不應也

強飢餓之民使不爲盜民不從也王式討襄甫而先開屯倉所以散有形之盜朱子令各鄉置社倉所以弭無形之盜歟年有備盜風自息一擇守令邱瓊山先生曰遠方之民所以易動者非民之性習然也治之者不得其人也得一良令如得勝兵三千人得一良守如得勝兵三萬人蓋得守令則能安民能安民則民自不爲盜此尤正本清源之論也凡此數者行之以實意而不粉飾於虛文善之以治人而不專求夫治法無驅民爲盜之政有化盜爲民之忱萑苻之患不足平也我朝治邁前古民康物阜之休不當駕三代而上之哉

致魏將侯

庚戌

胡林翼

三月十六日將曙時清江顧倅鈔寄鎮遠朱甲翁及閣下所言天柱黎平開泰清江匪徒情形通稟稿稿內所言匪徒結拜弟兄聚集百十餘人擄劫村寨持有火槍又稱在黎平開泰之皮所在瑣龜尾溪又稱須再查何屬之地卽此可見閣下於此情形尙未深悉如稟稿業經徑發則禍患方始若猶未也尙可從容謹逐條開陳以備甲翁及閣下之採擇焉一楚匪入黎境弟於二十日到黎平其時賊擾於外兵譁於內言利則勇赴敵則怯欲安內乎欲攘外乎禍患之萌不僅禦侮之難也幸賊於二十三日竄出而兵亦漸定卽此可見不教之兵將有不戢自焚之勢遑問殺敵致果耶此時賊去漸遠而兵不能撤糜國帑而

誤農功卽楚匪一事而官民已焦爛不堪矣若再言用兵則兵連禍結將無了時其弊一也一凡辦事不外孟子天時地利人和三端言天時則農功方始蒲杏初開用兵則誤農民食旣虧本實先撥已亂者未知何日蕩平而未亂者方且竊起生變此則天時之不可也言地利則閣下及鎮遠朱甲三黎平淡海珊均到任未久恐要隘形勢尙未周知此拏彼竄朝東夕西賊行如鼠兵行如牛以牛捕鼠必不可得兵少則必拒兵多則必逃勞師糜餉終無了時昔馬新息聚米爲山虜在目中故能得隴望蜀其征五溪蠻則地利不得其要故功效遲而讒慝因之而起伏波尙如此況我輩乎弟於革夷山丙之事上年閏四月署事至八月交卸畫圖將及百幅攷證察訪將盈百人故於要隘之處險僻之區土人所不悉者弟已盡知之正月初六日約期而會分布周匝實已得其要領然猶不免竄逸也猶不免曠日持久也此地之東西南北弟且不悉卽朱淡兩郡守亦恐未悉矣奈何輕言大舉此地利之不可也籌商合辦卽使人人有必操之勝算尙恐臨事有誤況未必能如我意其調兵以助聲威則將官以下必須選擇而後行意中可用之官弁有幾人耶此人和之難其弊二也一執事所言之匪徒卽黎平之郭繼明姜大五等數人糾約羣盜正月間曾投楚匪疑而不收每人給錢二百文旋卽散去此時黎平大兵雲集該匪亦驚疑奔竄所以潛至清江天柱邊界固非清江之匪也鄙意此等匪徒本是盜賊非真能叛逆也緩之固難圖急之則生

變其理易明此時楚匪若剿滅無遺則該匪亦聞風落膽若以不教之兵不習之練不熟悉地形之官吏猝而乘之萬一賊匪得志則膽氣必張禍患方始鄙見軍務之後若輩必散歸原巢留備賞需銀兩密囑地方官設法擒治卽每名賞及千金猶較大舉爲得計爲省費況不需千金耶且殲厥巨魁則餘匪不足平也若拏辦而不得手竄楚竄粵是將授人以話柄其弊三也一辦事必先自度必勝而後稟聞請示更須量同辦事者之均可必勝而後會合大舉此次若徑稟大憲在中丞在本省鎮靜安詳必有先機指示之處設非中丞之鎮靜安詳或據情入告或親自督辦彼時問原稟者要賊何以應之勢必強殺數人冒功虛報以爲了案地步其貽害於民生國計何窮其弊四也一辦事不外用兵用民用役之三途兵不可恃無智愚皆知之新任之官恩信未孚民不可恃黎平府無幹差天柱尤甚且恐其與盜通情則差亦不可恃姑再遲回物色線目久之必可得手又於暇時選擇武弁聯絡鄉民挑選差役則三者又均可化無用爲有用若急切用之徒然僨事其弊五也一此次藩庫已形支絀而營弁仍多缺望若藉此軍需以辦盜案其費不少不如留此經費以交地方官臨時購募費半而功倍矣蓋捕盜則支應可省而軍需則應接不暇且驕縱異常其弊六也一凡辦事首在得人尤須持重譬之李廣射虎度不中不發迺能除盜乃能用兵此等盜匪其著名者無多若地方官盡心盡力必可設法擒之但恐不誠心耳誠則金石可貫鬼

神可通不比革夷山丙之負險不服兵差不敢入其巢穴也若輕舉妄動設使傷官傷兵則賊燄必然頓起此地處處與楚粵交界一時不能了辦楚粵受其擾害則愈裏愈多楚中入奏粵中又入奏責備歸於黔省是又楚匪之續耳其弊七也一地方之事以十萬兵而不足者以一二良吏爲之而有餘卽如湖南會匪始事其巨魁不過三五人若得一二循良之吏了此數人何至貽害若此又如永昌之事其始不過羣盜耳因地方文武不得其要領不別其良莠始則輕躁而以賊爲戲繼則退縮而懼寇如虎其無事之時見罪囚則涕泣不食一味寬縱若至仁者其有事之時則縱兵殺民以當賊若至勇者宜其愈逼愈多永昌爲十年之害新甯爲三省之害我省當以此爲戒若不設法用計老成持重一舉不勝害及十年禍連三省其弊八也總之此賊因未卜楚匪成敗如何故觀望遷延相聚爲盜耳若楚賊旣滅此盜必散散則設法擒之每巨盜一名以一千金購之亦屬有益緣巨盜有限而餘匪又不值一購也若大舉則未見其益通稟尤萬萬不可行愚見如此以執事胸有千秋愛國愛民望度力而審行必養威而持重卽使將來購擒未獲而處處留心則人心旣孚地形亦熟俟農隙之際尙可審定會辦也

與大府論會匪書

咸豐元年辛亥

胡林翼

黎平會匪最多古州永從兩妹尤甚有言會匪總頭收盜匪爲爪牙者有言會匪從湖南寶慶衡州來者

有言古州多粵人會從廣東來者且言實繁有徒兵差一氣者其盜匪有老冒老三哥大五大六大九爲之渠魁其編號從大一至大十小十至小一以湖南紙牌之字爲燒香拜會之號此則確有可據者也愚以爲楚粵遍地皆是然有會匪而不爲盜者無大盜而不拜把者有會而不盡爲匪者無匪而不拜會者刻下湖南四川奉密 旨訪拏然而不可輕動者何也武備之弛兵氣之弱 國帑之支絀人心之浮僞怯懦實非旦夕所能挽回設使辦理不善禍端一發不可收拾轉不如暗爲轉移之爲得計暗爲轉移之計莫先於除盜懲貪國家之敗由官邪也自來西域臺灣達州起事均因官吏貪污會匪得以藉口川省之惡戴如煌而譽劉青天近年新甯因貪吏李博平糶勒價二千文一石次年差役訛詐雷再浩之妻黨以致李元發又復倡亂桂平韋正因謬懸登仕郎匾額疊次訛詐因而倡亂僞稱爲王前此固羨慕登仕郎而不可得者也挺而走險誰爲厲階是會匪極多之地如得廉吏主持必不致釀成事端卽無會匪之地而以貪吏混跡則平民亦可釀亂明季張李之亂豈盡拜會者乎其次莫如除盜盜匪多强悍敢死之人會匪必借其力會匪多深險不測之人盜匪必資其計然使翦其爪牙則會匪亦弱愚以爲不必計其爲匪爲會惟有盜案者必殺無赦則盜平而會亦消卽明知爲盜匪中之會匪亦止究其爲盜爲匪而不必問其爲會則可安反側之心而消無窮之禍若鹵莽訪拏將良懦就擒而渠魁免脫兵差滋擾而閭閻

騷然勢必箠鼓其餘黨以倡亂萌國計民生兩有所損惟實在辦事者不可居辦事之名不可惜辦事之費尤不可無了事之心則大局均有裨益

請通飭修築碉堡啟

胡林翼

粵西兵勇六七萬人皆選募於各省其隨行餘丁夫役各色人工計又不下二三萬人費帑已逾千二百萬兩兵力餉項不爲不厚然而圍守永安之日終日挑戰閱六七月之久而賊終不出所報斬獲豈盡實耶永安竄逸之後無戰不敗將星動搖侵軼省城勢更猖獗兵將之勇敢者多已傷亡餘人膽落怯不任戰告急於粵東而粵東多寇饑饉不繼楚省自保不暇救援之人宏濟之略相顧不發一策專待廟算而後行又不實力遵奉以慰宵旰是粵事直不可問城守半月條理當密明季瞿公起田極言桂林形勢可守或竟無虞而大勢終不能濟然則粵事之失其非不足於兵練明矣驅怯戰之兵日日浪戰以冀幸其一勝軍興三年無一人深入賊營探其虛實賊營動靜無能知者亦未聞設一奇策引賊入彀我太宗文皇帝天縱神武無戰不設伏無戰不用閒其於阿山葉赫薩本哈頭攻城奮力不令再攻今粵西乃棄民以嘗賊以此求功竊所未喻其失一也久治之世兵民晏安成習心志不苦患難未嘗則智慧鈍而膽力怯一盜夜呼千人皆廢彼小事且然況大寇耶粵軍兵將臥耽鳩毒卽無疾病亦半委靡選將不

精束伍不定以此言戰何恃不恐以此言兵雖多奚爲其失二也戚南塘選兵不用城市而用鄉農用意最精愚見以爲召遠方之惰民以充練不如卽本境之農民以自守今粵西之練數多於兵馳檄遠募游手惰民盡入籍中坐廢歲月漫無統領一旦餉絀職爲亂階近聞索賞而後言戰交綏卽退並有輸情通賊者其失三也田疇許達尙保鄉里塵埃之中何地無才何才不可策用惟官不先用則傑者思亂懦者風靡耳永安之民如不通賊何能接濟七月之久陽朔荔蒲如能浚溝築堡何能直犯桂林古東之敗如得土人指引協助何致全軍敗衄惟官不用民而民乃爲賊用此機一失禍患無窮其失四也黔中與桂林最近者惟黎平爲甚近日各屬傳聞不一稟牘頻來卑府日夜籌思設卽調兵三千勢已極弱然黔省核實每月卽需銀萬二千兩每年須銀十五萬兩以黔較粵兵力尙不及十分之一粵不能戰何望於黔招練過多恐亦非策粵防奏凱不知何時經費之計就目下而論粵爲充盈黔爲支絀彼費至一千二百萬兩而終成虛擲黔中豈能辦此是爲黔計者又不必從調兵設想可知矣愚以爲天下之勢必匿其所短然後能用其所長兵民之怯戰久矣言戰不如言守用兵不如用民用民力以自衛尤不如先用地利以衛民破天下之至巧者以拙馭天下之至紛者以靜公輸之善攻不敵墨翟之善守譬之於棋負者誤於進取勝者以慎守爲算其切喻矣熊公襄愍經略遼瀋惟扼形勢繕守具主固守不浪戰身之去就

係遼存亡然考其方略不過築堡插柳以防衝突盧公忠烈督兵大名鄖陽依險立寨築土垣以保民流賊遇公必敗所至飢疲川楚教匪嘉慶二年德侯奏請堅壁清野合州龔牧所陳調兵之害添兵之害鄉勇之害及四難十利各策其時以糜費擾民之說阻隔不行而糜餉擾民尤甚至額侯經略川楚於六年內復奏奉行立見功效乾隆之季楚苗不靖福和兩帥以重兵勦辦不勝而傅公重庵創立礮堡以制之鎮筵總兵富公志那憤司事者之歲費金錢妄爲招撫遂以叅苗之資歲十餘萬畀之傅公以成設礮之功楚人至今賴之治安已近六十年此近事之成效可考者也又王莽傳載田況所陳平盜之策言盜賊情狀將帥不能破賊擾害州郡妄殺良民各情無不切中今日之病其言收合老弱積藏穀食并力固守賊攻不能下所過無食剿之易滅招之易降又深似嘉慶六年以後堅壁清野情形蓋其所謂徙老弱於大城者卽後世之堡也李牧備邊收民入保終不亡失是卽築堡浚濠之始事合觀古今之勢大抵開創之始此策可不必行蓋亂極思治之日人心物力爲之一變其堅定純樸能耐勞苦壯膽智少嗜慾則不僅在朝之將帥官吏爲然卽在野亦然李牧爲周季之人熊飛百盧建斗爲明季之人惟德侯額侯傅公之策龔牧之議處乾隆極盛之後目覩人心日安於便利未嘗艱難非此不足以救民水火耳本日據魏令王署令韓委員超劉委員毅馳稟南路最要之八樂靠頭四堡大勢已成民苗亦知自衛身家同聲踴

躍成當不日而卑府查閱地圖凡與粵界之處約二百餘里以河流三大支爲界由遠及近由外及內均當一律次第辦理日役土木竹石鐵工千數百人其章程款目則取法於前而稍變通其堡中防守之具大概與城守相類其堡外靜僻之處或剷削以杜人跡或旌旆以示聲威或巡徼以絕窺探守禦果定則扼要爭奇當可於守中言戰也

上呂方伯啟

胡林翼

再者細揣盜賊之情狀兵練少而弱浮靡不整者賊見之必抗非馭兵者之過此挑練不精之過也似尙有法可施請勿過慮惟捕盜與剿逆互有難易逆則患其抗而盜則患其竄并患其匿耳官無久駐之勢盜有暫伏之技此剿辦之所以不能得手也前言保甲團練者所以防竄匿卽所以輔雕勦之不及保團可禦畸零奔潰之賊已敗已散之賊而不能當大股方張之賊專精雕剿又所以救保團之所不及二者缺一不可細思賊勢如此林翼何能坐待保團之成而始議動手卽使地方官保團不力又何能推過於地方官且黎平保團盡心一年有餘無日不討國人而訓之成效尙不過四分五分六分能自謂已精已善乎然總勝於不辦者總勝於徒恃文告者卑府受命委辦荷國士之知恨不卽時掃盡萑苻所以再四乞辦保團者實以保團非一手一足之所能兼又且非其官長則令不行而禁不止瀆請再四豈欲以口

說侈陳於上憲哉實見賊狀必歸於竄匿耳昔趙壯侯金城平羌主臣辯論往返不已卑府才識至庸何能妄爲援引然愚者千慮或有一二可備採擇之處尙祈明察並乞節取迭次稟詞稟陳兩院則於地方實有裨益

致督修碉堡各員紳書

胡林翼

潛山近舒近霍之山險邊隘已專懇樹人兄同朱君蘆溪柳君銅章督率潛山各局員趕緊興修凡霍山之山險邊隘應專懇會亭幹臣桐封督率各堡各局趕緊興修乃英山邊隘已請秩九同選鋒營哨趕緊興修其法以邊牆爲要以碉樓爲主不築礮臺碉樓卽空心小礮臺也其碉樓圖式卽照從前抄寄之件妥速遵辦其上一層則以灰包火藥包石塊鑼鼓梆爲用中一層下一層則以擡槍鳥槍爲用並會亭營中新造三叉架短式槍亦儘合用如可多造卽由會亭開鑪造二百桿以便發給各碉由會亭弟稟請發價可也守法平日十人臨警三十人積五日水米於碉中由局紳管理此萬全之策也其程限均以接信十日起限稟報地勢及興修起手日期看定一處卽趕辦一處餘均陸續稟報其作碉作邊牆之物料如石塊石灰樹木工役等項均由士民自捐其成功速而堅實者由樹人兄會亭弟秩九兄三君子稟獎先資以銀繼則奏獎也守備之修所以濟兵力之窮而士民之身家又足自衛務乞諸君子妥速辦理並諄

諭士民使曉然於有備無患之義倡率捐辦實爲至要

論全楚邊防

寶慶府知府 魁 聯

竊逆匪攻撲全州圖竄永州疊經差探馳報並恐該匪聲東擊西飄忽不測移催代辦都司篆務新平營守備方開榜速赴新甯協防并移屬張署副將嚴堵由全州入新甯要隘其郡城一切由卑府督率練勇巡防并抽調白毛坪練勇派趙縣丞管帶馳駐武岡四路策應一面由卑府飛諭預募待調之武岡渡頭洞口老潭三團壯丁六十名協同巡防均經次第稟報在案茲據初十日遣丁自全州賁回探報賊前隊已抵黃沙河後隊尙在全州攻城又分一股在東安柳鋪業將市鎮燒燬勢甚猖獗又有一股分撲灌陽等語查逆賊雖有萬餘其精壯者不過三四千人卽分數股則每股二三千精壯者不過數百果能各守各隘屹立不動賊到處不利其勢自感爲今之計似宜先將全楚邊防籌一萬全大局查賊匪由粵入楚之路最要者東安零陵永明江華新甯城步六縣零陵永明江華則以祁陽爲咽喉東安則以祁陽邵陽爲咽喉新甯城步則以武岡爲咽喉賊在全州則零陵東安新甯三縣相隔僅數十里爲尤要似宜飛檄各將弁堵截要隘不許退縮一面整頓精兵千人於祁陽以壯聲援而資策應邵陽南路緊連東安景都司今日到郡卑府現已移囑該都司酌帶弁兵駐劄五峯鋪花橋接壤地方爲東安聲援武岡現由卑府

飭派趙縣丞帶勇駐劄策應由東安城步新甯犯寶慶者督練勇策應會營堵截由零陵等處者祁陽駐兵策應堵截楚邊層層向外堵截粵兵步步跟蹤追剿閭閻不致震驚賊勢立可蕩滅但須示諭兵勇專擊賊匪精壯於其老弱婦女姑縱勿殺使賊始終自受牽制一面多籌經費使口糧應期給發兵勇得以飽騰并不惜重賞以鼓舞其敢死之氣

諭團練示

寶慶府知府 魁 聯

照得團練章程久經本府刊示曉諭粵西逆燄鴟張皆民間先未團練之故蹂躪之慘爾士民皆已聞知計釜底游魂不日卽當剿滅郡屬密邇粵疆沿邊一帶均經本府嚴密布置倘有警急本府卽當親帶練勇會帶營縣迎頭截剿斷不使邊民受匪徒驚擾惟本府保護地方尙且不遺餘力爾士民各有身家豈可不居安思危力行團練爲有備無患之計特將前示章程按切今日情事酌定簡明條規剴切申諭各士民務各乘茲閒暇急早綢繆已行者務益加精密未行者速實力奉行慎勿視爲老生常談自貽伊戚所有章程列後

一團規因地制宜 或都或村或甲或廟或族小團數里大團數十里各視其地所宜總以聲勢聯絡爲主每團設立副團長各一人不拘紳耆士庶公舉明白事體素敦信義者爲之視村甲戶口多寡每家

出一人或二三家輪出一人以爲團丁悉聽團長管束其姓名登記簿冊交團長收掌聽本府隨時調查不願身爲團丁者准其雇募強壯妥實之人自代不准以孱弱及外來遊民充數推避阻撓者准公同稟官究治

一預先扼要守險 依山傍水狹隘崎嶇者爲險通衢徑路往來必經者爲要扼要之處皆可以人力設險或築礮堡或築墩臺或深挖坑塹上設活橋以渡行人一旦有警去橋而守鋪市則多設木柵事無定法總在平時留意體察則臨事自不致周章

一壯丁練習技勇 藝高則膽大有衆而無勇與無衆同凡各團丁務操習技藝無論拳棒各項器械以及跑坡越澗飛石各就所長均可演習倘習有成效許團長稟請本府親臨校閱定將督率管教之人及技勇超羣者從優獎賞其器械亦須預先備用安置停當方可倉猝應用號令亦須預先議定家置銅鑼或木梆有警則鳴以便團丁趨護隣團有警聞聲率衆救援並多豎旗幟以壯聲勢惟鳥鎗一項須報官驗烙編號給發不准私製

一經費量力公捐 此項團丁各保鄉村具有天良豈有錙銖與隣里鄉黨計利惟置備器械以及操演獎勵貧者出力富者自應出財第演習之法或一日一次或三日一次如何章程如何獎勵是在爾士

民公同斟酌妥善量力自捐各保身家本府亦不爲科定其有公同妥議一人作梗者許據實稟明以憑察究

一齊心查詰游匪禁絕浮言 游民易溷匪踪浮言最亂人意現當隣氛不靖亟應認真盤查痛加禁絕凡有流民乞丐敲魚打蓮花落賣藥賣藝以及一切游手好閒之人均不准團內容留當資送者酌量資送如覺形跡可疑卽當留心盤詰倘敢恃強不服卽稟官拏究惟不得藉端擾害行旅至於粵西逆踪離郡甚遠本府先事預防久已周備且沿途逐節皆密派偵探自有的信各士民但須遵行團練以期安益求安治益求治邇有妄談粵西匪逆聳人聽聞者卽係造謠惑衆爾士民慎勿妄生驚恐卽將造謠之人拏解本府定重賞爾等並治造謠者以通匪之罪倘扶同傳說卽係夥同蠱惑人心定一併重治不貸 以上五條皆目前要務爲爾百姓保護身家捍禦鄉里至計全在爾士民各就本村本鄉情形實心實力辦理果能同心合力則荷鋤負耒皆屬猛將強兵木柵竹籬盡是銅牆鐵壁不惟可無外患抑且永絕內訌爾士民中不乏有識有志之士自必能深體本府之意倡率舉行本府卽日或委員抽查或親自巡視果勤奮倡行定予優獎倘惰弛玩違亦有顯罰令出惟行其各凜之

上中丞切要事宜

寶慶府知府 魁 聯

一新甯食鹽章程擬請籌變通也寶屬例食淮鹽然港淺灘高水販每難運到邵化各邑遇缺鹽之時往往赴下游買食新甯逼近粵西嶺嶠既峻灘河尤險官鹽萬難到地小民不能不買食粵私痞棍藉緝私爲名私設關卡據爲利藪無賴之徒趨之若鶩此弊不除竊恐愈積愈衆日久難免不滋生事端除飭地方員弁隨時禁戢查拏外謹據實稟聞將來可否於善後案內 奏改粵鹽之處伏候憲裁

一武岡阻米惡習亟應痛加懲除也寶慶山多田少戶鮮蓋藏一遇旱澇偏災富戶捐價居奇小民聚衆遏糴凡有米穀出境設卡阻攔始猶藉口保境自全繼卽乘閒搶奪各處皆然而武岡爲尤甚緣武岡田土較沃穀米稍多痞徒藉他處上游穀米有出無入爲詞糾煽鄉愚私行卡阻始而阻於歉歲繼卽阻於豐年始而專在勒索米船繼卽肆擾一切行旅黨日聚而日多勢日積而日疲荒歲則刦奪之案層見疊出豐年則貨棄於地貫朽粟紅商賈因而蕭條農民日形窮蹙到任又經節次示諭督同該州縣拏辦現在邵陽各處均已斂戢而武岡黃橋鋪排上渡一帶尙敢恃衆負隅除遴選幹員飭帶練勇會營前往督同查拏外第遏糴之痞匪固罪不容誅而義穀之勸捐尤刻不容緩雖有力之家好義者固不乏人而鄙吝者亦所時有現擬出示曉諭地方紳耆士民果有勸捐出力及捐穀較多之戶將來歸於善後案內由地方官核實詳請從優 題獎俾各士民咸知旣免荒歉無備之虞復有章服榮身

之樂庶鼓舞激勸之中可收踴躍樂輸之效是否有當伏乞憲裁

一緝捕擬添募練勇議請酌籌經費也竇屬痞匪盜賊多而且悍且接壤之處時有匪徒結會拜盟並有紅黑等會名目緝捕最關緊要惟邇來兵役大率積疲難期得力到署後蒙督憲凱旋過郡賞發銀一千兩以爲整頓地方費用卽當召募曾充鄉勇年力強壯者取其連環保結遴委試用從九高凌漢管帶備置槍械逐日訓練兩次挑選共八十名每名每日給口糧銀五分出鄉捕匪者酌加行糧每十日考驗一次擇其技藝嫻熟者酌予獎勵捕獲痞匪盜賊量功分別給賞兩月有餘較兵役尙爲得手惟地方剽悍強梁已成積習邵武化城各處高巖深峒多爲匪徒出沒淵藪而武岡城步一帶痞匪尤敢明目張膽新化本年六月間曾有新甯逃匪竄入經張令會營拏解可見此等在逃餘匪事定後難保不潛回滋擾若不乘此將各匪痛加搜拏懲創誠恐患等養癰善後終屬有名無實卑府悉心籌商現募練勇八十名雖附近緝匪疊有成效然令其遠出逕搗匪穴竊恐其力尙單未可深恃若輕易添撥兵役不特易於走漏風聲并恐民間難免騷擾至於村莊團練僅能各保里閭而匪窩附近之區公正紳士尤少辦理稍有失宜流弊不一而足莫如再添練勇八十名給以兵械遴選勤幹之員分帶訓練督捕以本地壯健之良民爲本地除悍惡之痞匪兼以未染習氣易以約束卽如苗防練勇迄今尙較

勝標兵是其明證惟寶郡雖屬苗疆若遽仿苗防常川添設練勇當此經費支絀之際誠恐窒礙難行然整頓地方非此不可現擬添募八十人并現在練熟之人合計一百六十名分員管帶巡緝遇有匪徒蹤跡立即馳督地方員弁踴拏務獲一面跟蹤將各匪出沒淵藪痛行洗除俟一二年之內各匪絕跡四境肅清即可裁撤惟此項經費可否於善後案內俯賜酌籌給發之處伏乞憲裁

復周鹽道四條議

寶慶府知府 魁 聯

竊寶屬不通驛站以致卑府會同夏守中秋前在新甯所發各稟鋪遞經旬未到省垣流言煩惑重勞各憲厘念八月二十八日接奉憲諭本擬即將稟覆因思會稟各件並由新甯回郡稟牘均可次第達覽夏守日內亦可到省面陳一切憲厘自可稍紓是以稟覆稍稽惟祇誦鈞諭飭相機督率妥辦如有難以徑稟各憲者許即縷陳以便憲臺婉爲面稟等因仰見垂念地方優加體察使上下無隔閡之情庶整頓收實獲之效五中銘感曷可勝言卑府自顧蠹材謬膺委任誓不敢苟且粉飾貽誤地方隨事激切上陳罔識瞻徇顧忌然於各憲稟牘中實有不能遽盡者今蒙垂問敢不一一陳之

一會匪之猝難盡除也南省會匪徧地皆有而寶屬頻年用兵匪徒之多尤難億計不特大兵剿除固有免脫卽各員弁疊次搜拏獲解之外投巖投繯自盡者亦復不一而足雖謠言靜息閭閻乂安若謂會

匪遂已淨盡地方永無遺孽則掩耳盜鈴之語斷不敢自欺不過從逆各匪翦除殆盡而各匪逃竄遐方者目前未敢遽返然積至半年不拏則此輩難保不復圖蟻聚卽如雷李諸逆初非久蓄異謀亦非生有異質祇以烏合蜂起遂致豕突狼奔前事之失後事之師卑府愚見似當將會匪萬難淨盡之實在情形密陳於上憲將各匪作爲常川緝拏隔一兩月卽發一雷厲風行之札使地方文武員弁刻刻以查拏會匪爲念各會匪不遑休息不敢與士民爲仇稍一出頭露面地方卽時捆送到官處以重刑無委員之騷騷無詳解之繁累期於員弁士民人皆樂於捕匪而不畏匪則匪自畏法而不敢藐法然後輔以保甲團練積穀諸實政期年之內會匪之技自窮雖不能盡除而地方自可收長治久安之效一痞匪之亟應懲創也痞匪雖有不入會之人而會匪中若無痞匪爲之主腦斷不敢擾害閭閻寶屬痞匪無惡不作而其最爲民害者有五大端一藉緝私爲名設卡攘奪鹽觔一藉保境爲詞勒碑阻遏米穀一強牽耕牛去勒令良民代賠一窩藏盜賊主使竊鄰村財物一糾約會茶私立大五三六九老八老十五等名目此等惡習各處間或有之而武岡新甯爲尤甚若不痛除積習將來必成鉅案蒞任以來節次訓練壯勇督率查拏現計先後拏獲五十餘人除其中情節較輕者隨時枷責保釋外其情節較重者現經飭委邵陽縣劉令研審詳辦計委審之員詳解一切受累已屬不貲而地方情形雖較前

兩年大爲斂戢肅清二字尙未敢言總緣藍正樽曾如炷等節次滋事當時辦理不免以姑息爲心而事後因循又多以敷衍從事十餘年來誅之不可勝誅惟幸此間士習民情時時窺伺上憲之趨嚮每見大張告示輒扶老攜幼傳誦此正是風俗可轉移處疊次示諭痞匪尙相戒動色若各憲再疊加嚴示則各匪自必革心所以屢次稟求告示並遵辦緝捕稟內力求撫憲將拒捕格殺勿論一層嚴切示諭原欲使此輩痞徒知今日大小官吏齊以治痞治匪爲心不稍姑息不畏抗拒庶幾聞風股慄或悔過遷善或遁跡遐方其有怙惡不悛者府縣再痛懲二三十人則十數年錮習可以漸破錮習一破會匪雖有不能爲患也

一牧令之最難得人也各牧令或以才見長或以守見潔雖尙無疲軟貪酷之員均堪器使然武岡地方非如趙廣漢虞翊之治積習斷難破除至於新甯兵燹之後整頓撫綏尤關緊要戚令人極明白辦事亦極實心然以瘠苦之缺當凋殘之餘書差均不敷役使緝匪解犯均須雇募鄉丁卽此一端其竭蹶已可概見該令前請添設民壯能否邀准未蒙核示然無米之炊巧婦殊難爲力新甯歲入合廉俸一切計之不過千二三百金爲知縣者能冰蘖自甘不受苞苴已屬勉爲好官甘受賠累若責以興利除弊從何措手是以前在新甯當面諭戚令放膽整頓地方先由府籌撥緩解之項借動銀五百兩發交

該令以應辦公急需一面由該令將各要工急須興修緣由據實通稟院司各憲請先發銀數千兩將來於該縣應領軍需銀兩扣除卑府愚見似當將新甯瘠苦情形婉陳上憲將署事補缺人員如何設法調劑著爲定章庶將來到新甯任者知一二年賠累有可補苴得以安心整理地方此層似全爲調劑缺分起見其實乃整頓地方要著地方之安危視乎官之賢否使無賠累之患而仍不甘心爲好官則寘之重典亦復何辭若不將新甯之缺設法調劑貪酷者固足以儆事卽廉慈者亦難以整頓得力府城離新甯二百餘里卽有才十倍於卑府者時事事提膽提心亦難免鞭長莫及之慮也

一營伍之應整飭也兵不能殺賊而但能擾民此近時通弊然留防新甯之桂陽營守備武昌顯其人尙能約束兵丁頗有膽略今題升寶慶都司尙未到任昨奉檄兼護桂陽營參將該守備業已來郡擬遵委卽赴桂陽因新甯現雖安靜然留防二百兵前經稟撤一百名留該守備及兵百名俟新設之營勻撥各兵到後再行歸伍今勻撥各兵尙未到營而粵西一帶又有滋事之信寶慶琦協現奉議革職瞿都司又解首逆赴京城中僅一鄧千總人雖穩練設有事故憑何措置現擬將武守備截留半月密探粵西是否全平一面稟請督撫憲速飭勻撥各兵來新並請檄催沅州協副將先赴調署寶慶協之任以資彈壓而備不虞如能密陳上憲婉商提鎮或徑檄協將嚴飭營伍隨時訓練遇有痞匪會匪立

卽隨同文武實力捕拏毋許私得搶鹽阻米各卡陋規雖不敢謂此一檄卽可兵皆勁旅然文武同心痞匪自無託足之處於地方裨益不淺

代劉侍郎與貴東道書

郭崑燾

接展來牘謂援黔之師速則功易而費省因推論及於曠日持久恐黔禍未終楚亂方始偉哉老成深識之言然以速爲計似猶知其一未知其二也凡剿外來之匪則全恃兵力勦本地之匪則兼資吏治辦匪於初起之時則宜先示兵力而以吏治輔之辦匪於積亂之後則宜先清吏治而以兵力輔之黔中民苗非盡無良十數年來叛服相尋以至於不可收拾固宜官紳之無以自強亦由官紳之惟知自利今且人烟蕭索田土荒蕪良民逃而之他莠民習於稱亂愚民之無識無力者則又依違於兵與賊之間以爲苟且自全之計卽使合楚蜀粵三省之力分途並辦勢不能盡黔之人而誅之臨以兵威誅其首惡毀其巢穴散其脅從楚蜀粵之責盡矣功旣見而費不資則楚蜀粵之師之不能久留黔固亦必然之勢也此速則功易而費省之說也援師旣罷善後之務主之地方官子遺之民瘡痍未起流亡之戶離散未歸反側之徒根株未淨地方官欲赴任則必募勇必籌餉欲籌餉則仍不能不取之於民取之不以其道於是弱者飲憾强者揭竿亂甫平而亂已旋生斯往事之可懲亦將來所必至未見速之果能有功而節省也大

抵經營黔事不宜多用兵尤不宜圖速效以安民爲要而不專言剿賊以保全未被賊據之地爲急而不遽貪攻破屯塞之功以撫卹招徠開墾地畝爲自立之道而無庸擁兵糜餉累已擾民以終歸於無濟得誠樸耐苦廉潔有膽之官吏分治各郡縣寬以時日假以便宜三五年後氣象庶有異乎至於總要隘口之必不可不防者仍須酌駐兵勇一二營或三四營賊來迎擊賊去勿追漸推漸廣漸逼漸進人皆復業則地利可徐興兵不求多則軍餉易爲繼迄乎人心完固守備謹嚴不必掃穴搗巢而賊勢已當瓦解然後分別剿撫可以久遠相安故遲則無浮費而有全功速則有近功而仍留後患特誠樸耐苦廉潔有膽者之未易得其人耳勤以求之虛以受之不限資格以取之其亦必有合矣

檄鳳穎淮徐滁泗宿海八府屬文

代作

魯一同

狂寇稽天討之日久矣自正月以來兩省不戒蔓延江北維揚士庶慌於邪說開門揖盜坐受殘辱皇上赫然震怒大軍徂征毀其土壤燒燬其船隻從而來歸者日以千計賊勢窮蹙嬰城自守節鎮大臣方爲百全之謀環攻而待其斃乃三月中旬有賊數千豕突江浦蜂擁六合六合義民操白梃而踣之殺賊千餘燒船數百賊負殘創掠滁徐走鳳宿此皆驚喪之餘孽迸散之醜徒非有器械之堅利旗隊之整肅也然而清流之險不守臨淮之關不閉俾賊游魂假息蕩漾中土夫徐方古多英傑鳳穎風氣勁快豈

今昔之勢殊而勇怯之情異與備預不素而久安之民易搖聯絡不堅而自孤之心多危也棠泗產也官於淮楚南當廣陵之衝西承洪澤之委地散民庸衆情岌岌待罪三月幸不辱命每當簡衆誓師聽江介之悲風望淮西之烽火何嘗不按劍衝冠撫膺流涕嗟夫獠犬狂噬久而自斃天厚其毒於斯極矣淮右吾桑梓緣河盡股肱綿地千里二瀆如帶形勢都要遮蔽中原齊乃心力何寇不殄守乃險隘何鋒不遏至於賊情可得而言夫賊無徵調之繁無文法之密行無紀律居無部次千里不齎糧發掘虜掠去則委棄走如飄風聚如螽蟻此其所長也至於兩陣相敵礮火齊發則賊之籐牌布障不可當也平原善地戈矛進退則賊之短刀竹竿不能支也馬步並進更番休息賊之芒履赤足不能敵也村堡自守野無所掠賊之飢困不能給也連城犄角遠近相救賊之徒衆不能應也由是言之賊之長在剽疾遇堅則退賊之情在恫喝能忍則全豈有八屬義衆不及六合一隅之民千里維城竟無六合一戰之效竊爲士大夫羞之敬陳約言各勉忠義

一約心有惟恐見賊之心賊斯至矣有惟恐不見賊之心賊斯去矣譬如十人同居密室忽疑鬼至則左右皆鬼矣使十人操戈而逐鬼則無鬼矣奉約八屬官紳軍民各自磨礪時存恐不見賊之心膽氣自倍賊有不來來則殲旃

一約耳聞急報而不驚恐以驚我衆也聞捷音而不喜恐以懈吾志也其言自賊中來者安知非妄語其言不自賊中來者安知非妄傳奉約八屬官紳軍民塞耳不聞以止煽惑

一約足足用之立奈何乎徒行足用之進奈何乎徒退能行而不能立終無立足之地矣能退而不能進終無可退之地矣奉約八屬官紳軍民思進有不死而退無十全何必紛紛遷徙自陷危亡爲

一約力人各用其力則勇生一人倡而衆人從則勇生知衆進之不能俱死則勇生奉約八屬官紳軍民齊心同奮如左右手則前無強寇矣

一約財窖金藏幣爲盜守也裹囊負橐爲盜醜也盜不有之人得而有之矣下智守財散十之一中智守財散三之一上智守財全散之十之一者可以守三之一者可以戰全散者百戰而百勝奉約八屬殷富之家散財養士以衛厚資

一約官民官非民何衛民非官何與衛棄其民而思苟免者是匹夫也出城一步童子制其命矣棄其官而思逃亡者是烏散也出鄉一步豺狼食其肉矣奉約八屬官民相愛相結如父兄子弟雖有黠寇不敢正視

一約城鎮城鎮之民主客各半其情必貳貳者盜之乘也客財多浮思捲而趨主人弗恤與客齟齬雖有

秦越之人不親於盜賊乎雖有仇隙之家不恩於盜賊乎奉約八屬城鎮之人破除彼此之懷庶得同舟之濟

一約鄉野小村並大村塹而守之小堡並大堡塹而守之五里一小聚十里一大聚聚少百家多及千戶晝獲於野暮藏於室丁壯處外婦子處內警至鳴鼓連聚畢集不集者罰聚必有長苦樂必均飢寒必恤出入必察恩分相得賊之散而之鄉必非大眾也四面而攻之無噍類矣以上八約備矣尤有請者國家休養二百年朝廷旰食近三載自粵賊踞桂管破湖湘走九江下皖桐陷金陵虜維揚前後興師十萬屢經創艾而其烽未燭者節鎮有追剿之師郡縣無堵截之力逐西則走東攻南則竄北犄角之勢未備而守令之權散也計賊大眾不過數千並其裹脅不過數萬總其數不能敵一大縣江甯分其一鎮江分其一揚州分其一臨淮又分其一其勢已散力已孤今向大臣圍金陵戰江南琦大臣圍廣陵戰江北漏而出者僅數千人誠使郡縣各守其疆連城相應則立時散破遷延日久滋蔓可憂棠不自揆敬與守土八屬僚友遙申歃血之約共指天日之誓賊至一縣四縣應之賊至一府府屬諸縣應之其或不應鬼誅神殛旣上不以憂貽君父而下以安其民業流福子孫不亦美乎麥熟急刈麥禾熟急刈禾殺賊所所獲恣取從我者生背我者死吳棠謹約

(The text in this block is extremely faint and illegible due to poor scan quality.)

皇朝經世文續編卷八十二目錄

兵政二十一 勦匪中

上琦中堂書

徐 蘊

定海兵亂記

李尙暉

會匪紀略

孫衣言

會匪紀略書後

孫衣言

又書會匪紀略後

孫衣言

陳河南捻匪情形疏

胡林翼

現籌剿辦川北巨股調集各軍分途前進情形疏

駱秉章

奏爲生擒逆首竝剿滅髮逆巨股疏

駱秉章

新世系系

新世系

新世系系

新世系

新世系系

新世系

新世系系

新世系

新世系系

新世系

新世系系

新世系

新世系系

新世系

新世系系

新世系

新世系系

新世系系

皇朝經世文續編卷八十二

上海萬士濬子源輯

兵政二十一 勦匪中

上琦中堂書 癸丑冬賊陷儀邑

徐 鼐

前因餉銀阻滯諸營乏食鼐與本縣溫令熟計籌出漕米一款接濟兵食另籌他款糴買麥麵蘆柴及馬草等件疊次由溫令稟報在案嗣因儀徵失守賊氛逼近又復添調土團鄉勇駐紮要口晝夜巡防一切火藥器械燈燭之費需用不貲均由鼐與溫令竭力籌辦職分應爲復何瀆告惟是儀六兩邑爲江揚兩郡咽喉右臂之區賊窺伺半年而未能逞欲者以兩城犄角諸營星羅碁布能扼其吭而掣其肘也賊若於儀邑要隘築壘屯守分衆出擾非特六邑爲脅亡齒寒之懼卽揚州大營有腹背受敵之虞且恐六合不支則鳳泗滁州諸屬勢將瓦解於大局關係匪淺鼐愚以爲儀城坍毀賊雖得之而不能守也冬寒土凍築壘亦必不堅若能於大營選銳師進討鼐與溫令督帶土勇堵禦西竄之路賊勢不支必將棄儀而走如此則克復不難儀徵復則揚州大營旣不慮其襲擊後路且可斷賊江揚往來之路而爲我鳳泗一帶屏蔽之資此舉於目下情形似爲切要惟中堂恕其狂瞽列諸芻蕘之采鼐雖孱弱書生竊願縛袴先

驅稍效尺寸

定海兵亂記

李尙瞻

定海屹立東海中爲四明屏蔽明季倭屢犯境民無孑遺實爲征戰屯聚之地康熙二十七年建縣道光二十年英圭黎兩陷城焚燬殆盡旋即脩治升直隸廳地當海會之衝巡防特重故設水陸額兵三千六百名移鎮海總兵於此及中左右三營統之巡洋緝盜歲久廢弛城中兵多於民民安耕鑿無游惰無囂凌熙熙皞皞有太古風兵則游手亡命桀驁不馴挾持官長爲常卽所轄營弁亦莫敢問凡工商胥隸無不隸名營籍以爲榮者邇年軍事旁午餉精竭蹶浙撫奏請凡坐糧皆給以半兵不滿意又以給發不時日思爲亂時同知蔣斯彥宰斯土聞之募勇數十名自衛己未八月初四日衆兵聚集城中之祖印寺鳴鐘號召得千餘人劫富紳薪米牛羊就寺飽食訖入廳署借餉蔣杖其鳴金者一人兵退啟軍裝局盡奪刀矛鎗砲復入署藉口於文員無杖兵例又謂鄉勇之設將圖我也上堂矛刺蔣腰際又挺擊傷頤蔣暈仆救護得免勇已紛散惟一人抵敵被殺剖腹出腸血肉狼藉又欲得其主計僕而甘心焉不可得總兵袁君榮懦不敢左右袒聞亂解救亦受傷於是紳耆公捐錢數百緡分給事乃寢蔣以是撤回省委同知陳繩武攝篆八月陳至折獄平允士紳感悅時奉催科嚴令稅課已爲前令徵其七不得已追比舊逋

而抗欠者兵居八九銜之祖印寺大鐘非晨昏不擊晝必兵火十一月二十七日午後聞鐘兵六七百人復嘯聚一呼百應擄劫富室如前罷市閉城署內外數十兵晝夜環守又恐運資寄頓出署者皆搜查卒亦無所得二十八日申刻蜂擁至署曰聞徵收有萬兩請無解司而以之給餉陳以所徵所解冊示之實收二千餘兩解省無存乃無言而譁噪不已將掖陳詣祖印寺會議至儀門紳數十人入止之就署中議兵守於外至中夜仍議以公捐散給兵乃退約初二日領錢米矣而三千人中良莠不齊亂者不過數百其守分者聚謀曰是役也吾曹不與設若輩釀成大事上臺率師剿討玉石俱焚矣盍禽以自白於是設保安太平局聚集盟會凡數百人乘夜持械擒獲數十名首惡野豬大王聞風由水關泗水逃徧緝不得獲其妾及壻次日又獲數名解署陳謂此輩獷悍性成目無法紀久矣不治以法後不可問且諸紳公捐息事力亦難繼非殺以儆之不可同僚紳士竄曰然訊得爲首三人兵二一廳吏而兵也陳曰吏則吾爲政兵非請命鎮戎不可備文移營營不得已亦畫諾初五日將三人正法及西市廳吏賄役而逃翼日獲於鎮海樓亦殺之梟示於祖印寺前餘薄責釋放賞保安太平局兵若干人先是亂兵聚市作飯有血腥識者決其必敗余客陳幕目擊其事十二月朔日將歸以此留阻至初六日乃啟行

會匪紀略

孫衣言

金錢會匪起於咸豐八年有賣筆者金華周兆榮流寓青田粗識字能卜卦娶妻於青田小溪以妖術教人喫菜入其教者出錢二百五十投沸湯中煮焚以符咒取湯飲之刀棒不能傷謂之銅錢壯聚於永嘉青田之山中是時粵賊已陷處州村民懼引寇一夕糾衆掩之燬其巢而青田令亦名捕兆榮甚急兆榮遂走温州流轉至平陽錢倉鎮易名曰周榮趙起者錢倉埠役設店以寓客嘗以結盟拜會聚諸惡少年既而周榮至復謀聚衆斂錢自云得金錢七於山中後當貴於是與奸民朱秀三謝公達繆元張元孔廣珍劉汝鳳等八人合謀爲金錢會而先誘錢倉汛外委朱鳴邦使入會依託錢倉山廟神以惑衆入會者納錢五百於會首則詣廟神誓無負約人給大銅錢一枚紅帖條約一紙無少長老幼皆相呼曰兄弟其錢文曰金錢義記其帖分八卦卦以三千人起數至五六千人以張聲勢又自言賊渠白老三耆平陽人陰授以號令入會者無賊禍於是從者日衆平陽商賈富民至以賄購僞錢平陽縣知縣翟惟本不能制亦不敢言賊狀其明年黨漸衆瑞安金谷山小篁竹等處奸民皆附之金谷山小篁竹者瑞安江上流去城六十里民多業椎埋趙起謀結爲己用令其黨謝秀球持大錢數千以來生員潘英林景瀾鄧日芳奸民黃孔標林福瑞黃梅宇等皆入會益四出誘脅漸蔓延瑞安西北鄉於是子弟鏘鳴方以翰林侍讀奉命在籍團練睹亂萌乃言之署巡道志勳署知府黃惟誥謂粵賊在括而奸民嘯聚啟寇心且內亂起

益無以扞賊宜及初起痛懲之可無煩兵力而道府以爲地方官無言賊者殊不爲意銅匠王秀錦者故會黨爲趙起散僞錢頗獲利乃益自鑄錢散之平陽東鄉趙起惡其攘利也倡言屏之而平陽貢生程殿英亦與秀錦合謀散錢其子方繫平陽獄殿英謀篡取之翟惟本懼朱鳴邦以語趙起趙起方與秀錦殿英隙且欲假官以立威遂糾黨數千人入平陽城捕殿英燒其屋秀錦乃自首於官願出會趙起之入平陽城也旗幟甚盛起與其黨朱秀三謝公達握劍指揮入則踞坐試士院平陽人大駭而惟本甚德之重犒以去於是勢益張民犯法卽投入會益斂民財置器械自平陽城循江以南至南北港循河以東至瑞安多通賊時咸豐十年也趙起之入平陽城平陽人有言之道府者道府頗以爲疑其明年二月起黨有馮阿三者潛入郡被獲搜得各城門鑰道府懼以詰惟本惟本自以首先召賊益諱賊遂謂馮阿三秀錦黨也無與趙起事會奸人某者謀調停爲兩利議假賊以團練名言之惟本謂賊願改會爲練惟本喜言之道府道府以爲然使縣給牒爲團練於是趙起豎旗平陽城南逼平陽知縣翟惟本平陽副將王顯龍共祭旗民以爲官皆從賊也爭受賊僞錢而道府謂賊真爲練不復言辦賊賊益不可制鏘鳴復力爭之道府曰趙起周榮等人人知其爲賊正其爲賊乃可辦今妄謂之團練使賊有所藉以脅民而民反無辭以抗賊是官毆民從賊也禍且不救且團練者各團其鄉今賊方遣黨四出播僞錢結營弁衙役及郡邑

羣小人其意果何爲而官謂之團練此淮南北覆轍也不可不深思而道府先入惟本言謂賊當漸解是時王壯愍公有齡來撫浙鏘鳴復寓書陳之王公王公以詰道府而道府果言賊已改團練王公知其僞責悉獻僞錢乃聽爲練道府噤不敢復言而賊之散僞錢益甚鏘鳴謂官不可恃乃謀益治團務逐鄉以爲團凡入團者無入會冀漸披賊黨瑞安民稍稍出會求入團貢生陳安瀾者林洋富民也方受縣牒團江南岸而林洋奸民金子蓉郭巷奸民陳丙式等皆會黨不利林洋團練遂仇陳安瀾糾其黨拔團練旗樹賊幟安瀾訴之郡郡遣縣丞羅敦樛往偵獲匪黨鄭步高以歸趙起聞之怒糾其黨二千餘人聚錢倉平陽民告變於翟惟本王顯龍請詰以所爲惟本顯龍皆不省安瀾亦請於郡縣求得官兵助民團郡縣亦不省賊遂以六月廿六日劫林洋焚陳氏及謝氏賊數千人建旗鼓往來平陽城惟本顯龍不敢問亦不實言狀陳安瀾旣被焚訴其事於郡鏘鳴復力言之道府於是總兵葉炳忠議撥溫州營兵四百瑞安營兵一百往剿賊而瑞安奸人者故通賊受賊指沮之副將趙振昌謂趙起衆甚盛且已爲團練矣胡用兵復爲賊黨造私書痛詆團練因幕客某以達惟誥又因振昌以達炳忠益爲賊游說巡道志勳與惟誥炳忠本畏賊得此書益謂趙起真不反反以咎團練遂不復言撥兵七月四日郡檄前永嘉令高樑材赴平陽察林洋事樑材先詣鏘鳴問計鏘鳴告以無他計但幸以實聞樑材至平陽惟本招趙起等

來置酒樑材惟本與賊飲甚歡及返瑞安遂爲撫議謂趙起願出金子蓉等以易步高而與官約無得深罪子蓉子蓉等延不出而趙起復焚雷濱溫氏溫氏平陽大姓丁壯數千人所居漁塘雷濱逼錢倉而誓不入會生員溫和鈞和鏘亦皆受牒爲團長賊恨甚至是襲焚溫氏屋和鈞和鏘來告急鏘鳴乃挈以赴郡與俱見道府具言賊屢焚劫不治將益肆然賊烏合初起無槍砲但得官兵數百助民團可一擊散而道府皆以兵力不及辭刑部主事黃體立復力請之惟誥惟誥亦辭且曰殺人放火報復之常禍皆由團練無與郡縣事而賊黨蔡惟屏者方在郡偵具以告賊賊益橫八月九日高樑材復自郡至瑞安因以議撫而趙起已約期大舉樹帥字旗錢倉江上陳安瀾等益懼乃謀自以團練擊賊傾貲募台州船三十艘令武舉游飛鵬督以行而與溫氏團約水陸夾攻賊十六日台州船航海薄錢倉時賊方晝夜鳴鼓謀舉事見台船至倉猝四散船上勇爭上岸焚賊屋趙起與其黨奔錢倉山麾旗以集衆衆不應起懼謀自盡其黨有止之者而溫氏團誤師期賊稍稍逸去先是游飛鵬旣以台船行又密募閩勇二百由陸攻錢倉高樑材及永嘉令陳寶善以道府意陰沮之故水師無援然賊方謂官兵至懼甚其黨或納僞錢以求免旣而知台船非官意乃復聚台船旣退賊知雷濱夾攻之謀遂以十九日攻雷濱溫和鈞與其父儒業妻陳氏皆死之而先一日平陽民獲賊諜搜得賊書二函其一約江西各鄉賊攻平陽其一約金谷

山小篁竹各鄉賊攻瑞安而官未之知也瑞安舉人葉寶衡等復奔郡告變言之至痛哭而知府惟誥怒謂瑞安人好事仍不省府吏有通賊者復以語賊賊喜高樑材往來議撫久無成憤甚遂與瑞安令孫杰謀以激變坐陳氏言之道府且謂瑞安團董曾鴻昌朱彙等妄言剿賊梗撫議瑞安人怒相率詣縣署詰樑材與賊飲酒求和狀樑材匿不敢出而賊已有所聞反益急二十日金谷山賊首潘英等率其黨千餘人焚予安義堡屋先是瑞安人聞賊約攻城知必先及予言於孫杰趙振昌謂賊禍及孫氏則郡縣皆不能無事而賊無火器團練亦無火器宜速撥槍礮手護孫氏及是余復告急於縣令請速撥兵助民團而趙振昌復不省及予家被焚賊果謀乘勝攻瑞安以雨甚散去瑞安始戒嚴而高樑材猶在瑞言撫猶言趙起事止劫村莊非聚眾謀逆且自辨無納趙起賂揭示於縣門瑞安人大譁樑材卽日去又三日賊首朱秀三率黨薄平陽焚城外游氏余氏屋連劫諸富民翟惟本猶不報瑞安人復告急道府道府亦不省於是縣丞趙榮興訓導戴咸弼復赴郡乞援師而瑞安城守者獲賊謀五人於百總楊世勳家蓋世勳久通賊而五人者謀焚藥局爲內應遂并世勳繫之獄其明日賊首蔡華率黨據嶼頭盡統隔江之賊逼瑞城而知府黃惟誥猶持撫議以二十七日抵瑞安爲好語出示以招賊不知賊已約期攻郡也二十八日平陽賊首趙起瑞安賊首潘英蔡華等率其黨二千餘人分道犯郡城由三角門入入則先犯試院殺捐

輸委員前麗水典史許象賢署永嘉場大使王恩溥走以免失永嘉場印入道署殺一人巡道志勳與其妻子走以免失道印入府署殺數人惟誥叔父某死焉失府印入縣署知縣陳寶善先出免殺數人寶善叔父某亦死焉賊遂分黨焚南門民居大掠城中總兵葉炳忠聞變召其鄉人台勇入禦賊高樑材亦召其鄉人廣勇入禦賊槍斃賊數人而賊皆揭竿持梃聞礮聲卽驚潰奪小南門出賊之約攻郡城也瑞安人先之以告惟誥惟誥怒告孫杰孫杰飛書告於郡郡城人知賊期者亦言之志勳志勳笑曰此自與團練鬪何與我事且賊豈敢攻我城者廿六日夜半瑞安告變書至志勳猶挾數妓縱飲飲已醉不啟封總兵得書則已寢矣廿七日城門甫開而賊擁以入至道署志勳猶未起聞殺人聲始驚跣以出見賊卽返走踰墻以逃出東門呼小舟渡江匿江心寺復逃至樂清匿樂清城中而是日賊已飽掠去賊之攻郡城也分遣二千人以窺瑞安至橫山聞城上礮聲乃亦間走趨郡比至郡南門而先至者已敗去城外團練槍斃執旗賊二人遂亦潰去而瑞安守城者聞橫山有賊蹤相率請於惟誥求擊賊惟誥笑不應瑞民怒擁惟誥至明倫堂責玩賊欲何爲惟誥厲聲曰趙起等好百姓也無妄言方中食復就孫杰飲酒而郡城警報至且聞家中人被戕失印信乃大驚自拊其膺以哭瑞安人恨甚爭詣署求見知府知府匿不出賊旣破郡城而道府自以先諱賊益不敢言賊狀盡諉其咎於團練謂賊因報復搶入城印信被劫被殺

者皆不報典史許象賢死亦不報也廿九日瑞安復獲賊謀一人鞫之則曰自郡來其黨數人先匿楊世勳家世勳守北門期賊至則開門事成以代趙振昌出前獲五人并鞫之語皆同遂與世勳皆磔死而是夜賊果犯瑞安以內應絕不敢近明日把總杜之才踰城遁與世勳同守城者也賊破郡城一日去永嘉令陳寶善知賊易與卽返郡而志勳匿樂清三日不出乃遣人求得之逆以歸然猶不敢言剿賊趣民輸財治城守瑞安令孫杰副將趙振昌亦閉門固自固而賊以破郡城頗惶懼日夜相驚以官兵旣偵官無出兵意於是瑞安賊復以九月初三日出桐嶺焚婁橋民居明日復犯郡城勇目徐文久千總陳國泰逆擊之乃退是日翟惟本復遣平陽人來議撫而趙起已遣其黨取平陽營礮以去瑞安城東並河諸鄉亦通賊初六初七日惟本連書來議撫又約瑞安人至江南岸議而是日賊分黨據南岸瑞平道梗瑞安人以賊之日逼也乃復請於道府願自僱船勇爲禦賊計會總督亦責温州官玩賊於是勇目於濟清陳錦瀾陶保登管士拱等千餘人至十八日千總孫純良率兵勇及城中義團攻南岸賊純良不敢上岸義團遂亦敗十九日千總沈作霖復率兵勇攻南岸賊擊敗賊黨杜之才廿三日兵勇義團復攻南岸賊於濟清縛八十老人與一童子歸孫令遣還俾持諭解散賊殺之廿六日瑞人所僱廣艇至瑞安江巡道志勳與前永嘉令高樑材前瑞安令孫源皆來於是知府黃惟誥在瑞安二十餘日矣惟誥在瑞名辦賊然猶

冀以撫爲諱飾言剿者輒爲所沮瑞民知之姑羈之城中不復與計議又時諷以署中被賊事惟詰窘甚思脫去而無計會廣艇有先至者民訛言巡道督兵來惟詰乃詭言往迎且計事瑞民亦謂巡道來則惟詰不足留也縱之去惟詰去六日志勳始至而志勳亦惡言剿賊以總督嚴檄懼得罪又聞賊所招海盜船已入江不得已來瑞督戰永嘉令陳寶善猶移書忱孫令冀卒撫而平陽賊已分黨破福鼎矣志勳雖以廣勇來督戰而恒怯畏賊廣勇亦素輕志勳無鬪志日索餉志勳屢渡江擊賊輒敗賊有乘大壩船至焦石者城西團練擊走之而志勳反不知志勳以屢戰不利謂廣勇需重犒令知縣孫杰索城中富民財杰以怒團長曾鴻昌責鴻昌貲數倍城中人皆謂鴻昌冤於是益怨志勳而翟惟本復遣平陽士人來議撫瑞人以爲志勳寔召之益怒旣而管士拱陶保登等以台船渡江擊賊志勳所督廣艇又不至台船亦怨而生員張家珍倡義於湖石以湖石團練數擊破賊張家珍者家貧無藉然負氣好義有膽略賊初起密遣其黨招之家珍大罵不從賊謀殺家珍家珍乃與所親林有森謝學本等謀討賊倡團於湖石營前廩生高王風等應之於是大壩孫山各村義民數千人皆從家珍以十月十六日殺賊祭旗連戰皆勝乃遣其弟崇新與有森學本閒走青田達永嘉請於知府黃惟詰知縣孫杰求撥槍手夾攻賊以分賊勢守令皆不報家珍遂獨往來自擊賊殺賊數千人賊謀西犯泰順家珍遏之不得過於是賊始不能傾巢出

而蔡華等據江南岸者勢亦孤巡道志勳在瑞安二十日未能少創賊廣勇以索餉屢譁而台勇又以廣勇屢誤怒於是勇目陶保登等相率去志勳聞台勇將去則與高樑材等以廣艇先遁既而省檄支方濂來攝溫處道台勇廣勇既去瑞安城中守益單而張家珍以二十四日戰死其弟崇新代領之復督以擊賊賊聞瑞安守已撤而張家珍死湖石團練不足畏乃聚衆平陽江口復召海盜約期攻瑞安瑞安令孫杰復告急於郡郡不應

或曰孫杰乞援於永令陳寶善寶善弗爲言

而賊果於二十五日由嶼頭渡江薄焦石海盜船亦揚帆

抵西門以巨礮攻城城上亦以巨礮擊壞其一船是夜賊船盡聚橫山下明日賊自橫山來攻城焚城北民居明日賊首趙起據城東龍山分道來攻城焚西門外民居船盜亦上岸焚南門外民居復分黨焚東門外民居城三面煙燄漲天城中大震已而西城大礮不火而發斃賊百餘人賊始去明日賊復於城外遙縱火是夜城上譁言小東門守者或通賊乃以王國寶守東門尋獲放火者三人殺之明日賊於龍山架巨礮以攻城龍山俯視全城礮自上而下聲如霹靂飛彈如雨皆從民家屋上過副將趙振昌泣語守者謀降賊守者厲聲叱之乃不復敢言賊分道來撲城復於城北新埭頭水淺處架橋以渡城上礮斃十餘人乃遁去西城上亦礮斃賊無數十一月初一日城中富民各出穀舂三日糧以給守陴者自初守城城中按戶具飯送上城日四飧城中人無士民十六以上皆持械上城城上見賊卽擂鼓鼓聲作則陴聞

人皆滿街巷民家戶皆懸一鐙婦女憑戶察奸人夜明如晝及是貧民家家得米守益堅明日賊列礮城東湧泉巷以攻城又築礮臺於城北又窺新埭頭城上礮擊之皆走明日龍山賊礮擊傷城上團丁數人而其礮忽連炸自斃數賊其在城西開礮者自燒其藥桶又斃數賊是夜賊以船載薪謀焚各水門守者運石以填門覆湓苦於石上又運水上城以備之賊不來而城中譁言通賊爭求殺匿以免明日賊分黨斷三都嶺永瑞道梗賊伏城外破屋中以擡礮擊城墻隙瓦縫中往往鉛彈飛出從人左右穿而過或裂禪墮帽而不傷一人賊既退城中民踰城出盡燒城外殘屋於是賊始無所藏明日閩師統領記名道張啟煊前軍至穗峯離瑞安三十里是日賊攻城益急賊撲城東洞橋城上礮擊走之賊又撲弔橋邊石牌樓下以擡礮仰擊城其藥桶忽自火起城上譁笑聲如雷賊又潛伏西門外夜半昇梯以緣城梯重昇者自相呼守城兵覺鳴鼓警衆則一梯已倚城急以鳥槍擊之斃數人梯下復以大小礮三面擊之賊皆棄梯遁兵丁陳鎮濤躍而下斬一首復上城遲明守城人出城取所棄梯梯高於城二尺寬八尺可五人並登衆爲之愕然東門外亦委數梯於道衆取而燬之於是賊攻城九晝夜輒敗去是日悉銳攻城期必破又大敗去賊知城不可得矣賊之南焚福鼎也閩督撫亦懼乃檄福建記名道張啟煊自金華回救永嘉前陝安鎮總兵秦如虎出福鼎閩安協副將吳鴻源以水師航海援瑞安水師甫出洋

風壞其船不能來而如虎以十月某日抵福鼎啟煊以十月十九日抵温州新巡道亦由樂清抵郡皆奉督撫令剿滅賊予弟鏘鳴謂事始可爲乃復就啟煊謀討賊而啟煊所部新挫於東陽軍械缺在郡二十日不能行鏘鳴謀於永嘉富民假錢四千緡以資啟煊啟煊乃令益造礮船至是軍械始完而郡復僱台廣勇約勦賊參將池惟屏以樂清兵五百勇目孫贊清及予子詒穀以台勇二百先抵穗峯爲前鋒前永嘉令高樑材亦督廣艇行初六日廣艇駛入飛雲江賊首趙起在龍山望見廣艇檣帆卽率賊黨由城西竄去蔡華繼走城外諸賊黨聞風皆潰去城東北諸鄉聞官兵至城外賊走則皆起殺賊皆粉其眉以爲號沿河數十里殺賊無算賊首朱秀三走死於董田生縛賊五百人送縣城殺之城東小教場皆破其腹而斬之小教場賊屍如山血流入河水皆赤賊或從東山走渡江廣艇復擊沈其二船賊自攻城被擊斃及是日被殺死溺水死者約五千人而其死黨所謂兌字號者皆平陽江西悍賊被殺尤衆於是賊精銳盡矣明日池惟屏等兵勇皆入城十六日張啟煊以閩軍至駐軍於龍山新瑞安令黃宗貴亦入城十九日賊復窺城西嶼頭賊有渡江來者兵勇擊走之斬一首則僧也繼復擒一禿者鞫之則賊以趙起令皆薙髮起敗而懼其黨散故詐而髡之自是賊益無以自脫矣二十一日北岸賊由廿四都踰嶺擾二都三都團練擊走之是日南岸賊亦謀渡江團練截之不敢渡平陽令翟惟本復遣前縣丞黃紹奎訓導欽陞

夏來瑞安爲趙起求撫而賊首繆元以十二月一日盡取平陽營槍礮送錢倉并繫副將王顯龍都司方某以去益遣其黨守平陽十二日海盜擄前巡道志勳於三盤海口志勳投水死經歷陳德元從之亦死志勳旣視職寄居城外民家郡人頗誚讓之不自安乃謀航海去而海盜知其橐中裝故及於難德元者志勳門生嘗與奸人爲游說者也閩師礮船成十五日張啟煊謀進勦金谷山遂令團練守龍山而別調廩生吳一勤以一都團練予子貽穀以廿五都團練先行會剿祇陀山賊十六日一勤貽穀焚祇陀賊皆西走啟煊進軍次澄頭而總兵秦如虎兵克水北溪十八日啟煊破賊於桐乾二十日啟煊破賊於碧山廿三日啟煊水軍焚沙洲賊巢於是金谷山賊勢益孤而蔡華謀移踞仙降以通金谷山沙洋仙降民拒之遂以廿四日焚仙降啟煊遣水軍追擊賊賊西走而城中兵亦乘虛襲嶼頭蔡華遂遁去二十九日秦如虎兵至蕭家渡盡焚瀕江一帶諸賊巢生擒賊首謝公達如虎兵連戰破平陽賊乃嚴檄詣平陽文武責獻趙起等平陽文武惶遽不知所爲於是翟惟本因重賂啟煊以求解王顯龍亦遣人爲趙起乞反正啟煊卻惟本賂而僞許趙起降責令速來營同治元年正月一日顯龍復遣人約送趙起明日顯龍以趙起出平陽城行十里而聞秦如虎兵至趙起竟逸去或曰惟本顯龍懼泄通賊狀陰縱之也瑞安賊首蔡華亦由山路逸將走青田投粵賊至永嘉界村民獲以送郡磔之并磔其弟廩生蔡岑初三日秦

如虎兵收復平陽初四日張啟煊兵破金谷山生縛賊首潘英送縣磔之會匪平於是啟煊回軍澄頭如虎駐軍平陽各搜捕餘匪責各鄉捆送賊渠復殺賊數百人其脅從者實不問自會匪起以咸豐十一年八月陷郡城同治元年正月肅滅凡六閱月平陽賊首朱秀三謝公達劉汝鳳孔廣珍皆先被獲誅趙起逸出從粵賊復逸至玉環被獲磔死瑞安賊首潘英潘國榮黃孔標林景瀾林福瑞黃梅宇皆被獲誅蔡華逸出亦被獲磔死其未獲者平陽周榮張元繆元蔡煥瑞安謝秀球鄭日芳等十餘人而翟惟本李鳴邦孫杰趙振昌以總督左宗棠疏請治罪孫杰趙振昌已前死翟惟本李鳴本皆從重發往新疆充當苦差黃惟誥竟得免會匪既平越一月粵賊始犯温州吳鴻源水師抵瑞安遂與啟煊如虎共平粵賊云

會匪紀略書後

孫衣言

會匪亂後予嘗欲識其始末久未遑暇既而得黃漱蘭洗馬所爲錢虜爰書者自咸豐十年賊初起至明年春閩師平賊逐日記事言之詳直不諱因綜其大要參以所聞爲紀略一篇使愚民可以爲戒而後之仕我郡者亦有所取鑑焉因系之以論曰嗚呼監司守令豈可不慎擇其人哉苟非其人因循釀禍可以貽誤天下而禍起旋滅僅僅塗炭一方猶其幸焉者矣我温州民氣雖曰樸野然實畏法而敬官平時見州縣役纓帽下鄉卽竊觀私語所至家具食飲如款尊客婦女偵伺藏匿有所要索唯唯如命雖名在庠

校或低首受吏胥訶斥一狀入則官與吏擇肥食之必饜飽而後止固民之極可憐者豈如閩之漳泉皖之鳳潁貌法好亂者哉咸豐七八年間粵賊既縱橫浙東西而州縣挾羣小人困之以捐輸民間始怨然亦未嘗敢與官抗也會匪之亂實自客民周榮者倡之周榮之聚青田永嘉山中瑞安前莊鄉民有入其黨者口語藉藉勢頗張瑞令傅斯懼甫有所聞卽以兵掩之焚首匪居其黨遂散及其在錢倉以下卦言命惑民復與趙啟等假粵賊聲勢謂入會得免禍而平陽鄉民爲身家計者遂爲所誘然非翟惟本之庸則一紙嚴明告示可以訶而散之其極至於遣數十健隸以往皆坐而就縛矣平陽人雖間入會而實深懼其累其愬之令長而欲得官之一怒者無日無之自翟惟本一切不問而民始折而從賊然非道府之庸惟惟本言是聽其禍亦未能遂成也蓋自會匪之起其始入平陽燒民居匪黨非不自危惟本重犒之以幸其去而賊始知官之可玩矣其後馮阿三之被獲匪黨益懼惟本爲之諱飾復假以團練名道府亦不復問而賊始知道府之亦可欺矣至於焚林洋陳氏則顯與團練爲難以謂守令必怒其懼尤甚瑞平兩令不敢一詣視府委員往復與賊飲酒議和而賊益知官之不肯用兵矣其後陳氏自募台船攻錢倉賊黨訛言官兵且至紛紛獻錢求免官誠以兵繼之其勢猶可散也至於閩勇之援爲官所沮而雷濱漁塘之被焚官復置之不問而賊乃真知官兵之不能一戰而反計決矣當其始端人正士有地方之憂者

非不苦口言之至於痛哭流涕而一時官府隱與數會非衰老昏眊卽少年巧滑昏眊者畏事巧滑者揣摩昏眊之意指而成之而郡邑一二奸人樂爲賊用者陰結官之左右虛疑恐喝使民之情不得一達於官而官之情無不盡輸於賊於是郡城首被其災平陽遂爲所據福鼎繼破瑞安見圍使非烏合無志之徒飽掠遽去則括賊可以順流而下矣非張家珍團練橫梗賊中則泰順不可守而閩之東境危矣非瑞安民誓死固守則瑞城破而郡城且聞風瓦解矣非閩師水陸來援使此賊更延兩月以俟粵賊之至則温州之事不可問矣嗚呼洪秀全之禍前後十年蹂躪半天下廣西一二大吏諱賊者釀成之也然則會匪之僅僅爲禍於温州一隅豈非所謂大幸也哉夫温州之民非不可治之民也秀者小黠而野者大愚耳豈真喜犯上而狃作亂者哉會匪之初起周榮趙啟輩七八人耳其旣熾潘英蔡華等數十人耳使非此昏眊巧滑之官但得如傅斯擇者及萌枿而折之不殺一人可也卽稍熾而謀之殺十餘人亦可也深諱固護顛倒錯戾至於破郡城突閩嶺用兵半年殺人幾萬僅乃無事而夷傷殘破一府元氣爲之蒸然矣然則豈獨良民之死爲官所陷卽會匪黨與其死於戰死於被獲誅者豈非官實誤之哉嗚呼罔民之罪官蓋十倍於亂民矣我願督撫大吏憫溫僻遠爲之慎擇循良而官我郡者永永以此爲戒清心而寡欲東吏而親民無恣睢自快使善良之氣不得伸無姑息偷安使桀黠之徒有所恃嚴邪正之辨謹治亂

之幾溫雖百年無事可也豈非吾民之福也哉

又書會匪紀略後

孫衣言

同治二年衣言備兵淮上駐壽州六月有言前刑部主事孫家泰徇壽州事者衣言喟然太息曰嗚呼危哉幸矣予兄弟之不爲家泰之續也始苗沛霖自號團練據鳳臺之下蔡陰懷逆志欽差大臣勝保欲假以拒捻而沛霖意殊不可測孫家泰治壽州團練獨訟言爲賊與之抗及沛霖率黨逼壽州家泰與官兵閉城拒守沛霖遣數巨捻入城約官不得殺家泰因衆怨殺之而先是官誤用降捻徐李壯守城沛霖遂以攻李壯爲名破壽州入城則稽首於帥前自言爲官破捻索重犒索家泰父子殺之又索家泰所用蒙時中官卽以時中畀沛霖亦見殺嗚呼予兄弟之欲急勦會匪卽家泰之志也而予兄弟得免於禍非所謂幸者哉嘻亦危矣雖然沛霖之初起未嘗一日自居於賊也雖擁衆自重而亦時爲官用當時督師大臣嘗屢言其功而朝廷且命爲川北道加布政使銜矣則固儼然官也而其衆整以強皖之兵力實亦未有以制則羈縻而用之猶有說也家泰策沛霖之必反急欲治之團練以抗以除地方之患不復自顧其身家可謂義士而沛霖旣破壽州則力足以傾覆皖北官之禍方在旦夕其勢不能復庇家泰其索時中勢亦不能復與之爭故濡忍目前以求解於倉卒之際其情猶可原也然沛霖卒反反不數月卽誅死

使其初起之時勝保等卽能正其罪而討之皖之禍何至於此然則賊固不可以玩而不正其爲賊賊亦不可以治也及沛霖旣滅朝廷乃知家泰父子之冤與時中之爲官所誤下詔昭雪贈卹有加而死者不可復生矣嗚呼自古豪傑之士爲國家深思遠慮不得稍行其志而反以身徇之者往往如此豈不可悲也哉夫苗沛霖皖北之悍賊也至如周榮趙起則真無賴奸民耳其始起卽以立會通賊爲名焚劫平陽潛伏郡城反迹亦昭昭矣及焚予居八日卽襲郡城殺官吏劫印信官且身罹其禍矣而道府上賊狀猶謂之團練猶謂之報復夫焚予居謂之報復可也破郡城則所報復者誰耶道府縣令於賊可謂有恩矣殺其父兄劫其印信則所報復者誰耶至於福鼎之焚軼及鄰省則所報復者又誰耶諱飾以釀亂亂旣成則益諱飾以求自脫此不肖道府之故智也使賊勢遂熾不可撲滅如苗沛霖之倔强一方則孫家泰蒙時中之故事又不肖道府之所優爲也閩督撫水陸之援賊之不久卽滅予兄弟亦幸而免耳然可不謂危甚乎哉嗚呼人臣受國厚恩爲地方生靈之計固不能有所瞻顧依違以求自便而禍亂者時之所常有也吾願爲長吏者不幸而當其變則惟及早圖之無以因循遷就貽誤斯民爲不肖道府之所爲也衣言初至安慶湘鄉相國詢及溫州之亂衣言爲備述之相國喟然曰京朝官在籍治事雖微末如典史亦與爲難故團練不可爲也湘鄉始亦奉命團練其後倡義旅自爲一軍以辦賊而後成功嗚呼此則

衣言兄弟之所不及者矣

陳河南擒匪情形疏

胡林翼

竊自蘇常失陷大局瓦解東南財賦之區倉儲根本所繫督臣撫臣駐守之地不能爲一日之守凡有血氣莫不憂傷我 皇上簡命督臣曾國藩視師江表人望所歸軍威自振倘能假以便宜期以歲月厚集兵餉當可成功惟是曾國藩僅止勇丁萬餘人近年江南江北皖南皖北之賊數不下數十萬人金陵之兵數七萬一旦潰決前車可鑒曾國藩渡江須兵四路一出廣信顧浙江一出祁門趨徽州一循江岸出池州每路須一二萬人乃能戰守兼資又須另備一路留鎮祁門等處作後防而通餉道皖北頓少一萬餘人兵勢已弱且賊計賊勢定於七月西趨旣已破吳卽將犯楚應請 皇上諭飭兩江督臣曾國藩並江西湖南各撫臣通力合作共籌兵餉若專意指調湖北之兵則吳已失而楚必隨之武漢爲上游之形勢荆襄爲南北之樞紐必保楚乃能謀吳此固不易之局也尤可憂者潁州亳州蒙城一帶擒匪本年三月十三日出巢擄掠河南之祥符陳留杞縣蘭儀尉氏洧川新鄭密縣禹州淮府商水襄城臨潁項城鹿邑柘城睢州汝陽正陽上蔡西平遂平確山汝州魯山寶豐南召裕州葉縣舞陽三十州縣焚掠村莊不取城池至閏三月杪飽載而歸所過之處無一兵一卒與賊接戰任其縱橫不知去向勝保奏報搪塞之

詞欺謾之狀可覆按也夫 國以民爲元氣民以財爲元氣民財既空 國計自損河南之生聚不完賊將轉顧而焚掠他省計近二年來每年春仲秋季兩次出巢大掠河南本年秋冬將及湖北之襄陽漢陽德安等府又必擾入陝西山東山西等省再一二年浸浸而及於附畿州縣矣腹心之患此爲最大臣聞賊騎近萬往來飄忽不僅袁甲三淮南之軍不能回顧北路卽勝保關保傅振邦等北路之兵當之輒靡斷難破滅此賊應請 皇上特簡知兵重臣於直隸山東地方擇地駐紮簡練馬兵萬人步兵一二萬人不爲近防而布遠勢不期速效而勤遠謀必期於一二年間將潁亳一帶賊巢一律蕩平然後江淮之後路無虞而中原之本實先固臣非僅爲襄陽漢陽等府作自保之計爲憂危之詞也臣極知所言爲越分特以臣今日言之已無救於河南臣再默而不言則五省均將受害使臣言而不中則固北路五省之福也

現籌剿辦川北巨股調集各軍分途前進情形疏

駱秉章

竊查李逆巨股現踞青神而分股竄擾眉州嘉定雅邛叙瀘各屬藍逆巨股現圍綿州而分股竄擾江油彰明綿竹安縣梓潼等縣此兩股中以李黨爲最多而藍黨爲最悍又皆分布北路難保不懷窺伺漢中之意臣自前抵順慶籌酌情形卽以先剿此股爲宜既咨商署督臣崇實請以署提臣蔣玉龍督率所部

兵勇牽制南路之賊俾臣得以專辦藍逆一股冀先將此股殲除然後鼓行而南以取破竹之勢則李逆黨羽當有望風瓦解之日臣在湖南籌軍十年雖未嘗躬歷行陣然於用兵先後緩急之序亦頗習聞其說大率賊中渠魁既踞要地則分遣黨徒到處裹脅所在擄掠而游痞奸民亦爭相趨附以圖快其意慾故股易分而衆亦易聚官兵卽能分剿剪除一股殲斃數千然所殺者大都新附之衆於賊勢初無所損隨時嘯聚不旬日又復累萬盈千故賊中有殺我一百祇須一刻殺我一千祇要一天之謠剿辦之要惟先攻其首逆搗其老巢苟巨魁被剿以難支則餘黨不攻而自破故臣近於各處警報皆有所不暇兼顧而惟以逕搗綿州爲事匪惟兵力太單不敷分剿亦先後緩急之勢所宜然也現據探報及署綿州唐炯蠟丸密稟稱藍逆精銳悉萃於綿州南門外之東嶽廟塔子山榜山等處營壘密布而西門外之西山觀北門外之龜山桑林壩東門外之雲屏山賊壘參差周遭環繞臣與署督臣崇實往返函商會調湘果營總兵胡中和何勝必蕭慶高等所部六千餘人與臣部果毅營護軍營分三路攻其南而檄遊擊唐友耕州判顏佐才等擊其西其東路則擬檄候選道張由庚率新募之勇九百餘人糾合團勇力扼橋樓場以防該逆分竄保甯之路並飛咨福濟請飭盧又熊所部三千人力扼魏城驛以遏分竄梓潼劍州之路其北路擬會檄候補知府宣維禮都司姚懷玉及團紳溫崇貴姜蓋臣張坦等督率團練使扼中壩場安縣

略坪各路據險設伏狙擊鵬剿臣亦即日進駐潼川就近調度冀收合圍聚殲之功雖賊勢數倍於我衆寡懸殊倘仗 皇上天威諸路如算則網羅密布該逆宜無倖脫之理至由川入陝之路一由廣元以趨甯羌劍閣棧道夙稱天險現有福濟率師扼截萬無可虞一由龍安以趨甘肅之階文亦可旁竄漢中蓋卽鄧艾入蜀所稱陰平小道路尤奇險數百里寂無人烟一夫當關卽難竄越臣已檄飭龍安府知府徐清飭團嚴防並令移知文縣階州一律警備但能稍加防範自可不致疎虞而臣現督師直搗老巢卽使鋌而走險度亦易於追躡竄陝一節暫可無勞 聖慮崇實屢函催臣赴省商辦裁汰冗兵寬籌軍餉之法實屬蜀中要務而臣以果毅營新失統將湘果營亦無統領之人誠慮諸將心力不齊致失事機之會不得不躬自調度冀其稍有遵循容俟布置既定然後趨赴省城共籌長策

奏爲生擒逆首並剿滅髮逆巨股疏

駱秉章

伏查僞翼王石達開在粵逆起事首惡中最爲狡悍善戰其蓄謀窺蜀匪伊朝夕自上年正月間由湖北利川突入川境卽欲徑渡大江肆其紛擾經臣調兵節節扼剿該逆沿江上下迄不得逞乃自長甯敗走敘永綦江遁入黔境復由敘南來犯蠡屯於橫江雙龍捧印等場綿亘數百里銳意渡金沙江以圖侵軼腹地經臣分撥諸軍面面兜剿挫其兇鋒該逆兩次犯蜀皆爲重兵堵截不能展其馳騁旋復退入滇境

而譎謀未息以中旗賴裕新一股先自甯遠冒險內竄以僞宰輔李幅猷一股仍由黔境下趨以圖牽綴大兵而自率大隊由滇之米糧壩踵境渡金江臣撫湘十年屢因石逆用兵稔其不憚險遠最善伺隙乘虛此次中旗敗匪足不停趾晝夜狂奔預料石逆在後必謂我軍皆已跟追中旗一股不暇回顧乘勢急進使我驟不及防臣揣度既審自當以嚴扼險隘毋使闖入查大渡河爲西南巨壑發源天全土司境內流經魚通之瓦斯溝與瀘水匯流冷邊沈邊至清溪以下復入夷地不惟自越嶲冕甯大小兩路必經之安慶壩以至萬工汛沿岸二百餘里渡口十三處皆應嚴防而上游之瀘定橋以至化林坪下之灣東皆可越松林小河由此徑渡以旁入天全石逆兇狡多謀一處疏漏卽不足以制其死命臣當卽一面飛飭署雅州府知府蔡步鐘就近選募熟悉地利勁勇並調阜和營及木坪松林漢土各兵一面由溫邛抽調重慶鎮唐友耕一軍先行馳防安慶壩以至萬工汛大小兩路渡口札飭松林地土千戶王應元督帶頭目土兵以扼松林小河防其旁竄化林坪瀘定橋一帶仍慮土司兵單復調雲南提督胡中和所部湘果左軍分布化林坪以至瓦斯溝以爲聲援並檄護阜和協謝國泰督本標兵馳赴磨西面猛虎崗以防竄打箭鑪之路比時中旗殘匪遠遁陝境臣急調總兵蕭慶高何勝必湘果中右兩軍兼程馳赴雅郡榮經以爲後勁而防奔逸並札飭邛部土司嶺承恩帶領夷兵將越嶲大路各隘紮斷逼賊使入夷地小徑卽

從後包抄以絕回竄酌賞嶺承恩王應元土夷各兵銀物以昭激勸而資得力面面張羅層層設守乃三月二十五日唐友耕蔡步鐘等馳至河邊布置甫定而石逆果擁衆三四萬人繞越冕甯知越舊大路有漢夷各兵扼截遂由小路於二十七日逕奔土千戶王應元所轄之紫打地是夜松林小河及大渡河水陡漲數丈勢難徒涉賊衆搭蓋蔑棚屯聚一面趕造船筏三十日申刻賊千餘人至河邊窺渡被我兵施放鎗砲轟斃數十人賊遂退連日隔河游弈意在疲我兵力四月初四日賊出隊四五千擁至河邊拖有木船竹筏數十隻每隻皆有悍賊數十人用擋牌護身拚命搶渡棚內衆賊皆出助勢隔岸呼譟聲震山谷我軍排列河岸屹立不動以鎗砲連環轟擊立斃執旂紅衣賊目數名竝將賊筏火藥引燃同時炸裂賊衆紛紛落水間有數筏飄至下游亦被我兵沿流擊沈搶渡之賊無一生還隔岸之賊遂皆懾退是夜亥刻逆匪數百人執持火把沿河探路復被我兵隔岸轟斃者不少賊知大河難渡遂銳意圖撲松林小河以冀由瀘定橋直趨天全迭經土千戶王應元扼河力戰前後共斃賊數千人甯越營都司慶吉委員王樽等及土司嶺承恩復帶夷兵於初七日由後路抄至新場一帶節節攻逼十二日乘夜刼取馬鞍山賊營逆匪猝不及防夷兵從上壓下殺斃賊匪數百名遂將馬鞍山佔踞絕賊糧道逐日鵬剿狙擊斃賊無算十三日逆匪數百人在下坝子窺探經蔡步鐘派撥弁兵與土游擊包良潤由蘇村過河殺斃百餘

名餘匪四散我兵收隊過河從此逆勢日蹙糧以漸竭石逆乃以箭縛書隔河射投千戶王應元啗之以利欲使讓路王應元誓以死拒該逆復以利誘土司嶺承恩欲使緩攻而嶺承恩攻之益急石逆自知陷入絕地憤極思逞於十七日三更時盡斬嚮導二百餘人祭旗傾巢而出分股一撲大河一撲松林小河皆被唐友耕蔡步鐘及王應元隔岸鎗礮轟擊兼以水勢湍急登筏者悉皆沈溺對岸之賊亦紛紛倒地該逆智窮力竭困伏賊巢殺馬而食繼以桑葉充饑咀嚼殆盡二十三日辰刻瞥見賊二百餘人徑至河岸自棄器械口稱投誠唐友耕蔡步鐘察其形跡可疑督令開放鎗礮石逆親擁大眾由水陸分撲船筏二十餘隻被水飄沒五隻其餘悉被擊沈對岸之賊攀援崖磴魚貫猱陞我軍用火彈火箭拋射並以鎗礮轟擊維時都司謝國泰已至松林地遂與千總陳太平土千戶王應元督率土兵渡過松林小河越嵩營叅將楊應剛都司慶吉委員王樽顏汝霖姜由範把總史國楨練目雷顯發等亦同土司嶺承恩從馬鞍山壓下兩路齊進直撲紫打地將賊巢一律焚燬斃賊數千名山徑險仄逃竄之賊自相擁擠漢夷兵練兩面夾擊槍砲如雨夷兵復登山巔用木石滾擊賊衆墜巖落水浮屍蔽流而下者以萬餘計石逆僅率餘黨七八千人奔至老鴉漩復爲夷兵所阻輜重盡失進退無路其妻妾五人抱持幼子二人攜手投河其曾受僞職老賊自溺者亦復不少臣前以石逆或傳其死倘能設法生擒辨認真確俾就顯戮庶可

以釋羣疑當經楊應剛等以該逆無路逃生於洗馬姑豎立投誠免死大旗石逆果攜其一子及僞宰輔曾仕和僞中丞黃再忠僞恩丞相韋普成等並餘黨至洗馬姑乞降楊應剛嶺承恩等於二十七日將石達開等五人羈留在營訊明新被裹脅及老弱者發給路票遣散四千餘人尙有二千餘名半係該逆五標桿賊臨陣用以衝鋒遂派文武弁兵及土司嶺承恩之弟嶺承高押至大樹堡復經唐友耕派都司唐大有等帶隊過河約會副將張福勝都司慶吉等四面駐紮彈壓於五月初一日先將石達開父子及曾仕和黃再忠韋普成押令過河唐友耕派游擊龔定國帶隊並蔡步鐘所派之知縣阮恩濤等護解起程來省臣前於四月二十八日得報後慮其餘黨殲除不盡將貽後患札飭藩司劉蓉馳往大渡河會同唐友耕等委辦善後事宜乃石達開等於初三日起解蔡步鐘等卽密派各營於初四日過河是夜以火箭爲號會合夷兵將僞官二百餘名悍賊二千餘名同時圍殺其偶有逸出者亦被夷兵沿途截殺惟遣散老病者數百人此股巨匪實已剿洗淨盡石達開父子及曾仕和黃再忠韋普成等五犯於初十日押解到省臣以石達開自寶慶敗竄粵西後傳聞異詞前曾奉 旨飭查臣亦不敢確指該逆是否尙在賊中而察其行兵詭計實與前次竄擾江西湖南湖北無異仰賴 天威現既俘獲到省自應審辦確鑿先令自瀘姑賊營逃出曾經認識石達開者辨認的確臣會同成都將軍臣崇實督飭在省司道親提該犯鞫

訊石達開自供與洪秀全等自廣西金田村起事卽封僞王及竄擾各省情形厯厯如繪皆臣所素悉語皆符合且其梟桀之氣見諸眉宇絕非尋常賊目等倫實爲石達開正身無疑本應檻送京師以彰國憲惟因道途遙遠著名巨憝未便久稽顯戮謹援陳玉成之例當卽恭請王命將石達開極刑處死僞宰輔曾仕和黃再忠韋普成據供從賊多年受有僞職亦皆押赴市曹凌遲處死其子石定忠現年五歲例應監禁俟及歲時照例辦理並將石達開原供抄錄恭呈御覽伏維石達開與洪秀全等首倡逆謀自粵西擾犯湖南湖北江西安徽竄踞金陵其間攻下名城戕害大吏不可勝計迨賊中憚其狡悍欲相屠害乃復擁衆自雄由金陵屢犯安徽江西繞竄浙江福建廣東邊境衆至數十萬圍攻湖南寶慶府城經大兵合剿敗遁廣西黨羽逃散踰伏山中蹶而復起突由兩湖直趨川境賊衆復至十餘萬乃敗入黔滇仍敢由甯遠繞道內竄其注意川疆志在必逞臣度其狡謀處處隨方布置不使少留空隙仰託皇太后皇上威福將弁兵勇暨土夷各兵用命逼使該逆陷入絕地糧盡術窮不惟全股剿滅無遺且將十餘年著名逆首生縛到省明正典刑應卽傳首被害較重各省以彰天討而快人心惟李福猷一股前由黔境下竄臣已飛調臬司劉嶽昭由敘南馳赴江津以備截剿乃此股賊匪由黔省遵義竄至綏陽正安地界適值勞崇光由川省彭水取道入黔行抵黔境之賈家寨突與賊遇田興恕奉旨來川帶

有勇丁二千名行抵綏陽聞勞崇光在賈家寨與賊相持卽星馳往援將賊擊退由正安敗遁婺川臣已知照田興恕約會劉獄昭兩面合剿至黔省苗教各匪尤難數計在在皆與川界毗連而滇省回衆情既叵測且土匪此聚彼散飄忽靡常敘南自滇粵各匪蹂躪以來遍地瘡痍臣萬不敢因石逆巨股殄滅稍涉大意雖於餉項萬分支絀之際仍須分布兵勇以防滇黔各匪現已移調胡中和仍駐敘南並俟唐友耕所部凱旋卽令馳赴江津綦江以固邊隅俾川南各屬之民藉資休息以仰副 朝廷眷顧西南黎元之至意

